



四川大學古籍整理研究所編

儒藏

史部 第四十一冊

四川大學出版社





儒藏



四川大學古籍整理研究所 編

儒藏·史部

儒林碑傳

第五冊

四川大學出版社 二〇〇五年

新學堂
PDG



儒藏

目錄

目錄

宋儒碑傳集

四（卷九八至卷一三二）

李勇先校點

吳洪澤尹波審稿

.....

一

宋儒碑傳集卷九十八

劉瑪 黃中 魯訐 劉愈 羅上達

故劉君德章墓誌銘

君諱瑪字德章姓劉氏。其上世居金陵。唐末^①五代江南之亂。舉族遷于吉州。分爲三派。一居永新之中村。劉楚公家是也。一居安福之下村。一居太和之上村。又名九洲。君之祖高。曾以來自九洲徙居安福。今爲安福人。曾祖迪。祖仕。先父良軻。皆隱居不仕。君幼敏悟。博學善屬文。尤邃於易。往往脫傳註而得經旨。時方興三舍。君在州縣學。月試常占魁選。舍法旣罷。君不喜爲偶儷之文。掉鞅舉場。輒見黜。自知力與命不諧。不復進取。會故人李君尙義負高才而仕未顯。襄漢方用兵。大帥解潛知其名。招至幕府。尙義約君同往。潛一見知其有材可用。奏辟令監襄陽府中廬陵酒稅。以試其材。將有以用之也。命未下而大帥改移。干戈尙擾。君亦罷

歸。不復出。日從余林間爲杖屨之遊。是時敵計稍窮。一二大將方勇銳。欲奮而擊之。秦檜忽自虜中竄歸。力主和^②。議權傾天下。舉朝鈐口。畏而和之。今侍讀胡公時爲樞密院編修官。上書乞斬檜。中外大悅。喜聞直言。胡公後得罪貶新州。余作送行詩。有癡兒不了官中事之句。蓋指檜也。里中有寒乞子妄意炙手權門。訐其詩于朝。仍以他事掛德章之名于牒中。德章無罪。有司文致其牘。致德章亦貶居臨江軍。當年遇赦即歸。余初得罪時。天子不忍誅。止竄居夜郎郡。凡八年而獲自便。旣歸及境。而聞訐者病浸劇。方欲遣人問無恙。未數日而訐死矣。德章迎我於郊外。握手道平生。一笑如舊。不復以清江事實懷人。謂德章真高義磊落人也。惜乎不見用以顯其所蘊。君娶邑中名族歐陽氏子。男二人。長允懷。因軍興補將仕郎。次允協。積學業進士。孫男六人。之洋。之澥。之洌。之洙。之溶。之湜。曾



儒藏

孫一人曰驥。君於乾道四年四月二十日終于家。享年七十有三。將以乾道五年十月二十七日葬于翔鸞鄉思義塘之東。前常寧令李誦以余與君雅故而知君之詳。作行狀與其孤來乞銘。不可辭也。銘曰、

嗟君平生、從我杖屨。讀書屬文、自幼敏悟。我遭讒言、莫能辯數。一時小人、蠱團蟻附。君獨不然、終始出處。日前相逢、一笑如故。鑱君大節、以寘于墓。

王庭珪撰 《盧溪文集》卷四六

端明殿學士黃公墓誌銘

公姓黃氏、諱中、字通老。其先有諱膺者、自光州固始縣入閩、始家邵武。至公間十有二世矣。公之曾大父汝臣、不仕。大父豫、假承務郎。父崇、贈金紫光祿大夫。母游氏、追封建安郡夫人。公生而穎悟端慤、少長受書、不過一再讀、退輒默然危坐竟日、問之則皆已成誦矣。未冠、從舅御史先生定夫愛其

厚重、手書爲夫人賀。踰冠入太學、會京城失守、僞楚僭位號。公即日出居于外。既而邦昌果遣學官致僞詔藥物勞問諸生。公以前出、故獨無所汙。建炎再造、丞相潛善公族祖父也。雅器重公、薦諸朝。詔補修職郎、御營使司幹辦公事。紹興五年舉進士、對策廷中、極論孝弟之意、冀以感動聖心。天子果異其言、擢置上第、名次舉首。授左文林郎、保寧軍節度推官。改宣義郎、主管南外敦宗院。代還、秦丞相檜方用事、察公意不附己、差通判建州事。罹外艱、服除、復差通判紹興府事。時公登第二十有餘年矣、轉徙外服。士友嘆其滯淹、而公處之泊如也。檜已死、公道稍開。上記公姓名、乃召以爲秘書省校書郎、兼實錄院檢討官。遷著作佐郎、兼普安恩平郡王府教授、遷司封員外郎、兼權國子司業。滿歲、爲眞。紹興二十八年、充賀金國生辰使、與賀正使、秘書少監沈介相先後。明年公還、獨言虜作



治汴宮、役夫萬計、此必欲徙居以見迫、不可不早自爲計。時約和既久、中外解弛、無復戰守之備。上聞公言、矍然曰、非但爲離宮耶。公曰、臣見其營表之目、宮寢悉備、此豈止爲離宮者。以臣度之、虜勢必南。虜南居汴、則壯士健馬不數日可至淮上。事勢已迫、惟陛下亟深圖之。上是公言、而宰相皆不悅。顧詰公曰、沈監之歸、屬耳不聞此言、公安得獨爲此。殊不以爲意。踰月、公復往扣之、且曰、即不以鄙言爲可信、請治其罪。又皆憮然莫應。而右相湯思退怒甚、至以語侵公。公不爲動、已乃除沈吏部侍郎、而徙公秘書少監以抑之。公猶以邊備爲言、不聽、則請補外。上不許、曰、黃某可謂恬退有守矣。除起居郎、賜以鞍馬、非故事也。踰月、兼權中書舍人。顯仁太后崩、百官朝臨、將避辰日。公以非經、且引唐太宗哭張公謹事爭之。已而卜殯日、適在權制釋服之外。有司議百官以吉服陪位、公又論之。

曰、唐制殯在易月之內、則曰百僚各服其服。啓殯在易月之外、則曰各服其初服。今殯雖過期、獨不得以啓殯例之而服其初服乎。且喪與其易寧戚、惟稽古定制、有以伸臣子之至情者、則幸甚。尋差同知三十年貢舉、權工部侍郎、奏御前軍器所領屬中人、其調度程品、工部軍器監有不得而聞者、非祖宗正名建官之意。請得隸屬稽考。不報。金人來賀天申節、充接伴使。故事、錫宴使者謝於庭中。至是辭以方暑、請拜宇下。公持不可、乃如故事。遂爲送伴使。還、又言聞虜日繕兵不休、且其重兵皆屯中州、宜有以待之。明年、兼侍講、又兼吏、兵部侍郎。會將有事于明堂、公請毋新幄帟、毋設四輅、以節浮費。詔從之。既而虜使復以天申來賀、方引見、遽以欽宗皇帝訃聞、且多出不遜語。諸公恇^④駭、不知所爲。至謂上不可以凶服見使者、欲俟其去乃發喪。公聞之、馳白宰相、此國家大事、臣子至痛之。

節一有失禮、謂天下後世何。且使人或問故、將何以對。於是始議行禮。公又率諸同列請對、論決策用兵事。衆莫有同者、公乃獨陳備禦方略、且曰、朝廷與仇虜通好二十餘年之間、我未嘗一日言戰、虜未嘗一日忘戰。以我歲幣、啗彼士卒、我日益削、虜日益彊。今幸天褫其魄、使先墜言以警陛下、惟陛下亟加聖心焉。蓋公自使還三年、每進對未嘗不以茲事爲言。至是上始入其說、然不數月而虜亮已擁衆渡淮矣。遷權禮部侍郎、入謝、因論淮西將士不用命、請擇大臣督諸軍。既而殿帥楊存中以御營使行、公又率同列論存中不可遣、狀甚力。虜騎至江壩、朝臣震怖、爭遣家逃匿。公獨晏然如平日。家人亦朝暮請行、公曰、天子六宮在是、吾爲從臣、獨安適耶。比虜退、唯公與左相陳魯公家在城中、衆皆慚服。於是車駕將撫師建康、而欽宗未祔廟、留守湯思退請省虞以速祔。公持不可、上納

用焉。而議者猶謂凶服不可以即戎、上曰、吾固以縞素詔中外矣。卒從公言而行。月朔、留司百官當入臨、思退復議寢其禮、公又力爭、得不罷。比作主、當瘞重、公又以初服請。右相朱倬不可、曰、徽考大行有故事矣。公曰、此前日之誤、今正當改之耳。倬因妄謂上意實然、臣子務爲恭順可也。公曰、責難於君、乃爲恭耳。虜既易主、明年復遣使來通好、議者皆曰、土地實也。君臣名也。先實後名、我之利也。公又奏曰、君臣之名既定、則實將從之、百世不易。若^⑤土地、則其得失取予非有定也、安得反謂之實而先之乎。上然之、詔公去權號。會有詔問足食足兵之計、公以量入爲出爲對、且曰、今天下財賦半入內帑、有司莫能計其盈虛、請悉以歸左藏。且引唐楊炎告德宗語曰、陛下仁聖、豈不能爲德宗之爲哉。上亦善之、然未及行也。未幾、今天子受禪登極、公始蓋嘗與聞其議、至是自以舊學老臣、且察



左右有以術數惑上聽者、首以堯、舜、禹、湯、文、武、周、孔所傳正心誠意、致知格物之說爲上、敷陳甚悉。會詔給筆札侍臣、論天下事。公既條上、且申前奏、極論內帑之弊。於是有詔、更以內藏激賞爲左藏南庫。明年、兼國子祭酒。詔以旱蝗星變、命近臣言闕政。公曰、前給筆札、群臣悉已條對、今什未一二施行。夫言非難、行之爲難。願陛下力行而已、無以多言爲也。已而有旨、自今太上皇后令皆以聖旨爲號。公以故典爭之、不得。宰相建遣王之望使虜、約和。公又論之、亦不從。俄兼給事中。明年、天申上壽、議者以欽宗服除、將復用樂。事下禮曹。公奏曰、臣事君猶子事父、禮親喪未葬不除服。春秋君弑賊不討、則雖葬不書、以明臣子之罪。況今欽宗實未葬也、而遽作樂、不亦失禮違經之甚乎。退復以白宰相、且引永祐龍輜未返時事爲比。左相湯思退曰、時已遣使奉迎、今則未也。公曰、此又誰之責

耶。右相張魏公亦曰、今乃爲親之故、不得以前日比。公曰、太上皇帝於欽宗親弟昆、且常北面事之、有君臣之義、尤恐非所安也。退具草、將復論之。詞益壯厲。尋有旨集議、而廟堂間遣禮官來偵公意。公出奏草示之、知公議正不可屈、乃寢。公在東臺不半歲、詔勅下者、問理如何、未嘗顧己徇人、小有所屈。內侍李綽、徐紳、賈竑、梁珂遷官不應法、諫官劉度坐論近習龍大淵忤旨補郡、已復罷之、公壹不書讀、繳奏以聞。左右已深忌之。會復有旨賜安穆皇后家墳寺田、而僧遂奪取殿前選鋒軍所買丁亾田以自入、軍士以爲言。事下戶部、尙書韓仲通以爲不可、而侍郎錢端禮觀望、獨奏予之。公復封上曰、今若奉行前詔、則當以官田給賜、不當取諸軍家所買。若謂丁亾得之非道、軍家不應得買、則亦當還直取田、不當遽乾沒也。疏奏、群小相與益肆媒孽。公遂以特旨罷中書舍人。馬騏上疏留

公未報而言事官尹穡希意投隙、詆公爲張公黨。騏後亦不能自堅、而公竟去國矣。明年乾道改元、公年適七十、即移文所居邵武軍、引年告老。除集英殿修撰致仕、進敷文閣待制。久之、上亦寢悟、思公言、將復用之。五年、因御講筵、顧侍臣曰、黃某老儒、今居何許。年幾何矣。筋力彊否。於是召公赴闕。公辭謝不獲、明年乃起。公以老成宿望、直道正言去國七年、至是復來、觀者如堵。入對內殿、問勞甚寵。時用事者方以權譎功利日肆欺罔、公因復以前奏正心誠意、致知格物者爲上精言之。又言、比年以來、言和者忘不共戴天之讎、固非久安之計。而言戰者徒爲無顧忌大言、又無必勝之策。必也暫與之和而亟爲之備、內修政理而外觀時變、則庶乎其可耳。上皆聽納。以爲兵部尙書兼侍讀。每當入直、上常先遣人候視、至則亟召入、坐語極從容。如是數月、月必一再見。公知無不言、其大者則

迎請欽廟梓宮、罷天申錫宴也。初、公在禮部論止作樂事、公去踰年、卒用之、然猶未設宴也。至是將錫宴、公奏申前說、且曰、三綱五常、聖人所以維持天下之要道、須臾不可無也。欽宗梓宮遠在沙漠、爲臣子者未嘗以一言及之、獨不錫宴一事僅存、如魯告朔之餼羊爾。今又廢之、則三綱五常掃地盡矣。陛下將何以責天下臣子之不盡忠孝於君親哉。已而詔遣中書舍人范成大使虜、以山陵爲請。公又奏曰、陛下聖孝及此、天下幸甚。然置欽廟梓宮而不問、則有所未盡於人心。且雖夷狄之無君、其或以是而窺我矣。上善其言而不及用。虜於是果肆嫚言、人乃服公論之正而識之早也。公又嘗奏請命有司作乾道會計錄以制國用、罷去發運使及它民間利病、邊防得失數事。公前以不得其言而被讒以去、其復來也、將有以卒行其志、而上意鄉公亦益厚。至是不能卒歲、又以言不盡用、



浩然有歸志。然猶未忍決求去也。乃陳十要道之說以獻曰。用人而不自用者。治天下之要道也。以公議進退人材者。用人之要道也。察其正直納忠。阿諛順旨者。辨君子小人之要道也。廣開言路者。防壅蔽之要道也。考核事實者。聽言之要道也。量入爲出者。理財之要道也。精選監司者。理郡邑之要道也。痛懲臧吏者。恤民之要道也。求文武之臣面陳方略者。選將帥之要道也。稽考兵籍。省財之要道也。言皆切中時病。每奏一篇。上未嘗不稱善。公遂從容乞身以歸。詞旨堅確。上不能奪。乃除顯謨閣學士。提舉江州太平興國宮。入謝且辭。上意殊眷眷。內出犀帶香茗爲賜。既歸。再疏告老。遂以龍圖閣學士致仕。淳熙元年。上意猶欲用公。以公篤老不敢召。則上手爲書。遣使詣公。訪以天下利害。朝政闕失。進職端明殿學士。且以銀絹將之。公受詔感激。拜疏以謝。略曰。朝政之闕失多矣。其尤

失者。君子在野。小人在位。政出多門。言路壅塞。廉恥道喪。貨賂公行也。天下之利害多矣。其尤害民者。官吏貪墨。賦歛煩重。財用匱竭。盜賊多有。獄訟不理。政以賄成也。臣願進君子。退小人。精選諸道。部使者以察州縣。則朝政有經。民不告病矣。公之復歸又十年。雖身安田里。老壽康寧。無復它念。然其心未嘗一日忘朝廷。間語及時事。或慷慨悲辛。不能已。聞者蓋動心焉。然尙冀公之復起。而卒有以寤上心也。七年八月庚寅。竟以疾薨于家。之正寢。先是。屬疾踰年。手草遺表。猶以山陵境土。欽廟梓宮爲言。而戒上以人主之職。不可假之左右。言尤剴切。至是上之。上聞悲悼。朝野相弔。詔以正議大夫告其第。享年八十有五。累封江夏郡開國侯。食邑千五百戶。實封百戶。娶熊氏。詹氏。又娶詹氏。封淑人。三男。源。通直郎。瀚。承務郎。浩。從政郎。六女。承議郎倪治。通直郎吳應時。宣教郎謝源明。承事

郎張鑄承事郎陳景山其婿也。第二子及第二女皆夭。孫男七人、女五人。公天性莊重、終日儼然、坐立有常處、未嘗傾側跛倚。語默有常節、未嘗戲言苟笑。它人視之若有所拘繫而不能頃刻安者、公獨泰然以終其身。雖在燕私、亦未嘗須臾變也。居家孝友篤至、夫婦相敬如賓。與人交恭而信、淡而久、苟非其義、一介不取諸人、亦不以予人。少時貧窶、炊黍或不繼、而處之甚安。至其力所可致、則亦不使親與其憂也。晚歲宦達、而自奉簡薄不改於舊。惟祭祀則致豐潔、細大必身親之。仕州縣奉法循理、敦尚風教、在朝廷守經據正、思深慮遠、不爲激訐之言、表襮之行、以矜己取名。然誠意所格、愈久而上下愈信服之。上雅敬重公、屢有大用意。而公卒不少貶以求合。上問進取、必謹對曰、先自治。問理財、必謹對曰、量入爲出。始終一說、未嘗少及功利。至於忠孝大節、敬終追遠之際、則深有所不

能忘者。蓋自始對詔策、已發其端、而痛夫欽廟梓宮之未返、則論之終身、至於垂絕之言不釋也。嗚呼悲夫。推公此心、可謂無歉於幽明、而其法戒之所存、雖與天壤相弊可也。尤恬於勢利、興廢之間、人莫見其喜慍之色。爲郡從事時、驗茶券有僞者、吏白公當受賞、公謝卻之。罷惇宗而造朝也、臨安學官與試貢士、公以朝命攝其事。時見官外猶有缺員、用事者故以嘗公。已而試事畢、公即解印去。其人曰、所攝黨缺員、盍亦自言以審之乎。公竟不顧、用事者以是惡之。在王府時、龍大淵爲內知、已親幸。它教授或與過從觴詠、公獨未嘗與之坐、朝夕見則揖而退。其後它教授多蒙其力、公獨不徙官。爲司業時、芝草生武成廟、武學官吏請以聞。公不答、則陰圖以獻。宰相召長貳而詰之曰、治世之瑞、抑而不奏、何耶。祭酒周公綰未對、公指所畫對曰、治世何用此爲。周退語人曰、黃公之言精切簡



當惜不使爲諫諍官也。六和塔成、宰相命諸達官人寫釋氏四十二章之一刻之壁間。公謝不能、請至再、終不與。其不惑異端又如此。所居官人莫敢干以私。然公初未嘗有意固拒之也。蜀士有仕于朝者、同列多靳侮之、獨感公遇己厚、然公亦未嘗有意獨厚之也。尤喜薦士、王詹事十朋、張舍人震皆公所引。張忠獻公、劉太尉錡之復用、公力爲多。然未嘗以告人、諸公或不之知也。致事里居前、後十五年、收死恤孤、振貧繼絕、蒙賴者衆、而公未嘗有自德之色。平居門無雜賓、邑里後生有來見者、躬與爲禮、如對大賓。諄諄教語、必依於孝弟忠信、未嘗以爵齒自高而有懈意惰容也。蓋公之爲人生質粹美、天下之物既無足以動於其心、其學於天下之義理又皆不待問辨而已識其大者。若其誠意躬行、則又渾然不見其勉強之意。而謙厚慤實、尤以空言爲恥。以故當世鮮克知之。然親炙而

有得焉、則未有不厭然心服者。嗚呼、所謂訥言敏行、實浮於名者、公其是與。明年將葬、嗣子源使其弟瀚^①狀公行事、屬熹以銘。熹辱公知顧甚厚、且嘗受命以識先大夫、先夫人之墓矣、不復敢辭、乃敬叙其事而銘之。公墓在邵武縣仁澤鄉慶親里居第之北、曰石歧^②。原葬以十二月初五日。其銘曰、天下國家、孰匪當務。曷爲斯本、身則其處。事物之理、指數其窮。曷其大者、維孝與忠。我觀黃公、天畀淳則。植本自躬、有大其識。儼其若思、履衡蹈從。盛德之表、見于聲容。烝烝于家、懇懇于國。敬終厚遠、靡有遺貸。根深末茂、綱舉目隨。行滿當世、言爲寶龜。出入兩朝、初終一意。酬酢佑神、表裏一致。因而不究、君子惜之。勒銘幽宮、維以質之。

朱熹撰 《晦庵先生朱文公文集》卷九一

左朝請大夫魯公魯公墓誌銘

近世有儒學起家、銳意功名之士、曰魯公如晦、官

雖不大顯於時、而姓名藉藉班列中。始予自金陵入朝、以婦家有連相好也。會完顏亮將渝盟、公曰：「詣丞相府論天下事、纒纒不止。」諸公雖知其才而不能用、常以是惜之。其後予歸廬陵、絕不相聞者累年。會公弟季欽奉使江西、予問：「如晦今何如？」季欽曰：「吾兄宦遊不遂、退居里中、無意世事矣。暨予還朝、則聞公屬疾。未幾、季欽遂以其訃來、且狀家閔行事使之銘、義不可辭。公諱譽、如晦字也。其先秀州嘉興人、徙海鹽之武原。曾祖延厚、祖惟辨、隱居不仕。父壽寧、任右奉議郎、贈右通奉大夫、生六子、各^①教以學。長詹、登第崇寧間、終樞密院檢詳諸房文字。公少尤刻苦、紹興五年與季欽同登進士第。自是魯氏子弟競勸、舉於鄉者歲增多。公初調建康府溧水縣主簿、帥葉公夢得材之、命行江寧縣事、百里以治。葉公儒先吏師、與公論文計事、率至夜分、其親厚如此。俄丁外艱、服除、爲淮西江東

總領所幹辦公事、分司池陽。邊烽初息、軍費冗濫、公檢柅其姦、歲省不貲。魏公良臣出守、一見歡若平生、遂通婚姻。用薦者陞左從政郎、徙淮西茶鹽司幹辦公事。兩淮惟置漕臣、刑獄常平、茶鹽事悉隸焉。諸司有疑事、輒屬公區處、無不中理。舒州五邑爭承、久不決、公爲決之。改左宣教郎、充通州州學教授、主管台州崇道觀。起爲淮西安撫司主管機宜文字。帥劉綱鳩民兵十餘萬、將校數百、聲震北方。公贊助爲多。綱卒、衆將亂、公訓曉撫循、一軍帖帖。敵焚樵場、邊民洶懼、公鎮之以靜、人爲按堵。入主管官誥院。完顏亮旣斃、太上視師江潯、詔公從行、兼領進奏院、文書填委、整暇若平時。上即位、遷大理丞、治獄明恕、爲時所稱。公三仕於淮、雅知南北形勢、兵將勇怯、至是輪對、爲上極言之、且請擇大將以重兵屯形勝地、無事則力不分、有事以逸待勞、此上策也。上深以爲然。兼戶部右曹郎官、



民有詣御史府訴婚田者輒請付公皆得其情。上方樂聞忠言、詔侍從臺諫各率其屬條具弊事。公言風俗未正、紀綱未立、賞罰未當、語甚切至。頃之請治郡、得池州。隆興二年、金再窺邊、趣公赴鎮。淮人日夜南渡、公竭力招集、至者如歸。軍士有得信箭、刻虜書云云者。公笑曰、此姦人規搖衆爾。不爲動、闔境晏然。先是諸郡調丁壯防江、擾甚。金師退、公以便宜散遣、朝廷咨美、仍詔他郡如之。清溪出城南、水潦泛溢、人病於涉。唐會昌中刺史李景業始作大堤於南、續長橋於北、揭名通遠、往來便之。歲久浸壞、公命增築新堤、自城屬齊山延袤數里、翼以嘉木、灑水爲三道、橋跨其上、別揭新名、迄今以爲利。乾道元年、江浙大饑、上焦勞甚、遣使旁午。會九華、綿山竹生實、饑民就食、日千數。公思有以寬上心、具以聞、而言者指爲導諛、非本意也。坐罷郡。士民懷公惠政、爭挽留不置。尋復主管崇道觀。

起知眞州。已而歎曰、吾志大而命不副、歸與以佚吾老。初、公築通隱、詩人何卿麒、洪翰林邁、王端尹、十朋、王司寇、拒皆賦五言以美之。至是改曰遂隱、自爲之賦。客至輒歌呼飲酒、間以琴弈酣適竟日。素喜釋氏書、晚自謂有所悟、哀樂得喪泊如也。七年十一月六日、以疾卒於正寢、享年七十有六。積官左朝請大夫致仕。娶陸氏、封宜人、前卒。四子、可簡、左承議郎、通判舒州。可適、右迪功郎、嚴州司戶參軍、贈右承奉郎。皆力學工辭章。前卒。可輔亦早世。可復、右迪功郎、廣德軍廣德縣主簿、濟美垂裕。庶其在此。二女、適左奉議郎、樞密院編修官孫雄飛、右儒林郎、監行在點檢贍軍激賞酒庫所羅場。魏仲恭、孫男九人、珏、玠、羽、茲、所、開、弼、翼、翬。女二人、適右承事郎周準、右迪功郎蔡興文。曾孫男三人、之茂、之柔、之純。女四人。明年三月壬申、葬於湖州歸安縣至孝鄉仙嶺、與宜人同兆。公性樂易、事父

母友兄弟根於誠、處朋友姻戚間皆得其歡心、家範整整、子孫率勸飭雍睦。尤喜周恤親族、鄉黨義之。天性嗜書、少老如一、所論著要以名家者爲師法、有文集三十卷、漢紀考異十一卷、集皇朝要覽一百卷、又嘗進江淮表裏圖、上邊防十二事、蓋將考古驗今、自見於功名。惜乎弗遂也、哀而系之以銘曰、

人患無志、不患無位。人患不久生、功不患不成。嗟吾如晦、由郎而守、仕非不偶。踰七望八、年非不壽。然而志竟鬱於初、功弗究其圖。已乎已乎、其亦命矣夫。

周必大撰 《省齋文稿》卷三二

劉進之行狀

紹興二十七年、故侍郎張公九成知溫州、初下屬部、惇禮賢者、以美風俗。郡長老上枏谿里人劉君鄉行、張公以書致酒饋曰、公孝于親、悌于長、孝義

聞于鄉里、敬致州郡禮焉。旣而力延請君正州學。初、君以風誼爲鄉閭信服、雖強悍小人素難與言者、于君無不敬愛。里有爭競、輒就平處、或爲不善于室、率自警曰、劉學正得無知之乎。同郡賈司理如規與君俱以善稱、一鄉人士諺曰、適樂成不見賈元範、枏谿不見劉進之、是浮洞庭而不嘗橘之食也。其見重于時如此。君諱愈、字進之、幼穎悟、篤志于學、試郡三舍、婁入優等、荐丁艱棘、不克薦。四十棄場屋、遊志于浮圖氏學、號無相居士。其先世友愛、至君兄弟益雍睦、三世同居、無一言之間。君問不及生計、弟某亦任之不疑、視兄弟子若己子。然皆終始如一。日。家豪于貲、未嘗以訟至官府、或加之無禮、往往笑不與校。君爲人方整、至誠出于天性、不妄言笑、終日危坐、凜如也。盛暑不解衣帶、接物溫粹、見者必肅。嚮人無纖芥之僞、而莫敢欺以不情。聞人之善、喜見辭色、常稱引以訓子弟。見



稱人之惡者、謝曰、幸毋及此。知識有過、時時面爲告導、退不以語人。嘗止僧舍、有竊君卧具而得者、君曰、是非吾物。即以予之。善與人交、少所與遊、皆知名士。賑其貧者、至爲解衣傾困。蓋不一再、然常不待其有請、後多賴以卒業、爲世顯人。客來無貴賤、掇蹙見之、無倦色。有求無不遂其所欲。或以無擇爲訾、君曰、吾以掇窮而已。其門故多貧士、至者相踵。君未始以有亡爲辭。其飲食之不事豐腆、資之亦不過厚。所濟甚博。其施得以有常。行道雖飢、不先僮奴而飯。當食而見餓夫、常推食命之食。輕于財、篤于義、憂人之憂、不啻于己。鄉里利害、必以身爲倡始、力興除之。臨事有立、摧撓百端、不爲沮。鄉人之喪、貧而不能舉者、每斂以棺而葬以地。且資金粟以佐其費。歉歲爲糜待餓者、率以爲常。稱貸必先最貧下者。或謂君將無所取償、君曰、能償者人已與之、吾獨不忍此爲溝中之殍耳。焚券已

責不少靳。己巳秋旱、明春大饑、君博謀賑贍之。其家山樵采不禁、恣民伐薪鬻之以自給。擇地不毛、道嶮巖者、買庸鋤治。又身請貸于州、詣州教授、丐爲先容、教授爲君具食。君不下筯曰、鄉人餓且死、尙忍安食于此邪。在坐客竦然起。從君見州將、州將慮民逋負、難其請。君即乞以家砧基簿爲質、得米三百斛、歸與並鄉大家分計、近居之下戶給之。貧者咸賴以活。其秋、君獨不收前貸、代出私廩還官。甲申春、不雨者三月、大無麥苗、農田不復播種。方仍歲困颶風、因之以饑疫、貧民挑蕨根舂糝充腹、或盡室脹死去、而操觚以乞者載路。時守倅俱闕、莫有任賑民事者。君合鄉民雩祭吁嗟、至于感泣。因詣匭論奏、請發常平倉米以紓民急。仍降祠部度牒畀郡、轉糴它道。以故端明張公闡鄉典之舊、詒書約爲己助。上爲惻然聽許、無一不如所乞。會郡太守袁公孚奉宣詔旨、司戶劉公朔寔左右

之君與鄉人徐讜求賑救之方、得趙清獻公救菑記以獻、袁公榜于座右、視以爲法、爲是生者得食、病者得藥、死者得藏、孩提之委棄者得以長養、君之居里亦緣君得官米以給、全活無慮千萬計、其端皆自君啓之、初中谿有石障流、號石斷、自谿濱潮民之架木爲柁、鄢水以捕魚者幾二十處、舟行多覆溺患、君與同閭陳常顧民聚石、更石斷水道、白縣撤柁去之、谿流遂安、君既功存鄉人、鄉人莫不倚君爲命、士夫之賢、聞君名者以未及識面爲恨、享年七十有一、以乾道二年七月一日卒、屬纊精爽不亂、自爲韻語二十四字、仍遺書戒子孫以儉約、近鄉居人識與不識、無不嗟涕、至有爲佛事資冥福者、有詩詞雜著一編、藏于家、先夫人周氏蚤世、後夫人韓氏、生子七人、士直、某某、士享、先君卒、君雖布衣、常有經濟大志、讀書講論、事緒紛還、不暫休、聞國有難、戚然憂形于色、方臘起、妖人呂

師囊趣和之反黃巖、陷樂清、犯柘谿、抵菰田管界、巡檢陳莘以郡兵三百人拒之、居人惴恐、多逃去、君始壯歲、奮不顧曰、寇至則吾鄉無噍類、忍相隨爲身地邪、因自贊從討賊、賊軍依山壅水爲固、陳徑進有輕賊心、君曰、賊營憑據巖險、官兵素不習、利誘致平地、乃可擊耳、陳不能用、君辭不行、官軍半渡谿、賊決積水灌而下、官軍大敗、陳與鄉豪李徽及其弟充死焉、君以二李公贈卹不加、爲之傳以表見于世、甲戌歲比不登、諸鄉艱食、姦人謹起、託借糧爲辭、警劫鄉疇、稠樹村黨最悍、水陸爲不通、郡遣邑尉圖之、尉止中道不敢進、欲起鄉兵討捕、君曰、人心方搖、當填以靜、臨以白刃、必將激而爲亂矣、單馬至渡潭酒坊、呼酋首二三人命坐、諭以禍福、皆幡然感動、即日罷歸、它黨亦聞風而定、郡鹽課積增、至己巳歲、歲七十四萬八千五百斤、有司艱于趣辦、輒賦于民、寸產之家無免者、按月



征斂吏緣爲姦類略豪強而增敷細民係縲于官無虛日因以破家者不可計君遣士直偕鄉人王大充訴于監司臺省得免增敷數萬斤猶以未足寬民遣甥盧緯偕士直復言戶部請蠲歲課之半時司邦計者聚斂方急甥子久客困沮而歸君又遣之始末六年費損家貲鉅億計沮撓非一君巍然無倦雖一餉頃常疚懷最後州人龍圖閣學士何公溥貴于朝爲主張是減年額二十五萬二百斤盡罷下戶科抑而上戶所出亦輕衆始笑君之迂旣乃喜其幹而能立今皇帝即阼詔書求直言君以今方邊興取守方略要有人言之至如內治所不可緩著書曰內治詳覽以進陳自治之策在清其源凡十數條皆切治道奏下三省看詳不報君曰臣言雖微有補聖治顧主上未深察耳復因郡置錄進後朝廷施行數事大略與君論合世之好議論人者妄意君之自奉簡素急于利物晚喜

讀西方書不愛金錢佐營塔廟謂修福田利益不知君之才器誠有大過人者不爲世用故不難施予放意物外以自適所爲數事雖得時聞人有不能辦而君居黨里處之裕如用行誼信重于州閭間非一日之積也士直等卜以歲二月某日葬君于某鄉某山之原將葬錄君行實屬某狀其平生某少從君遊知君爲悉是固朋友之職無所復辭爲次比以待立言君子爲之銘言雖不文亦將託君之名以傳不朽云爾

薛季宣代人撰 《良齋先生薛常州浪語集》卷二四

羅元通墓誌銘

元通姓羅氏諱上達廬陵人其先以五季之亂自豫章徙也曾祖駢祖仇皆不仕父紉字天文以儒先文師伏一州嘗貢至春官不第以仲子左奉議郎安仁縣知縣上行追秩右承事郎元通天文長子元通以詩學名家授徒數十百人自三舍盛時

有聲庠序如澹菴先生胡侍讀諸公皆其與游也。蓋一時同研席者光顯矣而元通猶在場屋。至紹興癸酉元通年五十有八始與其子維藩同薦名。又三年元通再薦名。又三年其子維藩維申維翰俱薦名。又十年維藩維翰同登進士第吉語至而元通之死旬時矣。元通事天文至孝。天文貧而好客每客至置醴踐豆客主必盡歡。客既去天文視元通一寒不可忍蓋以衣爲食也。元通卒不自言。天文嘗以非罪繫吏吏誅貨不厭將當以重劾。元通徧走婚友稱子本以脫天文於罟獲中。元通年踰三十未有子。天文曰吾兒孝而無子無天則已。建炎之亂里中盜有號李賊者執元通欲必殺摩頸將揮刀矣而其徒有念元通恩紀者免之。未幾賊敗有縛李賊來獻者請甘心元通一笑而釋之。元通性慷慨以義自任如廩給族兄之老貧者曰子正曰忱叔救焚築室以居其族者曰德凝收其

故人子之貧且失學而教育之者曰左龍卿葬其親戚之不能葬者曰李懷忠李晞祖之母羸糧以送致里人之孥者曰劉生蓋不可勝紀也。元通年七十有四以其年某月某日卒。初配李氏士族平國女也。繼室李氏靖州通判章之妹也。繼室之李名爲羅氏之孝婦三子二女皆其所生。長女適彭臯次適丁南隱。孫男四人。解璽浩沂。孫女三人。元通卒之明年將以某月某日葬于某所。其孤維藩以書抵予曰子於先人至親也非子莫之宜銘。乃銘曰

學周于身孝周于親義周于人元通之伸才不于職謀不于國有挾不白元通之抑不昌其己以昌其子元通之傷元通之喜

楊萬里撰 《誠齋集》卷一二六

校記

①末：原作「宋」，據四庫本《盧溪文集》改。

②和：原無，據右引補。

③辭：原作「亂」，據右引改。

④恆：原作「惟」，據宋浙江刊本《晦庵先生文集》改。

⑤若：原作「者」，據右引改。

⑥曰：原作「力」，據右引改。

⑦庚寅：原缺，據宋淳熙刊本《晦庵先生朱文公文集》補。

⑧三：原作「二」，據右引改。

⑨瀚：原作「翰」，據右引改。

⑩慶親、石歧：原缺，據右引補。

⑪辨：明祁氏澹生堂抄本《周文忠公集》作「辯」。

⑫各：右引作「力」。

⑬其：原作「某」，據四庫本《誠齋集》改。



藏書

宋儒碑傳集卷九十九

張浚 一

少師保信軍節度使魏國公致仕贈太保

張公行狀 上

本貫漢州綿竹縣仁賢鄉武都里。曾祖文矩，故不仕，贈太師、沂國公。妣沂國夫人楊氏。祖紘，故任殿中丞，致仕，贈太師、冀國公。妣冀國夫人趙氏、王氏。父咸，故任宣德郎，贈太師、雍國公。妣秦國夫人計氏。公諱浚，字德遠，本唐宰相張九齡弟節度使九臯之後。自九臯徙家長安，生子抗，抗生仲方，仲方生孟常，孟常生克勤，克勤生縉，縉生紀，紀生璘，即公五世祖。仕僖宗時，爲國子祭酒，從幸蜀，因居成都，壽百有二十歲。長子庭堅，以蔭爲符寶郎，後不仕。符寶之子即沂公也。沂公蚤世，夫人楊氏攜三子徙綿竹，依外家，遂爲綿竹人。長子即冀公也。冀公幼慷慨有大志，不肯屑屑爲舉子業，於書無所

不通。慶曆元年，詔舉茂才異等，近臣魚公周詢以公文五十篇應詔，召試秘閣報聞。時西鄙方用兵，魚公謂公曰：「天子以西事未寧，宵旰求賢，惟恐不及，子其可在草野乎？」僕當復率賢公卿共薦論，不敢隱也。遂與程公戡以公慶曆禦戎策三十篇上。公之策大抵謂唐之所患，節鎮兵盛，今之所患，中原兵弱，邊鄙有警，無以禦敵，良由四方藩境無調習之甲兵，無親信之士卒，兵以衆合，將以位充，行陳部伍都無倫理，何異毆市人而戰？古者兵出不踰時，今五年矣，民困財匱，黠科不息，生盜賊心，後患未可量也。可不速有改更圖所以爲靖民威敵久遠之計乎？今當以陝西四路、河北三路、河東一路割兵屬將，公選其人，不拘官品，爲置文臣通曉者二人爲軍謀，而使各得自辟其屬，丁壯之目，財賦之用，悉付之，勿使中官擾其事，勿使小人分其權。而通置采訪使二員，分部八路，提其綱領，糾其



姦非。如轉運、提刑、運判、監軍可悉罷去，庶幾事權歸一，戎虜可遏而人民可蘇也。有旨下國子監詳定以聞。召試西掖。張公方平奏公論議優長，天子嘉之，授將作監主簿。實二年之冬，事載國史。程公尤器重公，及帥涇原，辟公掌機宜事。移高陽，復辟焉。改秩知雷州。時黎人擾朱崖，朝命委公自四明遣兵數百，浮海道往鎮海隅。公至，不鄙其民，撫綏安靜，寇亦旋息。除管幹都進奏院。公年踰六十，即浩然思歸，致其事。自號希白先生，築希白堂，一時賢公卿皆爲賦詩。公親教授雍公，雍公字君悅，中元豐二年進士第，歷官州縣。職事之外，覃思載籍，諸子百氏之說無不貫穿，而折衷於六經，其爲文辭奇偉條暢。元祐三年，自華州學官以近臣舉應賢良方正，能直言極諫科，奏篇爲天下第一。比閣試，乃報罷。時太皇太后垂簾，哲宗未親庶政，自宰相、百執事皆選用名彥，更張前日王安石政事之

弊，排斥異議，沮抑邊功。公念明時難遇而內有所懷，思以補報，既不得對，無路上達。宰相呂汲公大防方貴重用事，公作時議上之。大略謂：今民和時雍，守成求助，而戒飭警懼不可以忽。況大憂未艾，深患未弭，博禍未去，所謂大憂、戢兵之說也。所謂深患、差役之說也。所謂博禍、行法之說也。戢兵之說，其憂有三：有損勢耗財之憂，有沮軍擾民之憂，有滋敵玩兵之憂。差役之說，其患有三：有貧富不均之患，有州縣勞擾之患，有簿書侵撓之患。而二者之本則在朝廷。惟朝廷之上去私意，公是非，明可否，一本於大中至正，法之可行，無問於新之與舊。議之可用，無問於今之與昔。除目前之害，消冥冥之變，則所謂大憂者可轉而爲樂，所謂深患者可轉而爲安，所謂博禍者可轉而爲福。今日之治，斯可維持於永世矣。汲公不納，而識者歎公先見之明且遠云。公歸又六年，復召試，考官以公文辭

傑出、實高等。宰相章惇覽其策、不以元祐爲非、且及廟堂用私意等事、無所回互、甚不悅。數日、公往謝之、惇嘻笑曰、賢良一日之間、萬餘言、筆鋒真可畏。因授宣德郎、簽書劍南西川節度判官廳公事。人爲公不滿意、而公處之恬然。惇於是奏罷賢良方正科、而更置宏詞科。初、祖宗立制舉、招延天下英俊、俾陳時政闕失。天子虛己而聽、得士爲多。自熙寧六年用事、大臣惡人議己、始令進士御試、用策而罷制科。司馬丞相輔元祐初政、以求言爲先務、遂復置焉。至是、惇惡雍公辭直、又廢之、而立詞科。詞科之文、如表、章、贊、頌、記、序之屬、皆習爲佞諛者、以佞辭易直諫、蠹壞士心、馴致禍亂、而人不知其廢置之源、蓋在此也。公晚得異夢、若有告者曰、天命爾子名德作宰相。未幾而公生、故字之曰德遠云。公生四年而雍公沒、太夫人年二十有五、父母欲嫁之、誓而弗許。勤苦鞠育、公能言、即教誦雍

公文、能記事、即告以雍公言行、無頃刻令去左右。故公雖幼、而視必端、行必直、坐不欹、言不誑、親族鄉黨見者、皆稱爲大器。年十六入郡學、講誦不間蚤夜。同輩笑語喧譁、若弗聞者。未嘗一窺市門。教授蘇元老嘆曰、張氏盛德、乃有是子。吾觀其文、無虛浮語、致遠未可量也。甫冠、與計偕入上庠。太夫人送之、拊其背而泣曰、門戶寒苦、賴爾立。當朝夕以爾祖爾父之業爲念。凡數十條、書之策、以授公。公去親側、常若在旁、無一言一動不遵太夫人之教。京師紛華、每時節游觀、同舍皆出、公獨在。蓬州老儒有嚴賡者、時亦遊太學、見公之爲、咨嗟愛重。賡嘗學易有得、遂以乾坤之說授公。公中政和八年進士第、知樞密院鄧洵仁、蜀人也、與雍公有雅舊、謂公來見、當處以編修官。公竟不答。調山南府士曹參軍、以歸、奉版輿之官。山南大府事夥、帥重公才識、悉以委焉。公爲區處、細大各有條理。治獄



明審務盡其情。至狴犴木索沐浴食飲亦必躬泣之寒暑不廢。以故軍民歸心。訟于庭者皆願得下士曹治。其受輸盡去舊弊。使民得自執權概。人又便之。公事罷歸。即對太夫人讀書。至夜分乃寐。故同寮之賢者莫不親之。其不肖者亦往往革面憚公。不敢爲非。蒲中孫偉奇父名士也。時過府與帥飲。至夜分。帥命繼酒于公所。公謂其使曰。此爲何時。而欲發鑰取酒酣飲乎。郡人其謂何。某不敢也。復命。帥未應。奇父整冠拱手曰。公有賢屬如此。某罪人也。問公姓名志之。即登車而去。又兼權成固縣事。秩滿。郡人遮道送者以千計。畫公像持以送公者至百餘。轉運使歎曰。爲小官得人之情如此。使得志於時。又當如何耶。調褒城令。辟熙河路察訪司幹辦公事。到官徧行邊壘。覽觀山川形勢。時猶有舊戍守將。公悉召與握手飲酒。問以祖宗以來守邊舊法及軍陣方略之宜。盡得其實。故公起

自疎遠。一旦當樞筦之任。悉通知邊事本末。蓋自此也。有旨以夏人爭地界事委察訪司。命其屬往視分畫。公以十數騎直抵界上。所謂陽關者。夏人始張旗幟騎乘於谷中。意不可測。及見公開誠。遂數語而定。改秩至京師。調恭州司錄以歸。會靖康改元。尙書右丞何臬薦公。同胡寅召審察。先是。臬以中丞論事罷去。寓居鄭州。公調官歸過鄭。念臬亦蜀人。粗有時望。因見之。告以國事阽危。宜益自重。思經濟之圖。無爲淺露。臬心重公。及執政。首薦焉。公到闕。聞臬益輕儇。浸失人望。初見即以劄子規之。辭切厲。臬不悅。不復使對。止除太常寺主簿。未幾而虜至城下。公在京師。獨與開封府判官趙鼎。虞部郎中宋齊愈。校書郎胡寅爲至交。寢食行止未嘗相舍。所講論皆前輩問學之方。與所以濟時之策。時淵聖皇帝召涪陵處士譙定至京師。將處以諫職。定以言不用力辭。杜門不出。公往候見

至再三、定開關延入。公問所得於前輩者、定告公但當熟讀論語。公自是益潛心於聖人之微言。二聖出城、公以職事在南薰門、有燕人姓韓者仕虜爲要官、往來南薰、稔識公面。一日、謂公曰、大人輩虜人呼貴酋爲大人、以京城之人不肯盡出金帛、翌日當洗城。指城一角曰、至時吾立大皂旗于此、爾來立旗下、庶可免。公笑謂之曰、公宜爲大人輩言、京師之人若盡死、金帛誰從而得乎。姓韓人喜、若有得色。他日復值之、謂公曰、比日以爾言說諸大人、已罷洗城之議矣。此事世莫知也。逆臣張邦昌乘時窺僭、公逃太學中、聞光堯壽聖太上皇帝即位、南京星夜馳赴。至即除樞密院編修官、改虞部員外郎。會上以初履寶位、登壇告天、公攝太常少卿導引。上見公進止雍容靜重、心重之、即欲大用。詰朝以語宰執、時中書侍郎黃潛善嘗在興元、知公治績、因稱述焉。上簡記他日除公殿中侍御史。先是

宰相李綱以私意論諫議大夫宋齊愈、腰斬。公與齊愈素善、知齊愈死非其罪、謂上初立、綱以私意殺侍從、典刑不當、有傷新政、恐失人心。既入臺、首論綱罷之。駕幸東南、道途倉卒、後軍統制韓世忠所部軍人劫掠作過、逼逐左正言盧臣中墜水死。公以雖在艱難、擾攘中、豈可廢法如此、即奏劾世忠擅離軍伍、致使師行無紀、士卒散逸爲變、乞正其罰。有旨從贖。公重論奏、及乞追捕散逸爲變者。上爲奪世忠觀察使、上下始肅然。知有國法。至維揚、即勸上無忘二帝北狩、常念中原、汲汲然修德去弊、以振紀綱。每奏事、上未嘗不從容再三問勞、泛及爲治之方、輒至日昃。公所論專自人主之身、以及近習、內侍、戚里、以爲正天下之本在此。乃奏崇觀以來、濫授官資、乞盡釐正。戚里邢煥、孟忠厚不當居侍從、宜換右職。駙馬潘正夫不待扈從、先來維揚、請治其罪。內侍李致道誤國爲深、不當引



赦叙復。尙書董耘獨以藩邸恩資緣通顯、宜即退閑、皆蒙采納。時以藩邸舊宮錫號升賜、至維揚、內侍占官寺爲之。公奏、方時艱難、行幸所至、豈宜爲此以重失人心。此必從行官吏欲假威福、妄興事端、借御前之號爲奉己之私耳。乞行罷止。上從之。遷侍御史、賜五品服。公感上知眷、益思效忠。時車駕久駐維揚、人物繁聚而朝廷無一定規摹、上下頗缺望。公奏、近日軍民論議紛然、彼得藉口爲說者、蓋二帝遠在沙漠而陛下乃與六宮端居于此、何怪人之竊議。願明降睿旨、以車駕不爲久住維揚之計曉諭軍民、仍乞朝廷早措置六宮定居之地、然後陛下以一身巡幸四方、規恢遠圖、上以慰九廟之心、下以副軍民之望。他日奏事、上謂公曰、朕於直言容受不諱、近有河北武臣上書、不知朝廷事體、詆毀朕躬、亦不加罪。公請以所得聖語布告中外、激勸言者、庶幾有補於國、上嘉納焉。又奏、

中原天下之根本也。朝廷中原之根本也。本之不搖、事乃可定。願降詔旨、勅東京留守司略葺大內及關^③、陝、襄、鄧等處、常切準備車駕巡幸、及以今來行在所止不爲久居之計、庶幾內外和悅、各思奮勵以圖報國。宰相浸不悅。又論御營使司屬猥衆、俸給獨厚、資格超越而未嘗舉其職、乞行沙汰、使僥倖者無以得志、法行自近、軍氣必振。又論無謂虜不能來、當汲汲修備治軍、常若寇至、遂大拂黃潛善等意。公以孀母在遠、乞外補、除集英殿修撰、知興元府。公已登舟、候朝辭、有旨除禮部侍郎、日下供職。召對便殿、上慰勞宣諭曰、卿在臺中知無不言、言無不盡、朕將有爲、政如欲一飛冲天而無羽翼者。卿爲朕留、當專任用張慤及卿。公頓首泣謝、不敢言去。慤時爲中書侍郎、未幾而卒。上一日復謂公曰、郭三益可與卿共事。未幾而三益亦卒。公念虜騎必至、而廟堂晏然、殊不爲備、率同列力

爲宰相言之。潛善及汪伯彥笑且不信。公常以疾在告。獨上眷遇益深。除公御營參贊軍事。撥魯珏、楊周等所部兵。令同呂頤浩教習所謂長兵者。公親往點閱。籍其鄉貫。年齒與所習藝能。復被旨同頤浩於江淮措置。未幾。虜騎自天長逼近郊。公從駕渡江。至平江。朝議東幸。詔朱勝非留吳門禦賊。問誰當佐勝非。左右莫應。公獨慷慨願留。遂以本職同節制平江府、常、秀州、江陰軍軍馬。車駕遂東。時建炎三年二月八日也。公行平江四境。規度可控扼。虜所來道。決水溉田爲限。立烽堠。召土豪與議。時禁衛班直及諸軍潰歸。無慮數萬衆。乏食。所至焚劫。一夕。知府事湯東野蒼黃見公曰。城四外焚廬舍。火光並起。柰何。公笑曰。此必潰軍之歸。正當招集。問府藏銀絹有幾。即白。勝非便宜出黃榜及旗于門。以聖旨招集。支賜銀絹各若干。令結甲而入。且令市人廣造食物以俟。頃之。潰兵皆以次

入。既得賜。又市食。無敢譁者。明日。令依所結甲出盤門。赴行在所。違者斬。如是數日不絕。而公舊所教習長兵至者亦近三千人。二十日。朱勝非召赴行在。公獨節制。三月八日。東野忽復遽告公。聞有赦至。公慮時方艱難。事變莫測。命東野先遣親信官馳至前路。發封以告。少頃。東野馳來曰。事變矣。乃明受赦也。袖以示公。時府中軍民已知有赦。公謂東野令登譙門。宣有旨。犒設諸軍一次。內外乃定。九日。有自杭持苗傅、劉正彥檄文來者。公慟哭。念王室禍變如此。戴天履地。大義所存。雖平江兵少力單。而逆順勢殊。豈復強弱利害之足較。便當唱率忠義。舉師復辟。誅討叛賊。以濟艱難。雖孀母在遠。身無嗣繼。而義有所不可已也。亟召東野及提點刑獄趙哲至。喻之。且激以忠義。二人感激願助。因秘其事。夜召哲以防江爲名。盡調浙西弓兵。令東野密治財計。十日。得省劄。召公赴行在。時承



宣使張俊領萬人自中塗還。公遣問之。乃云傳等勅俊交割所總人馬。赴秦鳳路總管任。公念上遇俊厚。而俊純實。可謀大事。急使東野啓城撫諭諸軍。俊立詣公所。公獨留俊。握手語曰。太尉知皇帝遜位之由否。此蓋傳正彥欲危社稷。語未終。泣下交頤。俊亦大哭曰。有辛永宗者。來自杭。備爲俊言。適徧喻將校輩。且當詣張侍郎求決。侍郎忠孝。必有處置。公慮俊意未確。復再三感動之。俊曰。只在侍郎。若官家別有它虞。何所容身。公應曰。某處置已定。當即日起兵問罪。俊大喜。且拜曰。更須侍郎濟以機權。莫令驚動官家。公給俊軍衣糧并及其家。皆大悅。公召辛永宗問傳正彥所與謀爲誰。曰。歸朝官王鈞甫。馬柔吉。舊聞侍郎嘗識鈞甫等。請以書先離間之。是夜。公發書約呂頤浩。劉光世兵來會。時頤浩節制建業。光世領兵鎮江。公慮書不達。復遣人賫蠟丸從間道往。公已再被赴行在之

命。知爲傳等姦謀。而兵未集。未欲誦言。戒東野。哲各密奏。虜未退。斬賽數萬衆。窺平江。若張某朝就道。恐夕敗事。公亦奏。張俊驟回。平江人情震聳。臣不少留。恐生事。因命俊遣精兵二千扼吳江。而奏曰。俊兵在平江者多。臣故分屯。以殺其勢。蓋懼傳正彥覺勤王之謀。先出不意。遣兵直搗平江故也。十一日。附遞發奏。臣伏覩三月五日睿聖皇帝親筆。朕即位以來。強敵侵凌。遠至淮甸。其意專以朕躬爲言。朕恐其興兵不已。枉害生靈。畏天順人。退避大位。臣伏讀再四。不覺涕泣。臣竊以國家禍難至此。皆臣等不能悉心圖事。補報朝廷。致使土地侵削。人民困苦。上負睿聖之恩。下失天下之望。今睿聖皇帝以不忍生靈之故。避位求和。臣獨有一說。不敢不具陳其詳。臣竊以當今外難未寧。內寇竊起。正人主憂勞自任。馬上求治之時。恐太母以柔靜之身。皇帝以冲幼之質。端居深處。責任臣寮。

萬一強敵侵凌、不肯悔禍、則二百年宗廟社稷之基拱手而遂亡矣。臣愚不避萬死、伏願太母陛下、皇帝陛下特軫宸慮、祈請睿聖念祖宗付託之重、思二帝屬望之勤、不憚勤勞、親總要務、據形勢之地、永自治之計、抑去微名、用柔敵國、然後太母陛下、皇帝陛下監國于中、撫靖江左、如此則國家大計自爲得之。如以臣言爲然、乞行下有司、令率文武百寮祈請施行。貼黃、臣契勘、伏睹睿聖皇帝方春秋鼎盛、而遽爾退避大位、恐天下四方聞之、無疑惑、萬一別生它虞、更乞睿斷、詳酌施行。并具因依申尙書省、伏望朝廷率文武百官力賜祈請、及具咨目報苗傅、劉正彥、某久病無聊、日思趨赴行在、緣斬賽人馬過平江、平江之人各不安居、守貳日夕相守、不容出城。朝夕事畢、即便登途。邇者睿聖皇帝以不忍生靈塗炭之故、避位求和、足見聖心仁愛之誠。然當此多難、人主馬上圖治之時、

若睿聖謙冲退避、上無以副宗廟之寄、次無以慰父兄之望、下無以厭四海之心。某曩備員言官日、竊見睿聖皇帝聰明英斷、意欲有爲、止緣小大臣寮誤國至此。某叨竊侍從、蓋亦誤國之人、乃至過江、事出倉卒。向使將相有人、睿聖豈肯輕發。今太母垂簾、皇帝嗣位、而睿聖乃退避別宮、若不力請、俾聖意必回、與太母分憂同患、共濟艱難、中興之業^⑤未易可圖。二公苟不身任此事、人其謂何。當念祖宗二百年涵養之舊、今所恃以存亡、惟睿聖皇帝。況皇帝天資仁厚、從諫如流、願勉爲之、再三懇請、睿聖宜無不允也。又與柔吉、鈞甫書曰、此事當責在二公。是日、公再被促赴行在之命。有進士馮輻者、後更名康國、與公爲太學之舊、來平江相從。公察輻慷慨氣義人也、夜四鼓呼輻具道所以、且云、已具奏及移書、今若得一人往面悉此意、大善。輻激厲請行、詰朝即就道。是日、再以書促頤浩、光世報



所處分次序。十三日、以所奏檢報諸路、復督頤浩、光世速選精銳來會平江、而張俊再被赴秦州指揮、且命陳思恭總其兵。思恭知逆順、信用公言、奏不敢交俊兵。十四日、公被命除禮部尙書、將帶人馬疾速赴行在。公復奏不可離平江狀。十五日、傅正彥遣俱重賫詔書撫諭、且來吳江代張俊。公召重至平江、重初桀驁、以秘計恐之、重逃避。既而公得請兼領俊兵。有報韓世忠海船到常熟岸者、俊喜曰、世忠來、事辦矣。即白公。公以書招之、世忠得書號慟。十八日、見公于平江、相對慟哭。世忠曰、某願與張俊身任之。偶甄援自杭來、詭稱睿聖面令促諸軍。公使徧諭俊、世忠及至鎮江、喻光世及部曲等衆、皆號慟。十九日、馮轡至自杭、傅正彥答公書皆不情語。柔吉、鈞甫亦以書來。是日、頤浩、光世報軍行。二十日、公大犒俊、世忠將士、令世忠奏以兵歸行在、而密戒世忠急至秀據糧道、候大軍至。

酒五行、公親呼諸將校至前、厲聲問曰、今日之舉孰順孰逆。衆皆曰、我順賊逆。公復厲聲曰、若某此事違天悖人、可取某頭歸。苗傅等聞、傅等以觀察使及金鉅萬求某、得某者可即日富貴。不然、一有退縮、按以軍法。衆感憤應諾。世忠軍自平江舟行不絕者三十里、軍勢甚振。是時逆黨傳聞、已自震懾、有改圖之意矣。公又恐賊急邀車駕入海道、先遣官屬措置召募海船、亦甚集。二十一日、復遣馮轡以書行、且令轡居中幾事相應。會得傅等書云、朝廷以右丞待侍郎、伊尹、周公之任、非侍郎其誰當之。公不勝忠憤、度傅等已覺公義兵動、而我兵勢既已立、遂因遞報之。其略云、自古言涉不順、謂之指斥乘輿、事涉不遜、謂之震驚宮闕。是以見君輅馬、必加禮而致恭、蓋不如是、無以肅名分、杜僭亂也。廢立之事、非常之變、謂之大逆不道。大逆不道者、族矣。凡爲人臣者、握兵在手、遂可以責君之

細故而議廢立、自古豈有是理者哉。今建炎皇帝春秋鼎盛、不聞失德于天下、一旦遜位、豈所宜聞。自處已定、雖死無悔。嗚呼、天佑我宋、所以保衛皇帝者、歷歷可數。出質則虜人欽畏而不敢拘、奉使則百姓謳歌而有所屬。天之所與、誰能廢之。況祖宗在天之靈、豈不昭昭、借使事正而或有不測、猶愈於終爲不義不忠之人而得罪於天下後世也。傅等得書、怒遣赤心軍及王淵舊部精銳盡駐臨平、而韓世忠之軍已扼秀州矣。公作蠟丸帛書云、不得驚動聖駕。募人賫付主兵官左言以下八人及知臨安府康允之、皆達。又作手榜遣人間道曉諭臨安居民曰、訪聞前日睿聖皇帝遜位、軍民掩泣、各不聊生、足見軍民忠義之情。世忠既抵秀州、稱病、日令將士造雲梯、修弓矢器械。傅正彥震駭、亟除世忠、俊節度使、指揮略云、世忠、俊深曉內禪大義、不受張某誑誤。二人皆不受命。傅正彥又令

朝廷降指揮謫公、其詞曰、張某陰有邪謀、欲危社稷、責授黃州團練副使、郴州安置。仍令平江差兵級防送、經由行在赴貶所。二十四日、頤浩以兵至、公迓且勉之、握手嘖嘖。頤浩亦曰、事不諧、不過赤族。翌日、光世亦至。二十七日、傳檄內外、辭曰、宋有天下垂二百年、太祖、太宗開基創業、眞宗、仁宗德澤在民、列聖相傳、人心未厭。昨因內侍童貫首開邊禍、遂致虜騎歷歲侵凌。逆臣苗傅、躬犬彘不食之資、取鯨鯢必戮之罪、乃因艱難之際、敢爲廢立之謀。劉正彥以孺子狂生、同惡共濟、自除節鉞、專擅殺生。仰惟建炎皇帝憂勤恭儉、志在愛民、聞亂登門、再三慰喻、而傅等陳兵列刃、凶燄彌天、逼脅至尊、蒼黃遜位、語言狂悖、所不忍聞。大臣和解而不從、兵衛皆至於掩泣。詔書所至、遠近痛心。駭戾人情、孰不憤怒。况傅等揭榜闐市、自稱曰余祖宗諱名、曾不回避、迹其本意、實有包藏。今者呂頤浩



因金陵之師、劉光世引部曲之衆、張某治兵於平江、韓世忠、張俊、馬彥溥各領精銳、辛道宗、陳思恭總率舟師、湯東野、周杞扼據衝要、趙哲調集民兵、劉誨、李迨餽餉芻糧、楊可輔等參議軍事、并一行將佐官屬等、同時進兵、以討元惡。師次秀州、四方響應。用祈請建炎皇帝亟復大位、以順人心。今檄諸路州軍官吏軍民等、當念祖宗涵養之恩、思君父幽廢之辱、各奮忠義、共濟多艱。所有朝廷見行文字、並是傳等僞命、及專擅改元、即不得施行。敢有違戾、天下共誅之。二十八日、張俊、光世相繼行、聞行在已有復辟之議矣。初、公遣馮輜授以計策、傳正彥聞平江之師將至、甚憂恐。輜知可動、即以大義白宰相朱勝非曰、張侍郎之意、蓋以國步艱難、政當馬上治之。主上盛年、乃傳位襁褓之子、聽斷不出簾帷、天下恐有不測之變。縱主上謙虛、固執內禪之論、此猶有一說焉。主上受淵聖詔、爲天

下兵馬大元帥、今日當以淵聖爲主、睿聖稱皇太弟、依舊天下兵馬大元帥、嗣聖當易稱皇太姪。太母垂簾聽政、大元帥治兵征伐于外、此最爲得策。勝非令輜與二人議、輜反覆告之、傳正彥有許意、遂與同議都堂。輜同傳正彥、鈞甫四人並引見太后、勞問曰、卿等皆忠義之臣。輜遂奏曲折。議定、乞賜傳正彥鐵券、詔宣百官、少頃畢集。宣詔云、二十五日、苗傅、劉正彥等四人上殿奏事、奉聖旨、睿聖皇帝宜稱皇太弟、依舊康王、天下兵馬大元帥。皇帝宜稱皇太姪。百官退、詣睿聖宮、上御殿引見傳正彥、詞色粹然、問勞有加。傳等出宮、以手加額曰、不意聖天子度量如此。既而傳正彥歸軍、逆黨張達曰、趙氏安、苗氏危矣。王世修尤大悖、三鼓詣勝非府變其事、復欲改正嗣皇依舊、而睿聖之名止稱處分天下兵馬重事、勝非不能奪。輜次日力爭、勝非云、勿與較、其實一也。輜遂歸、而勤王之師已

悉至秀州。三十日、公被命同知樞密院、亦不受。四月二日、公次秀州、奉復辟手詔、而傅等大兵屯臨平、公進發。三日、次臨平、世忠當前、俊次之、光世又次之。逆黨立旗招諭世忠等、世忠與戰、軍小卻。世忠親揮刀突前曰、今日不爲官家面上帶幾箭者、斬之。衆爭奮、賊黨苗翊等大敗、傅正彥相繼逃遁。是夕、皇帝聖旨除公知樞密院事。翌日、公與頤浩等入內朝見、伏地待罪泣下。再三慰勞、宣諭云、曩在睿聖、兩宮幾不相通。一日、朕方啜羹、小黃門直趨前傳太母之命曰、張浚早來、不得已安置郴州。朕不覺覆羹于手、今其迹尙存。自念卿旣被責、此事誰任。公嗚咽奏、臣蒙陛下眷遇之厚、久歷臺省、不能補助、致虜騎憑凌、禍變竊發。臣之罪大、敢復論功。上再三稱歎、獨留公、引入後殿、過宮庭。上宣諭、隆祐皇太后知卿忠義、欲一識卿面、適垂簾見卿自庭下過矣。公惶恐、頓首謝。上屬意欲倚公

爲相、公辭晚進、不敢當。蓋公意以關陝爲中興根本、欲請行矣。上曰、顧無以見朕意。解所服玉帶、命內侍覆去、龍飾賜公曰、此祖宗御府所寶也。公重辭、元樞之命、詔書曰、卿以小宗伯之職、贊天營之事、乃能總合諸師、來赴行在之急、俾姦宄不敢輒肆。威聲旣振、妖孽宵奔、致朝廷於安平無事之地、卿之功大矣。宜勿復辭。傅正彥旣敗走、與死黨直趨閩中。公命世忠以精兵追之、並縛于建州、檻至行在所。及其黨左言、張達、王世修等、伏法建康市。初、公起義、兵行次嘉禾、一夕坐至夜分、外間警備亦甚嚴、忽有刺客至前、腰間出文書、乃傅正彥遣來賊公、賞格甚盛。公顧左右皆鼾睡、見其辭色不遽問、爾欲何如。對曰、某河北人、粗知逆順、豈以身爲賊用者。況侍郎精忠大節、感通神明、某又安忍害侍郎耶。特見備禦未至、恐後有來者、故來相報耳。公下執其手、問姓名、曰、某粗讀書、若言姓名、是



徼後利。顧有母在河北。今徑歸矣。遂拂衣而去。其超捷若神。公翌日取嘉禾死罪囚斬以徇。曰。此苗傅等刺客也。後亦無它。公私識其人狀貌物色之。終不遇云。盜薛慶嘯聚淮甸。兵至數萬。附者日衆。公以密邇行闕。一有滋蔓。爲患不細。且聞慶等無所係屬。欲歸公麾下。請往示大信以招撫之。渡江而斬賽等。率兵降。遂徑至高郵。入慶壘。從行者不及百人。出黃榜示以朝廷恩意。慶感服再拜。始公入賊壘。外間不聞公信。浮言胥動。頤浩等遽罷公樞筦。及聞公訖事還。上歎息。即日趣公歸。且詔就職。公辭。上撫勞再四。復親書御製中和堂詩賜公。有曰。願同越勾踐。焦思先吾身。其卒章曰。高風動君子。屬意種蠡臣。仍題其後曰。卿看畢可密藏。恐好議者以朕屬意篇什也。其眷待如此。公素念國家艱危以來。措置首尾失當。若欲致中興。必自關陝始。又恐虜或先入陝陷蜀。則東南不復能自保。

遂慷慨請行。詔以公充川陝宣撫處置使。便宜黜陟。賜親筆詔書曰。朕嗣承大統。遭時多艱。夙夜以思。未知攸濟。正賴中外有位。悉力自效。共拯艱危。今遣知樞密院事張某往諭密旨。黜陟之典。得以便宜施行。卿等其念祖宗積累之勤。勉人臣忠義之節。以身徇國。無貽名教之羞。同德一心。共建隆興之業。當有茂賞。以答殊勳。公行有日矣。會御營平寇將軍范瓊來赴行在。瓊自靖康圍城與女真通。及京城破。逼脅后妃及淵聖太子宗室入虜中。又乘勢剽略爲亂。左右張邦昌爲之從衛。罪狀非一。至是聞二凶伏誅。始自豫章擁衆入朝。既陞對。恃其衆盛。悖傲無禮。多所邀求。且乞貸傳。正彥逆黨左言等死。公奏大略云。瓊大逆不道。罪冠三千之辟。呼吸群凶。布在列郡。以待竊發。若不乘時顯戮。則國法不正。且它日必有王敦、蘇峻之患。臣任樞筦之寄。今者被命奉使川陝。啓行有日。乃心踟

躡。若不盡言、乞伸典憲、死且不瞑。上深然之、公獨與權樞密院檢詳文字劉子羽密謀、夜召子羽及選密院謹飭吏數輩、作文書劄榜皆備、鎖吏于府中。翌早、公赴都堂、召瓊議事。瓊從兵溢塗巷、意象自若。坐定、公數瓊罪、瓊愕眙、命縛送大理寺。子羽已張榜于省門外、親以聖旨撫勞瓊衆曰、聖旨罪止瓊、餘皆御前軍也、無所預。衆頓刃應喏。瓊論死、兵分隸神武軍。自靖康後、紀綱不振、王室陵夷、公首倡大義、率諸將誅傅正彥、乘輿返正、復論正瓊罪、而後國法立、人心服。自武夫悍卒、小兒竈婦、深山窮谷、裔夷絕域、皆聞公名、盎然歸仰忠義之感、實自此也。公辟子羽參議軍事、遂西行。獨念上孤立東南、朝廷根本之計未定、蚤夜深思、苟有所見、不敢不納忠、以身在外而不言也。嘗奏曰、前日餘杭二凶鼓亂、彼豈真惡內侍哉、當此艱危、人情易搖、欲爲不順、借此以鼓惑衆聽耳。然在我者有隙

可指、其事乃作。願陛下謹之察之、於細微未萌之事、每切致意、使姦逆無以窺吾間。又曰、臣累具奏、謂前此大臣不肯身任國事、意謂事苟差失、衆言交攻、取禍必大。惟因循度日、萬一得罪而去、亦不過謂庸繆、落職領祠而已。此風誤國有素、願陛下臨朝之際、不匿厥指、與大臣決議、繼自今必使身任其責、脫或敗事、誅罰無赦。又奏曰、聽言之難、自古記之。書稱先王之盛有曰、侍御僕從、罔匪正人。夫僕從之微也、而亦必嚴擇、蓋其朝夕在君側、浸潤膚受、言爲易入。苟使小人得售、將何所不至。夫小人進讒說以快其私、經營窺測、投隙伺間、固不正名其事、顯斥其人也。或因獻談諧之說、或假託市井之論、夤緣附會、其端甚微。人君一或忽之、則忠賢去國、億兆離心、其禍有不可勝言矣。臣謂欲盡聽言之道、莫若親君子而遠小人。不然、雖有過人之聰明、而朝夕所狎近者、既皆非類、漸漬以入、



其能無過聽之失乎。又奏曰、自古大有爲之君、未有不體乾剛健而能成其志者也。易曰、天行健、君子以自強不息。人君法天、莫大於此。少康氏有田一成、有衆一旅、而夏后之業復振、蓋其經營越四十年、向使其間一萌退縮之意、則王業無自而興矣。漢高帝困於鴻門、屏於巴蜀、敗於滎陽、京索間、屢挫而愈不屈、終滅項氏以啓漢基。此二君者、豈非剛健不息而卒能配天乎。今日禍變可謂極矣、意者天將開中興之基、在陛下體乾之剛、身任天下而已。願陛下以至公至誠存心、惻怛哀矜、思天下之所以困窮、生民之所以塗炭、自反自咎、身任其責、便佞之惑耳者去之、美麗之悅目者遠之、以至於衣服飲食、亦惟菲薄之務、淡然漠然、視天下無足以動吾心者、而專以宗社生靈爲念。苟言之非有益於宗社生靈者、弗言也。苟思之非有益於宗社生靈者、弗思也。持之以堅、行之以久、乾乾不

息、則上可以動天、下可以格人。由近及遠、由內及外、民雖至愚、豈不感化。少康、漢祖之事業、又何難哉。臣於陛下分則君臣、情則父子、故雖遠去天威、而區區愛君之心、不敢不思所以自效。上手書賜公曰、卿自離闕、曾未幾時、奇畫深規、忠言讜論、著之簡牘、已三上矣。虛懷領覽、嘉歎不忘。時渡江大赦、獨李綱以言者論列、貶海外不放還。公論奏逆黨如吳玠、莫儔、顧反得生歸。綱雖輕疎、亦嘗爲國任事、乃不得叙天下謂何。上用公奏、綱得內徙。始公嘗論綱罪、至是獨爲伸理、其用心公明、無私好惡類如此云。公自七月離行在、經歷長江、上及襄漢、與帥守監司議儲蓄之宜、以待臨幸。先是上問公大計。公請身任陝蜀之事、置司秦川、而乞別委大臣韓世忠鎮淮東、令呂頤浩扈駕來武昌。張俊、劉光世等從行、與秦川首尾相應。朝廷議既定、公行。未及武昌、而江浙士夫搖動、頤浩遂變初議。公

以十月二十三日抵興元。奏曰：竊見漢中實天下形勢之地，臣頃侍帷幄，親聞玉音，謂號令中原，必基於此。臣所以不憚萬里，捐軀自效，庶幾奉承聖意之萬一。謹於興元理財積粟，以待巡幸。願陛下鑾輿早爲西行之謀，前控六路之師，後據兩川之粟，左通荆襄之財，右出秦隴之馬，天下大勢，斯可定矣。始，公未至，虜已陷鄜延。鄜延帥郭浩寄治德順軍。虜驍將婁宿孃於九月二十九日引大軍渡渭河，犯永興，知軍郭琰遁去。虜兵四掠，而諸帥方互結仇怨，不肯相援，人心皇皇。公到才旬日，即出行關陝，復奏請早決西來之期，以係天下心。至陝，訪問風俗，罷斥姦賊，而尤以搜攬豪傑爲先務。一時氣義拳勇之士爭集麾下。吳玠及其弟璘素負才略，求見公，願自試。公與語，奇之。時玠方修武郎璘尙副尉，公獎予，不次擢用，命玠爲統制，璘領帳前親兵，皆感激誓以死報。諸帥亦惕息聽命。會

謀報虜將寇東南，公即命諸將整軍向虜，使婁宿不得下。已而虜果大入，寇江淮，車駕浮海東征。四年二月，公以虜勢未退，治兵入衛。未至襄漢，遇德音，知虜旣北歸矣，乃復還關陝。奏曰：陛下果有意於中興之功，非幸關陝不可。願先幸鄂渚，臣當糾率將士奉迎鑾輿，永爲定都大計。又奏曰：臣竊惟國家不競，患難薦臻，夷虜憑凌，海宇騰沸。二聖久征於遠塞，皇輿未復於中原，而敵國交兵，方興未艾。郡邑半陷於賊手，黎元悉困於塗泥。自古禍亂所鍾，罕有若此之比。必欲昊穹悔禍，眈庶獲安，自非君臣之間更相勉勵，痛心嘗膽，修德著誠，大誅姦邪，頓革風俗，親君子，遠小人，去讒佞，屏聲色，簡嗜慾，崇節儉，則曷以上應天變，下懷民心。四海黔黎，殊未有休息之日也。若昔黃帝遭蚩尤之亂，大禹罹洪水之災，卒能平夷，終歸安治者，正以君臣上下苦心勞形，杜邪枉之門，開公正之道，天人響



應遐邇協謀故能平難平之寇成不世之績上手書報公以虜退衄狀且曰卿受命而西大恢遠略布朝廷之惠意得將士之歡心積粟練兵興利除害去取皆當黜陟惟公而又雅志本朝嘉猷屢告眷惟忠懇實副倚毗是月虜大酋粘罕復益二萬騎聲言必取環慶路公率諸將極力捍禦虜勢屢挫生擒女真及招降契丹燕人甚衆時聞兀朮猶在淮西公懼其復擾東南使車駕不得安息事幾有不可測者即謀爲牽制之舉始公陛辭上命公三年而後用師進取至是上亦以虜欲萃兵寇東南御筆命公宜以時進兵分道由同州鄜延以擣虜虛公遂決策治兵移檄河東問罪八月十三日收復永興軍虜大恐急調大酋兀朮等由京西路星夜來陝右以九月二十間與粘罕等會而五路之師亦以二十四日至耀州富平大戰涇原帥劉錡身率將士先薄虜陣自辰至未殺獲頗衆會環

慶帥趙哲擅離所部哲軍將校望見塵起驚遁而諸軍亦退舍公斬哲以徇退保興州時陝右兵散各歸本路宣撫司獨親兵實從官屬有獻議退保夔州者公堅駐不動以扼虜衝獨參議劉子羽毅然與公意合乃劾異議者遣子羽出關召諸將收散亡將士知宣司在興州皆相率會子羽于秦亭凡十餘萬公哀死問傷錄善咎己人心悅焉乃命吳玠聚涇原兵據高扼險于鳳翔之和尙原守大散關斷賊來路命關師古等聚熙河兵於岷州大潭一帶命孫渥賈世方等聚涇原鳳翔兵於階成鳳三州以固蜀口虜見備禦已定輕兵至輒敗不敢近公上疏待罪上手書報公曰卿便宜收合夷散養銳待時但能據險堅壁謹守要害旣以保固四州之地又能牽制南下之師則惟卿之賴公奉詔益厲諸將嚴備待虜紹興改元五月虜酋烏魯卻統大兵來攻和尚原吳玠乘險擊之虜敗走三

日間、連戰輒勝、虜逗留山谷、人馬死亡十之四。八月、粘罕在陝西病篤、召諸大酋謂曰、吾自入中國、未嘗有敢嬰吾鋒者。獨張樞密與我抗、我在猶不能取蜀、爾曹宜息此意、但務自保而已。兀朮出而怒曰、是謂我不能耶。粘罕死、即合兵來寇。九月、親攻和尚原。吳玠及其弟璘與合戰、出奇邀擊、大破之。俘馘酋領及甲兵以萬計。兀朮僅以身免、亟自髡鬚鬢、狼狽遁歸、得其麾蓋等。自虜入中國、其敗衄未嘗如此也。先是、上以公奉使陝右、捍禦大敵、制加公通奉大夫。公念自靖康中、召赴京師、更歷變故、出身爲國、違去太夫人、色養於茲七年、乃奏迎太夫人自廣漢來、閭中版輿就養。又思所以悅母意、遂乞以通奉恩命、特封外祖父母。優詔許焉。二年、上謂公未至西方時、虜已陸梁、蹂踐關陝、及引師而歸、勢誠不敵。而保護衝要、連挫大敵、蜀賴以全。聚兵至十五萬、勤勞備至、制加公檢校少

保定國軍節度使、賜手書曰、朕非敢決取秦穆之效、而卿自修孟明之政、是用夙夜歎嘉。今遣內侍任源往宣旨。源歸、公附奏謝、且密奏曰、天下之事、每當謹微、一失於初、末不可救。夫莫顯者、微也。常情謂爲微而忽之、明智以其著而謹之。唐玄宗惑女色而致祿山之禍、憲宗任內侍而啓晚唐之禍、其初二君之心、皆以爲微而不加察也。孰知其貽害之烈至此哉。願陛下於事之微、每深察焉、則天下幸甚。是歲、公亦遣兄滉及官屬奏事行在所、上喜、恩意有加。公在關陝凡三年、以新集之軍、當方張之虜、蚤夜勤勞、親加訓輯、其規模經畫、皆爲遠大恢復之計。以劉子羽爲上賓、子羽忠義慷慨、有才略、諸將歸心。任趙開爲都轉運使、開善理財、治茶鹽酒法、方用兵、調度百出、而民不加賦。擢吳玠爲大將、守鳳翔。玠每戰輒勝、虜不敢近。而西北遺民間公威德、歸附日衆。於是全蜀按堵、且以形勢



率制東南、江淮亦賴以安。然公承制黜陟、悉本至公、雖鄉黨親舊、無一毫假借、於是士大夫有求於宣司而不得者、始紛然起謗議於東南矣。有將軍曲端者、建炎中任副總管、逼逐帥臣王庶、奪其印、又方命不受節制。富平之役、張忠彥等降虜、皆端腹心、實知其情。公送獄論端死、而謗者謂公殺端及趙哲爲無辜、且任劉子羽、趙開、吳玠爲非、是朝廷疑之。三年春、遂遣王似來副公。公聞即求去、且論吳玠、劉子羽有功於蜀、不應一旦以似加其上。公雖累乞去、而以負荷國事至重、未嘗少忘警備。會虜大酋撒離喝及劉豫叛黨聚大兵自金商入寇、公命嚴爲清野之計、分兵據險、前後撓之。虜至三泉、掠無所得、乏食、狼狽引遁。大軍躡之、人馬死曳滿道、所喪亡不減鳳翔時。是時公累論奏王似不可任、而似與宰相呂頤浩有鄉里親戚之舊、頤浩不悅。又或告朱勝非以公唱義平江時嘗有斬

勝非語、勝非陰肆謗毀、詔公赴行在。公力求外祠、章至十數上、上弗許。四年二月至行在、御史中丞辛丙嘗知潭州、公在陝時調丙發潭兵赴湖北、丙怯懦不能遣、反鼓唱軍士、幾致生變。公奏劾丙、且令提刑司取勘。丙憾至是、遂率同列劾公、誣以危語。始、公在陝嘗以秦州舊驛秦川館爲學舍、以待河東、陝西失職來歸之士、給以衣食、令一人年長者主之。又新復州郡乞鑄印、請於朝廷、往返動經歲、恐失事機、即用便宜指揮鑄以給之、然後以聞。而丙謂公設秘閣以崇儒、擬尙方而鑄印。公初被命還闕、奏歸上冢、取道東蜀夔峽、庶幾安遠近之心。而呂頤浩又以書來言、若一離川陝、事有意外、誰任其責。宜以事實告上、萬一欲尙留宣司、當爲開陳如請。公不顧也。而丙反謂公不肯出蜀、意有他圖、公恐懼、亟以頤浩書進呈。上始愕然、即詔宣押奏事。公竟移疾待罪、而論者亦不已。六月、遂以

本官提舉臨安府洞霄宮、福州居住。公知虜既釋川陝之患、必將復萃師東南、不敢以得罪遠去而不言。且是時朝廷已盛講和好之議、乃具奏曰、臣竊觀此虜情狀、專以和議誤我、亦云久矣。彼勢蹙即言和、勢盛即復肆、前後一轍、請姑以近事明之。紹興三年秋、粘罕有親寇蜀之意、先遣王倫還朝、且致勤懇。蓋懼朝廷大兵乘彼虛隙、又其爲劉豫之計、至委曲周悉也。自後九月、余覩作難、前謀遂寢。至十二月、余覩之難稍息、則復大集番漢之衆、徑造梁洋。是時朝廷已遣潘致堯出使矣。次年二月、虜困饒風、進退未皇。先是、朝廷開都督府、議遣韓世忠直抵泗上、虜實畏之。於四月遣致堯還。其辭婉順、欲邀大臣共議、此非無所忌憚而然也。梁洋之寇、未能出境。至五月而後得歸、既狼狽矣。而世忠大兵尋復輟行。虜之氣力固已復蘇、而叛豫之心亦云舒緩。所以前日使人之來、求請不一、故

爲難從之事也。竊惟此虜傾我社稷、壞我陵寢、迫我二帝、驅我宗室百官、自謂怨隙至深、其朝夕謀我者、不遺餘力矣。況劉豫介然處於其中、勢不兩立、必求援於虜。借使暫和、心實未已。數年之內、指摘他故、豈無用兵之辭。而我將士率多中原之人、謂和議既定、不復進取、將解體思歸矣。若謂今日不得已而與之通使、爲陛下之權、敵亦固能用權也。願陛下蚤夜深思、益爲備具、處將士家屬於積粟至安之地、使出爲戰守者、無返顧奔散之憂。精擇奇才以撫川陝之師、使積年戍邊者無懈惰懷望之意。江淮、川陝互爲牽制、斥遠和議、用定大業。臣奉使川陝、竊見主兵官除吳玠、王彥、關師古累經拔擢、備見可任外、其餘人才尙衆、謹開具如左。吳璘、楊政可統大兵、田晟可總一路。王宗尹、王喜、王彥可爲統制。後皆有聲。時服公知人。公即日赴福州、從者皆去、肩輿才兩人。既至、闔門以書史自



娛。是歲九月、劉豫之子麟果引虜大兵、繇數路入寇、騰言侮慢、上下恟懼。上思公前言之驗、罷宰相朱勝非、而參知政事趙鼎亦建請車駕幸平江、召公任事、遂以資政殿學士提舉萬壽觀兼侍讀召、不許辭免、日下起發。手書賜公曰、卿去國累月、未嘗弭忘、考言詢事、簡在朕心。想卿志在王室、益紆籌策、毋庸固辭、便可就道。夙夜造朝、嘉謀嘉猷、佇公入告。金書疾置、絡繹於道。公即日行、中途條具戰守之宜甚悉。且乞先遣岳飛渡江入淮西張聲勢、以牽制虜大兵在淮東者。以十一月十四日入見。玉音撫勞、加於疇昔。即日復除公知樞密院事。公奏曰、人道所先、惟忠與孝。一虧於己、覆載不容。自昔懷姦欺君、妬賢賣國、當時閭巷細民莫不深怨嫉憤、恨不食其肉者。至若一心事上、守正盡忠、雖天下後世皆知企慕稱歎、思見其人焉。蓋理義人心之所同、故好惡不期而自定。臣以區區淺薄

之質、幼被家訓、粗知義方。平居立身、以此自負。偶緣遭遇、浸獲使令。陛下任之太專、待之過厚、而有怨於臣者、攻毀之備至、有求於臣者、責望之或深。上賴聖智、保全微蹤。臣奉使無狀、豈不自知。至於加臣於大惡之名、陷臣於不義之地、隳臣子百世之節、貽嬖親萬里之憂、言之嗚咽、痛憤無已。今陛下察其情僞、保庇孤忠、許以入侍、旋擢樞筦、在臣毀首碎身、無以論報。然而公議之所劾、訓詞之所戒、傳之天下、副在史官。臣復何顏、敢玷近列。上親書詔曰、張浚愛君憂國、出於誠心。頃屬多艱、首唱大義、固有功於王室。仍雅志於中原、謂關中據天下之上游、未有舍此而能興起者。乘虜百勝之後、慨然請行。究所施爲、無愧人臣之義。論其成敗、是亦兵家之常。矧權重一方、愛憎易致、遠在千里、疑似難明。然則道路怨謗之言、與夫臺諫風聞之誤、蓋無足怪。比復召浚、置之宥密、而觀浚恐懼惶惕、

如不自安、尙慮中外或有所未察歟。夫使盡忠竭節之臣、懷明哲保身之戒、朕甚愧焉。可令學士院降詔、出榜朝堂。時太史局占明年當日食正旦、公奏曰、臣聞太史推測天象、以來年正月之旦日有食之。臣竊惟天之愛人君、必示以災變、使之恐懼修省、勉求爲治。人主修德畏天、則天心眷佑、享國無窮。如其怠忽不省、歸之時數、禍有不可勝言者矣。然而應天之道在實不在文、當求之於心、考之於行、心有未至者勉之、行有不善者改之、如天之無不公、如天之無不容、如天之至誠無私而不失其信、則何憂乎治道之不興、何患乎賢才之不至哉。公旣受命、即日赴江上視師。時大酋兀朮擁兵十萬于維揚、朝廷先遣魏良臣、王繪奉使軍前。還夜與公逮于中塗、公問以虜事及大酋問答。良臣繪謂虜有長平之衆、且喻良臣等當以建州以南王爾家爲小國、索銀絹犒軍、其數千萬。又約韓世

忠尅日過江決戰。公密奏使人爲虜恐慌、朝廷切不可以其言而動、及不須令更往軍前、恐我之虛實反爲虜得。上然之。公遂疾驅臨江、召大帥韓世忠、張俊、劉光世與議、且勞其軍。將士見公來、勇氣十倍。旣部分諸將、遂留鎮江節度之。令韓世忠移書兀朮、爲言張樞密已在鎮江。初、虜謀報公得罪遠貶、故悉力來寇。至是、兀朮問世忠所遣麾下王愈、吾聞張樞密貶嶺外、何得已在此。愈出公所下文書、兀朮見公書押色動、即強言約日當戰。公再遣愈以世忠書往問戰期、愈回一日、而虜宵遁。士馬乏食、狼狽死者相屬。遣諸將追擊、所俘獲甚衆。上遣內侍趣公赴行在所。五年二月十二日宣制、除公宣奉大夫、尙書右僕射、同中書門下平章事、兼知樞密院事、都督諸路軍馬、而趙鼎除左僕射。先是、公在川陝、念上繼嗣未立、以紹興元年八月十五日上奏曰、臣荷陛下恩德之厚、事有干於宗



廟社稷大計、臣知而不言、誰敢爲陛下言者。惟陛下察其用心、貸以萬死。臣恭惟陛下自即位以來、念兩宮倚託之重、夙夜憂勤、不近聲色、不事玩好、是宜天地感格、祖宗垂祐、受福無窮、決致中興。臣之區區亦冀依日月之末光、獲保終年、少効補報。臣竊見西漢之制、人君即位、首建儲嗣、所以固基本、屬人心。臣願陛下特詔大臣講明故事、仍先擇宗室之賢優禮厚養、以爲藩屏。至是入謝、復陳宗社大計、莫先儲嗣。雖陛下聖德昭格、春秋方盛、必生聖子、惟所以系天下之心、不可不早定議。上首肯久之、乃云、宮中見養二人、長者藝祖之後、年九歲、不久當令就學。公出見趙鼎都堂、相與仰歎聖德久之。自是與鼎益相勉厲、同志協謀、以爲爲治之要、必以正本澄源爲先務。誠能陳善閉邪、使人君無過舉、則國勢尊安、醜虜自服。是以進見之際、於塞倖門、抑近習尤諄切致意焉。嘗奏曰、王者以

百姓爲心、修德立政、惟務治其在我、則大邦畏其力、小邦懷其德、天下捨我將安歸哉。固不僥倖於近績也。仰惟陛下躬不世之資、當行王者之事、以大有爲。正心以正朝廷、正朝廷以正百官、正百官以正萬民、國勢旣隆、強虜自服、天下自歸。因書王朴平邊策以獻、上嘉納焉。又奏、臣昨奉清光、竊見陛下於君子小人之際、反覆詳究、退自慶幸、以爲治道之本、莫大夫辨君子小人之分。聖意孜孜于此、宗社生靈之福也。昔唐李德裕言於武宗曰、邪正二者、勢不相容。正人指邪人爲邪、邪人亦指正人爲邪、人主辨之甚難。臣以爲正人如松柏、特立不倚、邪人如藤蘿、非附他物不能自起。臣嘗推類而言之、君子小人見矣。大抵不私其身、慨然以天下百姓爲心、此君子也。謀身之計甚密、而天下百姓之利害我不顧焉、此小人也。志在於爲道、不求名而名自歸之、此君子也。志在於爲利、掠虛美、邀

浮譽此小人也。其言之剛正不撓、無所阿徇。此君子也。辭氣柔佞、切切然伺候人主之意於眉目顏色之間。此小人也。樂道人之善、惡稱人之惡。此君子也。人之有善、必攻其所未至而掩之。人之有過、則欣喜自得、如獲至寶、旁引曲借、必欲開陳於人主之前。此小人也。難進易退。此君子也。叨冒爵祿、蔑無廉恥。此小人也。臣嘗以此而求之。君子小人之分庶幾其可以概見矣。小人在位、則同於己者譽之以爲君子、異於己者排之以爲小人。不顧公議、不恤治亂、不畏天地鬼神。是以自崇、觀以來。以至今日、有異於己者而稱其爲君子乎。臣以爲必無之也。彼其專爲進身自營之計、故好惡不公。以至於亡身亡家。^⑩亂天下而莫之悔。惟陛下親學問、節嗜欲、清明其躬、以臨照百官、則君子小人之情狀又何隱焉。上還臨安、公留相府。未閱月、復出江上勞軍。至鎮江、召韓世忠親喻上旨、使舉軍前屯

楚州以撼山東。世忠欣然受命、即日舉軍渡江。公至建康、撫張俊軍。至太平州、撫劉光世軍。軍士無不踴躍思奮。時巨寇楊么據洞庭重湖、朝廷屢命將討之不克。公念建康東南都會、而洞庭實據上流、今寇日滋、壅遏漕運、格塞形勢、爲腹心害。不先去之、無以立國。然寇阻重湖、春夏則耕耘、秋冬水落、則收糧于湖寨、載老小于泊中、而盡驅其衆四出爲暴。前日朝廷反謂夏多水潦、屢以冬用師、故寇得併力而我不得志。今乘其怠、盛夏討之、彼衆旣散、一旦合之、固已疲於奔命。又不得守其田畝、禾稼蹂踐、則有秋冬絕食之憂。黨與必攜、可招來也。雖已命岳飛往、而兵將未必諭此意。或遲^⑪兵殺戮、則失勝算、傷國體。遂具奏請行、上許焉。公在道、念國家任事不顧身者常遇禍、而畏避崇虛譽者常獲福、以爲國之大患。奏曰、今夫^⑫有疾於此、正在膏肓、庸醫畏縮、方且戒以勿吐、勿下、姑進參苓而



安養之、雖終至於必死、主人猶以爲愛己也。乃若良醫進剖胸洗腸之術、旁觀駭愕、指以爲狂。至其疾良已、尙不免於輕試之謗。自古掠美附衆者得譽常多、而骨鯁當權者負謗常重。澶淵之役、寇準決策親征、功存社稷。事定之後、姦臣乃謂其輕棄萬乘。今合天下之力以誅天下之不義、雖湯武復生、亦必出此。而顧乃爲恐懼顧慮之計、何由而事功可集哉。蓋公所以自任者始終如此、故每因事爲上言之。行至醴陵、獄犴數百人、盡楊公遣爲間探者、帥席益傳至遠縣囚之。公召問、盡釋其縛、給以文書、俾分示諸寨曰、爾今旣不得保田畝、秋冬必乏食、且餒死矣。不若早降、即赦爾死。數百人驩呼而往。五月十一日至潭州、於是賊寨首領黃誠、周倫先請受約束。然誠等屢嘗殺招安使命、猶自疑不安。公遣岳飛分兵屯鼎澧、益陽、壓以兵勢、其黨大恐、相繼約日來降。丁壯至五六萬、老弱不下

二十萬。公一切以誠信撫之。六月、湖寇盡平、乃更易郡縣姦賊吏、宣布寬恩。上手書賜公曰、覽奏、知湖寇已平。非卿孜孜憂國、不憚勤勞、誰能寬朕憂。顧奏到之日、中外歡賀、萬口一詞、以謂上流旣定、則川、陝、荆、襄形勢接連、事力增倍。天其以中興之功付之卿乎。於是公奏遣岳飛之軍屯荆襄、圖中原、遂率官屬吏兵泛洞庭而下。時重湖連年舟楫不通、公舟始行、風日清爽、父老歎息、以爲變殘賊呻吟之區爲和氣也。始、公定議令韓世忠屯承楚、於高郵作家計。及公出征而廷議中變、公復請去。上悟、優詔從公初計。公旣兩發儲嗣之議、至是聞建資善堂、皇子出就傅、喜不自勝、以爲當以擇師傅爲先。遂具奏、薦起居郎朱震、秘閣修撰范冲可任訓導之選。公雖在外、常以內治爲憂、每有見輒入奏。其一謂、自昔人君命相、與之講論天下大計、次第而施行之、故日積月累、成効可必。譬之營室、

先度基址、次定規模、付諸匠者、以責其實。一有不合、安可輕委。自建炎以來、陛下選用大臣、未知責以何事、而大臣進說於陛下、未知何以奉詔。臣但見一相之入、引進親舊、報讎復怨、以行其私意而已。欲望國家之治安、其可得乎。其二謂、祖宗置臺諫、本慮夫軍民之利害、人才之善惡、官吏之能否、廟堂不能盡見而周知、臺諫得以風聞而論列。不幸大臣不得其人、則臺諫力爭明辨以去之耳。今乃不然、陰肆揣摩、公爲反覆、或伺候人主之意、或密結大臣之私、捃摭細故、以示其公。人主不可以不察也。其三謂、祖宗時、郎曹之選、非累歷親民、不以授、自臺閣而爲守貳者、十嘗七八、蓋使之更歷世故、諳曉民情、養成其材、以備任使。今則不然、事口記者、可至言官、弄文采者、皆升館職、日進月遷、驟竊要位。一居京局、視州縣爲冗官。故有爲大臣而不知民情之休戚、財用之盈虛、軍政之始末者、

有爲侍從而不知州縣所宜施行者、況責以任天下大計哉。上嘉納焉。公自岳、鄂轉淮西、東、諸將大議防秋之宜、直至承楚、僞境震動。上念公久勞于外、遣中使賜手書促歸、制除公金紫光祿大夫。公力辭至四五乃許。特封公母計氏秦國夫人。賜公兄滉紫章服及五品服二人。官公親屬兩人。公以十月十一日至行在。上勞問曰、卿暑行甚勞、然湖湘羣盜既就招撫、以成朕不殺之仁、卿之功也。公頓首謝曰、陛下誤知、使當重任、故臣得效愚計。上親書周易否、泰卦以賜焉。公奏、自古小人傾陷君子、莫不以朋黨爲言。夫君子引其類而進、志在於天下國家而已。其道同、故其所趨向亦同、曾何朋黨之有。惟小人則不然、更相推引、本圖利祿、詭詐之蹤、莫可跡究。或故爲小異以彌縫其事、或內外符合以信實其言。人主於此何所決擇而可哉。則亦在夫原其用心而已矣。臣嘗考泰之初九拔茅



茹以其彙征、而象以爲志在外、蓋言其志在天下國家、非爲身故也。否之初九拔茅茹以其彙、貞而象以爲志在君、則君子連類而退、蓋將以行善道而未始忘憂國愛君之心焉。觀二爻之義而考其用心、則朋黨之論可以不攻而自破矣。臣又觀否泰之理起於人君一心之微、而利害及於天下百姓。方其一念之正、其畫爲陽、泰自是而起矣。一念之不正、其畫爲陰、否自是而起矣。然而泰之上六、三陰已盡、復變爲陽、則小人在外而泰之所由以生焉。當今時適艱難、民墜塗炭、陛下若能日新其德、正厥心於上、臣知其將可以致泰矣。異時天道悔禍、幸而康寧、則願陛下常思其否焉。上嘗召公獨對便殿、問所宜爲。公退奏曰、臣竊惟二帝皇族遠處沙漠、憂憤無聊、與夫輕侮受辱、可想而見也。尙忍言之哉。臣嘗屈指計之、如此者蓋三千晝夜矣。虎狼用意、實欲摧折而消磨之也。雖然、此尙以

陛下總師于南耳。異時或一有差跌、其禍可勝言乎。今事雖有可爲之幾、理未有先勝之道。蓋兵家之事不在交鋒、援戰然後勝負可分、要在得天下之心、則士氣百倍、虜叛歸服。雖然是豈可以聲音笑貌爲哉。心念之間一毫有差、四海共知。今使天下之人皆曰、吾君孝弟之心、須臾不忘、寢食之間父兄在念、當思共爲陛下雪讎矣。皆曰、吾君之朝君子在位、小人屏去、侍御僕從罔匪正人、譖說不行、邪言不入、市井之談不聞、道義之益日至、則內外安心、各服其職、而有才智者悉思盡其力矣。皆曰、吾君棄珠玉、絕弄好、輕犬馬、賤刀劍、金帛之賞不以予幸、惟以予功、則上下知勸矣。以至吾君言動舉措俱合禮法、至誠不倦、上格於天、則望教化之可行矣。如是則將帥之心日以壯、士卒之心日以奮、天下百姓之心日以歸。夷狄雖號荒服、然非至若禽獸也。聞陛下之盛德、知中國之理直、則氣

折志喪、小大雖異、戰必不力、衆必不同、則陛下何爲而不可成乎。或有不然、疑似之說毫髮著見、天下之人口不敢言而心敢怒。異日事乖勢去、禍亂立作、如覆水之不可救也。蓋隙見於此、則心生於彼、不易之道、自古爲君之難、非特今日也。一言之失、一行之非、或失色於人、或失禮於人、或一小人在側、便足以致禍致難、起戎起兵。前日明受之變、大逆之徒陳兵闕下、旁引他辭、其監不遠也。爲人上者、其可不兢畏戒懼耶。其警戒深切如此。上皆嘉納、且命公以所見聞置策來上。公承命條列以進、號中興備覽、凡四十一篇。立國之本、用兵行師之道、君子小人之情狀、駕馭將帥之方、均節財用之宜、聽言之要、待近習之道、以至既往之得失、郡縣之利病、莫不備具。上深嘉歎、置之坐隅。六年正月、上謂公曰、朕每以事幾難明、專意精思、或達旦不寐。公奏曰、陛下以多難之際、兩宮幽處、一有差

失、存亡所系、慮之誠是也。然臣嘗聞之、聽雜則易惑、多畏則易移。以易惑之心、行易移之事、終歸於無成而已。是以自昔君人者、修己正心、惟使仰不愧于天、俯不忤於人、持剛健之志、洪果毅之實、爲所當爲、曾不它卹。陛下聰明睿知、灼知古今、苟大義所在、斷以力行、夫何往而不濟乎。臣願萬機之暇、保養天和、澄靜心氣、庶幾利害紛來、不至疑惑、以福天下、以建中興。公以虜勢未衰、而叛臣劉豫復據中原、爲謀叵測、不敢皇寧處于朝、奏請親行邊塞、部分諸將、以觀機會。上許焉。即張榜聲豫僭逆之罪、以是月中旬啓行。公謂楚漢交兵之際、漢駐兵穀_④間、則楚不敢越境而西。蓋大軍在前、雖有它岐捷徑、敵人畏我之議其後、不敢踰越而深入也。故太原未陷、則粘罕之兵不復濟河、亦以此耳。論者多以前後空闕、虜出它道爲憂、曾不議其糧食所自來、師徒所自歸。不然、必環數千里之地



盡以兵守之、然後爲可安乎。旣以此告于上、又以此言於同列、惟上深以公言爲然。至江上、會諸帥議事、命韓世忠據承楚以圖淮陽、命劉光世屯合淝、以招北軍、命張俊練兵建康、進屯盱眙、命楊沂中領精兵爲後翼佐俊、命岳飛進屯襄陽以窺中原。形勢旣立、國威大振。上遣使賜公御書、裴度傳以示至意。公於諸將中尤稱韓世忠之忠勇、岳飛之沉鷙、可倚以大事。世忠在楚州時入僞地、叛賊頗聚兵。世忠渡淮擊敗之、直引兵至淮陽而還、士氣百倍。上手賜書公曰、世忠旣捷、整軍還屯、進退合宜、中外忻悅。每患世忠發憤直前、奮身不顧、今乃審擇利便、不失事機、亦卿指授之方。卿宜明審虛實、徐爲後圖、或遣岳飛一窺陳蔡、使賊支吾不暇、以逸待勞。時飛母死、扶護葬廬山。公乞御筆敦趣其行、飛奉詔歸屯。公身任輔相、雖督軍在外、朝廷有大差除、不容不預議。而孟庾除知樞密院、及

高世則除節度使、皆不知始末。具奏、以爲如此則臣不當在相位。上親筆喻指焉。公以東南形勢莫重建康、實爲中興根本。且人主居此、則北望中原、常懷憤惕、不敢自暇自逸。臨安僻居一隅、內則易生安肆、外則不足以號召遠近、係中原之心。奏請車駕以秋冬臨建康、撫三軍、以圖恢復。公又渡江、遍撫淮上諸屯、屬方盛暑、公不憚勞、人人感悅。時防秋不遠、公以方略諭諸帥、大抵先圖自守、以致其師、而乘幾擊之。六月、制加公食邑、食實封。時公所遣人自燕山回、知徽宗皇帝不豫、又聞欽宗皇帝所貽虜酋書、奏曰、臣近得此信、不勝臣子痛切憤激之情。仰惟陛下處天子之尊、遭父兄之變、聖懷惻怛、勤切于中、固不止坐薪嘗膽也。臣願陛下至誠剛健、勉強有爲、成敗利害、在所不恤。彼藉姑息之論、納小忠之說者、爲一己妻孥計耳。使天有志於中興、陛下奮然決爲、躬冒矢石、事無不濟。使

天無意乎中興、陛下雖過爲計慮、以圖一身之安、曾何補於事乎。但當盡其在我、一聽天命而已。況夫孝弟可以格天、仁厚可以得民、推此心行之、臣見其福、不見其禍也。七月、有詔促公入覲。八月、至行在、時張俊軍已進屯盱眙、三帥鼎立、而岳飛遣兵入僞地、直至蔡州、焚其積聚、時有俘獲。公力陳建康之行爲不可緩、朝論同者極鮮、惟上斷然不疑。車駕以九月一日進發、逮至平江、公又請先往江上。諜報叛賊劉豫及其姪猊挾虜來寇、公奏虜疲於奔命、決不能悉大衆復來、此必皆豫兵。公旣行、而邊遽不一、大將張俊、劉光世皆張大賊勢、爭請益兵、自趙鼎而下、莫不恟懼。至欲移盱眙之屯、退合淝之師、召岳飛盡以兵東下。公獨以爲不然、以書戒俊、光世曰、賊豫之兵以逆犯順、若不盡勦、何以立國。平日亦安用養兵爲。今日之事、有進擊無退保。時楊沂中爲張俊軍統制、公令沂中往屯

濠梁、且使謂之曰、上待統制厚、宜及時立大功、取節鉞。或有差跌、某不敢私。諸將悚懼聽命。公至江上、知來爲寇者實劉麟兄弟、豫封麟淮西王、兵凡六萬人。寇已渡淮南、涉壽春、逼合淝。公調度旣已定矣、而張俊請益兵之書日上、劉光世亦欲引兵退保。劉豫又令鄉兵僞胡服、於河南諸州十百爲群、由此間者皆言處處有虜騎。趙鼎及簽書樞密院事折彥質惑之、移書抵公至七八、堅欲飛兵速下。又擬條畫項目、乞上親書付公。大略欲俊、光世、沂中等退師善還、爲保江之計、不必守前議。公奏、俊等渡江則無淮南、而長江之險與虜共矣。淮南之屯正所以屏蔽大江、向若叛賊得據淮西、因糧就運、以爲家計、江南其可保乎。陛下其能復遣諸將渡江擊賊乎。淮西之寇、正當合兵掩擊、令士氣益振、可保必勝。若一有退意、則大事去矣。又岳飛一動、則襄漢有警、復何所制。願陛下勿專制于中、



使諸將不敢觀望。上手書報公曰、朕近以邊防所
疑事咨問於卿、今覽卿奏、措置方略、審料敵情、條
理明甚、俾朕釋然、無復憂顧、非卿識慮高遠、出人
意表、何以臻此、是時內則廟堂、外則諸將、人人畏
怯、務爲退避自全之計、雖公遠策之忠、始終不貳、
然握兵在外、間隙易生、向非主上見幾之明、不惑
羣議、則諸將必引而南、大勢傾矣、及奉此詔、異議
乃息、而諸將亦始爲固守計、旣而賊大張聲勢於
淮東、阻韓世忠承楚之兵、不敢進、楊沂中亦以十
月四日抵濠州、公聞光世已舍廬州而南、淮西人
情恟動、星夜疾馳至采石、遣諭光世之衆曰、有一
人渡江、即斬以徇、光世聞公來采石、大恐、即復駐
軍、與沂中接連相應、劉猷分麟兵之半來攻沂中、
是月十日、沂中大破猷於藕塘、降殺無遺、猷僅以
身免、麟拔寨遁走、虜獲甚衆、得糧舟四百餘艘、於
是公奏車駕宜乘時早幸江上、上賜手書曰、賊豫

阻兵、梟雛犯順、夾淮而陣、侵壽及濠、卿獎率師徒、
分布要害、臨敵益壯、仗義直前、箕張翼舒、風馳電
掃、遂使凶渠宵遁、同惡自焚、觀草木以成兵、委溝
壑而不顧、昔周瑜赤壁之舉、談笑而成、謝安淝上
之師、指揮而定、得賢之効、與古何殊、寤寐忠勤、不
忘嘉歎、公奏曰、逆雛遠遁、尙稽授首之期、金寇方
強、未見息戈之日、臣之罪大、何所逃刑、願陛下念
十年留滯之非、歎雙馭還歸之晚、儻爲民而勞己、
當有神以相身、無使自謀擇利之言、得惑至高無
私之聽、又上奏以賊臣邇者輒入邊塞、今雖勝捷、
而渠魁遁去、殺戮雖衆、亦吾赤子、致彼操戈而輕
犯、由臣武備之弗嚴、願賜顯黜、以允公議、上深嘉
歎焉、有旨、都督府隨行官吏、軍兵諸色人等備見
勤勞、可令張某等第保奏、公奏、馳驅盡瘁、職所當
然、賞或濫加、士將解體、乞上保奏戰功、庶可旌勸
軍士、又遣內侍賜公古端石硯、筆、墨、刀劍、犀甲、且

召公還。及至平江、隨班朝見。上曰：「卻賊之功，盡出右相之力。於是趙鼎惶懼乞去。」方公未至平江時，鼎等已議回蹕臨安。公入見之，次日具奏曰：「昨日獲聞聖訓，惟是車駕進止一事利害至大。蓋天下之事，不唱則不起，不爲則不成。今四海之心，孰不思戀王室。虜叛相結，脅之以威，雖有智勇，無由展竭。三歲之間，賴陛下一再進撫，士氣從之而稍振，民心因之而稍回。正當示之以形勢，庶幾乎激忠起懦。而三四大帥者，亦不敢懷偷安苟且之心。夫天下者，陛下之天下也。陛下不自致力以爲之先，臣懼被堅執銳，履危犯險者，皆有解體之意。今日之事，存亡安危所自以分。六飛儻還，則有識解體、內外離心，日復一日，終以削弱。異時復欲下巡幸詔書，誰能深信而不疑者？何哉？彼知朝廷姑以此爲避地之計，實無意於圖回天下故也。論者不過曰：萬一秋冬有警，車駕難於遠避。夫軍旅同心，將

士用命，扼淮而戰，破敵有餘。況陛下親臨大江，氣當百倍。苟士不効力，人有離心，陛下雖過自爲計，將容足於何地乎？又不過曰：當秋而進，士有戰心。及春而還，絕彼窺伺。爲此論者，特可紓一時之急，應倉卒之警。使年年爲之人，皆習熟，謂我不競，當有怨望，難乎其立國矣。又不過曰：賊占上流，順舟而下，變故不測。夫襄漢我所有也，賊舟何自而來？使虜叛事力有餘，果然凌犯，水陸偕進，自上而濟，陛下雖深處臨安，亦能以安乎？矧惟陛下負四海之重責，有爲而未成，天下猶矜憐而歸心於陛下。不爲而坐待其盡，其爲禍可勝言耶？要須剛大志氣，恢廓度量，以拯救天下爲心，仰不愧於天，俯不作於人，度事而爲，審時而動，先謀自治，利而誘之，致而破之，何難而不可濟？今臣侍陛下以還歸，在臣之謀，無所任責，臣亦得計矣。而爲陛下國家計，則爲不忠。是以披心腹，露肝膽，反復一二言之。惟



陛下詳教而曲諭焉。庶幾君臣之間得盡其道。不貽萬世之悔。上翻然從公計。十二月、趙鼎出知紹興府、專委任公。公謂親民之官治道所急、而比年以來內重外輕、祖宗之法盡廢。流落于外者終身不獲用、經營于內者積歲得美官。又官于朝者不歷民事、利害不明、詔令之行、職事之舉、豈能中理。民多被其害。遂條具以聞。郡守、監司有治狀、任滿除郎。郎曹資淺、未經民事之人、秩滿除監司、郡守。令中書省、御史臺籍記姓名、回日較其治効、優加擢用。治民無聞者、與閑慢差遺。館職未歷民事者除通判、郡守、殿最如前。仍乞降詔。又以災異奏^⑤復賢良方正科。上皆從之。七年正月、上以公去冬卻敵之功、制除特進。公懇辭再四。先是十二月以祿令成書加金紫光祿大夫。公辭不得、即求回授兄滉。至是上謂公曰、卿每有遷除、辭之甚力、恐於君臣之義有未安也。公乃奉命。

朱熹撰 《晦庵先生朱文公文集》卷九五

校記

①絃：宋浙江刊本《晦庵先生文集》作「紃」。

②陞：原作「陞」，據右引改。

③關：原作「開」，據右引改。

④白：原作「曰」，據右引改。

⑤業：原作「宗」，據右引改。

⑥宄：原作「究」，據右引改。

⑦艱：右引作「傾」。

⑧被：原作「彼」，據右引改。

⑨特：原作「時」，據右引改。

⑩二「忘」字，清賀瑞麟《朱子文集正訛》改作「亡」。

⑪逞：原作「退」，據宋淳熙刊本《晦庵先生朱文公文集》改。

⑫夫：原作「未」，據清賀瑞麟《朱子文集正訛》改。

⑬六：原作「九」，據宋浙江刊本《晦庵先生文集》改。

⑭函：原作「澗」，右引作「涵」。按：當作「函」，徑改。

⑮奏：原作「奉」，據右引改。

宋儒碑傳集卷一百

張浚 二

少師保信軍節度使魏國公致仕贈太保

張公行狀 下

公與趙鼎當國時、議徽宗在沙漠、當遣信通問、遂遣問安使何薛等行。是年正月二十五日、薛歸、報徽宗皇帝、寧德皇后相繼上仙。上號慟擗踊、哀不自勝。公奏、天子之孝、與士庶不同。必也仰思所以承宗廟、奉社稷者。今梓宮未返、天下塗炭、至讎深恥、亘古所無。陛下揮涕而起、歛髮而趨、一怒以安天下之民、臣猶以爲晚也。數日後求奏事、深陳國家禍難、涕泣不能興。因乞降詔諭中外。上命公具草以進、親書付外。其詞曰、朕以不敏、不明、託於士民之上、勉求治道、思濟多艱。而上帝降罰、禍延于我有家、天地崩裂、諱問遠至。嗚呼、朕負終身之戚、懷無窮之恨。凡我臣庶、尙忍聞之乎。今朕所賴以

宏濟大業、在兵與民。惟爾小大文武之臣、早夜孜孜、思所以治兵卹民、輔朕不逮。皇天后土、實照臨之。無或自暇、不卹朕憂。又以公請、命諸大將率三軍發哀成服、中外感動。公退、又具奏待罪曰、仰惟陛下時遇艱難、身當險阻、圖回事業、寢食不遑。所以思慕兩宮、憂勞百姓、未嘗一日忘也。臣之至愚、獲遭任用、在諸臣先。每因從容語及北狩事、聖情惻怛、淚必數行。臣感慨自期、願殲虜讎。十年之間、親養闕然、爰及妻孥、莫之私顧。其意亦欲遂陛下孝養之至、拯生民塗炭之難。則臣之事親保家、庶幾得矣。昊天不弔、禍變忽生、使陛下抱無窮之痛、積罔極之思、哀復何言。罪將誰執。載念昔者、陝蜀之行、陛下丁寧告戒、且曰、我有大隙于虜、刷此至恥、惟臣是屬。而臣終隳成功、使賊無憚。況以沙漠之墟、食飲憂慮、兩宮處此、違豫固宜。今日之禍、端自臣致。尙叨近輔、實愧心顏。伏願明賜罷黜、亟正



藏

典刑、仰以慰上皇在天之靈、俯以息四海怨怒之氣。上降詔起公視事、公再上疏待罪、不獲請。車駕以二十七日發平江、三月十一日至建康。時公總領中外之政、會車駕巡幸、又值國卹、幾事叢委。公以一身任之、至誠惻怛、上下感動、人情賴公以安。每對必深言讎恥之大、反復再三、上未嘗不改容流涕。上方厲精克己、務自損節、戒飭宮庭內侍等無敢少有越度者。事無巨細、必以咨公。賜諸將詔旨、往往命公擬進、未嘗易一字。四方有災異、公必以聞、祥瑞則皆抑不奏。知果州宇文彬、通判龐信孺進嘉禾九穗、並鐫秩放罷、而四方皆知朝廷好惡所在矣。四月、公行淮西、撫諭諸屯、築廬州城、治東西關、且申防秋備。自公來東南、太夫人留蜀。及再入政府、遣人迎侍。太夫人安于蜀、未即出。上爲降旨、召公兄滉俾迎侍而來、又遣內侍胡宗回往喻意。五月始達建康、而公亦自淮西歸。上疊遣中

使勞問太夫人、賜予稠疊。公戴星而出、經處國事、至暮入侍色養、委曲奉承、中外觀感歆慕、傳相告語、以爲美談。自公與趙鼎在相位、以招來賢才爲急務、從列要津、多一時之望、百執事奔走效職、不敢自營、人號爲小元祐。而公尤未嘗以恩澤私親戚。仲兄滉上知其賢、累欲加以異恩、公輒辭。及賜進士第、後省官繳駁、公非惟不加忤、且奏不當以臣故沮後省公議。外舅宇文時中政和中爲郎、出守大藩、舊已寓直、萬里召赴、僅進職知湖州。舅氏計有功久在幕府、得直徽猷閣。公止、乞就秘閣、人服其公。公以人主當務講學、以爲修身致治之本、薦河南門人尹焞宜在講筵、有旨趣赴闕。會旱災、且自太夫人以次闔門悉卧病、公力求去、至再四不得。方車駕在平江時、公歸自江上、奏劉光世握兵數萬、無復紀律、沈酣酒色、不卹國事。語以恢復、意氣怫然。宜賜罷斥、用警將帥。上然之、罷光世而



以其兵盡屬督府。公命參謀兵部尙書呂祉往廬州節制。公又自往勞之。人情協附。上下帖然。而樞密使秦檜。知樞密院事。沈與求。意以握兵爲督府之嫌。奏乞置武帥。臺諫觀望。繼有請。乃以王德爲都統制。即軍中取酈瓊副之。公歸。以爲不然。奏論之。而瓊等亦與德有舊怨。與其下八人列狀訴御史臺。乃命張俊爲宣撫使。楊沂中。劉錡爲制置判官以撫之。此軍自聞王德爲帥。往往懷疑。而酈瓊遂陰有異志。唱搖其間。八月八日。瓊等舉軍叛。執呂祉以行。欲渡淮歸劉豫。祉不肯渡。冒瓊等碎齒折首以死。公遂引咎。力求去位。上不得留。因問可代者。公辭不對。上曰。秦檜何如。公曰。近與共事。始知其暗。上曰。然則用趙鼎。遂令公擬批召鼎。旣出。檜謂公必薦己。就閤子與公語。良久。上遣人促進所擬文字。檜始錯愕而出。後反謂鼎上召公。而張丞相遲留。至上使人促。始進入。檜之交諜類此。公

本以檜靖康中建議立趙氏。不畏死。有力量。可與天下事。而一時仁賢薦檜尤力。公遂推引。旣同朝。始覺其顧望包藏。故臨行因上問及之。先是。公遣人賁手榜入僞地云。劉豫本以書生被遇太上皇帝。曾居言路。主上嗣極。擢守鄉郡。當山東之要衝。任濟南之委寄。眷禮殊厚。責望至深。俄聞率衆以請降。旋乃失身而據位。諒亦迫於畏死。姑務偷生。如能誘致金人。使之疲弊。精兵健馬。漸次消磨。茲誠報國之良圖。亦爾爲臣之後効。更須愛惜民力。勿使傷殘。儻或永懷異心。自致顯戮。豈惟皇天后土有所不容。抑恐義士忠臣終懷憤疾。金虜用事者見此榜。已疑豫。八月。豫聞王師欲北向。遣韓元英告于虜。謂南寇張某總領烏合之兵。或逼宿亳。或窺陳蔡。或出襄陽。增修器甲。趣辦軍裝。其志不小。先起制人。後起制於人。欲乞兵同舉。虜得此報。謂豫眞欲困己。益疑之。會瓊等叛去。公復多遣間

散持蠟書、故遺之。大抵謂豫已相結約、故遣瓊等降、而豫又乞兵于虜。十月、虜副元帥兀朮徑領兵來廢豫、惜其機會之來、公已去位矣。蓋公以九月五日得請、授觀文殿大學士、提舉江州太平興國宮。左司諫王縉奏乞留公、即日補外。都官郎中趙令衿繼上疏、亦罷去。而御史中丞周秘、殿中侍御史石公揆、右正言李誼、交章詆公未已、旋落職、以朝奉大夫、秘書少監分司西京、永州居住。於是趙鼎復當國、而車駕自江上還臨安矣。公出任國事、每以不得從容盡子職爲念。及既去國、太夫人以公退處、欣然從之。八年二月、抵永、左右侍旁、凡所以順承親意者、無不曲盡。太夫人安之、不知其爲遷謫也。然公自以爲上遇我厚、雖流離遠屏、亦未嘗一念不在朝廷。作草堂旁近、以奉版輿遊歷、命以三省、爲文紀之曰、予作堂于寓止客館之東隅、僅庇風雨、取曾子三省之目以名之。其省謂何。思

吾之忠於君、孝於親、修於己者、恐或未至也。士大夫學聖人之道、當求所以通天人之際。予之三省、將有進於斯而愧其未能也。則公之所深省而自得者遠矣。是歲秦檜已得政、始決屈己和戎之議。九年正月、詔書至永。公伏讀恐懼、寢食不安、移書參知政事孫近、大略曰、魯仲連不尊秦爲帝、且云連寧有蹈東海而死、蓋知帝秦之禍遲發而大。況我至讎深隙、乃欲修好而幸目前少安乎。異時歲幣求增而不已、使命絡繹以來臨、以至更立妃后、變置大臣、起罷兵之議、建入覲之謀、皆或有之矣。某是以伏讀詔書、不覺戰汗。幸公深思密以啓沃。又聞故人李光自洪州召入政府、復以此意移書抵之、懷不自己。又具劄子以奏曰、恭覩詔書之頒、再三伏讀、通夕不寐。今日事之虛實姑未論、借令虜中有故、上下分離、天屬盡歸、河南遂復、我必德其厚賜、謹守信誓。將來人情益解、士氣漸消、彼或



內變既平、指瑕造隙、肆無厭之欲、發難從之請、其將何詞以對。顧事理可憂、有甚於此者。陛下焦心勞慮、積意兵政、精誠感格、將士漸孚。一旦北面事虜、聽其號令、遊談之士取功於一時、忠勳之臣置身於無用、小大將帥、孰不解體。陛下且欲經理河南而有之、臣知其無與赴功而共守者矣。今從約之遽、肆赦之速、用世儒之常說、答猾虜之詭秘、措置失緒、不勝寒心。願陛下思宗社之計、圖恢復之實、逼之以大勢、庶乎國家可得而立。臣罪戾之餘、一意養親、深不欲論天下事。顧惟利害至大至重、不忍緘默、以負陛下之知。惟陛下留意。二月、以大需復宣奉大夫、提舉臨安府洞霄宮、任便居住。公復具劄子曰、竊惟今日事勢處古今之至難、一言以斷之、在陛下強勉圖事而已。陛下進而有爲、則其權在我、且順天下之心。間雖齟齬、終有莫大之福。陛下退而不爲、則其權在敵、且拂天下之心。今

雖幸安、後將有莫大之憂。夫在彼者情不可保、在我者心不可失。外徇敵國、內罹實害、智者所不爲也。仰惟聖慈、深計審慮、茂圖大業、永福元元。又自作謝表云、敢不專精道學、黽勉身修。求以事親、方謹晨昏之養。庶幾報國、敢忘藥石之規。視此、則公許國之忠爲如何哉。居旬日、又具劄子曰、自陛下回駐臨安、甫閱歲時、聖心之所經營、朝論之所商榷、專意和議、庶幾休息、莫不幸其將成矣。臣嘗不寐以思、屈指而計、虜人與我讎讐之深、設心措意、果欲存吾之國乎。抑願其委靡而遂亡也。臣意其力弱未暇、姑借和以怠我之心。勢盛有餘、將求故以乘吾之隙。理既甚明、事又易見。然則紛紛異議、可端拱而決矣。料虜上策、還梓宮、復母后、輿地來歸、不失前約、結懽篤好、以怠我師。遲之數年、兵無戰意、然後遣一介之使、持意外之詔、假如變置大臣、更立妃后、將何以塞請。虜出中策、則必重邀求、

責微^①禮失約爽信、近在期年、中原之地、將有所付。如梁武之立北魏王顥者、尙庶幾於前。虜出下策、怒而興師、直臨江表、勢似可愕、而天下之亂、或從此而定矣。是月、復資政殿大學士、知福州、兼福建路安撫大使。公以太夫人念鄉、不欲東去、力辭至再三。四月、公念^②前論講和事未蒙開納、又具劄子曰、竊惟陛下建炎初載、嘗歷大艱、天意至深、益彰聖德。前事不忘、後事之鑑。伏願亟收人心、務振士氣、權勢專制、操縱自我、外之醜虜、曷發敢侮之謀。內之羣帥、益堅盡節之志。天下國家、我所自定。宋之社稷、永永無窮。夫理有近利、亦有深憂。有天下者、當審機會、度人情、斷大義、持柄握權、不以與敵。腐儒寡能遠見、事至而悔、將何及焉。況夫今日事機尙可、因權適變、速於救藥。惟望聖慈斷以無疑。則天下幸甚。八月、聞虜遣使來、以詔諭爲名、則又具奏曰、臣近者累輸誓說、仰瀆聖明、誠以憂君過

慮、不能自息。竊惟天下之事、有置必有廢、有與必有奪。虜以詔諭爲名、持廢置與奪之大柄。且其蓄謀起慮、欲以沮人心、奪士氣、而坐傾吾國。臣之所憂、不但目前也。劉先主曰、濟大事以人心爲本。此存亡之大計。願陛下考臣前後所奏、留神毋忽焉。福州之命、旣累辭不獲、公念時事多虞、惟在近或可以補報萬一、遂受命而東。九月、至閩中、閩素號健訟難治、公謂人心一也、正由臨民者先有逆詐、億不信之心、是以不能感格。入境、一切諭以義理、飭守令誠意民事、令鄉里長老知書者率勸後生、及彊悍者無爲鄉黨羞、民皆感仰。每出、觀者至升屋登木如堵牆。十年正月、上遣中使撫問、公附奏謝、且曰、願陛下全養精神、剛大志氣、惟果惟斷、見幾見微、察彊弱於言辭之際、轉禍福於談笑之間、無使噬臍、爲天下笑。時虜中變盟約、復取河南。公奏曰、臣竊念自群下決回鑾之議、國勢不振、事機



之會失者再三。向使虜出上策、還梓宮、歸兩殿、供須一無所請、宗族隨而盡南、則我德虜必深、和議不拔、人心懈怠、國勢浸微。異時釁端卒發、何以支持。臣知天下非陛下之有矣。今幸上天警悟、虜懷反復、士氣尙可作、人心尙可回。願因權制變、轉禍爲福、用天下之英才、據天下之要勢、奪敵之心、振我之氣、措置一定、大勳可集。臣又有臆見、當燕山新復、朝廷恃郭藥師爲固。一旦醜虜敗盟、藥師先叛。何則。賣國無恥之人、本無它長、難與共事。願陛下每以爲鑑、制御於早、無忽。繼聞淮上有警、連以邊計奏知。又條畫海道舟船利害。上嘉公之忠、遣中使獎諭。公時大治海舟至千艘、爲直指山東之計、以俟朝命。在郡細大之務必躬必親、人人感悅、和氣薰然、訟事清簡。山海之寇招捕無餘、間引秀士與之講論、閩人化之。十一年三月、劉錡大破兀朮于順昌。錡本晚出、公一見關陝、奇之、即付以事。

任、錡亦感慨自立。公歸、薦之上、謂錡才識諸將莫及。而一時輩流嫉其材能出己右、百計沮遏。公既平湖寇、即薦知岳州。已而召赴行在、左右扶持、付以王彥軍、且擢爲騎帥。至是、錡竟以所部成大功。方欲進兵乘虜虛、而檜召錡還矣。錡還朝、上見之、首曰、張某可謂知人。檜遣郎官蓋諒來諷公、使附其議、當即引公爲樞密使。公答檜書、歷言和不可成、虜不可縱、且面爲諒言。諒歸、檜怒。時幕將等歸自虜、朝廷復遣劉光遠等奉使、而公亦力請祠奉親矣。十一月、除檢校少傅、崇信節度使、充萬壽觀使、免奉朝請。去福之曰、軍民送者咨嗟號泣、相屬於道。公以蜀遠朝廷、不欲徑歸、遂奉太夫人寓長沙。十二年、太母鸞輅來歸、制封公和國公、具劄子以賀。且曰、與或爲取、安必慮危。夫惟務農而彊兵、乃可立國而禦侮。願勤聖慮、終究遠圖。公恐太夫人念歸、乃即長沙城之南爲屋六十楹、以奉色養。

太夫人安焉。築堂榜曰盡心親爲之記。大意欲益求所以盡心於君親者。居間玩意六經。考諸史治亂得失。益思前事之機微。憂時之志。一飯未嘗忘也。檜旣外交仇讎。罔上自肆。惡嫉正論。諱言兵事。自以爲時已太平。日爲浮文侈靡。愚弄天下。獨忌公甚。中丞万^③俟高希檜^④旨。論公卜宅僭擬。至倣五鳳建樓。上不以爲然。檜遣朝士吳秉信以使事至湖南。有所案驗。且以官爵誘之。秉信造公。見其居不過中人常產可辦。不覺歎息。反密以檜意告公。而歸。且奏其實。檜黜秉信。十六年。公念檜欺君誤國。使災異數見。彗出西方。欲力論時事。以悟上意。又念太夫人年高。言之必致禍。恐不能堪。太夫人覺公形瘠。問故。公具言所以。太夫人誦先雍公紹聖初對方正策之詞曰。臣寧言而死于斧鉞。不忍不言而負陛下。至再至三。公意遂決。乃言曰。臣聞受非常之恩者。圖非常之報。拯焚溺之急者。乏徐

緩之音。竊惟當今事勢。譬如養成大疽於頭目心腹之間。不決不止。決遲則禍大而難測。決速則禍輕而易治。惟陛下謀之於心。斷之以獨。謹察情僞。豫備倉卒。猶之奕棋。分據要害。審思詳處。使在我有不可犯之勢。庶幾社稷有安全之理。不然。日復一日。後將噬臍。異時以國與敵者。反歸罪正議。此臣所以食不下咽。不能一夕安也。儻非陛下聖德在人。獲天地之祐。承祖宗之慶。有以照察其心。臣亦何所逃罪。事下三省。檜大怒。時公又以天申節手寫尙書無逸篇具劄子爲賀曰。臣嘗潛心聖人之經。有可以取必於天。膺大福。獲大壽。決然無疑者。輒輸丹誠。爲陛下獻。臣伏考周公無逸篇。商王中宗嚴恭寅畏天命。自度治民祇懼。不敢荒寧。高宗嘉靖商邦。至於小大。無時或怨。周文王自朝至於日中。昃不遑暇食。用咸和萬民。不敢盤于遊田。以庶邦惟正之供。三君者。非獨身享安榮。而有國



長久、後世莫加焉。商自祖甲之後、立王生則逸、不知稼穡之艱難、不聞小人之勞、惟耽樂之從。是以罔或克壽、或十年、或五六年、或四三年。天道昭然、其應如響。古之聖人以一身莅天下、惠澤四海、無不如意、未嘗少有憂懼退怯之懷。凡以天道可必、吾無愧歉于心而已。臣不勝臣子祝頌之誠、願陛下兢兢業業、勉之又勉、永堅此心、以奉天道。天之所以報吾君者、宜如何哉。七月、檜命臺諫論公章四上。上以特進、提舉江州太平興國宮、連州居住。樊川周勣者、氣義人也。自公貶永、即來相從。公帥福唐、辟爲屬。公來長沙、勣亦從居焉。檜累書招勣不得、恨之、乃謂公與勣誹謗時事、亦削勣官、竄封州。公被命即行、自夫人以下皆留侍、獨挈子姪往。太夫人送之曰、汝無愧矣、勉讀聖人書、無以家爲念。公至貶所、月一再遣人至太夫人所。日夕讀易、精思大旨、述之於編、親教授其子棡。連爲州、景物

甚勝、暇即策杖遊歷。連人愛重公、爭持肴果以迎、所至必爲曲留終日。時檜益肆凶焰、遷謫者不絕于道、四方觀望。公處之恬然、形氣益充實。太夫人亦安居長沙。公在連作四德銘以示其人曰、忠則順天、孝則生福、勤則業進、儉則心逸。連人相與鑱之於石、家傳人誦焉。己巳歲、嶺南瘴疫大作、日色晝昏。官于連者、自太守而下死凡數人、郡人無不被疾、哭聲連巷、鄉落至有絕爨者。公和藥拯之、病者來請、日至千餘人。惟公家下至僕廝無一人告病、過者咨歎、莫不以爲天相忠誠也。居連凡四年、二十年九月、移永州。湖湘之人見公歸、喜甚、爭出迎。望見公所養勝前、退皆歎息相賀。公遣人迎太夫人、以次年四月至永、母子相見、彊健如初。永舊所嘗居、人情尤相安、而公兄徽猷公遽以疾終。方公官于朝及在貶、徽猷公常留太夫人左右、悅適其意、太夫人鍾愛之。至是悲惻殆不能爲懷。雖公

解釋備至、太夫人亦年高多疾矣。蓋公去國至是幾二十年、退然自修、若無能者。而天下士無賢不肖、莫不傾心、武夫健將言公者、咨嗟太息、至小兒婦女、亦知天下有張都督也。虜人憚公尤甚、歲時使至虜中、其主必問公安在。方約和時、誓書有不得輒更易大臣之語、蓋懼公復用云。至是秦檜寵位既極、老病日侵、鄙夫患失之心、無所不至、無君之迹顯然著見。意欲先剪除海內賢士大夫、然後肆其所爲。尤憚公爲正論宗主、使已不得安、欲亟加害、命臺臣王珉^⑤、徐恠^⑥輩有所彈劾、語必及公。至彈知洪州張宗元文、始謂公國賊、必欲殺之。有張柄者、嘗奏請令檜乘金根車、其死黨也、即擢知潭州。汪召錫者、娶檜兄女、嘗告訐趙令衿、遣爲湖南提舉官、俾共圖公。又使張常先治張宗元獄、株連及公。以爲未足、又捕趙鼎子汾下大理獄、備極慘酷、考掠無全膚、令自誣與公及李光、胡寅等謀

大逆。凡一時賢士五十三人、檜所惡者、皆與獄上。會檜病篤、不能書判以死。時紹興二十有五年也。上始復親庶務、先勒檜子熺致仕、盡斥群兇、公迹稍安、而太夫人遽薨。有旨復公職、觀文殿大學士、除判洪州、公已在苦塊矣。哀苦扶護、以治命當歸葬雍公之兆、奏請俟命長沙。獨念天下事二十年爲檜所敗壞、人心士氣委靡銷鑠、政事無綱、邊備蕩弛、幸其一旦隕斃、當汲汲惟新、令圖而未見所以慰人望者。且聞完顏亮篡立、勢已驕豪、必將妄舉、可爲寒心。自惟大臣義同休戚、不敢以居喪爲嫌、五月、具劄子曰、臣夙負大罪、自謂必死瘴癘之地。仰惟陛下優容之、矜憐之、保全之、死骨復生、盡出聖神之造。自今以往、皆已死之日、而陛下實生之。臣今雖居苦塊中、安敢忽然遂忘陛下恩德、且顧惜一己而默不出一言、庶幾有補萬一哉。惟陛下察其用心、恕之而已。臣聞自昔忠臣事君、莫不



欲其主之聖、莫不欲其主之名顯日月、功蓋宇宙。彼知夫國家安榮、則其身亦與有安榮、故犯顏逆指而不敢辭也。姦臣不然、惟利是圖、不復它卹。導君於非、使重失天下之心、而陰肆其邪志。始則曲意媚順、而欺蔽人主之聰明、終則專事擅權、而潛移生殺之大柄。跡其包藏、有不可勝言者矣。然而身滅家亡、族覆世絕、見於史冊、歷歷可攷。天下後世視之、曾犬豕之不若。彼誠果何所利耶。惜乎至愚而莫之思也。日者陛下法乾之剛而用以沉潛、施設中幾、天下四夷孰不畏服。是臣可言之秋也。臣疏遠、不復預聞朝廷幾事、而伏自思念今日事勢極矣。陛下將拱手而聽其自然乎。抑將外存其名而博謀密計、求所以爲長久歟。臣誠過慮、以爲自此數年之後、民力益竭、財用益乏、士卒益老、人心益離、忠臣烈將淪亡殆盡、內憂外患相仍而起。陛下將何以爲策。方祖宗盛時、嘗與虜通和、惟力

敵勢均、而國家取兵於西北、取財於天下、文武之才世不乏人、是故得以持久。而百四十年之後、靖康大變、事出不意、禍亂之大、亘古所無。論者猶恨夫恃和爲安而不自治之失。今天下幾何。譬之中人之家、盜據其堂、安居飽食其間、而朝夕陰伺吾隙、一日之間、其舍我乎。然則陛下不可不深思、力圖於此時也。或謂虜嘗有弑立之舉、夫弑立之人、天地所不容、人情所甚惡。誠能任賢選能、修德立政、斷然爲吾之所當爲、口不絕和而實以勢臨之、彼必有瓦解之憂。借使虜不量度、輕爲舉動、第堅壁清野以持之、明示逆順、其衆自離、虜之危亡可立而待。何則。人心必不肯附逆而忘順。假之五七年、而虜之君臣之分定、彼國有人得柄用事、雖有賢智、莫知爲陛下計矣。願陛下精思審謀、無忘朝夕、無使真有噬臍之歎。夫約和衰弱之時、謂不能久而彊虜之變、荐生於內、是天贊陛下。違天不祥、

陛下其承之。臣聞人主之俯仰天地間、所以自立其身者、不過忠孝二字。此天下之大義、不可須臾少忽也。而臣行負神明、孤苦餘生、親養已無所施矣。事有大義所當爲者、不過盡忠於陛下。顧雖頭目手足有可捐棄而爲陛下用者、所不當顧惜。而況親逢聖明、極力保全、恩德至大、使臣有懷私顧己、匿情慮禍之心、則是陛下不負臣、臣實負陛下、天地鬼神其肯容之哉。是以不顧嫌疑、不避鼎鑊、不卹讒毀、爲陛下陳之。陛下勿謂軍民之心爲可忽、忠良之言爲可棄。夫治天下譬如槃水、一決而潰、有不可收拾者矣。陛下其念之哉。臣行年六十、死亡無日、非若紛紛互持和戰之說、惟恐其說之不勝而身之不獲用、貪目前之得、忽久遠之圖。臣知爲陛下國家計耳。陛下安榮、臣亦預有安榮、臣之自謀、亦豈有不審耶。幸未即隕、得終禮制。陛下不以臣爲愚而卒棄之、願陛下許臣居嚴、嫠間、優

游養痾、爲陛下謀畫心腹之臣、以畢愚盡忠、庶幾有補萬一。臣之志願足矣。惟陛下廓乾坤之度、以精求天下之賢、無忘祖宗國家之恥、父兄宗族之讎、盛德大業、昭著後世、臣猶幸及見之。繼被朝命、以太夫人之喪歸蜀。八月、行至荆南、會以星變詔求直言。公念虜數年間勢決、求釁用兵、吾方溺於宴安、謂虜可信、蕩然無備、沈該、万俟卨據相位、尤不厭天下望、朝廷益輕。顧伏在苦塊、經歷險阻、死亡無日、不得爲上終言之、懷不自安、乃復奏曰、臣受陛下更生大恩、今至憂迫身、涉險萬里、常恐一旦死填溝壑、終無以仰報萬一。思以展盡所懷、瞑目無憾。臣嘗病世儒牽於戰和異同之說、而不知實爲一事。或者竊儒爲姦、不知經史之心、切切焉利祿是圖、而有以欺惑陛下之聽也。又其甚、則大姦大惡、挾虜懷貳、以自封殖其家、簞鼓曲說、愚弄天下、敢畢陳之。臣聞天地之大德曰生、而天地生



物之功本於秋冬。蓋非嚴凝之於秋冬，則無以敷榮之於春夏。然則秋冬之嚴凝，乃生物之基也。在萃之象曰：除戎器，戒不虞。泰之九二爻辭曰：包荒用馮河。泰萃之世，聖人謹於武備如此，謂不如是不足以生物而行其心也。況時方艱難，而可忽略不省，啓大禍于後，反謂是爲得哉？若夫一時之和，則亦聖賢生利天下之權矣。商湯事葛矣，而終滅葛。書曰：湯一征自葛始。周太王避狄矣，築室于岐。未幾謀以卻敵。詩曰：乃立冢土，戎醜攸行。文王事昆夷矣，卒伐之。詩曰：昆夷駉矣，維其喙矣。越勾踐事吳矣，坐薪嘗膽，竟以破吳。越語曰：越十年生聚而十年教訓，彼皆翕之乎始而張之乎終，汲汲乎德政修立而以生利爲心，未嘗恃和爲安，自樂其身而已也。漢高祖與項羽和，羽歸太公、呂后，割鴻溝以西爲漢，東爲楚。良、平進言：今楚兵罷食盡，釋而弗擊，是養虎自遺患也。漢王從之，卒成大業。漢

文帝與匈奴和，曾無間歲之寧。漢文全有天下，謂可^⑧和以息民。方是時，百姓猶不免侵凌之苦。至武帝始一大征伐之。其後單于來朝，漢三百年間，用以無事。唐太宗初定天下，有渭上之盟。未幾，李靖之徒深入沙漠之地，犁其庭，係其酋，海內始安焉。茲豈非以和爲權而亦得之哉？若夫石晉之有天下，則不然，取之非其道，謀之非其人。桑維翰始終於和，其言曰：願訓農習戰，養兵息民，俟國無內憂，民有餘力，觀釁而動，動無不成。若有深謀者，然考其君臣所爲，名實不孚于上下。朝廷之上，專務姑息，賞罰失章，施設繆戾，權移於下，政私於上，無名之獻，莫知紀極。一時用事方鎮之臣，往往昏于酒色，厚于賦歛，果于誅戮，以害于百姓。朝廷莫知所以御之。所謂訓農習戰，養兵息民，略無實事。維翰所陳，殆爲空言。姑欲信其當時必和之說，以偷安竊位而已。契丹窺見其心，謂晉無人，須求凌侮，曰

甚一日。後嗣不勝其忿，始用景延廣之議，僥倖以戰，而不知其荒淫怠傲，失德非一日。天下之心已離，天下之勢已去，天下之財已匱。延廣不學，不知行聖賢之權，亟思所以復其心，立其勢，彊其國，急於兵戰之爭，事窮勢極，數萬之師，無一夫爲之發矢北向者，至今爲天下嗤笑。言君臣委靡不振，服役夷狄者，必曰石晉云。仰惟陛下聰明聖智，孝心純一，即位以來，簡用實才，虜人聞風而畏之，於是有議和之事。陛下以太母爲重，且幸徽宗皇帝梓宮之亟還，和之權也。不幸用事之臣貪天之功，肆意利欲，乃欲剪除忠良，以聽命於虜，而陰蓄其邪心。方國家閒暇之時，怠傲是圖，德政俱廢，而專於異己之去，意果安在哉？夫虜日夕所願望者，欲我之忠良淪沒耳，欲我之盡失天下之心耳，欲我之將士解體，其氣不復振作耳，欲我之懷於宴安，以甘于耽毒耳。前日用事者一切徇其所甚欲而畢

爲之，不幾乎與虜爲地歟？身死之日，天下酌酒相慶，不約而同。下至田夫野老，莫不以手加額。其背天逆人，不忠于君，而天下之心重惡之如此。且彼曾不思虜之於我，其愛之而和乎？其有餘力而肯和乎？其國中亦有掣肘之虞而和乎？其欲圖之於後而和乎？臣謂虜有大讎大怨，不可復合，譬夫一葉之分。今日之和，必其酋帥攜離，人心睽異，姑爲此舉，以息目前。而圖回江淮，以去除後患之心，其中未嘗一日忘也。惜夫昏庸姦賊之人，參於富貴，闇於政事，曾無尺寸之效，以上報於國家，毫髮之惠以下及於百姓，分列黨與，布在要郡，聚斂珍貨，獨厚私室，爲身謀，爲子孫謀，而不知爲陛下謀，不知爲國家天下謀，坐失事機者二十餘年，誤陛下社稷大事。有識之士，誰不痛心。且夫賢才不用，政事不修，形勢不立，而專欲責成受命於虜，適足以啓輕侮之心，而正墮其計中。魯仲連所謂彼將有



所予奪、梁王安得晏然乎、而甚可痛恨者也。敵國之人何自而畏。敵國之心何自而服。敵國之難何自而成。遲以歲月、百姓離心、將士喪氣、亦危亡而已矣。臣願陛下鑑石晉之敗、而法商湯、周太王、文王之心、用越勾踐之謀、考唐、漢四君之事、以保圖社稷。深思大計、復人心、張國勢、立政事、以觀機會。未絕其和、而遣一介之使、與之分別曲直、逆順之理事、必有成。臣不孝之身、親養已絕、含毒忍死、其亡無日、徒能爲陛下言之而已。又伏思祖宗之德、在天下、至大至厚、太平之治、多歷年所、三代盛時、有不能及。恭惟皇帝陛下、稟乾剛之資、輔以緝熙之學、何爲而不成。何治而不致。願陛下充其志氣、擴其聰明、必使清明在躬、如太虛然、惟是之從、以選賢才、以修德政、以大基業、天下幸甚。又以所著否、泰卦解義進之。奏曰、臣往待罪相位、陛下賜臣親書周易否、泰二卦辭。其後臣謫居連山、益遠天

日、葵傾之心、不能自己。遇朔望、必取再拜伏讀。竊不自揆、爲二卦訓釋。久欲獻之、以備乙鑑、而負罪積畏、無路上達。今謹繕寫、昧死以進。願坐井之見、豈足以仰補萬一。惟臣子愛君之誠、則不能自己焉。竊惟易謹君子小人之辨、而二卦則其効之尤深切著明者也。其事則本諸一心、惟陛下留神。上付前奏三省、宰執沈該、^①萬。俟高、湯思退等見之、大怒、以爲虜初未有釁、歲時通問、不翅如膠漆、而公所奏、乃若禍在年歲者、或笑以爲狂。臺諫湯鵬舉、凌哲聞之、章疏交上、謂公方歸蜀、恐搖動遠方。有旨復令永州居住、候服闋日取旨。公自扶護西歸、抵綿竹、即卜日治太夫人葬、附雍公之兆。賓客紛至、自朝及夕、哭泣應接不少倦。子姪交諫、尊年不宜致毀、而公孝誠自天、不能已也。太夫人既葬十日而謫命至、且有朝旨促迫甚急。公即日就道、服闋得旨落職、以本官奉祠、居永。公自爲表謝曰、念

君臣雖分于異勢、而利害寔係于同舟。其憂國之誠拳拳不捨蓋如此云。公自是不復接賓客。日紬繹易、春秋論、孟、各爲之說。夜則閱司馬氏通鑑。如是者又四年、而宇文夫人亦終焉。自庚辰秋冬、朝廷頗聞虜有異志、公卿大夫下至軍民無不內懷岌岌。曰願公還相位、表疏不絕。三十一年春、有旨令公湖南路任便居住。時臨安積陰、命下之日、廓然清明、上下欣悅。公歸至潭。五月、奉欽宗諱、號慟至不能食。又聞虜有嫚書、不勝痛憤、上奏曰、孝慈皇帝訃自北來、又聞逆虜兵動、凡爲臣子、孰不痛憤。臣往叨任使、孤負眷知。主憂臣辱、主辱臣死、無所逃罪。臣又度今日虜勢決無但已、九月十月之間、必有所向。願陛下與大臣計議、早定必守必戰之策、上安社稷。未幾而亮兵大入、中外震動。十月、復公觀文殿大學士、判潭州。時虜騎跳梁兩淮、王權兵潰、劉錡引歸鎮江、兩淮之人奔迸南來、沿江

百姓荷擔而立。遂改命公判建康府、兼行宮留守、金書疾置、敦促甚遽。長沙在遠、傳聞不一、人人危懼。公被命明日、即首途曰、吾君方憂危、臣子之職、戴星而趨、猶恐其緩。至岳陽、遇大雪、亟買小舟、冒風濤、泛長江而下、且欲經歷諸屯、慰接將士。未至鄂、有士大夫自江東來者、云虜焚北采石、烟炎漲天、南岸人不復可立、公毋庸進也。公愀然曰、某被命即攜二子來、正欲赴君父之急。今無所問、惟直前求乘輿所在耳。長江是時無一舟行、獨公以小舟徑下、遭大風幾殆。北岸又近虜兵、從者憂惴甚。公不少顧。過池陽、聞亮被殺、然餘衆猶二萬屯和州。李顯忠兵在沙上、公渡江往勞、以建康激賞犒之一軍見公、以爲從天而下、驩呼增氣。虜謀報惴恐、一二日遁去。顯忠乘士氣銳追之、多所俘獲。公至建康、奏乞車駕早來臨幸。聞已進發、乃督官屬治具、不半月而辦。風采隱然、軍民恃以安。上至建



康公迎見道左。衛士見公、至以手加額、無不喜公復用、而悲公久處瘴癘、形容之瘠也。車駕入行宮、首引公見、問勞再四。公頓首謝上更生骨肉之賜。且曰、方秦檜盛時、非陛下力賜保全、無此身矣。上亦爲之慘然曰、檜之爲人、旣忌且妬。後六日、再引對、公奏、國家譬如人之一身、必元氣充實、然後邪不能干。朝廷元氣也。今邪氣得以干犯、必是元氣之弱、或汗或下。邪氣固暫退、然元氣不壯、邪再干之、恐難勝任。用人才、修政事、治甲兵、惜財用、此皆壯元氣之道。上改容開納。時車駕將還臨安、欲付公以江淮之事。已而中止、更留御營宿衛使楊存中、俾專措置。臨發、復引公對。公奏、陛下當京城阨危之際、毅然請使不測之虜、後復受任開元帥府、以孤軍當虜鋒。當是時、不知陛下之心還知有禍福生死否。上曰、朕爾時一心家國、豈知有禍福。豈知有死生。對曰、是心乃天心也。願陛下試反此心

而擴充之、何畏乎虜賊。上首肯焉。且勞公曰、朕待卿如骨肉、卿在此、朕無北顧之憂矣。卿久在謫籍、聞甚清貧、郊祀合得奏薦及封邑、當盡以還卿。繼遣內侍賜公黃金及象笏筆、公惶恐不敢辭。秦檜二十年間所以譖公者無所不至、有臣子所不忍聞者。獨賴上主張、不至死地。至是上見公辭和氣平、無淹滯之歎、而溫乎忠愛之誠、爲之感動。對輔臣嘉美再三。車駕旣還、或有勸公求去者。公念舊臣它無在者、而國家多虞之際、人心尤以己之去就爲安危、不忍舍而遠去。日治府事、細大必親。時虜騎雖去、人情未安、朝廷賴公屹然增重。兩淮之兵渡江歸息、而奔走瘡痍之餘、重以疫癘、自三衙諸軍皆留建康、死者日數十人。公親爲分課醫工、置曆診候、自帥司給藥餌及它費、遣官屬監示。至日暮、公親視曆、考其勤惰得失而賞罰之、全活甚衆。四月、楊存中罷。公被旨兼措置兩淮、繼兼節制

建康、鎮江府、江、池州、江陰軍駐屯軍馬。時虜以十萬衆圍海州甚急。鎮江都統制張子蓋提兵在淮上。欲前救。聞當受公節制。士氣十倍。而公受命之日。亦即爲書抵子蓋。勉以功名。令出奇乘虜弊。子蓋率兵力戰。大破虜衆。得脫歸者無幾。公謂去歲淮上諸軍奏功。例不以實。有功者擯不錄。而庖人廝役悉沾濫賞。輕名器。耗財用。亂紀綱。使軍士不復知所勸激。奏。今海州上功。當有以深革其弊。使可爲後法。於是令諸大將戰勝。則命統制官以下至旗頭押擁隊。公共保明。限三日申。稍有繆僞。重寘典憲。公德威表著。將士望風畏愛。至是復總兵權。當軍政二十年廢弛之後。問疾痛。卹勞苦。撫孤遺。禁刻剝。勉將士。俾知忠順。於是人人勉勵。慨然有趨事赴功之志。公念軍籍日益凋寡。中原之人久困腥羶。思慕我宋。欲因茲時。乘虜事力未彊。頓兵淮甸要處。以招集忠義來歸之人。內以壯軍勢。

實曠土。外以讐虜情。系人心。奏曰。虜人退兵之後。士馬物故幾半。飲馬長江之志。固未敢萌也。而用事羣僧人各有心。日夜備具。似有欲窺淮甸之謀。先事預圖。理不可緩。我之甲兵。方之西北之士。所存無幾。而又去歲捍禦大敵。傷折逃亡。繼以病死。十亦四五。馬固同之。以今歲事力比量。酌度。夫人而知其爲弱也。議者或欲弭兵息民。以治在我。此說近是也。誠恐虜之圖事未肯但已。一旦倉卒。何以待之。又況補集將士。必資西北之人。能戰忍苦。方爲可仗。然則乘機及時。內堅守備。外疑敵心。左牽右制。使之首尾奔趨。人情搖動。斯爲成算。不可忽也。淮甸要處。我不先圖。異日彊虜起侮。渡淮先據形勢。則事有難處者矣。又奏曰。臣體訪得東北今歲蝗蟲大作。米價踴貴。中原之人極艱於食。欲乞朝廷或撥米糧。或錢物。付臣措置。招來吾人。人心旣歸。虜勢自屈。公又以淮楚之人自古可用。乘



其困擾之後、當收以爲兵、又奏曰、兩淮之人素稱
彊力、而淮北義兵尤爲忠勁、困於虜毒亦已甚矣。
讎虜欲報之心、蓋未嘗一日忘也。特部分未嚴、器
甲不備、雖有赤心、不能成事。自彊虜恣爲殘虐、十
室九空、皇皇夾淮、各無所歸。臣恐一旦姦夫鼓率、
千百爲群、別致生事。謂可因其憤嫉無聊之心而
招集之、欲置御前萬弩營、募民彊壯、年十八以上、
四十五以下、堪充弩手之人、並不刺臂面、以御前
彊弩効用爲名、各給文帖、書寫鄉貫、居住之處、及
顏貌、年甲、姓名、令五人結一保、兩保爲一甲、十甲
爲一隊、遞相委保、有功同賞、有罪同罰。於建康府
置營寨安泊。詔皆從公請。公即下令曰、兩淮比年
累被荼毒、父子兄弟夫婦殺傷虜掠、不能相保。今
議爲必守之計、復恥雪怨、人心所同。有願充者、宜
相率應募。至於淮北久被塗炭、素懷忠義、欲報國
恩、亦當來歸、共建勳業。於是兩淮之人欣然願就、

率皆彊勇可用。公親訓撫之、又奏差陳敏爲統制。
敏起微賤、聲迹未振。公擢於困廢中、感激盡力圖
報、未幾成軍。方召募之初、浮言鼓動、欲敗成績。數
月間、來應者不絕。衆論始定。公謂虜長於騎、我長
於步、制步莫如弩、衛弩莫如車、乃令敏專制弩治
車。又謂三國以後、自北窺南、未有不由清河、渦口
兩道以舟運糧。蓋淮北廣衍、糧舟不出於淮、則懼
清野無所得、有坐困之勢。於是東屯盱眙、楚泗以
振清河、西屯濠、壽以扼渦、潁、大兵進臨、聲勢連接、
人心畢歸、精兵可集。即具奏言之。又乞多募福建
海船、由東海以窺登萊、由清河窺淮陽。有旨下福
建選募。張子蓋自鎮江來謁、公與之語、見其智識
過人、謀慮精審、與圖規取山東之計。奏子蓋才勇
而性剛氣直、願優容之。且乞益以精甲、資以財用、
俾屯江淮、措置招來。會今上即位、公首奏建康行
宮當罷工役華采之事、據今所營、足備臨幸。有詔

從之。上自藩邸熟聞公德望、臨朝之初、顧問大臣、咨嗟歎息。首召公赴行在、賜公手書曰、朕初膺付託、以眇然一身、當萬幾之繁、夙夜祇懼、未知攸濟。公爲元老、被遇太上皇帝禮遇之久、羣臣莫及。宜有嘉謀至計、輔朕初政。方今邊疆未靖、備禦之道、實難遙度。思一見公、面議其當、使了然如在目中。繫公是望、公其疾驅、副朕至意。公奏曰、臣敢不以前日恪事太上皇帝之心事陛下。惟一其志、有隕無二。遂就道。未至國門、敦促再四、至即引見。上見公、改容禮貌。曰、久聞公名、今朝廷所恃惟公。命內侍賜公坐、降問再四。公奏、人主以務學爲先。人主之學本於一心、一心合天、何事不濟。所謂天者、天下之公理而已。人主惟嗜欲私溺、有以亂之、失其公理。故必須兢兢業業、朝夕自持、使清明在躬、惟是之從、則賞罰舉措無有不當、人心自歸、醜虜自服。上竦然曰、當不忘相公之言。公又奏、今日便當

如創業之初、宜每事以藝祖爲法、自一身一家始、以率天下。公見上天錫英武、每言及兩朝北狩、八陵廢隔、兆民塗炭、讎恥之大、感痛形於詞色。因力陳和議之非、勸上堅志以圖事。制除公少傅、江淮東西路宣撫使、節制建康、鎮江府、江池州、江陰軍屯駐軍馬、進封魏國公。太上皇退處德壽宮、羣臣希得進見、獨再引公、見輒移時。以秋防復往江上、留臨安旬日、中使問賜飲食等不絕。禮遇冠一時。公舟行出國門、見蝗自北來、飛長數里、即具奏曰、災異之起、必有所因。陛下即位之初、憂勞庶政、豈容有此。伏願益修欽畏、以答天心。抑天之愛陛下、殆將有以警勉於初、助成聖德也。更乞延見近臣、咨問時政、必使惠澤實及軍民。先是、公謂新政以人才爲急、人才以剛正爲先、因疏當今小大之臣、有經挫折而不撓、論事切直者、凡十數人薦於上、且乞以間暇時數、引賢者自近、賜以從容、庶幾啓



沃之間有所廣益。復薦陳俊卿、汪應辰可爲宣撫判官、有旨差俊卿。又奏前國子司業王大寶可備勸講論思、上遂命召大寶。公至江上、復奏曰、直言不聞、非國之福。自秦檜用事、二十年間、誣以它罪、賊殺忠良、不知幾何人。願下明詔、以太上之意、條具往以直言獲罪之人、各加恩施。其誣之以事而身已淪沒、許本家開析事因、經朝廷雪訴、庶幾冤憤之氣得申今日。又奏乞盡天下之公議、以用天下之才。時洪邁、張掄使虜回、見公於鎮江、具言初到虜中、鎖之寓館、不與飲食、令於表中換陪臣字。公奏、虜主恃彊、彈壓諸國。今日之事、惟修德立政、寢食之間、無忘此讎。上慰天心、下從人欲、不當復遣使以重前失。翰林學士史浩建議、欲築瓜洲采石城、上下公議。公謂、今臨淮要地、俱未措置、高郵、巢縣、家計亦復未立、而乃欲驅兵卒、但於江干、建築城堡、豈不示虜削弱、失兩淮之心、墮將士之氣。

或有緩急、誰肯守兩淮者。不若先城泗州、便。上以公言爲然。浩已爲參知政事、力主初議。其餘公所措置、浩輒不以爲是。公以張子蓋可任、使鎮淮上、圖山東。而子蓋所陳、浩輒沮抑百端。至下堂劄詰責、又深遏海州之賞。公方招來山東之人、至者雲集、而浩不肯應副錢糧。且謂不當接納以自困。公奏乞上幸建康、而浩專欲爲懷安計。公治舟楫于東海、所圖甚遠。而浩輒令散遣。凡公所爲、動皆乖異。黨與唱和、實繁有徒。子蓋西人、負氣竟以成疾。公遣官屬勞問不絕、且乞上親喻之。上賜手書撫存備至、而子蓋卒不起。山東前所結約者皆失望。浩遣其腹心司農寺丞史正志來建康、專欲沮招納事。公論奏曰、竊惟國家自南渡以來、兵勢單弱、賴陝西及東北之人不忘本朝、率衆歸附、以數萬計。臣自爲御營參贊、目所親見、後之良將精兵、往往皆當時歸正人也。三十餘年、扞禦力戰、國勢以

安。今一旦遽欲絕之事，有大不可者。此令一下，中原之人以吾有棄絕之意，必盡失其心，一也。人心既失，變爲寇讎，內則爲虜用，外則爲我寇，二也。今日處分既出聖意，將見淮北之人無復渡淮歸我者。人迹既絕，彼之動息無自而知，間探之類，孰爲而遣。三也。中原之人本吾赤子，今陷於虜者三十餘年，日夜望歸，如赤子之仰父母。今有脫身而來者，父母拒戶棄絕之，不得衣食，於天理人情皆所未順。四也。自往歲用兵，大軍以奔波疾疫死亡之四五。陛下概念及此，命諸將再行招募。若淮北之人不復再渡，所募之卒何自而充。五也。尋常諸軍招江浙一卒之費不下百緡，而其人柔脆，多不堪用。若非取軍淮北，則軍旅之勢日以削弱。六也。若果絕之，人心一失，大事去矣。國家所系，人心爲本。惟陛下恢廓聖度，同符天地，信順獲佑，其理必然。上見之感悟，事得不罷。正志又受浩旨，聚兩路

監司守臣往瓜洲相度築壘事。及見公，恃其口辯，欲爲浩遊說。公折大義，正志乃愧恐不敢言。將行，公復謂之曰：「歸致意史參政、秦檜主和，終致誤國。參政得君，無蹈覆轍。浩聞之悚然。時浩已遣使使虜，報登寶位。公奏：「陛下初立，方欲圖回復，而遽聞遣使，懼天下解體。前日洪邁虜中供伏事狀，尋聞虜酋備坐告諭嶺北諸國。虜借我和議之名，以迫脅諸國，類如此。願毋遣。浩竟遣之。然虜計已行，亦竟責舊禮不納也。十一月，有旨召宣撫判官陳俊卿及公子棫赴行在。公附俊卿等奏曰：「今日之事，非大駕親臨建康，則決不能盡革宿弊。一新令圖，鼓軍民之氣，動中原之心。臣自太上時，已爲此謀。蓋江南形勢實在於此，舍而不爲，未見其策。又奏曰：「漢文帝初立，有司請早建太子，以尊宗廟，其爲天下國家計甚遠。願陛下留意焉。公於九月中嘗具奏，以謂：「近聞吳璘之兵在德順，曾未幾月，與



虜大戰不可不爲之深思也。使此虜得志於西、則氣焰必熾、脅制蕃漢、聚兵邊陲、迫我臣屬、事固難處。今持久不決、有大利害存焉。儻坐視不問、貽憂異時、非計之得也。當令兩淮之師虎視淮壩、用觀其變、而遣舟師自海道搖山東、及多遣忠義結約中原、疑惑此虜、使有左顧右眄之慮。而德順之師知我有奉^①制之勢、將士當亦賈勇自奮。至是復令俊卿等力言之。時浩已發詔、命璘棄德順。蓋浩志專欲亟和、以自爲功、謂德順旣棄、則非徒璘無能爲、亦固撓公之謀矣。上見俊卿等問公動靜、飲食顏貌曰、朕倚公如長城、不容浮言搖奪。時上已有欲幸建康之意矣、而浩殊不以爲然。上遣內侍黃保躬賜公鞍馬手書曰、卿以元勳、特爲重望、慨風塵之未靜、仗忠義以親行。首固邊防、徐謀開拓、俾朕居尊、無復軫慮。緬思忠赤、益用歎嘉。俊卿等歸、公知車駕來建康之期尙緩、深慮有失機會、復具

奏曰、人心向背、興亡以分。建康之行、一日有一日之功。願仰稽天道、俯徇衆情、亟定行期、以慰中外之望。時契丹酋窩幹亦起兵攻虜、爲虜所滅、其黨奔潰。驍將蕭鷓巴、耶律适里自海道來降。公以爲女真一國之兵、其數有限、向來獨以彊力迫脅中國之民及諸國之人爲用、是以兵盛莫敵。今當招納吾民、厚撫諸國、則女真之心自生疑惑。中原諸國莫爲其用、虜可亡也。奏乞厚撫鷓巴等。上從之。詔公擬官賞施行、仍賜手書勞公曰、卿以文武全才、副朕倚毗、宣威塞垣、厥功益茂。夷虜來歸、中外帖然。今賜卿貂帽等。時虜以十萬衆屯河南、多張聲勢、欲窺兩淮。公以大兵屯盱、泗、濠、廬、虜不敢動。但移牒三省、密院及移書宣撫司、虛爲大言、欲索海、泗、唐、鄧、商州及歲幣等。公奏此皆詭詐、不當爲之動。卒以無事。隆興元年正月九日、制除公樞密使、都督建康、鎮江府、江、池州、江陰軍屯駐軍馬、且

命即日開府視事。始公命諸將築泗州兩城。至是而畢。隱然爲邊塞重鎮。時虜將萬戶蒲察徒穆及僞知泗州大周仁以兵五千屯虹縣。都統蕭琦以萬餘人屯靈壁。積糧修城。遣間不絕。公謂至秋必爲邊患。當及時掃蕩。若破兩城。則淮泗可奠枕也。且蕭琦素有歸我之意。累遣親信至宣撫司。會主管殿前司李顯忠。建康都統制邵宏淵亦獻擣二邑之策。公具以奏上。上手書報可。三月。召公赴行在。公中道具奏曰。今之議者。孰不持戰守之說。其下則欲復遵舊轍。重講前好。以臣觀之。戰守之說是也。然而戰守之道。本於廟勝。君天下者。誠能正身以正朝廷。正朝廷以正百官。正百官以正萬民。用之戰則克。用之守則固。理有決然者矣。今德政未洽于人心。宿弊未革于天下。揆之廟算。深有可疑。臣願陛下發乾剛。奮獨斷。於旬月之間。大布德章。一新內外。盡循太祖太宗之法。使南北之人知

有大治于後。人心既孚。士氣必振。于以戰守。何往不濟。既至。復伸前說。上再三歎美。謂公當先圖兩城。邊患既紓。弊以次革。乃命李顯忠出濠州趨靈壁。邵宏淵出泗州趨虹縣。而令參議馮方隨往犒勞。公亦自往臨之。將行。念軍事利鈍難必。恐或小跌。傷上有爲之心。謂諸葛亮建興六年所上奏其言明切。曲盡事機。乞上置之坐右。常觀覽焉。又出旗榜軍前曰。面奉聖旨。大軍所至。務要秋毫不擾。專以慰安百姓爲事。敢有行一不義。殺一不辜。達於聽聞。朕所不赦。公渡江。聞李顯忠至靈壁。而蕭琦中悔。以衆來拒。顯忠大破之。琦所將萬五千人降殺殆盡。邵宏淵亦進圍虹縣。顯忠會之。徒穆。周仁窮蹙。率其衆降。亦以萬數。公又遣戚方將舟師趨淮陽。慮顯忠輕敵深進。則親帥官屬前駐盱眙。幾便近得以指呼。顯忠追。蕭琦至宿州近城。琦與家屬及千戶頭領等百餘人降。遂直抵城下。虜僞



元帥者遣二萬餘人來戰、大破之。進攻城、將士蟻附而上、遂克之。中原震動、歸附日至。上手書曰、近日邊報、中外鼓舞。數十年來、無此克捷。公以盛夏人疲、急召顯忠等還師、而上亦戒諸將以持重。皆未達、僞副元帥紇石烈志寧率大兵至、顯忠等恃勝不復入城、但於城外列陣以待、士卒頗疲矣。僞帥令於陣前打話、謂爾若破我、當盡歸河南之地。既戰、虜^⑤兵引卻。明日復來戰、我師小不利、統制官有遁歸者、軍心頗搖。顯忠等率兵入城、虜衆進攻、城復殺傷而退。居數日、得諜者報、虜大兵將至、顯忠等信之、夜引歸、虜亦不能追也。時虜名酋勇將降執系道、精甲破亡不翅三倍、是後不復能爲靈壁、虹縣之屯矣。方初退師、公在盱眙、去宿不四百里、浮言洶動、傳虜且至。官屬中有懷檄以歸者、亦有請公亟南轅者。公不答、遂北渡淮、入泗州城。軍士歸者勞而撫之、視瘡痍、拯疾病、存錄死事、旌有

功、人情胥悅。凡數日、上下始知虜初無一騎過宿者、人心始定。時公獨與子栻留盱眙幾月、俾將士悉歸憩而後還維揚、具奏待罪。上手書撫勞、公復奏曰、今日之事、明罰爲本、而罰之所行、當自臣始。上手書報曰、卿屢待罪、欲罰自卿始。卿此言至公、豈不感格。朕委任卿、未嘗少變、卿不可以此介意。正賴卿經畫、他人豈能副卿。有旨降授特進、更爲江淮宣撫使。宿師之還、士大夫素主和議者乘時抵巇、非議百出。上又賜手書曰、今日邊事、尤倚卿爲重、卿不可以畏人言而懷猶豫。前日舉事之初、朕與卿獨任此事。今日亦須朕與卿終任此事、切不可先啓欲和之言。又荐遣內侍勞公、於是公又第都統制、統制^⑥官以下、乞以次行罰。時朝廷建遣楊存中以御營使行江上守備、首途有日。公謂命令不一、將士觀望、或敗國事、身死無益、遂論奏之。上即日詔存中毋行。公留眞揚、大飭兩淮守備、命

魏勝守海州、陳敏守泗州、戚方守濠州、郭振守六合、治高郵、巢縣兩城爲大兵家計、修滁州關山以扼虜衝、聚水軍淮陰、馬軍壽春、廬州大抵虜人來攻泗州、則糧道回遠、城中兵二萬餘足以守、乘其弊足以勝。如其出奇自淮西來、則清野堅壁、使無所掠。旣不得進、合兵攻之、可大破也。然是時師退未幾、人不自保、公命栻往建康挈家屬來維揚、衆情大安。兩淮郡縣悉增葺屋宇、人物熙熙、以至鄉落亦皆成聚。上復召栻奏事、公附奏曰、自古大有爲之君、必有心腹之臣相與協謀同志、以成治功、不容秋毫之間、然後上下響應影從、事克有濟。如伊尹之於湯、太公之於周、其次管夷吾之於齊、諸葛亮之於蜀、書傳所載、始終可考。不然、作舍道邊、何自而成。而況安危禍福之幾、其應不遠、可不畏哉。今邊隅粗定、軍旅粗整、虜以傷敗之故、其勢未能爲竭國之舉。而臣以孤蹤跋前疐後、動輒掣肘、

陛下將安所用之。願深惟國計、精選天下巖穴之賢、付以中外大柄、任之專、信之篤、如前數君所爲、謀出於一、不使小臣得以陰間、不使異議得以輕搖、先內後外、以圖恢復、庶幾日積月著、太平可期。載惟陛下當至艱至難之時、遇自古未嘗有之疆敵、若非君臣相與爲一、朝夕圖回、不較利鈍、終期有成、誠恐歲月易流、後悔難追、甚可痛惜也。臣老且病、望陛下矜憐、賜以骸骨、使之待罪山林、無令出處狼狽、取笑天下後世。上覽奏、謂栻曰、雖乞去之、章日至、朕決不許。朕待魏公有加、終不爲浮議所惑。公聞之、不敢復有請。時上對近臣、未嘗名公、獨曰魏公、每遣使來、必令視公飲食多寡、肥瘠何如、其眷禮如此。八月、有旨復公都督之號。虜都元帥僕散忠義與志寧並貽書三省、密院、索四郡及歲幣等。且云、今茲治兵、決在農隙、以恐脅我。公奏、虜力彊則來、力弱則止、初不在夫和與不和之間。



使其有隙可乘、有機可投、雖使人接踵于道、卑辭厚禮無所不至、亦莫足以遏其鋒也。今僞帥書蓋知江南之士欲和者衆、離間吾心腹、撓亂吾成謀、坐收全功、以肆其忿毒于後。惟陛下深察之。臣誠過慮、竊恐腐儒之論不知大計、遂爲眞和。曾不知三數年之後、虜馬日蕃、人心益定、我之將士解體怠惰、方是時、何以枝梧。然今日內治未立、人多懷私、只貴謀身、不思爲國、軍民之弊漠不加意、不求之此而區區於末、恐無益也。時朝廷欲謝卻歸正人、已至者悉加禁切、且不欲公多遣間諜、恐生邊釁。公奏曰、自昔創業中興之君、圖回天下、初非有夙任之將、素養之兵、舊撫之民爲之用也。攷其施設、事非一端。或取之群盜、或得之降虜、或以夷狄攻夷狄、莫不虛懷大度、仰憑天道、俯順人心、以成大功。後世仁德之不孚、措置之失宜、馴致降人多有背叛。此非徒人事之謬、蓋亦天命之不歸也。今

陛下紹隆祖宗、方務恢復、乃於降者而首疑之、則左右前後與夫今日軍旅之衆、孰不可疑。而況它日進撫中原、必先招徠、事乃可濟。若處之失當、反激其怒、它日人自爲敵、計之出此、豈不誤哉。陛下將有經營四海之心、推誠待人、如天如日、豈比固陋之士、姑爲保身之謀、獨無天命之可信哉。又奏、虜之於我、有不戴天之讎、挾詐肆欺、不遺餘力。自宣和靖康以來、專以和議撓亂國家、反覆詭秘、略無一實。今敗盟如此、而朝廷尙蹈覆轍、號爲信義、恐生兵隙、臣所未喻也。昔宋襄公謂君子不重傷、不禽二毛、而卒敗於楚、得無類是乎。時湯思退爲右相、思退本檜死黨、尤急於求和、遂遣盧仲賢、李栻持書報虜、並借職事官以往。公又奏、仲賢小人多妄、不可委信。上因其辭、戒勿許四郡、而宰執則令仲賢等許之無傷。栻至境、託故不行、獨仲賢往。僕散忠義懼之以威、仲賢遂鼠伏拱手、狀稱歸當

稟命許四郡、願持書復來。仲賢見公、謬稱虜有數十萬之衆近邊、若不速許四郡、今冬必入寇、我無以當其鋒。且公重臣、不宜在江外、當亟渡江。公知仲賢爲虜所脅、即謂之曰、某在此邊備已飭、借使虜來、當力破之。況探報日至、虜之屯河南者不過十萬、計議得無爲虜游說耶。栻復被旨、令入奏。公命栻奏仲賢辱國無狀、但所謀事未知有無出朝廷之意、臣實不預此議。栻至上即召見、首問仲賢事。栻具奏其狀、且曰、仲賢不可不明正其罰、朝廷與爲表裏、不可不察。上怒、下仲賢大理寺。思退等惶懼、反謂仲賢能說虜削去君臣之禮、止以叔姪相往來爲有功、百端救之、至與左相陳康伯等叩頭殿上乞去。上不悅、猶鑄仲賢官。思退及其黨懼、益大唱和議、建遣王之望、龍大淵爲通問使副。公在遠、爭不能得。見諸軍惶惑、歸正人尤不自安、即出榜諸軍、謂虜人妄有邀索、如輒敢渡淮、當約日

決戰。朝廷聞公出此榜、皆大恐、獨上以爲然。公又奏曰、伏聞朝廷遣使甚亟、思慮反復、實不遑寧。伏念臣頃居謫籍幾二十年、流離困苦、加以憂患、狼狽萬狀。所以養愛此身、不敢即死、亦以臣子大義、負不戴天之深讎、終幸一朝得伸素志、瞑目無憾。幸遇陛下龍飛之始、英武奮發、慨然有澄清天下之志。臣是敢受任而不辭。今將士人情日以振作、而虜寇作於內、師老於外、少稽時月、形勢畢見。載惟此虜若勢力有餘、內無掣肘、則秋冬之交必引兵長驅、要我以和、何求不成。而乃遣書約期、勢實畏怯、其狀甚露。縱令敢以偏師深入、自淮西來、爲我則利、爲彼非福。蓋三百里之內、野無芻粟、扼以不戰、又何能爲而直爲此急急也。重念臣衰老多病、所見所爲迂闊寡合、自度賦分單薄、無以勝任國事、方欲俟歲晚力求休退。惟臣所愛者、陛下之聖德聞於天下、有有爲之時。惟臣所憂者、夷狄之



姦計得以肆行、而後悔何及。不然、臣年餘幾何。豈不欲姑就安逸以畢此身、而固爲異同於今日也。又奏、今歲守備甚嚴、自秋涉冬、初無一事。向若虜不貽我以書、固自若也。不幸因虜以一介持書慢我、而朝廷匆遽遣人、自招紛紛。緣此內外之情、各不懷安、於國體所係甚大。今茲使行、事體尤重、豈宜更復草草。惟此虜若必欲侵凌我、雖懇請百拜、有不可遏。如其不能、亦何由而動。況專幸寇讎之不我侵、急急然徒爲懇免苟安之計、臣之所未諭也。上賜手書諭意、將以首相待公。公奏力辭。未幾、遂召公赴行在奏事。公初議答虜書事、以爲但當輕遣一介往觀其情、僞而爲之所。至是、乃聞朝廷遣之望等。十一月二十五日、行至鎮江、上奏曰、近者竊承朝廷已定遣使之議、臣身在外、初不預聞。竊惟徽宗、欽宗不幸不反、亘古非常之巨變、凡在臣庶、不如無生。而八陵久隔、赤子塗炭、國家於虜、

大義若何。況逆亮憑陵、移書侮嫚、邀求大臣、坐索壤地、其事近在目前。今議者不務力爲自彊之計、而因虜帥一貽書、遽遣朝士奔走麾下。再貽書、欲遣侍從近臣趨風聽命、復將哀吾民之膏血以奉讎人、用猶子之禮以事讎人、欺陛下以欺之名、而爲和之之實。其說固曰、吾將歛之而修吾兵、政不知使命一遣、歲幣一出、國書一正、將士褫氣、忠義解體、人心憤怨、何兵政之可修。又不過曰、吾將歛之而理吾財用、不知今雖遣使而兵不可省、備不可撤、重以歲幣之費、虜使之來、復有它須、何財用之可理。此可見欺陛下以歛之名、實欲行其宿志也。彼方惟黨與之是立、惟家室之是顧、惟富貴之是貪、豈復以國事爲心哉。況兩朝鑾輿之望已絕、宗室近親流落虜廷、戕賊殆盡、猶欲與之結和、不知於天理安否。臣實痛之。臣年老多病、所論與朝廷略不相合、豈可蒙恥更造班列、以重敗其

素節。且陛下廟堂之上、豈容狂妄不合之臣濫廁其間。臣雖至愚、亦誠不忍與今日力主和議之臣並立於朝。伏乞早降指揮、罷臣機政。臣見力疾至前路秀州、聽候指揮。上賜手書曰、覽卿奏、欲在秀州候指揮、甚非朕所望也。卿忠誠爲國、天下共知、和議事專俟卿到、面盡曲折。卿宜速來。繼遣內侍甘澤賜公手書曰、卿赴召入覲、何爲中道遽欲引嫌自陳。軍國大事、正要卿同心叶濟。已差甘澤宣卿、宜體朕意、疾速前來。公以上意厚甚、不敢固辭。復上奏曰、臣竊聞道路之言、謂今茲議和非陛下本心、事有不得已者。詢之士大夫、多以爲然。惟臣昔嘗力陳和之不可、爲秦檜所擠、瀕死者屢。賴太上皇帝保全覆護、獲有餘生。今日之議、臣以國事至大、不敢愛身、力爲陛下敷陳。不知陛下終能主張之否。又有事之大者、人才混殺、風俗陵夷、綱紀久弛、上下偷安、巨細積弊、內治自彊、未見端緒。若

力圖所以革之一繩以公、不卹浮議、則怨謗之言投隙伺間、巧爲傷中、事必無成。若因循不革、日復一日、何以爲國。國政不立、何以禦寇。不知陛下能力斷於中、果行於外、君臣一心、無間可乘、以濟此艱難之業否。臣是以食不遑味、寢不遑處、拳拳憂心有如皦日。思所以爲陛下計、爲社稷計、須臾不敢忽也。不然、臣年老數奇、粗知學道、豈敢叨踰榮寵、竊位於朝、以負陛下社稷哉。臣到闕日、願賜清間之燕、俾盡區區。度其是否、使之進退有據、不違其道。不勝幸甚。既至入見、上首諭公以欲專委任之意、公復力陳和議之失。上爲止誓書、留使人、而令通書官胡昉、楊由義先往諭虜帥以四郡不可割之意。於是之望、大淵待命境上、而上與公密謀。若虜帥必欲得四郡、當遂追還使人、罷和議事。十二月二十二日、制拜公尙書右僕射、同中書門下平章事、兼樞密使、都督如故。而思退亦轉左僕射。



上諭當直學士錢周才以注意在公故思退雖爲左相而公恩遇獨隆。每奏事上輒留公與語。又時召栻入對。賜公御書聖主得賢臣頌。思退等素忌公。至是益甚。公旣入輔。首奏當旁招仁賢共濟國事。上令條具。公奏虞允文、陳俊卿、汪應辰、王十朋、張闡可備執政、劉珙、王大寶、杜莘老宜即召還。胡銓可備風憲、張孝祥可付事任。馬^⑨時行、任盡言、馮方皆可備近臣。朝士中林栗、王柎、莫冲、張宋卿議論據正。可任臺諫。皆一時選也。公自太上時即建議當駐蹕建康以圖恢復。上初即位。公入對。又首言之。及總師江淮。每申前說。至是復力言於上曰。今不幸建康則宿弊不可革。人心不可回。王業不可成。且秦檜二十年在臨安。爲燕安酖毒之計。豈可不舍去之而新是圖。大抵今日凡事皆當如藝祖創業時。務從省約。而專以治軍卹民爲務。庶國有瘳。不然日復一日。未見其可。上深感悟。通書官

胡昉等至宿州。僕散忠義以不許四郡之故。械繫迫脅。昉等不屈。忠義計窮。更禮而歸之。上聞之。亟召栻語之。故令諭公曰。和議之不成。天也。事當歸一也。始議以四月進幸建康。公又奏當詔之望等還。上批出曰。王之望、龍大淵并一行禮物並回。思退等大駭。更約翌日面奏。及至漏舍。思退等競執前說。公折以正論。輒屈。是日三月朔旦。上當詣德壽宮。未登輦。召宰執議事。思退及參知政事周葵同知樞密院洪遵叩頭力爭。上怒。聲色頗厲。及自德壽宮回。復批出曰。追回之望等劄子宜速進入。適詣德壽宮。太上皇帝亦深怒。此虜無禮。卿等不可專主和議。恐取議於天下。思退等懼。遂以劄子進入。發金字遞行。公奏胡昉等能不爲虜屈。當加賞。而向者盧仲賢擅以國家境土許寇與讎。宜有重罰。有旨仲賢除名勒停。編管郴州。又奏宜榜示諸軍。諭以僕散忠義械繫使人。加以無禮。使各奮

忠義、勉勵待敵、趨赴功名、庶幾諸軍知曲在虜、且知和議不成、激昂增氣。上令都督以此旨降榜兩淮、荆襄、川陝、數日之間、號令一新、中外軍民皆仰上英斷。思退計窮、復奏力主和議、且請上以宗社大計、奏稟太上皇帝而後從事。上親批其後、降付三省曰、虜無禮如此、卿猶欲言和、今日虜勢非秦檜時比、卿之議論、秦檜之不若。故事、宰相日一人啓御封。是日適公當啓、啓畢、即轉示思退。思退大駭、藏去。先是、上既決幸建康之議、思退等初不與聞。後奏事上前、語屢屈、因請曰、和議不成、虜至何以待之。上曰、朕已決幸建康。思退等失色。及又見批語、乃陽爲皇恐乞祠狀、而陰與其黨謀爲傾陷之計、蹤跡詭秘、人不得盡知也。居數日、俄有旨命公按視江淮。公知一日出外、姦人必得肆意、然趣行之旨屢下、而事之成敗則又有非人力所能爲者、乃行。既出國門、思退遂與右正言尹檣通謀、曰

夜汲汲益求所以間公者。公未抵鎮江、道遇王之望等還、見之望力主和議、因密奏之。而思退等亦相與陰謀、謂不毀守備則公不可去、和不可成、乃令之望等盛毀守備、一無以恃者。又陰以官爵諷諸將、令入文字、稱虜盛彊、爲畏怯語。而檣專主其議、百計毀公。蓋公受任江淮、兩年有半、念國家多虞、醜虜未靖、憂恐計度、寢不遑安、食不遑味。祁寒盛暑、勞撫將士、接納降人、講論軍務、未嘗少倦。少年精力有不能及。而公忠義奮激、曾不以爲勞。諸軍感悅、有不待號令而從者。計所招來山東、淮北忠義之士、實建康、鎮江兩軍凡萬二千餘人。萬弩營所招淮南彊壯及江西羣盜又萬餘人。陳敏統之以守泗州。淮南軍士知泗爲兩淮要塞、皆願以死守。至挈父母妻子往焉。要地如海、泗、高郵、巢、和、六合等皆已成築、其可因水爲險處、皆積水爲櫃、增置江淮戰艦、諸軍弓矢器械悉備。兩年冬、虜屯



重兵十萬于河南、爲虛聲、脅和至再至三、皆有約日決戰之語。泗州將士日望虜至成大功、而虜亦知吾備禦甚設、卒不敢動、反爲防我計。及是、公又以宰相來撫諸軍、將士無不踴躍思奮、軍聲大振。虜聞公來、亦檄宿州之兵歸南京、沿邊清野以俟。淮北歸正者日來不絕、山東豪傑悉遣人來受節度。公曉之曰、淮北、山東之人慕戀國恩、厭苦虐政、保據山險、抗拒賊兵、于今累年、首領冒難遠來、備述爾等忠勤、爲之惻痛。已具奏皇帝、記錄汝等姓名、將來大兵進討、則掎角爲援、晝驚夜劫、抄絕糧道。如是賊兵深入、便當連跨城邑、痛勦賊徒、勲績儼成、節鉞分茅、皆所不吝。但當觀時量力、無或輕動、反墮賊計。今本朝厲兵秣馬、以俟天時、汝等亦宜訓習、以待王師之至。公又以蕭琦乃契丹四軍大王之孫、沉勇有謀、欲令琦盡統契丹降衆、且以檄喻契丹、大意謂本朝與契丹有兄弟之好、不幸

姦臣誤兩國、皆被女眞之禍。今契丹不祀、皇帝無日不念此。爾能結約相應、本朝當敦存亡繼絕之義。虜人益懼、遂爲間書、鏤板摹印、散之境上、類後周所以間斛律明月之意。督府參議官馮方立朝有直聲、臨事不避難、遍行兩淮、築治城壘、最爲勞勩。思退等以其效力尤多、尤惡之、使稽論方不當築城費財、凡再章而方罷。又論公所費國用不貲、公奏、計督府遣間探、給官吏等、二年半之費、實不及三十萬緡。其餘爲修城造舟、除器招軍等用。上出公奏、思退、稽議屈、於是始謀更造它事、撼公。殿前後軍統制張深守泗有勞、軍士安之。俄有旨放罷、而以趙密之子廓代之。公至淮東、詢問知狀、奏留深、而稽指公此事爲拒命跋扈。思退等又相與謀、上眷公厚、必未肯遽罷公、但先罷都督、則公自當引去。稽奏論如思退計、而公自聞馮方罷、已上奏乞罷督府。詔從公請、而公亦封章力求還政矣。

稽連疏詆公愈力。左司諫陳良翰奏如公忠勤人望所屬不當使去國。上謂良翰本無此事且當今人材孰有踰魏公者。卿宜遍喻侍從臺諫使知朕此意。侍御史周操素同良翰議至是爭論甚力。然是時公留平江虎丘致仕之章已八上矣。上察公懇誠欲全其去。四月二十有二日制除公少師保信軍節度使判福州而思退等遂決棄地求和之議。且命宣諭司及統領司磨治督府文書錢物吹毛求疵卒不可得乃已。公力辭恩命上不許至五十六除醴泉觀使。公雖去國不敢以嫌故有隱奏尹檣姦邪必誤國事又奏勸上務學親賢故舊門生或勸公當勿復問時事後雖有召命亦無庸起。公慨然語之曰君臣之義無所逃于天地之間。況吾荷兩朝厚恩久尸重任今雖去國猶日望上心感悟苟有所見安忍不言。上復欲用某某當即日就道敢以老病爲辭。如公等言復何心哉。聞者聳然。

公以連年疲勞比得退休已覺衰繭。且畏暑未能遂還長沙。行次餘干假宗室趙公頤之居而寓止焉。所居之南有書室公名之曰養正而爲之銘曰天下之動以正而一。正本我有養之斯吉。道通天地萬化流出。精思力行無忘朝夕。日讀易更定前說。且曰庶幾未死於學有進也。又取易象題坐右曰謹言語節飲食致命遂志反身修德。親舊來訪者輒與講論古道終日不倦。蓋其心純一無出處動靜之間如此。孟秋既望公薦享祖考既奠而跌。公起歎曰吾大命不遠矣。手書家事付兩子且定祭祀昏喪之禮俾遵守曰喪禮不必用浮屠氏。且曰吾嘗相國家不能恢復中原盡雪祖宗之恥不欲歸葬先人墓左。即死葬我衡山足矣。及仲秋二十日猶爲饒守王十朋作不欺室銘有曰泛觀萬物心則惟一。如何須臾有欺暗室。君子敬義不忘栗栗。至二十有二日始寢疾。二十八日疾病日晡。



時命子栻等坐于前、問國家得無棄四郡乎、且命作奏乞致仕。日暮、命婦女悉去、夜分而薨。先是六月末有大星隕于趙氏居養正堂之北、光芒若晝、趙氏一家盡驚。翌日、得公書欲來寓居云。訃聞上震悼、輟視朝兩日。有旨贈公太保。栻等不敢違公志、扶護還潭州。以是歲十一月辛亥葬于衡山縣南嶽之陰、豐林鄉龍塘之原。公自幼即有濟時之志、未嘗觀無益之書、未嘗爲無益之文、孜孜然求士尙友、講論當世之故。聞四方利病休戚、輒書之冊、至一介之賤、亦曲加詢訪。在京城、中親見二帝、北狩、皇族係虜、生民塗炭、誓不與虜俱存。委質艱難之際、事有危疑、它人方畏避退縮、則挺然以身任之、不以死生動其心。南渡以來、士大夫往往唱爲和說、其賢者則不過爲保守江南之計、夷狄制命、率獸逼人、莫知其爲大變。公獨毅然以虜未滅爲己責、必欲正人心、雪讎恥、復守宇、振遺黎、顛沛

百罹、志踰金石。晚復際遇、主義益堅、雖天嗇其功、使公困於讒慝之口、不得卒就其志、然而表著天心、扶持人紀、使天下之人曉然復知中國之所以異於夷狄、人類之所以異於禽獸者、而得其秉彝之正、則其功烈之盛、亦豈可勝言哉。公論事上前、務盡道理、期於聽從、不爲苟激。其在官守、事無細大、必以身親視國事如家事、視民疾苦如在己身、至誠懇惻、貫徹上下。平生四被謫命、處炎方幾二紀、拳拳念君之心遠而彌篤。見朝廷一舉措之善、則喜溢詞色。一事不厭、則憂思終夕不寐。嘗曰、事君者必此心純一而後能有感格、蓋其忠義自壯至老、或用或舍、未嘗有斯須之間也。事太夫人先意承志、婉愉順適、曲盡其心、奉養恭恪、寒暑不渝。家人婦子見公身率、莫敢不敬。或時遠去侍側、每覺意緒不佳、則曰、太夫人得無有疾乎。遣人候問、則其日果太夫人服藥也。太夫人方嚴、或顏色不

和則公拱立左右、踧踖若無所容。俟太夫人意舒、乃敢安。蓋自膝下至白首如一日。太夫人既沒、見素所服用之物、未嘗不泣下、起敬起孝、孝誠篤至、上自宮禁、下至閭閻、無不咨嗟歎息。縉紳軍民間風而興起慕用、與夫愧悔改行者、不可勝計也。於兄徽猷、公友弟篤至、教養其子與己子不少異。置義莊以贍宗族之貧者、以至母族喪葬婚嫁、亦皆取給焉。歲時祭祀、必預戒小大、使各嚴恪。滌牲治具、必親泣焉。及祭、肅乎如祖考臨之。時節嘗新、必先薦于廟而後敢食。器皿擇精潔者備薦享、不以它用。素能飲酒、至斗餘。及貶連山、太夫人曰、南方地熱、宜省酒。即不敢飲。及再見太夫人、命之飲、乃飲、遂終身不踰三酌。於器用取具、不問美惡、平生無玩好、視天下之物泊然、無足以動其心者。燕處飲食、皆有常度、雖在閨門、無戲語、無墮容。未嘗偏倚而坐、未嘗疾呼遽行、言必有教、動必有法。盛德

日新、至老無息。及在餘干、未寢疾間、溫恭朝夕、無絲毫倦怠意。絕筆二銘、于今讀之、猶能使人悚然起敬。則公之心雖未易以言語形容、然於此亦可以少見其幾矣。蓋其天資粹美、涵養深厚、以至於德成而行尊、非強勉所能及也。公之學一本天理、尤深於易、春秋、論、孟。嘗論易數曰、易有太極、是生兩儀。太極一也、兩儀三之也。分爲二、而七八九六之數五十有五、此天地之中數也。何以知其然。蓋一、三、五、七、九合爲天數、而天數不過五。二、四、六、八、十合爲地數、而地數不過五。天地奇耦合之爲十、總之爲五十有五。自然之數、皆不離乎中、中故變、變故其道不窮。聖人神而明之、用數之中、故消息盈虛之妙、闔闢變化之幾、皆在於我而動靜莫違焉。中其至矣。又嘗論剛柔之義、示子姪曰、君道主剛、而其動也用柔、故乾動則爲坤矣。臣道主柔、而其動也用剛、故坤動則爲乾矣。故夫必欲遠聲色、



必欲去小人、必欲配帝王、必欲定社稷、必欲安民、人必欲服四夷、乾之剛也、君則之於內而主斷也、至於禮臣下、下賢才、撫四鄰、愛百姓、卹孤寡、虛心取善、舍己從人、其動莫非柔矣。不敢唱始、不敢先事、謹禮法、循分守、安進退、守職業、坤之柔也、臣得之於內而有承者也。至於犯顏敢爭、捐軀盡節、可以託六尺之孤、可以寄千里之命、可殺不可辱、可困而不可使爲不義、守忠義之大訓、弭患難於當年、斷大計、定大疑、正色立朝、華夷讐服、其動莫非剛矣。故夫善觀易者、必觀夫剛柔之中而究其所以用、則六十四卦、三百八十四爻之或得或失、或悔或吝、或吉或凶、可以類推矣。不知剛柔之用、不可言易也。胡銓求公序其所著春秋傳者、公告之曰、春秋所書、莫非人事章章者、作之於心、見之於事、應之於天、毫釐不差。夫子叙四時、稱天王、以謂順天則治、生物之功、于是興、逆天則亂、生物之功

于是息、爲千萬世訓至明也。故一言以斷春秋之義曰、天理而已矣。嗚呼、使王知有天、則諸侯知有王、大夫知有諸侯、陪臣知有大夫、馴致之理、得之自然、禍難孰爲而作哉。蓋王者知有天而畏之、言行必信、政教必立、喜怒必公、用舍必當、黜陟必明、賞罰必行。彼列國諸侯雖曰彊大、敢違天不恭、以重拂天下之心而自取誅滅耶。周道旣衰、王之不能正身行禮、奉承天心、以大明賞罰於天下。春秋爲是作、以我褒貶、代天賞罰、庶幾善者勸、惡者懼、亂臣賊子易慮變志、不復接踵于後、天地之大德、始獲均被萬物。聖人先天心法之要、蔑有著於此書者矣。公於本朝大臣最重李文靖公、謂近三代氣象。又以寇忠愍、富文忠、范文正之事爲可法、嘗曰、萊公自澶淵還、恥於城下之盟、益勸上修德立政。旣不獲用、乃有東封西祀之說。鄭公使虜還、以和議爲恥、以自治爲急務、而不受樞庭之賞。

文正自西鄙入參大政、勸仁祖開天章閣、俾大臣條時務、大修政事。文正所具二十條、無非要切、然亦不克施。使三公獲盡其猷爲、則王業必不至二百年而中微也。異時歸老山林、當作三賢堂於弊廬之側、庶幾朝夕想像、如見其人。豈三公所爲適有契于公心也與。每訓諸子及門人曰、學以禮爲本、禮以敬爲先。又曰、學者當清明其心、默存聖賢氣象、久久自有見處。見人有一善、爲之喜見辭色。子姪輩言動小不中理、則對之愀然不樂。人自感動。公初娶楊國夫人樂氏、旬日被命召、即造朝。及爲侍從、或以公盛年、勸買妾。公曰、國事如此、太夫人在遠、吾何心及此。遂終身不置妾。再娶蜀國夫人宇文氏、賢明淑順、與公同志。事太夫人盡禮、鷄初鳴、已冠帔立寢前。俟太夫人寐覺、夜則俟太夫人寢至、息勻寐安乃去。食飲湯藥、一一親之。太夫人常曰、吾兒孝、天賜賢婦、以成其心。內外宗族敬

仰無間言、起居飲食亦皆如公有常度、不渝相對如賓。公方貴、未嘗言及宇文氏私門。每訓諸子曰、吾朝夕兢兢履地如履冰、惟恐一言之失、一事之差。蓋其德誠足以配公焉。先公五年薨、葬衡山、與公同兆異穴。生子男二人、長栻、右承務郎、直秘閣。次杓、右承奉郎。公奏議務坦明、不爲虛辭、率口誦、令子姪書之、皆根於心、不易一字。有紹興奏議、隆興奏議各十卷、論語解四卷、易解并雜記共十卷、春秋解六卷、中庸解一卷、詩書禮解三卷、文集十卷。惟公忠貫日月、孝通神明、盛德鄰於生稟、奧學妙於心通、勳存王室、澤在生民、威震四夷、名垂永世。平生言行、非編錄可紀。謹掇其大略、以備獻于君父、下之史官、傳之無窮。且將以求當世立言之君子述焉。謹狀。乾道三年十月日、左迪功郎、特差監潭州南嶽廟朱熹狀。

校記

- ①微：原作「微」，據宋浙江刊本《晦庵先生文集》改。
- ②念：原作「奏」，據右引改。
- ③万：原作「萬」，據右引改。
- ④遣：原作「遺」，據右引改。
- ⑤珉：清賀瑞麟《朱子文集正訛》改作「擢」。
- ⑥恠：右引改作「嘉」。
- ⑦家：原作「國」，據宋浙江刊本《晦庵先生文集》改。
- ⑧謂可：原倒，據右引乙。
- ⑨同③。
- ⑩或：右引作「多」。
- ⑪江淮：右引作「淮上」。
- ⑫禮：宋浙江刊本《晦庵先生文集》作「體」。
- ⑬奉：《記疑》云疑當作「牽」。
- ⑭迫：原作「虜」，據宋浙江刊本《晦庵先生文集》改。
- ⑮虜：原缺，據右引補。

⑯統制：原缺，據右引補。

⑰甚：右引作「粗」。

⑱艱：原作「疑」，據右引改。

⑲馬：疑當作「馮」。

⑳都督：宋浙本作「督府」。

㉑上「或」字原作「成」，據右引改。



儒藏

宋儒碑傳集一百一

張浚 三 劉子羽

張魏公傳

張浚字德遠、漢之綿竹人。唐宰相九齡弟九皋之後。祖紘、嘗舉茂材異等。父咸、舉進士、復擢賢良方正異等。浚四歲而孤、母計守志鞠養。雖幼、行直視端、儼如成人。識者知爲遠器。甫冠、入太學、中政和八年進士第、調山南府士曹參軍、恭州司錄。靖康改^①元、召除太常寺主簿。張邦昌僭竊、浚逃太學中。聞高宗皇帝即位南京、星馳赴焉。除樞密院編修官、改虞部員外郎、擢殿中侍御史、遷侍御史。嘗奏事、高宗曰、朕於直言容受不諱、近有河北武臣上書詆毀朕躬、亦不加罪。浚請宣布中外、以勸言者。時乘輿在維揚久之、中外竊議、以爲上將安居焉者。浚言中原天下之根本、願下明詔、令葺東京、關陝、襄鄧、以待巡幸、大拂宰相意。請補外、除集英殿

修撰、知興元府。未行、擢禮部侍郎。高宗召諭曰、卿知無不言、言無不盡、朕將有爲、政如欲一飛冲天而無羽翼、卿爲朕留。浚頓首泣謝。除御營使司參贊軍事。浚念虜騎必至、而廟堂不爲備、力言之於宰相黃潛善、汪伯彥、皆笑不答。三年春、虜果犯維揚。乘輿渡江、行幸錢塘、留朱勝非、吳玠、禦虜。以浚^②同節制平江府、秀州、江陰軍馬。已而勝非召赴行在、浚獨留。時潰兵數萬、所至焚剽、浚散金帛招集。事甫定、會三月五日苗傅、劉正彥作亂、脅立皇子、隆祐皇太后垂簾同聽政。高宗退處睿聖宮、改元明受。赦至平江、浚命守臣湯東野秘不宣。傅等以檄來、浚慟哭、召東野及提點刑獄趙哲謀起兵討賊。時傅等以張俊爲秦鳳路總管、將萬人自中途還。浚念高宗遇俊厚、而俊純實、可謀大事、握手泣語之故、俊亦哭。浚曰、浚即起兵問罪。俊喜再拜。因徧犒^③其師。呂頤浩在建康、劉光世在鎮江、浚以



書約其兵來會。傳正彥等脅朝廷召浚詣行在所。浚奏張俊軍驟還、宜少留尉撫之。因命俊分精甲二千扼吳江、即上疏請復辟、仍以奏草報諸路。又令蜀人馮輜持書往諭。傳等俄除浚禮部尚書、命將所部人馬詣行在所。浚復言不可離平江。狀會韓世忠舟師抵常熟、張俊喜曰：「世忠來、事濟矣。」亟以白浚。浚以書招之。世忠至、相對慟哭。世忠曰：「願與張俊身任之。因大犒俊、世忠將士。浚呼諸將校至前、抗聲問曰：『今日之舉、孰逆孰順？』衆皆曰：『賊逆我順。』浚又曰：『若浚此事違天悖人、可取浚頭歸苗傅等。不然、一有退縮、悉以軍法從事。』衆莫不感憤。浚令世忠奏以兵歸闕、而密戒其急至秀、據糧道以伺軍至。浚又恐賊急邀乘、輿入海、遣官屬募海舟、皆集。傅等遣大兵駐臨平、浚爲蠟帛書、募人持付臨安守臣康允之等、俾勿驚乘輿。韓世忠至嘉禾、稱病不進、日造攻具。傳正彥等大懼、亟除俊、世

忠節度使、謫浚黃州團練副使、郴州安置。俊、世忠皆拒不受。二十四日、呂頤浩、劉光世踵至。二十七日、乃傳檄中外、浚率諸將相繼以行。傳等聞師且至、憂恐不知所出。馮輜以浚意說宰相朱勝非、率百官請復辟。四月二日、浚至嘉禾、奉復辟手詔。三日、進次臨平。傳正彥逆黨屯距不得前。世忠等搏戰大破之。傳正彥脫身遁。是夕除浚知樞密院事。翌旦、浚與頤浩等入見、伏地涕泣待罪。高宗再三問勞、曰：「曩在睿聖、兩宮隔絕。一日朕方啜羹、小黃門忽傳太母之命、言不得已貶卿郴州。朕不覺羹覆于手、今其迹尙存。念卿被責、此事誰任？留浚、引入後殿、過宮庭曰：『皇太后知卿忠義、欲識卿面。』適垂簾見卿過庭矣。」解所服玉帶以賜。傳正彥既敗、走閩中、浚命世忠以精兵躡之、並獲于建安。檻以獻、與其黨皆伏誅。乘輿方經理東南、顧關陝之重、未有所付、浚亦以中興之功當自關陝始、慨然請

行。詔以浚爲川陝宣撫處置使、命以便宜黜陟將行。御營平寇將軍范瓊擁衆自豫章來朝、浚疏其通虜從僞之罪、呂頤浩請留浚、委以誅瓊而後行。在道屢上言於高宗、願體乾之剛以大有爲、謹左右之微而杜其隙、聽言之道在親君子而遠小人、責大臣以身任國事。高宗手書嘉納焉。先是、高宗問浚大計、浚請身任陝蜀之事、置幕府於秦川、別屬一大臣與韓世忠鎮淮東、令呂頤浩扈蹕來武昌、從以張俊、劉光世、與秦川相首尾。議既定、浚行。未及武昌而頤浩變初議。浚以十月抵興元、時虜已陷鄜延、驍將婁宿孛堇引大兵渡渭犯永興、諸師莫肯相援。浚至甫旬日、即行關陝、問風俗、斥姦賊、搜豪傑、諸帥聽命。謀告虜將寇東南、浚即命諸將整軍向虜、使婁宿不得下。已而虜果入寇渡江。四年二月、浚治兵入衛、未至襄漢、遇德音知虜北歸、乃復還、請幸關陝、爲定都大計。是月虜益兵、欲

必取環慶、浚率諸將極力捍禦、虜勢屢挫。時聞兀朮猶在淮西、浚懼其復擾東南、謀爲牽制之舉。浚之始行、高宗命浚三年而後用師。至是、詔浚以時進討、浚遂合五路之師以復永興。虜大恐、急調大會兀朮等由京西來援。九月、大戰于富平、涇原帥劉錡身率將士薄虜陣、殺獲頗衆。會環慶帥趙哲擅離所部、哲軍將校望見塵起、驚遁、諸軍亦退。浚斬哲以退保興州、命吳玠聚涇原兵于鳳翔、和尚原、守大散關以斷賊路、命關師古等聚熙河兵於岷州、大潭、命孫渥、賈世方等守階、成、鳳以固蜀口。虜輕兵至、輒敗。浚上疏待罪、高宗手書尉勉焉。紹興元年五月、虜酋烏魯卻統大兵來攻和尚原、吳玠乘險擊之、連戰三日、虜大敗走。八月、兀朮復合兵來寇。九月、親攻和尚原、吳玠及其弟璘邀擊、復大破之。兀朮僅以身免、祝鬢鬚而遁。制加通奉大夫、尋拜檢校少保、定國軍節度使、賜手書、遣中使



宣旨。浚遣兄滉及屬官奏事行在所。高宗喜。恩意有加。浚在關陝三年。以新集之軍當方張之虜。蚤夜訓練。以劉子羽爲上賓。子羽忠義有才略。任趙開爲都轉運使。開善理財。治茶鹽酒法。方用兵。調度百出而民不加賦。擢吳玠爲大將守鳳翔。玠每戰輒勝。先是將軍曲端逐其帥王庶而奪之印。又不受節制。富平之役。其腹心張忠彥等降虜。端與知之。浚送端獄論死。西北遺民間浚威德。歸附日衆。於是全蜀按堵。且以形勢牽制東南。江淮亦賴以安。然浚承制黜陟悉本至公。雖鄉黨親舊無一毫假借。於是士大夫有求於幕府而不得者。謗浚殺趙哲。曲端爲無辜。而任劉子羽。吳玠。趙開爲非。是朝廷疑之。三年春。遣王似副浚。會虜大酋撒離喝及劉豫叛黨聚大兵自金。商入寇。破金州。奪饒風嶺。先是浚命劉子羽爲興元帥。至是子羽約吳玠同守三泉。守禦甚固。虜至金牛。知三泉有備。又

聞子羽遣銳師襲己。懼而引退。王師掩擊其後。斬馘及墮溪谷死以數千計。浚聞王似來。求解兵柄。呂頤浩。朱勝非不悅浚。日毀之。詔浚赴行在所。浚力丐外祠。高宗弗許。四年二月。浚至。御史中丞辛炳率同列劾誣以危語。六月。以本官提舉臨安府洞霄宮。居福州。浚知虜既無西顧憂。必併力窺東南。而朝廷已議講解。乃極言其狀。是歲九月。劉豫之子麟果引虜大兵繇數路入寇。高宗思浚前言之驗。策免宰相朱勝非。而參知政事趙鼎請幸平江。及召浚。以資政殿學士。提舉萬壽觀兼侍讀召。既入見。復除知樞密院事。高宗親書降詔。辨浚前誣。仍榜朝堂。浚既受命。即日赴江上視師。時兀朮擁兵十萬于維揚。浚遂疾驅臨江。召大將韓世忠。張俊。劉光世與議。且勞其軍。留鎮江節度之。兀朮聞浚至。一夕遁。高宗遣中使趣浚赴行在所。五年二月。除宣奉大夫。尙書右僕射。同中書門下平章

事兼知樞密院事、都督諸路軍馬、而趙鼎除左僕射。浚與鼎同志輔治、務在塞倖門、抑近習、以正原本。書王朴平邊策以獻。高宗還臨安、浚留相府未閱月、復出江上勞軍。至鎮江、召韓世忠、諭以上旨、使舉軍前屯楚州、以撼山東。世忠即日渡江。巨寇楊么據洞庭、朝廷屢命將攻之不克。浚自請以盛夏乘其怠討之。行至醴陵、釋邑囚數百人、乃楊么遣爲謀者、給以文書、俾分示諸砦、諭以早降、皆驩呼而往。五月至潭、遣岳飛分兵屯鼎澧、益陽、賊魁相繼請降、衆二十餘萬。浚一以誠信撫之。六月、湖寇盡平。遂奏遣岳飛之軍屯荆、襄、以圖中原。自鄂、岳轉淮東。會諸將大議防秋之宜。高宗遣中使賜手書促歸、制除浚金紫光祿大夫。浚力辭不拜、請以其恩封其母。十月至行在所。高宗勞問曰：「卿暑行甚勞、然湖湘群盜既就招撫、以成朕不殺之仁、卿之功也。」親書周易否泰卦以賜。浚言：「自古小人

之陷君子、必以朋黨爲言。夫君子引其類而進、志在於天下國家而已。其道同、故其趨向亦同。何朋黨之有焉？小人則不然、更相推引、本圖利祿而已。或故爲小異以彌縫其事、或表裏相符以信實其言。人主於此何所決擇哉？原其用心而已。臣嘗考泰之初九拔茅茹以其彙、征而象以爲志在天下國家、非爲身故也。否之初六拔茅茹以其彙、正而象以爲志在君、則君子連類而退。蓋將以力行善道而未始忘憂國愛君之心焉。觀二爻之義而考其心、則朋黨之論可以不攻而自破矣。臣又觀否泰之理起於人君一心之微、而利害及於天下。方其一念之正、畫而爲陽、泰自是而起矣。一念之不正、畫而爲陰、否自是而起矣。陛下能日新其德、正心於上、臣知其可以致泰矣。異時天道悔禍、幸而康寧、願陛下常思其否焉。又言：「今日之事雖有可爲之幾、而其理未有先勝之道。蓋不在於交鋒接

戰之際、而在於得天下之心、是豈可以聲音笑貌爲哉。心念之間、一毫有差、四海共知。今使天下之人皆曰吾君孝悌之心、寢食不忘父兄、則當思共爲陛下雪讎耻矣。皆曰吾君之朝、君子在位、小人屏去、侍御僕從罔匪正人、則有才智者悉思盡其力矣。皆曰吾君棄珠玉、絕玩好、賞不予幸、惟以予功、則上下知勸矣。以至吾君言動舉措俱合禮法、至誠不倦、上格於天、則望教化之可行矣。如是則將帥之心日以壯、士卒之心日以奮、天下百姓之心日以歸。夷狄聞陛下之盛德、知中國之理直、則氣折志喪。陛下何爲而不成乎。不然、疑似之心毫髮著見、隙見於此、則心生於彼、天下之人口不敢言而心敢怒、異日事乖勢去、禍亂立作、足以致禍致難、起戎起兵。前日明受之變、大逆之徒、陳兵闕下、旁引他辭、其監不遠也。爲人上者、其可不兢畏戒懼耶。又言、聽雜則易惑、多畏則易移。以易惑之

心行易移之事、終歸於無成而已。是以自昔人君修己正心、惟使仰不愧于天、俯不忤於人、持剛健之志、洪果毅之姿、爲所當爲、曾不他卹。陛下聰明睿智、灼知古今、苟大義所在、斷以力行、夫何往而不濟乎。臣願萬幾之暇、保養天和、澄淨心氣、庶幾利害紛來、不至疑惑、以福天下。召對便殿、問所宜爲、浚旣面奏、復條列以進、號中興備覽、凡四十一篇。高宗嘉歎、置之坐隅。浚以虜勢未衰、而叛臣劉豫復據中原、請親行邊塞、部分諸將。六年正月至江上、榜豫僭逆之罪、命韓世忠據承、楚以圖淮陽、命劉光世屯合肥以招北軍、命張俊練兵建康、進屯盱眙、命楊沂中領精兵爲後翼以佐俊、命岳飛進屯襄陽以窺中原。高宗遣使賜浚御書裴度傳、浚請乘輿以秋冬幸建康。浚復渡江、遍撫淮上諸戍。七月、詔促浚入覲。八月、至行在所。時張俊軍已進屯盱眙、岳飛遣兵入僞地至蔡州、浚復力趣建



康之行。乘輿九月朔進發。浚先往江上。劉豫及其姪猊挾虜來寇。浚以書戒浚。光世令進擊。又令楊沂中往屯濠梁。劉麟渡淮南。涉壽春。逼合肥。張俊請益兵。劉光世欲引兵退保。趙鼎及僉書樞密院事折彥質移書抵浚。欲召岳飛兵速東下。又乞高宗親書付浚。欲浚、光世、沂中等退師爲保江之計。浚奏。浚等渡江則無淮南。而長江之險與虜共矣。淮南之屯正所以屏蔽大江。向若叛賊得據淮西。江南其可保乎。又岳飛一動。則襄漢有警。復何所制。高宗手書聽浚。楊沂中以十月抵濠州。浚聞劉光世舍廬州而南。疾馳至采石。令光世之衆渡江者斬。光世聞浚來。大恐。即復駐軍。與沂中接連。劉猊分麟兵之半來攻。沂中大破猊於藕塘。猊僅以身免。麟拔柵而遁。高宗遣內侍賜浚端硯筆墨刀劍犀甲。且召浚還。至平江。班見。高宗曰。卻賊之功。盡出卿力。時鼎等已議回蹕臨安。浚奏。天下之事。

不倡^①則不起。三歲之間。陛下一再進撫。士氣百倍。今六飛一還。人心解體。高宗幡然從浚計。十二月。趙鼎出知紹興府。浚獨相。以親民之官。治道所急。而比歲內重外輕。遂條具郡守、監司、省郎、館閣出入迭補之法。又以災異奏復賢良方正科。皆從之。七年正月。以去冬卻敵之功。制除特進。浚懇辭。先是。祿令成書。加金紫光祿大夫。浚辭不獲。即求流貶兄滉。至是。高宗謂浚曰。卿每有遷除。辭之甚力。恐於君臣之義未安。浚乃奉詔。問安使何薛歸報。徽宗皇帝。寧德皇后上僊。高宗號慟擗踊。哀不自勝。浚奏。天子之孝與士庶不同。必思所以承宗廟。奉社稷者。今梓宮未返。天下塗炭。願陛下揮涕而起。一怒而安天下之民。乞降詔諭中外。高宗命浚草以進。其辭哀切。又請命諸大將率三軍發哀。成服。中外感動。乘輿發平江。至建康。幾事叢委。浚獨身任之。人情賴浚以安。每見必深言讎耻之大。反



復再三、高宗未嘗不改容流涕。時高宗方厲精克己、戒飭宮庭、內侍無敢越度、事無巨細必以咨浚、賜諸將詔旨往往命浚草之。四方災異、浚必以聞、祥瑞皆抑不奏。劉光世在淮西、軍無紀律、浚奏其狀、高宗罷光世而以其兵屬督府。浚命參謀軍事、兵部尚書呂祉往廬州節制、浚又自往勞之。人情初無他、而密院以握兵爲督府之嫌、奏乞置武帥、乃以王德爲都統制、即軍中取酈瓊副之。浚歸、奏其不然、瓊亦與德有宿怨、自列於御史臺。乃更命張俊爲宣撫使、楊沂中、劉錡爲制置判官以撫之。未至、瓊等舉軍叛、執殺呂祉以歸劉豫。浚引咎求去位、以觀文殿大學士提舉江州太平興國宮。先是、浚遣人持手榜入僞地間、豫會瓊等叛去、浚復遣間持蠟書遺之、大抵謂豫已相結約、故遣瓊等降。虜疑豫遂廢之。臺諫交章詆浚、旋落職、以朝奉大夫、秘書少監分司西京、居永州。於是趙鼎復相、

乘輿自建康還臨安。九年二月、以赦復宣奉大夫、提舉臨安府洞霄宮、除資政殿大學士、起知福州、兼福建路安撫大使。時秦檜得政、始決和戎之議。虜遣使來、以詔諭爲名、浚前後五上疏爭之。十年正月、高宗遣中使撫問。時虜敗盟、復取河南、浚奏願因權以制變。繼聞淮上有警、連以邊計奏知、又條畫海道舟楫利害甚悉。高宗嘉浚之忠、遣中使獎諭。浚大治海舟至千艘、爲直指山東之計、以俟朝命。在郡細務必親、訟清事簡、山海之寇招捕無餘。間引秀士與之講學、閩人化之。十一年十一月、除檢校少傅、崇信軍節度使、充萬壽觀使、免奉朝請。十二年、太母薨、輅來歸、制封浚和國公。十六年、彗出西方、浚上疏力論時事。浚又以天申節手書尚書無逸篇以進爲賀。秦檜大怒、令臺諫交章論浚、以特進提舉江州太平興國宮、居連州。二十年九月、徙永州。浚去國至是幾二十年、退然自脩、若

無能者。而天下士無賢不肖、莫不傾心。武夫健將、言浚者、必咨嗟太息。至小兒婦女亦知天下有張都督也。每使至虜、虜主必問浚安在。先是、虜載書有毋易大臣之語、蓋憚浚復用也。於是檜令臺臣王珉、徐恠每彈事必及浚、至謂浚爲國賊、欲必殺之。又令張柄知潭州、汪召錫爲湖南提舉、以圖浚。又令張常先爲江西轉運判官、治張宗元獄、株連及浚。又捕趙鼎子汾下大理獄、令自誣與浚及李光、胡寅等謀大逆。一時賢士檜所惡者凡五十三人皆與焉。會檜死、高宗始親庶務、復浚觀文殿大學士、判洪州。浚時喪母、將歸葬。浚念天下事二十一年爲和議所移、邊備蕩弛、且聞完顏亮篡立、勢已驕悍。浚憂之、自以大臣義同休戚、不敢以居喪歸蜀。會星變、詔求直言、浚慮虜數年間其勢決生隙、用兵而吾方信虜、蕩然莫備、乃復言、願法湯、文事葛事狄之心、用勾踐事吳之謀、以和爲權、鑒石晉

之事、契丹以和致敗。大臣沈該、万俟卨、湯思退見之大怒、以爲虜初未有釁、而浚所奏乃若禍在年歲者、或笑以爲狂。臺諫湯鵬舉、凌哲論浚歸蜀、恐搖動遠方、詔復居永州。服除落職、以本官奉祠。庚辰秋冬、朝廷聞虜有異志、中外表疏請還浚相位者不絕。三十一年春、命浚自便。浚歸至潭、奉欽宗諱、號慟不食。又聞虜有嫚書、不勝痛憤、上疏請早定守戰之策。未幾而亮兵大入、中外震動。十月、復浚觀文殿大學士、判潭州。時虜騎充斥兩淮、王權兵潰、劉錡兵退歸鎮江、遂命浚判建康、兼行宮留守。浚被命即首途、至岳陽、遇大雪、亟買小舟冒風濤而下。時道塗之言傳聞日異、中外危懼、長江無一舟敢行北岸者。浚不少顧。過池陽、聞亮死、然餘衆猶二萬屯和州。李顯忠兵在沙上。浚渡江犒之、一軍見浚、驩呼增氣、虜惴恐、即遁去。浚至建康、請乘輿亟臨幸。聞已進發、乃督官屬儲侍以須、不半



月而辦軍民恃以安。三十二年正月、高宗至建康、浚迎見道左、衛士見浚、以手加額。乘輿入行宮、首見浚。浚言、國如身也、元氣充則外邪遠。朝廷元氣也、用人才、修政事、治甲兵、惜財用、皆壯元氣之道。高宗嘉納之。乘輿還臨安、將行、勞浚曰、卿在此、朕無北顧之憂矣。四月、命浚經理兩淮、繼兼節制建康鎮江府、江池州、江陰軍屯駐軍馬。時虜兵十萬圍海州、浚命鎮江都統張子蓋往救、大破虜衆。浚以軍籍凋寡、請招集忠義來^⑧歸之人、及募淮楚壯勇之士、以充弩手、未幾成軍。又謂虜長於騎、我長於步、衛步莫如弩、衛弩莫如車、乃令陳敏專制弩治車。且請東屯盱眙、楚泗以扼清河、西屯濠壽以扼渦潁、外可以塞虜寇之糧道、內可以接大兵之氣勢。益募福建之海舟、由東海以窺東萊、由清河以窺淮陽。張子蓋自鎮江來謁、浚與圖取山東之計、奏乞益以精甲、俾屯淮上。上即位、浚首言建康

行宮當罷工役華采之事、詔從之。上自藩邸熟浚德望、臨朝之初、顧問大臣、咨嗟歎息。召浚赴行在所、賜手書。未至國門、遄趣三四、既見、上改容曰、久聞公名、今朝廷所恃唯公。賜坐、降問再三。浚言、人主以務學爲先、人主之學以一心爲本。一心合天、何事不濟。所謂天者、天下之公理而已。人主之心一爲嗜慾私溺所亂、則失其公理矣。必兢業自持、使清明在躬、則賞罰舉措無有不當、人心自歸、醜虜自服。上竦然曰、當不忘公言。又言、今日當如創業之初、每事以藝祖爲法、自一身一家始、以率天下。浚見上天錫英武、力陳和議之非、勸上堅志以圖事。制除浚少傅、江淮東西路宣撫使、節制建康鎮江府、池州、江陰軍屯駐軍馬、進封魏國公。薦陳俊卿爲判官、復往江上。翰林學士史浩議欲城瓜洲采石、下浚議、浚謂不守兩淮而守江干、是示虜以削弱之形、怠軍民戰守之氣。一有緩急、誰肯守

淮者。不若先城泗州。浩既爲參知政事。浚所規畫。浩必沮撓。如不賞海州之功。沮死驍將張子蓋。散遣東海舟師。皆浩之爲也。先是洪邁、張掄使虜回。見浚具言虜不禮我使狀。且令稱陪臣。浚請不當復遣使。而浩議遣使報虜。以登寶位。浚請毋庸遣。竟遣之。虜責舊禮。不納而還。十一月。上召俊卿及浚子栻赴行在所。浚請臨幸建康。以動中原之心。用師淮堧。進舟山東。以遙爲吳璘德順之援。上見俊卿等。問浚動靜飲食顏貌。曰。朕倚魏公如長城。不容浮言搖奪。契丹曾窩幹^①起兵攻虜。爲虜所滅。其驍將蕭鷓巴、耶律适里自海道來降。浚請厚撫之。詔浚擬官以聞。虜以十萬衆屯河南。聲言窺兩淮。浚以大兵屯盱眙。泗濠廬。虜不敢動。第文移索海泗唐鄧商州及歲幣。浚言虜詐。不當爲動。卒以無事。隆興元年正月。制除樞密使。都督建康鎮江府、池州、江陰軍。屯駐軍馬。時虜將萬戶蒲察徒穆

及僞知泗州大周仁屯虹縣。都統蕭琦屯靈壁。浚謂至秋必爲邊患。當及時掃蕩。會主管殿前司李顯忠、建康都統制邵宏淵亦獻擣二邑之策。浚具以聞。上手書報可。三月。召浚赴行在所。浚中道上疏。謂廟勝之道。在人君正身以正朝廷。正朝廷以正百官。正百官以正萬民。今德政未洽。宿敝未革。揆之廟勝。深可疑者。願發乾剛。奮獨斷。盡循太祖太宗之法。上謂浚當先圖兩城。邊患既紓。弊以次革。乃命李顯忠出濠州趨靈壁。邵宏淵出泗州趨虹縣。浚自往臨之。以軍事利鈍難必。乞上以諸葛亮建興六年所上奏置之座右。又以上旨出旗榜軍前。慰安百姓。李顯忠至靈壁。敗蕭琦。邵宏淵圍虹縣。降徒穆、周仁。乘勝進克宿州。中原震動。歸附日至。上手書曰。近日邊報。中外鼓舞。數十年來無此克捷。浚恐盛夏人疲。急召顯忠等還師。而上亦戒諸將以持重。皆未達。僞副元帥紇石烈志寧率



兵至、顯忠與戰、連日未決。諜報虜益兵將至、顯忠等信之、夜引歸、虜亦解去。時浚在盱眙、去宿不四百里、傳言虜且至、浚亟北渡淮、入泗州城撫歸士、已乃還維揚、上疏待罪。上手書撫勞。浚復奏曰、今日之事、明罰爲本、罰之所行、當自臣始。上手書報從其請、降授特進、更爲江淮宣撫使。宿師之還、士大夫主和議者非議百出。上又賜手書曰、今日邊事倚卿爲重、卿不可以畏人言而懷猶豫。前日舉事之初、朕與卿獨任之、今日亦須朕與卿終之。荐遣內侍勞浚。浚留眞揚、大飭兩淮守備。是時師退未幾、人不自保、浚徙家惟揚、衆情始定。於是浚又第諸將、乞以次行罰。命魏勝守海州、陳敏守泗州、戚方守濠州、郭振守六合、治高郵、巢縣兩城爲大兵形勢、修滌關山以扼虜衝、聚水軍淮陽、馬軍壽春。由是兩淮守備浸固。上復召棫奏事、浚言、自古有爲之君、必有腹心之臣、相與協謀同志以成治

功、不使浮言異議得以動搖。今邊隅稍定、軍旅稍整、而臣以孤蹤、跋前疐後、動輒掣肘。陛下將安用之。因乞骸骨。上覽奏、謂棫曰、雖乞去之、章曰至、朕決不許。朕待魏公有加、不爲浮議所惑。上對近臣未嘗名、浚獨曰、魏公。每遣使來、必令視浚飲食多寡、肥瘠何如。八月、有旨復浚都督。虜元帥僕散忠義貽書三省密院、欲索四郡及歲幣、且云、今茲治兵、決在農隙。浚言、虜彊則來、弱則止、不在和與不和。時朝廷欲謝遣來歸之人、其已至者、悉加禁切。浚言、陛下方務恢復、乃於降者而首疑之。時湯思退爲右相、急於求和、遂遣盧仲賢持書報虜。浚言、仲賢小人多妄、不可委信。已而仲賢果以許四郡辱命。朝廷復建遣王之望爲通問使、龍大淵副之。浚爭不能得。未幾、召浚赴行在奏事。至鎮江、以論議不合、乞罷機政。上賜手書、報以面議。旣入見、上諭浚以欲專委任之意、浚復力陳和議之失、上爲

止誓書、留使人、而令通書官胡昉、楊由義先往諭虜以四郡不可割之意。於是之望、大淵待命境上、而上與浚密謀、若虜帥必欲得四郡、當追還使人、罷和議。十二月、制拜浚尙書右僕射、同中書門下平章事兼樞密使、都督如故、思退爲左僕射、上書聖主得賢臣、頌以賜。虜械胡昉等、上聞之、諭浚曰、和議之不成、天也。自此事當歸一矣。二年三月、始議以四月進幸建康。浚又言當詔之望等還、上從之。幸建康之議、思退初不與聞、大駭、力爭、乃與其黨密謀爲陷浚計。俄詔浚行視江淮。自浚受任督府、且將三年、講論軍務、不遑寢食。所招來山東淮北忠義之士、以實建康、鎮江兩軍、凡萬二千餘人、萬弩營所招淮南壯士及江西群盜又萬餘人。要害之地、城堡皆築、其可因水爲險者、皆積水爲堰、置江淮戰艦、諸軍弓矢器械悉備。兩年冬、虜屯重兵十萬于河南、爲虛聲脅和、有刻日決戰之語。將

士望虜至成大功、而虜亦知吾有備、卒不敢動。及是、浚又以宰相來撫、諸軍將士踴躍思奮、虜聞浚來、亦檄宿州之兵歸南京、沿邊清野以俟。淮北來歸者日不絕。山東豪傑悉願受節度。浚又以蕭琦契丹望族、沈勇有謀、欲令琦盡統契丹降衆、且以檄諭契丹、虜益懼。思退乃令王之望盛毀守備、以爲不可恃。又令尹穡論罷督府、宣力屬官馮方、又論浚費國用不貲、又論浚奏留張深守泗、不受趙廓之代爲拒命、又論乞罷浚都督。浚亦請解督府、詔從其請。言者詆浚愈力。左司諫陳良翰、侍御史周操言浚不當去國。上謂良翰曰、當今人才孰踰魏公。卿宜徧諭侍從、臺諫、使知朕意。浚留平江、上章乞致仕者八。上察其誠、欲全其去。四月、制除浚少師、保信軍節度使、判福州。朝廷遂決棄地求和之議矣。浚懇辭恩命、改除醴泉觀使。行次餘干、以家事付兩子、曰、吾嘗相國家、不能恢復中原、盡雪



祖宗之耻、即死不當歸葬先人墓左、葬我衡山足矣。八月二十二日寢疾、後七日、呼子栻等于前、問國家得無棄四郡乎、且命作奏、乞致仕而薨。訃聞、上震悼、輟視朝兩日。贈太保。後五年、上追思浚忠烈、加贈太師、賜諡忠獻。浚自幼即有濟時志、不觀無益之書、不爲無益之文、孜孜求士尙友、以講明當世之故。在京城、中親見二帝北狩、皇族係虜、生民塗炭、誓不與虜俱存。艱難危疑、人所畏避、則以身任之、不以死生動其心。南渡以來、士大夫唱爲和戎之說、浚獨以虜未滅爲念。晚志益確、雖不克就、然表著天心、扶持人紀、使天下知有君臣父子之道。論事上前、必以人君當正心務學、修德畏天、至誠無倦爲先。紹興間、力挽耆儒、實之講筵、至隆興罷政、猶惓惓勸上講學。紹興之日食、隆興之飛蝗、率上疏請修德以弭變。又以儲副爲天下本、自在川陝、即上疏乞選養宗室之賢、及爲相、復陳宗

廟大計。及資善堂建、皇子出就傅、又薦朱震、范冲充訓導之選。每以東南形勢莫重建康、人主居之、北望中原、常懷憤惕。若居臨安、內則易以安肆、外則難以號召中原。故自紹興至隆興、屢以遷幸爲言。稟性至公、嘗劾李綱以私意殺從臣宋齊愈、罷其政。及大赦、綱貶海外、獨不原。浚爲請、得內徙。韓世忠軍士剽掠、浚嘗奏奪其觀察使、及視師淮上、獨稱世忠忠勇、可倚以大事。兄滉以才學爲高宗所知、賜進士第、後省繳駁、浚言不可以臣故違後省公議。其輔政以人才爲急、與趙鼎當國、多所引擢。從臣朝列皆一時之望。人號爲小元祐。至隆興初、首薦論事切直、挫折不撓者數十人。及再相、又薦虞允文、汪應辰、王十朋、劉珙等、皆一時名士。其後多至執政侍從。尤善於撫御將帥、而知其才。始在關陝、吳玠由行間識擢、卒有大功於蜀。劉錡晚出、浚一見奇之、即付以事任、歸薦于朝。卒成穎昌

之奇功。高宗嘆息謂浚知人。其他若楊政、田晟、王宗尹、王彥俊皆爲名將。大抵浚之用心以致君堯舜之道爲己任。以春秋復讎之義爲己責。以未復祖宗之境土爲己憂。議者謂其論諫本仁義似陸贄。其薦進人才似鄧禹。其奮不顧身敢任大事似寇準。其志在滅賊死而後已似諸葛亮云。事母至孝。及出身爲國。離母七年。爲宣撫日始迎養于閬中。暨在相位。始遣人迎於蜀。彗星之見。浚將論時事。恐爲母憂。其母見浚瘠。問故。具以告。母誦其父對策之語曰。臣寧言而死于斧鉞。不忍不言以負陛下。浚意乃決。母喪。浚踰六十。哀毀不自勝。於兄滉。友弟尤至。教養其子如己子。置義莊以贍其族。及母族。婚喪皆取給焉。生無玩好。視天下之物泊然。無足以動其心。起居皆有常度。在餘干未疾之前。溫恭朝夕。無一毫倦怠意。浚之學一本天理。尤深於易春秋論語孟子。奏議務坦。明不爲虛辭。口

占成文。不易一字。有紹興奏議隆興奏議各十卷。論語解四卷。易解并雜說共十卷。春秋解六卷。中庸解一卷。書詩禮解又三卷。文集十卷。藏于家。長子栻。自有傳。次子杓。以才譖稱。今爲權兵部尙書知臨安府。

楊萬里撰 《誠齋集》卷一一五

少傅劉公神道碑

淳熙五年秋七月某日。觀文殿學士彭城劉侯珙薨於建康之府舍。疾革時。手爲書。授其弟珣。使以屬其友朱熹。若曰。珙不孝。先公少傅之墓木大拱而碑未克立。蓋猶有待也。今家國之讎未報。而珙銜恨死矣。以是累子。何如。熹發書慟哭曰。嗚呼。共父遽至此耶。且吾蚤失吾父。少傅公實收教之。共父之責。乃吾責也。即訪其家。得公弟屏山先生所次行狀。又得今江陵張侯栻所爲銘。以次其事曰。公姓劉氏。諱子羽。字彥修。其先自長安徙建州。今



爲崇安縣五夫里人。曾大父贈朝議大夫太素。大父贈太子太保民先。皆以儒學教授鄉里。而皇考資政殿學士、贈太師忠顯公遂以忠孝大節殺身成仁。事載國史。公其嗣子也。少以父任。補將仕郎。積勞。轉宣敎郎。權浙東安撫司書寫機宜文字。入主太僕。太府簿。遷光祿丞。辟河北、河東宣撫司書寫機宜文字。以功轉朝請大夫。授直秘閣。建炎三年。擢充秘閣修撰。知池州。改集英殿修撰。知秦州。未行。除御營使司參贊軍事。辟川陝宣撫處置使司參議軍事。四年。除徽猷閣待制。紹興二年。領利州路經略使。兼知興元府。除寶文閣直學士。封彭城縣開國男。食邑三百戶。三年。責授單州團練副使。白州安置。四年。還故官。提舉江州太平觀。復爲集英殿修撰。知鄂州。權都督府參議軍事。宣諭川陝。踰年還報。復待制。知泉州。八年。落職奉祠。尋責散官。漳州安置。十年。以赦得還。十一年。復故官。起

爲沿江安撫使。知鎮江府。十二年。復待制。進爵子。益封二百戶。是歲罷。復爲太平祠官。五年而薨。年五十矣。公天姿英毅。自少卓犖不羣。年二十四五時。佐忠顯公守越。以羸卒數百破睦寇方臘數十萬衆。卒全其城。復佐忠顯公守真定。會女眞入寇。以大兵圍其城。公設方略。登陴拒守數月。虜不能下而去。忠顯公旣以節死。公扶喪歸葬。號天泣血。以必報讎恥自誓。朝廷亦素知其材。使參御營使軍事。時叛將范瓊擁彊兵。據上流。召之不來。來又不肯釋兵。中外洶洶。知樞密院事張忠獻公與公密謀誅之。一日。爲遣張俊以千人度江。捕他盜者。使皆甲而來。因召瓊。俊及劉光世詣都堂計事。爲設飲食。食已。諸公相顧未發。公坐廡下。恐瓊覺事變。遽取黃紙執之趨前。舉以麾瓊曰。下有敕。將軍可詣大理置對。瓊愕不知所爲。公顧左右擁置輿中。衛以俊兵送獄。使光世出撫其衆。數瓊在圍城

中附賊虜迫脅二聖出狩狀且曰、所誅止瓊耳、汝等固天子自將之兵也。衆皆投刃曰諾、因悉麾隸他軍。頃刻而定、瓊竟伏誅。張公由此益奇公、及使川陝、遂辟以行。至秦州、立幕府、節度五路諸將、規以五年而後出師。明年、虜窺江淮急、張公念禁衛寡弱、計所以分撓其兵勢者、遂合五路之兵以進。公以非本計爭之、張公曰、吾寧不知此。顧今東南之事方急、不得不爲是耳。遂北至富平、與虜遇、戰不利、虜乘勝而前。宣撫司退保興州、人情大震。官屬有建策徙治夔州者、公叱之曰、孺子可斬也。四川全盛、虜欲入寇久矣。直以川口有鐵山棧道之險、未敢遽窺耳。今不堅守、縱使深入、而吾乃僻處夔峽、遂與關中聲援不復相聞、進退失計、悔將何及。今幸虜方肆掠、未逼近郡、宣司但當留駐興州、外繫關中之望、內安全蜀之心、急遣官屬出關、呼召諸將、收集散亡、分布險隘、堅壁固壘、觀釁而動、

庶幾猶或可以補前愆、贖_⑦後咎、柰何乃爲此言乎。張公然公言、而諸參佐無敢行者。公即自請奉命北出、復以單騎至秦州、分遣腹心、召諸亡將。諸亡將聞命大喜、悉以其衆來會。公命驍將吳玠柵和尚原、守大散關、而分兵悉守諸險塞。虜諜知我有備、引去。明年、虜復聚兵來攻、再爲玠所敗、俘獲萬計、蜀土以安。宣撫司移軍閬州、公請獨留關外、調護諸將、以通內外聲援、軍民之心翕然向之。又明年、漢中大饑、諸帥閉境自守、因有建_⑧言、皆願得公與連兵。張公承制、可其請。公至鎮、開關通商輸粟、輯睦鄰援、飭兵練卒、柵險待敵。會虜復入寇、將道金商以鄉四川。公以書諭金州經略使王彥、使伏彊弩於險以俟之。彥習用短兵、屢平小盜、不以公言爲意。虜猝至、不知所爲、逆戰、果敗走、保石泉。時吳玠爲秦鳳經略使、公聞彥失守、亟移兵守饒風嶺、且以語玠。玠大驚、即越境而東、一日夜馳三百



里。中道少止、請公會西縣計事。公報曰、虜旦夕至、饒風下、不亟守此、是無蜀也。公不前、吾當往。今又西走、不知者謂吾懼而逸爾、諸將得無解體乎。玠得書、即復馳至饒風、列營拒守。虜人悉力仰攻、死傷如積。更募死士由間道犯祖溪關以入、繞出玠後。玠遽走還漢中、且來邀公、欲與俱去。公不可、留玠共[○]柵定軍山以守。玠不可、公不得已退守三泉。從兵不及三百人。與士卒同粗糲、至取草牙木甲噉之。遺玠書與訣、玠持之泣下、欲馳赴公。未果、其愛將楊政者大呼軍門曰、公今不行、是負劉公、政輩亦且舍公去矣。玠乃來會三泉。時虜游騎甚迫、玠夜不寐、起視公方甘寢自若、旁無警何者。遽起公、請曰、此何等時。而簡易若是。公慨然曰、吾死命也、亦何言。玠慚嘆泣下、竟不果留。公以潭毒山形斗拔、其上寬平有泉水、乃築壘守之。儲粟十餘萬石、盡徙將士家屬柵中、積石數十百萬、下臨走蜀

道。數日、虜果至營數十里間。一夕候騎報虜大軍且至、諸將皆失色。入問計、公曰、始與公等云何。今寇至、欲避邪。下令蓐食、遲明上馬、先至戰地前、當山角、據胡牀坐。諸將追及、泣請曰、某輩乃當致死於此、非公所宜處也。公不爲動、虜知不可攻、亦引退。自虜入梁洋、蜀中復大震。宣撫司官屬爭咎公、更爲浮言相恐動、力請張公徙治潼川。令下、軍士憤怒、或取其榜毀之。公亦以書力爲張公言、此已爲死守、虜必不敢越我而南。藉令不能守、我死行未晚也。今一旦輕動若此、兵將忿怒、恐將有齟齬公墳墓者、柰何。張公發書大悟、立止不行。虜遣十餘人持書與旗來招公及玠、公斬之、餘一人使還曰、爲我語羣盜、欲來即來、吾有死耳、何可招也。因復與玠謀、出銳師腹背擊之。未及期而虜已遁矣。蓋方虜未至、公已悉徙梁洋官私之積置他所。虜旣深入、無所得而糧日匱、前後苦攻、死傷十五六、

又聞公之將襲己也、懼、故遁。公亟遣兵追擊之、墮谿谷死者不可計。其餘衆不能自拔者、猶數十柵、皆降之。是時、虜大酋撒離喝兀朮輩主兵用事、計必取蜀以窺東南。其選募戰攻、蓋已不遺餘力。而我之謀臣戰將、亦無敢爲必守計者。獨公與張公協心戮力、毅然以身當兵衝、將士視公感激爭奮、卒全蜀境、以蔽上流。寇退、又方相與定計、改紀軍政、以圖再舉。而張公已困於讒、公亦相次得罪、徙白州矣。始、吳玠爲裨將、未知名。公獨奇之、言於張公。張公與語、大悅、使盡護諸將。至是、上疏請還所假節、傳檄贖公罪。士大夫以是多玠之義而服公之知人。旣、張公入相、大議合兵爲北討計、召公赴闕、使諭指西師、且察邊備虛實。公還、奏虜未可圖。宜益治兵、廣營田、以俟幾會。時、又方議易置淮西大將、且以其兵屬公。公復以爲不可、遂以親老丐郡以歸。泉僧可度以賂結中貴人、屬戚里陳氏

誣奏、奪陳洪進守冢寺、符州奉行。公曰、此細事爾、然小人罔上如此、是乃履霜之漸、不可長也。即疏其事以聞。僚屬相顧、莫敢連署。公乃獨奏極言之。可度等皆抵罪。旣、又大興學校、以教其人、堂序規模、略放大學。至今爲閩中諸郡之冠。已而淮西軍果亂、議者反謂公實使然、不責、無以係叛將南歸之望。於是有臨漳之行、聞者嗤之、而公不自辨也。在鎮江、會金虜復渝盟、公建議清野、盡徙淮東之人於京口、撫以威信、兵民雜居、無敢相侵擾者。嘗得盜、劾之、乃楚州守某者所爲。前後攻劫不可計、悉具獄棄之市。某者亦坐遠竄。於是境內帖然、道不拾遺。旣而虜騎久不至、樞密使張俊視師江上、以問公。公曰、此虜異時入寇、飄忽如風雨、今更遲回、是必有他意。已而果復以和爲請。使至、植大旗舟上、書曰江南撫諭。公見之、怒、夜以他旗易之。翌日、接伴使者見旗有異、大懼、索之急。公曰、吾爲守

臣、朝論無所與。然欲揭此於吾州之境、則吾有死而已。索猶不已、乃遣人境外授之。會張俊歸奏事、上聞公治狀及料敵語、於是復有待制之命。公以和戎本非久遠計、宜及間暇時修城壘、除器械、備舟楫、以俟時變。宰相秦檜不悅、諷言者論之。罷歸、遂不復起。薨後十有六年、和議果敗、虜騎直抵采石瓜洲、江津幾不守。於是人始服公前慮之深而恨其不及用也。熹之先人晚從公游、疾病、寓書以家事爲寄。公惻然憐之、收教熹如子姪。故熹自幼得拜公左右、然已不及見公履戎開府時事。獨見其居家接人孝友樂易、開心見誠、豁然無纖芥滯吝意。好賢樂善、輕財喜施、於姻親舊故貧病困阨之際、尤孜孜焉。因嘗從公門下士及一二故將問公平生大節、又知其忘身殉國之忠、決機料敵之明、得將士心、人人樂爲盡死、事皆偉然、雖古名將不能過。至其爲政、則又愛民禮士、敦尙教化、決姦

擿伏、不畏彊禦、乃有古良吏風。及公旣沒、然後得其議奏諸書讀之、知其痛憤無日不在於讎虜、而其識慮之深又如此、未嘗不慨然撫卷廢書而歎也。公元妃福國夫人熊氏、葬拱辰山、忠顯公墓次、而屏山先生實表之。繼室慶國夫人卓氏、公沒、持家二十餘年、細大有法、內外斬斬。彭城侯雖熊出、然其撫之厚而教之嚴、所以成就其德業爲多。遇族黨親疏、曲有恩意。薨荆南府舍、葬甌寧縣演平之原。公子三人、彭城侯爲長。次瑞、承務郎。出後公弟秘閣公早卒。次玘、從事郎。亦以公命爲屏山先生後。孫男二人、學雅、承務郎。學裘、尙幼。女二人、長適將仕郎呂欽、次未行。熹惟公家三世一心、以忠孝相傳、事業皆可記、而公所處尤艱且勤、績效最著、人至于今賴之。於是旣悉論載其實、又泣而爲之銘、以卒承彭城侯之遺命。其銘曰、

天警皇德、曰陂其平。復畀人傑、俾扶厥傾。薄言試



之于越于鎮。卒事于西、亦危乃定。始卻于秦、偪仄飄搖。一士之得、厥猷以昭。再蹶于梁、莫相予死。亦障其衝、校績愈偉。岷嶓旣奠、江漢滔滔。爾職于佚、我司其勞。曾是弗圖、讒口瞽瞍。載北載南、倏貶其褒。曰和匪同、識微慮遠。豈不諄諄。卒莫予展。我林我泉、我寄不淺。莫年壯心、有逝無反。惟忠惟孝、自我先公。勉哉嗣賢、克咸厥功。豈不咸之。又毀于成。詩勸來者、永其休聲。

朱熹撰 《晦庵先生朱文公文集》卷八八

少傅劉公墓誌銘

公姓劉氏、諱子羽、字彥修。世爲京兆人。八世祖避五季之亂、徙家建州。曾祖太素、贈朝議大夫。祖民先、任承事郎、贈太子太保。再世以儒學教授鄉里。考幹、任資政殿學士、贈太師、諡忠顯。公以門蔭入仕。宣和末、忠顯帥浙東、盜發睦州、陷諸郡、直抵越。越兵不滿千、而盜且數千、公以主管機宜文字佐

忠顯募民守、卒全其城。入爲太府簿、遷衛尉丞。忠顯帥真定、復辟公以從。女眞入寇、圍城數匝、父子相與死守、部分方略、多公之謀。虜不能拔而去、名聞河朔間。除直祕閣。忠顯率兵入援京師、與虜戰、力屈死城下。方是時、爲國死難者蓋鮮、獨忠顯之節甚白。公痛家國讎耻之大義、不與虜共戴天。免喪、以祕閣修撰知池州、改集英殿修撰、知秦州、未行。召赴行在所、除御營使司參贊軍事。時太上皇帝即位三年、苗傅、劉正彥甫伏誅、有平寇將軍范瓊擁兵入覲。瓊在靖康變故中附讎、逆亂、知樞密院事。忠獻張公與公謀誅之。張公召瓊詣都堂、公叱縛之、致於理。懷敕榜出、撫其衆曰、所誅止瓊、爾輩皆御前軍也。衆頓刃應諾。悉麾隸它軍。頃刻而定。忠獻益奇公。及領川陝宣撫處置使、遂辟公參議軍事。公雅意欲圖虜、念關陝要地、而張公一見相知、非偶然者。遂不辭而從。宣撫司至關、據秦州、



號令五路。會聞虜窺江淮、議爲牽制、合五路兵進至富平、與虜遇、我衆不能支、虜乘勝以前、宣撫司退保蜀口、官屬震恐。有建議當保夔州者、公曰、議者可斬也。宣撫司豈可過興州一步。係關陝之望、安全蜀之心、收散亡、固壁壘、以爲後圖則可。與張公意合。公單馬直抵秦亭、分遣腹心、訪諸將所在。時虜騎四出、道阻不通、將士無所歸、忽聞公在近、宣撫司留蜀口、乃各引所部來會、軍復振。公命驍將吳玠柵和尚原、守大散關、虜不敢犯。紹興元年夏、始聚兵來攻、玠敗之。秋復來、又大敗之、俘獲以數萬計。宣撫司徒治閬中、公留關外護軍。上知其勞、除徽猷閣待制。明年、玠以秦鳳經略使戍河池、王彥以金房鎮撫使戍金州。二鎮皆饑、而興元帥過爲守備、閉關塞褒斜、二鎮病之。張公亟召玠、彥議事、皆願得公鎮興元、乃承制拜公利州路經略使兼知興元府。公至之日、盡弛其禁、通商輸粟、二

鎮乃安。公謂虜用騎兵利衝突、在我當先柵要地、以勁弓弩待之、蔑不濟者。且以是約二將、獨彥頗易公之說。是歲十二月、虜由商於犯金州、正月至上津、彥出不意、逆戰不能卻、遂焚金州、退保石泉。公遣將馳告玠、玠曰、事迫矣。當亟徼於險。諸將不能辦、我當自行。不然、是負劉待制。即越境馳一日夜、凡三百里、中道少止。公移書曰、虜旦夕至饒風嶺下、不亟守此、是無蜀也。公不前、某當往。玠即復馳至饒風、虜急攻數日、死傷如積、更募死士犯祖溪關以入、出玠後、玠還漢中。公與玠謀守定軍山、玠憚之、遂西。公退守三泉、從兵不及三百、與士卒同粗糲、至取草木芽蘗食之。遺玠書曰、某誓死於此、與公訣矣。玠得書泣、其愛將楊政大呼軍門曰、節使不可負劉待制。不然、政輩亦捨節使去。玠乃從麾下自仙人關由間道與公會於三泉。虜遊騎甚迫、玠夜視公方酣寢、旁無警呵者。玠曰、此何等

時而簡易乃爾。公慨然曰、吾死命也、夫何言。玠泣下、復往守仙人關、公獨留、爲壁壘於潭毒山上、十六日而成、又數日而虜至。中夜、斥堠將遣人報曰、虜至矣。諸將皆失色入白事。公曰、始與公等云何。今寇至欲避耶。下令蓐食。遲明上馬、先止戰地、據山角坐胡床、諸將奔至、皆泣曰、此某等駐軍處、而公先之耶。豈可使虜矢傷公。即爭代公處。頃之、復有來報曰、虜退矣。乃還。方虜入梁、洋、蜀、大震、宣撫司官屬爭咎公、有爲浮言相恐動、請徙治潼川、軍士聞者皆怒。公力爲書爲張公言、某在此、虜決不能越、無爲輕動搖。張公用公言、乃定。虜遣十五輩賫書與旗來招公及玠、公斬其十四人、令一人還曰、爲我言於爾酋、來戰即來、我有死、何招也。先是、梁、洋官私之積、公悉已徙置、虜無所得糧、日匱、前後苦攻、死傷十五六、涉春已深、癘疫且作、遂遁去、爲我師掩擊及墮溪谷死者不可勝計。虜之去四

月也、其餘衆不能自拔者悉降、凡十數柵、虜之喪失蓋莫甚於此役。方是時、虜其大酋撒離喝、兀朮輩垂涎於蜀、日_○夜聚謀。所選士卒千取百、百取十。其戰被重鎧、登山攻險、每一人前、輒二人擁其後。前者死、後者復被其甲以進、又死、則又代之如初。其爲必取計蓋如此。惟公與張公協心戮力、毅然以身當兵衝、將士視公、感激爭奮、卒全蜀境。公還興元、分遣官吏、安集勞來、凡潰卒之乘時怙亂山谷間者、悉捕斬以徇。自是兵勢日振、方更恢遠略。然張公已困於讒、公亦尋被罪矣。是歲除寶文閣直學士。四年、責授散官、安置白州。始、吳玠爲偏將、公奇之、言於張公。張公與語、大悅、使盡護諸將、卒得玠力。至是玠上疏納節贖公罪、士大夫多玠之義、而服公之知人。明年、還故官、奉祠。時張公相矣。召公赴在所。又還集英殿修撰、知鄂州、權都督府參議軍事、宣諭陝蜀。朝議欲合諸道兵大舉、公自



蜀還、歷諸邊、盡得虛實、謂且當益繕治、廣營田以俟時。朝廷欲遂用、公顧親年浸高、力請歸養、以徽猷閣待制知泉州。泉素難治、番商雜居。公下車肅然、無敢犯。有事涉權倖者、立論奏釐正之。亡何、張公去位、言事者觀望論公、復責散官、安置漳州。以郊祀恩得歸、會江上擇守、起公爲沿江安撫使、知鎮江府。虜入寇、公建請清野、盡徙淮東之人於京口、填拊得宜、人情不搖。謂樞密使張俊曰、異時此虜入寇、飄忽如風雨、今更遲回、是必有它意。已而果欲邀和、及遣使來、揭旗於舟、大書江南撫諭。公見之、怒、夜以他旗易之。翌日、接伴使索之甚急、公曰、有死耳、旗不可得。及其歸、遣還之境外。張俊以公料敵及治狀聞、有旨復待制。和議成、公謂宜及無事時、講修淮漢守備、厲器械、治舟楫、其言甚悉。宰相秦檜忌之、諷言者論罷、復以祠祿歸。十四年十月二日遇疾、沒於正寢、享年五十。積官右朝議

大夫、以子貴、贈太師。娶熊氏、贈福國夫人。再娶卓氏、贈慶國夫人。子珙、克世其家、後復以忠義識略被今上眷遇、嘗爲同知樞密院事。識者不以劉氏三世宦達爲衣冠之盛、而以忠義相傳不替、愈大爲家國之光。淳熙四年、珙爲建康留守、病且革、自力作書與其友張某、以銘公墓爲屬。某蓋公所從忠獻張公之嗣子也、奉書而泣、且無所從辭。於是取公弟子輩舊所狀行實、掇其大節、次第之如此。惟公慷慨自許、每有捐身殉國之願。當事之難、衆人惶撓失措、公色愈厲、氣愈勁、遇事立斷、凜不可犯。尤長於兵、料敵決機、殆無遺筭。得將士心、皆願爲盡死。其爲政發姦摘伏、若神、所治不畏強禦。而天性孝友、恂恂接人、樂易、開口見肺肝。輕財重義、緩急扣門、無愛於力。振人乏絕、傾貲倒廩、無吝色。姻親鄉黨昏喪、悉任其責。闢家塾、延名士以教鄉之秀子弟。吏部郎朱松疾病、以家事託、公築室買

田居之舍旁、教其子熹與己子均、卒以道義成立。平生再貶徙、處之怡然、不以介意。而其許國之誠、則至於沒而不懈也。嗚呼偉哉。公以是歲某月某日葬於崇安縣五夫之原、某之爲銘、蓋後公沒三十有五年也。公孫二人、學雅、承務郎。學裘、尙幼。孫女二人、長適將仕郎呂欽、幼未行。銘曰、

寒沍凜冽、喬松挺節。人危反側、志士秉烈。允毅劉公、孤忠業業。國耻家讎、刻骨泣血。誓不同天、心焉如鐵。縛袴從戎、思奮其伐。虜方鴟張、闖蜀門闐。紛紛鄙夫、縮避一轍。惟公矢謀、克贊於決。身當兵衝、橫遏力折。衆駭失色、我怒貫髮。驍將突兵、怙以奮發。羯酋力窮、麕走竭蹶。迄全蜀疆、如器無缺。伊人是恃、豈險難越。不寧蜀全、關輔可挈。投機於征、以冀日月。巧言害成、健手孰掣。空令父老、談說嘖嘖。和戎議興、公膺如噎。守臣舉職、妖旗莫揭。歸卧於家、忠憤曷洩。嗚呼中年、竟隕此傑。歲踰再紀、精爽

森列。嗣德有光、公志益晰。我爲銘詩、追勒其碣。

張栻撰 《新刊南軒先生文集》卷一三

校記

- ①改：原作「文」，據四庫本《誠齋集》改。
- ②以浚：原作「臣浚」，據右引改。
- ③稿：原作「稿」，據右引改。
- ④縮：原作「宿」，據右引改。
- ⑤乘：原作「秉」，據右引改。
- ⑥庭：原作「度」，據右引改。
- ⑦行：原脫，據《宋史·張浚傳》補。
- ⑧上：原脫，據四庫本《誠齋集》補。
- ⑨帥：原作「師」，據右引改。
- ⑩寇：原作「冠」，據右引改。
- ⑪張浚：原作「張浚」，據右引改。
- ⑫倡：原作「偶」，據右引改。
- ⑬遣：原作「遺」，據右引改。
- ⑭臺：原作「壹」，據右引改。
- ⑮完：原作「元」，據右引改。

- ⑯間：原作「問」，據右引改。
- ⑰官：原作「宮」，據右引改。
- ⑱來：原作「求」，據右引改。
- ⑲窩幹：原作「窩幹」，據《金史·世宗紀》改。
- ⑳可：原脫，據四庫本《誠齋集》補。
- ㉑「營所招」至「萬餘人」十六字原脫，據右引補。
- ㉒趙廓：原作「趙廊」，據右引改。
- ㉓餘干：原作「餘于」，據右引改。
- ㉔忠勇：原脫「忠」字，據右引補。
- ㉕坦：原作「垣」，據右引改。
- ㉖扶：原作「挾」，據《劉氏傳忠錄》正編卷二改。
- ㉗贖：原作「續」，據宋浙江刊本《晦庵先生文集》改。
- ㉘建：原作「違」，據《劉氏傳忠錄》正編卷二改。
- ㉙共：原作「先」，據宋浙江刊本《晦庵先生文集》改。
- ㉚讎：原作「賦」，據四庫本《南軒集》及《名臣碑傳琬琰集》下集卷二三改。道光本作「賊」。



藏

③呵：原作「何」，據《劉氏傳忠錄》改。道光本作「伺」。

④日：原作「自」，據四庫本《南軒集》及《名臣碑傳琬琰集》下集卷二三改。

宋儒碑傳集卷一百二

朱松

皇考左承議郎守尚書吏部員外郎兼史

館校勘累贈通議大夫朱公行狀

本貫徽州婺源縣萬年鄉松巖里。曾祖振，故不仕。妣汪氏。^①祖絢，故不仕。妣汪氏。父森，故贈承事郎。妣程氏，贈孺人。公諱松，字喬年，以紹聖四年閏二月戊申生於邑里之居第。未冠，繇郡學貢京師。以政和八年同上舍出身，授迪功郎、建州政和縣尉。丁外艱，服除，更調南劍州尤溪縣尉，監泉州石井鎮。紹興四年，召試館職，除祕書省正字，循左從政郎。丁內艱，服除，召對，改左宣教郎，除祕書省校書郎。遷著作佐郎，尚書度支員外郎，兼史館校勘。歷司勳、吏部兩曹，兼領史職如故。與修哲宗實錄，書成，轉奉議郎。以年勞，轉承議郎，出知饒州。未上，請間，得主管台州崇道觀。滿秩再請，命下而卒。紹興十

三年三月二十四日辛亥也。公生有俊才，自爲兒童時，出語已驚人。少長，遊學校，爲舉子文，即清新灑落，無當時陳腐卑弱之氣。及去場屋，始放意爲詩文。其詩初亦不事雕飾，而天然秀發，格力閑暇，超然有出塵之趣。遠近傳誦，至聞京師，一時前輩以詩鳴者，往往未識其面而已交口譽之。其文汪洋放肆，不見涯涘，如川之方至而奔騰蹙沓，渾浩流轉，頃刻萬變，不可名狀。人亦少能及之。然公未嘗以是而自喜。一日喟然顧而歎曰：「是則昌矣，如去道愈遠何？」則又發憤折節，益取六經諸史百氏之書伏而讀之，以求天下國家興亡理亂之變。與夫一時君子所以應時合變先後本末之序，期於有以發爲論議，措之事業。如賈長沙、陸宣公之爲者，旣又得浦城蕭公顗子莊、劍浦羅公從彥、仲素而與之遊，則聞龜山楊氏所傳河洛之學，獨得古先聖賢不傳之遺意。於是益自刻厲，痛刮浮華，以



儒藏

趨本實。日誦大學、中庸之書、以用力於致知誠意之地。自謂卞急害道、因取古人佩韋之義以名其齋。蚤夜其間、以自警飭。繇是向之所得於觀考者、益有以自信而守之愈堅、故嘗稱曰、士之所志、其分在於義利之間兩端而已。然其發甚微而其流甚遠、譬之射焉、失豪釐於機括之間、則差尋丈於百步之外矣。又嘗以謂父子主恩、君臣主義、是爲天下之大戒、無所逃於天地之間。如人食息呼吸於元氣之中、一息之不屬、理必至於斃。是以自昔聖賢立法垂訓、所以維持防範於其間者、未嘗一日而少忘、其意豈特爲目前之慮而已哉。是時宣和之季、士之干世至是已無可言者矣。旋屬靖康之變、中朝蕩覆。公在尤溪、方與同寮燕集、忽有以北狩之問來諗者。公聞震駭、投袂而起、大慟幾絕。旣而建炎再造、王室漂搖、未有所定。寇賊縱橫、道路梗塞、固不暇於博求幽遠、以盡一世人材之用。

而公抱負經奇、尤恥自售以求聞達、以是因於塵埃卑辱、鋒鏑擾攘之中、逃寄假攝、以養其親十有餘年。以至下從算商之役於嶺海魚鰕無人之境、則已無復有當世意矣。會詔出御史胡公世將撫喻東南、公乃因謁見而說之曰、古之爲天下國家者、必有一定之計、以爲子孫萬世之業。未有俯仰依違、苟度朝夕、曾不爲終歲之備而可以爲國者也。今日廟堂之義固必有所謂一定之計矣、然未知其但欲襟憑江漢、控引荆吳、以保東南而已乎。抑當克復神州、汎掃陵闕、據中原而撫三河也。蓋嘗聞之、不取關中、中原不可復。不取荆淮、東南不可保。唐唯不失關中、故更三亡、不失舊物。而吳孫氏東攻新城、西攻襄漢、乃所以保建業。其後桓溫、劉裕雖能以江漢舟艫西入河渭、然旣得之而不能守、則亦僅足以保東南而已。然則天下之大勢可知已。今進旣不能以六師之重通道荆襄、循漢

沔以赴興元、結連拓跋、控引五路、東嚮以圖中原。退又不能移蹕建康、治兵訓武、北爭荆淮、以爲固守之計、而但蹙處一方、費日月於道塗、前不能有尺寸之利、後又無所保以爲安、未知漂漂者竟何如耶。胡公奇其言、壯其策、歸即以聞於朝。而泉守、資政殿學士謝公克家隨亦露章薦公學行之懿、不宜滯筦庫、於是乃得召試。而發策者以中興事業之難易、後先爲問、公即對言、自古謀國有得失、而成功無難易。蓋天下國家有至計、而國勢之強弱、兵力之盛衰、土地之開蹙、不與焉。唯能順人心、任賢才、正綱紀、則天下之事將無難之不易。惟上之人惜時愛日而亟圖之、反覆馳騁、辯說縱橫、出入古今、證驗精博、日未昃、奏篇已上、累數千言、而文不加點、高宗覽而異焉。趙忠簡公方以元樞受詔、西督川陝、荆襄軍事、欲奏取公爲屬、會太夫人屬疾不果。旣遂遭喪以歸、而趙公卒亦不果行也。

再召入對、時上已用張忠獻公之策、進次建康、指授諸將、計日大舉以復中原、國勢亦小振矣。公始進見、欲堅上意、以遂中興之業、即奏言曰、陛下以聖哲之資、撫艱難之運、側身焦思、累年于茲、而民困兵弱、虜僞侵凌、戡定之勳久而未集。意者陛下殆當抗聖志於高明、而輔之以睿智日躋之學、垂精延訪、蚤夜汲汲、以求宗廟社稷經遠持久之計。申明紀律、崇獎節義、而又以民心爲基本、忠良爲腹心、則臣有以知虜僞之不足憂、而恢復大功指日可冀矣。因論自古中興之君、唯漢之光武勤勞不怠、身濟大業、可以爲法。晉之元帝、唐之肅宗、志趣卑近、功烈不終、可以爲戒。反覆切至、而猶慮夫計畫之間、或未精審、無以服衆心而成大功也。則又言曰、人主操大權以御一世、必有所以處此者、有以切中於理、然後足以深服天下之心、是以無爲而不成。今萬機之務、決於早朝侍立、逡巡之頃、



未有以博盡謀謨之益、使其必當事理、以服人心。謂宜略放唐朝延英坐論之制、仰稽仁祖天章給札之規、延訪羣臣、博求至計、然後總攬參訂、以次施行。則政令之出、上下厭服、天下之事無所爲而不成矣。顧又嘗病士溺於俗學、而不明君臣之大義、是以處於成敗之間者、常有苟生自恕之心、而缺於舍生取義之節、將使三綱淪墜、而有國家者無所恃以爲安、則又奏言、宜鑒既往之失、深以明人倫、勵名節爲先務、而又博求魁磊骨鯁、沈正不回之士、寘之朝廷、使之平居無事、正色立朝、則姦萌逆節、銷伏於冥冥之中。一朝有緩急、則奮不顧身、以抗大難、亦足以禦危辱、凌暴之侮、則庶幾乎神器尊嚴、而基祚強固矣。上悅其言、而於光武、晉、唐之論尤所嘉歎。明日、以喻輔臣、且論元帝、肅宗之失、而尤以元帝區區僅保江左、略無規取中原之志爲誚。乃詔改公京秩、仍典校中秘書。則當是

之時、聖志所存亦可見矣。不幸適有淮西殺將叛、兵之變、中外恟疑、異議蠭起、張公至爲解相印去、而國論遂變、至欲盡撤兩淮之戍、還建康以自衛。公深以爲不可、因率同列拜疏言曰、淮淝東南之屏蔽、昔人之所百戰而必爭者。今皆幸爲我有、而無故捐之以資敵、非計之得也。若彼乘吾之郤、長驅以來、不信宿而至江津、人心一搖、則建康雖有甲卒十萬、亦將無所施矣。且其新民累歲安集、亦既有緒。今乃一朝而棄之、使其老稚狼狽而南來、丁壯忿憾而北去、其失人心以貽後患、抑又甚焉。即以宿衛單寡、必行今策、則願毋庸盡撤、而使合肥、盱眙兩戍所留各不下三萬人、則亦足以固吾圉而折虜衝矣。疏奏不省、而劉豫果數求援於虜、以乘吾隙、議者方以爲憂、而虜反忌豫強將不可制、一旦執而廢之、遂不暇以我爲事。不然、則亦殆矣。自是之後、廟算低回、上下解弛、北伐之謀日以

益衰、顧望中原、坐失機會。而明年、車駕遂還臨安矣。御史中丞常公同薦公恬、尙有守、可任大事、因復召對。公即抗言、當今國論不過兩端、喜進取之謀者、旣以行險妄動而及於敗、爲待時之說者、又以玩日愒歲而至於媮。二者不能相通、而常墮於一偏、是以成功不可見而均受其弊。故臣嘗謂能自治以觀釁、則是二者通爲一說、而無所偏廢。蓋能夙夜憂勞、率厲衆志、則未嘗不待時而不至於媮。審知彼己、必順天道、則未嘗不進取而不及於敗。謀人之國者、誠能如是以求、逞於讎敵而有不得志者、臣不信也。然臣竊迹近事、則夫往年江上之捷、曰者僞劉之廢、中原之釁、可謂大矣。而吾終未肯求所逞、豈非以行險妄動爲不可以不戒、而於吾所以自治其國家者、將益求其至歟。今日之勢、雖未至於危機交急、亦可謂迫矣。謂宜斷自聖志、深思昔人愛日之義、憂勞庶政、無少怠忽。凡事

之故常、非天下所以安危存亡者、悉歸之有司、而日與輔相大臣一心戮力、明禮義、正綱紀、除弊政、振媮俗、撫循凋瘵之民、淬勵士大夫而責之職業、凡以求吾所以自治者、然後謹察四方之釁、投隙而起、安受其燼、以致天地之殛、則雖有智者亦不知爲敵謀矣。初、劉光世守淮西、御軍無法、而寇至輒謀引避。旣正其罪而奪之兵矣、尋有叛兵之變、廟議反謂由罷光世使然、更慰藉而寵秩之。張俊守盱眙、方撤戍時、猶命分兵留屯、而俊不受命、悉衆以歸、朝廷亦不能詰。公於是又言、陛下有爲之志、未嘗少衰、而天下之事、每每病於不立、使中興之烈、未有卓然可見之効、臣竊不勝憂憤。而深惟其故、以爲陛下誠能並進忠賢、修明紀律、懲陵夷委靡之禍、革姑息苟且之政、深詔大臣、號令所出、必務合於天下之正義、而毋卹匹夫狗私之怨、則威令必振、國勢安強。雖桀、鰲之虜、亦將斂衽而退。



聽尙何病於事之不立哉。上亦不以爲忤。特命除郎兼昇史筆。而常公猶以爲此非所爲薦論之本意。再論上前。言甚懇至。然事已行。不及改也。公至史院。會方刊修蔡卞所撰哲宗實錄。而宣仁附傳實公所分。所以辨明誣謗。分別邪正者。於體爲尤重。而公考訂精密。直筆無隱。論者美之。其後顧亦不免頗爲他官所竄易。是以讀者猶有憾焉。旣而虜人亟遣使來請和。趙公以議小不合亦罷去。而秦丞相檜始顓政事。遂決屈己和戎之議矣。虜使名稱旣不遜。而所責奉承之禮又有大可駭者。於是衆心共怒。軍士至洶洶欲爲變。夜或揭通衢。指檜爲虜謀。都人洶懼。一時忠智之士競起而爭之。公亦亟與史院同舍胡公瑄。凌公景夏。常公明。范公如圭。五六人者。合辭抗疏言曰。虜人方據中原。吞噬未厭。何憂何懼。而一旦幡然與我和哉。蓋其紐於荐食之威。動輒得志。而我甚易恐。故常喜爲

和之說以侮我。又慮我訓兵積粟。畜銳俟時而事有不可知者。故不得不爲和之說以撓我耳。蓋虜人和使即秦之衡人。兵家用之百勝之術也。六國不悟衡人割地之無饜以亡其國。今國家不悟虜使請和之得策。其禍亦豈可勝言哉。而執事者顧方以爲吾爲梓宮母后淵聖天屬之故。遂不復顧祖宗社稷二百年付託之重而輕從之。使彼得濟其不遜無稽之謀而藉躡以逞。將焉避之哉。昔楚漢相持之際。項羽常置太公俎上。而約高祖以降矣。使爲高祖者信其詐謀而遽爲之屈。則自其一身且無處所。尙何太公之可還哉。唯其不信不屈。而日夜思所以圖楚者。以故卒能蹙羽鴻溝之上。使其兵疲食盡。勢窮力屈。而太公自歸。此其計之得失亦足以觀矣。其言之切如此。蓋出公與諸公之意。而成於胡公之手。檜雖持其議不少變。然虜人狂謀因是亦有不得盡逞者。論者莫不壯之。然



自是之後、邊備遂弛、士氣益衰、而興復之謀上下皆以爲諱、正墮公等所憂撓我之計。檜顧自以爲得上心、始謀以次盡逐諸異議者、公因是亦數自求引去。而參知政事李莊簡公又嘗欲引以真近班、以是檜尤忌之、固留不許。及虜使再至、獨許歸我河南地。公因輪對、又言、陛下踐艱難之運、十年于茲、雖有大有爲之志、而於天下國家所以經遠持久之計多有所未暇者。今者天啓戎心、畫地數千里以歸于我、此雖異時之變、未可以豫知、意者天其以禮悔禍、使陛下間於憂虞而大有爲之志將有所使^③。此萬世一時也。然天下之事每病於難立者、正以嚮一夫獨見之言而略衆口異同之論、是以謀始太銳而用計有未詳也。願考漢廷雜議之法、自今發政造事、陛下旣與大臣謀謨於上、又令卿士大夫有忠慮者亦得以自竭于下、然後總攬羣策而裁處其中、將舉天下之事惟陛下之所

欲爲而無不成矣。此於前日講和之議猶欲三致意焉。又念國步日艱、人心未服、而天子無自將之兵、諸道無典戎幹方之實、二三大將人擁重兵、強不可令、事蓋有不可知者、則又數數建言、宜復武舉、責實用、必其洞曉韜鈴、長於綏御者、以儲將帥之才。下州郡選驍勇悉送行在、以補周衛之缺。精擇帥守、使蒐卒乘、以壯藩維之勢。亦皆當世之急務、久長之至計、反復惓惓、不能自己。其於請建太學、明大倫、以倡節義之風、而厲苟媮之習、則又平日之所深慮而每言之、所謂如人食息呼吸於元氣之中、一息之不屬理、必至於斃焉者、非若後來諸人承望風旨、但以課試文墨爲粉飾太平之具而已也。然而國是已定、言無所入、由是公之求去愈力、而檜之怒公愈甚。十年春、遂使言者論公獨以懷異自賢、陽爲辭遜爲罪、而出之外郡。然公去未幾、而虜果敗盟、復奪我河南地、悉其銳師、數道

大入、如公所謂未可豫知者。於是中外大震、檜亦不知所爲、周章回惑、至於視師之奏、援引乖錯而不自知、聞者莫不竊笑而深憂之。幸而一時將卒猶有前日束拔蒐練之餘、以故關陝、順昌、橐臯之師連戰大捷、虜乃引退、復議講解、而梓宮母后始得南歸、又如公等所論楚漢強弱之勢。然檜遂掩己失而冒以爲功、公奪主權、肆然無復有所忌憚矣。公固不能復爲之屈、遂自請爲祠官、屏居建溪之上、日以討尋舊學爲事、手抄口誦、不懈益虔。蓋玩心於義理之微而放意於塵垢之外、有以自樂澹如也。舊喜賦詩屬文、至是非有故不徒作、乃其文氣則更爲平緩、而詩律亦益閒肆、視諸少作、如出兩手矣。然公自是不復起、年未五十而奄至大故、善人之類、莫不傷之。其後十餘年間、檜遂顓國秉、大作威福、諸與公同時被逐之人、大者削籍投荒、小亦棄置閒散。迄檜死敗、其幸存者乃起復用、

或至大官、而公皆已不及見矣。嗚呼、熹尙忍言之哉。公性至孝、事太夫人左右無違。友愛諸弟、委曲將就、有人所難能者。與人交重然諾、不以生死窮達二其心。撫孤甥教之學、而經理其家事曲有條理、人無間言。接引後進、教誘不怠、聞人之善、推借如不及。至於邪佞鬼瑣、簡賢附勢之流、與己異趣、則鄙而遠之、或不忍正視其面。至其所以施於吏治者、亦皆果決明辨、抑邪與正、無所顧避。顧熹生晚、不及於聞見之詳、故不得而記也。晚旣屬疾、自知必不起、而處之泰然、略無憂懼之色。手書告訣、所善胡公憲原仲、劉公勉之致中、劉公子翬彥冲、屬以其子、而顧謂熹往受學焉。其志道服膺、死而後已、垂裕後人、不使迷於所鄉者、又如此云。所爲文有韋齋集十二卷、行於世、外集十卷、藏於家。始時吏部侍郎徐公度欲爲之序、略言少日多見前輩、而自得從公及正平張定夫遊、始得爲文之法。



會病革不及脫稿而今序則直祕閣傳公自得之文也。其論以爲公詩高潔而幽遠其文溫婉而典裁。至於表疏書奏又皆中於理而切事情亦爲得其趣者。公娶同郡祝氏封孺人贈碩人其父處士確有高行。碩人性慈順孝謹佐公事太夫人於窮約中未嘗一日不得其懽心。承接內外姻親下逮妾媵僮使曲有恩意。後公二十七年卒。一男子熹今以朝奉大夫致仕。一女子嫁故瀏陽縣丞劉子翔蚤卒。孫男三長塾亦蚤卒。次埜將仕郎次在承務郎。女三其婿脩職郎劉學古迪功郎黃榦進士范元裕曾孫男五鉅鈞鑑鐸銓^④。女九長適文林郎趙師夏餘或許嫁而未行也。公卒之明年熹奉其柩葬于建寧府崇安縣五夫里之西塔山而碩人別葬建陽縣崇泰里後山鋪東寒泉塢。然公所藏地勢卑濕懼非久計乃卜以慶元某年某月□□日奉而遷于武夷鄉上梅里寂歷山中峰僧舍之

北。蓋公之詩嘗有鄉關落日蒼茫外尊酒寒花寂歷中之句。嗚呼此豈其讖耶。不肖子熹追慕攀號無所逮及竊惟納銘幽堂具著聲烈以告萬世蓋自近古以來未之有改而公贈官通議大夫正第四品準格又當立碑螭首龜趺其崇九尺刻辭頌美以表于神道用敢追述其平生論議行實之大者如右以請于當世立言之君子。伏惟幸垂聽而擇焉。謹狀。慶元五年十二月日孤朝奉大夫致仕婺源縣開國男食邑二百戶賜紫金魚袋熹狀。

朱熹撰 《晦庵先生朱文公文集》卷九七

史館吏部贈通議大夫朱公松神道碑

祖宗時擇儒學爲館職自館職擇侍從由侍從擇輔相所謂儒學者明仁義禮樂通古今治亂其議論可與謀慮大事決疑定策文章特一事耳。治平中歐陽文忠公在政府奏疏如此。尋命宰執各薦士其效見於元祐之際。高宗方內修外攘首置秘

書省以儲人才。他有司治事日不暇給、獨館職涵養從容、要路闕必由此選、國朝盛舉乃復見之。新安朱公蓋其一也。公諱松、字喬年、世家婺源。曾祖振妣汪氏。祖絢、妣江氏。父森、常曰、吾家五世積德業、儒當有顯者。後贈承事郎。妣孺人程氏。公生於紹聖四年、兒時出語驚人。未冠力學、繇郡庠貢京師、文體清新、恥於蹈襲。政和八年上舍登第、以迪功郎調建州政和尉。丁父憂。服除、再調南劍州尤溪尉、監泉州石井鎮。詩名聞四方、他文渾涵流轉、惟意所適。然謂於道爲遠、益取經子史傳、考其興衰治亂、欲應時合變、見之事業。又因師友浦城蕭顗子莊、劍浦羅從彥、仲素而得龜山楊文靖公河洛學問之要、拳拳服膺、每疑性急害道、取佩韋之說名齋自警。在尤溪聞靖康北狩、大慟幾絕、自是奔走卑冗、假祿養親、無仕進意。紹興初、監察御史胡世將撫諭入閩、公袖書告之曰、今不自荆襄赴

興元、結夏人控引五路、東嚮爭中原、則當幸金陵、固守荆淮、奈何局促一方、徒費日月、竟將何爲。世將奇其才、歸薦於朝。會前執政謝公克家守泉南、亦露章薦公學問不宜滯管庫、遂召試館職。策問中興難易、公乞順人心、任賢才、正綱紀、累數千言、辨論精博。高宗嘉賞、除秘書省正字。四年二月、循左從政郎。趙忠簡公以元樞都督諸路軍馬、約公入幕、公以親疾辭。尋丁母憂、七年服闋、上已進都金陵。九月再召對、公勸上抗志高明、垂情延訪、求經遠持久計、遂言、中興之君惟光武身濟大業、可爲法。元帝、肅宗志趣卑近、宜以爲戒。上明日對輔臣稱善、且謂光武無可議、肅宗雖優於元帝、然虧人子之行、於其終爲可恨也。特改左宣教郎、除校書郎。是時、呂祉代劉光世統軍淮西、酈瓊擁衆叛去、朝論欲斂兩淮戍兵衛行都。公率同列疏言、不可、會虜亦疑劉豫將叛、兵不可制、執而廢之。當



路不能乘機會、乃亟還臨安。八年三月、遷著作郎。御史中丞常同薦公可任大事。四月復賜對、公言、國論不過兩端、進取者失之疏、玩愒者失之媮、惟自治觀釁爲上策。願陛下並進忠賢、修明紀律、革姑息、振國勢、虜不足平也。上悅。擢尙書度支員外郎、兼史館校勘。刊修蔡卞所改哲宗實錄、公用力爲多。歷司勳及吏部員外郎、史職如故。實錄成、遷左奉議郎、磨勘轉承議郎。趙忠簡公罷相、秦忠獻公當國、決意講和。公與史官胡瑄、凌景夏、常明、范如圭合奏、陛下以梓宮母兄天屬未歸、不憚屈己和戎、曾不思項羽置太公俎上、邀高祖、高祖知其詐、日夜思所以蹙羽者、彼兵疲勢窮、太公自歸。此今日龜鑑也。秦方惡公異議、參知政事李莊簡公又力援公。屬虜使再至、許歸河南地、公請用漢制、命廷臣雜議。又言二三大將握重兵、將有尾大之患、請復武舉、儲將帥、選驍勇補周衛、擇守帥壯藩

維、興太學、明人倫以倡節義。規模大率類此。秦滋不樂、諷言者論公懷異自賢、出知饒州。十年春也。未上、請主管台州崇道觀。和議俄變、秦蒼黃不知所措、有郎官代作自解之奏曰、伊尹告成湯、德無常師、主善爲師。臣前贊議和、今請伐虜、是皆主善爲師。如其不濟、則陳力就列、不能者止、當遵孔孟之訓。秦大喜、擢郎官爲右史、而不暇問所引皆誤也。是時秘書省寓法慧寺、或大書於門云、周任爲孔聖、太甲作成湯。秦大怒、疑出於館職、相繼汰去、而引用其黨、公遂不可出矣。祠滿再任、命下而卒。十三年三月辛亥也。享年四十有七。公性孝友、於朋友重然諾、不以死生窮達易其志。誘進後學、揚人之善、凡邪佞猥瑣鄙而遠之。後一甲子秦薨、異時名士抑遏竄逐者悉起爲大官、獨公無年不及。識者惜之。其將終也、手書與所善胡憲原仲、劉勉之致中、劉子翬彥冲、屬其子熹使往受業。其後遂

以奧學高文推重當世。今上聞其名、以待制侍講禁中、累贈公通議大夫。初、公卒之明年、葬建寧府崇安縣五夫里西嵒山、勢頗卑下、乃卜慶元某年某月某日遷葬武夷鄉上梅里寂歷山中峰僧舍之北。公嘗賦詩、有鄉關落日蒼茫外、尊酒寒花寂歷中之句、茲其讖乎。待制以某先太師與公爲同年進士、故來請銘。公娶同郡祝氏、處士確之女、贈碩人。事姑孝謹、待內外姻親和順、得其懽心。後公二十七年卒、別葬建陽縣崇泰里後山鋪東寒泉塢。一男、熹也。女嫁瀏陽丞劉子翔、早世。孫男三、長塾、已亡。次壘、將仕郎。次在、承務郎。女三人、修職郎劉學古、迪功郎黃榦、進士范元裕其壻也。曾孫男五人、鉅、鈞、鑑、鐸、銓。女九人、長適文林郎趙師夏、餘未行。公平生所爲文有韋齋集十二卷行於世、外集十卷藏於家。吏部侍郎徐度自言少多與前輩遊、迨識公及張戒定夫、始得爲文之法、欲爲公集

序、未及成、而文士傳自得實爲之、謂公詩高潔幽遠、其文溫婉典裁、非溢美也。公母弟棹亦負軼才、不肯俯仰於世、有詩數十篇、高遠近道、號玉瀾集云。銘曰、

信道惟人、窮理以書。合而一之、乃曰通儒。表表朱公、邁往於初。師友淵源、名實允孚。蘭臺史觀、卿才是儲。有昌其言、有宏厥模。人雖我抑、豈無後圖。高皇更化、群賢畢趨。公則逝矣、齋志弗紓。幸哉有子、播穫菑畬。追爵黃散、肇營新墟。揭以銘章、永鎮龜趺。

周必大撰 《平園續稿》卷三〇

皇考左承議郎守尙書吏部員外郎兼史

館校勘朱府君遷墓記

先府君諱松、字喬年、姓朱氏、徽州婺源人。曾祖諱振、祖諱絢、妣皆汪氏。考諱森、妣程氏。三世皆不仕、考妣以府君故贈承事郎、孺人。府君生於紹聖四



年閏二月戊申、性至孝、有高志大節、落筆語輒驚人。政和八年、以同上舍出身授迪功郎、建州政和縣尉。承事公卒、貧不能歸、因葬其邑、而遊官往來閩中。始從龜山楊氏門人爲大學、中庸之學、調南劍州尤溪縣尉、監泉州石井鎮稅、循左從政郎。紹興四年召試、除祕書省正字。丁內艱、服除召對、改宣教郎、除祕書省校書郎。遷著作佐郎、尙書度支員外郎、兼史館校勘。歷司勳、吏部兩曹、皆領史職如故。以史勞轉奉議郎。以年勞轉承議郎。丞相趙忠簡公、張忠獻公皆深知府君、未及用而去。秦檜以是忌之。而府君又方率同列極論和戎不便。檜益怒。出府君知饒州。未^⑥赴請間、差主管台州崇道觀。以十三年三月辛亥卒于建州城南之寓舍、年四十有七。所爲文有韋齋集十二卷。娶同郡祝氏、處士確之女、封孺人。後二十七年卒。男熹、嘗爲左迪功郎、差充樞密院編修官。女嫁右迪功郎、長汀

縣主簿劉子翔。孫男塾、埜、在女巽、兌皆幼。初府君將沒、欲葬崇安之五夫。卒之明年、遂窆其里靈梵院側。時熹幼未更事、卜地不詳。旣懼體魄之不獲其安、乃以乾道六年七月五日遷于里之白水鵝子峰下。熹攀慕號殞、痛貫心骨。重惟先君旣不得信其志以沒、而熹又無所肖似、不能有以顯揚萬分、敢次叙姓系、官閥、志業梗概、刻而揜諸幽、且將請文作者、以表其隧。昊天罔極、嗚呼痛哉。

朱熹撰 《晦庵先生朱文公文集》卷九四

校記

①清賀瑞麟《朱子文集正訛》云此下一本有「繼汪氏」三字。

②清賀瑞麟《朱子文集正訛》云朱玉祠堂本、徐樹銘新本「公在尤溪」以下均作「公時在制，一日，方與客語，忽有以北狩音問來諗者。」

③使：清賀瑞麟《朱子文集正訛》改作「伸」。

④銓：右引改作「銓」。

⑤不及：原脫，據傳增湘校道光刻本《廬陵周益國文忠公集》補。

⑥未：原作「去」，據宋浙江刊本《晦庵先生文集》改。

宋儒碑傳集卷一百三

向子諲 向子恣

向侍郎行狀

向氏出于神明之裔、子姓之支別、世爲開封人。至於國朝、文簡公以儒學登相位、欽聖憲肅皇后以名家有德居椒房。及中原衰亂、天下汙誕、褻然成俗、薌林公有高才遠識、以忠勤厲行、端潔其身、特立一時之表。故向氏世益光大者、不獨以相家后族、蓋以其德厚流長、而本支有才子也。薌林公名子諲、字伯恭、文簡公之五世孫、欽聖皇后之再從姪。曾祖傳範、皇任汝州管內觀察使、贈太尉、諡惠莊。妣萬年郡主趙氏。祖繪、皇任太子右贊善大夫、贈正奉大夫。妣碩人曹氏。考宗明、皇任武德大夫、江東提點刑獄、贈開府儀同三司。妣永國太夫人李氏。公蓋生而秀異、五歲誦書、日記數百言、七歲通書數、十三能幹蠱。開府嚴重、公率羣弟承訓、專

意詩書、宗族以爲法。欽聖聞而悅之。元符庚辰、后復辟、有司以故事上屬籍、推恩當百數。后曰、吾不敢自同先后。擇長而孤貧、幼而有立者、官十八人。公以幼而有立者補假承奉郎。明年、后登遐、遺恩選雄州防禦推官。時開府居憂貧甚、亟使公從官、監濱州鹽酒稅。會新法行、人皆幸賞奔湊、權貨客鈔既至、人皆談食。蠶無以繅。州民素以煮鹽爲生、抵罪者不可勝紀。公言于部使者、聽近郭官置牢盆、募亭戶煮、于是所積如丘山、民商咸便。東南建帥府、除鎮南軍節度推官。聽事健決、守正不撓。府中畏服。時行養濟政者、務多數以幸賞、一家有冒三四名者、蠶食太倉、不給、則反誅剝于民。公令計屬邑所入、析處之、于是自狀求歸者過半。屬邑水旱、將計分減放。公曰、若是、則貧下戶不得盡除、畸零合鈔輸納尤艱矣。乃請行視、從實除放。百姓稱善。秩滿、用薦者改宣義郎、監儀鑾司、以耻與閹寺



儒藏

共事乞歸銓部。改眞州司錄事。守倅不咸。庶事不理。公獨振綱紀。一州賴之。擢知開封府咸平縣。時行方田。又創水利。衆爭趨功病民。咸平獨行之若無事。會冊皇太子。將肆赦。邑人用先^②倚蔭無賴。養寇拒捕。殺傷巡檢。辭具當上。尹盛章方以獄空冀賞。卻不受。公直以聞。勅許自論決。章大怒。劾公修學買木踰期。直請御寶特勒停^③。久之。復官監杭州洞霄宮。未幾。除淮南江浙荆湖制置發運司文字官。淮南連年旱。漕運不通。揚州尤甚。徽廟憂之。遣中使按視。欲浚河與江淮平。時方臘亂兩浙。童貫爲宣撫使。譚稹爲制置使。貫欲運於海。輦於陸。稹欲開一河自盱眙出宣化。興化^④有曰。言者以爲不便。朝廷下發^⑤。運司相度以聞。發運司陳伯亨求肯任此事者。屬官皆辭。公請行。自宣化陸行至盱眙。而運自^⑥龜山。水程至瓜州。按圖籍。察地勢。言于伯亨曰。運河高江。淮數丈。自江至淮數百里。非人力

可平也。唐李吉甫廢開置堰。治陂塘。泄有餘。防不足。漕運流通。本朝發運使曾孝蘊嚴三日一啓之制。復作歸水澳。惜水如金。比年行直達之法。走鹽茶之利。且應奉權幸。啓閉不暇。欲歸水則力不給矣。又頃毀朝宗閘。自洪澤至邵伯數百里。不爲之節。故山陽上下不通。今欲救其弊。宜于眞州太子港作一壩。以復懷子河故道。于瓜州河口作一壩。以復龍舟堰。于海陵河口作一壩。以復茱萸待賢堰。使諸塘水不爲瓜州眞泰三河所分。于北神相近作一壩。權閉滿蒲閘。復朝宗閘。則上下無壅矣。伯亨從之。漕運無滯。貫輩求識面不能得。徽廟聞而器其才。遷官一等。明年召見。顧問甚厚。除淮南轉運判官。公言爲政以得人爲急。及乞復轉般糴本。上皆然之。陛辭對崇政殿。時軍糧不足。諸州兵多。欲爲變。上甚憂之。公奏曰。淮南歲租百三十萬。上供額乃百五十萬。別貢金帛又百五十萬。而茶



鹽之利盡在榷貨、此兵食不足之本也。伏見手詔、應奉司所費皆從中出。語未終、上曰、誠不欲費漕計。公對曰、郡縣惟知奉行、豈知陛下有社稷之深憂乎。如王從、永者、誠無分毫之費、朱勔則不然、恐處分有異。上愕然曰、朕豈欺人者耶。公曰、勔父兄子弟挾此爲奸、致一大石用八百餘舟、一綱費輒千斛、數千緡、甫官軍支請之期、則奪之、故多有怨言。此大弊也。上曰、可說與王黼待委卿覺察。公謝曰、微臣疎遠、付以此事、死無日矣。上曰、朕未嘗姑息此輩、凡事直以聞。即降御筆、王從永失察、應奉綱悉從御前給、外路不合支付。向係收管有旨、而其專一覺察、應奉騷擾違法者。公即詣所部、一切按治、勔大沮、無所施其計、歲省四十萬緡。守過惡尤甚、被罪未幾、已復職。公極論其狀。招信豪民兄弟無賴、殺仇家二十口、誣以爲盜、且冒賞、泗守與憲司保任欲官之、復乞窮治。宰黼弟以書來請、公

勿聽。楊守交結大閹梁師成、詔免輸賦、奪泰州屬邑隸焉。公劾論再三、竟得復故。時宿亳通海四郡大旱、方以應奉司錢移眞、揚米賑救民飢、而發運司上言、江淮米賤、乞均糴。仍折以香藥鈔、淮南分拋四十萬斛。公力論其欺君害民、取所在實直以贖。淮甸二十郡百縣吏職猥衆、不可程督。公悉籍其鄉里產業家口與保任者、罷額外名利爲籍、額闕則補。冒役教訟爲奸者、重置于法。吏皆膽落、于是文移不失期會。同事請留州縣財賦一分、以備移用。公善而從之。才有數萬緡、則密遣其屬指爲差餘三十萬、以獻應奉司。公曰、今秋苗當理來歲之額、方用四十萬有奇、以補今歲不足、豈更有餘。乃具以實聞。王黼遂不敢受。初、公到官、籍州縣戶口家業、置廳事、會拋燕山絹。公自差等貧民得不及、災傷之郡得免焉。白時中壻守海陵、妄作、侄壻蔡疑有田不輸稅、公督責不少假。既連忤權貴、數

有擠之者。及時中相首被罷。東夷遂襲京師。詔公乘驛赴闕。淵聖即位。除京畿轉運判官。寇退。公即走延津。陽武諸邑。又乞合鄰路輦。鄭汜水滑濬視凶豐計水陸利害。遣官置糴。隨宜支移。先是。內帑出百萬錢。未有所用。公亦請以糴。沿汴糴于南京。惠民河糴于陳。潁。廣濟河糴于曹。濟。得穀苡數十萬石。公上言。謂國初南糧運于京畿。下卸。初無限。量。內外之間。而兵食足。元豐中。歲用百三十萬。以知納稽滯。始以百五十萬爲額。崇寧初。以六十萬入中都。始以九十萬爲額。至宣和末。乃得十萬而已。二十餘年中。兩浙漕臣皆權幸姻舊。止以入中都六十萬較殿最。爲畿漕者。不知究其本末。故六食常憂不足。而必請于朝廷。給于內府。自今乞兩浙殿最從京畿者覆實。是歲十一月終。已得七十萬。及金再入圍京師。諸道兵還屯城外。得免科率餽運。重困民力者。以公之職事素修也。除右司員

外郎。議詳戶房檢討官。時宰執不協。公自度不能從容其間。引嫌不就。以直秘閣。陞副使。時運法大壞。朝廷令公相度。公言。祖宗置發運一司。經制六路。財賦盈虛。調度無不關焉。置糴于諸路。如年額綱運不到。即以所糴代發。候到。依舊截留。災傷州縣。還以元價。復于豐熟路分收糴補填。漕米至眞場。載鹽以歸。充經費。故漕計不乏。而民力亦寬。自鹽課歸榷貨。漕計已不足。繼行直達。廢倉廩。以爲無用。獻糴本。以爲羨餘。押綱使臣及兵梢無往來私販之利。遂侵盜官物。負欠者十九。又使臣兵梢不復以官舟爲家。一有損漏。不脩治。遂使破壞。而負欠者常自排岸司追逮入司農寺。由司農寺下大理推治。既無以償。率數月則以無罪出。近年雖欲復行轉般。而無舊轉般之積。故摺運鹽則廢。而直達之弊不除。今轉般舊法未易卒復。欲救目前之急者。發運使。副判官三員。宜以一員在眞州本



司、主江湖一員在泗州行司、主淮、浙一員在京置司、主下卸理欠。治泗州者、依例奏計。三人周而復始移治、應折欠、排岸司徑下發運司推治。仍下吏部差使臣數十員、以備管押事故綱、庶幾惜身計、可保官物。仍請以梁師成竹木場充修船料、以審務營充造船營、以王黼陸家店園宅充發運行司、廢外排岸司充發運公事官廨。淵聖大喜、可其奏。一日、急召對。上曰、朕昔在東宮、聞卿淮南之政、今除卿開封府尹、以親札付三省密院。公皇恐稱謝、固辭。遂改直龍圖閣兼淮南、荆湖制置發運副使、治京城外行司。公方具辭、而京師已戒嚴、議遣公使金軍。公曰、李鄴屈膝于幹離勃、既失國體、今先定相見之禮、則可行。或謂公不能屈、恐敗事、乃止。殿帥范瓊遣人清野、肆行焚掠、公命城外巡檢捕得數十人、殺之以聞、得旨用便宜。明日、欲詣都堂白事、而敵騎已至、城閉不得入矣。繼被旨促東南

兩道總管胡直儒、張叔夜進兵。公自至黎陽驛、勉直儒。公先之雍丘、道遇守河潰將、勸使立功贖過、揚言東道先鋒已敗敵于雍丘矣。明日、直儒屯邑門外、敵騎大至、直儒戰潰、爲敵所獲。公將詣南道、而道不通行及太康、遇潁昌五縣弓手、公率之擊敵于太康、衆多不支、乃自鹿邑趨汴上、而發運司迓吏方至。先是、都水使者聶崇決汴水、欲斷賊路。汴水既涸、綱運阻淺、半爲賊掠。公于虹縣上下權築數堰、收約水勢、措畫綱運。時敵騎已至亳社、公至宿州、選宋良嗣權鈐轄、帥衆捍戰。于是、敵不侵掠江淮。凡兵潰在江淮者、公悉收之、得數萬。遣詣南京朱勝非及范訥軍、令入援。時以外路平安得措置事、募壯士奏京師、復以京師及大元帥府動息、行下江南八路、以安人心。後朝廷以蠟丸許監司郡守勤王、公率幕兵、遣其屬賣輕貨十萬、餉元帥軍、仍請元帥移軍曹濟、約諸道同進。既而被詔、

不得輕舉勤王之師、害國大計、于是衆軍疑惑不前。公獨遣部將金汝玉由鹿邑至太康、遇敵力戰、爲粘罕所獲。虜遣使分道取李綱、吳敏、蔡靖、宗澤、徐處仁及蔡京、王黼、王安中等家屬凡百餘。公執其使按問、然後知京城失守、二聖播遷。張邦昌僭位、放僞赦之變也。邦昌遣呂勤、齊知禮以洪汴催綱爲名、勾當密切公事。又遣快_⑧行親從官持勅書至廬州問其家。公諜郡守馮詢及提舉鹽香范冲拘縻之。邦昌又手書南京尹尹、邦昌之連也。或勸公執尹自爲。公曰、時方艱難、尤宜謹守法度。乃移書勝非曰、公所守乃巡、遠忠義之地、不可汙也。勝非不得已、繫邦昌使于獄。邦昌用王時雍謀、分遣御史黎確、陳戩等、以書詣公及趙野、范訥、翁彥國、趙子崧等軍、徵兵問勞、有褒用之詞、仍斥名用國寶。公繳于大元帥府、請大元帥移屯南都、而勝非言財賦不足、公即辦三十萬以報、破其奸謀。于是

張邦昌之使還者、具言在外人心形勢、知逆圖之不可遂矣。乃召其黨入議、請元祐太后聽政。公遣其屬及子澹請于大元帥曰、今天下無君、人心皇惑、大王宜處分軍國事、乘勤王忿怒之兵、親率諸將、北渡大河、擊金人、情歸之兵、救二聖之急。若失機會、恐謀逆之徒、內連外結、未易誅鋤也。內侍班直潰在四遠者、宜即招收、禁衛六尙局等人在京師者、宜早諭使來。茶引鹽鈔、乞從行府彫造、委發運司置局、許南賈諸處舊鈔自四月後書填者不行。東南綱運汪_⑨、眞、揚等州約二百餘萬、轉般倉數與此相等、乞先計度軍屯所在分撥、恐積聚過多、去秋不遠、適以資寇。元帥多從之。元帥至南都、得運國寶、五月一日即位、欲除公版曹。公以僞是黨、盛辭以不能赴國城之難、敢冒寵乎。二親在東南、願公得補外。授公直龍圖閣、發運副司。既而邦昌以三公參預大政、公乞致仕、或久任宮觀、朝議乃



謂公在宿州差宋良嗣權鈐轄不當、落職與郡。未幾行宿州捍禦之賞、良嗣與焉、亦遷公一官。公曰、前日以爲非、則今日不當以爲是、乃立辭。宰潛善大怒、御史遂言公有不法事、考驗無一實、猶降三官、知襲慶府。丁開府憂。明年、奪喪、知潭州、力辭不獲。時累政姑息、軍士有殺人而不問者、宣撫司調數百人戍襄陽、衆方憚行、公到官七日而作亂、夜半縱火殺掠。公亟命傳呼列炬登城、飭持更者、一若無事。時賊所未至、人皆按堵。乃下令諸營曰、作亂者、戍兵耳。悉力擒捕者、有厚賞。牙兵聞之、相率攻亂兵、斬首百餘級。黎明皆遁、追襲遂降之、誅其魁首、盡以所掠賞有功。三日、復遣戍、無一敢喘者。是冬、金兵大入、一道自邾城南度略武昌、由咸寧、蒲圻將襲豫章、州縣皆望風投拜、有司擁隆祐太后去之。敵遂入豫章、所過殺掠、不可勝計、抵長沙境上。公分布將卒火甲、得萬餘人、爲守計。或曰、衆

烏合而城大、敵鋒不可當、盍避諸。公曰、朝廷使我守此藩也、委而去之、非義矣。于是敵騎傳城、檄公使降、公以檄報之。大略言、朝廷無負于金國、中外之限、如天地之有陰陽也、不可亂。敵知不可屈、大治攻具、悉衆薄城。公登門誓衆、激以忠義、將士協力、晝夜捍禦、雖殺傷相當、而驍將皆死。凡八日、而外城破、公率軍民入子城、巷戰兩日。敵縱火燒延府舍、公猶在譙樓督戰。敵兵已四合、兵民懼公之陷于敵也、擁公下樓死戰、焚敵柵、奪門以出。遂渡水、軍于江西。長沙之人咸從公、以忠義自奮、無一降賊者。敵以故不敢離城縱掠、留四日而遁。公即入城、鋤治彊蠹、撫安良善、上章以失守自劾。朝中不樂公者、以抗賊爲罪、坐落職放罷、而以轉運使賈收權州事。于是王以寧以京西路節制入橫長沙中、羣盜孔彥舟以鼎澧鎮撫使趨長沙、擊逐以寧、居數月、大縱殺掠、上趨衡、永。而羣盜馬友自江

北入據長沙、賦稅不復入王府。上始思公、乃降詔獎諭、復還職任。公乞持餘服、至于四五、不許、公方于所部視事。會詔改湖南、北爲東西路、置湖東安撫司于鄂、除高衛爲帥。俄知其誤、復令公代之。孔彥舟西阻嶺嶠、兵不得縱鼓鐘而下、公喻馬友共擊之、彥舟大敗、北走。時本路土寇季冬至起于宜章、侵擾三路之境。有吳錫提精兵數千、亦自北來、屯于益陽、乞糧于郡守魏舜臣、舜臣拒之、錫即以兵趨郡、走舜臣。公聞而招之、欣然歸附、激以忠義、錫願盡死擊滅冬至、平其巢穴。公方欲之鄂、而羣盜曹成擁衆十餘萬、太尉張浚招之不降、自江北縱掠入湖而屯于攸縣。時馬友陰有馬氏之謀、乃誘成以廣西之利、成張聲勢欲南。公曰、若使羣盜遂其謀、則三湘五嶺皆寇、而江南之形勢壞矣。乃屯于衡之安仁、有卒才數千。命韓京軍回雁、吳錫軍桂陽。遣人喻成以禍福、分給糧餉、羈縻之。成

逡巡不敢進。公以諸路形勢利害請兵于朝、求援于鄰路者相繼也、皆不報。相持百餘日、賊衆忿公之扼己、鼓譟直抵屯下。公知不可遏、乃肩輿入其軍、開諭國家威靈、賊羅拜。公與之約、毋焚掠。成等從命、擁公至道州。公時有所訓厲、賊憚公之正、使己不得大縱、乃送公出營。公上章以討賊不效、自劾、固請追服。有旨召赴行在、力伸前請、得補服。終喪、起知貴州。時南海賊號大棹、與福建多槳船商販者劫掠海道、所在竊發、咸不奠居、兵將疲于奔命、討捕不能得。公一日召胥魁詰之曰、吾聞大棹陰與汝曹通、故兵將動息、賊皆先知。今亟實言、不然置爾于死地矣。胥魁大恐、具言城中富家某人、大棹之囊橐也。遂命捕至、盛陳刑具、詰責之、即首服。令悉具徒衆名姓、往來宿食之所、窮詰盡得其實。令州縣籍其產業、五家爲甲、羈縻其家族、已乃釋之。令指縱多、無不獲。其多槳船、命依市泊過蕃



法召保給據、然後得行。于是賊黨消散、河道清靜。州爲蕃商所聚、人多入其貨而隱其直。訐訟則書不可識、語不可曉、官必憑譯者、而譯者受交、隱其情實、蕃商終不能自白。公命求蕃書千文及他書數種、先識之矣。乃命吏以蕃書告諭、羣商爭來懇盡得其情、應負之者悉徵還、咸呼舞歸其國。清明之政、播于海外。未幾、言者希時宰意論公、罷之、公遂乞致仕。繼丁永國憂、服闋、善類交章論薦、詔許致仕、歸江州。除江東轉運使、公皆固辭、被旨赴都堂稟議。明年、至闕下、奏曰、太宗時、許轉運使乘驛入奏、以絕壅塞之患。眞宗亦令更互赴闕。自蔡京擅權、凡召用人材、止令赴都堂審察、在外職事官亦止都堂稟議。于是人材賢否、政事得失、上無由知。臣多病早衰、實不堪事、願得一望清光、乞身歸田。有旨不隔班引對、問勞甚渥。公上奏曰、陛下方圖中興之業、而規模未定、故號令不一。昔漢高祖

之取天下、其謀先定于漢中。先主之謀巴、蜀、其計預陳于新野。今無一定之論、是以九年而無成。且君子小人之進退、實安危之所繫。今廟廊之上、乃有附逆之人、而欲弭邊釁、寧區下、不亦難乎。願陛下無忽。天語稱獎、加秘閣修撰。公固求退、不許。時東南漕臣當饒劉光世、張俊軍、誅求無限量。公曰、吝于出納、有司職也。痛加裁損、遂少橫斂。葺蕪湖廢倉、寄卸諸路綱運、以省般運之勞。又乞置造船塲于建康府、南康軍、以絕掠奪舟船之擾。兩軍軍衣例以夏稅絹充。絹惡、至一疋添結錢千五百、謂之估剝錢。公行下諸郡、令納絹者當親納攬納子鈔及姓名于絹端、以絕濫惡、免估剝之費。僞齊入寇、劉光世軍于合肥。賊軍渡淮、公方在上江。光世欲走、乃聲言乏糧。時車駕在姑蘇、中外震動、詔書促公濟光世軍。公晝夜并行、至太平州。光世輜重已蔽江而下。公至廬州、而光世已引兵出東門矣。

公直入城、且以倉庫金穀、岸次綱運上聞、按撫居民、以大義責光世。光世乃改圖、進襲劉麟、破走之。非公、則光世幾敗大事。然公爲漕臣、而與主帥不協、乃力求去。詔與浙漕張匯兩易。鎮江府呂城夾崗勢高、久不雨、則漕甚艱。公取唐韋損、劉晏考覈狀、鳩工聚材、增補^⑤浚治、遂無淺阻之憂。于德勝橋置倉和糴、乃以平價、且免腳乘、欠折。每上江淮糧運至鎮江、則候潮、聞占舟船、妨摺運、而綱兵侵耗、乃乞置倉、以轉般爲名、卸納諸路、朝廷從之。公連年入覲、未嘗不求歸。上嘉歎高志、親書薌林二字、以賜公、除徽猷閣待制、陞都轉運使^⑥。公辭、上曰、此舊物、可無辭也。居三月、除戶部侍郎。再辭、皆批答不允。公奏曰、安民固國、必資儲蓄、江西宜于洪州置糴、于江州置轉般倉、以給淮西。湖南于潭州置糴、于鄂州置轉般倉、以給襄漢。湖北于鼎州、淮西于廬州、淮東于眞州、興^⑦造舟船、則遣戍出兵、無

往不利。當今天下急務有三焉、一曰士風不競、二曰兵籍不修、三曰戶版不實。顯忠良、黜僥倖、才則舉循名責實、所以正澆薄也。去老弱、升勇健、創簿正名、使諸州上帳于兵部^⑧、諸將上帳于樞府、著鄉貫、書事勢、季申歲考、所以除詐冒也。凡詭名挾戶、典買推收、進丁退老、分烟析生、田畝升降、貨殖盈虛、必以時覈實、所以革欺蔽也。此特大略耳、推而行之、則在乎人焉。公因入對、言敵情不可測、宜飭邊臣、嚴爲之備。論奏甚詳。上顧問、辱三奏對移時。中書舍人潘良貴攝左史、忽出位言曰、天時暑甚、向某不可以無益之言久動聖聽。公退、即上章待罪、且乞致仕。曰、身叨侍從、職在論思、入覲嚴宸、疊蒙清問、但欲丹衷之罄、不知寸晷之移、遂致糾彈、是爲過咎。上批、向某無罪可待。所乞致仕、降詔不允。良貴亦待罪。上曰、楊前之語、良貴何由得聞。可謂面謾矣。特放罪與宮祠。公求去不已、乃除徽猷



閣直學士、知平江府。公復力辭、不允。上賜舟、親題曰汎宅。公之官兩月、復乞致仕。聞王倫使回、欲行非義之禮、歸意益堅、復伸前懇、仍具奏曰、比王倫由平江、聞河南故地可得繼^③。知使人以詔諭爲名、臣竊惟禦戎之道、自古人主不憚屈己與之和親、有之、未聞首足易位者也、宜諭韓世忠卻之。又臣聞本朝使金國者、多于城外經過、自有此例、已關國信計議所訖。會詔許公致仕、仍特降詔獎諭、以寵異之。公歸舊^④隱、創堂別圃、摘話語名曰改疎、追和陶淵明歸去來詞、以見遂初知止之意。逍遙徜徉、高視宇內、遐觀物表、自適其適者、凡十有三年。雖懷忿懣、不然不議^⑤、而亦不遭死徙之禍、可謂能見幾而作者也。開府公葬清江之芙城、公于其側^⑥。待地曰金澤、植松柏、營兆域、棺槨衣衾、無一不具。壬申三月十有六日、以疾卒于正寢、享年六十八。病中自占遺奏、其末曰、勿爲小康而忘大計。訃聞、

正奉大夫^⑦。諸孤奉公之喪、以七月庚申葬焉。娶宗子博士范璣女、封碩人。子七人、洛、右奉議郎、澹、右奉議郎、浯、右宣教郎。餘早卒。女七人、長適右宣教郎劉長福、次適右從事郎吳敦謙、次適右迪功郎黃揆、餘在室。孫男四人、孫女六人。公天姿超邁、讀書務觀古人大節、不專守章句。志大氣剛、見義必爲、置死生于度外。識慮深遠、洞見物情、剗劇治煩、迎刃而解。興利除害、不計目前。爲政雖嚴、而宅心忠恕。性至孝、承顏養志、必探其微。友愛諸弟、恩澤徧諸姪。然後及孫。和睦宗族、置敦義莊、以贍貧者。敦故舊、親名賢、與朋友交、盡言無隱。賙人之急、不計其私。自奉甚約。素重常某、死之日、經營其大事。陳公瓘、黃公庭堅以貶死、皆往會其葬、竭力資助焉。少見劉公安世、問爲學之要、安世曰、誠而已。此司馬公之教也。公敬受以歸。其後復見、極論天下事、器之、深加歎賞。曰、異時必有立于世。方臘作亂、

朝廷下發運司捕之。公時爲屬，獻言曰：「若急請于朝，以劉公安世尹南都，陳公瓘鎮金陵，人望歸之，可不勞兵而破矣。」識者曰：「此真良策也。」司長不能用。致仕之後，積俸錢三百萬，謂子弟曰：「無功而受祿，可乎？悉捐入郡庠，爲養士藏書之費，則公之仕也不念于利祿可知矣。」建炎己酉之冬，與先君遇于熊湘之西，神姿爽邁，超出羣衆，議論英發，忠誠動人。涖官臨政，聲震一方，望之隱然。先君嘗言于廟堂曰：「向某氣質忠鯁，心向國家，尊戴君父，徇公忘私，正今日扶持三綱，可備使令之人也。」惟宏于公，旣當子弟之列，而終身不獲贊見，狀公平曰：「不已僭乎？」方聖學衰微，異議繁殖，或能使君子大人之心，精微不明白于天下後世，是以徵諸先君之言，敢書公行事，以俟作者，而不辭也。

胡宏撰 《五峰集》卷三

徽猷閣直學右大中大夫向公墓誌銘

紹興二十有三年三月辛亥，徽猷閣直學士、右大中大夫致仕河南向公以疾終于家。歲七月庚申，葬于臨江軍清江縣建安鄉之金澤。旣而公之子以武夷胡宏所狀公之行以來請銘。某晚進，公實屈折行輩與之交，凡公平生出處大節，類多得于見聞者。屬未及秉筆，而遭罹家難，待盡山谷，自分已矣。旣除喪，公之子復以爲請，乃次序而銘之。距公之葬蓋十年矣。公諱子諲，字伯恭，世爲開封人，丞相文簡公之五世孫。欽聖憲肅皇后之再從姪也。曾祖傳範，汝州觀察使，贈太尉，諡惠節。妣萬年郡主趙氏，東海郡君徐氏。祖繪，太子右贊善大夫，贈正奉大夫。妣碩人曹氏，太碩人李氏。考宗明，武德大夫。妣永國太夫人李氏。公生而秀異，自幼凜然如成人。敏悟強識，迴絕流輩。元符三年，以后復辟推恩，補假承奉郎。明年后崩，又以遺恩遷雄州監禦推官、監濱州鹽酒稅。東南建帥府，幕屬自朝



廷選除公鎮南軍節度推官。臨事不苟、數與帥爭議可否、府中畏服。改宣議郎、監儀鸞司。公恥與閹寺共事、乞歸。吏部改眞州司錄事、權知開封府咸平縣。豪民馬氏倚蔭犯法、獄具上、府尹盛章方以園空覬賞、卻不受。公直以聞、詔許自論決。章大怒、劾公以修學市木不如其直、請御寶特勒停。久之復官、監杭州洞霄宮。除淮南江浙荆湖制置發運司主管文字。淮南連年旱、漕不通、有欲浚河與江淮平者、內侍主其議、無敢可否。發運司檄公行視、公以爲運河高江淮數丈、河至江淮凡數百里、欲通之使平、萬萬無此理。前此有司率三日一啓聞、復作澳以瀦水、故水不乏。比年行直達之法、重以應奉往來、啓閉無朝夕、復何暇歸水乎。昔之堰閘往往不存、今第修復故迹、嚴其禁約、則無患矣。所條畫盡悉、使者用其言、漕復通。朝廷嘉之、遷秩一等。召對、除淮南轉運判官。陛辭、力論財用所以不

足故、且言、伏見手詔、應奉司所費皆從中出。語未畢、上曰、誠不欲費漕。公對曰、郡縣奉行、惟恐不及、豈知陛下聖意所在。因言朱勔挾應奉爲姦、至一大石用八百餘舟、公爲欺謾、莫敢誰何。兵夫不可校虛實、一綱所費毋慮數千緡、甫及官軍支請之期、則奪之、故其下籍籍嗟怨。上曰、待委卿覺察。公曰、微臣疎遠、付以此事、則死無日矣。上曰、朕未嘗姑息此輩、凡事直以聞。即降御筆付公、云應奉綱悉從御前給、外路不合支。繼有旨委公專一覺察、應奉騷擾違法者。公既至、率以法繩之、勔雖素橫、亦少戢。淮上帥守往往挾權貴爲重、公按治無所避。宿亳通海四州饑、方移眞、揚米賑之、發運司乃言江淮米賤、乞均糴、而淮南當四十萬斛。公力論其欺罔、取所在實直以聞、于是不悅者益衆。俄罷去。金人逼京師、淵聖即位、召公將以使軍前。公曰、李鄴已屈膝于金人、乞先定相見之禮、廼可往。或

謂公不能屈、恐誤事、乃已。除京畿轉運判官。公上言、國初運東南糧于京畿、初無限量。元豐中、歲用百三十萬石、以卸納稽滯、始以百五十萬爲額。崇寧初、以六十萬入中都、始以九十萬爲額。至宣和末、得十萬而已。蓋二十餘年中、兩浙漕臣皆權幸姻舊、止以入京六十萬較殿最、而京畿使者不復究其本末、故兵食常不足。乞自今兩浙殿最從京畿覆實。是歲十一月終、已得七十萬、其後京城再圍、諸道兵集、率賴其用。除右司員外郎、詳議戶房檢討官。執政者不咸、公度不能從容其間、引嫌不就、乃以直秘閣爲京畿轉運副使、且詔公相度漕計。公言、祖宗置發運司、經制六路財賦、法令周密、其爲利甚博。今轉搬廢而爲直達、諸路鹽課之利、奪而歸榷貨、糴本錢罷而爲羨餘、公私俱病矣。方時艱難、舊法未易卒復、欲且權宜救急、請令發運使副判官三員、迭相往來、周而復始、其一在眞州、

主江湖、其一在泗州主淮浙、其一在京主交納理欠。在泗州者循例奏計、皆從之。一日急召對、上曰、朕昔在東宮、聞卿淮南之政、今除卿開封尹。公皇恐固辭、廼以爲直龍圖閣、兼淮南荆湖制置發運副使。時京師已戒嚴、帥范夔遣人清野、時行擄掠。公捕得數十人、戮之以聞、詔許公以便宜行事。今上以康王開大元帥府于河北、公以外路動息及所措置事、募壯士達奏于京師、復以京師平安及大元帥府行移檄東南八路、以安人心。詔監司、郡守勤王、公糾合義士、收集潰兵、期以入援、請元帥移軍曹濟、約諸道同進。詔復以金人議和、勤王之師勿輕舉。衆疑惑不前、公獨遣部將金汝翼由鹿邑至大康力戰、爲敵所獲。敵欲得李剛、吳敏、徐處仁、宗澤及蔡京、王黼、蔡靖、王安中等家屬、朝廷爲之遣使四出、公知非王命、執留不遣。二帝北狩、張邦昌僭位、邦昌遣人持書至廬州、問其家安否、公



檄郡拘縻其家。又遣人以僞詔詣公止兵。公以聞大元帥府。復遣子澹請于大元帥。宜處分軍國事。來勤王憤怒之兵。帥諸將北渡河。出敵不意襲之。救二帝危急。若失機會。恐窺伺之徒。內連外結。未易定也。元帥至南都。即帝位。欲留公自近。公以二親在東南。乞補外。乃復以爲發運副使。邦昌以三公平章軍國事。公乞致仕避之。論者謂公在宿州。嘗差宋良嗣者權鈐轄不當。奪職與郡。未幾。賞宿州守禦之勞。良嗣預焉。亦遷公一官。公辭曰。前日以爲非。則今日不當以爲是。時宰大怒。御史遂言公有不法事。按驗無一實。猶降三官。知襲慶府。丁開府憂。明年。奪喪。知潭州。力辭不獲命。到官七日。會遣戍襄陽。衆憚行。夜半縱火殺人。公亟命傳呼。列炬登城。飭持更者一如無事時。于是賊所未至。按堵不動。督厲牙兵。斬首數百級。比明。皆遁。急追襲降之。三日。復遣戍。無一敢喘者。時建炎己酉也。

其冬。敵騎自鄧城南渡。掠武昌。入江西。州縣皆望風降。還抵長沙境上。或謂他州縣皆已下。敵鋒不可當。盍避諸。公曰。是何言之不忠也。使向之諸郡有一二能爲國家守。敵其至此耶。旣而敵騎傳城。檄公使降。公答書數責之。登城誓衆。激以忠義。將士無不殊死戰。雖殺傷相當。而外救不至。凡八日。城破。公率衆入子城巷戰者二日。乃焚敵柵。奪門以出。軍于湘西。郡人咸從。公以忠義自奮。無一降者。敵退。公上章以失守自劾。詔奪職罷免。未幾。朝廷治州縣之投降者。公之忠節始白。賜詔獎諭。復還職任。公乞持餘服。至于四五。不許。時孔彥舟者縱兵大掠。西阻嶺嶠。不能前。鼓譟而下。公遣兵擊走之。有李冬至者。起兵于宜章。會將官吳錫提精兵數千。無所歸。公招致之。激勵討冬至。汔平之。有曹成者。自江北縱掠入湖南。欲踰嶺。公曰。若使此輩得逞。則湖嶺非王土矣。當隨以計破之。廼屯于

衡之安仁、有兵才數千、遣人諭成、待以善意、給其糧、成逡巡不果進。公以事勢危急、請兵于朝、請援于鄰路者相繼也、皆不報。幾百餘日、賊率衆鼓譟直抵屯下、公以單騎入其軍、衆皆羅拜。公與約毋得劫掠、皆聽命。擁公至道州、賊以公不便于己、復送公出營。公以討賊不效、自劾、既不報、且有召命。公力辭、復乞持餘服從之。服除、知廣州。海賊與郡吏交通、官府及兵將動息輒先知之。公合胥首詰責之、能以實告則已、不然將不復生出獄矣。胥大恐、言其情、于是盡得盜姓名及所囊橐往來宿食處、是後盜發輒得、嶺海肅然。未幾、以御史有言罷去、公遂乞致仕。繼丁永國憂、服除、一時善類、交章論薦、詔落致仕知江州。又改江東轉運使、且召對。公奏曰、昔漢高祖之取天下、其謀先定于漢中。蜀先主之復漢祚、其謀先定于荊野。陛下圖中興之業而初無一定之論、是以九年而功未就。又曰、君

子小人之進退、否泰安危所繫。今廟廊之上、乃有附逆之人、而欲弭外患、難矣。上嘉獎再三、進秘閣修撰。時江東使者當饋餉大將劉光世、張俊軍、凡軍中追求之非法者、公隨事裁抑。會僞齊入寇、光世軍合淝、以乏糧爲詞、請退保。公晝夜倍道至合淝、光世引兵欲出、公直入城、按簿書、具以見在泉穀與治路綱運上聞、以大義責光世。光世乃不復退、進擊賊、破之。然以此與光世不協、求去、詔移兩浙路。初、公卜居臨江、名曰薌林、至是入覲、上親書薌林字賜之。進徽猷閣待制、爲都轉運使、戶部侍郎。公所論事益衆、一日進對、上顧問至移時、閣門以當進膳、欲奏而未敢。有攝起居郎者、遽出位彈奏。公退、即待罪、又乞致仕。詔以爲無罪可待、而公請不已、除徽猷閣直學士知平江府。上賜舟、親題曰汎宅。時王倫自敵中與其使者偕來、公上疏以爲禦戎之道、自古人主不憚屈己、與之和、親則有



之未聞首足易位者、宜卻而勿受。且乞致仕甚力、許之、仍賜詔獎諭。自是歸隱、凡十有五年、積俸錢三百萬、悉捐入郡學、爲養士藏書之費。自卜葬地、後事皆豫備、且自草遺奏、率人所難言者。享年六十有八、詔贈右正奉大夫。娶范氏、宗子博士壻之女、累封安康郡太夫人。男七人、洛、右朝奉郎。澹、左承議郎。浚、右通直郎。餘早世。女七人、長適右承議郎劉長福、次適右從事郎吳謙、次適右宣教郎黃挾、次適承務郎陳延世、餘不育。孫男四人、士伯、士虎、皆將仕郎。次士彪、士叔。孫女六人、長適進士韓籲、次適右迪功郎劉荀、次適將仕郎韋相、餘幼。公性至孝、承顏養志、必探其微。李碩人沒、乞回郊祀任子恩加贈。友愛諸弟、先奏諸姪官、然後及孫。置義莊、以贍宗族貧者。篤故舊、親名賢、與朋友交盡言無隱。周人之急、不計其私、而自奉甚約。其見義必爲、如恐不及、置禍福于度外。識慮精遠、洞見物

情、盤錯之會、談笑剖析、皆出人意表。興利除害、不計目前、爲政最嚴、而本于仁恕、所致可紀甚多。此特著其大者。蓋自臨川王氏以其一家之學同天下、立法令、設爵祿以誘之、天下之士、循誦習傳、以爲成說。後之用事者持之益堅、士稍出意、欲自激昂、則摧沮擯斥、甚則有不可測之禍。故家遺老、雖有存者、世俗往往指笑以爲戒。風聲氣習、薰炙漸漬、大抵以委靡隨順爲俗。故利在閹寺、在權臣、在賊盜、皆從之。有能于此卓然特立、更閱夷險、不爲利疚勢回、而屹然自拔于流俗之中者、豈非難哉。方閹寺用事、趨附者惟恐後、公以小官與之辨曲直、不少屈。未幾變亂迭起、或乃甘心于污僞、他亦退縮奔竄、爲全軀保妻子計。公獨奮不量力、撓其鋒、蓋僅脫死如毛、斃者數矣。旣而大臣專權、以峻刑箝天下口、非曲意阿附、鮮有免者。公言一不合、見幾而作、超然物外、自適其適、于是人始服公爲

不可及也。元城劉公安世曾謂公必有立于世、文定胡公安國謂公氣節忠鯁、心向國家、尊戴君父、徇公忘私、正今日扶持三綱之人也。由今觀之、二公之言益信。銘曰、

顏跖之分、曰義與利。孰驅斯人、學乃爲利。舉世靡靡、偷安苟活。不有君子、豈能自拔。公以英姿、輔之正論。惟義所在、他無足問。方時多艱、馳驚其中。如水萬折、必歸于東。年五十餘、謝事而歸。惟介于石、故能見幾。知之固難、行亦匪易。若公始終、蓋可無愧。我爲此詩、以示來裔。後有攷者、尙論其世。

汪應辰撰 《文定集》卷二一

故左奉直大夫直秘閣向公行狀

公諱子忞、字宣卿、世爲開封人。自四世祖文簡公相章聖皇帝、其後蕃衍、浸以盛大、世有聞人。曾祖傳正、故任國子博士、贈開府儀同三司、太尉。祖綬、故任西京左藏庫副使。父宗琦、故任大中大夫致

仕、贈少師。妣夏侯氏、贈魏國夫人。所生母王氏、贈恭人。公自幼慷慨有大志、見諸老先生輒抵掌論世事、劇談雄辯、常欲折其坐人、而諸老先生亦莫能與之爭也。蓋其剛毅之氣出於天性、以故與世多不諧、雖屢抑退而終不自悔也。初入國子學、遇三舍法興、累試入等、已校定當升補。政和六年、再從伯永嘉郡王宗良遇郊祀恩、任公爲登仕郎。七年、爲華州司兵曹事。宣和初、朝廷新復幽燕、其地經契丹之亂、饋餉不繼、自涿至雄、霸、以縣令丞部農夫挽中州之粟、實不毛之地、挽不如期者以誤軍期論。先是、涿縣累政以運夫亡逸失期、委印紱而去。時大漕陳公亨伯、呂公頤浩皆知公之材、以爲涿縣丞。既至、究知前弊、調役不均、乃以戶口高下均定所役之數、衆服其平允。使部伍相爲保、無一人逸者。以餽運不乏、循從事郎。又以新遷到任、循儒林郎。少師以公在極邊爲憂、令丐罷。涿以武



臣爲州、類出童貫門、恃勢不法、公每以職事面爭不少屈、頗恚恨。逮公解去、沮格邊賞、不爲批書、公委之而去。會部使者適至、函令書印、馳介送公。宣和六年、轉宣教郎、爲中山司錄事。七年冬、金人犯東京、朝廷以种師道宣撫京畿、河北、河東路、辟公爲幹辦。靖康元年、淵聖皇帝覃恩、轉通直郎。六月、丁少師憂。少師晚年不樂處京師、市第于宛丘、未及徙居而少師捐館。是歲、虜再犯京師、明年大亂、公乃歸陳。建炎二年、虜侵陳、蔡、公之兄忠毅公先有德於蔡、蔡人借留于朝、而朝廷已別除人、就起復知陳州。至是、虜人圍陳、忠毅公誓以死守、先遣公走京師、求援于留守宗澤。公見澤無出師意、急歸、而城已破、忠毅公罵賊不屈、與諸弟三人皆死之。公亦喪其外姑與一男一女。乃徒步間關、收斂兄弟遺骸而葬之、訪尋骨肉之存者、攜挾南渡、流寓江淮間、尋復除通判均州、道梗不能赴。建炎三

年、江淮兩浙制置使呂公素知其材、適眞州經殘破、官吏皆逃亡、召公語之曰、此州非公莫能辦。即以便宜委公攝眞州事。有范瓊潰將郭吉屯駐爲姦利、屢欲叛去。公方之任、艤舟城下、人無知者。公遣人呼自吏問州治所、吏對以吉暴橫必爲亂、乞且寄治舟中爲緩急計。公叱之、馳馬徑造州宅、官吏稍集。然百事廢弛、財用乏絕、卒伍縱逸不復歸營、公揭榜招之、得數百輩。有司以無供給爲憂、公謂眞州平時富商大賈所聚、酒貨最爲繁夥、意務場瓦礫之下必有宿藏、令人斲之、人或竊笑、果得酒百餘斛、一郡以爲神。公乃張席爲屋、高其直以沽、郡人累月不知酒味、來飲者如市、路傍始有醉人。公又遣吏市麴米於他郡、益醞釀、課利益增。羨而發運、轉運猶謂公弗戢私醞、公乃先治沿江二漕兵梢列肆私沽者、二漕雖愧恨而不敢復言。公所至多忤監司者、皆此類也。視事纔幾月而財用

沛然收貯官錢以千計、至七十萬、不以一毫取於諸邑。向之郭吉者、初畏公之威而不敢逞、至是見府藏充盈、輒萌異意、郡人咸知之、竄入他邑。忽一日、吉與其二屬環甲胄、張弓露刃直趨庭、公危坐廳事、敕候兵持劍立屏後、戒之曰、聞呼即出。吉既至、公厲聲逆謂之曰、爾欲殺我、匹夫力耳、何用衆爲。此頸吾自斷之。呼候兵出授劍、吉氣沮錯愕、急抱持劍者曰、初無是心、特耀兵以娛公耳。公曰、一州人皆知爾欲殺太守、今獨有持吾檄以耀兵爲解、招回散亡百姓、不然、恐爾頭顱亦不能保矣。吉遜謝、即用公言、乞檄以去。事定、朝論偉之。會駕幸鎮江、公以鄰郡守臣當赴行在所。奏事、呂公因薦公、賜對勞問甚久、將欲大用、未果、寵以直秘閣還郡。且令郭吉隸杜充、命公帶淮南東路兵馬都監、管內安撫。冬十一月、虜復南來、建康失守、公退保沙南、以虜檄繳奏、召令赴行在所奏事。未到、有旨

謂公與其餘守臣棄城事體不同、降一官、與知州軍差遣。建炎四年三月也。即以公知江陰軍、專一主管水軍防託事。公從駕還、過明州、金人初退、郡方闕守、即改知州。明年、兼管內安撫使。公自遭宛丘家禍、忠毅公有子沈爲給事、胡公安國婿、從寓湖南、不知存亡、丐守道州。從之、兼湖東兵馬都監、節制管內軍馬。公從兄子譚方帥潭、待次間欲往依焉、聞曹友、孔彥舟相繼以長沙叛、李成群盜跨江西數郡爲亂。紹興元年春、丞相朱公以都督恭行天討、檄公權督府參議官。時洪久闕帥、丞相以公兼攝之。張俊以招討使聽呂丞相節制、戍鄱陽、至是輒擅徙豫章。豫章新遭金人蹂踐、倉庾府庫一空、而俊軍號數十萬、支用不貲、漕司皆被事委去、悉以屬公。公會僚屬議所以應辦、皆欲下諸邑科斂於民。公曰、大軍壓境、張喙待食、諸邑能指期集耶。因訪得負郭大姓、平時兼并、積而不散者、呼



而諭之曰、汝家所蓄、賊至能保乎。今官軍至、賊不能犯、公私皆賴焉。汝能輟不可守之財、以貸于官、期兩月執券取償、一毫不汝欺也。大姓欣然從之。又有巨商爲金人所害、其妻失所、昔時駙儉受其貨者咸諱匿之、公究得其實、悉以歸媼、媼拜謝、願分助縣官。旬日間不擾其民而軍須頓足。俊旣至、公告之曰、吾州井邑丘墟、戍兵朝入則居民夕避、無市肆則卒伍亦無聊、城東有浮屠屋數處、兼廢屋數百區、可以駐師。公能戢士伍、我當招集市區與相交易、軍民兩便。俊大怒、剡牘于朝、以公沮軍不能入城、亦不用公言而徑自入城矣。朝廷察知俊之言不然、而公敢抗之、兩置勿問。未幾軍士所處不便、卒如公言徙于城東。丞相奏公即眞、適朝廷已除授、不報、以賞轉奉議郎。冬十月、公之道州。湖東自經李成、孔彥舟焚劫、獨道界於二廣偶得免、一時號爲全盛。兩轉運、刑獄、鹽香使皆聚此州、

道實小州、不能堪。公始革去倉廩受納積弊、罷麴引、醋息、牛稅等錢、以寬民力、盡收禁軍之遺令、在諸司當直者。提刑周隨亨占江華縣治、別募兵四百、所支給一取足於江華。公以狀乞移按他郡、罷募兵、撥還侵用諸司鎗穀。提刑頗怨憾。提鹽薛公度先欲於本州置司、公力陳其不便、爭止之。公罷博易場監官、以冗費擾民、而公度堅俾復之、不從。故部使者皆切齒惡其與己敵。旣而成兵至安仁、劫帥入其營、縱兵四掠、勢逼道州。衆咸欲遠避、公曰、守臣出境、則境內先自亂、不如申朝廷宣撫司、移治錦田寨。百姓從之、皆獲免。成兵至、卒無所得。賊雖以偏裨之禮奉帥于道州、而實不遜也。會朝廷有旨令成赴行在所、久之乃解去、帥亦得自便。提刑提舉挾前憾、共劾公逼逐監司、又誣奏公激李成軍變、降一官、落職放罷。是時胡公安國自湖東赴西掖講筵之召、目睹其事、以書抵時宰訟公

之冤、反覆甚明、終不能用。公知道之不可行也。胡公亦自瑣闥出、乃相從隱居衡嶽山中讀書、授左氏春秋學。貧甚、始丐奉祠、主管台州崇道觀。四年、叙轉右承議郎。五年、以祀明堂恩復直秘閣。右相張公浚以都督平湖寇、薦公守衡州。是歲大旱、米斛萬五千錢、公分遣使臣齎金糴於鄰州之豐稔者、計本直與道路之費、量其價列糴于通衢、每升爲錢六十、饑民驟得賤米、所活不可勝計。提刑司姦吏董瑜、湖南大蠹、人莫能訐、公捕鞠得其贓、流之嶺南、湘人欣快。以故諸司皆不悅、謀欲去之。公亦自知不得行其志、丐罷、而報未下、諸司與帥臣共劾公數事、皆出于誣也。六年正月、復拜宮祠、士民相與群聚擊鼓于提刑司、願舉留、鼓爲之裂。提刑惶懼、夜半登舟出巡以避之。逮公戒塗日、闔城遮擁哭泣、聲聞數里、非若近世風俗爲文具備禮而已。始知古之良吏所謂攀轅卧轍者不然、亦近

世所未有也。公旣行、得報落職罷宮觀、用諸司誣奏也。是年轉右朝奉郎。八年轉右朝散郎。公銜冤自訟、久不獲伸。至於始被旨差官體究、元按發五事、並無一實。御史亦上章極論公剛直明敏、不畏強禦、奉法守正、不容於監司、內外朋比而攻之、奉聖旨與改正。尋復直秘閣、提點荆湖北路刑獄。衡人思之、繪公像建祠于東城青草寺。侍郎胡公寅爲記、鐫石于傍、并刻御史章於碑陰、至今存焉。皆公出後所立、非有使之者。十年春、赴湖北、先聲入境、時姦吏望風解印綬者數十人。湖北營田舊以抑配百姓、人不聊生、有破產不能償者、日號訴于馬前。公爲詢究其便利可行者、使遵守之、罷一切抑配者、遠近鼓舞。時岳飛以兩鎮節度使相兼營田大使、無敢忤其意者、至是飛亦喜以爲當然。公按部所至、立大榜於前、云久負抑屈、州縣不理者立其下、於是積年無告之冤、咸得伸雪。會總領曾



慥與薛弼素不悅於公。慥以職事誣奏，而弼方爲左司、表裏附會，公遂放罷。乃具奏陳，而都司再行批擬，又特落職。復歸衡嶽之下，與侍郎胡公寅、諫院韓公璜爲方外之遊，不復有仕進意。十一年，以貧甚請祠祿。自是十九年間四領宮祠。十二年，轉右奉朝大夫。十四年，劉昉帥潭，秦檜方用事，昉欲羅織士夫之不附檜者以進身。偶富人訴公弟子率由事昉，遂曲致其詞。并及於公，坐此貶三官，遷居衡陽之伊山，乃晉桓伊書堂故基。結茅以處，手抄諸書，尤喜觀魯論，取諸家之書編爲集義，以己見繫于後，今行于世。胡公明仲嘗過伊山，名其所居曰有裕堂，仍爲之記。十七年，叙復右朝奉大夫。十九年，轉右朝散大夫。二十三年，轉右朝請大夫。秦氏久專國柄，放逐善類，無復還期。暨檜死，公方辯湖北之罷，潭州之劾，久抑不伸。朝廷知其冤，悉從改正。二十八年冬，復起知道州。父老兒童走迎

境上，咸喜曰：我舊使君也。到任半年，復舊職，改知廣州兼主管廣南東路經略安撫司公事。馬步軍都總管未抵治所，而御史復彈公，乞落所復職罷免。公歸舊隱，始築第于衡陽之湖東三十里，徙居焉。三十一年再請祠。三十二年，轉右奉直大夫，除江南東路轉運副使。時淮上方用兵，隆興元年以饋餉功，復職名，繼兼江淮都督府隨軍轉運副使。夏四月，都督張魏公出師破靈璧、虹縣，下符離，勢如破竹。會大將失律，不能深入，魏公駐維揚。公乞還司，因得病，丐解職。言者以爲避事。二年春，復奉祠。病再作，戒子姪函上納祿之請，無與小人藉口。乾道元年，守本官致仕。八月朔丁丑，命道士建醮。公精爽不亂，醮罷，熟寐如平常。旦遂不起。實初二日也。享年六十有九。公娶畢氏，儒林郎瑗之女。先公三十五年卒，累贈恭人。男二人：澣，見任右奉議郎；前知潭州安化縣，以公病乞侍養。澣方五歲，女

三人長適右奉議郎、新廣南西路轉運司主管文字范揆辰、次適右奉議郎、荆湖南路安撫司主管機宜文字黃談、幼適將仕郎、新定擬柳州司理參軍侯宦。孫男五人、士克、士允、士充、士光、士元、皆未仕。孫女四人、長適左迪功郎、新臨江軍司戶參軍宋剛仲、餘尙幼。自宛丘之禍、宗緒飄零、公招集兄弟之子、與同席飲食、教撫如己出、而無擇焉。公買田業分給之、推其子已授官、與其猶子澧、請於朝、特旨從之。立其兄儒林公之後、而官其子濯。忠毅洎武功有子曰法、曰沈、皆不樂從宦、乃各官其一孫曰士永、士行。其篤於宗族、出於誠心、世所稀有也。捐館之日、一子五孫皆白丁、人謂公其必有大於後乎。平生好論人物、無所忌諱、聞者頗駭、而後卒如其言。嘗與胡文定公談當世士、文定頗稱秦檜靖康時事、公曰、與檜同時被執軍前、鮮有生也、獨檜數年之後、盡室航海以歸、非大姦能若是乎。

文定既歿、檜姦邪日著、文定之子明仲與公追復前說曰、昔侍先君子能預察姦邪如公言者、纔二人耳。深服公遠識。公初以直道不容、於是晚年公議方出、聖恩盡與改正。將漕江右、從張魏公轉餉征虜、幾時趨功名之會、不幸魏公遭讒、而公亦以病去、豈非命歟。其孤以乾道元年十月甲寅葬公於衡陽縣政義鄉高塘之原、自洪州西山遷恭人畢氏之柩而合葬焉。某從公遊僅四十年、所得皆事實、故錄以爲行狀、以候世之君子鴻文大筆叙而銘之。

王庭珪撰 《盧溪文集》卷四七

校記

- ①至：原無，據清陸香圃三間草堂抄本《五峰集》（下簡稱陸抄本）補。又，「談食」疑當作「淡食」。
- ②用先：疑是「周先」之誤。
- ③勒停：原作「勤停」，據文意改。
- ④興化：疑當作「興工」或「興役」。
- ⑤下發：原作「發下」，據《宋史》卷九六《河渠志》六乙。
- ⑥「自狀求歸」至「行至盱眙，而運自」，原闕，據清無名氏抄本《五峰集》（下簡稱清抄本）補。
- ⑦制：原作「置」，據《宋史》卷九六《河渠志》六改。
- ⑧朱勔：原作「朱覲」。按此人即宋徽宗政宣間興花石綱之朱勔，作「朱覲」誤，今改。
- ⑨此句疑有脫誤。
- ⑩省：原作「有」，據文意改。
- ⑪京師：原作「言師」，據文意改。

- ⑫汴：原作「什」，據文意改。「南京」下原有「惠州」二字，據陸抄本刪。
- ⑬始：原作「如」，據文意改。
- ⑭者：原無，據陸抄本補。
- ⑮乞：原作「迄」，據文意改。
- ⑯本：原無，據陸抄本補。
- ⑰「虜」字原無，「分道」二字原在「李綱」下，據右引補、移。
- ⑱快：原無，據右引補。
- ⑲汪：疑當作「潤」。
- ⑳代：原作「待」，據清抄本改。
- ㉑鼓鍾：原作「鼓種」，據文意改。
- ㉒公：原作「分」，據清抄本改。
- ㉓喪：原作「長」，據文意改。
- ㉔亟：原作「逐」，據清抄本改。
- ㉕直：原作「置」，據文意改。



儒藏

②⑥補：原無，據清抄本補。

②⑦都轉運使：原作「轉都運使」，徑乙。

②⑧興：原作「與」，徑改。

②⑨部：原作「銜」，據清抄本改。

③⑩繼：原作「維」，據右引改。

③⑪舊：原作「田」，據右引改。

③⑫不議：右引作「和議」，亦通。

③⑬側：原作「劍」，據陸抄本改。

③⑭「正奉大夫」前疑脫「贈」字。

③⑮司：原作「守」，據文意改。

③⑯尋：原作「大帥」，據傳增湘校本《盧溪文集》改。

③⑰公：原作「知」，據右引改。

③⑱增：原作「爭」，據右引改。

③⑲行在所：原無「行」字，據右引補。下文同。

④①被：右引改作「避」，文意似勝。

④②之：原作「文」，據右引改。

④③詞：原作「祠」，據右引改。

④④書編：原僅作「善」，據右引補。乾隆五十一年愛敬堂重刊本作「書」。

宋儒碑傳集卷一百四

鄧洵侯 王葆 李琥 陳鵬飛 劉庭直

劉子翬 段元愷

清遠縣令鄧君洵侯墓誌銘

乾道八年冬、清遠縣令鄧君卒、葬有日、敷文閣直學士胡公大書官族蓋其墓、孤溥復來謁銘。予謂得胡公書不朽矣、奚以銘爲。溥請益堅、乃爲紀初終於下方。君諱洵侯、字元直、世爲吉州廬陵縣人。曾祖河、祖注、父衍、皆業儒。母曾氏、生四子、而君爲季。年十五、由縣庠升泮宮、試藝日有聞、預宣和上舍貢。靖康改元、同其兄洵美、邦彥、涇舟與計偕、而涇舟遂中第、里人稱焉。君既篤學、且練習世故、樂善、喜爲人師、監司守令爭延教子弟。家永和鎮、有宅一區、負郭田二頃、伏臘賓祭有以自足、筆耕文績力也。然每上春官輒不利、嘗再對策集英殿下、再納敕牒而歸。今天子即位、特補將仕郎、而君病

矣。吳興芮公燁賢者也、漕嶺表、辟君廣州清遠令、瓊帥復召君爲屬、皆不果行。卒年七十六、易簀猶題詩示子孫。初、君以十月十九日昧明生、其死也、月日適同、衆頗異之。娶鄉人歐陽元老女、有懿行、年六十九、前君五年卒、葬青石之長岡。一男、溥也、孝而勤於學。四女、嫁進士丘大章、曾尙文、餘夭。孫男三人、良臣、忠臣、正臣。女三人。葬用九年十二月辛酉、其地在縣之膏澤灘頭平相嶺、君所自卜也。銘曰、

試言於廷、不潰於成。覃慶天飛、疾窒其亨。何志之閔、而命之屯。尙崇其墳、燾後之人。

周必大撰 《省齋文稿》卷三二

左朝請大夫王公葆墓誌銘

紹興辛未、震對策集英殿、天子嘉其狂直、不黜而進之。時尙書郎王公彥光爲覆考官、既賜第、例上謁、知其君子人也。後數歲與考上舍試、公以御史



儒藏

監視自鐫闥至揭榜、日夜談經論文、僕僕燈盡不休。又知公篤學醇儒、愈益加敬焉。居頃之、天子議置相、人懷向背、公獨介然持正論、予蓋耳聞目擊、竊嘆息以謂儒者操守當如是矣。其後公守漢、漢予鄉也、雖宦游他邦、實聞其政、異乎泥古而不通者。今上登極、忝執法殿中、乃抗疏道公立朝本末、與治郡善狀。事雖報聞、旋以大理少卿召公、而公久勞於蜀、力求便安、復持節於外、未幾而病、遂以不起。將葬、其孤不屬他人銘之、數千里謁於予、非以予知公深耶。其何可辭。公諱葆、彥光字也。吳郡崑山人。曾祖制、祖申、皆隱居不仕。父億、樂道好善、一鄉推長者。以公升朝、累贈右中散大夫。母令人史氏。公自幼志識絕人、讀書幾廢寢食、弱冠以通經能文稱。由學校貢太學、每試常右諸生。登宣和六年進士第、調通州海門尉。未上、改處州麗水主簿。興守檄治關隘、公規模閎遠、不類少吏、當路才

之用、薦舉陞秩而去。紹興改元、天子思廣言路、講求賢良等科、公慨然上疏陳十弊、皆切中時病、其末以儲嗣爲言。執政讀而奇之、欲試以事、會詔侍從舉劇令、得常之宜興。邑大、比屋皆士族、固已難治、而淮浙兵拏盜起、將士往來憧憧、稍乏興輒以軍法從事、僚吏駭竄。公白父母曰、食君祿無愛元理者、弟可養親、毋以某爲念也。明日取丞簿印兼佩之、自晨治事、至暮未嘗退食。將有頡頏妄求、輒面折力拒、人爲股栗、公弗恤也。久之、民德公不擾吏服、公不可欺、相與協力應軍需、而武將亦知公勇於義、稍稍自戢。於是簡條教、立綱紀、專意息民、視他邑獨晏然。至今父老猶能言當時之事、稱公之善也。秩滿、部使者交薦、而郡守雅不樂、風宗室子常爲公所繩者、使訴公、有榜通衢來告者、至掠治邑胥條公過失、卒無所得而止。改左宣教郎。朝廷將用公於邊、公以親老辭、乃調臨安府仁和丞



改江陰軍教授。丁中散憂。服闋。通判揚州。入監登聞檢院。遷宗正寺主簿。轉本寺丞。賜緋衣銀魚。擢司封員外郎。兼玉牒所檢討官。於時史令人老矣。公養志盡孝。朝士咨美。竟以憂去。三年杜門讀喪禮。人不見其面。免喪。以舊官召。兼權考功。當是時。百司無敢可否事。公獨伸滯直枉。當官不避。未閱月。鬚髮爲白。有蜀士黎洋者。以改秩賅吏。文書成。賄不如約。吏懟詣曹自首而逃。洋下大理獄。而吏不可得。公白侍郎。法雖有取與同罪之文。而事非執法。勿坐與者。請釋洋。破吏詭計。侍郎搖手曰。止。蜀士多資。禍及吾屬矣。公拂衣起曰。避嫌擠人。吾不忍也。自白執政。釋之。其忘己盡公類如此。今魏丞相常語人。銓曹得王公。寒士之幸也。俄兼權國子司業。拜監察御史。兼崇政殿說書。公自入朝。安於平進。同僚驟用者。踵相躡。怡然無愠色。晚用侍御史薦入臺。復以正議不爲衆悅。上章請外。得知

廣德軍。秦氏初失勢。有江東使者諱出其門。追治王晌守宣城亡失常平錢穀事甚急。逮繫平人滿軍獄。久之無驗。公下車。首理出之。使者劾公惠奸。公亦奏使者撓法。事下他司併治。而公詞直。使者既重坐。公纔解守符。旋起知漢州。撫綏善良。鋤治姦猾。境內大治。乃繕修學舍。增葺城壘。百廢具舉。蜀人謠云。廣漢南隆。闕清強。天子聞而嘉焉。南隆守就升部刺史。而擢公瀘南安撫使。知瀘州。引用名士。劾退貪吏。然後鎮以無事。闔境大治。踰年以疾求歸。徙池州。遂拜廷尉。而道改浙東提點刑獄。時隆興元年春也。會稽近行闕。政尙姑息。公屢行帥事。疾惡彌厲。歲歉。請厚捐民租。仇家因飛謀釣謗。適會公疾寢。遂主管台州崇道觀。初宜興民懷公不已。公亦樂其溪山。乃卜居焉。乾道三年。公年七十矣。以二月告老。是月十九日卒於正寢。積官左朝請大夫。原配許氏。門下侍郎文定公將之孫。

再娶里人張氏、皆贈宜人。今宜人莊氏、右朝奉郎安詩之女。生二子、嘉言、右修職郎、嘉賓、右迪功郎、並監潭州南嶽廟。二女、嫁左朝奉郎、新知南劍州周某、左奉議郎、新監行在都進奏院唐子壽。孫二人、將仕郎紹祥、廣孫。二子以是年十月十六日奉公柩歸葬崑山先塋之側、寔積善鄉新漕里也。公起布衣、篤學力行、鄉里所敬、後生奇士爭造門問道。公指授有方、人人成其材。好賢樂善、出於天性。貧者賙之、未遇者爲揄揚致聲譽、後多至執政大僚。今溫守李衡、倜儻有大志、公一見稠人中、妻以從妹、世以公爲知人。教子弟姪甥甚至、登第薦名無虛榜。吳中論儒、素稱王氏。公平居恂恂寡言、臨事毅然不可奪。天資精明、善總理庶務、然不自以爲能也。雖稍更中外任使、而援進不若忌嫉之衆、閑曹遠官必久次、嚮進用時輒亟徙、素所蘊蓄百未究一、汨汨以老。公亦自知不偶、益留意經學、而

尤邃於春秋。嘗讀孟子彼善於此之句、悟聖人作經深旨、以謂當時名卿有功而賢者莫如管仲、子產、晏子、而三人姓名略不概見、其他可類推矣。又曰聖經如化工之造物、有自然法象、蓋昔人所未嘗及者。用心三十年、乃成集傳十五卷、去取是非不措一毫私意於其間。書成、嘆吾精力盡於此、後當有知我者。嗚呼、如彥光庶幾無愧於古之儒者矣。銘曰、

我觀萬物、皆備於書。古之用才、有不在儒。懷以功利、假以朱愚。人自妄耳、匪書之辜。有美王公、秀出三吳。學恥空言、志儒之初。事君不欺、臨政不迂。忠純是遵、仁義是趨。用罔盡才、而譽有餘。平生所得、春秋賞誅。書成而歿、公不爲殂。銘以昭之、尙後之孚。

周必大代張震作 《省齋別稿》卷一〇

李次琮墓誌銘



撫崇仁有隱君子曰藏脩先生李公彥華余嘗以其孫劉之請銘其竈厥三年劉通判武岡軍走書靖曰既有以見王父于地矣雖然先君之葬劉與弟博古支綴殘息僅識歲月于壙今十有五年矣劉不佞蒙寧宗皇帝擢自主管戶部架閣爲國子錄尋以罪斥今上起之祠官命之郡貳會郊祀恩贈先君承事郎妣孺人將以命書告第顧未有以銘竈嗚呼公其終惠之余閱其狀憮然曰士之陞陞乃至此邪國朝以學校育材以科舉取士濟時貽後亦云盛矣然而篤信好學守節厲志之士有不必盡由此選蓋其敝上以權謀利祿爲操世之具下以揣摩迎合爲攫寵之資以位天地育萬物之身顧爲小小得失驅迫喉使以終其年然則毋惑乎李氏累世而不一逢也乃爲之誌曰君諱琥字次琮系見父銘五年喪母周父憐之扶攜卧起授學至仁義大端必反覆開說曰人所爲貴於物

者凡以是耳故自幼通大義不以章句爲能然性穎晤援筆成文家儲書萬餘卷皆父手澤君口誦心惟自道德性命之奧名物度數之詳象緯山河之廣靡不究極國人弟子挾策問疑豪析縷解聽之者如瞽得相惟深疾釋老氏書於事親從兄睦族御下咸叶義盡分人謂克肖厥考客有嘆老嗟卑者君曰窮則獨善其身達則兼善天下得志澤加於民不得志脩身見於世今窮不得志則善其身以見於世者吾儕所當汲汲而暇憂其非我力者乎工部尙書何同叔異聞其言而壯之引爲上客嘗從容爲何言近世諸老講明義理過漢唐諸儒遠甚顧曆象鐘律氏族軍法之學有講焉而未盡者吾欲從公借麻姑山房讀書一二年證其所見以備闕文何公忻然諾之會劉迫官期奉君濟湘乃去故何公聞君之歿爲之出涕且吊臨甚哀云君娶吳氏同邑青雲鄉進士諱洪之女相夫教

子行應儀法前君十七年卒。子男二人、長劉次博古女一人、適進士羅煥。孫男四人、耘、耔、耕、耜俱蚤世。劉兄弟幼受義方之教、長以詞賦應舉、君語之曰、科舉累人、汝以貧故爲之、吾不汝奪。盍自力一經、與其彫蟲篆刻、又舉業之下也。劉以明春秋中嘉定元年進士第、調潭州寧鄉縣主簿、待戌五年始得奉君爲道林嶽麓之遊。參知政事衛清叔涇守長沙、召劉寘莫下、因留君東閣。嘉定六年冬、詔以劉幹辦成都府路安撫司、堂帖下州毋辭。七年春、君至江陵、謁湖北帥趙彥仁方、且告之曰、吾觀星象、狄難將作、公當訓民練士以守襄漢。趙公傾心咨策甚悉。俄感末^①疾、趙一再挾鑿問疾、不克起、爲治喪、且以文哀之。屬纊無它語、惟曰、小子劉、其正學直道、無負吾教。劉殊州獨哭、跣護還里、以是年七月甲戌得卜、用治命葬于所居梅亭之上。後七年、博古懼梅亭地淺薄、改卜于同里廬墓之原、

與藏脩先生兆相望、亦君志也。又爲之銘曰、

厥氏孰宗、唐大支兮。厥紹綿綿、弗棄基兮。厥考荒之、若有開兮。厥生而秀、報在茲兮。厥旣開之、報則微兮。厥子是似、君何尤兮。

魏了翁撰 《重校鶴山先生大全文集》卷七九

陳少南墓誌銘

少南以謫死、葬不及銘。後三十年、當淳熙五年三月己酉、改葬於舊墓南百步先人之側、其子六齡始次叙本末、請銘於余。少南姓陳氏、諱鵬飛、少南其字也。自爲布衣、以經術文辭名當世、教學諸生數百人。其於經、不爲章句新說、至君父人倫、世變風俗之際、必反復詳至而趨於深厚。今世所刊曰詩書傳者是也。其晚而始得仕、用之未及而斥逐以死。旣死不泯滅、而南方學者尤思之、至今稱焉。猶曰少南。故因而不改、所以記也。少南、溫州永嘉人也。曾祖某、祖戩、父公謨。少南舉進士再爲第一、



中紹興十二年甲科。授左迪功郎。明州鄞縣主簿。移浙西安撫司屬官。召對。爲博士太學。以視學恩。改承奉郎。說書崇政殿。除尙書禮部員外郎。兼資善堂贊讀。復兼說書。初建太學。承中原喪亂。士未知所向。司業高閌始更造學法。及少南以文字起。多所接納。而江左俊秀李冲、詹左、張相、范端臣、林光朝等應其選。由是紹興之文見矣。上知其名儒。敬待之。經筵論周平王歸魯仲子之賵。上忽問。母以子貴。何也。講讀官變色踖蹐不敢對。少南從容開析其所以然。旣而曰。舜、禹皆聖人。興於賤微。其父母待之而後顯。所以貴也。若失道與民以憂其父母。則非所以爲貴。此孔氏所以戒也。上爲欣然聽納。初。秦丞相子熺學於少南。丞相旣重少南。且以熺故。遂驟引用。以博士爲講官。其爲禮部郎也。熺爲其侍郎。少南謂熺子弟未習事。所下文案多不應法。批其後還之。每見丞相言。荆襄可爲都以

控接北方。今置郊祀壇、都驛亭。勞費甚矣。是不動吳越而忘讎恥以自佚也。及上前講解。多引尊君卑臣之義。崇抑予奪。有所開諷。自是丞相見少南禮甚恭。意浸不悅。而熺尤不平。遂以御史疏罷歸。明年。主管崇道觀。上將復召。有自南還者。執政問少南何爲。時適彗見。則對曰。覩妖星。聚飲爲樂耳。由是除名。居于惠州。福建盜起。少南徒步循江南。踰嶺數千里而至。妻子不能從。紹興十八年。少南居四年矣。得瘴疾卒。年五十。會有鄉人經略廣東。得以喪歸。葬于甌浦之原。娶王氏。子一人。六齡也。二女。適周季顯、徐貫之。孫男二人。曰載、曰古。有管見集十卷、羅浮集二卷。少南性簡重。言動有準。自幼而孤。以專志勤苦成其名。於聲利樂欲無所動。其學爲通博。而多識治亂。在人主左右。謀議箴切。皆合大體。上亦自欲用之。而不幸有所牽制。一不屈節。即坐貶死。及秦丞相薨。諸常所排擯。隨小大

收用無遺而少南獨以先卒無爲言者。乾道中時宰欲上其事。庶幾天子慨然追錄其後。卒不果。嗚呼。少南之所立不少。概見而至此也。宰相必用士。士必修潔博習以待用。治世之常理也。而其進退離合若此。何也。故士有卓然著見而不汙其所爲者矣。其遂可以爲賢耶。其亦有幸不幸耶。銘曰。

古時會通俊良集。左臯右夔助引汲。忽非其逢牽挽入。自行志義以維繫。吁嗟少南兮。命胡弗長。放彼南服兮。奄淪亡。永終一世兮。改厥藏。後如有考兮。視銘章。

葉適撰 《水心文集》卷一三

故左奉議郎劉君墓誌銘

吾邑鄉貢進士劉承弼書其叔左奉議郎諱庭直字諤卿之行狀。世次來請銘。曰。劉氏故家宜春。自七世祖豐城府君徙居安福。豐城博學善屬文。嘗有文集行於世。其後未有顯者。君之曾祖璣。祖知

復。皆隱居。至父仕先。家益富饒。始置書館教書。聚書至萬卷。日延四方賢士。以故諸子交游日廣。而學日新。紹興初。以詞賦取士。君與兄禹錫尤勤敏。自礪數月之間。已嶄然有能賦聲。是歲君幾中魁選。禹錫亦同貢于禮部。明年禹錫登第。厥後選舉兼試經義。君復以詩學被薦。明年亦登第。以歸。鄉人榮之。調鄂州司戶。鄂於荆湖號攘劇。屯兵數萬。司戶掌軍食。無一人叫詼者。大將頗驕肆。以疑似之獄屬州院官使。咸欲迎合其意。君獨執不從。於是人始知君剛而有守。轉從事郎。爲鼎州武陵縣丞。舊無丞廳。君始創立。前隔永泰渠。因建大橋於其上。州人皆便之。未幾甘露降于後圃海棠之上。太守蘇公籍見而喜之。移植於新堂之南。榜曰瑞露棠。會教官陳元裕被召。君典教事踰年。講訓有方。禮部侍郎辛公次膺。國子祭酒楊公椿列薦于朝。改宣教郎。知臨江軍新喻縣。未赴而君已病。轉

奉議郎致仕。紹興三十年八月一日終于家。君負材見知於當途，方將顯榮於時，而天嗇其壽，悲夫。君初娶伍氏，蚤亡。再娶向氏，文簡公之後也。男三人，宏中、處中、德中。女二人。家有文集二十卷，又作易集傳，未成而歿。紹興三十有二年十二月甲申，葬于清化鄉黃田廟坑之原。盧溪王某爲之銘曰：一門丹桂，起于白屋。將大其家，宜享豐福。車行萬里，出門折軸。萬斛之舟，望涯而覆。君材亦然，未究所蓄。誰其尸之，理必有復。階庭芬馨，尚多蘭玉。

王庭珪撰 《盧溪文集》卷四六

新喻知縣劉公墓表

紹興二十有九年冬十月十有九日，萬里迎侍老親來吏零陵，過湘江，遇公於野店，驩甚。而彼此骨肉已前行，日荒荒欲落，勢不容久相語。某拜公上馬馳去，公亦行，一再回顧，有惻惻之色。公平生剛簡，未嘗對某如此也。私竊獨怪之。未幾，則聞公病

遂不起。前日之回顧，殆永訣之意也歟。嗚呼痛哉。蓋明年之八月一日也。得年六十有一。公諱廷直，劉氏，字諤卿，一字養浩。世爲吉州安福人。曾祖諱璣，祖諱知復，考諱仕先，皆不仕。紹興初元，復元祐詩賦科，時士以王氏訓故熟爛口耳，聖經賢史，古今治亂正邪之大端，漫不省爲何物。公與兄禹錫以文章煒然同升里選，而公在第二，州閭稱二劉焉。已而禹錫登科，公聞罷。又十一年，禹錫死，公以經賦兩科再詣太常，登十五年進士第，調鄂州戶掾。鄂居上流，留屯神衛兵以大萬計。一夕軍中積芻火，大將田師中怒甚，大搜。後一夕得三偷兒，有火具械致之州。太守張搏承意委公鞠之，欲必得三人者，火芻狀。公精意問囚，蓋其情將以竊藏於民家，實未嘗至軍壘也。即抱具獄白釋之。三。太守怒，以語侵公，公曰：以火具而殺三人，有以異於以釀具而抵酒禁者乎？太守一笑，破械遣囚，遂與公



爲知己。薦之朝。遷左從政郎。丞鼎州武陵縣。數決疑訟。歲旱。州命公禱而雨。甘露降于丞廳事之後圃。桃者五。李海棠者一。邑民咨異。部使者某。公雅不屑其人。某剡章薦公。公以好言謝卻之。就攝郡博士。逾年用禮部侍郎辛公次膺及諸公薦。改秩左宣教郎。知臨江軍新喻縣。而疾作。致仕。得左奉議郎。命下於身後云。公初娶伍氏。繼室向氏。三子。宏中。處中。得中。二女。始公未仕。恤恤然有及物意。安福西寅陂。歲溉田萬三千畝。擅於豪右。貧民病之。公爲作均水約。上之官。事下。至今利焉。嗟乎。士大夫儋爵賦祿。任民之安危福禍。而漠然塞耳關口。視若風馬牛不相及。甚者作俑厲民。以爲吾民數百年不可療之疽根。以進其身無忤色。而公未有職於民之時。而拏民憂以自詭如此。使得大其施。所及豈少哉。公即世之二年。門下士楊萬里聞其葬。乃哭而表其墓曰。

鄉里遺老爲予言。劉正臣極長者。其陰德在^③人博矣。其後增增。未有已也。今觀其二子相踵策第而亦相踵以死。以不得遠其翔。不及流其根。則福善之報。然不然。未可知也。然君子之望其子也。無忝於其訓。以無媿於其天而已。負其先以尤其天。豈其志也哉。是則報之大者。是則二劉已矣。

楊萬里撰 《誠齋集》卷一二二

屏山先生劉公墓表

屏山先生劉公既沒二十有一年。一日。其嗣子玘涕泣爲其故學者朱熹言曰。玘不幸蚤孤。先人葬既不及銘。而墓道亦至今未克表。大懼不孝。獲戾幽明。亟欲建石琢辭。以覺于後。而惟先人不及用於世。其事業無得而稱。唯道德之懿。不可以不白。而知者又益鮮。未有所屬筆。獨吾子嘗學於先人。盍以所見聞者爲我書之。熹竊伏原念。所以得遊先生之門者。具有顛末。其於今日之誼。固不敢辭。



而又有不敢不辭者。蓋先人疾病時、嘗顧語熹曰、籍溪胡原仲、白水劉致中、屏山劉彥冲、此三人者、吾友也。其學皆有淵源、吾所敬畏。吾即死、汝往父事之、而惟其言之聽、則吾死不恨矣。熹飲泣受言、不敢忘。既孤、則奉以告于三君子而稟學焉。時先生之兄侍郎公尤以收卹孤窮爲己任、以故熹獨得朝夕于先生之側。而先生亦不鄙其愚穉、所以教示期許、皆非常人之事。今乃幸得屬辭比事、以相茲役、顧恨弗獲、其何敢辭。惟是駑劣、老矣無聞、蓋未有以副先生疇昔之意、而慰吾父泉壤之思、其何能有以究闡幽微、信示久遠。此又熹之所以不敢^④不辭者、則起拜辭謝不敢當。而玆重以大誼要責、於是不得終辭、而輒論次其事如左方、謹按建之劉氏至忠顯公始、大公以節死于靖康之難、而歸葬其鄉崇安縣拱辰山之南。今其墓西二十有五步、少南有丘焉、則先生之所藏也。先生忠顯

公之季子、諱子翬、而彥冲其字也。世系本末、具刻于忠顯之賜碑、此不復著。先生少負奇才、未冠遊太學、聲譽出等夷。以父任補承務郎、辟眞定幕府。旋屬禍亂、忠顯公薨京師。先生痛憤家國非常之變、執喪過禮、哭墓三年。服除、通判興化軍事。秩滿、以最聞、詔還蒞故官。先生始以哀毀致羸疾、至是自以不復堪吏責、遂丐閒局、主管武夷山冲佑觀以歸。世家屏山下潭溪之上、有園林水石之勝、於是俯仰其間、盡棄人間事。自號病翁、獨居一室、危坐或竟日夜、嗒然無一言。意有所得、則筆之於書、或詠歌焉以自適。間數日、輒一走拱辰墓下、瞻望裴回、涕泗嗚咽、或累日而後返。事繼母呂夫人盡誠敬、兄弟之間怡怡如也。侍郎公之子珙幼開爽嗜學、先生愛且奇之、教以文行經業不少懈、而必使務其遠者大者。與胡、劉二先生爲道義交、相見講學外無一雜言。他所與遊、亦皆海內知名士、靡

不歎服深遠、自以爲不及。而先生之心未嘗少自足、雖聞常人有片言之善、無不從容咨叩、必竭兩端而後已。至族黨後生來問學者、則亦隨其器質、告語成就、終日無倦色。如是者蓋十有七年、四爲崇道祠官、累階右承議郎、享年四十有七、以紹興十七年十有二月丙申卒。始得疾甚微、即入詣家廟、泣別母夫人前、徧以書告訣、素所與往來者。召珙付以家事、指示葬處。中外孤遺、人人爲計久遠。昏官^⑤舍業之旣已、則日與學者論說修身求道之要、作訓戒數百言、彈琴賦詩、澹然如平日。熹時以童子侍疾、一日、請問先生平昔入道次第。先生欣然告之曰、吾少未聞道、官莆田時、以疾病始接佛老子之徒、聞其所謂清淨寂滅者、而心悅之、以爲道在是矣。比歸、讀吾書而有契焉、然後知吾道之大、其體用之全乃如此。抑吾於易得入德之門焉、所謂不遠復者、則吾之三字符也。佩服周旋、罔敢

失墜。於是嘗作復齋銘、聖傳論、以見吾志。然吾忘吾言久矣、今乃相爲言之、汝勉哉。熹頓首受教。居兩日而先生沒。所著書詩合爲文集二十卷。娶陸氏、封孺人。先先生十七年卒。無子、葬忠顯公墓東三十有五步。有先生所紀其家世德善刻焉。蓋先生不再聘、則以侍郎公之幼子玘爲後。今爲右修職郎、實立此表。熹方爲次其文、而西府建安公亦以書來曰、叔父之墓弗識、珙則與有責焉。熹讀之瞿然曰、是乃吾之罪也。乃亟起書石而系以銘。銘曰、

神心惚恍、經緯萬方。孰握其機、而挈其綱。嗟惟先生、立德之本。旣覺而存、復則不遠。亦曰于仕、我止我行。亦生而死、我安且寧。拱辰西南、有銘斯碣。嘉我^⑥後人、仰止遺烈。

朱熹撰 《晦庵先生朱文公文集》卷九〇

段元愷墓誌銘



段氏自唐成式刺吉州、後家永新、至諱準者徙居郡城、故爲廬陵人。準生居簡、居簡生世臣。族系駸蕃、兄弟繼登科、號稱儒家。世臣生子冲、字謙叔、一上南宮、不肯爲新學、退築雲齋、藏書數萬卷、朝夕讐校、自號潛叟。郡以遺逸八行薦、不就。政和中、太守程祈學有淵源、尤工詩、在郡六年、日與謙叔唱酬、其和梅花輾轉千詠、人嘆其博。所著書號螺川集、多至百卷。程爲前序、資政忠簡胡公作後序。是生五子、君次居三、名元愷、字達信。儀表偉岸、襟度坦夷。始從進士舉、值兵亂棄去。輕財周急、鄉里仁之。遇有持論不公、行己弗正者、輒面折不少恕、人更服其義。忠簡公與謙叔有師友婚姻之契、待君甚厚、每觴詠必連句。暨予卜居城東、與君爲鄰、君長予二十五歲、而精神非予所及、獨棋品酒量均劣、可相追隨。淳熙二年正月、予赴行在所、君來宿舟中、飲弈達旦而別。五年夏、予在玉堂猶得其書、

是秋乃聞君以七月十一日卒、享年七十有八。後二年十月丁酉、葬本縣儒行鄉橘井之原。妻劉氏、前卒、塋相望也。二子、人傑、世其家、人鑑爲季父鑠。後、孫男六人、希尹、希晏、希說、希周、希顏、希韓。孫女三人、長適歐陽興祖、次適劉慶遠、一尙幼。初、君疾革、語其子曰、胡公知我深、今居里中、必有詩文哀我、銘則屬諸內相、小子志之。旣沒、其子以遺命告、雖諾未暇。迨一星終、予奉祠歸、人傑泣申前請、乃爲之銘曰、

惟利與名、逐逐營營。外物重焉、在己必輕。孰如達信、樂以全生。尙論潛德、庶幾天民。

周必大撰 《省齋文稿》卷三五

校記

①末：原作「未」，據四庫本《鶴山集》改。

②閨：原作「閣」，據四庫本《誠齋集》改。

③在：原作「枉」，據右引改。

④敢：宋浙江刊本《晦庵先生文集》作「能」。

⑤官：右引作「宦」。

⑥我：右引作「與」。

⑦句中諸「希」字，明祁氏澹生堂抄本《周文忠公集》皆作「睇」。

宋儒碑傳集卷一百五

羅上行 羅無競 范如圭 樊光遠

蕭許 王九成

羅元亨墓表

元亨諱上行、羅氏、世爲廬陵人。年二十有八、擢進士第。負其有、慨然欲竭才力、爲國立功業。卒至於憊以病、病以死、死以不壽。壽止於六十有一、官止於左奉議郎、知饒州安仁縣。嗟乎、若元亨之志、元亨之才、元亨之廉勤、而止於斯、天邪。人乎。天也。亦人也。始元亨丞武岡軍武岡縣、時大寇楊么窟穴洞庭、狼然有窺湖南意。朝廷命大將岳飛討焉、元亨以飛檄督饒於諸郡。至全州、通判范寅秩挾家、閱心輕士大夫、元亨屢撼不動。一日往哀懇之、范盛氣大罵曰、公少年不曉事、錢糧不可得也。抗言責之曰、寇在心腹、王師遠來、不宿飽、公忍坐視邪。臣子之義當如是耶。范怒且愧其坐人、即發帑廩

以應、然用是銜元亨、元亨不顧也。已而元亨宰靜江府荔浦及永州東安縣、凡兩遇范爲部中監司、數窘元亨、卒不得絲粟罪。然元亨自是困躓、晚乃教授德安府府學。用諸公薦、改秩左宣教郎、而元亨老矣。至安仁數月、境內大治。部使者太守上其狀於朝、丐頒其條教爲州縣式。廟堂欲用之、而元亨病革死焉。蓋紹興三十有一年九月某日也。其在荔浦、民世爲胥於帥漕憲司、怙其勢、意氣橫出、視令亡如也。令往往反折節隆禮以就焉、介其譽於上官、否則與爲市。以故多犯法、不輸租、令惕不敢呵問。稍忤焉、則飛語釣謗、遠者莫考、近者逐二十餘令矣。元亨至、則條其姓名與其所以然者、白於三司、請再犯者得逮治、胥徒側目、治甲廣右。其在東安、范運判修怨、移以丞祁陽。受牒鞠獄衡州。先是、衡有浮屠弱一孤兒而奪之田。浮屠者、徑山宗杲之徒也。宗杲以才辨得幸於公卿要人、孤兒



儒藏

每訟田於有司、有司皆觀望宗杲之勢、撓法以田畀浮屠屢矣。元亨未至衡州十里所、宗杲遺書於元亨、啖以惟所欲、或當塗薦章、或金帛、皆立致、必以田畀其徒。元亨謝曰、諾。入城則發其姦、其訟一問而決、舉田以歸孤兒、諸公大驚。及秩滿歸家、萬里私怪其憔悴、以問其子全略。全略感然曰、吾翁平生之心力盡於爲邑矣。竟日坐聽民政、飢甚則入屏風後卒卒索食。食未徹、聞一民揖於庭、則又屣履而出。迨夜過丙、事已、民謝去、倦卧於屏風後、率以爲常。未幾則聞大病於德安、再病於安仁、卒死於勤。且所至遭其仇、以不得施其才、是可哀也已。曾祖諱駢、祖諱仇、皆不仕。父諱紉、以經術爲州里儒先、粹然古君子人也。以元亨贈右承事郎。母李氏、贈太孺人。妻孺人周氏、先卒。子四人、全略、全德、全材、皆以文世其家。全功、未冠。二女、已嫁。其詳見於行狀誌銘矣。明年某月某日、妹婿楊萬里復

表其墓曰、

嗟乎元亨、以王師不飽爲己憂、而不慄上官之含怒、賢矣。范公以一時之怒不容天下之士、而阨之至死、冤矣。雖然、元亨之賢、蓋自其天、在阨而安、亦豈其冤。吾特爲國愛元亨之才、而爲當世之君子惜其使斯人而然也。嗟乎、櫻④己者醜、諛己者妍、同己者扶、異己者顛。今之君子、此病未痊。若元亨之犯一郡丞、其禍已如此、況復有大於此者邪。然則乏才於緩急之際、而天下之所以難治、不足怪也已、不足怪也已。

楊萬里撰 《誠齋集》卷一二二

孝逸先生傳

羅無競字謙中、其先長沙人、邁馬氏亂、家於廬陵。曾祖晟、祖亮、父允、以好善聞州里。謙中哲幘⑤豐姿、幼穎悟、年十六游學南昌、且數歲、有聲場屋。三舍法行、歲時鈎校、行藝出諸生上。疾士風日薄、歸杜



門。會有熙河之役、上書條利害、特旨褒美、授迪功郎。交親強之仕、始爲建寧主簿。愛民如恐傷、御史束濕令魯人贖貨、無藝謙中連指其過、銜之。思有所中傷、無毫髮釁、令卒以貪敗。先謙中嘗攝尉、鄉民爲穀舐戲、令意爲盜、檄尉捕。既得、移縣以實、則使喻以風指、此可超某官。笑曰、殺人以爲梯、忍耶。亟白郡、數十人得不冤。汀有劇賊衆數千、聲響建寧、民凜凜欲亡、其同僚謀自全、謙中曰、邑無大小、召吏民、鍵以禍福、爲守備、盜不入境。去官、百姓遮道留。歸踰年、丁父憂毀甚。母不勝悲、不得已、強食。免喪、不復仕。號遜翁、蓄書萬卷、大蒐其間、故人清風、觴咏竟日。建炎間、金人渡江、聚落爭顧府、謙中太息、吾獨如墨莊何。虜過其廬、曰、儒先家也。戒毋犯。自是避地者如歸、或以方義成堡。一日忽得疾、侍母不解。寢棘泣數行下、謂家人、吾不得終養矣。遂卒、年五十三。門下客私謚曰孝逸先生。娶朱

氏。子良弼、良佐。謙中喜作詩、高處切風雅、平處往來鮑謝難之。天資靜易、未嘗丐汲引、而薦者章交。待人以和。若汎然應、而終不易其介。父事兄、友其弟。弟死、厥孤方襁褓、養育數年而夭、則以良佐爲之後、且嫁其女。姑若妹寡而寡者、給其養終身、死則具禮以葬。子姓皆興於學。紹興初、取士復詩賦、良弼爲鄉舉首。亡幾何、上大饗合宮、恩耄、其母年九十、封太孺人。人謂謙中仰親俯子、皆可無憾。有集數卷、經解數卷、著清襟集三卷、藏於家。先君宣教雅與公厚、嘗謂某兄弟、謙中有佳兒。予之師清節先生蕭子荆、謙中友也、亦云。故予兄弟樂與良弼游。予登第後、讀書山間十年、良弼未嘗不來、來未嘗不論文終日。後被召、大臣舉予、應直言極諫等科、朋友有功焉。良弼爲多、予其敢忘之。頃得給事中李仲謙所爲公墓志、又以所聞補之、爲公傳、而竊評其大概曰、爲親而仕、近毛義、談達以詭近

東方朔遜以求志近淵明云。太史公曰。在易之蠱曰。幹父之蠱。意承考也。又曰。不事王侯。高尚其事。一卦而二戒。具聖人之意深矣。崇觀以來。迄於政宣之間。童蔡方君圖門如沸羹。人爭趨之。朝輿臺而暮間兩社者。肩摩於朝。而不知其害。及靖康之變。凡其黨與。耄嬰頸血。不死刀鋸。則死於兵。骨相枕於道。頸顱有行。萬里者。謙中於是時。方白水捲簾而青山隱几也。人然後知公之爲高。然猶挂名縣篆者。父命不敢違也。進不違父命。則合乎承考之義。知時不可爲而止。則又合乎高尚之義。論曰。孝逸。予寧欺公。

胡銓撰 《胡澹庵先生文集》卷三一

范直閣墓記

宋故左朝散郎直秘閣主管台州崇道觀范公諱如圭字伯達。曾大父履謙。妣阮氏。大父補之。妣李氏。童氏。父舜舉。從事郎。累贈左朝議大夫。妣胡氏。

繼葉氏。俱贈恭人。大父以上世家建州建陽縣之由原。先大夫始居漳濱。遂爲荆門軍當陽縣人。以崇寧元年玄默敦牂九月己丑巳時生於舅氏胡文定公荆南學官廨中。既孤。自奮從文定公受春秋學。舉進士。建炎二年對策廷中。語切直。張和公時爲考官。第爲首選。同列不可。於是。以乙科賜及第。授從事郎。武安軍節度推官。以母喪解職。服除。從外舅葉公辟。爲江南東路安撫司書寫機宜文字。召試館職。除祕書省正字。兼史館校勘如故。紹興十年春。謁告如荆門。遷奉先大夫。恭人之柩歸葬建陽。始。公在館。數陳論時政。與宰相意不合。至是。遂請奉祠。差主管台州崇道觀。秩滿。輒復請。由是歷十載。三爲祠官。十九年。添差通判邵州。秩滿。差通判荆南府。賜緋。二十七年。召赴行在。上殿。直祕閣。提舉江南西路常平茶鹽公事。歲餘。除利州路提點刑獄公事。在道上。書論宗社大計。有人所

難言者。會有目疾。辭得不行。差主管崇道觀。二十

九年秋。起知泉州。十月到郡。革弊抑強。人方受其賜而貴勢不以爲便。俄有旨與宮觀。理作自陳。越明年正月。始被命。即日罷歸。四月受敕。復爲主管崇道觀。而公已病矣。六月乙丑。卒于邵武軍寓居之正寢。享年五十有九。而是歲紹興三十年上章。執徐也。公娶葉氏。右文殿修撰宗諤之女。封安人。子男三人。長念祖。右迪功郎。次念德。次念茲。念茲後公十八日而亡。年十有七矣。女二人。長適右承務郎折知常。次適登仕郎劉玘。孫男四人。女一人。皆尙幼。其年九月甲申。諸孤奉公喪歸葬建陽縣渭曲山。謹次公姓系爵里。始終梗概。納諸壙中。以識。若經術。行誼。出處之詳。則將請于先生君子深知公者。刻辭墓左。以明示後世云。從表姪。左迪功郎。監潭州南嶽廟朱熹謹記。

朱熹撰 《晦庵先生朱文公文集》卷九四

直秘閣贈朝議大夫范公神道碑

紹興之初。天子痛念宗社阽危之辱。久而未報。寤寐俊傑。以圖事功。既得趙忠簡公。張忠獻公。而相之。又俾兩公博求天下之英材。以備官使。於是忠賢畢集。讜言日進。國以大競。仇虜讐焉。其後兩公相繼去位。秦檜遂以講和誤國。脅主擅權。一時諸賢率以異議擯逐。二十年間。堙阨淪謝。其幸及檜死。復見收用者。什不二三。然亦往往遲暮奄忽。而不及究其所爲矣。嗚呼。此豈獨士之不幸也哉。若故直祕閣范公。則其一人已。公諱如圭。字伯達。建州建陽縣人。曾大父履謙。大父補之。皆隱德不仕。父舜舉。始登進士第。官從事郎。以卒。其學行志業。延平楊文靖公實銘之。以公故。贈左朝議大夫。母胡氏。葉氏。皆封恭人。公生數歲。遭母喪。哀毀如成人。未冠而孤。奉繼母尤謹。撫弟妹。曲盡恩意。有人所難能者。從舅氏胡文定公。受春秋學。鄉舉類試。



儒藏

皆第一。對策廷中、極論人主正心立志之方、力詆和議、宴安之失、言甚壯切。張公時爲考官、讀而異之、第以爲選首、而同列有病其言者、抑寘乙科。授左從事郎、武安節度推官。始至、帥將斬人、公白其誤、帥爲已署、不易也。公正色曰、節下奈何重易一字而輕數人之命。帥矍然從之、自是府中事無大小、悉以咨焉。居數月、以憂去。時虜騎已陷長沙、湘中大亂。公崎嶇避地、艱苦百罹、而志業益修。開口論議、皆切當世之務。諸公多訪以事、而文定亦亟稱之。辟江東安撫司書寫機宜文字、近臣交薦、召試、除祕書省正字、改宣義郎、遷校書郎、兼史館校勘。會秦檜力建和議、虜使鼎來、而朝廷草創、無所於館、將虛祕書省以處之。公亟見趙公曰、祕府謨訓所藏、平時以館好使猶不可、況今日之仇虜、而可使腥羶之乎。趙公竦聽、即爲改館。旣而使至、悖傲所議多不可從者、中外憤鬱。公與同省十餘人

合議、拜疏爭之、旣具草而駭懼引卻者衆。公乃獨手書抵檜、責以曲學倍師、忘讎辱國之罪、且曰、公不喪心、不病狂、奈何一旦爲此。若不改圖、必且遺臭萬世矣。檜以是怒、而公所議奏草卒與史官六人者上之。未幾、虜歸河南、以嘗我、檜方自以爲功。公曰、是亦安能久有。顧今日之義、則有不可不爲者。乃因輪對言曰、兩京之版圖旣入、則九廟八陵瞻望咫尺。今朝修之使未遺、何以仰慰神靈、下萃民志。上泫然曰、非卿不聞此言。立命遣使。於是檜以公不先白己也、益怒。公亦以先墓久寄荆門、中更變亂、乃謁告、奉柩歸葬故鄉。飯蔬帶經、往返數千里。旣窆、即以病告。差主管台州崇道觀。前後三請、杜門讀書、不與人事者十餘年。尋起通判邵州、又通判荆南府事。荆南戶口舊數十萬、寇亂荒餘、無復人迹。朝廷爲蠲口賦以安集之、百未還一二也。而議者希檜意、遽謂流庸浸復、可使稍輸什二



而歲增之。吏不能供、顧無敢言者。至是積逋二十餘萬緡、他負亦數十萬。戶部日下書責償甚急、曰不且有譴。時檜晚節悖亂、喜怒不可測、爲戶部者又其姻黨、凶焰赫然。帥孫汝翼懼、欲賦於民以塞責。公持不可、曰、吾寧被譴、此不忍爲也。無何、孫去、公言於後帥王公師心、悉奏蠲之。時檜已死、公所與同時去國者多召用、公亦被命入對。上猶記公前議、勞問久之。公因進言爲治以知人爲先、知人以清心寡慾爲本、語甚切至。又論東南不舉子之俗、傷絕人理、請舉漢胎養令以全活之、抑亦勾踐生聚報吳之意也。上善其言。時陳文恭公知政事、亦欲留公朝著、而同列有以檜黨暴起秉事者、忌公前輩、不肯媚事己、乃以直祕閣、提舉江西常平茶鹽公事出之。公辭行、復奏言、今日屯田之法、歲之所穫、官盡征之、而田卒賜衣廩食如故、使力穡者絕贏餘之望、惰農者無饑餓之憂、貪小利、失大

計、謀近效、妨遠圖。是以歷年久、用力多而無成功。謂宜舉籍荊淮曠土、畫爲丘井、放古助法、酌今之宜、別爲科條、以令政役、則農利修、武備飭而復古亦有漸矣。章下、任事者或笑以爲迂闊、寢不奏。公平時所至、詢究利病、搜訪人材、汲汲如嗜慾。至江西、論奏數事、皆一方久遠之利。薦臨川宰陳鼎有古循吏之風、聞者亦以爲當。改利州路提點刑獄公事、以病、復請爲祠官以歸。時宗藩并建而儲位未定、道路竊竊有異言。公雖在遠外、獨深憂之。嘗剡至和、嘉祐間名臣章奏凡三十六篇、合爲一書、至是囊封以獻。且言曰、願陛下深考群言、仰師成憲、斷以公道、無貳無疑、則天下幸甚。人或以越職爲公危之、公不顧也。上感其言、以語輔臣而歎之。曰、如圭可謂愛君矣。遂留陳公決定大計、即日下詔、以普安郡王爲皇子、進封建王。因復起公知泉州、公辭不得請而行。既至、舉大體、盡下情、擇丞史

任之郡以大治。蠲屬縣負課久不能償者什三四度其力而寬與之期。縣感公誠意、輸將惟謹、財用以紓。泉地瀕海通商、民物繁夥、風俗錯雜、而經用常不足、人始以公不更治民理財爲憂。至是乃大服。南外宗官寄治郡中、挾勢爲暴、前守不敢詰。至奪賈胡浮海巨艦、其人訴於州、於舶司者三年不得直。占役禁兵以百數、復盜煮海之利、亂產鹽法、爲民病苦。公皆以法義正之、則大沮恨、密爲浸潤以去公、遂以中旨罷公領祠如故。邦人涕慕、欲相與號訴於朝、公禁之不得行。遂邵武僦舍以居、門巷蕭然。士大夫益高仰之。遠近學者多從質問、經子疑義、公亦孜孜引接、朝夕不倦。屬疾、移書政府、舊交告訣、語不及私、惟以中原未復、民力未蘇、遺賢未用爲寄。戒諸子強學、且毋得用浮屠法治吾喪。以紹興庚辰六月十八卒、享年五十有九。後兩年、今天子遂由青宮受內禪、即皇帝位、父堯子舜、

海內大安、而公已不及見、世亦莫知公之嘗有言也。近歲士大夫頗有見紹興日曆及陳公手記者、然後乃知公之忠精爲不可及。公爲人篤厚易直、不飾邊幅、忠孝誠實、得之於天。其學根於經術、不爲無用之文。有集十卷、皆書疏議論之語、藏于家。所議屯田、嘗別草具其施行之目數千言、未及上。其後張公總師江淮、奏下公家取其書、而張公尋罷、亦不果行。識者恨之。公累官左朝散郎、贈朝議大夫、娶葉氏、封安人、後贈恭人、公繼母之弟、右文殿修撰宗諤女也。靜淑儉素、配公無遺德。後五年卒、與公合葬建陽之渭曲村。公始嘗欲卜居處也。子男三人、念祖、通直郎、知撫州宜黃縣致仕。念德、今爲朝奉郎、江南東路安撫司主管機宜文字。念茲、早卒。女二人、通直郎、利州路提點刑獄折知常、從事郎劉珏其壻也。始、公之葬不及銘。旣葬、諸孤始屬其故賓客魏君揆之狀公行、將請文於上饒



汪公而刻石以表其隧。又未及而汪公薨，則公之同時輩流已無復在者矣。乃奉其書泣以屬熹。熹愚晚出，何以及此。然惟先人爲史官時，實常與公連名奏事。及罷而歸，又與公同日艤舟國門外，其相與期於固窮守死之意，晚而愈篤。先人既沒，公所以憐熹者亦益厚。至於親爲講畫，反復辨告，蓋惟恐其迷昧沒溺，喪失所守，以辱其先人也。此意豈可忘哉。乃受其書考之，而論著其大者如此，且系以銘。銘曰：

嗚呼惟公，廣博易良。不耀其章，不劇其方。斤斤其容，坦坦其行。懇懇其言，循循其政。剛毅勁切，以時發之。賁育雖強，孰能奪之。晚殫厥猷，遂啓明聖。萬世之傳，一語而定。凡今有慶，孰匪公功。我銘斯闕，以詔無窮。

朱熹撰 《晦庵先生朱文公文集》卷八九

吏部郎樊茂實墓誌銘

茂實樊氏，名光遠，臨安錢塘人。曾祖文，妣婁氏。祖用安，妣王氏。考周，贈右朝請郎。妣席氏，贈安人。累世皆隱德不仕。至茂實始以儒學顯。初臨川王荆公著三經義，字說以同天下之學，舉世誦習如六經然。范陽張先生以爲學者貴于自得而躬行，可爲天下國家用也。今守其穿鑿附會之說，而修身治人，析爲兩途，則何貴于學矣。先生以此數見黜于當時之有司，貧至飡粥不給。茂實獨師事之，甚謹。既冠，徒步就太學，試以書義對。是時文體亦稍變矣，而茂實獨直指王氏之失，力排之，切中其要。攷官奇之，置高等。是後士人乃益得自致于學。紹興五年，茂實試春官爲第一，遂中進士第。調秀州海鹽縣主簿，改常州教授。未行，召見，除秘書省正字。秦丞相用事，敵人來歸河南地，茂實因輪對，力言所當思患而豫防之者。秦丞相始不悅。未幾，敵人叛盟，前日異論者益見忌，乃出茂實爲閬州

教授。茂實以大母年高而迎養非便，得請監潭州南嶽廟。丁大母憂，服除，歷廬州、明州教授。秦丞相既薨，詔除茂實秘書丞。方秦丞相時，凡以疑忌得罪者，往往累赦不復，又奪其所當得恩澤。茂實得召見，言之，太上嘉納，詔還恩澤有差，而茂實爲監察御史。茂實在臺中，所裨攷甚多。未幾，爲工部員外郎，得請知興化軍。茂實初未嘗歷吏事，興化俗號難治，生謗起訟，長吏鮮以理去。茂實曰：「吾以誠待人，他不恤也。」既至，簡節目，通下情，先教化而後刑罰。獄訟日衰少。遷提點福建路刑獄。茂實于刑獄尤盡心，凡所以要束防察甚備。閩多劫盜，類與州縣吏相表裏，不即獲。間有在官者，吏輒併財主繫之，以是無敢愬者。茂實許其徑詣司自言，而嚴追捕勘鞫之限，盜始有所畏。建州兩獄充斥，茂實至，釋囚繫一百四十有三人。朝廷爲罷免長吏，其所平反全活甚衆。徙知嚴州，適諸軍遣人募兵，

皆誘略平民，所至騷然，人不敢入市。茂實具奏其狀，乃詔諸軍皆立額，有闕則取旨下。諸州寄招其患遂息。嚴每歲買御爐炭，其實皆科取于民，茂實奏罷之。提點浙東路刑獄高麗將入貢，茂實極言其甚不便者六事于朝，詔即止之。今上即位，召爲吏部郎。茂實以足疾辭，尋除福建路轉運副使，不行，得請主管台州崇道觀。以隆興二年七月卒，年六十有三。茂實氣貌嚴重，語言確訥，不知者以爲簡也。自得罪秦丞相，流落幾二十年，入朝纔歲餘，輒出，蓋有不悅者。既而諸公貴人議論士大夫之當召用者，未嘗不以茂實爲稱首。茂實初無求于人，也是以久在外。吏部之命，蓋將用之，而茂實不能造朝，遂以不起。識與不識，皆爲之流涕也。然茂實強學力行，更閱世變，操履如一，顧念平生無一可愧恨者，其志得矣。他何言哉？有尙書解三卷、禮記講義二卷、梅窗雜著十卷，藏于家。娶陳氏，算學



博士從道之女、封安人。子男三人、擢左修職郎、抑左迪功郎、饒州浮梁縣主簿、擢將仕郎。女一人、許嫁將仕郎陸邈。孫男七人、致堯、拱舜、贊禹、暨湯、憲、武、保成、規宣。孫女一人。諸孤將以其年十月甲子、葬于錢塘縣安溪鳳泉山之原、而移書屬某爲銘。某與茂實皆范陽張先生之門人、又同年進士、又同爲秘書省正字、旣而還朝、以至去國、亦適相先後、道義之契、非他人之比者、銘其可辭。銘曰、舉世方紛、獨尊其所聞、更歷險夷、不傾不歆、以終其身、以畀其後人。

汪應辰撰 《文定集》卷二二

蕭嶽英墓誌銘

公諱許、字嶽英、蕭氏。其先自唐丞相復觀察湖南、其子儉留家長沙、六世而徙廬陵。其後武寧令霽子煥國初徙白沙、今遂爲吉水人。自定基與其孫服相繼入爲御史、至公之曾祖汝賢爲將作監主

簿、蕭氏遂爲廬陵大家。公服之從孫也。祖公瑾不仕。父昂、以公贈承務郎。公七歲知屬文、鄉先生李端臣一見期以偉器。年十二三、有聲郡學、三舉於禮部、不第。今天子嗣位、慶賴海內、公以特奏名授將仕郎。公事親無遺恨、獨恨親不及祿、旣受官、則喟曰、白頭非折腰。具於功令、選調者六考、老焉、則爵父母、吾得藉手下泉其可矣。初調監常州奔牛鎮、奔牛中切^①邦甸、外通疆場、行李還往、空道攸出、大農之供、歲五百萬、大賓儲侍、則又稱是。踐厥職者聞罷自免、非慮^②則懦、凡二十輩。蓋廣出狹入、官吏並緣剗剗市利、虐取苛留。征商其咨、間道以逋、官用告匱。公旣莅至、搜蠹剔弊、白之郡將、自詭刮磨^③稅外乾沒、罔不滌除。曾不旬時、商旅走集。初年增至千萬、明年二千萬、又明年乃三千萬。時北鄙有興、天兵濯征、虎符羽檄、夙宵崇降、塗出毘陵、州不乏興、奔牛焉依。葉丞相衡實典是州、嘉公之才、

論薦于朝、廼移公爲無錫令、奏令爲眞。會公秩滿、力請自解、以奔牛課最、增秩從政郎、監潭州南嶽廟。戶部接近比懋賞、符州賜錢四百萬、公辭不受。嶽祠秩滿、調全州清湘丞、改常德府武陵丞。官期至、公雅不欲之官、則請老于朝。上有旨以通直郎致其仕。淳熙三年春、光堯慶壽恩、加奉議郎、賜五品服。故事、仕而告休者半其俸、太府檄鄉郡廩之、公辭焉。是歲十一月、朝廷有事于南郊、大賚臣庶、公以通籍朝列、遂得追秩考妣、如公始願、則欣然曰、吾志畢矣。奏牘既上、未幾以疾卒、年七十有五。方子孫侍疾、涕泣不止、而公神氣清夷、顧曰、吾無一物以遺子孫、平生所學、獨得中庸二字、今以遺汝。言訖而逝。公嘗客臨安、同舍多鄰曲。前任縣令楊元皋病棘、則皆棄去、公獨留、晝夜助其子謁醫。元皋死、又助其喪紀、其急義類此。公有文集三十卷、皆有律令。又有五一堂叢目十卷。初、室彭氏、繼

室黃氏、皆先卒、贈孺人。男一人、特起、彭出也。孫男六人、必得、必固、必簡、必取、必恭、必東。女一人、適進士李棣。特起將葬公於吉水墨潭之上、以奉議郎知袁州分宜縣謝諤之狀來請銘於某、則哭而銘之曰、
邳隆之階、何聘非瓊。何斲非材、何刈非萊。嶽英之才、而不逢哉。墨潭之涯、堂斧斯嵬。松柏斯哀、疇不永懷。

楊萬里撰 《誠齋集》卷一二八

王九成夷仲墓志銘

君諱九成、字夷仲。石初因君亡友劉子夷叔而得其人、蓋誠厚樂善、知好吾輩者也。始余與劉子皆居東州、少交西州士、未甚爲西州士所知、或足一至西州、率睥睨諸公間、少有一語合、其他可知也。劉子從李公瑆爲辟客、舟行、碎舟石佛灘下、僅以身脫、無一人哀之者。過二江、得君父子、館於其家、



如素所熟。劉子心怪之。既而果爲人排擠。卒不合。掉臂東歸。謂余曰。殆哉。此行賴王君父子多矣。且言君之賢。能誦吾二人之文。因勸余交其人。余官成都。君果挾劉子之知以來。且自言從臨邛黃源學讀易久矣。幸以劉子故得印證。可乎。自是率四十里間。一早來暮去。其來遇坐客劇談。君抗身揖客坐席上。欣欣若有得。不出聲以去。余固奇君之爲人也。後二年。劉子與余偕官東南。時各出一文示人。輒聲不能句。至使人含怒裂去不顧。以是多得唾罵益甚。吾二人竊竊自語曰。是前日東西州也。况萬里吳乎。此文王夷仲卻知容吾輩也。劉子死於館職。余亦罷學官以歸。官成都。君之子知方來泣告葬日。謁銘。余曰。是平日愛吾文者。劉子死矣。非石誰宜銘。按君世雙流人。曾祖某。祖某。父某。卒以紹興二十九年某月。葬以三十二年十二月。年五十八。娶袁氏。一子。即知方也。所居竹勝處。館

有師。几有書。觴豆琴弈。非獨自娛。亦以娛客。每客至。多四方名士。相與說學問文章。子弟立侍。几杖斤斤。蓋一義方門也。至君沉厚和緩。望望若欲有施於世。惜夫不工場屋舉子業。而樂從吾輩爲迂闊左計。其卒止此也。銘曰。

佩明月之旗。不若紵絮之易衣。饜九房之芝。不若黍穀之易糜。人棄我收。爽世所宜。二江合流。沂海以西。匪君曷思。惟友之悲。有窆其幽。請相吾詩。

李石撰 《方舟集》卷一五

校記

①么：原作「公」，據四庫本《誠齋集》改。

②弱：右引作「欺」，按「弱」作動詞用，自可通。

③辨：原作「弁」，據右引改。

④櫻：原作「櫻」，據右引改。

⑤幘：四庫本《澹庵文集》作「頤」。

⑥吏：原作「史」，據文意改。「御史束溼」謂控馭縣吏嚴急，不使其害民也。下篇《衡州太守高大夫行狀》云「馭吏如束溼」，可證。《漢書·寧成傳》：「操下急如束溼。」

⑦此句四庫本《澹庵文集》作「謂之孝逸，不予欺云」。

⑧矣：原脫，據四庫本《誠齋集》補。

⑨切：原作「功」，據右引改。

⑩應：原作「廣」，據右引改。

⑪自「公既莅至」至「自詭刮磨」，原無，據右引補。

⑫任：原作「古」，據右引改。

宋儒碑傳集卷一百六

胡銓 范浚 傳自得

宋故資政殿學士朝議大夫致仕廬陵郡

開國侯食邑一千五百戶食實封一百

戶賜紫金魚袋贈通議大夫胡公行狀

曾祖璉不仕。曾祖母夫人康氏、劉氏。祖愷、贈承務郎。祖母張氏、封孺人。父載、累贈太中大夫。母陳氏、張氏、所生母曾氏、俱贈淑人。公胡氏諱銓、字邦衡。其先金陵人、五季避地廬陵。祖愷未壯而沒、贈承務郎。父載、累贈太中大夫。母陳、張所生母曾、俱贈淑人、皆以公、惟祖母張以百歲封孺人云。太中氣慷慨、一試有司無遇、即棄去。公自幼超詣絕世、強於記覽、有質以古書者、必曰是出某書某卷、驗之而信。年二十入太學、試文淨不加點、博士驚異。建炎二年、上皇策士於維揚、初擢公第一、有媚其直者、竟第五、授文林郎、撫州軍事判官。未上、昭慈聖

獻皇太后避狄於虔州、狄踵至、公哀眈爲兵、與皇叔士參、撫州太守張循軍合遏其衝。虜退、論功轉承直郎。權吉州軍事判官。時群盜四起、守臣張中彥檄公督別將趙之儀捕之。覘者請夜襲之、公不可、曰、賊掠民自從、將毋俱焚。遲明、賊遁、掠者得釋。未幾、居太中憂。除喪、與兄蓬山居士鑄築精舍於里之洞巖、從名儒蕭楚講畫古學、冥搜治亂安危根株。或勉之仕、不答。紹興五年、忠獻魏國張公浚都督諸路兵、辟公提舉荆湖北路常平茶鹽司幹辦公事。改荆湖南路提點刑獄司幹辦公事、召赴都堂審察、兵部尙書呂祉以賢良方正直言極諫科薦、賜對便殿。公論持勝及納諫及虔寇及營田事。上曰、營田孰初。對曰、田制邈矣、三代曰井、春秋之晉曰爰、秦之商君曰轅、漢之晁錯曰屯、趙過曰代、充國曰營。眞宗用耿望之之計、於是乎治屯田。仁宗用歐陽脩之議、於是乎建營田。無弊法、有弊



儒藏

吏。今募民營田、官給之牛、且貸之種、美矣。然湖之南土牛之所生、市之以出鄉、則無全牛、降之嘉種、官有其費、漁之於吏手、則無實惠。上曰、善。當改之。改通直郎、樞密院編修官。七年十一月、宰相秦檜決策暨金人平、王倫^③誘致虜使、以僞詔來、責禮異甚、中外洶洶。公獨奏封事、其略曰、臣謹按、王倫本一狎邪小人、市井無賴。宰相無識、舉以使虜、誘致虜使、以詔諭江南爲名、是欲臣妾我也。是欲劉豫我也。豫臣醜虜、南面稱王、自以爲子孫帝王萬世之業。一旦豺狼改慮、猝而縛之、父子爲虜。商鑑不遠、倫又欲陛下效之。夫天下者、祖宗之天下也。陛下所居之位者、祖宗之位也。奈何以祖宗之天下爲犬戎之天下、祖宗之位爲犬戎藩臣之位。陛下屈膝則廟社盡汙、夷狄赤子盡爲左衽。宰執盡爲陪臣。異時豺狼無厭、安知不劉豫我乎。夫三尺童子至無知也、指犬豕而使之拜、則怫然怒。今堂

堂天朝相率而拜犬豕、曾童孺之所羞、而陛下忍爲之邪。倫之議乃曰、我一屈膝、梓宮可還、太后可復、淵聖可歸、中原可得。嗚呼、自變故以來、主和議者誰不以此說啗陛下。然而卒無一驗、則虜之情僞已可知矣。而陛下尙不覺悟、竭民膏血而不恤、忘國大讎而不報、含垢忍耻、舉天下而臣之、甘心焉。就令虜決可和、盡如倫議、天下後世謂陛下何如主。況醜虜變詐百出、而倫又以姦邪濟之、梓宮決不可還、太后決不可復、淵聖決不可歸、中原決不可得。此膝一屈、不可復伸、國勢陵夷、不可復振、可爲痛哭流涕、長太息者矣。向者陛下間關海道、危如累卵^④、當時尙不忍臣虜、況今國勢稍張、諸將盡銳、士卒思奮、只如頃者、醜虜陸梁、僞豫入寇、固嘗敗之淮上、敗之渦口、敗之淮陽、校之蹈海之危、固已萬萬。儻不得已而用兵、我豈遽出虜人下哉。今無故而臣之、欲屈萬乘之尊、下穹廬之拜、三軍

之士不戰而氣已索。此魯連所以義不帝秦、非惜夫帝秦之虛名、惜天下大勢有所不可也。今內而百官、外而軍民、萬口一談、皆欲食倫之肉。謗議洵洵、陛下不聞、正恐一旦變作禍且不測。臣竊謂不斬王倫、國之存亡未可知也。雖然、倫不足道、秦檜以腹心大臣而亦爲之。孔子曰、微管仲、吾其被髮左衽矣。夫管仲、霸者之佐爾、尙能變左衽之區爲衣裳之會。檜大國之相也、反驅衣冠之俗爲左衽之鄉、則檜也不惟陛下之罪人、實管仲之罪人矣。孫近傳會檜議、遂得參知政事。檜曰、虜可和、近亦曰可和。檜曰、天子當拜、近亦曰當拜。嗚呼、參贊大政、充位如此、有如虜騎長驅、能折衝耶。臣謂檜、近亦可斬也。願竿三人之頭於決街、然後羈留虜使、責以無禮。徐興問罪之師、則三軍之士不戰而氣自倍。不然、臣有赴東海而死爾、寧能處小朝廷求活耶。書奏、除名編管昭州。時侍御史鄭剛中諫議

大夫李誼、吏部尙書晏敦復、給事中勾龍如淵、戶部侍郎李彌遜、向子諲、禮部侍郎張九成俱入對、引救檜、迫公議、亦僞爲救公者。弇監廣州都鹽倉、改簽書威武軍判官事。於是寺丞陳剛中以賤賀公曰、屈膝請和、知廟堂禦侮之無策。張瞻論事、喜樞庭經遠之有人。又曰、知無不言、願請上方之劍。不遇故去、聊乘下澤之車。陳坐是、弇知虔州安遠縣死焉。十三年、御史中丞羅汝楫彈公、以奉議郎除名、竄新州。同郡王庭珪以詩贈行、有癡兒不了公家事、男子要爲天下奇之句、爲歐陽識所告、王坐貶辰州。新州太守張棣告公訕上、再竄吉陽軍。時有觀察使某上書乞代公行、不報。張棣擇一牙校游崇者、送公至半途、臨大江、崇拔劍而前、公色不動。徐曰、逮書謂送某至吉陽者賞、爾不愛賞乎。崇笑而止。至朱崖、或諗公以有後命、家人爲慟、公方著書、怡然也。吉陽士多執經受業者、凡經坯冶、



皆爲良士。初吉陽貢士未嘗試禮部、公勉之行。及位于朝、乃請廣西五至禮部者、乞不限年與推恩、自是仕者相踵。聞母曾之喪、一慟幾絕。勺^⑤飲溢米、三日不歡、鬚髮盡白、見者出涕。先是、檜大書丞相趙公鼎參政李公光及公姓名於格天閣、冒進^⑥者爭以公爲梯。監察御史田如鼈獻書乞斬公、檜抵之地。光坐移書於公、再貶儋耳。武岡軍通判方疇以致書議姻、遂下若盧。二十六年、檜卒、公量移衡州。三十一年正月、公與忠獻公偕命自便。時忠獻奔零陵、公自衡造焉、館於讀易堂。忠獻從容謂公曰、秦太師顓柄二十年、成就邦衡一人耳。今上即位、首復公官、除知饒州。召至行在所、即日賜對。上溫顏曰、久聞卿直諫。公首論爲國以禮。又論今日之事在修德以結民心、固吾圉。練兵選將以觀其釁、待其衰。上嘉納。除吏部郎、遷秘書少監。又遷起居郎。論史官失職有四、謂記注不必進呈、使史官

無諱。史官當立於御坐之前、庶幾言動皆得以書。今之史官後殿立而前殿不立、請前後殿皆立。左右奏事請令直前、不必預白閣門、及以有無班次爲拘。許之。自是史職盡復唐制、返祖宗之舊。公請遷都建康、謂漢高入關中、光武守信都。大抵與人鬪、不搯其元、拊其背、未能全勝。今日大勢自淮以北、則天下之亢與背也。建康則搯之拊之之地也。進據建康、下臨中原、此高光興王之計也。況今西北欲歸之人、如漢民之思漢、苟不移蹕、何以繫其心。詔議行幸、言有請紓其期、遂止。隆興元年六月、忠獻張公自建康入奏、圖恢復計。侍御史王十朋力贊之。於是忠獻公督師進討金人。既克宿州、以大將李顯忠欲私其金帛、且與邵宏淵私憤、復敗於虜。上憂甚、十朋亦自劾。上愈怒。公言、近者淮上之衄、蓋天以是厲陛下之志、使動心忍性、增所不能。願益強其志、毋以小衄自沮。蒐乘補卒、期於濟



大業時宿州之師賞罰衡決、公言、宿州之敗、誤國之將厚賂[○]權貴、游說自解、安處善地、誅戮不加、禍亂之漸、間不容髮。願毋忽。兼侍講及國史院編修官。因講禮記進序篇、其略曰、君以禮爲重、禮以分爲重、分以名爲重、名以器爲重。願陛下辨其分、謹其名、守其器、勿輕假人。七月、上以旱蝗、星變詔問闕政、公請勿徼福于佛老之教、而躬行周宣憂旱之誠。戒監司守令、有貪殘者必罰、是應天以實。公因論納諫曰、今在廷之士以箝默爲賢、容悅爲忠。道路相傳、近日臺諫論事、朝廷謂爲賣直、臣未知信否。夫賣直之言、唐德宗之言也。德宗猜忌、謂姜公輔爲賣直、此言一出、忠臣結舌、馴致興元之變、所謂一言喪邦者。願陛下以德宗爲戒、以太祖皇帝欲拜昌言爲法。上曰、非卿不聞此。九月、金人求更成、大臣欲從之、公奏曰、虜知陛下銳意興復、移書請和、非甘言誘我、即詭計緩我爾。願鑑前車之

覆、益修守備、益張吾軍。上曰、朕有二說、斷然不移。一則中原歸附之人決不可遣、二則夷夏名分決不可亂。又曰、邊事倚張魏公。對曰、陛下至誠如此、何憂醜虜。願持之以不懈、絕口不言和字。上曰、卿忠直如此、朕甚喜。兼權中書舍人、公遜于右史馬騏。上曰、無以易卿。又曰、恐駁事不勝任。上曰、貴當理。遂就職。進兼同修國史。有旨、以中人李綽等嘗典發軍書無誤、各進官一列、公不奉詔。綽等泣訴。上曰、胡銓不肯。經筵講禮記、至愛而知其惡、憎而知其善、公曰、愛而知其惡、必去之勿疑。憎而知其善、必任之勿貳。上稱善。壽聖明慈皇后改稱教旨爲聖旨、公言、易曰大哉乾元、至哉坤元。蓋天地之位所不可並、故以大哉至哉爲別。陛下雖奉親盡孝、而光堯與壽聖難於並稱聖旨。上嘉納、謂樞密洪遵曰、奉親之過、朕當自受。張栻召對、賜三品服。公言、君子愛人以德、今賜棊服章、非愛之以德也。

其父浚決不肯使之輕受、拭亦有守、決不肯妄受。恐或議浚、非全浚也。十一月、上以和戎之利病、遣使之可否、禮文之後先、土疆之取予^⑧。下廷臣雜議。公議曰、國家與金人講解、覆轍亦可睹矣。京都失守、自耿南仲主和、二聖播遷、自何^⑨。主和維揚失守、自汪伯彥、黃潛善主和。完顏亮之變、自秦檜主和。國家罹戎狄之禍、何嘗不以和哉。議者乃曰、姑與之和、而陰爲之備、外雖和而內不忘戰、此又向來權臣誤國之言也。一溺於和、則上下偷生、將士解體、終身不能自振、尙安能戰乎。大臣見之、相顧失色。於是益忌公、且欲奪魏公兵柄。公復沮其議。除宗正少卿。公請補外、不允。嘗遞宿玉堂、上召問曰、虜人汲汲欲和、聞其勢窘甚。對曰、近有自淮甸來者云、虜人聞陛下力任張浚、所以汲汲欲和。臣願陛下委任勿疑、則恢復可必。上曰、善。公又申前請。上曰、卿久在瘴鄉、而略無瘴色、天祐直諫。卿未

宜去。兼國子祭酒。因見公言、往年睿旨欲移蹕建康、不可但已。上曰、澶淵之役、當時有勸幸蜀及江南者、惟寇萊公決策。公曰、今張魏公、陛下之萊公也。願早定計。上曰、善。卿直諫四海莫不聞、不可言去、且留經筵、事無大小皆以告朕。公言、晉開運之末、有陳友者殺李璘之父。國初璘遇友於途、手殺之而自言。鞠之得實、太祖壯而釋之。臣願陛下堅復讎之志、以不忘太祖之訓。上在講筵、謂公曰、卿之學術、士所甚服。因及比日、文士如蘇軾、黃庭堅者、誰歟。對曰、未見其人。詩人如張耒、陳師道者、誰歟。對曰、太上時如陳與義、呂本中、皆宗師道者。上曰、如韓駒、徐俯皆有詩名、卿可廣訪其人。退而薦王庭珪、朱熹、楊萬里、周必正、弟鎬、猶子昌齡籍云。除兵部侍郎。公言、受降古所難、六朝七得河南之地、不旋踵而皆失。在梁武時、侯景以河南來奔、未幾而陷臺城。在宣政間、郭藥師自燕雲來降、未幾



而爲中國患。今虜中三大將內附、高其爵祿、優其部曲、以繫中原之心、善矣。然處之近地、萬一包藏禍心、或爲內應、後將噬臍。願勿任以兵柄、遷其衆於湖廣、勸之耕種、以絕後患。時有國學生獻書闕下、乞用福國陳公康伯及公爲腹心者七十有七人。二年八月、上以災異數見、避殿減膳、詔廷臣各陳闕政及急務。公言、禹有九年之水、而國無捐瘠、陳闕政及急務。公言、禹有九年之水、而國無捐瘠、備先具也。今數路水潦、曾不踰時、而民已流殍、無備甚矣。願詔遭水之處、博施振卹、使民被實惠、無至流徙、此先務也。陛下又令條陳闕失、臣謂今之闕失、孰有大於和議者。因極陳和議可痛哭者十、上太息。公言、自靖康至今、凡四十年、虜未嘗不由詭道、而我終不悟也。竊聞道路之言、虜緩我以和、而實潛師以伺我。或言多作戈船、由海道以進。或言實粟塞下、由間道以來。願陛下堅守和、不可成之詔、力修政事、十年生聚、十年教訓、如越之圖吳、

則社稷幸甚。進兼侍讀、因進讀寶訓至食訖習射、奏曰、四夷易以兵制、難以信結、願陛下謹守此言。上曰、文武豈可偏廢。又讀眞宗顧李宗諤曰、聞卿至孝、能保宗族、朕守二聖基業、亦猶卿之守門戶。公奏曰、唐柳玭云、積累如登天、覆墜如燎毛、祖宗基業、誠不易守。上稱善。公言、側聞虜人慢書、欲議書禮、有所增損、議者謂末節不必較。臣竊以爲議者可斬也。夫四郊多壘、卿大夫辱之。楚子問鼎、義士耻之。獻納二字、富弼以死爭之。今醜虜橫行、與多壘孰辱。國號大小、與鼎輕重孰多。獻納二字、與再拜孰重。臣子爭欲君父屈己從之、是多壘不足辱、問鼎不足耻、獻納不必爭也。臣願絕和議、以鼓戰士。左氏謂無勇婦人、臣謂今日舉朝之士皆婦人也。十一月、以邊鄙有釁、詔改卜郊、用來年正陽之月大雩之辰、公稽參禮經及國朝故事、陳不可者十。宰相湯思退、參政王之望等堅主和議、遂罷

張魏公兵柄公又力爭之。於是大臣皆不悅。遂除措置浙西淮東海道使。詔趣行。以二日爲期。公即辭。行曰。臣願陛下先絕和議。上曰。要盡其在我者。時金寇及境。號八十萬。聲動輦轂下。自維揚海陵連數郡望風棄城。高郵太守陳敏與虜相距於射陽。湖水軍帥李寶屯江陰。詔寶條陳舟師及扼守要害白海道使。公檄寶發兵。援敏。寶不行。公奏曰。臣受詔令范榮備淮。李寶備江。緩急則更相援。今寶逗留違詔。坐視敏之孤。臣恐射陽失守。則大勢去矣。上以命寶。公又移書切責之。寶乃發兵渡淮。與敏相犄角。虜一夕退。時天大雪。河冰皆合。舟車不能進。公先持鐵槌槌冰。士皆奮。尋詔罷兵。而時相亦斥死。除提舉江州太平興國宮。加集英殿修撰知漳州。改泉州。入見。言郡邑害民之大者三。上曰。每思卿直諫。朕恢復之志已決。今虜中土木不息。旱乾相仍。機不可失。對曰。陛下嘗許臣以誓不

與虜和。何爲中變。又謂。臣決移蹕建康。何爲中輟。上曰。以民之不易。少須。又曰。在廷大半腐儒。卿不可去。一日秘書郎張淵對選德殿。上因數不詭隨者。云。猶有胡銓一人在。除在京宮觀兼侍講。公論前古未有不由講學而興滅學而亡。精兵百萬。不如道德之威。被練三千。不敵忠信之冑。陛下之意端在於此。上稱善。除權工部侍郎。以修史書成。轉承議郎。因見。上曰。屬已得契丹要領。觀朕施設。公言。少康以一旅復禹蹟。今陛下富有四海。非特一旅。而即位九年。復禹之效尙未。赫然。又言。四方多水旱。廼者乙酉之歲。脩門之外斗米易一婦女。小兒半之。左右不以告。此謀國者之過也。宜令有司速爲先備。尋即。工部爲真。公辭焉。詔曰。汲黯在漢。謀寢淮南。隨會仕晉。盜奔秦境。卿其奚辭。賜對衣金帶。封廬陵縣開國男。食邑三百戶。今參政周公必大視草。以御札歸公。今藏。于家。公嘗燕見。言。初



元經筵之臣七人、惟臣獨在。臣老矣、願乞身歸田里。上曰、卿忠孝有物護持、且留觀朕恢復。屬立皇太子、公請飭太子賓僚朝夕勸講。上曰、三代長且久者、由輔導太子得人所致。末世國祚不永、或七八年、或五六年、或四三年、皆由輔導不得其所致。對曰、誠如聖訓。公力乞致仕、除寶文閣待制、與外祠。既出都門、有旨復留、改佑神觀兼侍讀。公辭不得請、於經筵講罷、復申前請。上曰、卿大節可嘉、朕不忍令卿去。因論納諫、公曰、從諫人主之高致、陛下自登大位、虛懷受言、中外翕然、咸謂恢復之期指日可冀。然靡不有初、鮮克有終。光武之殺韓歆、文皇之殺劉洎、終之實難。詔舉堪刑獄錢穀及有智略吏能各二人、公以張敦實、昌永、周必達、李發、劉之柄應書。言者謂舉李發、劉之柄非是、公坐貶秩二等。三求去、上不得已、從之。除敷文閣直學士、與外祠。辭行、言於上曰、願陛下規恢遠圖、任賢

黜邪、理財訓兵、撫綏恤孤、然後布告中外、必報國讎、必歸陵寢、必復故疆、以副太上付託。上曰、朕志也。又問、卿今何歸。對曰、廬陵。又賜通天犀帶。又曰、臣在嶺海無所用心、妄意經學三十年、粗能訓傳。上曰、卿可進來。既歸、詔趣之、遂表進易、春秋、周禮、禮記解、命藏之秘書省。復奉議郎、以郊恩進封開國子、食益三百戶。又復承議郎、除龍圖閣學士、提舉江州太平興國宮。制有身蹈東海、獨仲連不欲帝秦。名重泰山、微相如何以強趙之語。光堯天壽七十慶壽、湛恩轉朝奉郎、進封開國伯、益邑三百戶。公自收科至是、未嘗以伐閱自言增秩也。詔吏部舉行所宜得之官、特畀四秩、轉朝散大夫、除提舉隆興府玉隆萬壽宮、復以加恩進封郡侯、加食邑三百戶。公復乞致仕、優詔不許。除端明殿學士。明堂合祭禮成、復增邑戶三百、實封百戶。淳熙六年十一月、召赴行在所、公辭焉。復力乞致仕、不許。

公遂引疾轉朝議大夫、提舉江州太平興國宮。遂稱篤。且極陳時病五事。上察公志不可奪。乃加資政殿學士致仕。明年夏五月、疾革。庚辰薨。不及家事。惟命諸子口授遺表。有死爲厲鬼以殺賊_③之語。表聞。特贈通議大夫。年七十有九。諸孤卜以是歲冬十月丙午葬于廬陵縣之儒行鄉松山原。祖承務府君塋之右。公名德峻極。虜絕敬畏。丞相洪公适述其先忠宣公虜中事云。皇太后以書歸曰。胡銓封事此有之。知中國有人。益生懼心。公於利不苟取。初。欽宗旣祥及冊隆興皇后。公以職將事。皆賜金帛。再辭。必得請乃已。使海道曰。賜金十鎰。旣歸。或甚之以理生業者。悉以賙昏友之貧。其於君賜尙爾。故沒齒先疇不益一畝_④。遂於禮學冠昏喪祭。式禮迂叟。佛老梵唄。焚紙爲錢。一切剗礮。四仲享先。設醴分膳。坐客百人。州閭耆老。不遺_⑤。賤貧。挹髮必躬。投壺賦詩。雜以琴奕。往往申旦。睦族篤親。

慶予必詣。寒暑雨風。不爲回車。居新興時。嘗名其室曰澹。蓋取賈生澹若深淵之意。晚自號澹菴老人云。公居無事時。下心拱手。言恐傷人。獨論國事。勁氣正色。貫日襲月。奮以直前。不怵不惻。不疾不式。大節揭揭。細行斬斬。動容出辭。見者起敬。長身玉立。望之山如。即之春如。其爲文章。駿奔軋忽。幽紛膠輶。隱帙奇字。旁摭遠擷。初佔之者。口呿語難。徐綜其緯。理順脈屬。似肆實莊。若險實夷。韓碑柳騷。媿高麗沉。中興以來。作者寡二。筆畫真隸。上規顏蔡。鐵屈石出。肖其作人。飯不重肉。一製十稔。而豆區饑民。棺斂道殣。退省其橐。屢空不贏。惟太中公。不貨於畚。繫德之植。公實儀之。蓬山旣逝。公字其子。歲在癸巳。瀟以公任。孝友惟抵。忠義惟榦。後茂碩大。豈一朝夕。公有澹菴文集一百卷。周易拾遺十卷。書解四卷。春秋集善三十卷。周官解十二卷。禮記解三十卷。經筵二禮講義一卷。奏議三卷。

學禮編^②三卷詩話一卷活國本草三卷娶劉氏贈

淑人先公卒中散大夫荆湖南路提點刑獄敏才之女子男五人泳承務郎監江東淮西總領軍馬錢糧所太平惠民局兼行宮雜賣場淳熙二年卒于官參政周公哀而銘之。解承事郎監潭州南岳廟。浹、瀟皆承務郎。冲未命。女五人。適西昌嚴萬全、福唐葉昌嗣、上饒方自厚、承務郎贛州興國縣丞王宗孟、將仕郎王藏。孫男六人、搆、渠、程、杙、机、楷。女四人、長曰相孫、夭、餘皆幼。萬里與公同郡、且嘗從學。公將竈萬里以繫官嶺表、不得築室于場。解走書二千里、以公猶子承務郎致仕昌齡所述公之言、行詭萬里論次、將乞銘於參政周公。萬里敬慟哭而書之。謹狀。淳熙七年九月日、門人朝奉郎、提舉廣南東路常平茶鹽公事楊萬里狀。

楊萬里撰 《誠齋集》卷一一八

資政殿學士贈通奉大夫胡忠簡公神道

碑

武王一戎衣而定天下、應天順人之舉也、義士猶或非之、孔孟奚取焉。爲萬世計也。紹興和戎、高皇有不得已者矣。兩宮未歸、母后春秋已高、故與大臣決策從權。中外議論雖洶洶、顧無敢直陳於上者。獨樞密院編修官胡公銓上書數百言、援大義而伸之。大略謂、王倫誘致金使、欲劉豫我。秦檜腹心大臣、導陛下爲石晉。孫近傳會、遂參政事。願竿三人頭、羈留金使、興問罪之師。時八年十一月也。辛亥有旨、銓書凶悖劫持、其削籍流昭州、仍降詔布告中外。是日、檜近惶恐待罪。明日、又請收責命、不許、則乞從末減。十二月、王倫亦再上章自劾、而六曹長貳、給舍、臺諫、自晏景初而下多有救解者。乃改監廣州都鹽倉。明年正月、宰執復奏、銓書專詆臣等、前和議未諧、不敢固請以疑羣心。今議已定、宜稍甄叙。乙酉、遂改簽書威武軍節度判官



藏

廳公事十一年六月之官。十二年七月、諫議大夫羅汝楫劾公益倡前說、用欺羣聽、復除其名、勒停編管新州。十八年十一月、郡守張棣奏公與客唱酬、毀謗怨望、移吉陽軍。時大臣專國柄、小人觀望迎合、必欲置公死地、賴天子獨保全之。二十五年冬、秦丞相薨、乃得歸。某竊惟人臣犯顏逆耳、上撓人主之怒、下爲權臣切齒、或誅或斥、何可勝數。未有九重特申詔諭、兩府矯情屢請、禁近引誼救止、曾不四旬、謫命三改、如朝廷此舉之盛者。當是時、一胡編修名震天下、勇者服、怯者奮。朝士陳剛中以言餞行、至云、屈膝請和、廟堂無策。張膽論事、樞庭有人。貶令安遠之死靡憾。鄉人王廷珪嘗賦姦諛膽落之詩、竄徙夜郎、反以爲榮。下至武夫悍卒、遐方裔土、莫不傳誦其書、樂道其姓氏、爭願識面。雖北庭亦因是知中國之不可輕。蓋天理所存、自公達之。人心所憤、自公發之。扶世垂教、非聖朝之

伯夷耶。孔孟如在其大書特書也必矣。胡氏本金陵人、五季徙廬陵。公字邦衡。曾祖連、妣康氏、劉氏。祖愷、贈承務郎。妣孺人張氏。父載、有氣節、一試有司不中、即棄去、贈大中大夫。母陳氏、張氏所生、母曾氏、俱贈淑人。公幼不羣、強記博覽、年二十試大學、文不加點。建炎二年廷對行在所、考官初以冠多士、或畏其切直、置第五、授左文林郎、撫州軍事判官。未上、隆祐太后避狄上贛、狄師隨之。公以發運司檄攝本州幕官、率鄉丁佐官軍扞止、第賞循承直郎、就權判官。尋丁父憂、服除、與兄鑄從鄉先生蕭楚講春秋學、無仕進意。紹興五年、張忠獻公都督諸路軍馬、辟湖北常平茶鹽司幹辦公事、以親嫌、易河南提點刑獄司、俱未行、召赴都堂審察。七年、兵部尙書呂祉以賢良方正薦、四月賜對、改左通直郎、留爲樞屬。後二年赴福州、纔一年踰嶠。又六年過海、守棣。驅公使步往、又諭送吏侵公。公



不爲動、吏無所肆其毒。旣抵珠崖、著書怡然、不以死生介意。士執經從學、多可觀、預貢者相繼赴南宮。其後公還朝、復請五至省者、許勿限年推恩、自是海島頗有仕宦者。閱七年、始量移衡州。又數年、乃許自便。三十二年、壽皇即位、復左奉議郎、知饒州。十二月入對、乞修德結民心、練兵觀敵釁。上曰、久聞卿直諒、拜吏部尙。左郎官。隆興元年正月、遷秘書少監。四月、擢起居郎、兼侍講、國史編修官。論記注不應進稿、前後殿皆當侍立、遇直前毋白閣門、毋隔班次。又請移都金陵。時督府北伐克宿州、大將李顯忠、邵宏淵敗歸、勸上毋以小衄自沮。七年、旱蝗星變、求直言。公請勿徼福佛老、躬行周宣王故事、罰監司守令之貪殘者。其論納諫曰、今廷臣以箝默爲賢、容悅爲忠、反謂臺諫論事爲賣直、此德宗疑姜公輔之語也。馴致興元之幸、所謂一言喪邦者。上曰、非卿不聞此。金人再求和、公曰、彼

知陛下銳意恢復、故以甘言詭計款我、願絕口不言和字。上嘆其忠直。侍郎王之望、侍御史尹穡皆主和、排張忠獻公、公廷責之、聞者稱快。兼權中書舍人、特升同修國史。公雖與忠獻善、及其子枋賜金紫、則謂不當如待勳臣子、繳奏之。太上皇后改稱教旨爲聖旨、公奏、大哉乾元、至哉坤元、今乃一之、將如太上皇帝何。上曰、奉親之過、朕當自受。十一月、詔以和戎利病、遣使可否、禮文後先、土疆取予、大要詢禁近。或勸公從衆、公奮曰、古有斷頭將軍、無降將軍。乃上奏曰、京師失守、自耿南仲主和、靖康播遷、自何桌主和、維揚失守、自汪伯彥、黃潛善主和、完顏亮之變、自秦檜主和。議者乃曰、外雖和、內不忘戰。此又向來權臣誤國之言也。一溺於和、將士解體、尙能戰乎。執政讀之失色。會中貴人推金字牌賞越舊制、公索成法將論之。俄與宗正少卿何備兩易其官、公未出省、吏白新舍人至、公

叱曰、命汝取成法、何遲也。吏懼、探懷出之。公亟具奏、乃緘印上馬去。上尋悟中傷之由、請外、弗聽。獨以侍講夜對。上曰、金急欲和、其勢甚蹙。公乞力任張浚、恢復可必、因再求去。上曰、卿直諫、四海所知、且留經筵、事無大小皆以告朕。二年二月、兼權國子祭酒。六月、除權兵部侍郎。八月、上以災異避殿減膳、詔廷臣言闕政急務。公以賑恤爲先務、議和爲缺失。於是太學生七十七人同上書、乞再相陳康伯、用胡某爲腹心。進兼侍讀。金人議國書未合、或請末節不必較。公曰、富弼以死爭獻納二字、今欲君父卑辭下敵國、愧弼多矣。上遽其言。十一月、以邊事改卜郊。公言不可者十。又大臣主和益堅、公爭之力。以本職措置浙西、淮東海道、命下即趣行。時金寇深入、號八十萬、淮東郡縣望風退避。高郵守陳敏拒之射陽湖、而大將李寶駐師江陰、不肯援敏。公檄寶出師。寶先嘗取密詔爲自安計、公

劾奏曰、臣受詔令范榮備淮、李寶備江、緩急更相援。今寶視敏弗救、若射陽失守、大事去矣。寶懼、與敏犄角退金兵。時大雪河凍、公親勵冰濟舟師、人以用命。初、公與尹穡同出使、穡使浙東、置家於京。公使江淮、蓋受敵之地、攜孥北行、實安衆心。言者乃併指爲罪。閏十一月、與穡俱罷。久之、提舉江州太平興國宮。乾道五年冬、上語諫臣單時、思得節誼之士。時奏公中興初率鄉兵遏金事。上雅知公、陳、虞二丞相復薦之、遂除集英殿修撰、知漳州。未赴。六年春、改泉州、趣令奏事。上曰、每思卿直諫、今朕恢復之志已決。公曰、陛下嘗欲移蹕金陵、何爲中輟。上曰、以民之不易、少需耳。留爲在京宮觀兼侍講。閏五月、除權工部侍郎、論前修史功、進官一等。十一月、眞拜侍郎。公言、初元經筵七人、老臣獨在、願乞身歸田里。上曰、卿忠孝、神物護持、且留觀。朕恢復、同載大梁。或忌公敢言、摘細故雜他朝士



併撼公、冀不得獨留。公自以年踰七十、遂求致仕。詔除寶文閣待制、在外宮觀。七年三月也。未數日、特留提舉祐神觀、侍講如故。上曰、卿大節可嘉、朕不忍令卿去。未幾、受詔舉堪任刑獄錢穀及智略吏能各二人。言者又謂公所舉非其人、貶秩二等。公知不容、力求退。進敷文閣直學士、再提舉興國宮、特許陞辭。公奏、願陛下任賢斥邪、理財訓兵、逮鰥恤孤、必報國仇、必歸陵寢、必復故疆。上曰、朕志也。又問、卿今何歸。公曰、臣向在嶺海、嘗訓傳諸經、今歸廬陵、將成此書。特賜通天犀帶以寵之。公既歸、上趣所進書、遂上易、春秋、二禮解、詔藏秘書省、尋復原官。淳熙二年、上思公不置、諭大臣令進職。初擬稍遷、上特升十等、遂爲龍圖閣學士。前此未有也。太上慶七十、獨公以前朝龍飛甲科遷朝奉郎。祠滿、又納祿。上令因任、近臣有言、秦檜時臣僚被貶斥者、後皆還其所歷歲月、惟胡某爲議郎、將

四十年、未嘗自列。詔特予四官、遂轉朝散大夫。三年冬、三納祿、優詔不允。四年秋、秩滿、特命提舉隆興府玉隆萬壽宮。五年夏、上以公連歲納祿、舉大梁同載之言、諭大臣使留公、仍進端明殿學士。六年冬、三省復奏公祠滿。上曰、銓雖老不衰。昨去國、欲他日從朕中原。朕嘗壯其言、可召歸、處以經筵。公引疾力辭。因陳時病五事、且曰、劉珙、張栻將死、其言甚忠。李椿、鄭鑑之去國、論議皆有補。陛下盍念之。顧何以老臣爲。上知公不能來。七年春、超轉朝議大夫、再食興國宮祿。公稱疾篤。四月、加資政殿學士致仕。五月庚辰薨。遺表猶欲爲厲鬼殺賊。贈通議大夫、官其後三人。享年七十有九。初封廬陵縣開國男、加至本郡開國侯、食邑自三百戶積至一千五百戶、實封百戶。是年冬十月丙午、葬於縣之儒行鄉松山原祖塋之右、以子升朝。遇郊恩、贈通奉大夫。娶劉氏、中散大夫、湖南提點刑獄事。



儒藏

宋儒碑傳集 卷一〇六

卷、書解四卷、春秋集善三十卷、周官解十二卷、禮記解三十卷、經筵二禮講義一卷、奏議三卷、學禮編三卷、詩話二卷、活國本草三卷。自公之歿，其子以門人今秘書監楊公萬里所狀行實來求銘。某自少知慕公名德，隆興初先後入兩省，中間郊居從游幾十年，已復遞宿玉堂，凡公文行皆親薰而炙之，銘其敢辭。獨念公官品雖未應謚，而名節如此，顧在隱德丘園之下耶。幸從執政之後，當任斯責，暨尸宰事，始奉明詔謚公忠簡，而郡庠又以公配祠六一先生，然後哀榮兩備，銘公有辭矣。銘曰：河入中國，地卑而傾。屹立砥柱，其勢乃分。江會三峽，湍束於隘。截然灩澦，其流乃殺。天方驕金，帝維念親。事之至難，有君無臣。斷斷滿朝，其瀾孰障。言言胡公，正論獨抗。鼎鑊刀鋸，視之猶無。嶺海崎嶇，不曰夷途。相欲殺公，彼儉趨和。天子仁聖，公卒無禍。晚儀王朝，素志弗移。不會於梁，則繫乎時。富貴

壽考百年之頃。孤忠大節，千古惟永。懦夫以立，清哉伯夷。孔孟亟稱公乎得師。祠在學校，傳在國史。刻詩新阡，與宋無止。

周必大撰 《省齋文稿》卷三〇

范浚小傳

范浚，字茂明，婺之蘭谿人。隱居香溪，世號香溪先生。初不知從何學，其學甚正。近世言浙學者多尙事功，浚獨有志聖賢之心學，無少外慕，屢辭徵辟不就。所著文辭多本諸經，而參諸子史，其考易、書、春秋皆有傳註，以發前儒之所未發。於時家居授徒至數百人，吾鄉亦有從其遊者。熹嘗屢造其門而不獲見，近始得學行之詳於先友呂伯恭、庸述小傳，以聞四方學者。

朱熹撰 四部叢刊本《范香溪文集》卷首

朝奉大夫直秘閣主管建寧府武夷山冲佑觀傅公行狀

本貫孟州濟源縣。曾祖君俞、故任通直郎、知京兆府奉天縣事、贈正奉大夫。曾祖妣張氏、贈碩人。祖裕之、故任朝議大夫、主管南京鴻慶宮、濟源縣開國男、食邑三百戶。祖妣錢氏、封恭人。父察、故任朝散郎、尚書吏部員外郎、贈徽猷閣待制、累贈少師、諡忠肅。妣趙氏、封清源郡太夫人、贈秦國夫人。公諱自得、字安道、其先鄆州人。自曾伯祖獻簡公以清直仁勇事仁宗、英宗、神宗、歷三朝、皆以諫諍有聲。在哲宗時、遂聞國政。蓋始築草堂於濟源之上而家焉。至忠肅公、遭靖康之難、實以忠義死國事、其事皆具國史。公幼穎悟、讀書不數過輒成誦。有至性、生十年而忠肅公薨、哀號思慕若成人。事太夫人愛敬飭備、一舉動唯恐失其意。遭亂離、轉側兵間、遇父友故參知政事陳公與義於嶺右、陳公奇愛之、坐之膝、撫其頂曰、長必以文名天下。因自誦其詩之傑句以詔之。公時雖幼、已悉領解。年十

四、賦玉界尺詩、語意警拔。故參知政事李公邴大驚異之、因許歸以女。既乃定居于泉州、家貧甚、夜燃薪自照、與兄弟讀書或至達旦。遂博通六經諸史百家之言、下筆爲文輒數千言。初、朝廷以忠肅公死事錄其孤、公得補承務郎、三監潭州南嶽廟、乃爲福建路提點刑獄司幹辦公事。使者李公公懋性剛介、好面折僚吏、獨屈意待公。欲試以事、因悉以訟牒委焉。間相見、則摘其事以問。公具條委折、及其姓名爵里、一無所遺。李公喜甚、自是一司之事無不取決於公。書奏出、公手輒報可、他人爲之則多寢不下。李公行部至漳州、會州兵擒漳浦賊華齊及其黨與以獻、而安撫司以便宜指揮檄憲司悉斬之。李公將從之、公爭不可、且曰、便宜指揮安撫司受之朝廷、本司無所預。今乃承之於安撫司、可乎。李公悟、命悉械繫諸縣分鞠之。獄成、以法誅其首數人、餘悉以畀軍中、蓋全活幾百人。已



而丐閑得主管台州崇道觀。秩滿通判漳州事。太守劉公才邵始以公年少未甚相知。及見其處事精明、馭吏嚴整、而文詞敏妙、又非流輩所及、乃大歎服。郡事非公不決。間則相與徜徉以文字相娛樂。每語人曰、自傳君至、吾始知有爲郡之樂。時山獠跳踉未已、而太守與統兵官陳敏不相能、餉或不繼、軍幾變。公調護其間甚力、且爲移書轉運判官、得錢二萬緡以贍其軍。敏及軍士皆感泣思奮、群盜竟平。及公代去、敏語其下曰、傳公成就吾軍如此、而未嘗以一事干吾軍、政可謂眞清矣。故聞公喪偶、欲遣其愛妾挾重貲來奉公、公亦竟不受也。漳浦尉士有申和者、以事爲郡所逮。縣忽告有盜入竟、請兵爲援。公笑曰、是必非實、特爲申和地耳。已而果然。陳敏亦爲和請、公弗從、竟捕寘于法。而後以畀軍中。後十餘歲、公自融徙潮、行荒山大雨中、忽有以卮酒獻者。問其姓名、則申和也。公愕

然詰其所以來之意、則曰、和曰者罪當誅、公用法固無所私、然和獨抵罪而家獲全、是以感恩而來耳。公爲笑而飲之。臨漳公帑歲時例外致饋守貳甚厚、公獨不以一錢入門、悉儲於外、以給賓客之費。比去、計所不取蓋餘千緡。通判泉州事。公居泉久、及貳郡事、洗手奉公、無毫髮私。且熟知民俗利病、部使者多委以事。轉運司嘗欲榷郡酒酤、公格弗下。吏白恐獲罪。公曰、泉人中產之家仰是以給者十室而五、是決不可行。若輩徒欲行文書、因取賂於酒家耳。乃私以書條利害于使者、事竟寢。有賈胡建層樓於郡庠之前、士子以爲病、言之郡。賈貲鉅萬、上下俱受賂、莫肯誰何。乃羣訴于部使者、請以屬公。使者爲下其書。公曰、是化外人、法不當城居。立戒兵官即日撤之。而後以當撤報。使者亦不說。然以公理直、不敢問也。受代造朝、民爭遮道以送。有金戶齊氏、探其懷出金十兩以獻。公曰、某

爲金戶、郡官買金無藝、且多不償直。獨公未嘗市分星、爲賜厚矣。此乃丹藥所化、爲杯器食飲當益人、故敢以壽公、而非敢以爲獻也。公笑卻之。差知興化軍事。興化素號難治、前守聽訟或繼以燭、事猶有不決者。公剖決如流、廷無滯訟、發姦摘伏、猾吏束手。日未午、棠陰無一迹矣。於是乃以暇日延禮邦人士大夫之賢者、相與從容賦詩飲酒爲樂、而郡以大治。初、秦丞相檜以公忠臣子、年少能自力學問、有文詞、通吏事、遇之甚厚。然亦疑其剛果負氣、終不爲己用、故雖使之連佐兩郡、然皆銓格所當得。召試博學宏辭科、又已奏名而故黜之。及泉代歸、乃間語公曰、故事三丞得通用蔭補人、而丞宗正者例以玉牒奏篇得爲郎。況公之文今從臣中名能文者所不及、顧公太剛耳。盍亦思少自貶乎。公默喻其意、然以太夫人春秋高、且樂居閩中、不肯遠適、乃力請便郡歸養。秦丞相以是始怒、

而其黨又或陰中公、以爲有顧望持兩端意。以故是時公資序已應典州、而僅得莆陽軍壘以歸。然公亦既朝辭而行有日矣、會通判衢州汪召錫者告前知泉州趙令衿誹謗、且有及丞相語、臺諫徐恠等交章論奏、事下廷尉。秦丞相因以上旨命公體究令衿在泉時納賄事。公以嘗同官辭、丞相不可。是時丞相權震天下、一忤其意、家立碎。公念前已有小隙、今又力辭、必重得禍、貽太夫人憂、意不能不少回惑、乃不得已奉命以行。至泉按事、十得一二、即不復窮竟。然猶慮不免爲異時之累、則見故樞密黃公祖舜而問焉。黃公曰、事端幸不自我加之以恕可也。公然其計、既上其事、又爲請得毋更置獄。會廷尉獄成、令衿已坐譴、奏上、不過追納所受金而已。方事作時、戶部曹泳、刑部韓仲通實主之、兩曹符檄日四五至、督趣甚峻。已而秦丞相死、泳被逐、仲通恐禍及己、乃以體究事劾公。朝廷



亦知非公首事。姑下公置對。而仲通章再上。遂罷公郡事。公在郡不半歲。罷去之日。父老邀遮涕泣。其賢士大夫有追路越境。持公慟哭而別者。後兩年。諫官挾舊怨。復以前事爲言。遂奪公官。徙融州爲民。公念前日本以愛親故。不敢力辭。體究事。今乃反爲親憂。痛自咎責。聞命即卻酒肉。屏媵御。獨與一浮圖人偕行。至融。杜門讀書。益大覃思於文章。融人皆敬愛之。而中州人士官其土者亦皆樂從公游。以文字求指教。蓋居融四年如一日。泊然無復有一豪軒冕意。特一念親闈在遠。不獲日夕左右。則涕泣竟日。會黃公給事東省。知公前事。首末力言於故丞相魯國陳文恭公。魯公亦素知公。遂以上聞。得內徙潮州。未幾。聽自便。主上登極。復故官右通直郎。時魯公猶當國。欲寢用公。乃先除主管崇道觀。以言者罷。乾道初元。始復得申前命。未幾。故樞密林公安宅又力薦於上。且具白公前

被枉狀。除知漳州。又爲言者所持。事竟中寢。未數月。今少傅福國陳公入爲吏部尙書。雅知公之爲人。則與侍從官數人露章薦公事。親孝。居官廉。博學能文。興化之政。庭無留訟。而所坐初非其罪。遂再除知興化軍。而陳公章中語。人以爲無一字不實也。陛辭。論尉利捕盜之賞。妄執平民。有至論死而不能自明者。語未竟。上遽曰。今之儒者。例以不殺爲仁。然殺人者死。公徐對曰。臯陶稱大舜之德曰。與其殺不辜。寧失不經。殺人者固應死。而不辜者豈可殺。上意亦悟。即連稱曰。不辜則不可。不辜則不可。公退。以語宰相。時朝廷方議重強盜之法。以公言而止。公前治興化有惠愛。去之十有四年。而再至。且復奉安輿以來。閩郡之民垂髻戴白。爭迎車下。歡呼之聲滿道。公治郡如前。時郡有猾民。素以挾持郡縣爲事者數輩。前公未至。盡挈其家以遯。公條教素信於民。不動聲色。而郡復大治。民

李氏嘗寓白金於其族兄已而誣以盜獄更數政不決。公明其誣且判曰銀當羽化既慚長者之風金或誤持又愧同舍之誼聞者感歎悚服且傳誦其語以爲無愧於唐人甲乙之判李氏感泣會太夫人有疾供佛燃燈以禱既而太夫人竟不起郡縣賻金餘千緡公辭曰家雖貧幸足以葬豈可以此污吾親皆卻弗受而父老犇走闕下以公治狀白于朝者數十百人中書爲書于籍公性至孝以奉太夫人故仕宦未嘗出閩中太夫人小有疾則憂形于色在漳時官舍有池亭日奉太夫人飲焉忽有珍禽彩羽數十容與水上太夫人甚愛之一旦忽飛去太夫人不樂爲不飲者數日公懼與其室共禱于神明日乃復奉太夫人飲池上則禽亦皆復來集矣比公去乃已竟不知其所自來亦莫有能名之者時以爲孝誠所感云至是服喪毀瘠甚免喪言及輒涕下初造朝知識見之無不驚愕

再除知漳州奏事稱旨留爲吏部郎中天官素號劇繁侍右尤甚吏舞文爲姦爲郎者例不可否事公既入即召令史而下語之曰吾久諳州郡利病於省曹事體初不熟今幸蒙恩得備郎選亦將以治州郡者治之耳吏懾伏不敢欺然公素以吏事自喜而銓曹守格法無所施爲遂請于朝願竭力外官上喜其意除直秘閣福建路轉運副使陛辭玉音褒諭且云素知卿有風力閩中多賊吏故命卿往行召用卿矣公即奏治道去泰甚閩中去朝廷遠吏不知奉法然取其甚者二人治之亦足以厲其餘上首肯之時閩部上四郡行鈔鹽法歲入悉輸大農漕計爲空而州縣窘匱尤甚吏兵之給弗供廩廩然有朝夕憂公奉命疾馳至部夙夜詢究利病所在而參伍其說大抵皆以爲官不鬻鹽則無以爲歲計然縱州縣一切科之於民則民必大病獨一二近鹽之鄉若非籍戶定數使民必



鬻於官、則私販公行、官鬻不售、豪強得以倚法幸免、而貧弱顧獨受弊。於是乃使縣各以地遠近、利病所宜爲法而奏行之、且寬其宿負、貸以本錢、蠲增鹽錢數十萬緡、州縣之力以寬、而公又爲之撙節用度、一毫不妄取予、漕計亦遂饒足。泉州兩稅外、復科宗子米、歲歲增廣、民不堪命。郡太守若周公葵、王公十朋皆嘗請罷之、弗果行。公力以爲言、得旨、戶部給度牒轉運司、移他郡錢俾之和糴、而禁其科擾。泉民感公恩、生祠之。蓋公爲治、大率以愛民爲主、而保全下吏、非有民訟不獲已、亦未嘗輕有所按治。其罷軟不勝任者、多奏處以祠祿、略如公前奏語。然其候視極精明、風采可畏愛、吏亦不敢犯也。建寧闕守、公以郡屢易將、帑廩空乏、且歲頗不登、亟聞于上、乞選能臣以治之。上素知公、即除知府事。建寧當孔道、部使者多寄治、民健訟、爲郡者日不暇給。公談笑以治之、事或累歲不決、

壹經公手、無不立辨、且後無能易者。今戶部尙書王公佐爲轉運判官、嘗語人曰、吾與傅公厚、乃因政事間相知耳。歲小不登、公發廩賑濟、有嘯聚欲爲寇者、僚屬請出兵以捕。公特以文檄俾鄉官諭之、皆帖伏、不戮一人而定。屬縣有殺人者、方捕治、而他縣獲逃卒、卒於獄中自首、嘗殺某人。縣以言府、公疑有姦、命鞠其實、果吏教殺人者重賂逃卒、使僞首、則殺人者可不死而卒罪亦止於流。因并論吏如法。移知寧國府事。寧國民淳、事素簡、公亦以清靜治、或累日庭無公事。酒官有爲專知所悖、自言者、公召詰之。吏具言監官贓罪。公曰、是則然、然上下之分不可亂也。命杖之。吏不伏、公立命械治。獲其流罪、將論決、袒其背、則有涅文、爲皇帝萬歲四大字。公笑曰、是固有法。命呼執箴者雜刺涅、使不成文、乃論如法。明日、闔郡士大夫悉來賀曰、此素橫于鄉者、前太守屢欲治而不能、不謂公談

笑間去此一害。公曰、法當然、吾非有心者也。春雨水溢、將決圩田、公力捍之而止。上嘗以手札訪問、公具以實奏。秋大旱、時公將去郡、猶請于朝、蠲租十餘萬斛。既去累年、後守偶閱公帑之籍、見某年齋閣迎新供帳、獨無一不存者、怪而問之、則公所留也。因大歎服、每以語人。蓋公平生涖官所至、率常如此。此特因事而顯耳。復爲福建路轉運副使。公所臨郡縣、小有水旱必以聞。至是泉州大旱、而守利督租諱之。公奏請募海舟廣糴以助民食、由是米不翔貴。臨安闕帥、上命執政選有風力不阿、權貴者爲之。執政擬二人以進、上獨指公以爲可、亟命召之。先是、公嘗以事過三山、副總管曾覲先來謁公曰、聞公之名久矣。因自誦其詩數十篇、且請公誦近作。公辭以憂患廢忘、時其亡而往報之。及爲郎、復嘗遇於客次。覲詫數從官曰、某人某人嘗辱來訪、公獨見鄙、何也。公遜謝而已、竟不往。及

將使閩部、閣門官子弟有使本道而召還者、以職事來謁、公往報之。延公便室、則覲及從官數人皆在。時方置酒、公飲一卮、辭腹疾而退。於是翰林承旨亦以入直辭、諸人皆有赧色。覲大不樂。公退謂諸子曰、仕宦當自結明天子、其次當由宰相、安能俯首此曹以求進邪。以故權貴多嫉公、而召命竟不行。改除兩浙西路提點刑獄公事。時公年已六十餘矣。性本剛介、疾惡、不能容人之過、以故歷官任事多與物忤。至是自度不能俯仰俗間、上章丐閑。不允。得移浙東。兩浙今號封畿、多有力者、部使者例不案事。公入竟、受訴牒日數千紙、一一親爲剖決。所至決遣囚徒、臺無留事。至於糾剔愆違、繩治姦墨、或望風解印綬去。常山令爲民所訟、公素不輕案吏、先面戒之。而執法殿中者親黨多在其邑、令事之素謹、亟馳書求援。其人即論公前使閩時推行鹽筴非是、今又欲逐令而使其親黨代之、



以此公至治所未十日而賜罷。過建寧、父老捧薰鑪以迎者夾道數里、而浙東人亦至今稱思之。然公益自知果不爲世俗所容、乃復求爲祠官、得主管武夷山冲佑觀。秩滿復除知寧國府事。朝命督行甚峻、公不獲已、單車引道。行未數程、復以言者追論前體究事、且嘗面折泉守爲罪、則又以冲佑祠官罷歸。公性高簡、不妄與人交、居泉五十年、杜門自守、讀書奉親外無他爲。中間乘貳車、持使者節亦且十餘年、訖未嘗以一事擾州縣。太守之賢者、如宋公之才、王公十朋、周公葵皆高仰之、待以異禮、而公月不過一詣郡、每留語、談說道誼而已。至是居間、益無事、唯讀書不輟。客至、觴酒論文、道說古今、唱酬詩什、以相娛樂。蒼顏白髮、意氣偉然、未嘗以留落不偶幾微見言面也。前居喪、哀毀得脾疾、至是益侵、然猶日誦書數卷。既病、則屏卻藥餌、獨飲水以待終。一日、忽召所善前昭武守黃君

維之、新新安守石君起宗、置酒卧內與訣。既而劇談談笑、歌呼如常時。翌日遂不起。時淳熙十年秋八月也。年六十有八。積官朝奉大夫。其配李氏有賢德。先公三十餘年卒。今贈安人。子男五人、伯壽、朝請郎、權知道州軍州事。伯成、宣教郎、新知福州閩清縣事。伯詳、將仕郎、卒。伯瑞、迪功郎、新漳州龍溪縣尉。伯拱、業進士。當以公致仕恩補官。女四人、長適承奉郎、知潮陽縣丞李讜。次適進士李申之。繼室以其季俱早卒。次適進士黃知白。孫男五人、充業進士。育良、尙幼。餘未名。孫女六人、長及嫁。餘尙幼。公於書無不讀。少治春秋、有聲場屋間。中年讀詩、至鴛鴦之二章、因悟比興之體、閒爲子弟論說、多得詩人本意。故太常丞吳公棫來官泉州、公聞其博通古學、著書甚富、日從之遊、相與博約、往復不倦。吳公悅之、請公序其論語十說、今行於世。謫居讀易、數日一周。手書程氏傳一通、玩繹久之、

紙爲之弊。其於子史百氏之書。嘗過目者。蓋皆略成誦也。識慮高遠。機警絕人。少時聞朝廷奪劉光世軍。更遣儒臣代將。歎曰。是必且敗事矣。亟移書所知刑部侍郎曾公開。請如唐罷馬燧。郭子儀等故事。擇其偏裨。授以兵柄。曾公然之。將以白宰相。未及而酈瓊等叛書已聞矣。參知政事李安簡公亦忠肅公執友也。罷政居會稽。公往見之。李公初以通家子弟待公。問曰。子以老夫今日之罷爲何如。公曰。得失相半。公問其故。公曰。公初附和議而終以弗合去。豈非得失相半乎。李公起握公手曰。公晦爲不亡矣。虜寇淮甸。公以書抵樞密黃公。論備禦方略。因策虜有十敗。且言其變必自中起。書至不數日。虜酋完顏亮果爲帳下所殺。黃公以示諸公。且報公曰。何其策之明也。曾覲自福州召還。公移書丞相陳福公。爲言覲入必留。留必爲善人。正論之害。其後亦皆驗。公少從外舅李公學爲文。

得其指授之微意。既長。益從當世先達遊。又日求其所未至。刮磨灌溉。以迄有成。則其氣骨雄健而關鍵謹嚴。波瀾浩漾而語意精切。有非當世文士所及者。李公每讀而歎曰。吾文有傳矣。故丞相魏國張忠獻公及尙書左丞葉公夢得。翰林汪公藻。中書舍人張公嶠。尙書郎新安朱公得其文。皆愛重之。汪公尤歎賞。每謂公曰。今世綴文之士雖多。而往往昧於體製。獨吾子爲得之。不懈則古人可及也。然再試禮部輒不利。三應博學宏詞科。一旣入等而黜于中書。遂不復應科舉。而誨諸子甚力。伯壽、伯成皆及太夫人無恙時登進士第。伯壽復中詞科。遂登臺閣。而公晚歲始自次輯其文。定爲三十有二卷。藏于家。今伯壽等將以明年七月丁酉葬公於泉州南安縣唐興鄉田豐里之雲臺山。以熹嘗以先人之舊辱公知顧甚厚。見使狀公行事。以請志銘。圖永久。熹竊惟公孝友之行。潔廉之



儒藏

宋儒碑傳集 卷一〇六

操精敏之識、雅健之文、皆足以高一世、而其吏事方略亦復過人遠甚、蓋不厲威猛而人自畏服、不爲一時小惠以干虛譽、而其去思遺愛愈久愈深、獨以蚤年未能深自晦匿、不幸見知權臣、辟咎得凶、遂以中廢、然當時識者固有以知其非公所欲、其後誦言於朝、白公無罪者又多一時正人、莊士且明天子亦既起公而任使之矣、而自比年來、殊無他端、乃復重以前事橫遭口語、乍起乍仆、以沒其身、既不得盡志竭才以布宣仁聖之德澤於遠邇、而其壽命又不得究於高年、是則豈不有命也夫、故既歷叙其世家行事之詳、而復具論其本末大致如此、伏惟當世立言之子、幸賜采擇、以垂永世、謹狀。淳熙十年十二月日位朱熹狀。

朱熹撰 《晦庵先生朱文公文集》卷九八

校記

- ①超：原作「起」，據四庫本《誠齋集》改。
- ②編：原脫，據右引補。
- ③王倫：原作「生倫」，據右引改。
- ④卯：原作「卯」，據右引改。
- ⑤勺：原作「句」，據右引改。
- ⑥冒進：原作「孟晉」，據右引改。
- ⑦賂：原作「敗」，據右引改。
- ⑧予：原作「子」，據右引改。
- ⑨何梁：原作「何梁」，據右引改。
- ⑩覺：原作「興」，據右引改。
- ⑪辭：原作「舜」，據右引改。
- ⑫射陽：原作「謝陽」，據右引改。下同。
- ⑬「兵」下原衍「兵」字，據右引刪。
- ⑭椅：原作「椅」，據右引改。
- ⑮殿：原脫，據右引補。

①⑥未：原作「夫」，據右引改。

①⑦即：原脫，據右引補。

①⑧藏：原作「度」，據右引改。

①⑨屬：原脫，據右引補。

②⑩待：原作「侍」，據右引改。

②⑪撫鰥：原作「逮鰥」，據右引改。

②⑫又：原作「人」，據右引改。

②⑬死爲厲鬼以殺賊：原作「死爲鬼以厲賊」，據右引改。

②⑭畝：原作「晦」，據右引改。

②⑮遺：原作「導」，據右引改。

②⑯學禮編：原作「學編禮」，據右引乙。

②⑰棣：原作「隸」，據《澹庵文集》改。按「守隸」，即上

文所言新州守張棣。

②⑱「尙」下原有「書」字，不可通，據宋官制刪。按「尙

左郎官」乃吏部郎中主管尙書左選之官稱。《宋史·胡銓

傳》直云「除吏部郎官」。

②⑲二：宋浙江刊本《晦庵先生文集》作「三」。

③⑩罪：原作「辜」，據右引改。

③⑪同⑩。

③⑫公：原作「尉」，據右引改。

③⑬此句原缺，據右引補。

③⑭垂：原作「乘」，據右引改。

宋儒碑傳集卷一百七

王剛中 呂廣問 馮時行 劉獬 徐淮

陳持 彭恪 程揆 錢朝彥

宋故資政殿大學士王公墓誌銘

乾道元年六月、左中大夫、同知樞密院事王公病不能朝、上書致其事。天子曰、吁。予舊學之臣也。遣中貴人挾太醫診視、出上方名劑馳賜、問安否、絡繹於道。越四日、復請曰、臣犬馬之疾浸革、自度不復任陛下政事矣。願乞骸骨、以終天賜。上惻然、始許致仕。翌日癸未、公訃聞。兩宮震悼、輟視朝、賻金帛加等、賜龍腦香、水銀以斂。又詔太常撰日、有司除道、將臨其喪。諸孤奏言、先臣治命、蒙國厚恩、久備將帥、誓將捐軀戰場、馬革裹屍以歸。而大期奄至、得卧家簣以沒、不敢屈帝尊臨奠之禮。諸子具奏懇辭、得請而後已。上益哀其志、贈公資政殿大學士、左光祿大夫、進其子景辰秩一等、官其子孫

七人、親御宸筆、賜諡恭簡、敕使者典葬事、喪舟所過州縣、發吏卒護送。所以隱卒崇終、賻恤有物、褒贈有告、節惠有諡、平生始終大節、合而志之、表之墓道、有碑有銘、恩賚光寵、極於哀榮、可謂盛矣。公諱剛中、字時亨、姓王氏。其先信州弋陽縣人、後徙饒州之樂平。皇曾祖誠、贈太子太保。妣汪氏、新興郡夫人。皇祖翰、贈太子太傅。妣彭氏、高平郡夫人。皇考憲、贈太子少師。妣吳氏、齊安郡夫人。徐氏、江華郡夫人。少師公英毅有大志、常曰、世間事多不如人意、惟教子起家、可以大其門。至是公得位處顯、番陽王氏爲宋巨室。公博覽彊記、文章長於議論、傳經據古、不爲空言。紹興十五年、發策殿中、擢第二名。實暴發、自天子至大臣、皆論以爲國器。授文林郎、奉國軍節度推官。有花樹湖漑田數百頃、歲久湮沒、常苦旱、公率並湖之民疏治之、復其故、歲以大稔。州民德之、爲公生立祠湖上。秩滿、改左



宣義郎。故事當召試館職。宰相怒公不詣己。授洪州州學教授。公不屑意。待次里中。治一室。取舊書讀之。榜曰應齋。賦千餘言。所謂應者。不居人先。不爲事始。履常蹈素。與物推移。如撞千石鐘。大扣大鳴。小扣小鳴。如對百鍊鑑。胡來胡現。漢來漢現。其大不榮而小不辱。其來不拒而去不追。乘流遇坎。任運而已。以是名應。實信踐之。二十六年。召見談治道中上意。擢秘書省校書郎。遷著作佐郎。今天子爲普安郡王。又兼王府教授。每侍講席。極陳古。今治亂興壞得失之故。君子小人賢佞忠邪之辨。所以起導聰明。有諷議切劘之益。除起居舍人。升起居郎。編修神宗皇帝寶訓。書成。遷左奉議郎。磨勘轉左承議郎。除中書舍人。賜三品服。公入謝。疏言。禦戎最今日先務之急。夷狄之情。強則犯邊。弱則請盟。今勿計敵國之強弱。盍先自治。考練文武之材。以擇將帥。揀汰冗食之卒。以蒐戰士。積穀以

實邊儲。節用以備器械。加我數年。國勢富彊。將良士勇。彼請盟則爲漢文帝。彼犯邊則爲唐太宗。伸縮在我。不亦善乎。上韙其言。會西蜀謀帥。大臣以蜀方備胡。宜得有文武威風識大體者。上曰。無以逾王某矣。進左朝奉郎。龍圖閣待制。制置四川。知成都府事。御便殿臨遣。錫鏐帶。象笏寵其行。賜親札。所以眷顧拊存。恩禮甚渥。進敷文閣直學士。當是時也。大將吳玠累官閤至帥。其下姚仲。王彥之。儔亦建節旄。龐臣宿將。矜功負貴。雄視一方。異時守帥以文令。則玩於柔。而將吏驕蹇不用命。以武競。則窒於暴。而上下相盼伺。不得其情。故人爲難。惟公檢身以法。示人以禮。內撫四路。外鎮三邊。上自大將。下至裨佐。開心見誠。不事聲章。不立崖塹。馭軍戢吏。恩威並行。間遇邊遽。羽檄紛然。從容裁決。皆中機宜。會虜騎度散關。人情洶懼。公跨一馬。日馳百里。抵仙人原。吳玠大驚。公曰。大將臨戎。義



同休戚、安得高枕而卧。又遣臘書抵張正彥濟師。西師大集、胡馬退舍、方議捷奏、公幡然倍道馳還、謂其屬李燾曰、將帥之功、吾何有焉。燾喟曰、以身督戰、而功成不居、公大度過人遠矣。已乃差擇軍中將士爲衆所推者上之朝、備統帥之選。蜀中人物如林、一時名人勝士與幕府參佐之賢、密疏以聞、充部使者、州刺史之任、所臨有聲、皆號稱職。於是百官趨前、萬兵擁後、蠻蜚夷獠、小夫賤隸、近在肘腋間、遠至數千里外、目使頤指、翕然響應、無一辭怨議、眞所謂有文武威風識大體者也。州城缺壞、凡可踰者三十餘處、公周視太息曰、事孰有急於此者。即日飭吏屬起羨卒、具餼糧、蓄財用、俾圖庀工、立表受事、計日而成、民不知勞。高墉巨壁、周若干里、堅壯可支十世。諸軍汰遣使臣千餘輩、有困絕不能自存者、公曰、使之執兵冒白刃於少壯之年、而斥棄於既老之後、非朝廷意。悉召詣府、猶

有馳射可備戰守者、復其祿秩、奏用禁軍缺額糧廩之。其罷癯不堪事、則給義倉、遂無失所者。威茂叙、瀘四州地接西南夷、邊吏貪功、夷人不堪、則屯聚而爲寇。公始下令、敢有妄動挑發爭端者、斬以徇。自是兩地宴然、訖公去、無一人犯塞。四路榷酤、歲課不登者五十萬、監吏無能否皆不能辦、徒空文耳。公奏除之。夔路例給鹽充糴本、官吏並緣所給才十之二。忠州太守楊光薺知其故、令官自鬻鹽、得錢糴買、不以累民。忠人大說。公推其法於一路、至今人蒙其利。成都萬歲池廣袤十里、溉三鄉之田、皆爲沃壤、積久填淤。公集三鄉夫共疏之、累土爲巨防、表以石柱、植榆柳其上。州人指曰、吾公之甘棠也。府學禮殿、東漢興平中所營、最爲舊屋。崇寧中推三舍法、又建新學、連薨接棟、幾至萬礎。遭時多故、師生之廬日入於壞。公屬九縣修復之。蜀之父兄欲進子弟於學者、爭出錢以佐財費、輪

奐一新、盡復其舊。又命工葺諸葛武侯、張文定公祠廟、作而新之、具牲醴、率州之賓屬拜焉。地有黃巢墓、松楸延袤、樵牧不敢犯。公曰、巢出潼關、轉寇陳、蔡、遇朱全忠、李克用之兵、連戰大敗、挺身東走、至泰山狼虎谷、爲時溥追兵所殺、函其首獻於朝。安得墓在此。命夷之。妖人王思聰挾女巫、蓄一蛇、晝夜聚男女爲妖。公曰、左道惑衆、亂之萌也。命殺蛇、鯨思聰徙之遠方、而境內淫巫爲妖妄者皆自戢。蜀人繪公像於文翁、張文定之次、置別室祠祀之。謂公視二人爲無愧也。天子受內禪、恩遷左朝請郎。又以宮邸之舊、進左朝奉大夫、召赴行在。於是公帥蜀三年矣。兩蜀自劉旻、王均、李順之亂、姦訛朋興、衆心危懼、日三四驚、無寧居者。時有馬正惠、文潞公、張文定隨事鎮撫、皆以功名著稱天下。建炎以來、北胡擁衆數萬、窺蜀、朝廷宿重兵扼劍門之險。積三十年、師老財匱、非若曩時群盜竊發、

嘯聚烏合、可以應手撲滅而定也。公挺一身以折千里之衝、護諸將以撫三軍之衆、禁戢姦盜、護養貧弱、內外斬斬、不聞疾步急呼。軍食歲爲米百萬石、爲錢二十萬緡、而猶有調發不時之須。公爲更關鈔法、請給度牒、以貸倉猝急征暴斂之患。有旨下階、成岷、鳳、四州刺丁壯爲兵、群言籍籍以爲憂。公建五害奏罷之。免符下、而歡呼之聲震山谷。其規模宏大、垂裕悠遠、與前後數公相望百年、如出一手。比公去蜀、父老墳道、遮留不得去。旣去、有追路數百里而後還。公尋具奏、以足疾不良於行、請祠甚懇、得提舉江州太平興國宮。歸次番陽、營一圃、植巨竹數千挺、桃數百本、環之、號竹陽。謂人曰、上恩許暫均勞、實終焉之計也。會胡馬南牧、兩淮震擾、有旨促召、日一再至。公聞、單馬見上。問戰守之策。公曰、靖康國破、二聖北遷、中原陷沒、億萬生靈肝腦塗地、皆兵將不任、誰與戰。靖康嘗防河矣、



建炎又防江矣。而虜騎長驅超邑越都。如踐無人之境。誰與守。且當懸瑕忍垢。與之通和。得歲月之頃。選將厲兵。堅城銳器。爲不可勝以待之。戰則有。舉旗斬將之功。守則有金城湯池之固矣。上曰。善。除翰林學士。公避祖諱。辭不受。命改除禮部尙書。直學士院。兼給事中。上即位。爲鹵簿使。一日。上御內殿。召公。命坐賜茶。詢當世之務。以上即政之初。求治太銳。對曰。道遠當馴致。事大難速成。高帝王漢中僻陋之國。人知畏楚矣。獨范增知有滅楚之志。句踐棲會稽一島之上。人知事吳矣。獨伍員知有報吳之役。今陛下坐薪嘗膽。欲刷四夷之恥。萬分未得一。而迹之布於天下。已若泥中之鬪獸矣。所以陳先後緩急之方甚辨。已而使人自虜中得其要領還報。除公端明殿學士。簽書樞密院事。明年。當乾道元年。進同知樞密院事。公曰。戰守者實事。和議者虛名。不可恃虛名害實事。又奏疏論四

事。一曰開屯田。漢趙充國建屯田十二利。以破滅先零。爲萬世法。本朝太宗皇帝用何承矩爲屯田制置使。墾闢曠土。千倉萬箱。充滿塞下。無餽師勞民之費。而出入守望。帶刀佩劍。有扞邊固圉之實。功效卓殊。具載國史。可舉而行。二曰省浮費。國有財用。非天不生。非地不養。非人不長。收之有時。取之有數。止於是矣。而不急之務。無名之費。蠹耗殆盡。主計之臣。取其臨時。趣了目前。所以待未然者。夷狄賊盜之虞。水旱疫癘之變。無尺帛斗粟一金之蓄。可謂寒心矣。三曰舉材武。以備將帥。將帥之才。不可一途而取。或有武力。或多權謀。或通術數。或興於屠販。樊噲灌嬰是也。或起於盜賊。彭越黥布是也。而豪悍絕人之姿。如周處。戴淵之儔。亦出於閭里惡少。天下有道。狙詐作使。旁招廣攬。羅而致之。爲王爪牙。則兵勢張矣。四曰汰冗兵。以練精銳。兵有正兵。有奇兵。有伏兵。馬有上駟。有中駟。有

下駟。爲將者、必有奇材劍客、投石超距之倫、以一勇當百、以一技當千。譬之求金於沙、斂而揚之、精則無遺金、沙礫棄不錄矣。上曰、天下名言也。嗚呼、自公帥蜀、聲號顯融、震耀四海。天子召歸、秉國柄於本兵之地、公亦慨然自任。以天下之重、國貧矣、開屯田、節浮費、可以復富。國蹙矣、舉材武、汰冗兵、可以復彊。得時得位、次第罷行。欲以大勳勞光輔中興、功施社稷、追配管、蕭於千載之下。而天不假齡、得疾不可治、可以慟哭流涕、爲天下惜者也。享年六十三。爵太原郡開國公、食邑一千八百戶、食實封三百戶。娶吳氏、銀青光祿大夫某之孫、前卒。贈樂平郡夫人。三男子、序辰、右朝奉郎、通判江州。昭辰、右宣敎郎、通判文州。景辰、右承奉郎。皆以文學行義世其家。四女、長適舒州通判史庭俊之子。孫梠、次許嫁知樞密院葉義問之子端臣、餘在室。孫男二人、晉老、元老、並右承務郎。女孫二人。公幼學

無師、受業於兄軍器監丞必中者。天才超驚、一日千里、不數年、齊名號二王、相繼及進士第。而公被遇太上皇、踐臺省、登侍從、擢帥兩川、禮遇恩顧、諸臣莫敢望。它日、監丞賜對、上曰、蜀人以卿弟可繼張詠、朕不復西顧矣。比進直學士、制詞有嘉而舉職、信我知人、述上語也。今皇帝踐祚、推選舊德、比公甘盤、典司密命、倚爲柱石。昔曹參相齊、齊國大治、其後以所以治齊者治天下、號稱賢相。公之治蜀、大功數十、度越古今。以所以治蜀者相天子、必有以驚世絕類。而百不一試、賁志以沒、命矣夫。前薨一夕、有大星隕於寢廬之側、里人望而驚焉。諸孤以某年某月某甲子奉公之柩、葬於縣永善鄉石榴峰車馬原上、公所自卜也。故事、宰執得建剎先墓、以薦冥福。公表請如令、賜名敎忠美報禪院。去少師墓若干步。公亦在少師之次、指地一穴、曰、它日從先公於此。至是、諸孤奉宿誠、併舉樂平郡

夫人以祔。公志大論高、尚名節、平生慕范忠宣爲人。疏財好義、解衣推食、振人之急、無秋毫計惜。買田千畝爲義莊、館三族之無歸者。既與政、請以范公約束著爲令、俾子孫世守之、如口分世業之法。又築室爲家塾、延賓師、具糧糗、凡族子之勝衣者皆進於學。遇郊祀恩、任兄弟之子。自爲布衣至公卿、無它嗜好、官閒吏退、以讀書著文爲樂。有易說、春秋通義、仙源聖紀、經史辨疑、漢唐史評、唐史要覽、天人修應錄、東溪集、應齋筆錄、續成都記、凡百餘卷、藏於家。某投老歸田、竊睹公姓名於除目之上、聽想風采於搢紳士大夫之論、以不及見公爲恨。公門人左奉議郎、知果州趙不拙狀公世次、官壽、治行、勞烈與卒葬年月日、爲書屬予曰、大資公每讀公文、喜而稱善。而墓碑無辭以刻、諸孤勤勤懇懇、欲得公銘、爲不朽之託、其勿辭。銘曰、

一弛一張、文武二道。文玩於柔、武窒於暴。惟皇作

極、處此兩間。仁綏義克、勢如循環。或用武斷、律貪立懦。奮髯抵几、變齊俗緩。或用柔理、勿庸擾之。手摩撫之、慈惠之師。不主故常、緣督而動。如持一鉢、權以輕重。蹇蹇我公、獨步帝躔。振迅一鳴、搏風戾天。允武允文、備道全美。左之右之、惟君子使。入侍詞垣、大筆如椽。出擁戎旃、長劍倚天。帶甲十萬、如圈獠虎。折箠驅之、妥若兒女。三邊宴然、烽滅燧息。獸遁禽逃、不見一迹。乃作泮水、如泗如沂。投戈講藝、橫槊賦詩。乃駕西郊、褰帷問俗。男耕女桑、賣刀買犢。文修武鬯、不茹不吐。畏而愛之、如祉如怒。高勳鴻烈、暴耀一時。繡裳赤舄、以俟公歸。進陟五兵、承輔樞極。嗚呼噫嘻、曾不煖席。山頽木壞、遂喪國寶。殄瘁之悲、不遺一老。天子震驚、爰及卿士。當饋興嗟、一鑑亡矣。隱卒崇終、恩禮之隆。祖門贈隧、靈車崇崇。有誄有銘、有誥有諡。大書特書、又將有史。傳信萬世、茲謂不朽。雖死不亡、繫公之壽。



孫觀撰 《鴻慶居士文集》卷三八

左大中大夫充龍圖閣待制致仕贈左正

奉大夫呂公墓誌銘

隆興改元之次年、前禮部侍郎呂公自徽州入對內殿、言致治之要、當以內爲先、收人心爲急、而朝廷當守一定之論、不可屢變。時天子新即位、切於求治、聞公言、大稱善、欲任以事。公謝曰、臣蚤衰且病矣、理一郡猶不能、其敢任事。有詔除敷文閣待制、提舉神佑觀兼侍講。公在講席、凡可進諫、必因經陳誼、反覆論辨、盡其說而後已。會敵使再通禮、有未定、上問公和議成否。公曰、彼利吾幣、何患不和。但旣和之後、勿以爲無事、宜思患豫防之。未幾、以^④病乞外祠、章五上而不受。旣不能朝矣、上猶問大臣、公果病耶。是老成有學問者。進龍圖閣待制、提舉江州太平興國宮。六年十一月七日、終於家。嗚呼、公之論思、大略可睹矣。蓋國朝呂姓自丞相

文靖公始大、世有顯人。公曾祖諱宗簡、于文靖爲兄弟、仕至尙書刑部員外郎、贈金紫光祿大夫。其配魯氏、贈普寧郡太夫人。祖諱公雅、仕至徽猷閣待制、贈少師。其配安氏、贈鄧國太夫人。考諱希朴、仕至承議郎、贈右正議大夫。其配張氏、贈碩人。公諱廣問、字仁甫。自少雋拔能文、年二十即貢太學、登宣和七年進士第、授宣州士曹掾。改司理參軍、治獄以情、未始徇上官意。調徽州婺源縣主簿。權邦彥安撫江東、辟爲幹辦公事。權公拜樞密、李光繼至、又辟公書寫機宜文字。召試館職、辭不就。得宣州學教授、用薦者改宣教郎。李公帥江西、再辟主管機宜文字。會其入參大政、詔薦西北人材、乃首以公應詔。給事中劉一止輩交薦之、宰相專且愎、指以爲黨。公與薦者皆罷去。李公自是南遷、且興大獄、得其私書、有所善姓名、悉中以事。公屏居黃山之隅、怡然若無意於世者。以流寓恩、監西京



中嶽廟。從吏部選知江州德安縣。招輯流亡、建學舍以教其子弟、獄訟幾息。邑人相與祠公於學。添差通判筠州、又通判虔州。及用事者死、舊人稍稍復用、公始召爲禮部員外郎。而言者嘗有舊怨、又詆公禮部侍郎周葵黨也、復俱罷。明年、除提舉江南東路常平茶鹽公事、移浙西路。入對、言常平錢穀、自軍興多用之、以法嚴、故不上聞。今虛數未除、恐緩急誤指揮。上爲遣使覈其實。遷本路提點刑獄、兼權湖州。除直祕閣、兩浙路轉運副使。異時漕臣多媚悅、上下媒進、取公獨屹屹無依倚、而人亦不敢干以私。因奏事、太上皇帝問所部人材、悉以實對。除右司員外郎。假某官充接伴金國賀生辰使。時金人且畔盟、使者入見、無恭順禮。公曰：是求釁端、不足計。願增邊備待之。既至盱眙、敵有宣徽使銜命越境來見者、公曰：此非常禮也。見之而不拜其命、時以爲得體。遷中書門下省檢正諸房公

事。拜起居郎。一日上曰：呂某練達、不沽激也。大臣皆未諭。既至中書、則御批除公侍御史矣。以宰相陳康伯有姻聯、避不就。遂除權禮部侍郎。凡內禪典禮、前未有者、多所訂正。且密議先建儲宮、以示四方之信。上踐阼、疏十有二事以獻。其言深切、皆留中不出。兼同修國史。請外、除集英殿修撰知池州。以病移徽州。歲饑、損常平米價以賑民、而任其所損之數。時州郡多獻羨餘、公不肯、曰：無以使上知民之貧也。爲人和易長者、與物無忤、而內實剛重、不可犯。每讀書、見昔人行事有所感、或爲出涕。遇儉佞狡險之徒、至不忍視其面。其受知李泰發、嘗勸其明公道而察附己者。周敦義與公平生交、自貧賤至貴達、未始一語相詭隨、而世皆目以爲黨。屢躓不伸。非明聖在上、則朋黨之禍將復起矣。然公之任宰掾、當軍書旁午、與同列陰贊廟堂爲多。其爲池州、論沿江備守甚至、然後知公之用有

不盡者也。少時家貧，兄弟奉親至孝，聚族數百指，無間言。賓客過之，疏食菜羹，講論道義，終日不厭。或見其市魚肉而客饌無有，戲問之，公蹙然曰：「吾親所以爲養，吾徒可享哉。」及貴，有遠族乞附公服屬以就國子試，公曰：「是豈特欺君，非幼子毋誑之義也，不可教後生。」蓋誠信不欺類如此。臨終，處其家事如平時。手疏邊防利害爲遺奏，有曰：「遠斥導諛之言，力行責實之政，結人心以固本，養民力以待時，皆公雅志也。」享年七十有三，官至左大中大夫，爵太平縣開國伯，食其邑七百戶，贈左正奉大夫。娶王氏，太府寺丞有之女，封令人，先十二年卒。男三人，得中、修職郎，監行在草料場，庶中皆早世。自中承務郎，女適從事郎胡璉，孫男女三，尙幼。公家自河東遷符離，而世葬鄭州管城縣。因公之南，始家寧國府太平縣，葬其夫人與其兄弟長壽鄉之古城山，且自爲穴，今遂窆焉。是宜銘，俾其後有

考。銘曰、

世之誣賢、以黨斥兮。空而去之、易爲力兮。其不可去、聖不惑兮。旣去復還、奸則熄兮。不有君子、其能國兮。猗嗟呂公、蘊厥德兮。不玷不缺、如圭璧兮。致柔與和、中則直兮。人皆曰賢、識不識兮。誰其舉之、抑又踣兮。出入事君、盡其職兮。有言必信、義不嘿兮。以筮以決、如龜策兮。俾以重任、宜柱石兮。視彼儉王、孰失得兮。黃山之隅、聚族百兮。孝友中庸、善斯積兮。兄從弟從、永此域兮。

韓元吉撰 《南澗甲乙稿》卷二〇

呂待制廣問傳

呂待制名廣問、字仁甫、丞相文穆公之裔、尙書刑部員外郎行簡之曾孫也。世家開封、隨高宗南渡、初居寧國、再寓新安。公自幼雋拔、能文詞、事親孝。年二十、貢太學、登宣和七年乙科、調徽州婺源簿。召試館職、辭、教授宣學。江西羣盜蠭起、李侍郎泰



發帥豫章、辟入幕、多所裨贊。泰發入參大政、上命從臣各薦二人、公在薦中、言者指爲黨、罷知江州德化縣、招輯流亡、建學舍、息獄訟。旣去、邑人祠於學。除禮部員外郎、言者又詆爲周葵黨、罷。除江東提舉、移浙西路。入對、上嘉納。遷提刑、兼權湖州。除直秘閣、兩浙運副、因奏事、上嘉其通曉。除右司員外郎、充接伴金國賀生辰、使得體、拜起居郎。一日、上喜其練達、不沽激、親擢御史、以宰相陳康伯有連、不就。權禮部侍郎、凡內外典禮、多所訂正、且密定建儲之議。孝宗即位、首疏二事以獻、其言深切、請外、除集英殿修撰、知池州。以病移徽州。歲饑、捐常平米價以賑民、而自任所捐之數。時州郡多獻羨餘、公不肯、曰、無以使上知民之貧也。歲餘、召對內殿、極論方今舉事當守一定之論、以治內爲先、以收人心爲急。上屢稱善、除敷文閣待制、兼侍講。疆事甫定、金再通好、上問議成否、因上章備論思

患豫防之意、朝論偉之。未幾病、五上祠請。上對宰相問病狀、曰是老成有學問者。進龍圖閣待制、提舉江州太平興國宮。卒、官至太中大夫、年七十三。子得中、自中。

李以申撰 《新安文獻志》卷九

古城馮侯廟碑

左朝請大夫、提點成都府刑獄公事馮侯諱時行、字當可、隆興元年死其官。侯有功業於時、死凡四年、名山進士喻大中合邦人之思、築宮於縣之古城、以俎豆侯。又三年、駒來守雅州、考侯事之終始、刻之石。先是經界之禍、此邦實烈。方經界之令甫頒、民恐懼奔走、徇朝廷之法、不敢輕售其姦。法旣行、久且翫、姦民始生心、爭爲僥倖之橐、取前日之令紛更之、而弊始錯出。跬步之田而受蓓蕞之稅、連阡陌者以巧倖入輕租。破業析產、瘠溝中者枕籍、幾蹈湯火之酷。將且十年。而侯持節而來、問民

疾苦、首得此、蹙然爲之寢食不遑。毒於民者莫烈此、即閉閣書奏報天子、乞仍其故。既畫可行、民懽迎曰、吾今更生矣。及侯死、民聚哭曰、我有室廬、侯畀我、使獲弛然安居其下、有田以耕以飽、皆侯賜。雖一飯必祝。大衆斥七十萬錢、傳屋二十五楹、中爲堂塑侯像、挾以兩廡、民歲時歌舞其下。水旱厲疾必禱、侯亦能出爲禍福、以恐動其民而食其土。自侯爲部使者、經畫邊事尤縝密、此邦箸之令甲世守焉。侯恭南人、明果敢斷、足以當大事。文尤高古、人不敢斥其字、曰爲縉雲先生。紹興初、宰通義之丹稜、以政最召行在所。時權臣柄朝撓節、徇女眞之和、侯斥其非是、對天子言剴切。出守萬州、部使者迎附權臣、侯退居里社凡十年。權臣死、復出爲州、守蓬黎及天彭、遂持節以死。侯所在政卓異、多去思、民必祠之。夫考風俗、箸其媿惡、太守事也、是故爲之記、而繫之以聲詩、使邦民歌以妥侯靈。

詩曰、

潔罇罍兮酒冽清、籩豆靜嘉兮、肥脂其牲。坎坎擊鼓兮、式和且平、攜持父子兮、進侯庭。維廟孔嚴兮、有覺其楹、寢簟孔安兮、維侯是寧。維侯相民兮、式臨爾誠、雨我田兮、澹澹其盈。欲暘而暘兮、飢犢肆耕、厲鬼驅左兮、風不暴盲。維侯是安兮、侯無遽征。朝奉郎、權發遣雅州軍州事、主管學事、沿邊都巡檢使蹇駒撰。

蹇駒撰 《縉雲文集》附錄

德慶通守劉承議墓誌銘

君諱獬、字去邪、年五十一卒、其年十二月某甲子葬廬陵儒行鄉曲石之原。左迪功郎、興國縣尉鄧君善以去邪之族、出處文行、歷官治績、年若干爲書、遣一介請爲銘、詩刻之墓碣於廬陵胡某曰、劉姓凡二十五望、無在江左者。或傳上世籍建康、五季之亂、徙居吉之泰和。曾大父宗孟、大父紹、父及



甫皆鏹迹丘園。惟父以去邪升朝，再贈至右宣教郎。初，宣教公無子，取兄雲之子爲後。去邪以仲子出繼。方髫髻時，已穎脫其群。稍長，克意門戶。五世兄朔講學鄉枌，去邪從之游。淵源演迤，日大以肆。一出即登賢書，戰其藝南宮。遂中建炎三年進士第，授左迪功郎、衡州司法參軍。秩滿，用薦者轉左從政郎。改選潭之攸縣令。丁生母憂，服闋，調池之東流縣令。當途交章公薦，改左宣教郎，知衡之衡陽縣。秩滿，知筠之上高縣。磨勘遷至左承議郎，通守德慶軍府，需次於鄉。未幾以病卒。實紹興二十三年八月八日也。去邪起白屋，若素宦，然始典法，讞議必傅經術，每得情論決，民自謂不冤。歲浔饑，民艱食，寇攘以延朝夕。捕者利其賞，有司鬻獄，將置數十人於死。去邪曰：「是迫於饑，仲尼謂未必本惡者，盍從輕。」比時方募兵，則請以充數，使自效。守將怒，抵所議於地。去邪徐拾以歸，復執以請，牢不

可奪。守將悟而奪之，囚賴以免。名動一州。自此郡有疑獄，必委亭議。東流素凋殘，值兵火紛擾之餘，公私室廬十僅一二。去邪既剗剔撫摩，更戮力營繕，未幾棟宇一新，而民不罷。至於學有精舍，賓有館穀，百廢具舉。會虜騎長驅淮上，邑瀕江，鳩民戒不虞，吏請徵發，公不可，止揭片紙與之期。民勸趨之。尚書某將出境假道，聞公之爲，擊節歎賞，遂力推轂。衡陽懷公遺愛，始至庭，勞者相踵。邑當二廣之衝，左湘江，右蒸水，實一都會。先是爲邑者以兩部使者所在，胥吏恃勢橫甚，又簪紳僑寓旁午，誑丐百出，動輒掣肘，煩言易生。往往令率以譴去。去邪洗手就職，逮鰥恤嫠，至桀黠吏必苗薈而髮，獮之。撫字有多，催科以期，物物得職，曾不閱月，而邑以整暇聞。初蒞上高，鄉校橐敝，去邪喟曰：「吾所至邑，未嘗不修學宮，惟衡陽尤竭力十倍他邑。故事無不集會，其可不勉。」於是殿宇、門廡、堂室、帑廩、庖

涸之撓折腐敗者、丹堊之漫漶不飾者、自我畢葺。學有蘇黃門子由記、歲久斷缺、訪墨本摹刻之、且識重修始末於碑陰上。既訖、躬率吏及生徒行釋奠禮、耆老至歎息、其子弟皆興於學。邑有溪、冬冰春潦、去邪爲杓、以濟病涉者、民歌舞之。凡宰三邑、大抵以愛民戢吏爲心、鍵之以公勤廉儉、故吏不病民、田野熙熙、終歲不以投匭至其庭。其治雖號風力凜凜、然嚴而不殘、當途皆才之。薦者章累數十、近世未有。平生孝友忠信、自以出繼、竭力於父母、無違禮者。初、先廬殘於兵火、僦屋郡郭、內外親附待哺者百口、米斗餘千錢、加以疫、死者八人。仲氏實治家、以乏絕告、去邪竭橐、粥付之。所生母卒、適在官、欲以喪去、吏白法不可、號慕逾月不出。郡繩以三尺、且遣官敦諭、以毀請、力丐終喪。郡以聞、得報不許、猶不止。與夫自謂不在一畝者、用心固殊矣。伯氏死、教育成就其孤如己子、至使有室。田

園汙萊、身督耕薤、至收成悉付仲氏。異籍、則命與猶子各區別、具所殖產、而析先疇三之、不以己出繼而半、自不與也。性開爽、雅好賓客、俸入隨得而盡。周人急不計私、至自奉甚嚴、歛之日、衣止周於身。嗚呼、去邪所以治身齊家、字民格物、表表如此才器、蓋加人數等、不大顯於時、君子惜之。娶歐陽氏、封孺人。男三人。令猷、二十一年賜進士出身、選左迪功郎、徽州婺源縣尉。將之官、遭父喪、服闋、主興國簿、今爲左文林郎、新常德府觀察推官。令節、令訓、皆志學。女三人、長適胡著、次適李近、季未字。孫男六人、未名。某與同年進士、義不容不銘、遂銘之。

胡銓撰 《胡澹庵先生文集》卷二五

諸王宮教授徐奉議墓誌銘

君諱淮、字佑元、系出衢之官堂、唐末徙信之永豐。高祖諫、與韓魏公同試於禮部、自是友善。魏公入



相累以書招致、不出、授將仕郎、有遺書藏於家。曾祖伸、祖季、皆有隱德。父汝霖、年八十六、紹興乙卯春、以慈寧皇太后壽八十、恩授右承奉郎致仕。母葉氏、年亦稱是、封孺人。君嘗作雙榮堂、莆田鄭厚記之。君服綠二十年、既通籍、合賜章服、力請於朝、乞回授其父、有旨從之。君之愛親、切於愛身。凡有所適、得一甘膳、必歸遺焉。嘗客於臨安、一日謂友人、親老矣、始生之日在、即吾忍重數百里之勞、失吾親一日之歡乎。遂浩然西歸爲壽。愛親類若此。方舉子時、慷慨言曰、苟且時文、僥倖科第、何用哉。周官書、成周太平之典具在、盍肄業焉。庚戌秋、遂偕計、試於禮部、不偶。甲寅之秋、見斥舉場、詣甌上平邊八策、權臣惡其言危、以微罪歸泉石、灌園蒔蔬、以養親。庚申秋、再薦春官、爲禮經第一、聲名籍甚、學者莫不歆羨。初任鄂州教授、銳意簡諒、有鄒魯風。鄉人流寓者、咸加訓勵、預薦者無慮數人。終

更教授郢州、會通判訐太守姍時政、朝旨下本路究切、謂君實與聞。君抗言直守、坐是俱報罷。一時有識之士、皆以其直節許之。君隱居不出者九年、恆賦詩自娛、有冷眼旁觀堪一笑、着鞭歸去卻如愚之句。會恩授武岡軍判官、輟俸以新廨舍、抑兼并以懷溪夷分米、以周族黨、嫁不給之女、沾丐君惠者、又不知其幾人。管庫吏有以錫易白金者、郡將漫不省。君發摘其奸、人莫不服其精明。朝廷更化、伸郢州之屈、且薦者章交、改宣教郎、差除諸王宮大小學教授。今上即位、遷奉議郎。初罷官武岡、楮無長貲、託妻子於邵陽之姻家、單騎歸里。隆興改元夏五月、復抵邵陽、攜其孥、沿潭湘、浮洞庭、檣傾檣摧、鄰數舟賴公精禱以濟。是日微公幾殆、人以方婁長者、先是夢一持檄者報云、今兩國兵交、忍坐視耶。既寤、益以功名自許。還至鄂渚、謁岳公廟、往嘗入劄於執政、乞復公侯爵、過是悽愴嗚悵。

感疾談笑而去。其別諸孤之言曰：汝輩當以忠孝實吾志，所恨者不克終養，死不瞑矣。蓋棺凜然如生，鄰里鄉黨聞者咸下淚。公尙氣義，發乎文采，見諸行色，章章具在，豈古所謂以義將其氣者耶？至於新永豐學，立柳相祠，皆君發其端。里人有客死，雪水者，與君嘗有一日雅，君往白郡，發塚而歸其喪，咸高其義。主上起魏國張公總戎閩外，君乃草儒將書數千言，盡古今用儒之效，上之政府，意蓋欲任魏公之專。又獻五啓八劄，皆切中時病。政府偉其才，宮教之除，示引用之階，惜乎不幸死矣。娶武氏，子四人，時邁、時適、時遇、時造。女二人，長適進士俞潛宜，次在室。孫五人，女孫二人。時邁以左迪功郎、新德安府司戶參軍白與時狀乞銘於某，辭之而請益力，乃銘曰：

惟銳於氣，動必直，惟勇於義，必形色。反是不諛，乃毀則，是謂非天喪厥德。暨佑元，滋學殖，恃氣嗜義，

衆所嫉。一跌不振，鄰鬼域，鋟石崩辭，詔來哲。

胡銓撰 《胡澹庵先生文集》卷二六

永康陳君迪功墓誌銘

陳在婺爲右族，名數布於七縣，其譜或通族爲之。其籍永康之前黃者，不知於婺何別也。蓋傳至數世而得高安府君，而前黃之陳始爲儒家。邑人紀焉。公諱持，字守之，質厚而慤，蚤以事母聞。隆於兄弟，白首無違言。邇之里閭，遠之郡國，所交耄稚良桀不同，一接以恩意。年十三，入郡庠，下筆亶亶，諸生皆畏避之，意氣甚盛。已而靖康之難，其父赴京，師捍禦，沒不反，家事益落，遂連蹇不耦。紹興開太學，故時儕輩強之行，公勉爲出，即綴弟子員。往來二十年，竟無所遇。晚以累舉，恩授迪功郎、筠州高安縣主簿。或謂鉤校朱墨，殆非老人所宜，而公耆事樂識，蚤夜不怠。若欲少自見者，諸公稍稍知之。代還，未及調官，以淳熙二年八月十一日卒於家。



嗚呼、士方少時、心壯力強、謂天下事直差易耳。年運而往、更涉險難、僅得一官、欣然俯首就之、姑以少償其鉛槧之勞、曾不得須臾以死。盛衰之變、可勝道哉。公雅能自寬、婆娑嬉遊、無憔悴留落態。暇則爲詩文自娛、至老不輟。有左氏國類二十卷、遂志齋錄十卷、筠陽雜箸二卷。以其年九月二十四日葬于朱旺、距所居五里。曾祖諱援、祖諱賀、考諱知元、承節郎。公享年七十有二。娶蔡氏、敦武郎秉圭之女。前公十五年卒。今祔公葬。子男一人、次皋。女一人、適進士曹源。孫男五人、長曰充、餘尙幼。予雖未及識公、而公之從孫亮相與友、實來速銘。銘曰、

髮如髻如、孫篋之初。閱五星終、甫從走趨。不酢其勤、卧起于于。命也奈何、保於其墟。

呂祖謙撰 《東萊呂太史文集》卷一二

永明主簿彭迪功墓誌銘

乾道辛卯十一月上浣、執喪彭君方燧、以其猶子免解進士郁持狀扶服踵門、泣告某曰、先君主簿既葬、敢請銘。某流涕曰、吾里故有燕許筆、如僕不文、請辭。方燧重拜、泣曰、禮以親、不得銘爲死其親、況先君辱知最故、銘莫如君宜、敢固以請。其言哀惻、輒刪取其狀序而銘之。維彭氏系出斟雉、世居金陵、其先有眞逸居士名忠、南唐李主高其操、兩以璽書招之、不起、遂隱於廬陵、儒行鄉於君爲曾大父。大父勝、父再德、皆有祖風。君諱恪、字邦憲、天姿穎悟、自幼軼群、日誦數千言、過眼不復覽。年且長、師大庾尉易蟠、時甫、屬文輒數千字。時甫曰、子駸駸逼人、老夫不逮、其別擇師。乃從鄉先生鄧公子充學。遭家多難、館於鄰陳氏。清節先生蕭公子荆亦客焉、遂獲請益。由是經史百氏、無不該洽、而獨以詩書名家。建炎初罷三舍法、復詩賦科、君獨首啓關鍵、一試輒中優等。清節書曰、吾友豈易量

耶。紹興甲子復行兼經法、預鄉薦、至癸酉復以詩賦舉。凡較藝屢占選首。於是講學於鄉、弟子受業者益衆、而與^①計偕者亦時有人。越十四年丙戌廷試、授右迪功郎、主道州永明簿。辛卯春被外臺命決湘潭獄、時邑長適出、攝邑事。未及行、肺疽作、一夕夢金章紫綬坐於庭、旁有吏數十抱文書直兩楹間、決遣未終、又數十黃衣趣行。急呼方燧立床下、曰、予少明經意、芥拾青紫、蹉跌至是、汗顏何言、疇昔之夢、其告之矣。爾兄弟勉繼志、無遺予九原羞。遂瞑。享年六十有八。實七年二月二十四日也。君儀容秀整、進退規矩、耻即邪辟、喜慍不形、是非不挂頰輔、處己待人、皆有條理。字畫不俗、每云漏雨畫沙、皆古人妙處、故雖訊子弟、亦不作行草。所蓄書多手自點勘、一一可觀。居室湫隘、安之廣廈如也。所與遊悉聞人正士、或徒步里巷、俗子遙望丰采、循牆避去。未受命時、以經訓諭爲職、既筮仕、

講書郡庠、遍舉先儒異同、出新意以折衷、聽者忘疲。先是湖南、北游學者、多訪求其文以歸、無不喜慰。至羸糧執經北面。有富室逋官租五年、吏莫敢詰、諭以理、而宿租頓足、咸頌君德化。有獄三歲不得情、談笑平反、人服其明敏。自是諸司有疑似、必即謀。明習政事、若素官然。文不蹈襲^②、而自出機杼。平生敦契義、謂睚眦仇不復可也。一飯恩決不可忘。感故人厚於己、訓其子至登名奉常。又有知己早世、而諸孤不臧、援理和解、遂兄弟如初。然不以爲德。與鄉薦也、總領彭侯餞其行、且曰、兄家登科亡嗣音者、弟素負學、豈但取一班一級以爲族榮。禮部侍郎周公保任出官、亦曰、夙蘊儒猷、雅通吏道。其爲時所敬如此。平日論議、有集三十卷、目錄十卷、藏於家。既沒、門人私謚曰文行先生。娶顏氏、先六年卒。男三人、曰祐、曰方燧、曰社。祐^③早卒。方燧嘗與偕計、社亦志於學。女三人、長適進士胡廷茂、

次適鄉貢進士曾維翰、次適進士任仰。孫男四人、允文、允武、允恭、允成。孫女二人、尙幼。方燧千里扶柩歸、以九月壬申安厝於儒行鄉南塘原夫人之墓左。蕭公諱楚、鄧公諱詢美、絳帳雲集、某與家弟嘗學焉、談邦憲不容口、咸稱兩公知人。銘曰、宦耶達耶翳其能、貂何夥耶。聞耶年耶繫其身、亦豈勸耶。夫皆絜楹、君獨數奇、非蹇產耶。

胡銓撰 《胡澹庵先生文集》卷二八

資州程使君墓誌銘

資州程使君以疾卒於治寢。在法、終於位則以官書、州之人愛使君、猶曰吾州使君云。李石於民之一也。公子師夔執經石門、用是走使以訃至、未幾以弟援狀以葬、葬緩銘亦緩、非他志也。石嘗評公之文、凡三變、始以經術、中以議論、終以叙述。經術之文淵而旨、議論之文陳而肆、叙述之文理而盡。凡向之以文字往來者、如大蘇尙書公符、小蘇博

士公籍、喻駕部汝礪、運副范公瓚、檢討邵公博、石與使君日處其間。其諸公之羣從子弟、執門生弟子禮者、多名人。日沓沓說文不離口、而所得於淵源有自者、未論其人、文可知也。如公、人猶以富貴功名期之、公亦自負以當世意、語溫厚而氣寬舒、學道之士君子也。時固有陰忌而軋之者、公不爲少屈、故以文自昌、而卒亦不達。石被丁丑召官太學、朝路多知公、葉樞密公義問、都御史公民望謂石曰、蜀秀如程君、引重諸公、俾來此、而公以書來告曰、誠有東下意、終不能隨金帛之舟以幸捷出。旣而石被罪上峽、值公舟留一夕、飲酒賦詩、去來彼此無礙也。公旣得州、石亦倅彭、書問不間斷如昨、未幾以訃至彭矣。嗚呼、士有艱於一進如公、而袞袞者肆焉、悲夫。公諱揆、字端卿。始祖浚儀令鐸、唐末入蜀、家眉之武陽。曾大父賢良公諱希甫、大父沂、熙寧間以經學教授犍爲、因爲犍爲人。父植、



儒藏

右承事郎累贈右朝散大夫。君宣和初以博士宋公齊愈挈之入太學補十舍與趙雍姚孝寧熊彥詩王晞亮孫汝翼爲同舍生。諸博士如孫逢者傾遲公以爲上庠之重。未幾以春秋科登建炎二年進士第任彭州司戶參軍試中學官潼川府教授。以十策干樞密張公浚奏差榮州軍事推官再除成都府學教授循左文林郎以舉員改宣教郎通判瀘州轉左奉議郎丁父大夫公憂服除轉左承議郎通判成都軍府除知昌州未赴丁母夫人憂轉左朝奉郎知資州覃恩轉左朝請郎感疾致其事以卒年六十一。卒以隆興二年某月日葬以乾道五年某月日。初娶黃氏給事公哲之女先卒。再娶王氏左中奉大夫咸之孫五子長師契從政郎次師稷師夔師望師岳三女長適將仕郎何震次適承直郎張仲堅次適承直郎王子然公爲政一切以推行所學爲本崇大體略細故愛民惜物爲

務所至有能稱。崇學校以養士蓄帑廩以足兵敦儉約以革浮用清靜以矯俗抗益瀘兩帥之橫則義動於色而有貳郡之禮革資中擾政之弊則權出於一而得專城之舉。自筮仕至老不衰其有志未盡見於事功亦一世奇傑之氣終不沒也。文集五十卷通鑑發揮十卷春秋外傳十卷尙書外傳五卷史評二卷雜誌三卷佛心印三卷藏於家。公疾革屬其子必欲得石銘銘曰

程眉聞家如蜀之文有來犍爲山之一雲雲有五色孕爲斯文不亟以徐厥用將大指我如風所觸無礙文之用舍關天成敗浩乎廓然有志永齋是碌碌者吾文曷施著書滿家父則已菑後將穫之以永銘詩。

李石撰 《方舟集》卷一六

冲虛居士錢君朝彥墓碣

三代盛時四民有常職農服田工商宿業惟士最



貴世祿爲胄子、賓興爲賢能、不以外物而遷、故能各底於成、勃興驟廢者鮮。自井田壞、田業俱失、農與工商旣散而逐末、貴族降在皂隸、秀民不復鄉舉、人才無所於歸。或橫議如孟子所云、或潛山隱市如杜牧所論、於是處士之名著焉。在戰國時、高者取卿相、下不失尊禮。至於後唐、有公車特召、有藩鎮辟召、得人與否、班班可考。本朝數路取人、惟恐遺賢、其間懷才抱義之士、門蔭科舉所不逮者、尙或有之。上方一道德以同風俗、特命起家、絕無僅有。下亦各安分義、不求聞達。然降才於天、積善在躬、源深流遠、終裕乃後、肆其子孫、修身勵業、自足進爲於世、而天復有以相之。凡今顯者多出於此、永嘉錢氏其一也。初、忠獻王奉兩浙地圖歸聖朝、後裔散居四方。諸孫有諱輯者、嘗爲韶州刺史。輯生尙、端州司理參軍、游溫州樂清、愛白石風土、家焉。尙生恬、恬生潔。潔生二子、忠卿字某、堯卿字

熙載。世以文行稱。紹興十四年詔舉孝廉、州縣以熙載應選、未報而沒。忠卿生一子、諱朝彥、字用明、謙退和易、少從孝廉學周官、業成身隱。每出未嘗乘車、或勉之、過市即下、曰、吾不仕、不宜坐人上。家貧不能周急、力可及亦弗靳。遇樵夫野叟無高下迭爲賓主、鄉人莫不敬愛。晚喜道家說、自號冲虛居士。白石有巖、巖有集真觀、高出群山之表、歲從黃冠避暑。酒酣、相與浩歌起舞、吹洞簫、人望之、疑以爲仙。素善章少房、少房死、過其墓必酌酒酹之、與人交類此。雖督諸子以學、每曰、教之在我、其成有命。作詩不求工、而語有塵外趣。名卿太子詹事王十朋稱其不羨不矜、心休休然、鄉評以爲知言。卒年七十七、有冲虛集二十卷。夫人同郡孫氏、贈承事郎士初之孫、奉議郎知紹興府嵊縣朝之女。四歲知書、父授以孝經、論語。歸居士時、祖姑鮑姑賈皆在堂、群從聚居、婦道孔艱。夫人早暮躬盥饋、

接姻戚約已裕人、內外稱賢。姑末疾累載、奉事無少懈。其沒也、哀慕三年如一日。以乾道庚寅十月辛卯終於家、年六十三。明年十一月丙申、葬縣之茗嶼鄉白石南山之原。後十年、當淳熙庚子七月丁丑而居士沒、是歲十月己酉、乃合葬焉。四子、宿、賓、寬、宏。女適陳濤。孫正之、松之、釋之。宏字文子、後以字爲名、通經術、工詞章、國學上舍、釋褐魁、初仕吉州軍事判官、今以宣義郎知潭州醴陵縣、格當官成均。屢求予碣其先墓、於是宿、賓、寬俱死矣。案孝廉有子曰朝佐、朝佐生易直、試南省第一、今爲太學錄、文子從弟也、錢氏其昌乎。故爲推原古誼、振宣幽光、而繫以銘曰、

志氣內光、樂無窮、德善久積、吉有終。根本固者枝葉穰、菑畬勤哉黍稷豐。報施在天、理可通、富貴豈必於其躬。松檟鬱然馬鬣封、里人過之常敬恭。

周必大撰 《平園續稿》卷三八

校記

- ①懼：原作「悖」，據四庫本《鴻慶居士集》改。
- ②叙：原作「激」，據《宋史·地理志》改。
- ③將帥之才：「將帥」二字原無，據文意補。
- ④以：原作「已」，據武英殿聚珍版本《南澗甲乙稿》改。
- ⑤左從政郎：原作「左從郎」，「從」下脫一字。按《宋史》卷一六九《職官志》九，政和末所定官階，從政郎比舊官錄事參軍、縣令，此當是脫「政」字，茲補。
- ⑥左湘江：原作「右湘江」。按湘江在衡陽城之東，當云「左」，徑改。
- ⑦與：原作「於」，據文意改，下文云「與偕計」，是也。
- ⑧襲：原作「褻」，據文意改。
- ⑨祐：原無，據文意補。
- ⑩恬：明澹生堂抄本、四庫本、傳增湘校本周必大集均作「浩」。下句同。

宋儒碑傳集卷一百八

胡鎬 鄒宗謨 舒黻 穆深之 史浩

王伯庠

從周弟墓誌銘

某從父弟鎬。字從周。皇曾祖諱璉。皇祖諱愷。俱膏肓泉石。皇考諱汝明。贈右宣教郎。皇妣孺人任氏。孺人羅氏。從周少從師學。兄弟同堂五人。自爲朋友。而從周與某齒最近。親講說爲密。靖康丙午。某與國學薦。從周亦偕計。同試奉常。某中龍飛榜。從周不偶。紹興乙丑。始擢第。授左迪功郎。尉新淦縣。奉命惟謹。獄有死囚。根柢牽連。鞠歲餘。冤不能白。從周訊問情得。力平反之。一邑駭服。他日囚賫賄謝更生。不受。令素貪。查不遜。不之校。及終更。部使者劾其過。俾從周羈留之。笑曰。人謂我宿怨。乃趣之行。而以前出境爲解。鄉林向公伯恭歎曰。眞長者。循左從政郎。靖州判官。溪徭懷服恩信。婉畫爲

多。秩滿。調贛丞。贛吉比鄰。知盜斂之習。諭戢有方。俗爲之變。郡守任公盡言雅見器許。會令闕。俾攝領。逾數月。不擾而辦。民曰。於我有德。郡憲黃公績賞其清強。滯訟必我乎決。初。某狂瞽忤宰相。從周落選二十年。或諷少媚奧。則曰。若我可薦。姑從之。不可則已。吾終不求。某既脫丹圖。丞相魏國張公首薦從周於朝。其略云。居家孝友。涖官廉勤。章上。改左宣教郎。除諸王宮教授。久之。轉左奉議郎。輦轂三年。非公事未嘗一至文昌臺。樞密劉公嘉其靜退。嘗曰。朝廷當以中秘處之。會出鎮鍾陵。不果。就除棘寺主簿。兼攝丞。執法乎恕。狴犴以空聞。有詔獎諭。遷左丞議郎。賜五品服。甫越歲。力丐補外。除荆湖南路參議官。從周久倦遊。及門親交強之。不獲已。止與猶子渙偕。職閒清坐。議古終日。長沙地卑濕。苦腫腿。顧謂渙。生平世味薄。矧今且疾。求罷數四。帥陳公尙書季若色變曰。其謂我不優賢。



乎。既劉公復來、重致懇、劉公曰、曩嘗欲薦弗克、今幸同僚、而輒聽其去、人謂斯何。則喟曰、義難以官養病、雖頃刻不可留。疾竟不起。實乾道九年九月丁未也。享年七十。從周性疏財、會要贏耗不入耳。俸稍緣手盡、喪不能舉。劉公命纖悉調護、乃克歸。天資渾厚質直、洞見誠實、不事表暴。容人過、胸次廓然有餘地、尤樂易、愈即之而愈不厭。居官若里人、無一失歡者。聞其沒也、皆失聲相弔。自幼少、一無子弟之過、迄於壯老。某處嶺海二十有一年而還、二老雪髯秀眉日相從、潔樽滌茗、謂當如昔人共享黃髮期之句、從周忽爲長逝、可悲也已。娶陳氏、繼娶劉氏、皆封孺人。子男五人、汲、濤、泗、沔、澣、皆習儒業。汲前一年卒、泗前十一年卒。女二人、長適鄉貢進士曾三益、次未聘。孫男三人、棫、栒、悉嗜學。女孫四人、長許進士劉大方、餘尙幼。曾孫男一人、煥。曾孫女二人、皆幼。淳熙元年四月癸酉、葬於

吉水縣中鵠鄉白蓮塘之原。初、從周之官、某罔罔若有失。一日據繩床假寐、忽夢從周來歸、告某曰、朱褒、覺而識之、然不解其義。既訃至、以所夢語直院侍郎周公子充、答曰、朱謂書丹、褒謂銘也。從周其以銘屬乎。及是、某適以幹至秣陵、猶子登仕郎瀟、迪功郎新靜江府司戶參軍昌齡以狀來速銘。某泣曰、周公豈欺我哉。遂叙而銘之。銘曰、魏公斷斷、不妄許人。八字之褒、華袞匪珍。伐石勒銘、我豈貌言。山峨水沔、白蓮在原。

胡銓撰 《胡澹庵先生文集》卷二八

宋故鄒府君次魏墓志銘

臨川自丞相王文公以鴻儒碩學啓迪後學、爲大宗師、天下之俗一變、通經學古、尊王賤霸、源源然日入於道德矣。紹興初、余以臨安尹觸罪徙嶺表、奏臨川道、訪公之遺阡、則墓木拱矣。而流風餘韻、猶存乎弦歌之音、舞雩之詠、彬彬如齊魯焉。當是



時郡人鄒君次魏者、始從余游、自六經、百氏諸子之書與太史公所記無不讀、文詞古雅深厚、有典有則、笑語不妄、進止可識、未嘗佚游燕嬉、以棄一日、蓋先君之澤也。比余蒙恩北歸、積六七年、相望二千里、次魏惠然過余、而學益博、行益高、文益奇、雄深辯麗、亶亶數萬言、終不肯出一伎投衆人之耳目、以阿世俗之所好。嘗隨計一試禮部、率齟齬不合、而驚然不屑、直意慕古作者於千百歲之上、惜乎未見其止而遇疾以沒。年四十二、實紹興十六年某月某甲子也。於是次魏之友黃允元狀君行事、世次來請曰、次魏著書探道、師慕賢達、固馳驅一世以就功名、而天不假年、不究於施設、不博見於天下、竟賁恨以死、而身後之名、猶有待而傳也。公宜銘、遂叙而銘之。次魏諱宗謨、姓鄒氏、次魏其字也。曾大父齊、宣義郎。大父餘、建中靖國間歷三院、爲侍御史、與鄒志完、陳瑩中、江民表同時任

言職、其言專以銷朋比、開公道爲急。崇寧初、新將相用事、得罪貶死。父陶、字志新、名臣子、潔修介特、有奇操、里中伏其高。次魏娶甘氏、某官某之女。生四男子、曰升卿、子卿、春卿、夏卿。二女、適甘以寧、趙良史、皆善士。孫男一人。以二十年十二月十七日葬於宜黃縣吳城之原。初次魏之亡也、志新哭之、過時而悲、余移書勉之曰、死生天壽、天也。公其如天何。余聞人定者勝天、天定亦能勝人、鄒氏以儒名家、父子祖孫種德藝善、閱三世矣、第少忍以待其定也。未幾、幼子纔七八歲、誦其書曰、千言、出語不凡、一時歎譽號奇童。噫嘻、次魏爲不亡矣。銘曰、矯矯鄒公、著節御史、蓄厚不流、鍾此奇偉。追驂群聖、馳騁百氏、有德有言、宜壽而貴。誰主誰謀、半途而稅。有生必死、萬物一致、炊未及熟、俯仰一世。惟是不朽、遺書滿笥、渥窪之奇、墮地千里、以爲不信、歸視其子。

孫觀撰 《鴻慶居士文集》卷三六

先君承議公墳誌

先君姓舒氏、諱猷、字德濟、世家明之奉化。曾祖諱文吉、祖諱惟政。考諱卞、承節郎、贈宣議郎。妣王氏、贈孺人。先君自幼力學於伯氏諱黼、文行重於鄉。以七十上禮部、對策入等、授右迪功郎、贛州贛縣西尉。任滿、循從事郎、監行在贍軍激賞東庫、再監潭州南嶽廟。致仕、轉通直郎。淳熙己亥七月初三日、終於正寢、享年七十有四。以其年十有二月甲申朔、合葬於金溪鄉永豐里廣教畧妣孺人李氏之域。七子、曰琬、鄉貢進士。曰琰、曰球、曰琳、曰琥、國學進士。曰璘、迪功郎、信州州學教授。曰琪、孫男二十三人、某某、一未名。球、琥及銳先卒。女孫十一人、長歸李元琪、次適張南圮、餘未行。曾孫男一人。先君忠厚誠篤、敦行孝弟、尚論古人、必以檢身、夷考載籍、務明治道。聲色貨利不入於心、故處家庭、在

鄉黨、守官涖民、咸有典則、可紀述。興國軍教授、臨川陸先生九齡嘗謂人曰、舒君溫恭、足以倣傲惰之習、粹和足以消鄙倍之心。聞者以爲篤論。某等欲請銘於陸君、迫於窀穸未克就、其行實則有友人揚州州學沈煥爲狀。某泣血紀歲月納諸墳。迪功郎、廬州舒城縣尉李過庭書諱。

舒璘撰 《舒文靖公類稿》卷二

穆承奉墓誌銘

惟國家靖康用兵以來、急於邊餉、許人以輸邊補官、與理選限。士有艱於科舉、每指爲捷徑、往往階此躋顯仕、而不以一進之爲污。國中之士、往往各挾所有、折而從之、銓選益廣、品流益雜。間有仕不得試、試不得盡、如吾友穆深之、其人也。深之幼負奇志、舉九經童子、至京師、會科罷、西歸、專意禮學、與弟湘俱有名場屋。累舉不售、尋以邊勞補迪功郎。鎖闥是歲、果以周禮爲運司首選。旣下第、會張



魏公宣撫四川、深之挾文謁轅門、爲所稱賞、辟綿州司理參軍、又辟劍州某縣主簿、欲要致幕屬、會罷司、不果。又從總領待制趙公辟、撥發船運。深之蹭蹬州縣、乃歎曰、吾書生、假此求仕、況仕本爲貧、吾不屑此、忍鬱鬱向來下第習氣乎。褐衣冠隱焉。俄以恩轉承奉郎、牙緋致仕、士論高之。世豪於貲、至所自處如寒儒、士與之交不厭。深之藏書萬卷、博學喜讀書、好議論性理、通貫二氏。多藏法書、名畫、奇玩、動至數千。又有園亭甲乙勝處、持是以交四方名輩。人知深之儒者、不知其富也。如提刑馮時行當可、侍講程敦厚子山、皆其素交。虞雍公入蜀、聞其隱退、辟深之子爲屬、欲因致之。深之以老辭。雍公曰、達人也。姓穆氏、世爲彭望族、諱某、字某、年六十九。卒以淳熙元年正月己亥、葬以二年三月丙戌、域某縣山原。深之孝友、治家可法、喜施、不妄予。每公私借貸、率爲彭豪倡、州縣賴以濟、多得

往來賓客之譽。余倅彭、與深之游、日說學哦詩、炷香啜茶、出所藏縑緙、評第高下、眞贗。歷環堵、觀明窗、棐几、所居澹如也。彭堰務本、民私自出力、至以水利致訟。熙寧以來、乃始委官督。部民倚官多出緡募夫、歲夫不集、益調春夫。余改令民出米飯夫、尅以歲前一月辦事。食水家與胥曹利於哀掠與春夫之再起、爭沮其說。獨深之贊余說、倡諸家出米、至是省三十萬夫、而春夫不復起矣。深之嘗欲俾予書之、未果、故併叙其末。曾祖某、祖某、父某。娶某氏、三子、曰某、曰璋、曰璵。某後數月以毀卒、祔葬。二女、長適修職郎景大同、次適從政郎雍壽寧。孫二人、紹孫、重孫。深之臨死、屬其子璋、璵曰、當得方舟子銘吾葬。且璵游學吾門、友人蘇楠於牀前聞其語、助其請甚力。銘曰、

四楠堂上、炷香瀹茗、誰賓誰主。練江分流、遶於花竹、樂此春莫。嗚呼、桑下之嗟、樹下之踞、吾不欣戚。

於其毀譽。蓋窆而藏銘以爲固。

李石撰 《方舟集》卷一六

純誠厚德元老之碑^③

高宗皇帝以孝宗君德日就將屬以社稷妙選天下學行端粹之士以輔導之。紹興二十有九年太師會稽郡王史浩以國子博士奏事殿中高宗一見契合屬目送之。諭大臣曰浩今日有用之才也。除秘書省秘書郎。粵五日兼普安郡王府教授。受知高宗被遇孝宗實昉于此。明年孝宗封建王遷司封員外郎兼直講。又明年爲宗正少卿。三十二年五月立皇太子擢起居郎兼左庶子。六月孝宗受內禪遷中書舍人兼侍讀。十日爲翰林學士知制誥。八月參知政事。明年正月拜尙書右僕射同中書門下平章事兼樞密使。未幾罷政再典巨藩。淳熙四年春召爲侍讀。五年三月復拜右丞相。十一月罷仍侍經筵。八年告歸得請一再召見恩賚

架渥。每以老先生呼之。孝宗移御重華宮以宴處清閒思見舊學太上皇爲放詔諭賜御札。明年遣幹辦御藥院楊舜卿撫問趣行命守臣以禮津發。旣入覲孝宗顧公曰卿輔朕初潛親遇朕建朱邸陞儲宮登大寶兩居相位三入經幃逮今三十餘年君臣相得殆非他人比也。五年四月五日公薨于里第之正寢。訃聞孝宗上皇震悼賻贈有加。有旨以公身居極品又爲壽皇潛藩舊學贈卹之典宜從優異可特追封。自餘賻葬恩數並如陳康伯例。今皇帝登極賜諡文惠親灑宸翰書純誠厚德元老之碑以賜焉。且命臣鑰爲之文。臣以末學待罪北門乃得對揚明命敷述盛美以詔不朽。臣雖甚陋何敢辭。竊伏思自古君臣以遇合爲難而篤眷不替善始以終殆千載而不一遇也。方孝宗以藝祖統系之遠承高廟付託之重時公以所學糾正贊弼自其緝熙光明推而至于事親以孝事天



以誠兵不輕用、刑不妄施、人才盛多、夷夏乂肅。孝宗繼志述事之功、承顏順色之愛、刑于四海、光于萬世、而又惠顧帝師、日篤日親、昨我太師、福慶流衍、光大顯休、追媲典謨。孝宗奄棄慈極、公先六旬以遺表聞。嗚呼、豈偶然哉。公諱浩、字直翁、世爲慶元之鄞人。曾祖簡、祖詔、父師仲、俱贈太師、冀國公。曾祖妣葉氏、祖妣徐氏、妣洪氏、俱贈冀國夫人。曾祖蚤卒、母葉夫人有遺腹、指天自誓、願得子以續史氏之祧、是生公。祖教之甚嚴、以八行薦于朝。積德垂祐、浸大其家。仲子才、紹興二十三年爲簽書樞密院事。公又繼登揆路、衣冠盛事莫尙焉。公性穎異、記誦絕人。少孤、自力于學、貫穿經史、理致超詣、措詞持論出人意外。年四十始登進士科、授左迪功郎、紹興府餘姚縣尉。尋爲溫州州學教授。郡守張九成有重名、待以國士、諸生推崇之。以中書舍人吳秉信薦除太學正、遷博士、改宣教郎。自此

六年、以至相位、近世未有也。公智慮深長、臨機輒斷。平居若不勝衣、而剴裁勇決、毅然不可回。推究經旨、多先儒所未發。引經處事、動中要領。完顏亮南牧、邊廷用兵、建王抗疏請爲前驅、誓不與賊俱生。公方以疾移告、聞之、亟往問、孰爲大王計。誤矣。國步方艱、父子豈可須臾離。使唐肅宗能隨明皇幸蜀、安得有靈武事。建王大悔、立俾公草奏、請扈蹕以供子職。辭意懇到。高宗聞議出于公、歎曰、眞王府官也。廟堂方議以建王督師、由是不果。遂從視師之行、而內禪之意決矣。高宗將過德壽宮、公議嗣皇當乘馬扶輦。高宗諭公曰、執轡前導、不足爲法。公對曰、臣于肅宗何取。父行而子隨、萬世不易之道也。孝宗竟用公議。高宗數遣使邀還、出皇城門而止。旣參大政、召宴禁中。公奏、臣頃在翰苑、雖暮夜宣召、可也。今居政地、非有中使、不敢前。若恃恩奔命、非大臣體。孝宗深然之。嘗問當今施設

何先公曰、莫如保邊境、收人才。前言辛次膺、張燾人望所屬、即日召還。又薦周葵、任占、胡銓、張戒、王十朋等、以次收用。公平時咨問天下人物、有所聞、密疏其實、且識言者、錄爲一編、皆于此乎取。又得金安節、王大寶、周必大等三十五人、各書所長以聞、並爲時用。嘗對德壽宮、高宗曰、皇帝誠孝、卿輔導之效居多。今又得卿佐之、朕心亦安。又曰、卿爲皇帝親臣、凡有規正、不可回忌。賴卿悉力調護。公既推謝、次日又因奏事言之。上封事者多乞減任。子公請歲一試、且損其額。試者必習所業以應詔、既不傷恩、足以激厲。孝宗顧左相陳康伯、議合。公因奏凡有所陳、皆先與丞相議而後言。自是臣僚奏請、更改政令、必先以示公、然後施行。嘗因諫擊鞠事、張燾共政、退而曰、相公愛君至矣。燾又嘗語人曰、參政今之賢輔、不可妄議。向來柄臣得君、多以威嚴脇人、史則不然、事多迎刃而解、志于寬厚。

上前別白是非甚明、宰相器也。康伯乞罷政、孝宗批問恩禮已盡、當與何職、意蓋屬公也。公即奏康伯前朝老臣、不可不留以爲重。若其請未已、必得德壽聖諭、可安其意。是日高宗賜以御筆、康伯乃安職。尋密詔公曰、朕粗勤庶政、然軍務民事未得其要。若礦金璞玉、方以卿爲良工、其毋怠焉。公既相、益思所以報上者。首言前宰相趙鼎、參政李光之無罪、大將岳飛之久冤、宜復其官爵、錄其子孫。凡坐廢者、次第昭雪、悉從之。時外建都督府、歸正人及諜者日衆。公雖憂之、而深察其能否、故拔皇甫倜于境外、官胡昉于書生、皆賴其用。有滕忠信等八人、還自山東、自言已結集萬五千人、可爲內應。公詰問再三、皆無其實、語塞汗下而退。初已借閣門宣贊舍人、遂令赴督府。張浚亦以其無證、僅補承信郎而已。燕人劉蘊古該通古今、談辯如流。一日濠州奏募到北方游手僅萬人、欲以營田。蘊



古力請以抗敵。時欲許之。公獨謂此必姦人。姑欲藉以反其國耳。因詰之曰。樊噲欲以十萬橫行匈奴。季布猶以爲可斬。君得萬人。何以成功。蘊古錯愕。不知所對。曰。此皆無家。必不爲朝廷留。不如乘其未定而用之。公曰。其家不來。宜無固志。不知君家何在。蘊古曰。老幼皆在幽燕。自知失言。戰灼久之。後因刺探事宜。私遣僕歸燕。僕以告。遂伏誅。吳璘以兵取德順。捷至。方議行賞。公奏。諸葛亮出師必攻陳倉及郿。即今之鳳翔。得之則可窺長安。高祖出漢中。正此道也。姜維舍此而多出隴西。狄道臨洮。得之無益。今乃蹈維覆轍。臣恐遂失蜀矣。宜勉諭其歸。登命公即選德殿廬。作詔令。徹戎班師。專保蜀口。以俟大舉。斯須而就。詞旨明暢。孝宗閱之曰。他人必不能道朕意。奇才也。旣而吳拱。王彥奏敵已扼璘歸路。方募人往報。璘亦勢迫。間道以歸。袁孚罷右正言。公曰。初政而遽去諫官。何耶。孝

宗曰。妄言德壽宮有私酤。公曰。陛下事親可謂曲盡。然宮中左右皆閹官。有何知識。若非言路時以正論折其萌。則將有甚此者。上怒少霽。又奏。諫官無故而罷。天下必以爲疑。若暴其罪。恐啓兩宮之間。願少須之。使其引去。尋除直秘閣。知溫州。自是益無纖芥之隙。張浚屢奏欲取山東。公曰。宿師于外。守備先虛。我能出兵山東。以牽制川陝。彼獨不知警動兩淮。荆襄以解山東之急耶。惟當固守要害。爲不可勝之計。必俟兩淮無致敵之慮。然後可前。若乃順諸將之銳氣。收無用之空城。寇去則論賞于朝。寇至則僅保山寨。顧何益乎。繼而大將李顯忠。邵宏淵奏乞進兵。公又奏。二將輒乞戰。豈督府之命令不行耶。浚繼請入覲。乞即日降詔幸建康。孝宗以問公。公陳三說。謂若下詔親征。則無故招致敵兵。寇邊何以應之。若巡邊犒師。則德壽去年一出。州縣供億重費之外。朝廷自用緡錢千四

百萬、今何以繼。若曰移蹕、欲奉德壽以行、則未有行宮。若陛下自行、萬一敵人有一騎衝突、則都城騷動、何以處之。孝宗感悟、曰、都督先往臨邊、俟有功緒、朕亦不憚一行。浚言、陛下當以馬上成功、豈可懷安以失事機。公執不可、退。又以詰公、公曰、帝王之兵、當出萬全、豈可嘗試而圖僥倖。主上承二百年基業之託、漢高祖起于亭長、敗亡之餘、烏可比也。尋復論辯于殿上、浚曰、中原久陷、今不取、豪傑必起而收之。公曰、中原決無豪傑、若有之、何不起而亡金。浚曰、彼民間無寸鐵、不能自起、待我兵至而爲內應。公曰、勝、廣能以鉏耰棘矜亡秦、彼必待我兵至、非豪傑矣。若有豪傑而不能起、則是彼猶有法制維持之、未可以遽取也。今不審思、將貽後悔。又上疏力諫曰、靖康之禍、臣子孰不痛心疾首、思欲喋血北廷、以雪大恥。恭想宸衷寢膳不忘、然邇安則可以服遠、若大臣未附、百姓不信而遽

爲此舉、安保其必勝。浚老臣、慮宜及此、而溺于幕下新進之謀、眩于北人誑惑之語、是以有請耳。德壽豈無報敵之心。時張、韓、劉、岳各擁大兵、皆西北勇士、燕薊良馬、猶不能進。今欲以顯忠之輕率、宏淵之寡謀而取全勝、可乎。惟當練士卒、備器械、固邊圉、蓄財賦、寬民力、十年而後用之、則進有關國復讐之功、退無勞師費財之患。此臣區區素志、實天下之至計也。督府乏用、欲取之民、公曰、未施德于民、遽重征之、恐外賊未必至、民貧將自爲盜。康伯與公相顧、同奏曰、必欲取于民、臣等皆當丐退。上爲之給虛告五百道以庚費。浚又奏歸正人當優待之、公以爲不可。浚、康伯俱曰、彼以善心至、安可拒乎。公又兩入奏、其一曰、敵曰爲姦謀以撓我、縱流民以困我、而沿邊方以招徠爲功、數年之後、蠶食旣多、國用益乏、彼將反有怨悔之心、可不遠慮乎。固不可絕其內嚮之意、其有至者、當諭之、使



安土以俟恢復。彼且無所歸怨而敵亦知國之有人。豈應先爲自蹙之計。其二曰、棄實而務名、捨近而謀遠、見利而忘害、願棄名取實、以集大勳。先近後遠、以安邊鄙。見利思害、以杜亂萌。言甚切至。又與浚言、平時願執鞭而不可得、幸同事任、而數日議論不同、不惟爲社稷生靈計、亦爲相公計。相公養成名望、一旦失利、豈不有損威重。浚曰、公言良是。但浚老矣。公曰、杜預輩有平吳之功、而晉歸功于羊祜。以祜立規模、而預竟其功。相公若先立規模、後使人藉是有成、亦相公之功也。何必身自爲之。浚因內引、奏曰、史浩意不可回、恐失機會、乞出英斷。旣而省中忽得宏淵出兵知稟狀、始知不由三省、徑檄諸將。公語康伯曰、吾屬俱兼右府、而出兵不得預聞、則焉用相哉。由是求去不已。孝宗曰、何苦至是。公對曰、道德元老、無如陳康伯。忠義慷慨、無如張浚。臣與之議論俱不合、諸將出兵而臣

不知、近習積憾而臣不去、尙何待乎。因又言、康伯欲納歸正人、臣恐他日必爲陛下子孫之憂。浚銳意用兵、若一失之後、恐陛下終不得復望中原。臣即日去國、遂遠清光。然惓惓之忠、不容緘默。言訖、拜辭而退。遂以觀文殿大學士知紹興府。公力辭、提舉臨安府洞霄宮以歸。未及月而宿州失利、喪士馬甚衆、軍資器械不可計、人心沮喪。上降詔罪己、而浚亦自劾去位矣。初、浚措置萬弩營及他所建請、公應之如響。或問之、公曰、事力未備、故止其進兵。若邊防捍禦、安可不從。公旣去、其所奏請多不以時報。浚亦悔之。嗚呼、公本欲修政固圉、裕民練兵、雖不求近功、而規模甚遠。議者不察、以爲獨無意于事功、惟知之者乃信其非苟爲異也。公卜居東湖之麓、徜徉山水勝絕之地、以奉親歡。歲時賀表外、不以一字至行在所。後除四川制置使、知成都府、以親老辭。月餘、改知紹興府、兩浙東路安

撫使。孝宗見公首曰、卿前所奏陳如龜兆數計、無一不驗。從容賜坐、訪以治道。公以求治太速、聽言太雜爲對。至鎮、爲民興利除害、不可縷舉。越人至今德之。進檢校少傅、領保寧軍節度使。會洪夫人屬疾思歸、力丐祠、不允。乃許謁告迎侍。未幾罹內艱。公性至孝、平日奉母甚周。孝宗素知之。在王府時、得上方珍饌、必以分遺。登位之後、間問動靜。以正旦賜酒肴使爲壽。特于洪夫人生朝拜公爲相。又嘗以御筆徑賜之曰、丞相今日正謝賜酒果、爲太夫人之慶。其歸自帥閫、旌旄行前、公擁版輿于後。人子之榮極矣。至是悲毀骨立、忍哀舉葬。纖悉周備、世所難及。前即吉數日、除知福州、兼福建路安撫使。避魏王同鎮、改崇信軍節度。入對、賜宴內庭、勞問加優。後三日、除開府儀同三司。公自言、臣何功德、叨此眷寵。孝宗指心而言曰、于此甚有功。朕學力堅固、心術明正、皆卿之力也。初過越、老穉

迎拜擁道、有垂泣者。時方滋爲帥、謂公曰、公去此時、有緡錢十六萬、米斛四萬、漕司取充羨餘、遂爲歲例。奈何。公奏除之。至閩、盤山路七百餘里、葬旅櫬以千萬計、闢官舍以益貢闈。每事立規、四方傳以爲式。建劍四州多不舉子、臧獲則取于福與漳泉間。公置田爲莊、貧婦孕育月有所給。既使生齒益繁、又免誘略之害。淳熙元年秋、丐祠、提舉洞霄宮。後三年、孝宗問執政、久不見史浩、無他否。遂除少保、觀文殿大學士、充醴泉觀使、兼侍讀。頗聞有尼之者。至兩降親批、三遣金字牌、又取尙書省移文封以付公、不得已而後起。抵都城、聞輔臣謫英州、及見奏曰、陛下未嘗以大臣投嶺南、實國家忠厚之意。此門恐不可開。孝宗唯唯。他日語近臣曰、史浩厚德人、蓋深知前日事也。進讀三朝寶訓及眞宗正說事關治體及當法祖宗者、必委曲援引、開廣上心。嘗宴澄碧殿、酒數行、步至清激觀機泉、



宣勸無算。至二鼓。孝宗攜手登橋。又賜三爵。命宿玉堂。夜參半。引雙蓮燭以送。且曰。此游不可無紀。是夕公進古詩三十韻。孝宗和答之。引陳襄故事。薦石斗文等五人。皆赴闕。既再相。孝宗曰。自葉衡罷。虛席以待丞相久矣。與執政入謝德壽宮。高宗曰。卿再入相。天下之幸也。公以士夫留滯旅寓者凡八百人。各隨其分處之。爲之一清。初相時。蜀帥以緡錢獻。公謂宜以儉德風天下。請以賜蜀郡。復二稅。是年紹興所獻復倍此。孝宗曰。卻之必有散失。姑令封椿如何。公對曰。郡方困于和買丁錢。願以代輸其半。孝宗欣然從之。是年金曆以八月晦爲九月朔。或言會慶節使人將先一日入境。請治曆官。公曰。天道難測。未知孰是。而遽治曆官。是自彰其失也。但當諭接伴使。若使人渡江。則當語以晦朔尙可議。皇帝生辰則不可改。先一日。乃是藝祖忌。後若欲行慶禮。當如舊期。孝宗以爲當。後皆

如公之言。車駕既幸太學。公因請幸秘書省。三衙皆與坐。乃奏。閤門舍人方以比館職。亦當列于西廡。崇儒矯弊。皆有深意。孝宗謂公視文武如一。爲得大體。十月。諸軍以多闕額。又有逃亡。請得自招捕。許之。而並緣強取。被掠者或至斷指以求免。都下洶洶。公飛奏盡釋所捕。又禽爲首者送棘寺。宣宰輔及樞密都承旨議罪。欲取兵民各一人梟首以徇。公謂未得其平。兵士可斬。百姓陸慶童當坐流罪。上怒。不以爲然。公曰。陛下恐軍人有語。而百姓爲可欺耶。豈不聞等死死國可乎。此豈是軍人語。上愈怒曰。是比朕爲秦二世也。同列相顧失色。公徐進曰。如時日害喪。予及汝偕亡。豈二世事。聞者縮頸。而公不爲動。議罪既如初。遂曰。求去位。除少傅。保寧軍節度使。醴泉觀使兼侍讀。後有言慶童之冤者。孝宗曰。史浩蓋嘗力爭。坐此求去。至今悔之。賜第城中。出御製長春花詩酬和。至再。以示

眷留之意。又薦薛叔似而下十五人。叔似召用。餘以次收擢。佑聖觀故建邸也。孝宗嘗自北宮臨幸。語曰。去此十七年。今得與卿爲豐沛故人之飲。可謂盛事。甘盤無此樂也。公屢求歸。時陳俊卿已奉祠。八年二月。除判建康府。公奏。俊卿年未及七十而去。臣以七十有六而往。豈不媿見吏民耶。孝宗嘗自擬館職策。極言取士用人之弊。大要謂國朝過于忠厚。以示公。公讀畢奏曰。太祖不忍殺一不辜。以得天下。累朝仁德。至仁宗而大備。夫忠厚豈有過耶。乞改曰。一于忠厚。孝宗曰。非卿不能爲此言。五月。始許歸。除少師。留至八月。陛辭。猶進八事。十年。請老。除太保致仕。公嘗歷永、衛、魯三國。公于是進封于魏。仍如曾公亮例入謝。明年。先降旨。候至國門。百官郊迎。見畢。對御賜宴。用文彥博故事。道中具辭再三。奉俞音。乃絕江。公晚治第西湖之左。哀兩朝所賜御書。建閣以奉之。因奏聞。孝宗書

明良慶會之閣。以賜公。謝不敢當。孝宗曰。古人願爲良臣。卿輔朕之久。日聞忠言。深悟朕心。尙何嫌乎。敕後苑造扁榜。命中使馳賜之。上嘗以舊學二字。即政事堂。賜公。同列咸曰。自古際遇莫盛于此。請鑄諸石。爲省中榮觀。公又謝不敢。旣歸。以名其堂。歲遇誕日。錫以金器者十四年。年八十。又加器寶。兩宮使命相望。高宗再舉慶典。詔公隨班上壽。進太傅。賜玉帶金魚。踰月乃東。上皇御極。進太師。降詔求言。首及故老。公上封事數千言。皆當世要務。重華之召。引辭甚切。孝宗誥曰。今與卿皆閒人。當衣褐見。何必求免耶。詔乘肩輿入隔門。仍命孫定之扶掖。特改京官。朝退。次詣重華。孝宗從容謂公曰。與卿復得相見。旣無嫌疑。足可爲度暑計。毋亟言歸。因奏。陛下躬行三年之喪。復見堯舜三代之盛。孝宗曰。此皆卿平昔所以語朕者。今日得以行之。正如滕文公盡哀戚之情。而弔者大悅。實自



然友反命之一言。蓋公平時專以忠孝二者發明聖學。謂父子天倫。雖自有至性。亦宜先意承志。曲盡誠心。後又屢奏。欲報莫大之恩。惟應尊事不倦。使慈孝兩盡。爲萬古父子之懿範。垂之子孫。永永無極。故孝宗不忘此言。再對。奏陛下召臣。非徒使霑被寵光。亦恐有一得之愚。少裨繼明之治。敢爲四說以獻。曰立天下之大本。平天下之隱難。收天下之人望。伸天下之直氣。謂教皇子。備夷狄。舉人才。受盡言也。太上垂聽。慰獎再三。既歸之次年。長子彌大以疾不起。公起居寢衰。後感疾。危甚。呼諸子及孫。戒曰。吾受國厚恩。欲報無所。汝等惟當世竭忠節。以圖尺寸。命左右取手藁遺表曰。吾且死。其以是進。遂暝。享年八十有九。娶貝氏。追封魏國夫人。先三十九年卒。子四人。彌大。故通奉大夫。充敷文閣待制。新知寧國軍府事。贈銀青光祿大夫。彌正。朝奉大夫。復直祕閣。主管華州雲臺觀。彌遠。

朝奉郎。主管建寧府武夷山沖佑觀。彌堅。通直郎。兩浙路轉運司主管文字。彌大。彌遠皆登進士第。彌正。彌堅亦累舉春官。人以是服公之教子也。女五人。長適朝請郎。新權發遣永州軍州事陸杞。次適從事郎。充江淮荆浙福建廣南路都大提點坑冶鑄錢司檢踏官豐謙。次適朝請郎。前通判湖州軍州事李友直。次適迪功郎。新荆湖北路提舉茶鹽司幹辦公事夏鼎。次適承議郎。簽書寧海軍節度判官廳公事王櫛。孫十二人。宗之。通直郎。改添差沿海制置司幹辦公事。宜之。宣教郎。知臨安府富陽縣丞。定之。宣議郎。新知婺州蘭溪縣。守之。承事郎。前監平江府糧料院。安之。迪功郎。溫州瑞安縣主簿。實之。修職郎。監紹興府和旨酒庫。宣之。憲之。寓之。寬之。鵠之。賓之。孫女十五人。長適奉議郎。新知建康府上元縣方叔恭。次適通直郎。新知名州鄞縣丞吳樸。次適宣教郎。前知湖州武康縣丞。

秦鉅次適宣義郎新監臨安府仁和縣臨平鎮稅胡綱次適修職郎新秀州華亭縣支鹽官王友元餘未行。曾孫八人唐卿、虞卿、文卿、夏卿、商卿、周卿、漢卿、顯卿。曾孫女十人皆幼。以其年十二月庚申葬公于鄞縣翔鳳鄉吉祥安樂山合魏國之兆。公盛德絕人備福無比蓋嘗竊窺其大者性本至孝有不可解于心故爲士時惟見其事親事長篤朋友鄉黨之義及出而事君則盡其忠謀國則竭其慮接物則極其寬臨事則務于恕匹夫孺子不失其懽心而義有不可不以死生禍福少變率自孝道發之君臣道合昭然無間蓋近古人主躬行通喪自孝宗始而公又以此事之其能不膠漆而固豈無所自哉孝宗嘗謂公曰卿所薦用人其間有負卿者亦知之乎公頓首曰此臣所以報陛下也臣所薦未嘗以語人亦不受其私謝故人人自以爲得上意薦賢者臣之責用賢者君之恩也嘗擬

知湖州陳之茂進職知平江孝宗知之茂嘗毀公曰卿豈以德報怨耶對曰臣不知有怨若以爲怨而以德報之是有心也莫濟作詹事王十朋行狀詆毀尤甚公薦濟掌內制孝宗曰濟非議卿者乎公曰臣不敢以私害公遂除中書舍人兼直學士院待之如初蓋公之寬厚類此人雖有不悅然無物可以忤意古人所謂澄之不清滄之不濁雷霆破柱而神色不動者猶未足道也公既極貴處鄉曲一如布衣時每以事親爲未足又推本史氏積德累行之原自爲之文時節誦于家廟上以報祖考之施下以勵子孫之習其用意篤矣事物之來不問劇易雖至難甚冗或連日夜廢寢食而精神酬應益有餘裕攷其克勤小物凡事精密園館器用動出新意其在富貴中望之如神人而謙虛退然若無與者野服蕭散皆不足以累其中此如萬斛之舟容物有餘不見其多而經濟之業則用之



猶未盡也。而又居權之日少、安佚之日長、故舉世無怨無惡、惟以鉅公大度推之、生榮死哀、無可憾者。公屬文多立就、雖老、表章猶自爲之。有文集五十卷、外集二十卷、論語口義、尚書講義、周禮天官地官講義傳于世。餘皆公之細也、不勝書。銘曰、

於皇高宗、天開中興、鞏宋基業、思永繼承。藝祖七世、有孫神武、是用付託、續宋之緒。高宗曰嘻、帝命不易。我儀圖之、謹厥輔翼。孝宗武文、實惟承之。雍雍太師、實維成之。帝咨臣弼、一本于學。緝熙光明、德修罔覺。兩輔予政、毋輕黷兵。毋過取民、毋濫用刑。言如著龜、靡有差忒。旁招多士、寧我王國。天地清夷、中外晏然。繼志述事、二十八年。兩宮燕娛、天壽平格。三奉玉卮、四登寶冊。召對德壽、嘉帝之孝。又曰太師、輔翼之效。帝謂聖父、教誨之功。臣亦歸美、媚于高宗。天用昌之、耆艾康寧。帝用休之、福祿寵榮。孝宗乘雲、太師騎箕。君臣始終、雖恨莫追。有

赫景命、湯孫是纂。顧瞻遺烈、于以追遠。錫之篆碑、孝宗有臣、報我天子、詔爾後人。

樓鑰撰 《玫瑰集》卷九三

侍御史左朝請大夫直秘閣致仕王公行狀

曾祖寂、故任永靜軍東光縣令、累贈少傅。妣趙氏、贈成國夫人。丘氏、贈濟國夫人。祖禔、累贈少師。妣張氏、贈衛國夫人。父次翁、故任資政殿學士、左大中大夫致仕、累贈太師。妣趙氏、贈秦國夫人。本貫濟南府章丘縣巨德鄉巨人里。王公伯庠、年六十有八狀。公字伯禮、其先大名府人。五世祖繼文、贈特進者、以明經出身、嘗爲河中府虞鄉縣令。四世祖昇、贈太保者、以甲科爲尚書郎、直史館。嘉岐王府翊善十餘年、請老而歸。避大河之患、葬特進于濟南、因家焉。少師古學精深、兼通醫卜、工眞行草篆、尤邃于春秋。旣免少傅喪、不樂進取、攜二子屏

居青崖山之兩河。太師因教授其間、以供甘旨。名聞東州、學者雲集、時號兩河先生。紹興初、執政凡四年、力丐閒退、已遂致其事、居于四明西湖之陽、今遂爲鄞人。公登紹興三年進士科、授左迪功郎、吉州左司理參軍。試教官爲第一、改充明州州學教授。十一年任滿、循左從事郎、便親自列、主管潭州南嶽廟。時太師方在政府、詔以諸將成卻敵功、皆二三大臣奇謀指縱之力、可與一子職名、改左宣教郎、直秘閣。顯仁皇太后回鑾、太師充禮儀使、辟公書寫機宜文字、尋主管台州崇道觀。十四年、授兩浙東路安撫司參議官。太師薨、服除、二十二年通判平江軍府、奪職罷歸。三十年、主管台州崇道觀。三十一年、賜五品服、通判鎮江軍府。三十二年、以覃恩轉左朝請郎。隆興元年、改兩浙西路安撫司參議官。二年省罷、知興國軍。乾道元年七月、召赴行在、除戶部左曹郎官、仍有旨復舊職。明日、

兼皇子慶王府贊讀、尋改直講。二年、南省試進士、爲參詳官、就院擢殿中侍御史。五月、遷侍御史、八月罷。四年、主管台州崇道觀。十二月、知閬州。五年、溫州。九年赴上、纔三月、終于州治。累官至朝請大夫。公忠孝謙勤、得之天資、自幼刻意問學。家素清貧、太師教子甚力、朝夕講習、至以楮衣禦寒、手種苜蓿以充飢。及冠、猶未知肉味。父子易衣以出、而抗志不凡、慨然有立名當世之意。手抄古書、往往成誦。太師守道州、欽宗登位、奉表者例當推恩、公請以叔父次臯行。既乃連中世科、人益奇之。分教四明、人士仰慕、適與名士相先後、或以見在、過去、未來三佛名之。初被延閣之命、時宰欲擢丞列寺、太師既不欲私其子、公亦力辭焉。平江當冠蓋之衝、毗贊郡政、聲稱甚美。會以讒間遭論、自此不復造朝、安貧樂道、十有餘年、若將終其身。一旦趨召、



際遇聖明、首論養人才、裕民力、理財訓兵、以爲不可勝之備。又論攷察薦舉、鬻爵積粟等事、奏對明白、音吐洪暢。上意開納、陛楯亦屬耳傾聽、爲之咨歎。即日除戶部郎、講讀王府、究繹經旨、詞義俱勝。帝子斂衽受之。逮執法殿中、進遷南牀、自以起遠外、被異知、益展盡底蘊。謂強國在法制、固國在人心。然國勢可振而易強、人心難得而易失。乘航之諭、不可不知。駭輿之言、不可不鑑。又奏方今之弊、莫大于風俗苟且、而苟且之弊、生于士大夫議論之不公。惟不以虛言先實用、不以高論蓋眞才、苟且之風、或可少革。是時宿將類以罪廢、公奏奔北固爲可罪、而戰多有不可掩者、不應以一眚而廢之。宜及此無事之日、以次召還、使備環衛。撫之以恩、折之以威、庶可收效于後。上深以爲然。稍稍錄用。沙田蘆場議起租稅、民以爲病、無敢言者。公乃極論之。其略曰、沙漲之地、未嘗耕耨、施工布種、乃

是務本之民。既未能如漢置立田科以勸農、而可擾之乎。蘆葦之生、本非種植、各以其力樵刈、必非游手之徒。既未能如古捐山澤之利以予民、而可困之乎。豪強坐據、雖曰非法、然怨不及上。今朝廷遣官增稅、怨始有歸矣。上感悟、即令罷去、以便貧民。廢省兩浙舶司、簡閱宿衛之士、皆自公發之。由是眷意愈厚。嘗奏事良久、上肅容謂公曰、卿所言一一可用。議論全似唐王珪。公平日恥言人過、未嘗臧否人物、恩仇一視、坦無城府。既居敢言之地、遇事輒發、抨彈所及、動涉仇怨、無少分顧忌意。或爲公危之、公正色曰、言責所在、顧忠于君者如何爾。一有愛身之念、紀綱何賴焉。筆力素高、作奏不能自休。諫藁謹密、子弟不得預。論事尙多、非施行于外者、莫傳也。諫長率公論政府、乞置詔獄、已乃下其事臨安。一日太守請間、公語之曰、始得之風聞、不容自嘿。今既事在有司、豈復當預。獄具失實、

即上章自劾、以故俱獲譴、而公止從罷免。上亦知其非出于公、念之不忘。或言去國之後、事有涉公所嘗論者、上必取元奏親加省覽而施行之。且嘗曰、此真臺諫也。奉祠未幾、以閬風起、公遂易夔帥。夔部曠遠、夷夏雜糅、公首圖諸郡地理、合而爲一、分別險要、獸蹊鳥道、纖悉畢見、區處指授、盡出于此人、莫得而欺也。撫夷人以寬、養百姓以惠、馭官吏以嚴、夔以大治。郡有巨剝、旣爲嵩呼祝壽之地、而祖宗諱辰、薦修及三歲、合五州人士羣試、皆在焉。公以爲彫且陋、命葺廢寺、分行香之所。又建貢闈二區、以其一與漕司。土木之工皆有條理、不日而成。士民誦而歌舞之。巴俗多略子女以爲貨、公特嚴其禁。有綿竹獄掾者、捆載而來、爲瞿唐關所詰、蓋以此牟利者有年矣。公立訊之、皆遂寧潼川間人、爲給貨、各還其家。或請發其事、公曰、不可究也。惟責而遣之。城素無井、笕水于山、杜少陵所謂

白帝城西萬竹蟠、接筒引水喉不乾者。郡失于葺、或課民以錢。詹事王公十朋嘗縱民取水、曰曰義泉。公修王公故事、又增治焉。市人歡呼、相謂曰、二公豈伯仲耶。其他營繕非一、先賢遺跡如子美高齋之屬、皆以餘力一新之。施黔、珍三州與南平軍地接生夷、而思州則田氏世襲、撫御尤難。有何思明任鬼師、楊震穆會等皆豪族、動輒疑阻、牒訴累興。公化之、深得其道、宣布威德、譬曉禍福、揭示約束、至或親致尺書。思明投牒、乞藏膀于家、傳示子孫。楊震得書感泣、飲血盟誓、邊境帖息。公遇事敏明、臨機善斷、戢吏至嚴、莫敢仰視。聽訟之際、反覆究問、誠意具孚、無不退聽者。旣而有伉儷之戚、亟請祠祿、遂移永嘉。赴闕奏事、上意欲留、惜公已衰矣。到郡篤志從事不少懈、而疾已不起。寔二月二十五日也。娶同郡成氏、封宜人。柔淑孝謹、克配夫子。男三人、曰星郎、未名而卒。曰有大、通直郎、福建



路提舉市舶司幹辦公事。後公九年卒。曰正大、文林郎、新處州軍事推官。女三人。長適朝請郎、中書門下省檢正諸房公事周舜元。次適承事郎汪大有一。幼亡。孫男十一人。坦、域、埴、塢、埤、垓、圻。餘未名。坦、埴將仕郎。女八人。其一適進士孫瑜。餘在室。曾孫女一人。淳熙元年正月九日。葬公于奉化縣忠義鄉之瑞雲山太師墓側。公事親至孝。少時所得成夫人奩具。悉以奉太師。居喪哀毀盡禮。有人所難及者。記問絕人。博覽載籍。當宣政間。舉子惟務金陵之學。公獨貫穿經史。旁出入百氏。至老未嘗釋卷。賓客相對。諸子侍立。奧篇隱帙。隨意舉似。以探其學問之進否。後生多親附之。舍人朱公翌嘗問侍郎周公綰曰。比見表中用一驢載都市事。偶忘所出。周公素簡默。僅舉一二。公適參坐。又以曰。公公歷誦臧質傳中數十語。二公歎賞不已。又歸以勵其子焉。作文雄奇。操紙筆立就。若不經意。

而語多警拔。諸公銘誌類出公手。有歷山集、雲安集、奏議、告蒙、資治編年、宏詞集要、夔路圖經等藏于家。其他不及屬藁。散落甚衆。人雖以公不作文。字官爲恨。然崇論宏議。日月獻納。亦有以少伸素志矣。立朝典州。威望凜然。而待人接物。卑牧已甚。閒居客至。應酬終日。倒屣延納。惟恐其後。朝章野服。顛倒層疊。人人與之傾寫。略無倦色。士夫無不愛敬。下至閭里。聞風悅服。疎財好義。不計家之有無。義所當爲。無所吝惜。四明舊爲義郡。顯謨汪公思溫爲之主盟。汪公歿。公實繼之。緩急叩門。視所請曲爲之經理。故鄉人尤歸心焉。廉節傳家。他無嗜好。俸給之外。一毫不以費公帑。在夔首禁科買。狨麝之類。仍以公移鏤版。徧滿山谷。有以書求市者。則以墨本寄之。永嘉軍卒百工咸具。公一切罷遣。服用所需。必面與之直。至或倍償。人謂其過。而行之不疑。故治溫未久。病告幾半。而喪行之日。百

姓巷哭以過車、非德之感人者深乎。僚屬問疾卧內、見公几案蕭然、鎮紙以璧、皆歎息而退。初治入蜀之裝于建康、有以白金來售者、曰、以此西上、當有倍蓰之獲。公曰、不幾于商乎。止以緡錢行。比歸、日、輕舟而下、以餘錢自隨、人愈咨其清。方家食時、未嘗忘國事、凡所聞見、必詢究講明、務求可行之實、蓋其志尙如此。及膺進用、期不負所學、以報主知。去不以罪、人猶望其再入也。終不得究見德業、朝野共惜之。病且革、二子以藥進、手格之去、靜默焚香、宴坐自如。上章休致、處畫家事若平時。及屬纊、不但不亂。翌日入歛、肢體和柔如生、皆積善之報也。鑰汪出、因外家以拜下風。自蚤歲辱知獎、間置坐隅、匪怒伊教、殆非一日。公將沂江、鑰以假吏之燕會別于金山。客授永嘉、公適來守、尤得窺治行之詳。公之二子不鄙、以行實見屬。自惟荒淺、不足以稱、下筆復輟者屢矣。壬寅之夏、提幹公一疾

不起、殊使人有愧于泉下。今推官又以爲言、乃取所聞見叙次之、以俟當世君子立言者採擇云。

樓鑰撰 《攻媿集》卷九〇

校記

①四庫本《澹庵文集》「鎬」下有「號文岡」。

②據前所述，墓主舒獻七子，無有名「銳」者。舒銳蓋爲其孫。

③題下原注：「標題一作《太師保寧軍節度使致仕魏國公諡文惠追封會稽郡王史公神道碑》。」



藏 書

宋儒碑傳集卷一百九

何逢原 程鼎 支時起 塗勉仲

鄭耕老 李石 羅良弼 陳長方

何提刑墓誌銘

永嘉自元祐以來、士風浸盛、淵源自得之學、胸臆不蹈襲之文、儒先數公、著述具存、不怪不迂、詞醇味長。鄉令及門孔氏、未必後游、夏徒也。涵養停蓄、波瀾日肆。至建炎、紹興間、異才輩出、往往甲於東南。若舍人何公、又其卓然者歟。公諱逢原、字希深、世爲溫人。曾祖某、祖某、皆潛德不耀。父某、累贈奉直大夫、妣王氏、封太宜人。公姿穎異、眉宇秀整、頎而長身。兒時強記覽、落筆語驚人。嘗賦松柏後彫、志趣不凡。識者期以遠到。擢進士乙科、調秀州司戶參軍。未赴、召對、敷奏進止、剴切詳雅。除敕令所刪定官。書成、改承奉郎、遷秘書省正字。時秘閣初建、登瀛皆極選、公翺翔其間、讀異書、見聞益博。丁

母憂、服除、復舊職、以言罷、通判池州。歲飢、公攝郡事、發廩以濟、有以專輒諫者、公曰、以此獲譴、所甘心焉。爲粥以待于路、病者藥之、人由是免流移、飢而不害。秩滿、除樞密院編修官、兼權左司郎中、起居舍人、中書舍人。初、秦^①氏盜權、以國事讎、殺大將、竄忠良、鉗天下口、神怒人怨。公爲書生時、嘗客其館、授其子以經、於是間見、以物議洵洵告。秦氏曰、吾所與語者天也、豈復與人校是非。公曰、天之心即人之心也、豈有異哉。秦氏大銜之、臺諫承風、摺以他故、至是再黜。久之、除添差通判處州。公以才進譽藉甚、自樞屬攝從班、兼數職、光顯于朝、去不以罪、且下佐小州、士論屈之。公以近鄉自賀、無幾微愠色。君子謂其得大雅之明哲。太守某聞其賢、以郡事諉之。公既深厥職、剔蠹鋤梗、郡遂大治。俗生子多不舉、公重賞嚴禁、飭保伍諭以天性、所活叵計。除浙東參議官、改提舉湖北常平茶鹽事。湖



北產茶、病私鬻、江西惡少越境群至、數以千百、相挺爲盜村。^②落間、戶閉白晝。公憂之、乃與憲司謀以戍兵三千隸盜賊司、分布要衝以遏之。盜販者息、民賴以安。徙知嘉州、嘉遠王都、吏橫而肆、訟謀紛委、率出入其手。公至、立訟者于庭、俾自供、曉以曲直、悔過者隨遣之、不悛則懲以笞罰、訟由是簡、犴獄屢空。罷行估、不一毫市於民。去之日、闔境交送、攜扶填擁至不得行。^③有然香于臂以祝者、且曰、自有漢嘉無此賢使君。祠于佛舍、至今奉之。除成都路轉運判官。四川類省試、有請託暗記傳義之弊、朝廷擇清德重望士以董之、差公充監試官。公措畫有方、內外嚴密、纖介不通、前弊盡革、時號公選。明年廷對、蜀士果多巍科。廟學歲久而壞、像貌黝剝、易而新之、植嘉木、增養士員、頌之者以比文翁。除知夔州、未至、改潼川路提點刑獄。行部至合州、有重囚衣鮮潔而械有塵垢、公親鞠之情得、乃縣

吏受賕、釋其械、遂竟其奸。且申明縣吏行常祿、雖枉法而罪不重、故獄多冤濫、乞自縣吏、掌獄者亦重祿、朝廷從之。大足尉利盜賊、殺匿者以滅口、而以病死聞。公疑而詰之、尉色動、猝赴獄、果自伏、人以爲神明。監司歲薦舉、劫於有力、不得如己志、公獨記姓名壁間、疏臧否于下、有狀不待請而舉、由是孤寒皆蒙識拔、奔競少衰。就差轉運副使、再監類試院。乾道二年、召赴行在、除金部郎中。公久患臂弱、至是浸劇、力丐祠、除福建提點刑獄事。以四年三月某日、卒于官舍、享年六十有三。階朝散大夫。公爲人謙恭樂易、持心近厚、不爲崖岸異行、善諧諛、然未嘗忤物、儉於自奉、澣衣菲食以終其身。通守兩州、不按臨屬邑、五持使節、所過州縣止數輩、人不知其爲使者。每謝卻廚傳、吏以例冊言、公曰、吾知奉法而已、何以例爲。專以愛民爲心、治尙不擾、故所至可紀。有古循吏風。故相趙公鼎參政

孫公近、皆厚遇之。尙書吳公表臣、端明張公闡、樞使汪公澈、皆舉以自代。然公既忤權臣、迹疏遠、十年楚蜀、晚方還朝。以疾補外、遂致不起、才不克究、中外惜之。長於理學、尤精論語、覃思二十年、每見學者必與講論、有集解十卷、簡嚴明白、超詣處諸儒所不到。且自序其書曰、古之學者爲己、今之學者爲人、爲己則能爲人、爲人則兩失之矣。凡平日臨政遇物、一以所得於書者從事、蓋非苟知之也。善屬文、清峻遒麗、雖倉猝應用、必自己出、不剽竊前人語。尤長於詩、有晉宋味。有文集二十卷、外制二卷。初育於楊氏、旣登第、復今姓。嫁楊氏女、立其後、擇師以教之、買田以贍其家。娶丘氏、故左司鐸之妹。子三人、長端木、將仕郎、孝而能文、先公三年卒。次東里、次少連、女一人。孫男二人、曰鏞、曰某。東里、鏞皆將仕郎。以五年十二月某日、葬于吹臺鄉西山瑞鹿院之右。公漕成都、與大資王公之望善、

及憲閩王^④適爲帥、後事卒賴之。旣而移鎮鄉邦、又經紀其家。某與公同鄉、爲晚進、慕其名久矣、恨未之識。及守夔子、始通書。自蜀召還、迂于江潯、公驚曰、吾以子爲尙年少、乃爾老邪。一見如故、首及論語、且授以集解。某傳之夔學、酌酒郡齋、講酬酢、公舉觴曰、吾不爲世俗祝、願子得祠^⑤、早還故鄉。某感其言、餞于白帝、詩以送之。公喪自閩、某弔于其家、諸孤以墓銘見屬。明年冬、興化簿葉仲堪以行狀來、其^⑥受公一日知、不敢辭。銘曰、

賢哉何公、邦之傑、博通六藝、窮館塾、爲己爲人、皆自出、致身事君、耻容悅、忠告善道、乃見黜、施于有政、果藝達、學道愛人、治可述、栖栖萬里、走輓軌、君命召還、已白髮、陳力下就、四七列、歲寒不凋、出持節、命也歟哉、遽嬰疾、死生晝夜、貫以一、沒世名稱不磨滅。

韓溪翁程君墓表

韓溪翁先君子韋齋先生之內弟程君也。諱鼎^⑧字復亨、徽之婺源人。少孤、從先君子學於閩中、因得講聞一時儒先長者之餘論、而心悅之、抄綴誦習、晨夕不少懈。先君子愛其勤敏、於其歸書六言以贈之、皆事親、修身、爲學之要。君拜受其言以歸、益自樹立、務記覽、爲詞章、思所以大其門^⑨者。然君爲人坦夷跌宕、不事脩飾、好讀左氏書、爲文輒倣其體、不能屈意用舉子尺度、以故久不利於場屋。家故貧、至君益困。中歲奉親徙居窮山中、自號韓溪翁。山田百^⑩畝、環堵蕭然、無以卒歲、而君處之泊如也。晚益不得志、因自放於杯酒間。酒酣、諷左氏書、雜以國風雅頌之篇。坐者聳然傾聽、其俯仰疾徐之間、頓挫抑揚、如有節族。至於放臣孤子、怨夫寡婦之辭、又未嘗不三復感慨而出涕流漣也。庸夫孺子從旁竊觀、時或笑而侮之。君警然不以爲意、

蓋其中所抱負有不得騁者、故託此以自遣。至它行事、則其不合於理者固鮮矣。乾道元年、年五十九、以疾卒。後十年、君夫人胡氏亦沒、遂合葬于懷金鄉福林冷水^⑪之原。蓋新安、番陽、信安諸程皆出梁鎮西將軍忠壯公靈洗、其家婺源者又自歙之黃墩徙而來、譜牒具在。聞之先君子、忠壯公葬黃墩、其墓以石爲封、今尙在也。君家自其大父翔^⑫始與鄉薦、父著^⑬亦以郡學上舍當貢京師、皆不幸蚤卒。至君學益勤、而其師友淵源所漸者益遠、顧亦不逢以沒其世。而有子曰洵、好學而敏於文、君奇愛之、曰、是足以成吾志矣。既又屢薦不第、今乃以特恩授信州文學、識者恨之。然洵故嘗從熹論爲學大要、意其所以成君之志者、在此而不在彼也。熹祖母君之姑、因謂君叔父。幼從先君子在臨安時、時見君來、先君子或留與飲、君必盡醉而論說衰衰、不能自休。既長歸鄉里、又得拜君。而君辱教



誨之、則君益以老矣。然得酒輒歌呼談噓、意氣猶不衰也。今又三十餘年、洵乃以書奉君學徒李君繒之狀、請表君墓。惟^①念始終、顧二父於今皆不可見、而熹與洵孤露之餘、亦俱老大、乃流涕而書之。蓋以重歎君家之不遇、又惟^②潦倒、無以副君疇昔之意而自悲也。嗚呼、洵尙勉之哉。淳熙八年八月乙卯、表姪具位^③朱熹述。

朱熹撰 《晦庵先生朱文公文集》卷九〇

支興道墓誌銘

張子寬先生、易師也。以小學教授、雖童稚勝衣者、登其門、皆以著數授之。凡前輩讀易有聲場屋者、自其門出。石年九歲、與支君興道、吳君德駿同遊先生之門。先生遇之、不以童稚句讀也。君長余三歲、率能誦師說、退即抗聲作色、以鼓舞群稚、人爭竊其說、以復於師而幸免者。未幾、與君各更師他門、里巷不遠、往來每示題義、講說不異向來時。然

回視昔年淳和樸厚之氣、已比比爲聲病舉子剽竊之文、余則知之、君則未知也。一日、君若有所憂、曰、親老家貧、未即振發、可若何。余曰、勉來相就坐。群兒間、提秃筆掖公於敗亡、未晚。君以爲夸而笑之。君每試不廢、輒不遇。余登第、興道姪壻趙達以狀元歸鄉、支門爛然自榮。君一日獨致僕、曰、他人飯新先輩、禮也。某於吾人、豈敢泛泛於衆客杯酒。僕仕成都學官、興道以疾告、未幾卒。卒以某年月日、年若干、葬以某年月日。石家居、其子某兄弟袖卷不敢言、而以泣拜。出卷、則君之從弟全州戶曹日中狀、云、支氏其先出合陽、詳仕唐爲許州節度。子師友官於資、爲資之祖。資祖四世名漸者、元祐八年以孝旌其門。曾祖諱某、則孝子之兄弟也。祖成、父翊、皆不仕。娶楊氏、先卒。再娶馬氏。四子、皆儒業。三女、一適侯播、一適黃庭、一許適侯棫。孫五人。君孝友溫豫、喜慍不見於色、龐然福厚君子也。長



於治生、幾以致富、四子各占大第以處之。病中召諸子誦書、曰、吾老、手未嘗釋卷、老病聞書聲則胸次廓廓矣。汝曹勉而持之以正、學而不成、不失爲鄉之善人。以卒。君諱時起、興道字也。銘曰、

吾率夢與君遊、小學如平生、師操撲據坐、君從傍也、發笈執卷以立。吾凜凜以驚、夢覺則君死矣。嗚呼、君夢乎。吾夢乎。吾俾吾兒與君之子修再世之盟。義久則重、勢久則輕。不忘素交、以爲君銘。

李石撰 《方舟集》卷一五

塗勉仲墓誌銘

按元稹傳載、嚴礪節度東川、沒入居民塗山甫等八百餘家、田產奴婢、爲稹所効。礪與山甫皆東川人、豈有怙用其勢、以暴其鄉之人如此。蓋以素仇所私、非一日耶。今塗氏、嚴氏皆爲梓望姓、兩家阡陌相接如昔時、而詩書家法、葉葉相與通姻婭、甚歡。塗出山甫而嚴出礪無疑也。嗚呼、退之援同姓

於毛仙翁、孔文舉記通家於李元禮、吾儒以寇爲婚、以明易之變、浮屠氏以平等視冤親、痛一念之由失、至百劫相讐、不悟、可悲也夫。中江塗勉仲者、娶嚴氏、兩家有佳子弟、多從余游、而勉仲尤厚者。勉仲之弟端卿、於余爲同年進士、而勉仲兩郎曰森、曰柄、亦得以藉口意愛、如通家骨肉。余爲學官成都、勉仲歲遣兩郎修執經禮。逮倅彭至、閒居資中、兩郎子往來不絕。森、柄得於二禮、大小戴氏學、亦出父之親授也。森以治禮兩預賓薦、柄更從余讀春秋。勉仲倉卒得腹病、森留侍父病、柄適留資、未知也。勉仲且死、執森手、曰、汝力學無以怠惰、汝等李氏門、終可依、以卒。森訃書詞來資、速柄歸云、爾也。端卿狀云、勉仲兄葬有日、森視竊辦大事不及來、舁柄挾狀以謁銘。余固不以森爲不敏、而痛柄之請詞苦苦再三、爲得禮也。縣有塗使君祠、則勉仲世爲中江人。曾祖某、祖某、父某、三世業儒不

仕。勉仲儒者、於生事不疏而有理、以自給。其所樂予、則里鄰吉凶緩急、佛道祠廟、橋梁營造、首倡悉力、不吝惜。至焚券市義、又不知幾何人。然其人剛介有守、凌轢非意、如丘山欲壓者、一毫不挫也。至今牛翁爭蹊與里胥之珥筆者、猶佩勉仲高誼、以自慙伏。其晚進鄉校小生服膺善訓於勉仲者、可忘哉。年五十六卒、葬以某年月日。銘曰、
兒曰讀書、翁喜傾耳。兒今嗚嗚、哭翁淚洗。垂盡之言、兒奚不知。清懷之葬、使君之祠。

李石撰 《方舟集》卷一五

奉議郎鄭公墓誌銘

莆人鄭洙言曰、先人歿於乾道壬辰、葬用淳熙甲午。惟先友莆一二賢大夫也、不敢銘。誨洙曰、必別求賢有文者。洙也不肖、不足以得、懷疑重請、延佇于今、二十六年矣。懼老且死、不能振幽芳、昭遺緒、豈惟不肖又抱不孝之罪以殞。吾子縱不勝任、勉

矣。筆之也。按洙狀、鄭氏自太府卿露徙莆南湖、露之孫曰大中大夫敖、生五子、各以其居自別爲祖。由敖之子司門郎準三世而爲君之曾祖曰亞卿。祖曰資深、父曰安正。君諱耕老、字穀叔。幼孤、母林氏、有專行、切切課君從三兄學。曰、余婦人、汝欺余易耳、欺場屋難也。君兄弟益自力、鄉論多甲乙、送之、至再舉三子云。中進士第、主福州懷安縣簿、而林氏卒。喪除、歎曰、祿不逮親矣、求仕何爲。復居廬二年。親戚故人強起之、調溫州法曹。守故用常平錢物、君不聽、忤守意、又欲捨去、其友知旁郡、固止之。教授明州學。四明白女眞焚蕩、士之學、學之地、陋弗理。君爲講說科舉之外者、更營學區、取田以供鄉飲費。侍從薦君通經術甚衆、召見、奏事明辨。孝宗悅、親筆用爲國子監主簿。於是執政患職事官多待闕失職、以君添差福建安撫司機宜文字。滿秩、不朝集、遂歸南陂、移梅種竹終焉。始、君雖捷



儒藏

應舉已厭聲律浮靡。讀詩、周易、洪範、中庸及論語、孟子、味其深微、皆有訓釋。著仁義、禮樂、扶中、截流等論、推明聖人之道、歸於中正不偏、常行不厭、而佛者以寂默無爲亂之、此性命道德之蠹也。常撫書語其子曰、時不我知、我死若藏此書南陂上而已。榮利澹無與、既喪母、宦進尤薄。每曰、吾心方神遲、習險履巖、余所畏也。林氏墓有小精廬、南陂木蘭溪有草堂。堂南有沂春亭、舞雩臺、君所常往來也。具舟楫、琴書、晴光月夕、不從賓御、夷猶溪上、忘其近遠、深北野農、常吹簫擊鼓送迎之。莆多大儒名士、皆君輩行上下、相善甚。其間相踵爲輔相、然不以身之進退望焉。蓋六經孔氏之學通於天下、而人之心知耳目、有淺深之殊。百有餘年以來、士雖以其深者自命、而世之好惡趣舍、猶不能盡合也。故妙已而粗物、譁僞而毀眞、方並逐於末流、以斲敗本學矣。惟不必于用者、知自重、不急於教者、

知自樂。自重則嚴己、自樂則恕人。余以洙所次君事及其書考之、君學爲用而不求用、可以教而不教、退靜多而進動少、未嘗違世而世莫之同也。昔孔子謂顏淵舍之則藏、曾皙曰異三子者之撰、聖賢之遺意庶幾乎。君之卒、年六十五矣。其葬在文賦里東山。娶林氏。二子、炳洙。女嫁朱審度。銘曰、南陂之書、今故存兮。溪北鼓簫、後可聞兮。慶元三年十月□日。

葉適撰 《水心文集》卷一五

自叙

方舟子甫冠、筮易得需之夬、曰吉哉、吾事濟矣。需有所待而孚其兆也、以夬爲決、決無疑也。以姤爲遇、遇小人也。需與訟對變、䷄乾下坎上需、䷄坎下乾上訟。夬與姤對變、䷪乾下兌上夬、䷫巽下乾上姤。需訟曰涉大川者、利涉與不利凡十有一、多以水爲險、君子進退取焉。陰六六年、陽九九年、此進退也。兌澤

巽木、舟楫之用、膏澤下民、如需夫焉、可跬待也。於是築書臺、作方屋、爲方舟。曰方舟子者、石隱名也。李姓、知幾其字也。方舟子九歲舉童子、幼逮老、不一日不讀書、病患寒暑不易。或稍廢、日補之。第進士乙科、成都戶掾、被召官太學、循遷博士。執政薦其文似黃庭堅而秀潤過之。上皇曰、朕知之、是讀書至夜分者。以多士鼓倡、從之。自試院論罷、執政導意欲留官近州、答以虎死不卧、負琴書、徑登舟還蜀。太學之士數百扶送、爭曰、陽城去國矣。除成都學官、左右生至千二百員、諸司增給學廩。西邊二三大將相與義助。倅彭州、知黎州、蕃蠻曰、是天子學官來乎、眼色不可犯。再被召官都官權、仇者每見、泚然面顏、好言如飴而險穽乘之、果再論罷、知合州、又罷知眉州。歲餘仍被旨召還、以母老懇辭、就除西漕。又論罷、家居七年、艱貞彌厲。會吾兒開喪亡、一慟曰、天平、吾豈私吾子乎。開好學能爲

古文、長於楚詞。訃聞、生徒所至慟哭之。老夫追綴每每涕淚薰炷。無他度日、作世系手記三卷一百篇者、如漢人百兩篇之義、出入六經、網羅百氏。學以易、春秋爲本、蓋嘗統之曰、易者春秋之天、春秋者易之人、天人合統而皇極立矣。至於詩者、春秋之世、書者、春秋之事、二禮者、春秋之制、實則原於一也。或問二經之學、曰、以易而讀春秋則嚴而理、以春秋而讀易則潔而通。問師、曰、心又問、則曰、易則探象數於鈞道先生、而出伊川之門、人和靖先生尹焞、焞之門人范淑、自洛陽以經侍和靖入蜀。時春秋廢於新學久矣、岌岌乎絕業之餘也。淑亦有經樞三卷行於世。先是入官太學、胥問經業、曰、易、春秋。豐然又問、答如初。諸生曰、吾負笈十五年、今得師矣。嗚呼、使吾生果窮槁死田畝、亦復不恨。俾尙有立於世、宋黼、魯倉、今猶古也。天平人乎、後之君子、吾有藉口者。乃爲詩曰、惟吾之學、世先大

夫。大夫之隱、遂於詩書。手抄經說、如哺小雛。雛飽而嬉、趨師於隅。其長維舟、舟衆羽翼。誰弟誰兄、雁行其習。次參軍君、孝弟以質。次鄴茲君、有文甚力。小者谷弟、穉鳴嶷嶷。惟鄴茲君、其學多通。大夫曰汝、維舟睦從。先秦古文、述其服膺。不蹈陳言、惟經是承。扣牛永歌、豈不律呂。流爲狎說、嘔噦糞土。人兄我師、十九踵武。有誤孔艱、以文覓舉。雕冰鋸雪、有損無補。舟顧曰巢、歆向同異。春秋一經、父父子子。向出公穀、歆出左氏。同爲尊經、異不殊軌。人廢我興、睽車載鬼。衆曰何疑、從其師傅。舟誦所聞、元祐諸公。歐陽盟寒、蘇黃晁張。一齊衆楚、捨我誰憑。孔孟以降、不顏則韓。聖訓可稽、攻乎異端。喋喋吸帆、忍揮我門。小舟一兒、自善一家。愛汝助予、易與春秋。倣予以馳、派別江西。有徒執經、斤斤其儀。小舟不幸、夭死莫追。雲巢小舟、道不喪時。衆子及孫、藩其閑閤。羸書未貧、詔我後人。

李石撰 《方舟集》卷一〇

會昌縣東尉羅迪功墓誌銘

某壬午冬十月被旨召赴闕、與長卿別不三年、而長卿即世。乾道改元春正月、某還自王所、急往弔哭。越三月、其子泌扶服乞銘。某曰、予與若父最故、且厚、銘非予而誰。但方以狂瞽被譴、姑少須。泌請益虔、自夏徂秋、固辭不獲、則叙而銘之。長卿姓羅氏、諱良弼、長卿字也。其先占長沙、辟馬氏亂、徙廬陵。曾祖諱寬、祖諱允、皆業白不仕。考諱無競、知邵武軍建寧簿。其卒也、人相與謚爲孝逸先生。長卿力古、憤先世不偶、卓然有遠志。建炎三年、復詩賦科、一出首鄉舉。紹興丁丑廷試、授迪功郎、調贛州會昌東尉。資性孝友、祖母太夫人劉嫠居三十年、男若女凡七、皆前卒、養志承顏、秋毫咸當其欲。劉耄期而終、葬祭極洗腆。母朱寡亦二十年、叔母郭尤早寡、長卿竭誠奉二母、故母得以善事其姑。同



儒藏

母弟開出爲季父後、與之處無間言。比沒、其子未冠、友愛不替。及之官、與其母子俱。姪若子。姪早孤、館而訓之。有宵人囁頤誣讎、曾不之恤。幼孤終有立焉。撫育從孫甥、擇儒生嫁之、人多其義。居瀕江、好山偃蹇如畫、亭榭薨桷、翬飛數百楹。當建炎、光火之盜奮、里無餘家、而先廬獨全。辟地者數十姓、虛室以館之。餘二紀、餽餉久益篤、人悉賴之。居鄉忍簡、恭慶弔禮無違者。急人之急、如不及。歲饑、棄倉實賙給、以約自處、而待人極周。口未嘗及人惡、有詆之者、不少介意。後乃自愧。贛民悍難格、推腹心待之、感悅而化。邑有巨盜、閱數政益張、到官無幾、何獲之、人爭繪像祀焉。天性敏於事、大吏數委以疑獄、平反不顧。令佐分鄉督租、獨毫忽無擾、故不趣而辦。其終也、邑人愛而哭者、不勝計。里巷汪汪、太息出涕。及喪歸、復遮哭罷市。居官廉勤、凡服食器用、不遠千里、皆取足於家。中書舍人周公與

書曰、邑雖小、不應陋如許。殆欲礪葵魚之操耶。甲申十月一日得疾、七日。稍間、視事如初。是暮疾復作、呼泌立床下、曰、吾少時意功名、可指取、落落晚節、汗顏復來、其將溘然。汝兄弟友敬、勉自植立、無墮先緒、吾志尙伸、幸矣。遂瞑。爲十五日也。享年五十有七。藏書自上世已萬卷、至長卿不啻倍蓰、皆手朱墨、表無虛帙。時謂語曰、校書不校書乎。謂不入館閣也。其親抄書僅千卷、字畫如刻、人以擬隱俠云。長卿才識兼長、博學強記、凡百家雜志、下至裨官虞初之說、無不淹貫。上下數千祀間、成敗利病、灼見如火。然自少逸群、與人無畦畛、而擇交甚嚴。燕坐蘭堂、翛然賓朋沓至、潔樽枯棋、賦詩奏雅、恢諧不虐、議論驚筵、善類一見傾蓋、久益愛重。里人彭公曰、予之知識、此一人而已。耆儒清節先生蕭公、以爲非常人比。詩文往來、必曰友弟。顯謨閣直學士劉公、尤加獎許、每議古必與聞。某與長卿



幼學時相與肄制舉業。服其博洽。某嘗賦詩云。笑春燭底影。湔淚風前杯。用衛恆書故事。口占未畢。長卿應聲云。此法帖第五卷。隋僧智果書也。又嘗讀崇文總目。長卿曰。某書若干卷。某集若干卷。已而檢眊。無一不讎。雖唐二崔號爲強識。不及也。有文集三十卷。歐陽三蘇年譜一卷。著欣會錄十卷。詩話二十卷。聞書七卷。皆未卒業。而仕逕亦蹇蹇。與時左。嘗喟然曰。吾隱乎。人以吾爲矯。吾仕乎。芋魁豆饘。我豈無哉。吾其漫浪於人間。作鵬鷖游乎。因自謂漫叟。初娶某從妹。繼娶劉。皆先卒。男四人。曰泌。曰濤。次仲孫。鼎生皆夭。女七人。長適某。猶子漸。次歸某。從姪孫椿。餘幼。其孤卜以歲之秋九月辛酉葬於縣之膏澤鄉石蓼崗之原。銘曰。

石崩辭以穀來哲。

胡銓撰 《胡澹庵先生文集》卷二六

陳唯室先生行狀

公諱長方。字齊之。其先浮光人。十世祖魏公顯。唐僖宗時任太保。福建道節度使。終葬於福州侯官縣。子孫因家焉。高祖校書清高。叔祖司戶易。則以道德爲鄉閭表率。見閩中名士傳。曾祖袞。故不仕。祖勸。故承事郎。父侁。故左宣教郎。洪州司錄事。母林氏。故太僕卿旦之女。公生而英爽。髫髻記誦過人。十有四歲而孤。豫章公蚤歲入洛。師友賢士。親得心傳自得之學。與游察院定夫。楊祭酒中立。鄒正言志完。陳大諫瑩中。許右丞少伊。諸公游。志將行。古道於當世。詆斥蔡氏。白首州縣。臨終之年。一日爲公極談天下善類。治道邪正。學問源委。顧公太息曰。吾嘗有聞於先賢。恨汝年幼未足告語。士之處世。本於治心修身兩言而已。小子識之。是年

六月豫章公終於官舍、公奉母來客於吳、貲產付之仲父、一切不問。與弟同之杜門安貧、刻意問學。聞著作王先生昔嘗聞道於程氏之門、遂以先豫章之訓爲請。先生知其器可大受、默無所告、遇咨叩輒峻詞不假。公夙夜憤悱、求於六經、體之驗之、不敢少釋。一日讀論語、至參乎、吾道一以貫之、曾子曰唯、始而疑、終而信、喟然而歎曰、六經之書、淵深浩博、無踰此一言而已。因榜其便坐曰唯室。年十八序伊洛答問、力贊二夫子之道、謂得絕學於千五百年之後、發其關鍵、直睹堂奧、補助天地、有功聖門。然理義人心之同然、學者胡不由斯言而體之於身、優柔涵泳、然後知聖學之傳實在於此。右丞許公一見奇之、謂公不負家世、眞陳後之之子也。兵部江公子我聞公令名、一日得所爲文、曰、此子他日當與東坡抗衡。因遺書公曰、文章議論、前輩未到。足下性識超邁、學之所造、便自高明。眞

所謂豪傑之士、不待文王而興者也。建炎中、祭酒楊公請祠南下、吳中學士大夫爭先願見、公方弱冠、一拜先生於稠人中、見謂所知得聖人之淵奧。且曰、子之學、知至而行未至、故志剛而氣勁。在常人則以爲美、學者反以爲病。子視顏子之爲人如何。行其所知、則剛勁不足爲子道矣。子其勉之。他日未易量也。年三十一、凡三上春官。紹興戊子擢進士第、調太平州蕪湖尉。縣多猾吏、鬻獄舞文、循習無憚。公訪其尤者、繩之以法、一縣肅然。公爲政尙恩信、事無劇易、臨之曉然。民有兄弟訟者、公教以孝弟之道、戒而遣之、兄弟雍如、無復爲隙。當路以公道文才薦於朝者十二人、公與焉。秩滿代還、邑人老幼扶泣拜送數舍、父老言前所未有。用薦者關陞左從政郎、授江陰軍學教授。每謂親朋曰、教官惠不及民、幾於尸素、要當教育人材、使聞孔孟之道、庶足以報吾君置官設學之意也。未行、以



疾終、享年四十有一。母夫人林氏以六十之年哭其息子、行路悲之。士大夫識與不識咸以材德之大、百未一試、爲斯文惜也。公天姿英發、絕出等夷。幼之所造、不汨流俗。壯而學成、清明端亮。其學本於正心誠意、終於窮理盡性。雖其幼歲志剛氣勁、及其久也、痛殺芒角、履踐益壯。至於教人、隨問意滿。嘗與學者辨學之邪正、曰、黃老以清淨無爲爲宗、吾聖人之教則時止時行、不主於一、以時爲中。而仲尼不可得而見也、所謂清淨無爲、得吾之止而已、不知聖人之所謂時止。西方見性之說、主於見性而已、吾聖人之教則致知以知性、格物以窮理。知性則極高明、窮理所以道中庸。極高明而不由中庸、安能君臣義父子親長幼序夫婦別、從容於規矩繩墨之間、超然乎天地萬物之表。佛老之說與吾聖人之道似是而非、聖人之道與二家之說似同而異。要當先得聖賢之權度於胸中、持此

斟酌、以別是非。及夫霜降水落之際、必有所成就也。紹興六年冬、朝廷罷趙公鼎、用張公浚、公作里醫一篇以諷侍郎劉公、無慮數百言、君子以公之言爲至當。公於經史無所不讀、家貧不能置書、假借手抄、幾數千卷。有文集十四卷、春秋私記三十篇、尙書講義五卷、兩漢論十卷、步里談錄二卷、辨道論一卷。嗚呼、孟子沒而微言絕、千數百年間、士之白首窮經者或汨於專門、或沒於章句、道之不明也久矣。間有特立獨行之士、質疑無師、問學無友、道之不行也久矣。二程夫子以天民之先覺、振聖學於旣墜、受業其門、非一時賢公巨卿、則皆自拔於流俗之士。然夫子無所不與、學者無所不受。及其成就、或駁或粹、隨其所資。公當二夫子宏道於伊洛、雖不及升堂入室、親炙於當年、由其言而察諸己、以其言而體於心、所謂資之深而粹者也。進將致君堯舜、措俗成康、退將立大本、斥異道、

以私淑諸人。惜乎早世、皆有所不及也。紹興二十七年九月二十一日、始克葬於平江府吳縣常山鄉銅井之原。夫人趙氏、左朝散郎直秘閣子璘之女、賢淑靖恭、事姑以孝、治家有法。後公三月而歿。今以祔也。二男子、正學、右文林郎、正行、舉進士。孫男三人、曰度、曰康、曰庠。百能與公有世契、且嘗從公游、故知公爲甚詳。謹錄其行事之大概、尙俟作者爲之銘焉。乾道戊子十月、左奉議郎守諸王宮大小學教授致仕胡百能述。

胡百能撰 文淵閣四庫全書本《唯室集》卷五

校記

- ①秦：原作「奏」，據清雍正七年刻本《梅溪先生文集》改。
- ②村：原作「材」，據右引改。
- ③行：原闕，據右引補。
- ④王：原作「五」，據右引改。
- ⑤祠：原作「詞」，據右引改。
- ⑥其：疑當作「某」。
- ⑦韓：《新安文獻志》卷八七作「環」。正文同。
- ⑧鼎：原缺，據右引補。
- ⑨門：下右引有「戶」字。
- ⑩百：右引作「數十」。
- ⑪福林冷水：右引作「福臨里兌泉」。
- ⑫翔：原作「某」，據右引改。
- ⑬著：原作「某」，據右引改。
- ⑭惟：右引作「慨」。

⑮惟：右引作「予」。

⑯具位：右引署作「宣教郎、提舉江南西路常平茶鹽公事」。

⑰日：原作「月」，據文意改。

⑱泌：原作「秘」，據《誠齋集》卷一六《羅泌字序》改。



宋儒碑傳集

卷一〇九

宋儒碑傳集卷一百十

陳良翰 羅棐恭 黃公度 趙師孟

敷文閣直學士陳公行狀

公諱良翰字邦彥。早孤事母孝。遊鄉校以謹厚莊重爲人所稱。讀書務通大指。爲文恢博有氣。紹興初舉進士中第。授左迪功郎。調紹興府會稽縣主簿。秩滿循從事郎。知明州慈溪縣事。歲凶民饑。公喻富室發廩以糴。籍貧民授券以糴。上安下濟。邑人賴之。導德門三鄉之渠。溉田甚廣。改宣教郎。知溫州瑞安縣事。轉奉議郎。瑞安俗強梗。號難治。或謂公宜厲威嚴以彈治之。不然不濟。公歎曰。縣令字民之官。愛之如子。猶懼不饒。況奮其武怒以懾威之。彼亦何所恃耶。催租不下文符。第揭逋戶姓名通衢。爲之期日。民樂於不擾。如期皆集。聽訟多得其情。或問其術。公曰。吾何術。第公吾心。使如虛堂懸鏡。而物之至者妍醜自別耳。罹內憂去官。邑

人送者皆泣涕而返。免喪授衢州州學教授。日進諸生。教以修身厲行之意。不專器人於文字語言之間。轉承議郎。用殿中侍御史吳公芾薦。爲御史臺檢法官。擢監察御史。上即位覃恩。轉朝奉郎。時金亮敗盟。旣斃而歸。其嗣主新立。復遣使來。約以舊禮修好。而中州遺民又皆相率來歸。詔問所以處之者。公上疏曰。緇負之民皆吾赤子。去墳墓。離親戚。捐生業而來歸我。其義不可以不納。然若許以舊禮而又納其降人。則異日彼必來索。索而歸之。傷向化心。納之不便。其必定計在我。以自治爲先。而和與不和付之泛應。然後乃可納耳。二者在陛下聖志如何。願熟計之。尋復有詔。問時務所宜。公復上疏。請明階級以修軍政。核兵籍以豐財用。禁折變以蘇民力。省堂選以抑奔競。內外之官皆久其任。賞罰輕重務合衆心。上嘉納焉。隆興元年秋。詔以災異求言。時上用故相張忠獻公軍淮泗



以規進取而議者不一、爭獻防江之說。公於是上疏極論、以爲備邊之要在固藩籬、專委任而已。今欲捨淮防江、卻地奪便、非計也。而朝廷過聽、使督府不得專任閩外之寄、臣竊以爲誤矣。上然之。除右正言、入謝、首陳納諫修德之說、以開上意。會有飛蝗之異、公又勸上以畏天恤民爲心、語益切。於是虜人再移書求復故疆、且邀歲幣、朝議將許之。公入見上、極陳前日講和之失、使山陵隔絕、疆場無備、北方忠臣義士來歸我者、反爲虜用而致怨於我、皆秦檜之罪。今不可以復蹈其失。且中原之地皆吾祖宗二百年故土、虜盜據屬爾。況唐鄧海泗又逆亮渝盟之後、吾以兵取而得之者、安得以故疆爲言。我亦何說而歸之乎。旣而宰相湯思退力主和議、建遣盧仲賢、李栻持書幣賜虜中大臣主兵者。公爲上言、仲賢輕儇無恥、栻自北來、其蹤跡不可知。宜罷勿遣、姑報以書、徐觀其變而爲之。

所。上鄉公說、而宰相力爭、竟遣二人行。公又論、今廟堂督府議論不同、凡邊奏上聞、廟堂皆陽爲唯諾、無所可否、而陰實百方沮敗其計。萬一爽於事機、督府安得獨任其責。上矍然稱善、以公語語宰相。時楊存中爲御營使、悉總殿前諸軍。公言、存中自太上皇帝時提禁旅二十餘年、權勢極盛、中外憂疑。賴太上聖明威斷、罷使就第。今又無故假以使名、授以兵柄、陰凝冰堅、不可以不戒。願陛下爲宗社計、亟罷存中、使以兵屬三衙如故事、則天下幸甚。疏三上、論者再、竟罷存中。會仲賢等出疆、虜迎勞如禮、朝廷上下皆喜、以謂和議決可指日而定。公獨抗言曰、和議於虜人有大利四、而在我有未可必者五。蓋罷兵講和、則彼得以坐守中原、休養民力、威制小種、銷伏羣盜、此皆虜之大利。而我欲與爲敵國、請復山陵、又必其不求四郡、不索降人、不疑邊備、此則殊未可必。願陛下毋惑羣議、先

定久遠之規以應其變。上欣然開納。既而李杞竟不敢涉淮。公奏論奪其官。獨仲賢至汴。輒許以疆土歲幣輸虜而還。上大怒。下仲賢吏欲誅之。宰相叩頭懇請得免。因極言邊備不足恃。和好不可不修。上不得已。復遣戶部侍郎王之望。知閤門事龍大淵使虜。公遂與侍御史周公操請見。力言。前遣仲賢已辱國命。而大臣不悔前議之失。又欲肆臆決。卻衆謀。不謂秦檜復見於今。且虜書要我罷四郡屯兵。而以其地歸之。如此是彼不折一兵而坐收數千里要害之地也。臣愚以爲決不可許。若歲幣則俟得陵寢而後予之。庶幾猶爲有名。今計議未決而之望遽行。恐其辱不止仲賢而已。願先馳一介往議堅決。行未晚也。上以公奏示宰相。宰相請召侍從臺諫議之。詔可。公上議如前。一時侍從之賢者亦多附其說。上遂以胡昉、楊由義爲審議官。令專議四郡事。而手詔之望、大淵使議陵寢。梓

宮降人。邊備四事利害以聞。二人奏上。上燭其姦。凡語之依違轉脫者皆墨識之。以示臺諫。公因復伸前論。上乃從之。時歲十二月也。除左司諫。會長秋宮建官。其內外之屬若干人。公上疏論之。且請節它冗費。始自宮掖。以奉邊軍。詔諸以長秋爲官者損其七人。它亦頗有所減省。如公請。既而昉及由義與虜議四郡不合。大爲虜所困辱而歸。思退尙執前議。正言尹穡素以諂事龍大淵得進用。又本仲賢姻黨。陰附思退以撼督府。公因疏論思退姦邪誤國。宜早罷黜。以靖中外。張浚精忠老謀。不宜以小人之言搖之。上曰。思退前議誠失。然朕愛其警敏。冀可責後効。卿其置之。至魏公。則今日人材物望孰有出其右者。朕豈容有此意。正使有之。亦豈不謀卿等。此殆言路有異意者。卿爲朕諭之。公頓首謝曰。陛下言及此。天下幸甚。然宰相之任。古難其人。正使不得全才。寧取椎頓朴實之人。緩



急猶可倚賴。思退庸狡、小黠大癡、恐誤陛下國計。且警敏二字、非明主所以卜相之法也。退以上語諭同列。檣勃然變色、明日亦請對。於是以王之望爲諫議大夫、罷公言職、以直敷文閣知建寧府。越兩日、而有詔張公罷兵還朝。又兩月、張公竟罷相印去、而和議遂定、如思退等之策矣。時隆興二年六月也。初、公惡檣姦邪、面舉韓魏公富貴易求、名節難保之語以警切之。檣大愧恨、至是旣得陰結近幸以售其姦、遂連中外之力、先排公去之、然後罷督府、退張公、召還四郡戍兵、毀撤兩淮守備、務以強虜勢、孤上心、而冀其說之必用、不復能爲宗社計也。虜於是乘勢大入、幾不可支。上亦悔悟、而太學諸生數百人前後伏闕、再上疏請召用公及胡銓、王十朋等而斬思退之望、尹檣、洪适以謝天下、謂之四姦。思退等由是始敗、然邊備遂弛、不能復^①張天下至今恨之。公至建寧、一以惠愛撫其民、

如爲縣令時。掾史以死囚獄具、至錄問、輒不承、請循故例即訊而已。公不可、曰、錄囚于庭、法也、吾何容心哉。旣亦卒無稱冤者。未幾、就除福建路計度轉運副使。聽覽不倦、幽隱畢達。欲行部、輒先移文所至、毋得治道路、飾供張、諸州以例致餽、一不受。作觀風九^②詠、以示敦本厚俗之意。轉朝散郎、除江東路提點刑獄公事。移浙西、轉朝請郎、以宗正少卿召還。五年、權太常少卿、侍立官、給事中、除兵部侍郎。時朝廷欲調沿江數郡民兵、列屯江津、以備虜。公力爲宰相言、虜未嘗窺邊、民兵未嘗練習、無故點集、恐徒擾而無益。語聞、事寢、以足疾求去、不許。會浙東有風水之災、秋稼盡壞、州縣不以聞。公以白上、上即遣漕臣按視、蠲租賦、賑流冗、官吏蔽匿者皆抵其罪。尋詔公同脩國史、轉朝奉大夫、除右諫議大夫。命下之日、中外翕然。時杭帥周淙多創攝局以私親故、秀守徐藏遣吏持錢買燈都下、

聞之恐懼、皆亟罷之。公入謝、陳四事曰：畏天、曰愛民、曰修政、曰官人。因言：治効未易遽言、而治象可以立見。陛下誠能盡取天下賢才、真之列位、自然壯觀朝廷而治象可見。治象見則治効因可卜矣。上曰：善。六年正月戊辰、大雨震電。庚午、大雨雪。公求對、極陳祗畏天戒、飭正庶事之說。時東宮久未建、復奏手疏言之。上皆嘉納。時上已深悟前日和議之失、思欲亟致富強、以爲恢復之漸。而小人乘間爭售其說、有王天覺者、以貨結左右、陳聚斂擊刺之術、皆狂妄乖刺。上未之察、以爲樞密院編修官、臺諫攻之不能動。公極論之、上始開寤、逐去。史正志者、素以傾巧進。至是當帥成都、憚遠役、則使其黨請復置發運使、而以己爲之。上然其說、公入奏曰：祖宗本建此官、蓋沿唐制、轉東南以餉京師。今已居東南而衣食其租稅矣、又頗分給武昌、建康、京口、諸軍、應上供者數亦無幾、而虛立此官、甚

無謂。況正志反覆小人、誕妄有素、不過欲假此重權、割剝州縣、侵牟商賈、以自爲功耳。自今以往、法之旣密者不復寬、法之未密者日加密、臣恐數年之間、民愁盜起、有以勞聖慮也。疏三上、且面論之益切。上亦知正志之妄、謂公曰：吾姑試之耳。公於是退而求去。上封還所奏、手札喻公若曰：都兪吁、前聖所不免、卿豈可輕去爲高耶。公復求對、面請益力、上留公亦益至。已而發運司爲公私之病、果皆如公言、正志遂以罪竄、而發運官屬皆罷矣。公嘗爲上言曰：蜀漢之兵可以窺關陝、荆襄之衆可以趨韓魏、江淮之師可以擣青徐、三者之勢、相爲掎角、不容有偏。今蜀道旣委大臣、開府節制、而荆淮之郊、東西數千里、未有任其責者。願擇重臣分以委之、則久遠萬全之計也。上曰：武臣爲之、可乎。公曰：文武固無異道、但必得真才宿望、足以服軍民之心者、然後可以濟國事耳。上曰：善。公言曰：



中興之初、諸將領兵者皆別選精銳數百人自爲一卒、優其廩餼、以故驍勇競勸、所向有功。韓世忠所謂背嵬、張俊所謂親隨、劉光世所謂部落是也。今養兵雖衆、而諸將未聞有能爲陛下拔尤取穎、以生其氣勢者。願陛下之有以詔之也。上欣然曰、此朕意也。即下其書諸將。尋以與脩玉牒成書、轉朝散大夫。再上章求去、不許。七月、除給事中。會節將成、閔冒請眞俸、事覺、詔罪官吏之出納者而置閔不問。閔門王抃招納妄人謝顯、矯稱密旨、出境生事、詔抵顯等罪、而亦不以及抃。公皆處駁議、乞正典刑。章上、翼日除禮部侍郎。公力辭不拜、遂除敷文閣待制、提舉江州太平興國宮以去。七年、詔起公知婺州。辭不獲命、再踰月、始就道。未至、除太子詹事、兩詔趣行、仍令州郡敦遣。公遂入見、上慰藉甚厚、屬以調護之意。公亦竭誠輔翼、凡所以告太子者、無非規戒之言。一日、召對東華門、賜坐、從

容訪以治道。公論士大夫苟且欺誕之弊及江湖荒政甚悉、上皆納之。因出手書唐太宗與魏鄭公論德仁功利之語而書其後、俾公極陳今日所未至。公拜謝、退、上疏曰、臣聞仁德者、治之本也。功利者、治之効也。大有爲之君、務其本而効自至、未有無其本而有其効者也。陛下鑑觀古事、親御神筆、深詔愚臣、以求今日所未至、此堯舜之心也。臣敢無辭以對。臣竊觀陛下欲承天意、而比年以來水旱間作、數千里間、流殍萬計、是所以承天意者未至也。陛下欲結民心、而營造寨屋、民不聊生、死凍餒者不知其幾、是所以結民心者未至也。陛下欲任賢能、而張栻一言、遽從外補、正直之氣鬱而不伸、是所以任賢能者未至也。陛下欲退小人、而正志方逐、張某繼之、張某適罷、韓玉又進、是所以退小人者未至也。至於欲擇將帥、而內外諸軍、脔削士卒、專事交結、不修軍政、欲卹軍情、而移戍江津、

措置失當、使其老幼狼狽失所。欲擇監司、而以祥刑之寄付之武臣。欲吏久任、而或到官旬日即行改易。凡此八者、一有未去、則於陛下深仁厚德、不爲無累。臣恐功利之効未易可致也。願陛下無以仁德爲難、而忘爲治之本、無以功利爲易、而速爲治之効。欽崇奉若以承天意、哀矜惻怛以結民心。任君子必盡其才、去小人必絕其本、廣搜智略、以司閫外之權、作成武勇、以振三軍之氣。罷監司之非人、申久任之良法、自然仁德昭著、功利烜赫、將與唐虞比隆、而視太宗之事有不足爲者矣。疏奏、上嘉歎再三、出以示輔臣。詔以公兼侍講、公以足疾有加、求去甚苦。上固留之、詔聽五日一參。公力辭不許。十二月、以病劇請致其事、上始知公果病、除敷文閣直學士、提舉太平宮、遣使賜以告身衣帶。公還家、病間、已而復作、再奏告老、遂以八年四月癸丑卒於正寢。自疾革、即屏醫卻藥、湛然無怛

化之意。七日而終、享年六十有五。詔轉一官致仕。訃聞、贈太中大夫。公質實無僞、莊毅有守、而色和氣溫、不露節角。人有片善、稱歎不已。小有不善、必面規之。自起寒素、以至通顯、奉養益薄、無所嗜好。不治生產財利、祿賜隨用輒盡、不爲毫髮計留。自罹內艱、不復入私室。誨督子弟、接引後進、孜孜不倦。在州縣勤事愛民、號爲良吏。及登朝廷、直言正色、遭值聖明、開獎納用、抑邪與正、中外倚以爲重。隆興中、協贊廟謀、經營北向之策、尤盡其力。當是時、國勢幾振、不幸爲小人所間以去。比其復來、則事已異於前日、而公亦益老矣。然其氣不少衰、因事獻言、必極其意而後已。蓋公嘗爲人言、先儒有論爲貧之仕者曰、俟吾之饑餓不能出門戶也、而後計之、此孫言也。而聽者不喻、則其弊將無所不至。夫饑餓而不能出門戶、則死而已矣、尙何計之爲哉。公敬遜誠懇、非欲以大言夸世者、而其語如



此足以見其所存之素定而所立之非偶然也。少時聞潘左史良貴廷叱奏事官、竊獨歎曰、潘公慙矣。曷若退而疏之、之爲得體乎。族父某部侍郎公輔聞而賞之曰、子少年而議論及此、異日立朝、當必有可觀者。願子自愛。至是卒如其言。所爲奏議及它文若干卷藏于家。娶朱氏、封碩人。子男四人、元壽、右迪功郎、耆壽、右承務郎、彭壽、太學生、廣壽、敕賜進士出身。女二人、適右迪功郎郭戡、進士吳洎。孫男七人、女三人、皆幼。元壽等將以是年九月壬申葬公于義城鄉疊石山之原、以熹辱公知待薦寵之厚、俾次其行事、將以求誌於作者、請謚于太常、且備異時史氏采錄。熹不得辭、謹第錄如右。謹狀。乾道八年八月日、前左迪功郎朱熹狀。

朱熹撰 《晦庵先生朱文公文集》卷九七

敷文閣直學士陳公良翰神道碑

自紹興壬午迄乾道壬辰十年之間、士大夫舉端

人正士、陳公邦彥必在焉。蓋其議論專以格君非、定國是、扶持公道、斥遠姦佞爲本。當高宗內禪前二日、寘之六察以遺孝宗。作其即位、徧歷給諫、每行其言。立儲之初、召長官寮、期大用於他日。二聖相遺如此、而歲不我與、公則逝矣。天下至今惜之。其子耆壽等以書謂某曰、先人即世三十年、侍講朱公熹嘗狀其行、而墓碑未立。烏臺虎觀之僚、道同志合、惟公獨在、敢固以請。予雖老悖、尙能追記大略、乃序而銘之。公諱良翰、邦彥字也。世居台州臨海縣。曾祖咸寧、妣吳氏。祖懷漸、妣朱氏。父守中、贈奉直大夫、妣碩人洪氏。公幼孤、天資莊重、讀書輒會要旨、爲文氣槩不凡。中紹興五年進士第、以左迪功郎主紹興府會稽縣簿。秩滿、升從仕郎、知明州慈溪縣事、導德門三鄉渠漑田利民。改宣教郎、知溫州瑞安縣、轉奉議郎、俗號彊梗、吏治尙嚴、公獨撫之以寬、租賦揭示名物、人競樂輸、聽訟率

得其情。或問何術。公曰。清水明鏡不可形逃。心澄亦猶是矣。丁內艱。服除。充衢州教授。轉承議郎。三十一年冬。用殿中侍御史吳芾薦。入御史臺爲檢察官。明年六月。擢監察御史。孝宗覃恩。轉朝奉郎。賜緋魚袋。虜主完顏褒新立求和。中原舊人多來歸。詔問何以處之。公言。議和復受降。皆非是。自治可也。復詢時務。公請明階級以修軍政。核軍實以豐財用。禁折變以蘇民力。省堂選以抑奔競。官當久任。賞罰當合衆心。隆興元年七月。除左正言。首陳納諫修德畏天恤民語。極剴切。虜移書取海泗。唐鄧且邀歲幣。公持不可。詔遣小使盧仲賢。李拭。公言。仲賢輕儇。拭北來難信。又言。廟堂督府異議。恐失事機。楊存中久擅兵權。太上皇罷就第。奈何復假使名付以邊事。上皆嘉納。公因言。權宜與虜和。名分不可不正。陵寢不可不歸。四州不可復與。降附不可遣。邊防不可弛。上曰。朕志已定。於是書

用敵國禮。而降附不復遣。俄以戶部侍郎王之望。知閣門事。龍大淵往議四郡陵寢及歲幣事。公與侍御史周操復言。四郡固不當議。若歸陵寢。乃予發幣。聘使未應出境。有詔侍從臺諫集議。多附公說。上爲罷使。第命小臣胡昉。楊由義充審議官。十二月遷左司諫。成恭皇后受冊。錄內外親屬二十五人。公論其泛。詔減七人。昉由義旣辱命。宰相猶議和不止。至欲罷督府。右正言尹穡助之。公言。絀不用。以直敷文閣。知建寧府。二年四月也。兩淮已徹備。虜遂大入。上深悔之。太學生數百人伏闕。乞召用公等。不報。用治最就。升本路轉運副使。作觀風九咏。諭厚本善俗之意。行部不許治道。供帳餽餽皆卻之。改提點江東刑獄。又徙浙西。歷朝散。朝請郎。乾道四年十一月。以宗正少卿召還。五年兼權太常。又權侍立官。又兼權給事中。四月擢兵部侍郎。賜服金紫。浙東風水敗秋稼。州縣隱蔽。公白



遣漕臣按視振恤、官吏多抵罪。兼同修國史、轉朝奉大夫。十二月、除左諫議大夫。臨安帥多創攝局、私親故、秀守遣吏市燈中都、聞公除日、皆懼而輟。公入對、以敬天、愛民、修政、官人四事爲獻。六年正月戊辰大雨震電、庚午大雨雪。公請畏天戒、正庶事。儲位未正、手疏言之。先是上雖勉從和好、志存恢復。有王天覺者用聚斂擊刺之術迎合爲圖冊、因近習以進、得樞密院編修官。言者交攻未聽。因公極論始去之。史正志憚守成都、創發運使得留。公奏、祖宗立國於汴、重兵屯西北、故運東南之粟。今軍國就食東南、此職安用。疏累上、面再三、繼以求去。上還其奏、公論列不已。正志竟罷。公嘗言、蜀漢之師下關陝、由荆襄趨韓魏、江淮擣青、徐、今日大計也。四川旣命大臣宣撫、荆淮自當一體。又言、中興初、劉光世之部落、韓世忠之背鬼、張浚之親隨、皆擇驍銳、優其廩犒、以勵諸軍、故能所至成功、

願取以爲法。上然之。下其疏於諸將。宗正寺玉牒書成、轉朝散大夫。七月進給事中、纔兩月、節度使成閔冒請眞俸、有司坐獲譴。閤門王抃矯詔遣安人謝顯出境、顯抵罪、而置閔及抃不問。公並封敕還之。明日、改除禮部侍郎、固辭不拜、以敷文閣待制提舉江州太平興國宮。七年、起知婺州。未上、召爲太子詹事、連詔趨行、仍命州郡禮遣。旣對、上勞勉甚至。未幾、命公與某同對選德殿、手錄唐太宗與魏鄭公論德仁功利之說、批聖語於後、使極陳今日之未至者。公退而上疏曰、仁德治之本、功利治之效、務其本則效自至。今水旱數千里、流殍萬計、是承天意者未至也。金陵創營寨、役夫凍餒不聊生、是結民心者未至也。欲任賢能、而張栻一言遽從外補、欲退小人、而正志方逐、張松繼之、松罷韓玉又進矣。欲擇將帥、而腴剝交結如初。欲收軍情而老幼困於移戍。至如詳刑參用、武臣久任、乃

復數易。誠能革此八弊。則仁德無累。功利自致。疏奏上悅。以示輔臣。旋命公及某並兼侍講。俄以足疾乞去。詔聽五日一朝。力辭不允。十二月遂告老。上知公果病。除敷文閣直學士。再提舉興國宮。就賜告身衣帶。八年四月。轉朝請大夫致仕。癸丑卒於正寢。享年六十五。爵臨海縣開國男。食邑三百戶。特贈太中大夫。是歲十月壬申。葬縣之義城鄉疊石山之原。諸子升朝。累贈金紫光祿大夫。妻碩人朱氏。累贈魯國夫人。後公二十五年薨。四男。元壽。通直郎。福建安撫司幹辦公事。後十九年卒。耆壽。朝請郎。新權發遣常州。彭壽。朝請郎。通判沅州。廣壽。朝奉大夫。行太常丞。兼權倉部郎官。修身好學。皆有家法。二女。朝散郎前通判撫州黃朴。宣敎郎前兼兩浙轉運司務解官吳洎。其婿也。孫男十八人。文之。奉議郎。知隆興府新建縣。前卒。振之。國子進士。揚之。厚之。方之。國子進士。擇之。孚之。奇之。

迪功郎。新饒州司戶參軍。謙之。文林郎。新袁州軍事判官。孚之。誠之。太學生。說之。拱之。淳之。詠之。挺之。存之。仔之。孫女八人。長適迪功郎。南劍州尤溪縣尉范大雅。次適進士黃如阜。石繼時。迪功郎。新撫州金谿縣主簿趙師羔。文林郎。新潭州湘潭縣丞趙汝适。次在室。次適將仕郎趙希賢。次尙幼。曾孫男女二十一人。公質直好義。氣和而守正。早爲族父禮部侍郎公輔所知。期以遠器。自寒素至。通顯奉養如一。內難後。不復入私室。用度悉出祿賜。未嘗問產業。誨督子孫。接誘後進。孜孜不倦。人有片善。力加稱獎。不善。即規正之。旣葬十八年。光宗踐祚。追思舊僚。官未應謚。特以獻易其名。禮部尙書尤袤之守台也。邦人乞祠公於學。尤公以爲宜。繪公與提刑羅適及族父小宗伯合而祠之。榜曰三老。所著^④有奏議文集二十卷。銘曰。三聖相授。精一惟心。大政所咨。左右惟人。侃侃陳

公端諒清醇。鴻漸于朝。通宏厥聲。堯老欲傳。實諸臺評。重華繼承。地禁職親。獻可替否。盡忠竭誠。身有進退。道無詘信。繼在震方。溫文日新。宮尹孰宜。公惟當仁。胡不萬年。遂都四鄰。天以遺直。成其令名。我爲銘詩。式穀來今。不顯臣良。於昭君明。

周必大撰 《平園續稿》卷二六

武岡軍太守羅公墓誌銘

公諱裴恭字欽若。其先襄陽人也。五世祖拯。中景祐進士第。攝從事廬陵。因家焉。曾大父曰宣。故守秘書丞。大父拱辰。鏞述民伍。父虬。故贈右朝議大夫。朝議府君以學問爲鄉先生。疾革。命公曰。吾故家衣冠文物。不墜惟汝。公涕泣識之。辛勤讀書。至不類不冠。或曰。何至是。公曰。客子敗人意。彼見我頭如蓬葆。當引去。其勤如此。旣而歎曰。里居不識。其可以卒吾業。乃徒步入賢閣。後三年登進士第。蓋建炎二年也。授迪功郎。虔州司理參軍。宣諭使

李公案命公鞠賊。賊富且黠。挾故有以持。有司莫能決。至是復以錢二十萬遺公求脫。公笑曰。是復以他有司待我耶。卒論殺者三十人。移潭州司理參軍。平反盜九人。胥二人。湘潭士鄧深者。以事係獄。公爲白其冤於帥侍郎謝公祖信。且薦其能。請釋之。明年鄧君策第。後爲達官。時謂公知人。紹興十二年。陞秩左從政郎。遷靜江府荔浦縣令。異時廣西轉運司歲符浦民以稅高下輓粟五千石。饒宜州。公奏計曰。荔浦抵州絕遠。不通舟楫。民往焉則以賤粟得貴銀。至焉則以賤銀得貴粟。惟財粟之。轉運使即令輸者止詣縣。至今民有去思碑。龍圖閣學士張公宗元有薦牘一。而求者十八人。皆不與。一日召公食。即席授簡。謔公草奏三篇。食竟而章就。張公歎敏而工。乃與之牘。未嘗求也。十六年。用薦者改秩左宣教郎。知虔州石城縣。以重賞捕十年未獲之盜七十人。減民稅之以經界增者。



儒藏

葬前政主簿逢君之無歸者。二十二年授左承議郎、道州僉幕。明年賜命服左魚。至道州朝旨命鞠邵州民張巨駟獄。初巨駟等以仇家誣告與賊通獄吏楊錫得賂力主仇家太守之子弟與知之遂起大獄連坐者三百餘人疾而死者六七十人黥而流者二十八人沒入貲產者十八家公具得其實楊錫不得隱即首服公正其罪而返二十八人之黥而流者還十八家之沒入者冤民得直皆畫公像祀焉。提刑蘇公籍歎曰邵守方位於朝公不疚於禍仁者之勇哉。二十九年授左朝散郎通判贛州。贛本虔州至是改焉。贛俗貧民生女則殺之公乃以頃在石城所作殺女戒下之邑善諭而嚴禁之活者無數。贛之廩人給兵糧率以公量入以私量出兵人口語籍籍公窮治其狀太守不樂陰代公即奏請祠於朝。命既下或勸公自辯公曰祠祿吾願也。公在贛也題輿得職人以方瀨憤故事

彼有慚色。隆興初從列有力薦公於上者上雅聞公名授左朝奉大夫知武岡軍。公以老病懇請奉祀。乾道戊子三月授左朝散大夫四月得祠祿而疾作矣。是月庚申坐而逝。初室彭氏太常博士齊之孫女繼室喬氏貴妃之族女趙氏濮安懿王之孫皆贈宜人。三男齊賢尚賢世賢世賢彭出也皆能傳業齊賢補將仕郎尚賢以公致仕補官世賢名佳進士三女長嫁李叔浩次陳叔虎其季許嫁費洽男孫二人尚幼其孤以乾道五年十有一月庚申卜葬公於吉水縣仁壽鄉太平里東郭山以左宣教郎新差知隆興府奉新縣楊萬里狀走行在乞銘於某其大略云公之學邃於名數字書故其文長於序事其碑板之作尤崛奇間出庾辭難語切響奇字讀吾皆駭或問是出何書公即呼其子曰取插架某書某卷第幾簡其強記雖昔簡節陵栢寢器不過也又云萬里嘗歎今代備顧問者



惟公可、而止於斯、可哀也。公有詩文三十卷、號不欺先生集、又增廣左氏指蹤、春秋會盟圖二書、歐陽文忠公年譜并序、又有辯謗一卷。里中後輩從公受業者多登第、如羅君上行、郭君有憑其選也。某與公幼同泮水、長同上庠、又爲同年生、知公深矣。銘公則莫如某、矧廷秀請之力。廷秀、萬里字也。某在海上時、公移書云、邦衡此行、前無古人、後無來者。某得書太息流涕者久之。方權臣當國、飛鳥不敢問、公獨惓惓如此、所言不畏強禦、惟公有焉。嗚呼、某尙忍言耶。輒刪取其狀、叙而銘之。銘曰、嗚呼武岡、誰不絜楹以容、公戛戛兮。箝默以爲能、公獨介兮。羞彼突梯、玉析竹裂兮。忠以爲信、郭莫克侵軼兮。辭寵而就祠、得勇決兮。直羸近禹磨、一何傑兮。揉劓劓而不試、古所噎兮。鉞石崩辭、婉變者之怛兮。

胡銓撰 《胡澹庵先生文集》卷二八

宋左朝散郎尙書考功員外郎黃公行狀

公諱公度、字師憲、世爲興化軍莆田人。大觀間、皇考靜有聲於上庠、起家試秘書省正字、遷校書郎、終左朝奉郎、提舉京畿、京西路茶鹽事、以公貴、贈中奉大夫。祖邈、以中奉公贈朝請郎。曾祖陟、晦德不仕。黃氏在莆爲著姓、世多聞人。公之族兄泳、以童子召見、徽廟朝、賜五經及第。至紹興八年、公遂以文章魁天下士、解褐簽書平海軍節度判官廳公事。時有流民數百輩自汀、虔下、郡疑其盜、盡繫之、行旅騷然幾變。時郡倖庸人、喜生事、欲自以爲功、無敢言者。公獨辨其非、倖不悅、語侵公、公爭益力、已而皆平人。代還、除秘書省正字。故事、第一人以館職召、公之除非當路意、居數月、言者論公嘗貽書臺官譏時政、罷爲主管台州崇道觀。秩滿、通判肇慶軍府事。高要於百粵尤荒遠、非以罪遷及資淺躋授者不至、或唁公、公笑曰、是獨不可爲

政耶。先是、屬邑胥於道得銅、寓書生舍、旣而誣以爲金、郡寘生獄、獄且具、生寘甚、抑於有司、莫能明。公至一問得其情、立出之、以其罪罪誣者、府中惴服、守賴以無事。居亡何、部使者檄公攝守南恩、至則決滯訟、除橫斂、人安樂之。增學廩二百餘斛、擇其秀民與之登降揖遜、學者用勸。恩平自唐貞觀置郡、至是始有梁作心者、由科目登仕版、邦人相率繪公祠于學。公還、越其境以送。二十五年冬、被召赴闕、明年正月入對便殿、乞總權綱、厚風俗、所言皆切時病。上嘉納之、且知公歸自南海、問勞良久。公因歷陳遠人利病如上旨、立拜考功員外郎。於是天子識公、將盡用之。其年六月、公得疾、八月二十四日卒于位、年止四十八、自承事郎五以序遷、止左朝散郎。國朝首儒科者、率不以五六歲即列侍從、公陸沉不偶、十有九年、始入尙書爲郎、同時召用者、往往以次遷擢、而公不任朝謁矣。方其

出入瘴霧、往還數千百里、未嘗親藥餌、一日被遇、則死奪之、悲夫命也歟。公寬和樂易、喜慍不形于色、與人交忘其短、其爲人力可及、無所愛、士有寸長、即退然下之。尤不喜聞人過、平居汎然若無所可、否而胸中涇渭明甚、于所厚善眷眷不能捨。訃至之日、皆相弔出涕。始莆中有讖語相傳甚久、公旣首多士、以其語驗之、皆信。所識地有大木可蔽畝、公將亡、木忽仆、人甚異之。有文集十一卷、藏于家。母鄭氏、宣德郎永中之女、贈令人。娶方氏、左朝奉郎符之女、封安人。男五人、沃、泮、洧、洙、皆力學能世其家。沃嘗舉進士。南僧尙幼、女三人、長適右迪功郎潮州海陽縣尉林敖、次適左迪功郎鼎州州學教授林枏。孫男處權、處材。季弟庚、以文藝早知名、公尤友愛之、及赴召、攜以偕行。以旣捐館、庚將試禮部、不忍獨留、與沃同護喪歸殯于某處、需葬事。茂良忝公同年進士、辱交最久、知公平生爲尤

詳然公負遠業、用不究萬一、見之行事者止于此、姑次序以告當世立言之君子、圖不朽焉。謹狀。紹興二十六年十月日、左文林郎、新差泉州觀察推官龔茂良狀。

龔茂良撰 《莆陽知稼翁文集》附錄

故尚書考功員外郎黃公墓誌銘 左朝散

郎提舉江州太平興國宮林大鼎撰

粵自秦益公檜當國之日、凡陞擢人才、未嘗召用于外。二十年間、陸沉州縣者衆、祖宗薦對之科、徵拜之令、至是弛置。紹興二十五年冬、益公薨、天子慨然收下移之權、歸諸掌握、銳意求賢、鋒車四出、召魏良臣、沈該置之政事堂。以前後大魁皆淹遺于外、於是張九成、陳誠之、劉章、王佐、趙逵等以次除召、分布館閣臺省。公在一輩中最久最滯、故首被命。其年十一月、受命赴闕、正月登對便殿、乞以總權綱、厚風俗爲今日急先務、言中時病。上喜、知

公歸自南海、再三勞問。公歷陳遠人利害、皆嘉納之、面命除尚書考功員外郎、朝論美其親擢。知眷獎之渥、繼見朝夕。母何、公六月得疾在告、八月二十四日卒于位、年四十八、官至朝散郎。惜哉。公姓黃、諱公度、字師憲、世爲興化軍莆田人。皇考靜政和初起家、試秘書省正字、遷校書郎、終左朝奉郎、提舉京畿京西路茶鹽事、以公貴、贈中奉大夫。祖邈、以中奉公贈朝請郎。曾祖陟、晦德不仕。族系在莆爲著姓、世多聞人。中奉公以本州首貢作南廟省魁、中上舍兩優之選、公之族兄泳以童子召見徽廟朝、賜五經及第。至紹興八年、公又以文章魁天下士、族弟童亦在榜中高第。公解褐、簽書平海軍節度判官廳公事。時有流民數百輩自汀、虔下、郡疑其盜、盡繫之、行旅騷然幾變。郡倅庸人、喜生事、欲自以爲功、無敢言者。公獨辨其非倅、不悅、語侵公、公爭益力、已而皆平人。代還、除秘書省正字。



故事第一人例以館職召、公之除非當路意。居數月、言者論公嘗貽書臺官、譏議時政、實未嘗有書也。罷歸、主管台州崇道觀。秩滿、通判肇慶府。高要於百粵尤荒遠、非以罪遷及資淺躡授者不至。或信公、公笑曰、是獨不可爲政耶。先是屬邑胥於路得銅、寓書生舍而去、旣誣以金、郡置諸獄。獄且具、書生竄甚、抑於有司不能明。公至、一問得其情、立出之、以罪罪誣者。府中惴服。部使者聞其才、謂檄公攝南恩守、至則決滯訟、除橫斂、人情孚悅。南方風俗有遭喪者、椎牛釃酒、鼓舞達旦、以娛弔客。至破產營齋祭、以相競尚。公作文勸諭杜絕之。增學廩二百餘斛、擇秀民與之登降揖遜、其中學者用勸。恩平自唐貞觀置郡、至是始有梁作心者登進士科、郡人相率繪像祠于學。公還、越境以送。其在高要、亦修黌舍、鼎新夫子廟貌、師聖賢哲、山龍煥然、邦人爲之改觀。公所至羽翼吾道如此。歸未幾、

被召爲尙書郎考功。四選咽喉、天官之劇、曾非親加綜覈、依格任吏、摺紳有不勝其弊者。公期振職、不負所付、爲之焦心敝力、殿最功罪、斟酌定奪、務在允平。食息之間、節宣有爽、而疾作矣。同時召用者、皆叙遷超拜、而公已在告中、不任朝謁。異時官瘴鄉、往還霧露中數千里、未嘗服藥、一旦遭遇、而疾纏之、命也夫。先是黃涅槃有識云、折卻屋、換卻椽、望京門外出狀元。是時孫守憲改創譙門、規樞雄偉、甫成而公捷音下。公病中夢雷電震閃、旗幟殷赫、擁櫬而去、金書化字以示公。屬續之夕、果雷雨大作。公應三百年之懸讖而來、仙官敕雷電六丁擁而去、去來默符冥數、厥非偶然者。公爲人寬和樂易、喜慍不形于色、與人交忘其短、於所厚尤眷眷、如天性。士有寸長、退然下之、不喜聞人之過。訃至之日、皆相弔出涕。公負大科名、益修遠業、學識淹該、詞氣涵浩、其議論文采、含起草之姿。陳誠



之入翰苑、首薦公自代、其人望相期、豈淺近者。工詩、倣杜甫古律格、而法句逼真。詩併雜文有一編十一卷。母鄭氏、宣德郎永中之女、贈令人。娶方氏、左朝奉郎符之女、封安人。男五人、沃、泮、洧、洙、皆力學、世其家。南僧幼未名。女二人、長適右迪功郎、潮州海陽縣尉林敖、次適左迪功郎、鼎州州學教授林枏。孫男二人。公之兄庭、以中奉公蔭補高州電白尉。先公卒、季弟庚、早以文藝知名。公卒之明年、擢第調福州連江尉。沃弱冠舉進士、屈於禮部、今當嗣任子貽恩。沃在浙京遭鉅創、煢然無親友、攸助、獨侍老母、攜弟妹蓬跣二千里、扶公柩以歸。既虞、亟圖窀穸之事、徧走山間、得吉卜於方山之原、撰曰下事實紹興二十七年九月二十日壬午也。沃以大鼎與公雅有事契、知平生出處之詳、重以誌銘爲請、義不得辭。銘曰、

上天有籍、錙銖稱量。對因付果、視履考祥。稟之厚

薄、器之窳良。賦公德行、嫻如珪璋。畀公才調、琅然宮商。假公科名、江夏黃香。胡不百年、鬢眉雪霜。紅顏未槁、井已生桑。向魁天下、十年鳳凰。其不至者、金馬玉堂。今十九年、一尙書郎。子三奪一、孰問蒼蒼。蒼蒼無據、老釋荒唐。諸孤負土、方山之陽。素車雲散、松檟淒涼。有詩有文、珠玉千章。名懸不朽、日月爭光。

林大鼎撰 《知稼翁詞集》附錄

訓武郎趙公醇叟墓誌銘

君諱師孟、字醇叟、胄出昌陵、燕懿王之七世孫也。懿王生冀康孝王、康孝生丹陽僖穆王、僖穆生南康修孝王、修孝生崇溫獻公、五世皆居嫡長。溫獻諱令圖、是爲君之曾祖考。祖考諱子野、終襲慶軍承宣使。考諱伯莊、繇宮邸爲外官、終右朝請大夫、知道州。君生而秀異、長無貴驕之習、以孝友稱、用承宣公恩補官。紹興壬子歲調監永州祁陽酒稅。

秩滿用宗室恩得監潭州南嶽廟。自是之後、寓居南嶽蕭寺中、屋僅數椽、被服不減寒士。無他嗜好、獨與簡編對、潛思博攷、矻矻忘晝夜、其於國朝法度興革廢置利害靡不周悉。至於天文、象數、卜筮、篆籀亦無所不通、論古今事纒纒可聽。間即遊歷溪山以自娛適、蓋無復後進意也。逮於壬午歲之春、先公忠獻留守建康、薦君才可以任事、操可以厲貪、願易文階、擢真清近、以爲公族勸。有旨令赴在所、而君時已抱疾、喟然曰、固願一見君父、効愚忠、其如疾何。且幸得托公族、竊厚廩、召而不行、國則有刑。乃扶持越數驛、引疾以歸。蓋自始求退、以至於終、凡任嶽廟者五、主管台州崇道觀者四、其恬於進取如此。始君來南嶽、會文定胡公之家在焉、君聞所講伊洛餘論而心慕之、與文定季子仁仲先生遊餘二十年、其間講論問辨、固非一端、而君自謂吾斯終未有所安也。故先生之沒、君哭之

尤哀。然而君方年少時、性剛而氣銳、遇事輒發、不可少忤。及見先生長者以來、閒暇靜養、至於終歲、意象循循、寬厚和易、未嘗有忿色慍辭見於外。識君者皆謂與疇昔爲易人、則學力之所變化亦可知矣。於後有室家之戚、歷時而情未能遣、君頗病之。一日晨起、灑然有喜色、家人怪而問焉、則笑不答、已而語其友曰、吾今而後始爲不負此生。平時滯吝、冰解雪消、其樂有不可名言者矣。蓋自是以爲所得不疑、有隱几據梧之意。家事亦不甚經念、時獨旁觀老釋之書、輒然一笑。晚苦末疾、以乾道壬辰九月十七日終於所寓之正寢、享年六十有四。其年冬、君之友胡寔狀其行使來告曰、醇叟不幸死而無子、將以十二月壬寅葬於衡山蘭橋之原、惟是所以詔來世者敢請。某念往來湘中、熟君舊矣、義固有不得辭者。重惟習俗之弊、搢紳大夫往往競於寵利而不能自克。如君近出公族、抱負



儒藏

才業而退然終身孜孜求道無所歆慕乎外抑亦可尙也已。是宜銘。君積官敦武郎配王氏先八年卒。獨有二女長適將仕郎張衍次適右迪功郎柳州洛容簿范子文。君無恙時或勸宜以時定嗣子。君曰兄弟有子先人不乏祀是亦足矣。而識者尤悲之。銘曰。

世俗爭驚己獨處兮。公族烜赫己踽踽兮。天資剛強變寬裕兮。夫豈偶然學所致兮。生以其常死曷悸兮。勒名於丘示來世兮。

張栻撰 《新刊南軒先生文集》卷四〇

校記

①復：原作「遂」，據宋江西刊本《晦庵先生文集》改。

②九：原作「七」，據右引改。

③至：原無，據四庫本《文忠集》補。

④所著：原無，據傳增湘校道光刻本《廬陵周益國文忠公

集》補。

⑤此處當有脫誤。

⑥尤：原作「充」，據四庫本《南軒集》改。

宋儒碑傳集卷一百十一

錢端禮

觀文殿學士錢公行狀 代汪尚書

曾祖暄、故任中大夫、寶文閣待制、累贈太師、鎮國公。妣陳氏、贈國夫人。祖景臻、故任少師、安武軍節度使、累贈太師、康國公。尙仁宗皇帝女秦、曹國賢穆明懿大長公主。父忱、故任少師、潼川軍節度使、累贈太師、雍國公。妣唐氏、雍國夫人。本貫開封府。錢公諱端禮、字處和、年六十九狀。吳越忠懿王六世孫也。高祖惟演、以文章受知章聖、掌內外制十有餘年。擢樞密使、以襄鉞鎮盟津、移洛陽。歐陽文忠公修、尹公洙、謝公絳皆在幕下、一時士靡不歆艷。諡文僖。鎮公在慶曆、治平間、號良二千石。神宗朝、王莊定公存領三司、鎮公爲副使。奕世光顯、至康公而愈大。公雍公第三子、以賢穆之孫、政和初授宣義郎。七年、賜緋。宣和三年、賜金紫、主管西京

嵩山崇福宮。靖康元年、監登聞鼓院。未幾、隨侍重親、避地湖廣、累奉祠祿。紹興三年、添差通判台州。歲饑、方議賑給、飢民千餘人集譙門下、守欲設兵衛。公曰、是促之爲亂也。亟開倉、俾以次受粟、無敢譁者。識其間有猾吏數輩、白太守尸諸市、一境安堵。公時方年二十餘、由是聲名籍甚。四年、通判嚴州、又改湖州、皆不赴、主管華州雲臺觀。七年、通判明州。太守尙書莫公將知公明敏、郡政多決于公。除直秘閣。後政以苛敏自任、僚吏重足而立。公獨以理折之、不爲屈、又加敬焉。十五年、除提舉淮東茶鹽。引對、改除兩浙轉運判官。時方繕治行闕、增葺宮城、公與臨安守分任其役、率先告辦。除直徽猷閣、進寶文閣。漕司有積鏹近萬萬、或勸公獻之。公曰、此朝廷外府也、何以獻爲。時宰不樂、遂罷歸。十七年、除淮東轉運副使。時金使方通、官吏希賞、趣辦過豐、一切取給于民、怨嗟相聞。公日力言于



朝人皆危之。公曰：目覩公私之害，忍不言乎？秦丞相亦察其誠，遂爲減入。至今賴之。漕計率耗于無名之費，歲用多請于上。公革去宿弊，帑廩有餘。遂乞罷大農歲給，又儲三年之貲爲備用庫。明年進直龍圖閣，知婺州。公入境，聞歲方苦旱，即齋素默禱，首祈于星祠。香火未收，雨已大注，邦人歡呼。已而霖霖不已，公度必有水患，亟募客舟百餘艘，人或以爲蚤計。一夕水暴至，城不沒者纔數版。浮梁旣漂去，溪南市人求救者號呼震動。公坐城上，厚賞舟人，競載以濟，幾數千人。公分處僧舍，計口給食，悉遂全活。去之日，遮道挽留，生立祠至今。奉祠三年，丁雍國憂。服除，知衢州。過婺，闔境送迎，近世所無也。三衢大火，公以民居侵據通途，不因是時一正之，害未艾也。乃訪古溝遺跡，盡復其舊。自是無火災，民方大以爲便。嘗治一豪氏之無良者，偶與漕有連，以屬公。公必欲竟其獄，漕陰中公而罷。

人皆冤之。二十八年，除知撫州。抵玉山，以病勾歸。是冬召赴行在。次年陞對，除太府少卿。七月，除秘閣修撰，兩浙轉運副使。公嘗領浙漕事，至是十四年再至，人以爲淹回，而公會不介意。振舉職事，視昔有加。居無何，顯仁皇太后上仙，太上皇帝欲得典禮嚴備，御筆委公專領辦護。公晨夕不少懈，訖事，進右文殿修撰。三十年正月，除知臨安府。府以應辦積欠民戶緡錢幾數萬，公曰：天府爲郡邑首，即售物不償其直，何以示天下。盡還之。明年七月，除權戶部侍郎。先是，御史中丞汪公澈論版曹闕官，當遴選。太上問誰可者，對曰：錢端禮可。故有是命。八月，兼樞密都承旨。九月，兼權知臨安府。公嘗建明用楮爲弊，至是專委公經畫，分爲六格，出納皆有法。幾月已易見，鏹數百萬。三十一年八月，丁雍公憂。次年，今上即位，公取故諫議大夫忠肅陳公瓘所撰芻說中二十事，事爲之說，號曰正論，進

之時邊境方擾、公言戰守爲尤詳。其略曰、當今國家利害莫大于夷狄侵侮、然圖大之計不若從是而務實、張虛聲、蹈實隱、非國之福也。去年諸軍所可恃者、獨一劉錡、而首不能支、託疾退師。其餘或避舍宵遁、或全軍陷沒、或逗撓不進、間取小捷以欺君上、公肆大言、然無成效。幸而敵人自相殘滅、不然可爲寒心。今金主新立、陛下嗣服之初、所當講聘睦鄰、修明政事、訓勵士卒、增理邊要。外與之和、而不忘內修、中原之民將見襁負而歸王化矣。上每爲稱善、賜親札曰、卿世積忠孝、姻聯戚畹。雖居憂于外、乃心罔不在國家。載閱奏篇、備詳忠讜。嗣有聞見、無憚剡牘。公又奏曰、陛下訓練甲兵、申命將帥、人人賈勇、無如今日。兵法曰、倍兵不戰。蓋衆寡強弱既已不同、縱有驍勇之兵、忠義之將、適足以餌虎口耳。今彼勢雖屈、而事力尙強、未可與之較勝負。今日將帥非無忠勇之士、恐爲匹夫之

勇、乘危僥倖、貪小利而忘大計。使得一城一邑而旋得旋失、既不能保持其民人、又不能堅守其要害、更相屠戮、以激強敵。不惟終無所益、久致寇兵。願陛下審思利害而熟計之、明詔諸將無妄出兵、以蹈後患。夫戎狄俗尙殺戮、然兩世俱遭篡弑矣。報應之理、各以類至、是殺人豈有利哉。藝祖不血刃而得天下、盡除五代專殺之弊、故四海之內歸仁焉。陛下若取法祖宗、以仁政爲先、自可以鞭撻夷狄、不在于戰勝而後定也。令彼殺我、亦殺彼、鬪我亦鬪、諸將疲于奔命、民困財竭、而兵革不息、意外之虞又有不可勝言者。太上講好、息民二十餘年。今一旦欲以虛名招實禍、獻言之士徒以口打賊、若將帥妄希功賞、誤國遠圖、後雖孥戮之、亦無及矣。臣竊謂當修睦鄰好、以懷柔爲務、則安靖休息不妨固守邊障、遵養時晦、上以奉兩宮之歡、下以安百姓之生、仁及草木、則中原不難圖也。隆興

元年冬外除、召對內殿。自符離失利之後、南北相持、和戰未決。公奏曰、竊觀注措施爲可謂勤且勞矣、且夫大功必立而未聞其效者、豈非議論偏勝、機事失宜、未得其當耶。中原之當復、人皆知爲不可緩、恐須時至則可爲耳。今士多持以爲進身之資、揣摩上意、所以施爲之事未嘗有成、徒捐貨財、虛費民力、有用兵之名、無用兵之實。是欲增重兵威而反弱國勢、豈不爲鄰人所侮哉。至于招納叛亡、交結鄰援、此皆賈怨生事、無益于國者。又以江東守備未具、及所用將帥未盡得人、又奏、臣聞金人數有文移、取索俘擄人衆、是釁已開、爲興師張本。敵人犯邊、淮東必自清河、淮西必自渦口、兩處當豫選梟將、委之拒捍。維揚、六合、和州當爲聲援、須擇有謀略三大將臨之。高郵僻在一隅、三面阻水、止可以處游兵水寨之屬。或可爲間探、不可專恃。陸贄謂兵當居重以御輕、蓋謂以輕兵居前、重

兵居後、爲臂指之用。淮上旣固、則大兵當屯于沿江、如采石、宣化、鎮江、江、池皆當嚴備。又須選名將數人、如前日有因事而罷者、願加收卹、諭以恩意、稍復官爵、責之後效、孰不願盡死力。仍須以威望素著、懷忠善謀者、使各護一路。敵知備禦有方、未必便敢輕犯。若處之失宜、反爲所易。故上兵伐謀、不待戰而定勝負也。是日除戶部侍郎兼樞密都承旨。二年、寓吏部侍郎、上面諭。前日劄子議論甚好、朝臣皆不及。時韓公仲通爲尙書、同對、論及經費、因奏所入有限、兵食日增、正恐此去或更有調發、不易應辦。公奏曰、臣頃在戶部、已見支用不足。嘗總一歲出入之數、比較五年增損多寡、爲會計錄上之。後自度牒旣行、僅得八十萬、通約有四百餘萬、內庫取撥又不在此數。而辛巳調兵爲之一空。今日匱乏、實由于此。今宿兵之久、未見休息之期、臣等所以夙夜惴恐、未知救弊之道。上云、直須



恢復中原了、財賦須充足。仲通奏曰、恢復恐未可必、且願陛下經度目前所用。公奏、仲通之言甚是。望陛下聽納。上亦稱善。時左相湯公思退、右相張公浚招戶部長貳同到都堂、右相問兩淮興兵用度錢糧、公云、未知合用多少。右相云、軍中大費、且備千萬。韓公欲退而議、公云、此事體大、須與兩丞相執政面議。若非于經費內分撥、必須飛泛措置。經費既不自足、飛泛必取于民。民力困敝、若無名橫斂、不惟不堪、必致人言。韓公云、民間科斂甚難、不知以何名取之。惟有鹽鈔一事、容試議之。公曰、鹽事差可爲、然添起鈔面、則民食貴鹽、未必及千萬之數。改法亦重事。若一切行之、恐致中輟。須先有定論、然後有司可以奉行。後再論鹽事。右相云、不若賣度牒數萬道。尋有旨、且給一萬道。然竟不施行。時左相乞出、公因對、又奏、今廷臣羣居竊議、但以和戰守三事爲進身之資、未嘗權國之利害、

分朋植黨、牢不可破、以惑上聽。萬一事變、奈何。三說不必執一、但度事力淺深、知彼己當何如耳。上極然之。問今日當何如。公即奏、三代以至秦漢、夷狄多得志于中國。所謂王者不治夷狄、非不治也、以不治治之也。因歷陳秦皇、漢武用兵之禍、高帝和親、宣帝不用兵之利。澶淵之盟、爲中國之福。燕山之役、致靖康之變。又言、太上講解、以致乂安。陛下欲成恢復之志、此聖主之用心也。然兵者凶器、帝王之道以仁爲本。太祖灼見、故以不殺爲武。應天順人、指顧而定。中原破蕩、而四海獨知有趙氏、豈非仁恩之至乎。非不知順旨迎合、可以保爵祿、世受國恩、蒙陛下非常之遇、臣而不言、誰當言者。願以符離之潰爲戒、早決國是、爲社稷至計。上改容欣納。云、卿論事甚詳。因賜卮酒。且云、卿可見湯思退、諭朕旨、令勿再請。仍見張浚、令早行。退詣二相府宣諭。右相遂行。三月、充淮東宣諭使。王公之

望使淮西、公奏又詳陳秦漢之事、且言、魏晉以下、無術制夷狄、以至于亂者多矣。惟有唐制、頡利得先後之序、和吐蕃有終始之謀。五代石晉之事、尤不足言。自完顏亮入寇、于今四年、天下不得休息、殺傷不可勝紀、疾疫者殆無虛日。官爵不足以充賞、錢穀不足以爲用、內外急迫、上下煎熬。而議者不深維大計、惟空言以求虛譽、抵巇而要利權、國何賴焉。臣故歷陳自古所以制夷狄者在德、保人民者在仁、願躬行此道、以致太平。今兩淮名曰備守、守未必備。名曰治兵、兵未必精。欲增兵則餉饋無所從出、欲增備則人力有所不勝。雖使敵不犯邊、但見日以自困。今所以未長驅而來者、蓋完顏亮覆車未遠、慮挾彈者在後。欲與臣下重兵、恐有尾大不掉之患。又河南困敝、未易鳩集。故委前日餘兵付二元帥、使自經理、其意蓋欲和耳。故在今日和之爲利、南北均焉。或以前日持用兵恢復之

說者爲勇、爲忠、爲剛、以今日和議爲懦、爲怯、爲弱、此不明事機、不計事實之甚也。用兵而敗、豈不爲懦。連兵數戰而無功、豈不爲怯。與敵角逐而不能勝、豈不爲弱。今斷然行仁義之事、修文德以來遠人、可不謂勇。陳帝王之道以輔明主、可不謂忠。以柔克之、可不謂剛。又況古者兵交、使在其間、禮文之事、安可遽絕。前日敵帥力言四郡之地、若使命得通、庶幾有可商榷、未至遽行。萬一彼以重兵攻下四郡、寇裹漢淮甸、重相邀索、和則退師、不和則進兵、不知其時議者何以處之。昨小使之行、自來無此體例、爲彼摧沮、以自取辱。蓋緣事多輕發、不思後圖。茲蒙選擇、俾宣德意于淮東、及令經度事宜、不敢隱默、取誤國之誅。望察臣愚忠、明詔大臣、早定其議。御筆付三省。又奏、向者經營山東、得海州而終不能守。中原之人、非不懷祖宗之德、澤歸陛下之仁聖、然自出兵收復、所至劫掠、重擾其民。



既而又不能堅守、爲金人屠戮、肝腦塗地、生業蕩散無餘。若此、望簞食壺漿以迎王師、難矣。陳、蔡、順昌、壽春等處皆被此患、如此招來、適足以離人之心、豎後日之敵也。傳聞道路、或謂吳璘已失德順、秦州不守、還保川口。果爾、則可見用兵無效、虛費錢糧、枉殺軍士、初無益也。不徒無益、正恐釁端再起、兵連禍結、養成大患。雖有智者、不能爲陛下謀矣。方今將帥兵強馬壯、未有如璘者。力尙不敵、況餘人乎。建康、鎮江之兵、經王權、李橫敗衄之後、率皆傷殘之餘、又且數易主帥、士氣未振。江、池、襄、漢之兵、尤爲烏合、殿司一軍、爲成敏破壞、死損大半。而東南諸郡起發之兵、懦弱、不堪披帶、緩急必致誤事。臣故曰、和戎國之福也。聞金人大軍見屯虹縣、積粟糧、秋冬必爲邊患。兩淮城邑半爲丘墟、雖欲堅守、戰備不具、又無兵力以拒之。或欲清野、則是先自棄之。萬一彼留戍淮上、俯視長江、以久相

困、豈非危道哉。雖欲與之連和、彼必偃蹇邀索、何以應之。靖康議割三鎮、百官廷議、舉朝皆謂寸土不可與人。後敵騎長驅、事窮勢迫、則或言割地、或言固守、一時不能堅決。金人徑抵京師、三鎮平下、遂成大變。前日議臣相與太息而已、眞可爲痛哭也。臣所以墮肝膽吐情實、願陛下夷攷前事、永以爲鑒、早定和議、遣使通誠、以保國安民爲計。旣和之後、養勇以待時、蓄積以富國、待兵力旣壯、機會可乘、惟陛下所欲爲耳。又奏、專言用兵者、嘗謂敵人已弱、可以恢復。今止得一宿州而遽棄之、則恢復之計復如何。有用兵不勝、僥倖行險、輕躁出師、大喪師徒者、則必勝之說果如何。有自獻其說、欲折服人、使用敵國之禮者、及從而遣之、則辱命無所不至、使至今和好未決、則未見其折服使人之效也。有稱長安談笑可取、鳳翔之虜如何可逃者、今西師取一德順、尙不能有、則未見其談笑取長



安之效也。凡此數事皆可考驗、誤國明甚、不可掩。願聽言則審其忠實、立事則黜其浮議、幸甚。五月、公至揚州、頒詔勞賜諸軍、即申朝廷云、雖未至楚、泗淮上守備大略已見。揚州城補葺破敝、全無樓櫓、何以容人。借使有人、須積糧爲一城之計可也。設敵人自天長徑入瓜洲、曠野約可容二十萬、則揚州巋然在後、詎能堅守。瓜洲兩小城、不過容五七千人、豈足當其鋒。兩處守禦止如此、泗州邈在淮北、如敵兵渡淮、不必取泗州、遠則光濠、近則浮山一帶、皆可以濟。近日淮北賊過浮山寨、卻奪婦女驢馬、泗州恬然不知。或敵人徑渡、及自清河口運糧而來、泗州必先隔絕。此不待圖上、灼然可見。若自西路而入、則海、淮、泗折北不支、揚、楚坐困。前日劉錡之敗是也。今營屯備守皆嚴、將士亦願賈勇、其如地勢平曠、分布難遍、聚于一處則不能分守要害、各守一方則臨事難應大敵。今劉寶一軍

分屯外、在寨者不滿二萬、自以爲憂、正以前出後空、別無後繼。或謂輕兵在邊、重兵留屯江上、則敵可直臨大江、小駐不去、坐失兩淮、尤非策也。至若軍須調度、糧饋犒賞、金帛官爵、計今日帑藏、可充其用否。今泗州姑少增兵、以張聲勢、移江陰一軍、亦可以安邊民、助軍聲爾。若決欲守備如金湯之固、前日蓋嘗大有所費矣、皆徒勞而必不可恃。若欲開拓以希大功、萬無一可。故曰用兵難而守亦不易。罷揚州牧馬監、塞楚州滿浦閘、增清河之戍、兵積監本之贏貲、皆公措置之大略也。既至盱眙、泗州宣詔犒師、與守臣遍巡城上、觀覽形勢。時準御筆云、泗州可棄則棄。今夏金人蓄銳、秋必犯邊。彼以重兵得泗州即去、則于我無利害、不必與之爭鋒。若守而不去、則會重兵、絕糧道、是不戰而勝也。若彼得泗州而平其城郭而去、則我亦平其城郭。如淮陽軍之類是也。朕調發卿以前軍屯楚州、

扼清河、輕兵守泗。王琪以殿司兵二三萬屯揚州、郭振屯六合、淮西自有王彥、張守忠等。敵兵雖衆、何足憂。止恐調發不及而來。卿宜保江上。朕便遣三衙兵至江上。卿宜軍往楚州。別有所見、即具奏來。時審議官胡昉、楊由義已回兩月、金人聲言聚兵于近邊、有意連和、而朝廷尙未通書遣使。知揚州周淙提舉茶鹽、吳巘謂彼計如此、必有所待。欲作本路帥臣一書、鈎致彼帥之意、然後審處其宜。公爲聞于朝、謂兩淮與金人各爲屯守之計、彼旣清野、稍遠其兵、我亦宜休息、少減屯戍、其意各欲安靜。然彼此未絕關防、欲休不得休、欲靜不得靜、則餉饋不減于前日、戰守相去能幾何。緣國是未有定論、前嘗有書往來、今遂南北阻絕。周淙等恐因循及秋、敵情難料。若彼趣和之意欲速、則興師之舉必急。兵一交鋒、所傷必大。若待其無禮侵踰、而後與之盟、曷若先事通情、可以款其意。因具以

淙等書上之。回至楚州、又奏論前此屢通元帥書、使命終不曾行、議論久無果決、所以致彼之疑。必曰旣不遣使、又無禮幣、謂我通書止爲款兵之計、持空言以相誤也。僕散忠義在邊累年、若成和解、彼則無功。今業已簽軍、意欲一動、力彊則自取待其不可、然後連和、固執前謀以激功利。今雖與之書、彼必持此說、沮格其議。不若便遣信使直造燕山、一則可見金主之意、一則可伐僕散之謀。仍調發諸軍、分屯江淮、以備不虞。或不納我使、納而過有邀求、則曲在彼、而不在我。兵以曲直爲勝負、不繫強弱衆寡。前日完顏亮之事、正類此也。又得御筆云、比得陳敏奏泗州兵少、欲增戍兵。朕俟近秋調發。設若七月敵人伺我不備、衝突泗州、輕則敵衆則避。縱使得泗州、終何能爲。卿當按兵持重圖之。六月歸奏事、納劄子十二及六圖、一一指陳、仍言守備疎略、恐敵人入寇。再對、上問兵力險要、具



以實對。改除吏部侍郎。仍再令日近起發。公又一再入奏。乞早定和議。及和議未決。守備當嚴。七月回至鎮江。被省劄住楚州。以此體度應副北人。登舟至江口。得盱眙報。北人未有來耗。公具申朝廷。謂來朝未可知。若遽往而守待日久。彼無來耗。勢必空回。徒致衆疑。俟報而動。庶合事機。又遣屬官楊由義赴闕。奏乞遣使發兵。云。北人來期。皆是不定之辭。未可信憑。今又無耗。敵情狡詐。竊慮別生姦計。其遣使發兵二事。皆不可緩。若只發兵以待其報。則海泗二郡必先受兵。中其陰謀。若只遣使以俟其和。則可否未決。不可不虞。惟當遣使與發兵並行。使以盡其禮。兵以防其變。若使至北廷。則堅決之語。誓書一定。然後抽回軍馬。脫議論有變。勢必相侵。則嚴兵固守。與之力戰。是謂應兵。臣雖不武。實無所懼。所以至于再三冒瀆天聽者。恐一失機會。後必噬臍。望速賜睿旨施行。數日。又申朝

廷。乞速遣使介以示信。彼見使來。必喜。無有使行而兵來深入者。兼使人見敵酋。言必端的。彼此可決。使回即遷西城所有。不過信宿事耳。與其先墮其城。不若速遣使介。彼料吾重于遣使。若使命既往。信非空言。其間設有小不相從。至再至三。議當定矣。書中務存大體。簡嚴其文。不必用前日來書中辨曲直之語。卻恐引起不遜之言。後復難處。當少遷就之。以濟大議。須兵與使同遣。一則使敵人聞我有備。和議早定。二則安海內之心。亦知吾本謀得和則和。必不得已則戰。以和爲先事。以戰備不虞。如此。則間言異議無從而入。不必待其書來而後遣使。書中或有見脅之語。則不若先遣以釋其疑。以破其謀。于計爲得。八月。由義回自行在。云。到日得旨內引。上云。錢端禮所奏未是。左相又面授劄子三十五道。令親納。宣諭劄子係奉聖旨。令將海泗二州戍兵先次撤回。便令奉行。時丞相魏

公杞爲本司參議官、是日招劉寶及參議官以下與由義會議、公大言曰、某屢于內殿奏和戰之議未決、且當固守邊圉、觀敵情以待其成、舉動皆未可輕、必不得已而爲應兵、曲不在我、若與之和、彼已求四郡之地、前後雖已許之、彼必候盟書約定而後退師、今使命未遣、雖敵帥通書本相、未曾計割四郡、若無故撤戍而回、是棄之也、彼乘虛據之、自言收復、不以爲我之惠、他時別有邀求、或乘時侵軼、孰任其責、上不以某不肖、付之一路事權、一己去就至輕、此事繫天下休戚、斷之于心、必不敢奉行、須俟遣使、或朝廷通書議定、始可議之、即具申奏、力論撤戍不便、緣繫北界回書未到之日、承降指揮、今北界回書已到、本朝之書有續當遣使之文、若所議之事北界書中悉已相從、則目下撤戍便可交割、或事有未定、只撤戍占據之後、餘事難以商量、縱欲備宣聖主示信之意、他日亦難以

口舌爭也、又慮未曾遣使、交割撤戍之後、敵帥據以要功、自稱收復、又執盧仲賢之語、必愈費力、兼兩州撤戍、合行事多、難以申明待報、恐致誤事、乞暫赴行在面奏曲折、得旨、邊事未定、未須求對、別有事宜、速且奏來、遂上奏、并牒北界官司檢繳申、未挾日、金字牌至、奉御筆、覽卿奏劄、欲遣使事、朕初遣卿爲宣諭、意在肅軍政、明守備、二者皆無所陳、卿當與諸將嚴戰守、主和議、非卿事也、雖金人重兵屯于淮北、亦須待許我議事、方當遣使、若因而侵犯、則將帥之任安在哉、撤戍可早、關邊無害、不可遲疑、即日便宜施行、卿恐兵一動、若彼不回書而發兵、則當何如、卿欲奏事、邊上未可闕、卿可頻具奏來、翌日又準金字牌、魏杞令疾速赴行在奏事、公亦乞罷、遂請劉寶面付撤戍省劄、仍與議定、候朝廷北界書先行、然後抽兵、庶敵人先得書、知是以海泗與之、不是白棄兩郡、日後免于邀索、



是日發下宰相與僕散書、登時入遞、盱眙申寶書已過北界。九月癸未朔得旨、過淮上措置撫于軍民。以二州撤戍、人民南奔也。報差魏杞奉使、康渭副之。庚寅、盱眙報撤戍人回。辛卯、招撫司申胡明兵馬已回、敵已薄海州而未入。公申朝廷云、自至淮上、兩具申稟、又遣幹官稟議、乞發兵遣使二者兼之。既而被旨撤戍、即具奏、合候使行議定之後、正防姦詐。尋蒙璽書切責、已即恭依。近北界射過榜文、已相見欺、未知厥後之意。方今兩州未受、奉使未過、正是危疑之時、雖飭諸將嚴備、竊恐兵力不加。累乞王琦一軍、望早賜調發。引疾求罷、非敢規避、誠恐死無益于國耳。尋報金人有入寇之意、蓋遽得二州、反以我無信、具以聞。望日、敵騎已入泗州、民有不及南渡者、或刖其足。海州歸正人亦多被害。兩州積糧尙二十餘萬、半爲居民所焚、餘者皆爲敵用。壬寅得御筆、已令王琪起發。劉寶軍

馬有分在他處者、可盡抽回、不可使兵分。詔劉寶亦如之。公奏、敵人貪婪無厭、既見撤戍、遂啓姦心、虛張大言、公肆迫脅。陛下憫南北生靈、俯從其議、令大臣通書講解、撤戍以示大信。彼宜應答如響、而乃包藏異意、自反其說、此殆天亡之時也。夫無事則深憂、有事則不懼。臣已謹戒邊吏、固守封疆、不爲禍先、不可輕敵。若取接使介、則信義不可輕變。或妄爲陰謀、別有窺伺、臣當傳檄六師、奮勵諸將、堅壁以老其師、持重以乘其敝、絕其糧道、挫其銳鋒、以逸待勞、可以決勝。甲辰、王公之望除參知政事。丁未、報左相除都督。戊申、得省劄、除兵部尙書、都督府參贊。庚戌、淮泗報金人侵廬州、本州移治。初、頓遇守壽春、金人繫橋、不敢禦敵、是夜南徙。韓璉守廬、謂敵已渡淮、徑入焦湖、郡人奔迸、致溺舟狼狽甚衆。既而聞虛驚、復還。十月庚申、公以督府既建、宣諭司乞結局、又申朝廷、比得盱眙錄到

來書副本、正緣先得四郡、遂致猖獗。如取俘擄等
人、決不可從。事須斟酌、不宜欲速。若固守道理、使
知我不畏怯、乃所以速之也。癸亥、差充大禮鹵簿
使。十一月癸未、探報敵騎已至濠梁、盱眙守移治
天長。奉使楚州、敵未渡淮而盱眙大火、軍民奔走、
一路震動。因取所遺錢糧、自燕館郡治、民間屋宇、
盡移泗州。魏勝力拒于清河、死之。進據楚州。初、金
人本不爲渡淮計、而一旦至此、豈無自哉。丙戌、公
赴闕、既對、上曰、前後廷臣議論、獨卿不變。兼戶部
尙書。乙未、上問、欲遣楊由義持敵帥書、而辭行甚
力、誰可遣者。公奏、臣聞王抃者、雖不識其人、前副
盧仲賢行、知事之詳、又亦審細、自願一行。更望召
見、察其人而用之。上欣納、數日遂行。丁酉、下詔親
征。戊戌、上宣諭、卿議論實忠于國、欲用卿爲報政。
公控辭甚力。辛丑、除端明殿學士、簽書樞密院事、
賜同進士出身。甲辰、兼權參知政事。時邊報日至

都下、官民多謀移徙。或傳德壽宮亦有諸宮燒香
之議、人心愈搖。太上宣問近事宜、公奏、金人必和、
但民間驚疑、似聞陛下亦有所備、所以日有妄傳。
臣不敢少誤陛下、此豈小事、願陛下不可輕動。太
上開納、自是始定。去者復還、或議峻其法禁。公曰、
朝廷鎮靜持重、人當自寧、豈可家至戶曉也。閏十
二月乙卯、得旨、令執政等進呈文字、以左丞相陳
公康伯疾也。公奏、適見付出王之望奏、金左副元
帥見在滁州、恐王抃徑往都元帥處、則于左副元
帥情意不通。乞將書本別寫、發往左副元帥處。臣
竊詳之望嘗建三策、欲放彼處人至淮、用兵掩擊。
今既過淮、之望又在江上、若見得可擊、必已擊之
久矣。而乞再通左副元帥書、可見之望親臨所見、
必不敢妄言、以背前說。乃所以盡忠、望從而行之。
乙亥、王抃到闕。先是、上嘗宣問敵情如何、有需索
否、樞密虞允文對必有之。公曰、若然是、不欲和。若



只如盧仲賢約定、方可議耳。扑至、書未啓封、上復問允文奏、定有需索、恐難應副。公獨以爲、今旣駐兵不動、又連來通書、皆無不遜之言、欲和本出彼意。若必欲和、定無意外。或果有難應、不足從也。及見書、止是欲世稱姪、國書用名、後用再拜、皆舊書元定項目內事、餘無他請。上曰、今旣別無所需、可如其式報之。虞曰、何必一如他說。公曰、而今正以未能制彼死命、苟力可制、又豈以一言半辭爲輕重。但權其事機而已。虞曰、且如和尚原、最係川蜀襟喉、豈可復與。上曰、他要辛巳年以前舊界爲定、若于內不與、和定不成。公奏、固知險要、我若求之而得、彼卻以求、何以應之。況與向來之和不同。虞曰、有何不同。公曰、今旣以皇帝兼稱、則名位已正。雖曰稱姪、是敵國、與向日殊不同。又減十萬歲幣。此三事最大、我執之已堅、彼不能易。此外若更力爭、是求釁也。謀國當思遠圖、姑與之和、則我得休

息、以修內治。若爲忿兵、未見其可。恐欲爲治兵親征之計、臣乞先罷、專任能者。爭辯至漏下數刻方定。虞已承命、明日又奏、王扑行只理會乞令奏便朝陵寢一事。上曰、不若且休、待事定了別議。公又入奏、第一次遣使、莫若安靜、庶幾他日有事、卻可與言。扑遂行。十二月辛卯、除參知政事、兼權知樞密院事。先是、已得差遣人限五日出門、奏除其令。論館職不當限員、又論人才當須自外召三五人面論、然後審擇而用。上皆從之。奉使過界、北軍已回。甲午降詔、和議已定。丙午、上問改元事。隆興故叛臣趙諗嘗用、虞公以爲載籍所不載、自不必改。公曰、改元大典也。簽書王剛中奏事留身、上以爲問、剛中奏、此事具見曾布日錄、不當復用。錢端禮欲改、虞允文有不同之論、臣以爲當改。御筆欲用乾統、西北虜曾用、別擬四號以進、遂改乾道。元年正月辛亥朔、上親祀園丘。公爲禮儀使、率百僚班

賀于端誠殿。庚申、充德壽宮使。丁卯、公乞出、不許。丁丑、殿中侍御史唐堯封論公以帝姻、不可任執政。公即再乞出、堯封除太常少卿。戊寅、又申前請。上云、朕已宣諭堯封、朕以公選用才、即非私意。公奏曰、既移臺諫、愈不自安。上曰、決難請去。己卯、降詔不允、不得再有陳請。二月庚辰朔、祥曦殿奏事。虞公奏云、錢端禮輔佐陛下、方成和議、恐未可去。上曰、和議出于朕意、參政端不可去。王公亦奏、大臣進退、所繫非輕。公又奏乞從臺諫之言、間陳累數百言、退復入文字。辛巳、御筆、朕念即位以來、股肱鮮克勝任。倘得其人、不以私義廢。雖議者或有不容、而曾無眚愆見于論疏。抗章屢上、丐去甚力。方憫風俗之極弊、嫉浮言之易興、卿宜竭節推誠、亟安厥位、毋以小嫌拂朕意也。次詣德壽宮、太上亦再三諭不當去位。又云、只如許大一件事、非卿誰能了得。丁酉、寒食、公奏欲上先世諸王冢、上再

三宣問、因歷叙家世。上曰、卿以才德選、不緣私親。是日約族黨具集表忠觀焚黃、兩宮壽聖殿並賜酒果以爲榮。丞相陳公已病、公爲援典故、以長子偉節爲直秘閣、次子安節賜同進士出身。既薨于位、以少師大觀文致仕。公奏、逆亮內寇、康伯以重德鎮浮、陛下踐阼、康伯以大忠翊戴、宜優贈典。遂贈太師。已而王剛中薨、公亦稱其竭忠輔治、引詹大方故事、乞贈七官外、更加贈一職、以示優禮。所以周旋二公之後、備至。公既行相事、兼權提舉玉牒、監修國史。八月乙酉、詔立鄧王爲皇太子。壬辰、公入奏避親嫌。甲午、除資政殿大學士、在京宮觀、仍奉朝請。踰月、兼侍讀。公在經筵、論事不少貶、而勇退之志益堅。七上章求外祠、始改提舉臨安府洞霄宮。辭曰、宣坐賜茶、褒諭尤渥。四年秋、起知寧國府、仍奏事而行。公治尙簡靜、幕府省文書、蠲畸零稅八萬餘緡、一方爲之鼓舞。建炎初、劇寇攻城、



故參政莊簡李公光力卻之、奏爲立廟。境內有麻姑山、地曠多藏姦盜、公奏立砦、仍置官徼巡、百廢具舉。不加鞭笞而租稅如期、郡以大治。雖鋤治姦猾、終以恕行。每曰、治道去太甚者爾。六年四月、丐祠。六月、知紹興府、力辭而歸。九年、申前命、辭不獲免。適修荒政、不憚勤勞、民賴以安。又勸種麥、官與之種。明年、麥大熟、收數倍。決滯訟、理經費、吏民以爲神明。兩郡皆爲之修建貢闈、且葺公宇廢壞者、率談笑而辦。最聞、除觀文殿學士。公在越、凡有建明、直達上前、請無不從。或以御筆批行、忌者恐再用、因以飛語中公。旣以祠歸、竟降資政殿學士以罷。時淳熙二年四月也。三年、太上皇慶壽、公以紹興從臣、特轉通奉大夫。六月、再提舉洞霄宮。四年三月、復資政殿大學士。八月、屬疾、請致其事、復觀文殿學士。壬辰、薨于正寢。娶李氏、中奉大夫、直顯謨閣莊之女、贈文安郡夫人。再娶高氏、封鄆國夫

人。先公一年薨。男當、故奉議郎。女一人、爲莊文太子妃。孫象祖、承議郎、知處州軍州事。女三人、修職郎、監行在車輅院吳修年、迪功郎、新福州侯官縣主簿王鐸、承務郎、知常德府桃源縣許軫、其壻也。曾孫二人、曰雲、曰澤、並登仕郎。女一人、尙幼。公生而不羣、居重慶下、承顏幹蠱、曲盡孝道。雍國尤所鍾愛、親教以詩書。雍國父之問、質肅公介之幼子、嘗仕館閣、以元祐黨廢。娶晁氏、濟北先生補之實爲羣從。公承平時、生長京師富貴中、了無膏粱之習。唐氏、晁氏諸老尙無恙、公從容其間、因得以講論文詣、商榷古今。又先世自文僖公以來、文獻相繼、故公曰、自少多識前言往行、熟于典章。由熙寧以至政宣間事、世所不及知者、歷歷能言之。謂李德裕不應進士科、以至宰相、非力學烏能至是。耽玩經史、未嘗一日去手。少時嘗手節十七史甚備、晚又著史提要、行于世。尤通于左氏、西漢、率多成

誦。幼好爲詩。伯祖內相文肅公勰字穆父。與蘇文忠公游。往來書尺唱和甚多。公尤刻意慕效。詞翰得其遺風。清癯如不勝衣。而眸子瞭然如神仙中人。尙氣節功名。雖在下位時。聞國有大事。必默爲經畫。揣成敗多中。嘗稱子房貌若婦人。乃能仇秦而興漢。蓋自況也。爲政飾以儒雅。不專事文法。望之儼然。即之也溫。寮史稟白。使盡其詞。一言剖決。是非立判。公家之利。知無不爲。不顧一己之私。意所不欲。迫之終不能動。靖康用兵。公親見和戰不決。而致大患。故力陳和議。終始不變。公規畫甚遠。亦非苟于就和者。但內審國用。外察兵力。少休王師。方可支吾。以圖大計。崇深果決。洞見敵情。嗚呼。辛巳敵寇之變。無可奈何。若甲申歲。公揣事勢。謂金人弒亮之日。以無名興師。騷動百姓爲辭。今新造之國。又負篡弒之名。必不肯效尤以取禍。但欲偃兵以靖其國。徒張爲虛聲。實主于和。故勤勤

懇懇。欲乞遣使以通好。出兵以示備。緩棄海泗以爲惠。至于執詔書而未出以當之。使盡行公言。則敵兵不動。不至淮楚再遭蹂躪之苦。公之言亦不爲不用。而用之頗失其機。西則廬濠先遁。東則劉寶不援。魏勝以致敗死。豈不痛哉。是時士氣愈索。幾不可支。而敵人似進而退。似攻而緩。公益探其欲和。而己之說爲是。故王抃之行諭之曰。此行有三。一曰正位號。二曰定名分。三曰減歲幣。往往人不以爲然。謂如此何以卻敵。至有面詰公者。公笑曰。事成是非乃定。姑少待之。抃回。既皆如約。金果退師。人始服公能斷大事。自此南北晏然。以至于今。誰之力也。公始至台。呂忠穆公頤浩一見賞歎。以公輔期之。又爲參政。席公益所汲引。中書舍人潘公良貴。元樞賀公充中。皆相友善。尤有知人之鑑。丞相史公浩。魏公杞。知院王公綸。或交于布衣。或取于賓僚。推輓名士。至輔弼禁從。卿監臺郎者。

甚衆。一介之士苟所許可、無不委曲薦達。嘗曰、韓安國自謂所舉皆天下士、賢于己者、誠竊慕之。士之賢者恨未盡知耳。好賢樂善如恐不及。嘗奏事德壽、太上賞雪、賜坐、以玉盃宣勸、不以名呼、隆眷如此。因問及閒居自號、乃大書松窓以賜。上亦賜忠實二字。兩朝宸翰光動一時。公雖家居、而恩數視政府。其孫裒所著詩文奏議若干卷、號松窓集、藏于家。初、康公賢穆葬天台之護國山、公以某年某月甲子從葬、遂爲台人。公初歸、寓瑞巖僧舍、年餘始卜築于城之東北隅。有林泉之勝、立精舍、繙經其中。暇日幅巾野服、與方外之士徜徉笑傲、觴詠琴奕、甚自適也。及遇圓悟禪師、究心內典、超然自得、視軒冕如無、故出處死生之際、絕人遠甚。得疾、即屏去醫藥、曰、生則有死、亦事之常。大期將至、待之而已。疾革、家人捧藥泣告、公曰、汝曹豈解此大丈夫何可倖覬萬一。浮屠氏或勉之、亦笑不答。

第捐金分施以謝之。前一日、肩輿登所居山園、瞻謁釋道像如平時。歸即瞑目安坐、至終、神色自若。豈苟然哉。公薨之後、象祖以書來曰、先大父居官立朝之大節、公知之最詳、願爲紀述、將以告于太史氏。鑰竊惟參政德望勲業在家有牒、在國有史、搢紳知之、士民誦之、豈衰朽駸駸之辭所能發揚。觀公自隆興以來、與人主論天下事、見于奏對者多矣、皆本于忠實、合于人情、是非有攷于前、而所成敗有驗于後、其先見如著龜之明、其定力如金石之堅。至如回太上燒香之行、抑都人遷避之擾、皆所目擊而心服者。載念鑰自幼識公于三衢、首蒙賞愛、來倅鄉郡、鑰初竊第以歸、及尉江山、公方主漕事、即收置門下。公之守婺、鑰適丞金華、知遇益深、護慈寧之喪、辟以爲屬。後入爲六院、正隸版曹、煩使必以見屬、宣諭之行、亦備數幕下。進參大政、力薦于上前。以鑰之不肖、叨實從列、實基于此。



四十餘年所以挈提成就之者至矣。而鑰既無所効尺寸于公者、矧公之門名人才士凋謝無幾、何敢以固陋辭。謹摭其大者書之、不敢隱、不敢諛。卒狀如右。

樓鑰撰 《攻媿集》卷九二

宋儒碑傳集卷一百十二

汪澈 胡鶚 黃瑀

樞密使贈金紫光祿大夫汪公澈神道碑

公諱澈字明遠姓汪氏系出新安南唐保大中徙饒州浮梁縣曾祖仲宣贈太保妣徐氏衛國夫人祖叔寶贈太師惠國公妣陳氏益國夫人考俊修贈太師慶國公妣檀氏秦國夫人三世皆以詩書訓子弟公生穎異幼從伯兄沆學博覽羣書尤長於《春秋》登紹興八年進士第主臨江軍新喻簿從軍器少監鮑琚檢察荆湖軍改吉州州學教授父憂不赴服除教授衡沅二州万俟卨靖公謫沅知公可任重二十六年入相薦召爲秘書省正字兼實錄院檢討官遷校書郎國史院編修官安分無求視同舍郎數遷殊不介意二十九年三月輪對論立國二道曰文與武宜令帥臣監司舉所部大小使臣智謀深遠可備鎮防武藝超絕可帥士

卒者在內則侍從臺諫各薦所知務得其實實則精不必求多多則泛毋問小疵毋拘常制高宗嘉納即詔內外薦舉武臣而擢公監察御史尋進殿中侍御史特賜鞍馬和戎浸久邊防懈弛公力陳養賢養民養兵及自治預備之說反覆累數千言其他如有司毋得援例破成法并廢教坊皆自公發之顯仁皇后攢宮既訖工議者欲廣四隅凡士庶墳在二十里內皆當遷公言陰陽家說難信與帝意合命公按視公還奏昭慈徽宗顯肅懿節四陵園舊占百步已數十年何今日爲是紛紛且漢長樂未央宮夾樗里疾墓未嘗遷也唐張說坎其宅東北隅人謂洩王氣今就如議者言則穿穴丘壠恐非徒無益按國朝宮陵儀制在封堠界內不許開故合祔願遷出者聽其意深矣帝大悟一切如故三十年知樞密院事葉公義問使金歸頗知入寇之謀公申言選將帥爲兵備八月遷侍御史



儒藏

賜緋衣銀魚。時酒課虧、國用不足、公請戢私酤。或遂議以贍軍庫、付殿前司、公言兵權利柄出於一、他日將不可制。又論鎮江大將劉寶十罪、乞行誅斥。又論往歲經界法行、隱漏稅多、諸郡經總制錢一時羨溢、嗣歲即虧、今乃以爲額、必至病民、願詔戶部別取十年通數而用其中。事皆施行。當國者多過舉、公疏罷之。明年上元前一日、風雷雨雪交作、春大寒、有旨令侍從臺諫條具消弭災異之術。公謂天變不虛、其應在兵。今荆襄無統督、江海乏備禦、凡陳十二事、皆內修外攘計。會詔政事并用祖宗舊制、公言近歲武爵遷轉太驟、請復六等檢校官。總管、鈐轄、路分都監除授超躐、當遴其選。於是詔兩省詳議、其後稍復舊制云。金使高景山因賀天申^①節報欽宗升遐、且索將相求釁。公請置使江干、益兵上流、守淮甸、備海道、然後下哀痛之詔、布告中外。是月除御史中丞、遣大將成閔提禁旅

五萬屯荆襄、而公遂爲宣諭使、大率如公前後所陳。詔書略曰、撫勞將士、體訪事宜、凡其所臨、如朕親幸。公自以身任言責、凡川陝江淮利害悉以聞。由鄂渚歷江陵、走襄陽、具宣天子恩意、拊循諸軍、勉將帥以忠義、人人感激思奮。時田師中戍鄂、李道成荆、吳拱以蜀兵戍襄、成閔屯郢鄂間。公以師中老病劾去之。襄披城爲山寨、荆治水堡、公曰、此特自守計耳。敵至當力戰逐北、奈何坐困乎。乃部分諸將乘邊、還武昌調軍食。九月、金犯信陽、光化諸將戰卻之。俄金師大至、與我軍相持。公乞下詔進討、而駕幸金陵、乃升閔京西河北西路詔討使、實聽宣諭司節制。公欲乘完顏亮駐淮南、檄諸將分兵出唐、鄧、陳、蔡、直擣京洛、使亮腹背受敵、可成大功。會兩淮失守、駟召閔軍入援、公志不就、惟以荆襄軍當金將劉萼十萬之衆。頃之、牒報金謀自光、黃渡江、襲武昌、入江西、詔拱分兵還戍江岸。拱



即將而南。公在武昌馳書責拱還襄陽、自調鄂之
餘兵悉戰艦聲言備光黃、敵計不得行。拱僅抵峴
首、金師掩至、大戰漢水上、敵衆敗走、唐鄧陳蔡汝
穎相次歸職方。未幾亮死、公乞出兵淮甸、與荆襄
軍夾擊其歸師、未報而金之新主罷兵請和矣。三
十二年春、駕留金陵、公請奏事、詔需後、公復條奏
便宜。三月、趣公朝臨安、虛政府以待。甫入對、即拜
參知政事。六月內禪、公與宰相陳魯公及二樞臣
俱膺佐命之寄。壽皇既御極、銳意恢服、首用張忠
獻公使江淮、而命公督視荆襄軍馬、將分路進討。
公開府襄陽、遣趙樽守唐、王宣守鄧、別選偏將分
據要害。皇甫侗擁衆萬餘、柵陳蔡間、未有所屬。公
請賜軍號官爵、果爲名將。初、蜀帥頓德順軍爲金
所圍、公欲以兵助侗牽制之、會上命中使梁珂齎
手筆勞公、曰、卿文武兼資、帷幄大臣、以戰以守、臨
機制變。公因奏、金方併力拒西師、宜分命趙樽、王

宣潛師襲洛、仍令兩淮犄角、中原遺民必響應、一
舉可定、豈特解西師而已。是時、金師移文江淮督
府議和、復揚言入寇。上慮公銳於進取、諭旨未宜
分兵遠略。公念襄漢宿兵、饋糧艱阻、昔之沃壤、彌
望荆榛、乃與漕臣呂擢、姚岳議因古^②長渠築堰通
流、募閑民、汰冗卒、十人爲甲、五甲爲隊、三隊爲屯、
授地給牛、各有等差、貸之種穀、授之廬舍、而薄其
課。秋成第輸種、餘穀官以緡錢市之。畫爲三十八
屯、規模詳密。人方勸趨、而西師退保、虜勢遂張、蓋
隆興元年也。宸翰數飭修邊備、公請入奏軍事。上
復遣內侍甘澤賜親札曰、入寇無虞、可暫入覲。仍
賜金合茶藥、非常典也。方公歸武昌候命、而張忠
獻公先入朝、密以迎降人爲名、刻期大舉。雖宰相
亦不與聞。詔公出師應之。公以前議驟變、上奏曰、
虜自得志陝右、陳兵壓境、姑遷延避盛夏、將期秋
冬一決和戰。浚先發固善、獨未知能度彼己、有必

勝之策否。願許臣對、面論形勢。詔可、而我師已踰淮。公知言不用、乞令張公併領荆襄、號令歸一。俄李顯忠師潰、公道乞奉祠、除資政殿學士、提舉臨安府洞霄宮。言者隨攻之、落職台州居住。明年冬、有旨自便、纔兩月、復端明殿學士、知建康府、視事於乾道元年春。上浸察前讒、深念公之功、九月、召知樞密院事、遂升樞密使、立班恩數并同宰臣。公以南渡後非舊相、若官至公孤、不以拜、再三辭。上曰、卿將命馳驅、經歷爲多、故授此職。嘗密訪人才、公舉所知百餘人、第其材器復於上。二年、引疾、上固留不能奪、以觀文殿學士再領洞霄。越三月、起知鄂州、兼管內安撫使。蓋上知公兩使荆襄、有經武整軍之勳、將倚規恢也。繼訪公邊事、公奏、向者我有唐、鄧爲藩籬、又皇甫倜控扼陳、蔡間、敵兵不敢窺襄。比旣失兩郡、倜復內徙、敵屯新野、相距百里耳。臣嘗令趙樽、王宣築城郭、儲芻糧、守備要害、

首尾相應、有以待敵、衆心乃安。爲今之計、無以易此。至於機會之來、固難預定。臣職在守土、不得而知也。上深然之、每以上流諉公。議臣欲廢江州軍、公力言不可而止。公以和好方堅、上章求歸、移知寧國府、便公之私。四年、改知福州、兼本路安撫使。海寇爲亂、公遣兵捕渠戮之。十月、得未疾、再請洞霄。七年、遂告老。上雖知公疾、猶令降詔不允、曲示禮意、尋特轉通奉大夫、許致仕。八月二十三日、召其子授遺奏、大指而薨。年六十有三。特贈金紫光祿大夫、官其後十人。積階自迪功郎至三品皆特遷。爵鄱陽郡開國公、食邑二千三百戶、實封五百戶。有司定諡曰莊敏。以九年二月乙酉、葬邑之南鄉湘湖長穆山之原。娶同邑李氏、封榮國夫人。後公九月薨。子男四人、皆通敏。棹、今爲朝請大夫、提舉廣南路市舶。梓、朝請郎、知盱眙軍。楫、通直郎、新通判撫州。獨其季承奉郎、隆興府監倉櫛早世。女



三人適李師心王源方恬。孫男十五人。光熙烈勲、燧、燁、燭、杰、炁、煇、炬、焯、炎。孫女七人。公學本誠敬、不專誦說、每務躬行、嘗從容奏高宗曰、臣起家寒遠、所以報國惟無私、不欺耳。及事重華亦云。退以名所居二齋。天性孝友、自以祿不逮親、每沾俸賜、感愴彌日。憐弟澄少孤、拊遇尤至、首蔭以官。前公數月沒淮東、公已病、猶遣長子暑行護柩歸、遺命復官其子。與人交、始終如一。居家儼恪、服用猶未貴時。治郡不求赫赫名、處軍事精審明白、將卒無不悅服。尤愛惜爵賞、每曰、名器輕假、何以示勸。有立功者必奏真命、未嘗假版。其後朝廷以諸軍借補猥濫、或奪或裁、獨所部無之。汲引善類、惟恐不及、名卿才大夫多公所薦。有文集二十卷、奏議十二卷、辭章簡重如其爲人。某嘗觀《國史》、天聖中契丹講好已二十餘年、宿將無在、武備卑缺、范文正公方爲京官、奏疏乞命大臣舉忠義有謀之

人、次命武臣舉壯勇出羣之士、及復唐武舉、當世稱其有王佐才。由是入館閣、擢右司諫、言事鯁挺、爲仁宗所知。元昊僭竊、選帥西邊、盡瘁經營、昊竟納款。召拜二府、值西北交爭、麟府奏警、自請宣撫河東、陝西、二虜卒不敢動。後歷數鎮而終。本朝言文武兼資可爲後世法、推以爲首。公以文正嘗守鄱陽、師慕其爲人、故當南北交聘、習講文治、諱言軍旅之時、獨以館職爲國遠慮、請擇武將、遂結主知。中歲徧歷言路、出帥荆襄、往來指授、兩路晏然。及亮授首、遂參大政。重華初元、復以執政督視軍馬、悉其智謀、方面鞏固。和戎定、而公歸位元樞、歷四鎮、遭時遇主、出處本末大略近文正、然後摺紳間皆知儒者果可用也。初公薨、翰林學士洪公景廬既以歷官行事刻之墓、嗣子棹謂某與公同朝、嘗贊美攢陵之議、相與至厚、復請碑於墓道、義不可辭、謹提其要而繫之以銘。於是公以諸子升朝、

累贈至太師。銘曰、

天生聖人、專用仁治。蠢茲獫狁、常桀以肆。念昔三代、降漢迄唐。樂天保民、運祚以長。赫赫高宗、紹復大業。明明重華、廣聲繼伐。叛則征之、服則盟之。寧抑爾兵、毋殘我民。維時汪公、致位丞輔。翼贊兩朝、敵威衆附。雜耕渭上、屯田先零。氣吞幽燕、公志則然。我車旣攻、我策旣定。師干一試、簞壺必應。有黠斯寇、竊窺至仁。叩關乞和、遂許來庭。上曰歸哉、其永予弼。公曰止哉、盍均於佚。征鎮四遷、訖其外庸。或出或入、有始有終。孰不富貴、孰不更踐。有譽無疵、如公則鮮。往在慶曆、西征夏臺。倚臣曰范、迄用招徠。於穆二聖、心乎仁祖。公慕先正、幾踵其武。螭首龜趺、表於墓門。文以詩之、庸詒後昆。

周必大撰 《省齋文稿》卷三〇

廉夫弟墓誌

處士府君胡鏐字廉夫、吉州廬陵人。祖諱愷、父諱

汝明、皆鏹迹丘園。母任氏夫人生一男一女、羅氏夫人生五男六女。君羅出也、與予同堂、少予八歲、幼同學、長同春籥。紹興初、予官於朝、坐狂瞽謫閩、越又削爵投嶺海、不見君久者、惟嶺海時爲然。辛巳夏、得旨自便還里、弟兄相處如初。未幾予召赴闕、隆興甲申冬、自少常伯使淮東浙西、措置海道、以遏金寇、獲譴罷歸、復把盞論文、道舊歡甚。丙戌春、偶過地傷足、不良於行者久之。冬十二月庚寅、疾革、辛卯遂屬纊、不亂、享年五十有八。娶鍾陵趙氏、戶部侍郎庶明之曾孫、左宣教郎昌之妹、先卒。男二人、漸渙皆力學。女二人、長適暨世賢、次適李諲。孫男二人、曰、栢、漸等。卜以丁亥二月乙酉葬於吉水縣中鵠鄉白蓮之原、君之同胞兄鎬手書。卒葬、姑識歲月、其詳則俟暇日。乾道三年。

胡銓撰 《胡澹庵先生文集》卷二六

朝散黃公墓誌銘



始予試吏泉之同安、聞旁邑永春有賢令尹曰黃公、公廉強介、察見微隱、吏不能欺而民不忍欺、它縣民有冤訟、率請諉公以決、其條教科指、操驗稽決、人皆傳誦以爲法、間嘗以檄書案事涉其境、道傍小民稱說令尹不容口、其禁令要束、大抵皆敦禮義、厚風俗、戢吏姦、恤民隱之意、其言明白簡切、其達之也、遠近幽隱無不暨焉、過門入謁、則公方危坐堂上、閱學官弟子程課、廷中闐然無人聲、問公所以爲此者、公不鄙、告語甚悉、恨所案事有程、不得久留聽公語也、泉之士大夫爲予言、永春自故司諫^④江公民表爲令、有善政、民稱思之、以爲無能繼者、今黃君節守始無愧江公、而吏事精密有過之者、予旣罷歸、聞近臣有薦公者、天子擢以爲監察御史、謂公得以行其志矣、未幾聞其以病去、竟不復起、識者恨之、後十餘年、屏居里中、有書生來請受學、思苦業精、久而益篤、問其出、則公之季

子也、一日、出其兄東之書與其母之外弟、今提舉廣東市舶江君文叔之狀、泣而請曰、先君子幸相與有一日之舊、敢請銘以賁其幽、予不得辭也、公諱瑀、字德藻、其先世居福州長樂縣青山下、後乃徙家郡城之東、爲閩縣人六世矣、曾祖徽、祖時皆不仕、父南仲、七試禮部不偶、以公故贈朝奉郎、而妣陳氏亦封太安人、公中紹興八年進士第、初任爲饒州司戶參軍、提點鑄錢官、欲市冶工餘糧以規贏利、強公高其估、公不可、則怒、欲中以法、而求其罪無所得、乃更欲薦之、公謝不受、歲旱、郡檄視屬縣民田當免租者、公請免之什九、而行它縣者以什一告、太守洪忠宣公以爲疑、卻公所上文書、俾更之、公曰、官可罷、此不可易、且吾已聞之諸使者矣、旣而洪公使視諸縣、則公所行縣民獨無流徙、乃復善公所爲而薦之、罷官貧甚、與一力徒步以歸、更調湖北轉運司主管帳司、使者向公伯奮

一日謂公曰、人皆求薦、君獨未嘗一言、何也。即袖中出奏牘、上公可親民者、且以心源淵靜、夷險一操目之。公於是改官、而人亦以賢向公焉。及來永春、承寇亂蠱弊之餘、田萊多荒、民力凋瘁。公至、首蠲其宿負。民有鬻業而稅籍不除者、悉釐正之。其文書或不具、則履畝而均其稅。於是豪民無得幸免、而貧弱以蘇。民輸賦或後期、不使吏與其間、獨揭其姓名於市、爲之期日、而聞者相先以至。間不一歲、流庸盡復、賦入再倍其初。公又痛以廉儉自約、凡例所當得公廨錢悉輸之官。到罷挈家、法當計傭受直、亦不取。至於燕遊饋送之費、又皆一切屏絕。而鈎考出內、則必以身親之、吏無所容其姦。於是廩有餘粟、庫有餘錢。乃視民所病、凡前日無名之賦可罷者、如浮鹽錢之屬、皆罷之。不可者、如上供銀、亦爲損其虛估之直。宗子米則以它錢代輸、一歲至數百萬。左翼軍自漳徙屯郡下、當治

營屋。郡分以屬縣、它縣征調輸載、民不勝擾。公獨出庫錢、僦工徒、取竹木、具陶瓦、而分寓便舟以往、爲屋餘千間、而邑人不之知也。里正舊以誅求破產、前後相屬、當役者畏避百方、惟恐不得脫。至是乃有投牒爭先爲之者。嘗有寡婦負租而逃、公寬其期以召之、來則使之傭織於人以漸償所負。又嘗有請鬻牛以輸負租者、公閔然曰、柰何使汝失一歲之計。今春姑以丐汝、秋成而輸未晚也。其人欣然聽命。及期果如約。蓋其及民之大者、旣已周浹、而於其細者、又皆曲盡如此。獨豪宗大姓侵刻細民、則捕劾窮治之、無少貸。他所聽斷、發擿隱伏、人以爲神、而卒亦歸於仁恕也。大治學館、關其衢路、斥去喧雜、作亭其前、而刻詞以厲學者、語意甚偉。延擇修士、課試以時。士子上謁者、接之於學、講學之外、一豪之私不敢及也。有儒冠而以博訟者、爲設席聽事之旁、課以論孟。通者罷歸、否者呼其

父兄懲以二物、由是俗爲一變。始至、款謁羣祀、以文告曰、令有昏墨、神其殛之。視社稷祠壇隳敝甚、即命改爲、而又植以名木、至今人猶指以思公、名之曰御史林。遭旱、出俸錢、具牲酒、躬走羣望、窮極幽險、不以勞爲憚、雨爲立應。愚民奉佛、往往私立塔廟、僧以是得雜處市里間、亂倫敗俗、爲良民患。公按律令盡撤之、且禁僧無得復居外、宿弊頓革。丞有女病、若有物憑之者。巫曰、故邏卒某也、死而役於城隍之神、實爲祟。公怒曰、是安敢然。杖其土偶而投之溪流、女病即愈。始時縣人頗神事之、巫史因託以爲妖、至是乃息云。以郡守諸司薦、去爲兩浙轉運司幹辦公事。有獻鬻公田之策者、檄公視之。歷諸郡、盡得其多寡輕重不均之弊、還、極言其非便。且曰、公田歲入若干、而畜牧芻藁取具焉。今一旦鬻之、計其獲不過數歲之入、自是以往、能無橫斂於民乎。貴將楊存中請地以廣其營、實規

爲觀游、以奉權幸。公又以檄往視、還曰、營卒若干人、度地若干畝而足。今所請地且數倍、若從其請、是壞民田廬冢墓、不知其幾、而獨爲存中結驪於一幸臣也、不可予。卒皆罷之。權秀州華亭縣事。歲惡民饑、公白常平使者、請發廩以賑焉。使者以當俟奏報難之。公曰、民命在朝夕、苟可以生之、雖重得罪不悔。退即發常平廩粟之在縣者、全活萬計、而使者亦不能有以罪也。吏部侍郎汪公應辰、侍御史汪公澈、交章薦公材中御史、除御史臺檢法官。未幾、擢監察御史、而公已病矣。告滿請外、除江南東路提點刑獄公事。未行、徙轉運副使。視事旬日、改知漳州。旋丁內艱、免喪、請就閑養疾、得主管台州崇道觀。乾道四年八月二日卒、年六十。官自左迪功郎七遷至朝散郎。即其年十一月庚申葬懷安縣靈山鄉長箕山。公娶葉氏、中奉大夫大任之女、封安人。五男子、杲亦以進士選官至宣教郎、



江南西路提點刑獄司檢法官、後公十二年卒。東從政郎、南劍州沙縣丞。查、榦、皆業進士、枸亦蚤卒。二女子、長適承議郎、江淮湖廣路總領司幹辦公事任文茂、次適奉議郎、知泉州同安縣余元一。而榦即來學請銘者也。公資剛介、自少即刻苦自厲。家貧、鬻麪於市而挾書隨之。苟非其義、雖寒且饑、不可得而衣食也。閩俗多火葬、公遭父喪、親黨憐其貧、喻使從俗。公哀號不答、盡鬻家人衣具卒葬。以禮事母、兢兢唯恐少傷其意。即有譴責、未嘗敢自辯數也。自奉簡薄而於奉親極其厚。至於兄弟族姻之間、周貧振乏、亦無所愛其力。官番陽時、有邑子爲糾掾、以職事不相中、尋以憂去。公極力調護之、其人初不敢以此望公、涕泣慚謝。爲舉子時、書皆手寫成誦。爲文不追時好、爲吏一心營職。其清苦之操、非人所堪、而聰明仁愛、所以惠於民者、亦非人之所能及也。平生一以直道自任、未嘗小

降色辭以希薦寵。爲御史時、嘗病甚。臨安守趙公子瀟亦以廉節著、被旨視公家事。見其篋櫝蕭然、衣無兼副、俯仰歎息者久之。卒之日、家亡餘財。凡此皆人之所甚難而公之所甚易、人固多能言之。顧其中猶有大於此者、不幸未試、而人亦莫之知也。蓋公在臺時、與殿中侍御史杜公莘老雅相好、每以節義相勸勉。一日、杜以公疾來問訊、連呼不應、乃大呼曰、吾今日擊去王繼先矣。公矍然起坐曰、君能任職、吾不病矣。探枕中片紙示之、乃疏繼先罪狀甚悉。繼先者、以醫得幸、罪惡盈溢、公意蓋有待也。居無何、杜以論宦者張去爲不効求去。公就與別、喟然太息曰、君厚自愛、吾亦從此逝矣。即日上疏請去。以此視公之志、豈但欲爲其所已爲者而止哉。是宜伐石刻辭以告後世之君子。乃爲之序其事而銘之。銘曰、

我觀黃公、古人之風。其剛方而潔廉者、義之操。其



儒藏

宋儒碑傳集 卷一一二

慈愛而惠利者、仁之功。其仁雖僅得施於十室之聚、其義則未及折乎百壬^⑨之鋒。遽抱其餘、以息乎此、尙有以啓厥後於無窮。

朱熹撰 《晦庵先生朱文公文集》卷九三

校記

①申：原作「中」，徑改。天申節乃高宗誕節。

②古：原作「右」，據道光刻本《廬陵周益國文忠公集》

原校改。

③古人罕見有單名「日」者，且胡銓孫輩之名皆從木，

「日」字當誤。

④諫：原作「課」，據宋浙江刊本《晦庵先生文集》改。

⑤產：原作「屋」，據右引改。

⑥果：原作「畢」，據右引改。

⑦事：原與下句「歲」字互倒，據右引乙。

⑧宦：原作「官」，據右引改。

⑨壬：原作「王」，據右引改。

宋儒碑傳集卷一百十三

虞允文

宋故左丞相節度使雍國公贈太師諡忠

肅虞公神道碑

自昔立國者、不幸當強虎狼之敵、非得天下之大勢、國未易立也。大勢一得、則萬億年之基可定於一日、不然百戰萬舉、何益於成敗之數。是故吳以赤壁、晉以淝水、吾宋以牛渚、皆以一日之大勢、定基而立國者。然赤壁、淝水之役、乘其方銳之初、君子以爲易、牛渚之役、振於婁敗之後、君子以爲難。客有問者曰、事難而功反易、何也。曰、我高宗皇帝知人如堯、善任使如漢高祖而已。其人受任使者爲誰。曰、丞相虞公。公有勇力乎。曰、否、公儒者也。公非賁育、公焉得力。公有機數乎。曰、否、公德人也。公非孫吳、公焉得數。然則曷濟登茲。曰、忠誠而已。方諸將皆遁、而我師大潰、公身先冒死、以激怯懦、不

以忠乎。方虜酋遺吾元帥書、以行碁間、公昌言其詐、以安危疑、不以誠乎。夫大忠可以貫日月、何人不感。至誠可以動金石、何人不懷。感一而萬從、懷一而萬順、惟吾所嚮、何敵不克、何難不濟、何功不成哉。故曰公之成功忠誠而已。客曰是^①矣。然君子以謂堯之知人、猶失之鯀。漢祖之善任使、猶失之綰與馮。今我高宗一舉而得公、公一戰而定國、故公之功難於周公瑾、謝幼度、而高宗之聖賢於堯與漢祖遠矣。嗚呼盛哉。嗚呼盛哉。^②公諱允文、字彬父、隆州人也。系出周虞仲、在六國曰卿、在唐曰世南。世南七世曰殷、守仁壽郡、即隆州也。因家焉。曾祖昭白、祖軒、父祺、皆贈太師。周、魏、秦國公。秦公^③仕至左中奉大夫、德陽縣男、潼川府路轉運判官。初、秦公未有子、禱于梓潼神、是夕夢入一官府、見一大官袞冕迎秦公、執客主禮甚敬。主人忽指其側一人介冑而立者、曰、此爲而子。秦國夫人娠、公將



生戶外有異光云。六歲暗誦六經十歲賦詩有驚人語諸老知其遠器。未冠屬文有能名。初不欲以門子進。秦公曰。汝薄吾澤耶。公乃拜命。鎖廳試凡四薦名。至紹興二十四年第進士。竟如志。初仕監成都府榷茶司賣引所。又監雅州名山縣茶場。權四川都大提舉茶馬司幹辦公事。四川總領所辟差幹辦。行在分差戶部糧料院。既登第。轉左奉議郎。通判彭州。未赴。制置司檄權黎州。改知渠州。召除秘書丞。兼兵部員外郎。兼實錄院檢討官。兼國史院編修官。除吏部員外郎。兼權樞密院檢詳。又兼檢正。又兼右司員外郎。除起居舍人。兼權中書舍人。假工部尚書使虜。歸除中書舍人。兼直學士院。兼侍講。爲江淮督視府參謀軍事。拜兵部尚書。川陝宣諭使。孝宗即位。徙知夔州。未上。召除敷文閣學士。知太平州。改兵部尚書兼湖北京西宣諭使。就陞制置使。改顯謨閣學士。知平江府。徙知潼

川府。未上。再知平江府。召拜端明殿學士。同簽書樞密院事。改參知政事。兼同知樞密院事。未幾。以端明殿學士提舉江州太平興國宮。召拜知樞密院事。又以知樞密院事爲四川宣撫使。召拜樞密使。進尚書右僕射。同中書門下平章事。兼樞密使。兼制國用使。濟國公。遷左丞相兼樞密使。華國公。終少保。武安軍節度使。四川宣撫使。雍國公。以少傅致仕。薨。贈少師。又贈太傅。諡忠肅。今上慶元元年。贈太師。公在茶馬司。使長賈思誠議增茗課。公力諫不從。謁告引去。公在渠州。地堦民窶。而常賦之外。又行加斂。流江一邑尤甚。公亟除之。然後上聞。歲減緡錢六萬五千有奇。遠民呼舞。考試類省。所得多知名士。宰臣沈該薦公於高宗。召見。公獻言。謂君道有三。曰畏天。曰安民。曰法祖宗。時論譴之。顯仁后崩。百官入臨。皆吉服。公獨變服。有非之者。公不改。俄詔百官易服。公在西掖。秦檜妻王贈

希妙先生、富民金鼎以奴事檜而累官至閣門宣贊舍人、給使元君實以結宦官^④而超除樞密副承旨、公皆封還詔書。吏部侍郎汪應辰出知衢州、公請留之。時諸軍帥皆以宦官充承受、公奏罷之。紹興季年、和戎既久、虜情叵測、而朝廷翫愒晏然無虞。公因見上、力陳虜必渝盟、寇來之道有二^⑤。曰川陝、曰荆襄、曰淮東。彼必不出於此、必以正兵出淮西、奇兵出海道、宜爲之備。時上方在顯仁諒闇、太息深以爲然。未幾公使虜、館公者與公實射、公一發破的、君臣驚異。公見虜中倅倅輓芻粟、肄舟師、歸見上、再申前言、請備之。上繼使徐度使虜、還言虜無變意。三十一年五月、虜使來賀天申聖節、因索將相大臣、割兩淮地。上始悟公前言、乃以劉錡爲淮東制置使、京畿河北等路招討使、軍于建康。王權與錡姪汜副之。九月、虜以重兵出淮東、劉錡禦之。完顏亮自將大軍自壽春渡淮入寇、衆號百

萬、王權禦之。既而二將望風遁還、而權以僞退誘虜爲辭。公料權必渡江南奔、白執政未信。十月丁巳、謀報權果渡江、中外大震。上避殿減膳、面諭宰臣、議散百官浮海避狄、宰臣陳康伯曰不可。於是上始聞公料權必敗語、謂公知兵、心倚重焉。急召李顯忠爲淮西大將、命知樞密院葉義問督視江淮諸軍事、以公爲參謀、洪邁、馮方俱入幕府。庚申、公辭行、上曰、卿詞臣、不當遣。以卿洞達軍事、姑爲朕行。公泣謝曰、主憂臣辱、臣願盡死力。辛酉、公出脩門、聞王權盡失淮西、劉錡盡失淮東、錡亦託疾過江。戊辰、公至京口、見錡、問兵敗狀、錡抵闕曰、兵凶器、聖人不得已而用。公曰、虜席卷兩淮、直窺江表、今日用兵爲得已乎。屬建康告急、公與義問倍道而進。十一月壬申、劉汜又大敗于瓜洲。逆亮以兵向采石、即牛渚也。甲戌、公與義問至建康。是夜有詔、罷劉錡、以成閔代。召王權、以李顯忠代。於是



義問檄公如池州、招顯忠領西師、且犒師采石。乙亥、公行。是日逆亮已次采石、刑白黑馬祭天、期以詰朝渡江。丙子、公未至采石十五里所、已聞江北鼓聲震天。公見官軍十五五坐道旁、蓋王權敗軍也。公念權已去、顯忠未來、若坐待顯忠、國事去矣。呼而問之曰、逆亮在江北、汝等何乃在此。從者皆勸公還建康曰、事勢至此、皆他人壞之。且督府直委公犒師耳、非委督戰也。彼自有將帥、公奈何代人任責以速辜。公曰、吾位從臣、使虜濟江、則國危、吾亦安避。今日之事、有進無退、不敵則死之、等死耳、退而死不若進而死、死吾節也。策馬至采石、趨水濱、望見江北虜兵連營三十餘里、不見其後、號七十萬、馬倍之、而王權潰兵止一萬八千人、馬數百而已。諸將已爲遁計。公召其將時俊、張振、戴皋、盛新、王琪、勞問之曰、虜萬一過江、汝輩走亦何之。今前控大江、地利在我、孰若死中求生乎。且朝

廷養汝輩三十年、乃不得一戰報國乎。衆皆曰、豈不欲戰、誰主張者。公覺其可以義動、因誦言曰、汝輩止坐王權之謬至此、今朝廷已別選將將此軍矣。衆愕立曰、誰也。曰、李顯忠。衆皆曰、得人矣。公曰、今顯忠未至、而虜以來日過江、我當身先進死、與諸公勦力決一戰、何如。且天子出內帑金帛九百萬、給節度、承宣、觀察使告身、今皆在此、有功即發帑賞之、書告授之。若有遁者、我亦歸報某用命、某不用命。衆皆曰、如此則我輩效命有所付矣。請爲舍人一戰。公即與時俊等謀、整步騎爲陣、分戈船爲五、其二上下東西兩涯爲遊軍、其一載精兵於中流以待戰。其二伏內港以備不測。號令甫畢、公復上馬至水濱、見北岸有一高臺、其上立大朱繡旗、左右各二環立侍者。中張一大黃蓋、有一人被黃金鎧、據胡床坐其下者、逆亮也。忽虜衆大呼、聲動天地、亮親秉一小朱旗、麾舟數百艘絕江而來。

一瞬間七十餘舟已達南岸、其登岸者與官軍戰、我師小卻。公乘馬往來陣間、顧見時俊、撫其背曰、汝膽略聞四方、今可作氣否。若立陣後、則兒女子耳。俊回顧曰、舍人在此耶。即手揮雙長刀、出陣奮擊、士皆殊死戰、無不一當百、俘斬略盡。其中流者、船小而卒衆、又自爭舟、兵刃隔塞、運掉不俊、而我之蒙衝往來如飛、橫突亂刺、虜舟破溺死者數萬、頃刻江水爲丹。虜引餘舟遁去、公命強弓勁弩追射之、虜兵多傷。至夜師還、數尸四千有七百、殺萬戶二人、生得千戶五人、女真五百人。是夕公具捷奏以聞、椎牛釃酒、大饗將士。公謂虜明日必復來、乃與諸將再往水濱、整列步騎戈船、出海鱸船五之二、以其半直北岸上流楊林河口、以遏虜舟之所自出。丁丑、虜衆如牆而進、我師射之、應弦而倒死者萬計。舟來未已、海鱸逆擊、虜舟大敗。顧見我師扼其歸路、即縱火自焚。我師舉火盡焚其餘二

百艘、逆亮遁去。入揚州、留遣一騎移書^⑧招王權、其辭若與權有宿約者。公觀其書、權之將佐變色。公慮生變、即顧諸將曰、此反間也、欲以攜我衆耳。諸將拜曰、賴公之明、當效死以報。是日李顯忠至、公諭之曰、京口無備、我今欲往、公能分兵見助否。顯忠曰、惟命。即分李捧軍一萬六千人及戈船百艘會京口。庚辰、公至京口、謁劉錡問疾。錡執公手曰、疾何必問。朝廷養兵三十年、我輩一技^⑨不施、今日大功乃出於一儒者、我輩媿死矣。時京口止有戰艦二十四艘、會李顯忠戈船亦至。公與楊存中、成閔謀曰、虜棄來石來此、欲出我不意、我宜反出其不意。庚寅、大閱舟師、大而蒙衝、小而海鱸、皆外塹板城、中運機輪、但見舟行、不見有人。三周金山、沂洄往來、矯如白龍、怒^⑩飛水上、風濤掀天、江水盡沸。北岸諸酋憑壘縱觀駭愕、皆以爲神。亟遣人報亮、亮至見之、笑曰、此紙船也、欺我哉。因列坐、諸酋前



跪曰、南軍有備、未可輕進。亮震怒、拔劍數其罪、命斬之。哀謝久之。亮曰、姑赦汝、宜率諸將、五日必絕江。違命先斬。諸酋退曰、南涯必不可往、往即死。亮不可諫、諫亦死。蓋先諸。亮居龜山寺、乙未夜、諸酋僞效南軍劫砦、直至亮幄前、闔曰、何爲者。曰、欲奏事。旣入、即亂射幄中、亮被箭呼曰、汝南人乎。吾人乎。皆應曰、吾人。遂連射殪亮。十二月己亥、公與楊存中等具奏以聞、公尋詣闕奏事。甲辰、公至、上見公、慰籍甚渥。公謝曰、此廟社之靈、陛下之英斷、臣何力之有。公因奏曰、來石之役、張振等以偏裨勝逆亮、今止賞以三官、臣願貶臣官以賞扼等。上曰、曩者江上事勢、此何等危事。如此宣力、功其可忘。即除扼等正任承宣觀察等使、於是劉錡致仕、王權、劉汜削籍流嶺表。上命公往經理兩淮、公請以兵斷虜歸路、徐發京口之師襲之、爲進取計。比至淮上、諸軍先已過江、盡復兩淮矣。戊申、東駕幸建

康、於是有宣諭川陝之命。三十二年春、公自襄漢而西、開幕府于興元。初與大將吳拱、李道會于襄陽、旣又與吳璘會于河池、又與璘會于秦州、前後博議經略中原之策。令董庠守淮東、郭扼守淮西、趙撙次信陽、李道進新野、吳拱與王彥合軍於商州、吳璘、姚仲以大軍出關輔、因長安之糧以取河南、因河南之糧而會諸軍以取汴、則兵力全而饒道省。至如兩河、可傳檄而定。初以此策聞于高宗、又以聞于孝宗。經理有緒、關河響應、旌旛所指、軍民歸附、日以萬計、且爭出芻粟牛酒以迎王師。遂復涇、原、熙、鞏等十六州。而蜀士楊民望者媚公、沮撓於中、謂宜棄新復州郡、而退守蜀之故封。言者信之、大臣史浩主之。公婁爭不能得、乃請入見而陳便宜、詔許焉。旣見、孝宗問棄地得失何如、公以笏畫地、具陳形勢險要、如是而固吾蜀、如是而基進取。上慨然曰、史浩誤朕。公旣忤時宰、於是有當

塗之命。時隆興元年春也。明年春、襄陽有警、召歸、於是、有宣諭湖北、京西之命。未幾、進制置使。公開幕府於襄陽、與大將王宣、趙樽等會議攻守之策、以爲荆襄藩籬實在唐、鄧、然勝勢在唐州、方城、其次樊城、其次光化軍、而唐、鄧無城、難以據守、乃先城新野、次城鄧州、次城唐州、又開泌河以通漕運。藩籬既固、則襄漢久安、此守策也。王師進取之路、出蔡以睨陳、出襄邾以襲許、出汝以逼洛、出嵩、虢以震河東、出商以圖陝西、此攻策也。部分已定、累奏以聞、而宰臣湯思退欲速和戎、議棄唐、鄧。既而二州之民虜皆孥戮、上亦悔之、召公詣闕。未至而有姑蘇、潼川之命、旋又有召歸之命、公參辭不獲。參知政事王之望忌公、請少須政成、召用未晚、上可之而召公益急。既至見上、即除簽書樞密院事、而之望未之知也。命下、之望失色。初、虜議和、其約曰、俘虜兩還、叛亡則否。至是併求所否、公執不與。

未幾、有參知同知之命。適議母后戚畹恩澤、公請視舊差增、視今損半。蜀軍請謀帥、或薦王權、公執不可。虜使來聘、故事、大臣躬與除館、公獨不行。虎賁給其廝役、公請易以材官。使者驕惰、公請斬之。不果。識者韙之。湖寇李金頗熾、潭帥珙請濟師、公曰、鄂將可用而與某州將不相下、即遣鄂將、而以某州將繼之。鄂將聞之、力戰禽賊。時久不置相、有兩參預、會蜀人李宏求中書除官、同列欲與之。公曰、是富者子、吾曹可不避謗。同列不悅、言於上曰、虞某納李宏玉帶、將除以某職。御史章服附其說、以彈公、請付廷尉。丐罷政、於是有太平興國宮之命。獄成、有司懷二奏以候伺。上意、上迎問曰、帶自虞某家出否。對曰、否。於是同列亦罷政。李宏流新州、章服貶秩絀、中外讐服。即召公、於是有知樞密院之命。未幾、蜀帥吳玠卒、於是有四川宣撫之命。上輟所御履及黃金甲冑賜焉。公開幕府於利州、



時軍政久蠹、民力愈凋、公曰、敝之攸興、興於大將之貪與私也。於是首劾大將任天錫、剝其下以爲苞苴、又劾幕掾王槐孫以戰功官其親族、又劾守令劉洪、宋琛等十一人之病民瘼官者。首薦員琦爲西帥、吳玠爲東帥、又薦可將材者三人、又薦其次者五人、又進退偏裨二百餘人。大將得人、後進獲伸、諸軍驩呼、四蜀交賀。於是開公正、絕請謁、繕營壘、修器械、明勸沮、甄竄良、拔智勇、絀姦貪、戢哀克、禁子本、杜私^⑤、役、訓技擊、汰老癯、刊竅籍、核贖名、一日罷浮食者一萬有七千餘人。乃闢蒐庭、乃試射侯、今之挽弓一石有五者、昔之^⑥減於一石者也。今之蹙^⑦弩五石有五者、昔之三石者也。至是軍政修矣。請擇使者、厚賈胡、簡權奇、卻罷駑、設監牧、廣駉牝。至是馬政修矣。又請捐公錢一百萬緡、代民補輸、自是一歲軍須減錢穀九百萬有奇、四路郡縣除逋負緡錢三百四十三萬有奇。又禁兩稅之

豫索者、又禁醴酒之豫輸者、又減常賦之虛額者。適邛蜀等十四郡告饑、則發帑廩、除年租、活流民數十萬口、至是民力裕矣。法行之初、謗譏盈路、或謂召變、公不爲動。旣而下無異論、蜀民頓蘇、軍政一新、實自公始。公引疾丐祠、一再愈力、上優詔召公、降詔者一、錫宸翰者二、遣中使迎勞趣行者五、公固辭者八。特命北門草麻、除樞密使。未幾、有右輔辨章兼官樞廷、國用之命、時乾道五年八月戊子也。右相陳公俊卿薦龔茂良宜^⑧在本朝、有詔補外、陳公見上、上愠。見上震怒、陳公退、丐罷政。上不留行、恩禮頓衰。公泣入見上、爲陳公摧謝、且言願全所以進退大臣之禮。上怒未怠、公百拜于前、始授陳公觀文殿學士、知福州。汪應辰曰、虞公所謂范堯夫佛地位中人也。聞者一辭。上自即位、再郊見上帝、皆以兩望祀于齋居之宮。六年卜郊、及期又雨。公憂形于色。是夕公雨立霑衣、炳薌籲天、引

咎責己。丙辰開霽，上登壇成禮。公感上不世之遇，深思所報，每日宰相無職事，旁招俊乂列于席位而已。懷袖有一小方策，自曰材館錄，聞人一善必書。一再諭蜀，首薦汪應辰、趙雄、黃鈞、梁介、范仲芭、章森。前後居中及爲相，首用胡銓、張震、洪适、梁克家、留正、鄭聞、周執羔、王希呂、韓元吉、林光朝、林枏、丘鵠、晁公武、呂祖謙、張璠、楊甲、王質、辛棄疾、湯邦彥、王之奇、尤袤、王佐、王公哀。又用呂原明、司馬康故事，薦張栻入經筵，又薦布衣李垕制科。一時得人之盛，廩廩有慶曆、元祐之風。先是，浙民歲輸身丁錢絹，細民生子即棄之，稍長即殺之。公聞之，惻然。訪知江渚有荻場，其利甚厚，而爲勢家及浮屠所私。公令有司籍其數以聞，請以代輸民之身丁錢絹。以緡計者至一十三萬七千有奇，絹以足計者一十六萬三千有奇。免符下，九州之民呼舞。始知有父子生聚之樂。會慶聖節，燕群臣及虜使。酒

半，上起更衣。使者密誚儋曰：「侍坐孰爲虞丞相？觀者以聞。」上命儋與之見公于幕次，歎曰：「眞漢相也。」上大喜。召公見曰：「卿能重中國如此。」七年春，建儲公言於上曰：「皇太子宜日聞正言，日見正行，以養成其德，必與正人處。」乃薦王十朋、陳良翰爲詹事。劉焯、李彥領爲侍講侍讀。會慶節，虜使烏林答天錫來賀，見紫宸殿，既跪進其主遺上書，因跪不起。要我以故事所無之禮，左右失色。公請駕興，上入內，天錫色沮。公遣閤門官傳宰相之令，云：「使人好禮，有詔放仗。」使介還館，更相譙責，乃因儋者懇祈，詰朝朝見上壽，遂極恭順。朝論稱快。公下其事于邊郡，令檄虜中。天錫歸，果獲罪。上遣使使虜，請陵寢地，虜不可，而荆襄羽書報云：「虜以三十萬騎奉遷陵寢以來，中外恟恟。」於是荆襄大將韓彥直、帥臣張棟請發兵禦寇。公料虜決不敢動，戒邊臣勿妄動，已而寂然。中外大服。其後書贊稱公鎮物



如嵩岱、決事如著龜者以此。一日、有報國門外海舶數百艘、將及岸者、中外恍駭。上召問公、公對當是外夷賈舟風飄至此、果高麗賈胡也。上志克復、嘗手筆付公曰、朕必欲用武臣爲樞密、曹勛如何。公執奏不可、上勉從之。未幾、復用張說爲簽書樞密院、廷臣極諫、上怒甚。公力救解、皆授以郡。上蒐講官制、欲正左右丞相之名、於是有左丞相之命。八年、公引疾求去、不許。御史蕭之敏彈公移帝城、騎兵一軍於建康、非是。上曰、丞相有大功、勿移彈文之副。公伸前請、祈致其仕。三請不許、強起視事。之敏外補、公上疏留之、不報。朝論歸重。尋力祈解、政納祿、其詞危苦。上察公意不可奪、於是有少保節度使、宣撫四川之命。錫宴禁中、上賦詩餞行、有云、歸來尙想終霖雨、未許鄉人衣錦看。又詔奉常賜公家廟五室祭器、其後大臣不復有。此矣。公開幕府於漢中、建請蜀軍口。衆者微增其廩、於是諸

軍大悅。又請關外四州之民、凡養馬者復其賦役、於是馬數歲滋。又大將秦琪以邊頭六軍兵將散漫、地勢回遠、公請隨地易置、左右前後中軍之部分、以便緩急。於是軍勢首尾相應。商、虢之間有寇、鄰者擁衆數萬、嘗輸款於我、公不輕納。虜中捕之、或請增兵、公不爲增。虜卒自退。契丹之使曰、六彪者、潛請合力於我、俟命於西和州上、久不遣。會其屬疾、公請遣還、無致後悔。青羌犯邊、制司請發兵、公止調綿州兵三百留屯成都、聲言擊羌而實不進、羌自散。上銳意大舉、密詔趣迫、公不奉詔、復於上曰、機不可爲、但令機至勿失耳。植根本、圖富強、待時而動可也、安敢趣師、期爲亂階乎。公注意將才、偏裨行伍寸長必錄、延見慰薦、人人得其驩心。幕府再招人士如韓曉、王元、李昌圖、韓炳、陳季習、陳損之、李舜臣、後朝廷皆賴其用云。公念屬任至重、益務修軍政、裕民力、儲財用、戴星秉馬、冰滿鬢

髻人不堪其勞、公不顧也。竟以此得疾而薨。實淳熙元年二月癸酉也。享年六十有五。是日大風揚沙、前兩夕大星貫于軍前。太史奏將星墜云。訃聞、上大慟、輟視朝。於是有贈少師、太傅之命。公娶王氏、成都甲族、累封蜀國夫人。三子、公亮、奉議郎、直秘閣、前四川制置司參議官。公著、朝散郎、知開州。公遜、奉議郎、余杭縣丞。女樞娘、適從事郎、黎州軍事推官張熠。孫八人、易簡、承議郎、前棗陽軍使。剛簡、通直郎、知成都府華陽縣。方簡、宣教郎、知瀘州江安縣。秋、宣教郎、知眉州青神縣。夷簡、宣教郎、知成都府郫縣丞。普、承奉郎。曾、泰、未奏官。公事秦公、秦國夫人。至孝、宅夫人憂、哀毀柴立。既葬、伏哭墓前、僵仆不能起。阡中有枯桑、是夕兩鳥巢焉。里人賦詩頌其孝感。秦公嘗疾篤、公驚懼、書章默禱於天云、願移父之疾加臣之身、減臣之年爲父之壽。秦公即瘳。後一星終、乃薨。公在紹興、隆興間、以忠

孝、文武勳名、德望與魏國張公浚相頡頏。孝宗嘗稱公曰、今閩外能類魏公者、獨有卿耳。然二公以身徇國、皆不免於讒口。賴上聖明、其言不行。魏公嘗遺公書曰、自昔任事於外、鮮獲安全。優游不爲、率有後福。公嘗以聞、且言於上曰、一天下輿圖、易一朝廷議論難。然公天資寬厚、每以德報怨。故王之望公所薦、馮方公所厚、而每排公。章服與公無怨、而附他執。政彈公。及公爲相、念之望、以罪廢、請授以資政殿學士。方以水死而祿不及嗣、請官其一子。服久遠、竄、請貼職授郡。或問公曰、聖人謂何以報德、何如。公曰、聖人不曰以德報怨、寬身之仁乎。有以明哲保身規公者、公曰、仲山甫之明哲、不曰柔亦不茹、剛亦不吐乎。公之經學、絕人如此。公性廉介、雖君賜亦固辭。初除簽書樞密、賜白金及縑疋兩各一千、力辭得請乃已。最後諭蜀辭行、賜錢一萬緡、至蜀以市國馬。大將有獻附子、發之金

也。有獻家釀珠也。公笑曰：是宜^①一効効之近名。卻之而已。公頎^②而長，山立玉色，望之如神仙中人。其音如鐘，傑魁俊偉，慷慨磊落，內無城府，外無邊幅，好士如好色，視軍士如視其子，待內外族親如待其家人。家居雍容，無疾言厲色，不訾飲食，不詈臧獲。謁鄉郡太守，出入不由戟門。自秉政至諭蜀，退食必觀書，爲文立成，不^③瑯而工。嘗注唐書、五代史，有詩文、奏議若干卷。諸孤以某年月日葬公于某所，後二十八年，不遠八千里，遣一个行李來廬陵，請銘。萬里嘗待罪太史，於職宜書。銘曰：

維古南國，以江爲壁。維宋中興，以人爲城。孰爲其人？虞姓雍公。玉立長身，巖巖岱嵩。諒我高宗，殫彼羯戎。匪公則賢，高宗叡聰。攫而將之，萬英之中。紹興辛巳，彼羯暴至。其來衝風，其速如^④鬼。我師旣潰，彼鋒益銳。公奮孤忠，轉敗爲功。羯酋射天，岱嵩壓之。羯駭飲江，岱嵩踰之。踰之則斃，壓之則殪。赫吾

天聲，濯吾王靈。風鶴弗鳴，彼自震驚。草木弗兵，彼自割烹。在昔典午，有導有安。曷嘗帥師，與敵周旋？武哉雍公，儒衣據鞍。矢石紛前，對之夷然。弗色^⑤弗聲，弗麾弗旛。笑談之間，一清腥羶。乾坤再安，神人重驩。赤子晏眠，今四十年。公事高宗，盡節盡瘁。萬事不理，維理一事。公相孝宗，端委廟堂。旁招俊乂，實彼周行。維宋中興，兩社稷臣。前張後虞，皆蜀之人。相望有偉，與宋靡已。作頌以紀，太史萬里。

楊萬里撰 《誠齋集》卷一二〇

書虞雍公守唐鄧事

紹興初，秦檜議和，割唐、鄧遺虜，以襄陽三十里前爲境。三十二年，逆亮敗盟，自率大兵渡淮，窺江，遣劉萼一軍由光化順流徑薄襄陽城下。亮意不在襄漢，但分兵使相率。亮敗死，萼亟撤去。唐、鄧民開門納官軍。明年春，高宗視師建康，命中書舍人虞公宣諭川陝。然陝西之師非京西合勢，莫可進討。



藏

非京師屯守、莫可牽制。故陝西之勢、其重乃在京西。爲今日最急之策、宜速以重兵據確山一帶之險、以保唐、鄧。時王彥取陝西數郡兵、止六千人、屯商州。公奏乞駐兵唐、鄧、令吳拱分精兵二萬人從鄧州路與王彥會商州、以萬人守潼關、使河南虜兵不得援長安。以萬人與王彥合力取長安。吳璘、姚仲、徐擁大兵震關輔、使陝西虜兵無援、可不戰遁去。會吳璘破大散關、進兵向西北、與虜相持、德順而吳拱乃被旨屯郢州。公又奏郢去唐、鄧數百里、緩急難以相應。且唐、鄧無屯兵、恐京西虜兵無所顧忌、引兵向陝、以助合喜、則吳璘未必成功、使或成功、用兵力亦倍。乞且令吳拱、李道於襄陽歇泊、仍更兵戍唐、鄧。若京西之虜分兵向陝、則令引兵擣其虛。未報。是歲六月、壽皇受禪、和戰議未決。論者多欲棄陝西、新復州郡。公亦奏乞歸班。而吳璘在德順事急、約公會議。公至秦州、又具劄子、與

汪澈同申前議、乞以重兵據唐、鄧、分兵二三萬人、由內鄉出商於、守潼關、焚大慶橋、與王彥合勢取長安。因長安之糧、可取河南、因河南之糧、會諸軍可取汴。兵力既全、饋運亦省。至於兩河、因民之心、可傳檄而定。無何、省符以公知夔州、繼被旨留吳璘軍前議事。又起赴行在、遂詔吳璘班師、盡棄陝西、新復州郡。公還、奏事殿上、以笏畫地、爲陝西形勢、論辨甚悉。上憮然有悔意。以公知太平州。襄陽有警、再召公、除兵部尙書、河北京西制置使、節制趙、撙、王、宣軍馬。公陛辭、即於上前論今新復州郡、雖陝西已棄、而唐、鄧、海、泗尙存。唐、鄧爲荆襄藩籬、且平原廣袤、實爲恢復勝勢所在、決不可棄。既至襄陽、即與諸將議城唐。時虜已遣使議和、必欲求割唐、鄧、海、泗四郡。朝廷遣胡昉還聘、虜留之、聲言沙河造橋、襄葉置烽燧、必欲取唐、鄧。公知虜恐我得唐、鄧勝勢、則中原人心自歸、其憂大矣、故絕欲



市和以得唐、鄧。於是章凡十餘上，乞不棄唐、鄧。其後竟城唐。公之城唐也，或言虜重兵壓境，公料虜自逆亮之殞，兵散馬多死，契丹渤海益張，兩河民日起，必無能爲。公乃行，以數百騎出唐城，欲至赭陽陂，以安衆心。遣人伺虜，還言虜將蕭定遠聞官軍在唐，以四千騎走汴矣。公遂還唐，鄧間，士民爭持酒來獻，羅拜馬前，乞朝廷勿棄二城。公皆勞勉之，歡悅而去。會和議成，將割地。初，公上章剴切，有云：「朝廷必欲割唐、鄧，臣即挂冠而去。」至是，遂上丐老之章，有旨赴闕。以戶部尚書韓仲通制置荆襄，割唐、鄧、海、泗以和。燮嘗論諸葛孔明草廬中與昭烈論取天下，先取荆益，待天下有變，則一軍出隴右，一軍出荆襄，亦欲犄角取雍耳。其後關羽已失襄陽，則孔明右臂已斷，天下形勢非復草廬中所料。是故魏延嘗欲以奇兵取長安，孔明不之從，蓋無以爲之犄角故也。天若祚漢，關羽尚在襄陽，孔

明以大軍出隴右，而許、洛之間又有徙都之警，則孔明可以安坐而得長安，何至乘危徼倖，用魏延之策哉？自頃中原有事，忠肅虞公既成采石之功，朝廷付以襄漢上流重任，公知唐、鄧勝勢可以牽制虜兵，則隴右之師可以平取長安，乃專意保唐、鄧。虜亦覺之，請和以求割地益堅，惜乎。和則堅矣，而天下勝勢，孔明之所欲而不之得者，一旦在我，而未獲收其功也。因具著之，以明天下形勢之所在，俾後有考焉。紹熙二年上元，眉山任燮述。

任燮撰 《名臣碑傳琬琰之集》下卷二五

校記

- ①是：原作「足」，據四庫本《誠齋集》改。
- ②嗚呼盛哉：原脫，據右引補。
- ③秦公：原無，據右引補。
- ④宦官：原作「官官」，據右引改。下同。
- ⑤三：原作「五」，據右引改。
- ⑥詰：原作「誥」，據右引改。
- ⑦丹：原作「舟」，據右引改。
- ⑧書：原作「盡」，據右引改。
- ⑨技：原作「枝」，據右引改。
- ⑩⑪怒：原作「奴」，據右引改。
- ⑫守：原作「安」，據右引改。
- ⑬斬：原脫，據右引補。
- ⑭伺：原作「司」，據右引改。
- ⑮私：原脫，據右引補。
- ⑯「昔之」句：原脫，據右引補。

- ⑰「今之蹙」三字原脫，據右引補。
- ⑱「卿」原作「鄉」，「宜」原作「宣」，據右引改。
- ⑲邦：原作「拜」，據右引改。
- ⑳問：原作「問」，據右引改。
- ㉑好：原作「奸」，據右引改。
- ㉒有：原脫，據右引補。
- ㉓口：原作「曰」，據右引改。
- ㉔圖：原作「國」，據右引改。
- ㉕公遜：原作「旂孫」，據右引改。
- ㉖官：原脫，據右引補。
- ㉗夫人：原作「夫夫」，據右引改。
- ㉘執：原作「報」，據右引改。
- ㉙宜：原作「直」，據右引改。
- ㉚頤：原作「傾」，據右引改。
- ㉛「不」下原衍「不」字，據右引刪。
- ㉜如：原作「山」，據右引改。



儒藏

宋儒碑傳集 卷一一三

③弗色：原脫，據右引補。

宋儒碑傳集卷一百十四

丁堯 黃石 李椿

丁復之墓記

復之名堯、姓丁氏、建寧府崇安縣上梅里人。父名愛、母某氏。復之爲人篤厚慈良、深有志於爲己之學。從予遊數年、不幸早死、朋友莫不哀之。有子二人、曰某某。淳熙十有二年冬十有一月□日卒。□月□日、其父葬之某處。友人蔡君季通實相其事。新安朱熹記。

朱熹撰 《晦庵先生朱文公文集》卷九四

朝散大夫直顯謨閣黃公石墓誌銘

公諱石、字圯老、姓黃氏、世爲溫州平陽人。曾祖遂祖鬲。父理、有聲太學、贈官至朝奉郎。母陳氏、贈宜人。公幼篤學、及長識慮精審、喜論國家大利害。紹興七年、投匭上書、言內事可治者七、外事可治者四。天子異之、下其書、給舍皆謂切時可行、詔永免

文解、加賜束帛。明年遂中進士第、補左迪功郎、融州觀察判官。未赴、改福州州學教授。學規業素弛、公命正錄而下各舉其職。諸生或不告輒出、公曰、此職事不職也。盡罷之。聞李葵、李楠、林之奇爲衆推服、即走其家備禮延致。學田故爲吏乾沒、供饋日賒、公大加括責、歲輸數倍。於是增置弟子員、優給職事以俸而督其藝業。帥左丞葉公夢得賢之、薦於朝。葉公尋奉祠、闔郡郊餞。獨顧公曰、子且顯、其自愛。袖出前執政薦章畀公、其見器如此。秩滿、以書抵秦丞相曰、上踐祚十九年、儲貳未立、安危所係孰大於此。公獨不開陳乎。不報。得西外敦宗院宗學教授、視事踰時、丁內艱。二十二年免喪、秦丞相尙當國、公申論前事。秦曰、君謂某向不省耶。面舉百餘言、而以時未可爲解。復得南外宗學教授、丁父憂不赴。服闋、沈丞相秉政。公以語秦者語沈、沈亦不能用。授建康府府學教授而去。二十九



年留守張忠定公召赴闕、公送以書、大略言內則國本未定、闔寺浸昵、外則北庭懷貳、大將乏人、國用不給、張公咨其言入對、言儲貳尤力、適契上意、未幾、遂行典禮。三十一年冬、完顏亮死、議者爭欲乘機進取、會太上皇帝視師金陵、公獨陳八事、謂宜按甲休兵、徐俟其變、其後諸將果然無功、駕還臨安。公以銓格改宣教郎、選充諸王宮大小^①學教授。主上登極、轉奉議郎、賜服緋銀。乾道元年九月、輪對論二事、其一曰、舜大治而禹益儆戒無虞、成王守成而周公作無逸、真宗東封還、孫藉上書勸無自滿假、召試賜出身。今南北始和、願陛下以舜禹、成王、真宗爲心、益自戒懼、無或暇逸。上獎諭云、卿言真致治之本。其二曰、儲君學問當求堯舜禹湯、文武之用心、不當如書生分析^②。章句、絺繡文詞。時莊文太子留意於詩、公故及之。上大喜曰、朕固嘗以此諭太子、卿言正與朕合。退朝、以章送東宮、

且批付中書黃某、與陞擢差遣、今晚便可擬來。遂除校書郎、入館不試、蓋異恩也。十一月、進著作佐郎。二年省試、初擬公點檢試卷、上特陞參詳官。三月再對、力陳正心出治之要。上曰、卿言不諂、旦夕別有委用。四月、兼權司封郎官。十月爲真、仍兼司勳。十一月、太上聖政書成、以公經修、進秩一等。四年夏三輪對、力言陛下爲治雖勤而未得其要、且用人當辨才與德、其語益剴切。十月、除樞密院檢詳諸房文字^③。十一月、改右司員外郎。廷尉讞囚有父被毆不死、而其子托以復仇殺毆者二人、朝議貸死。公言、父未嘗死而置殺人之罪、他日頑民與人有仇、導父使鬪、從而殺之、將不可禁、如死者何。詔是公議。五年八月、進左司。時公與左相善、右相不樂也。會蜀人蘇森乞用元祐黨籍恩補官、右相欲與之。公言、紹興六年雖許補官、尋以僞冒、故八年纔令免解、既充前敕矣。右相滋不悅、公遂引去、

除直顯謨閣、江東轉運副使。六年行部、值諸郡大水、壞太平圩田、公以其事申三省、而重於再出擾人、亟委官相視賑濟、且奏其施設之序。三省得初報、即取旨差公躬親按視、命方下而委官之奏適至、時左相已去、右相劾公弛慢不親行、降兩官罷。或勸之辨、公曰、吾失職獲譴、尙何辨。聞者韙之。六年冬、主管台州崇道觀、繼復原官。九年八月、再任崇道觀。淳熙二年十二月六日以疾卒、享年六十六。積官朝散大夫。妻宜人王氏、某人之女。男裳迪、功郎、新衢州常山尉。三女、長適林俱、次適迪功郎、湖州武康縣主簿毛鳩、季適迪功郎、新臨安府司戶參軍林達己。孫男女各一人。其子卜以四年十一月壬申葬公某鄉某里岱^①山之原、使來請銘。予昔與公分教金陵、雅相善、故知公爲詳。銘曰、

金華唐與政、名士也、知人而善評。嘗謂圯老容粹而溫、心和而平。稠人廣坐、語如不出諸口、間發一

言、則辭盡而理明。蓋靜而能謀、柔而不傾。學恥虛文、而實用之爲貴。論不阿出、而君民之爲心。若此者、可以爲天子之近臣矣。嗚呼、是爲銘。

周必大撰 《省齋文稿》卷三二

敷文閣直學士李公墓誌銘

公諱椿、字壽翁、洛^②州永年縣人。曾祖安、祖泰皆不仕。父升進士起家、爲吏以廉正稱。累官朝奉郎、贈太中大夫。母楊氏、趙氏、張氏、皆贈碩人。靖康之難、汴都不守、太中公以衛父見傷、父子偕卒。公年尙少、藁殯佛屋、深竊而詳識之。奉母南走湖嶺間、備嘗艱窘而竭力以養。母子相慈孝、人不知其趙出也。用遺澤補官、調潭州衡山尉。擿姦發伏、人不能欺。決事問理如何、不爲勢奪。再調桂陽監司理參軍、盜發臨武、將尉縛六十餘人以獻。公辦理之才、六人抵死、它所活亦甚衆。以數爭獄事失守意、求去不獲。守悟、乃更相知。建復臨武縣、盜以不作者



二十年。徙衡州軍事判官、守與部使者交惡、公諫止之、不聽。後闔郡坐劾去、公獨免。邵民有告兩人爲盜者、郡得其一、將寘之法、而囚家訴冤。公被檄鞠之、使召告者、則無其人。問其同徒、則已斃於路矣。閱故牘、則斃者是夕乃在他州、有左驗、囚乃得釋。徙寧國軍節度推官、豪民執僞券取陳氏田、陳父子斃于獄、妻又將斃矣。公辨其僞、奪田歸陳氏。虜亮將渝平、亟白守將修城壁、葺軍械、料民兵甚整、人恃以安。張忠獻公節制兩淮軍馬、辟準備差遣。及拜宣撫都督、皆以自隨。蓋公始見胡文定公、退與其諸子遊、從容言曰、椿願天下之人無不唯是之求耳。胡公聞而異之。其子仁仲後見公所論富川六事、亦謂有經濟才。張公知之、故取以爲屬。諉以經畫淮甸事、公爲奔走兩路、綏集流民、布置屯兵、察廬、壽軍情、相視山水寨險要、凡四五反、詳審精密、所助爲多。它如謂督府當鎮無爲、請制戰

車以易拒馬之屬、未及行者尙衆。至於事有不可、則固未嘗爲苟同也。宣司訖事、議請第賞官屬。公曰、今未有功而遽求賞、已非所宜。且先將佐則無以勸士卒、溥及之則無以待有功、皆不便。張公然之、爲止不上。後諸將有以北討之議聞者、事下督府、將從之。公在外、亟奏記張公曰、復讎討賊、天下之大義也。然必正名定分、養威觀釁而後可圖。今議不出於督府而出於諸將、則已爲輿尸之凶矣。況藩籬不固、儲備不豐、將多而非才、兵弱而未練、節制未允、議論不定、雖得其地、不能守也。書未入而師已行、則又言曰、大將勇而無謀、願授成算、俾進退可觀、毋損威重。旣而果無功、張公悔之一曰、喟然歎實材之難得。公徐對曰、十室之邑、必有忠信、天下之大、豈可厚誣。誠欲致之、唯不惡逆耳而甘遜志、則庶乎其肯來矣。張公復拜右相、公知事不可爲、勸之去。明年春又出視師、公曰、小人之黨

已勝而公無故去廟堂、此必危。復申前議甚苦。張公心是之、而自以宗臣任天下之重、不忍決去計也。未幾果罷。公出幕府、得監登聞鼓院。在職數月、有所不樂、請通判廉州以歸。未上、召對、首請復廣西州縣運鹽而罷折稅、和糴招糴之擾、二請無汰去軍中百戰之士以壯軍勢、寬郡縣三請以懇田爲課最、而更賦法、改祿令、多以穀帛、少以錢、皆當上意。除知鄂州、再對、請令墾荒田者三分其租、三年乃增其一、三增而畢輸。請罷經總制錢、悉爲上供、一其帳目以省吏姦。上可其墾田說。至鄂行之、復戶數千、曠土大辟。鄂地重而守權輕、賦薄而用廣。公交際以誠、調度從約、未幾、遽振而贏。嚴火備、禁姦盜、皆有方略。軍民之爭、一決以法、主將悅服。移廣南西路提點刑獄公事。廣西舊遊、習其民情之欲惡、有所更革、不戒而孚。官吏有罪、免之而已、無所窮治。未竟之獄、一以輕平、所縱釋數十百人。

盛夏按行、慮問諄悉。退閱文書、一夕千紙。奏罷發運司所復昭州金坑、請禁仕海南者無得市土物、事皆施行。移荆湖南路轉運判官、俾入奏事。行及近甸、時宰忌之、促便道之部。適歲大侵、官配民備賑糴、民爭糴、米踴貴、復抑米價、商船不來。公至、損配數、除米估、人用不饑。奏請蠲歲糴代發二分米、出緡錢權楮幣、和糴米宜用市直、毋使太賤傷民、人以爲便。自爲少吏時、已病監司行部從吏卒擾州縣。至是當出、輒前戒吏具州縣所當問事目以行、而罷諸常從者。所至州取吏卒使令、凡以例致饋一不受。自是人多效其所爲。言事者亦請下諸道以爲法。召爲吏部員外郎、復論廣西鹽法。上是其說、俾條施行之目以上、遂改法焉。其後二十年間、法雖屢變、而折苗和糴招糴之擾竟罷。民賴以安。除樞密院檢詳諸房文字、小吏持南丹莫氏表來、請於宜州市馬、因簽書張說以聞。公語說、邕遠



宜近人孰不知。其前日故遷其塗、豈無意哉。況今莫氏方橫、乃欲爲之除道而擅以互市之饒、誤矣。小吏妄作、將啓邊釁、請論如法。說又議諸郡招軍、宜立法以課殿最。公語之曰、贛、吉、建、劍等州民衆俗悍、雖多募不難致。淮、漢、荆、湖凋弊未復、若限以額、恐有抑挫之擾。積二事忤說、怒語人曰、吾乃無一可耶。公聞之求去、上問知之、亟令慰喻安職。未幾說免、乃遷公左司員外郎、密裨國論。深抑吏姦、號爲稱職。嘗言、三衙御前之兵有用、當益。諸州廂禁兵無用、當銷。銷之之術、死亡勿補。二十年之後、無復無用之兵矣。它時寧壹、以御前兵分屯諸州可也。始、公在督府、嘗建軍民雜耕之策。旣而詳其利病、乃欲盡捐以予諸軍、使歲分半卒以耕而益其食。至是亦爲上言甚悉。尋復請外、除直龍圖、知隆興、江南西路安撫。避祖諱、改荆湖南路轉運副使。至未一月、移都大提舉四川茶馬、俄復歸故

官。建請十三事、同日報可。大者減桂陽軍月椿錢歲萬二千緡、而損民稅折銀之直、民刻石紀之。免戶部配鬻乳香、諸路併得免。訖今不復配。衡嶽廟火、公言、廟洊火、天寔厭其非制、請毋復屋而築壇以望、用遵禮典、省財力。不報。茶寇作、帥以失律免。公攝其事。時江西兵已集、寇勢窘、謀復南走。公亟收散亡分守要害、寇不能越。故江西得蹙而擒之。姦民有規聚徒應賊者、公募土豪捕其魁桀誅之。餘悉散走。事平、請於朝、歲分卒戍產茶處、盜以益衰。又言、茶商買券於官而復市茶於園戶、與鹽商買券而即受鹽於官者殊科。今一其賈、是以茶商獨困而私販多、歲額不敷而民被擾。甚則鬪斂攻劫爲羣盜。前日之事亦可驗矣。請損其直以便事。而有司吝出納、乃析小券以一爲六、實無所損而重以煩費、人益病焉。召還、見上首論軍政之弊曰、屬者鄂渚大軍三千、捕茶寇數百、亡失過半。小寇

尙爾、如大敵何。臣嘗求其故矣、大抵將不得人、馭衆無術、廩食既薄、又苦侵漁。老成習戰之士、一以疲老被汰、則挈其強壯子弟以去、軍中唯有抑勒寄招之人、又皆不習戰陳而不可用。至於待遇、復不均壹、使吾老舊之卒自傷其不及歸正之人、而歸正者又自以爲待之不如俘虜之厚也。誠亟圖之、反此數者、則軍聲振而國勢張矣。因復力陳茶法之弊、乃得頗增鹽數、而公意未已也。政府白擬司農少卿、上自用公爲正卿。京師月須米十四萬五千石、而省倉之儲多不能過兩月。公請給南庫錢以足歲糴之數、又糴洪、吉、潭、衡軍食之餘、及鄂商船、并取江西、湖南諸寄積米、自三總領所送輸以達中都、常使及二百萬石、爲一歲備。久之不行、公以不得其職求去、不獲、又以白宰相曰、今豐儲倉、南上庫皆移東、就西以眩主聽、而使朝廷、戶部自分彼此、告借索還、有同市道。願革而正之。凡百

政事、各付攸司、委任而責其成、則名正而實舉矣。臨安擇守、公在議中。執政或謂公於人無委曲、上曰、正欲得如此人、遂兼權臨安府事。守比非其人、日走權門、奉約束耳。民事悉付吏手、吏得徇勢爲姦。公既視事、親閱文書、躬自予決、要人請囑、一無所聽。府故以宦者爲承受公事、守至例謁之。公不往、怒、因喻旨、故遷延以相沮傷。公白政府無所用、承受、請罷之。市有火、近巨璫所居舍、怒、不專挾護、遣兩卒喧厲公所。公奏其狀、下兩卒大理獄。大理觀望、覆逮府吏卒。公即家居自劾、詔杖兩卒、釋府吏卒勿問。僧倚豪貴、立私宇至百數、會有以姦穢事覺抵罪者、因悉以令沒入之、而逐僧、還所隸事。在府三月、竟以權倖不便亟解去、而民至今稱之。公在朝遇事輒言、執政故不悅。及是轉對、又言、易以九居五、六居二爲當位、而詞多艱、以六居五、九居二爲不當位、而詞多吉、蓋君以剛健爲體、而虛



中爲用、臣以柔順爲體而剛中爲用。君誠以虛中行其剛健、臣誠以剛中守其柔順、則上下交而其志同矣。陛下得虛中之道以行剛健之德矣、而在廷之臣未見其能以剛中守柔順而事陛下者也。願觀象玩詞、求剛中之臣、遠柔佞之士、以應經義、起治功。由是執政滋不悅、沮公茶議、使不得行。公益論事自若、久之求去、復除江南西路轉運副使。陛辭、上曰、卿未可遠去。改知婺州、進祕閣修撰。上意猶欲留公、而公亟言軍政敝、武備弱、必誤事、不合旨、乃之郡。居數月、郡以大治。會詔市牛筋五千斤、公奏一牛之筋才四兩、今必求此、是欲屠二萬牛也。上悟、爲收前詔、且思公前言、召以爲吏部侍郎。公又爲上言、民貧多盜、非國之福。願詔中外有司各條所部冗費可省者以聞。上善之、而亦不果行也。在吏部、與吏史約、予奪命士所陳身計、當悉疏著令、堅定其可否乃行。旣行而有遺若未允者

重坐。吏以此不能肆其姦。秀邸館客特注州掾、公言其人未試、且衝待次人、請更受員外、置不簽書公事。執政建議欲有所私而託以吏部所啓、公言是事雖小、所關則大、請究治。上嘉納焉。上親慮囚、命公與知閣門事張掄次比其事以聞。掄自以官承宣使、欲列名公右。公不可、白之丞相、亦右掄。公奏言、臣固知承宣使序權侍郎上、但使事以閣門副侍郎耳、故所被旨臣實先掄、唯陛下財幸。上不直掄、罷之。公以上常獨攬機務而羣臣偷安苟免、乃按易象爲上言、乾首坤腹而六子之卦各象其事、故聖賢之訓皆以君爲元首、臣爲腹心、股肱、耳目、喉舌、各有攸主。今君勞臣逸、非治之體。且使出令用人或有未善、則過歸於上而政亂於下。願觀易卦之象、體乾剛健而使腹心、股肱、耳目、喉舌之臣各任其職、且察臣下有遊近習之門者、嚴禁絕之、而益以公道用人、名節取士、則士風振而人材

出矣。一時弊事如衛兵壞僧廬、掠都市而朝廷不深治、言事官彈劾不勝去職而取從風聞者坐黥隸、軍中結邏卒開鋪以搖主將、皆極言之。又建白凡選監司若大郡守、宜使侍從集都堂、公舉所知而宰相拔其尤者以聞、皆切治體。又請凡應輸義米者皆置倉鄉社以藏、而凶歲還以予之、亦便於事。然皆不得行、獨衡州監牧諸軍回易竟罷如公言。又嘗抗言、往者闔寺之盛、卒階靖康明受之變。今復盛矣、請抑制之、不使浸長。官置蠶室、限其進子之數。官高者使補外、而門禁宮戒之外、它毋得有所預。嚴士大夫兵將官與之交通之禁、則上下俱安而禍變潛弭矣。上聞靖康明受語、嘖蹙久之、曰、幼亦聞此。因納疏袖中以入。最後極言邊備不可以不豫、如欲保淮、則楚州、盱眙、昭信、濠梁、渦口、花鬻、正陽、光州皆不可以不守。如欲保江、則高郵、六合、瓦梁、濡須、巢湖、北峽亦要地也。其形勢之緩

急、兵力之多寡、計策之利鈍、皆歷陳之、如指諸掌。又論應城四達之衝、宜屯一軍以爲襄陽近援。荆南兵戍襄陽、宜徙其家屬營江南、毋使爲虜所襲。以病請祠、不許、面請益力、乃除集英殿修撰、知寧國府。數日、改太平州、賜尙方珍劑以遣焉。當塗重地、蓋以一面爲寄。公因自請以時行視圩垸、有機事得以密疏直達、上皆從之。既至、力圖上流之備、請選募橫江水軍千人、以爲濡須、東關、采石聲援。采石水軍舟多卒少、宜以步卒之半爲水戰之用、使可舟可陸、往來巢湖、爲必保濡須之計。而凡沿江津渡、宜使皆隸南岸。比來和州利商算、輒穿支港以內舟、首尾皆屬之江、此爲自隳天險。邊民盜虜馬或爲它盜來歸者、有司不問、甚或賞以勸之、皆不便。上納其言、亟命塞港、它亦頗施行。居年餘、年六十九、即上章請老。上初惜其去、三請、乃許以敷文閣待制致仕。越再歲、上以湖南兵役之餘、公



私困敝、上下恫疑、思有以鎮安之、謂公重厚可倚、復起公以顯謨閣待制知潭州、荆湖南路安撫使、私禮免繫帥銜、以避家諱、公雅無復出意、再辭不獲、乃勉起、至無幾何、悴者蘇、疑者釋、氣象一切如盛時、復稅酒法、人以爲便、前此官市民物不予直者、悉爲償之、斗酒千錢、不妄用、故人賓客薄少、周助率以私錢、州宅火、徐葺之、不調一夫而復其舊、諸縣有羨賦、州竭取之、縣以不可爲、公歸其半曰、歲饑用不足、少須之、當悉歸矣、歲旱、賑廩勸分、蠲租十一萬、給常平米二萬、糶又數萬、民以不流死、飛虎軍新立、或以爲非便、公曰、長沙一都會、控阨湖嶺、鎮撫蠻徼、而二十年間大盜三起、何可無一軍、且已費縣官緡錢四十二萬、民財力不可計、何可廢耶、亦在馭之而已、異論乃息、郴民輸租、吏所加賦幾再倍、力請裁之、三去其一、民以小寬、前在兩州、再言配法之弊、請使凡應配者祇坐加役流

法、髡鉗居作、三年而免、母或黥涅、使得自新、免竄逸、免遞送、廣至恩、召和氣、至是、計長沙一歲所遞配卒千二百五十餘人、復申其說、朝廷爲下其事、而議者狃常、或笑以爲迂、不能革也、未滿歲、復告歸、進敷文閣直學士致仕、朝拜命、夕登舟、歸老衡陽、故居野塘之上、淳熙十年十一月旦日薨、享年七十有三、公生十有五年、避地南來、貧無以爲養、不得專力於學、年三十、始學易、兩鞠郡獄、須慮問者累旬不至、因得晝夜研考、乃若有得、遂樂玩而沒身焉、其言於朝廷、措諸行事、無適而不於是也、尤惡佛老邪說、在臨安被詔擇靈隱寺主、因復于上曰、天地變化、萬物終始、君臣、父子、夫婦之道、性命之理、死生之故、鬼神之情狀、易盡之矣、曷爲求之他、他時僧或宣對後苑、復疏其失、請崇先王之道、正人倫之本、漸汰游惰、歸復農桑、其在當塗、申法禁、戢誑誘、出教喻民、語極諄悉、至是病革、題詩

一章以示諸子、沐浴正衣巾而逝。人以是益知公之於易非徒誦說而已也。公莊重簡淡、嶷然有守、泊然無欲、喜怒不形見於色、故人不可得而親疏。而中夷易平直、廉不近名、介不絕物、應事存心、悉主於厚。平生未嘗失節於權倖、然非有意以矯厲爲高也。在六院時、淵、觀寵方盛、同舍曰走其門、公恥之、自引去。晚登從列、觀已位使相、竟不往謁。它一二輩職事所及輒與忤、又嘗爲上指言其姦。其徒相與聚而訕公、有言太尉獨不柰李某何者。其人復之曰、誠無柰其不顧官職何耳。賴上知公深、屢歎其樸直、故小人無以行其計。公於中外鉅細知無不言、其尤致意焉者、邊備、軍制、賦法、祿令、茶鹽、屯田、經總制錢、揀汰、歸正、配法也。蓋自少日親罹兵難、復歷邊事、盡悴州縣、乃登使守、乃踐省寺、於大小之務皆身履而心喻焉、非如它人剽聞掠說而籍口嘗試者也。其從違忤合雖不可常、然持

其見終身不易、言之懇懇、至於四三。其才通、其識遠、不阿主好、不詭時譽、無書生之輕、俗吏之陋。其所緼畜使得宣究、斯世其庶乎。公娶龐氏、早沒。繼室以韓氏、有賢行、夫婦相敬如賓、皆贈令人。男二人、毅夫、承務郎、後公三年卒。正夫、宣義郎、廣南西路提舉常平司幹辦公事。女二人、長適朝散郎、提舉荆湖南路常平茶鹽公事臨川吳鎰、次適邯鄲劉全。孫男八人、大有、大來、皆修職郎。大謙、迪功郎。大用、大臨、大鼎、大觀、大鼎未仕。女二人、尙幼。公居家有常度、不惰替、亦不嚴厲、約不戚、豐不泰、終身一致。在官儉而法、官燭不入中門、家人不用公家供張。初臨有新帟幕、必撤而藏之、存以迎新。去之日、不私一物焉。家至今無有敝帷。蓋凡例所饋餉、私不應法之入、率積之公帑、以供公不應法之用、餘則委置而去、門內化之、落然清素。素篤風誼、嘗僚章貢李燮、死于安陸、有女棄民間。公贖而育之、



韓令人愛之如己子、以歸士族。初仕、亦嘗從衆投上官爵里、狀心恍然不寧、自是不干請。嘗獲盜委曲、可以被賞、置之弗問。既循資、則曰、吾老於職官耳。年五十有二、乃改京秩、自是出爲時用。然未嘗忘歸志、未始攜家入中都、亦不至畿郡。仕五十年、上爲人主敬信、下爲士大夫尊慕、無纖謗微累。出入中外數四、其入也皆以特召、其出也皆以力請。年至亟歸、不得已而勉起、起又竟歸、以終素志而沒。出處之義、特爲全盡。以是年閏十一月十一日葬于衡州花光寺之山後二里、與韓令人同穴。以葬日迫不及識、而吳鎰狀公行大略如此。後十年、正夫乃以其銘見屬。熹不足以銘公、然熟公聞望蓋久、中間一再通書、荷公見予良厚。今又得吳狀及公平生議奏讀之、觀其行身如履繩蹈矩、無一事之不合於理、論事如絲麻穀粟、無一言之不適於用、而其忠厚純篤之氣、又有藹然溢於行事言

語之外者、未嘗不廢書三歎而悚然心服也。乃最其事而系以銘。銘曰、

大易之縕、微妙不窮。孰窺其表、而測其衷。懿彼李公、心潛躬詣。逮其渙然、隱顯一致。進矢于廷、退諗于私。迎知失得、不假蓍龜。閔天越民、忠君及國。在古有評、曰庶常吉。胡不百年、以究其施。長言鼓缶、奄旻其離。衡山之陽、非其故土。竊而弗銘、曷詔終古。

朱熹撰 《晦庵先生朱文公文集》卷九四

李侍郎傳

李椿字壽翁、洺州永年縣人。父升、進士起家、以廉正稱。靖康之難、汴都不守、虜大掠。升護其父泰、以背受刃、與其長子相繼卒。椿殯三喪、侍後母張避地、溯湘隄嶺、備嘗艱窘。用父遺澤補官、初調潭州衡山縣尉。丁母憂、服除、調桂陽監司理參軍。臨武寇作、求盜者禽致五十九人、鞠之才六人抵死。又

誣爲官軍鄉導者父子三人通寇、釋之。調衡州軍事判官、邵守陳正同怒永民張巨泗、誣以死刑、椿鞠其獄、竟直之。再調寧國軍節度推官、豪民執僞券奪陳氏田、陳父子斃于獄、妻又將斃、辯其僞、取田歸陳氏。完^①顏亮將渝平、亟白守宣近江宜爲備、因爲經理、繕城池、葺軍械、料民兵、宣恃以無恐。張浚節制兩淮軍馬、辟充準備差遣。浚拜宣撫使、又拜都督、連辟椿爲屬。是時賓贊之盛、皆一時選。至經營兩淮形勢事宜、綏流民、布屯戍、察^②軍情、砦山水、揜險要、涉歷周遍、規度精密、皆椿力也。癸未之春、將臣有以北討之議聞者、下其議督府。椿方奉檄至巢、亟移書浚之子栻、言藩障不固、儲備不豐、將多而非才、兵弱而未練、節制未允、論議未定、彼逸我勞、雖得地必不守、未可動也。歸至合肥、師已行矣。復致書於浚、言大將勇而無謀、願授成算、俾進退毋損威重。後^③皆如椿言。是冬、浚入覲、事小異、

椿勸之去。來年春、浚出視師、小人之黨已勝、浚跡甚危、而浚自以宗臣任天下之重、誓當捐軀死而後已。椿又連書趣之去。初、椿得監登聞鼓院、在職數月、有所不樂、請通判廉州。未赴、召對、除知鄂州。至鄂、首行墾田、復戶數千、曠土大闢。軍民有爭、一裁以法、主將忻服、以治理聞。移廣南西路提點刑獄、決前使者未竟之獄、縱釋數十百人。盛夏行部、厲毒弗避。牢戶慮問、人人諄悉、退閱文牘、一夕千紙。廢發運司所復昭州金坑、禁瓊管仕者買土物。復移荆湖北路轉運判官、許奏事。行及近甸、屬時宰方謀^④逐正人、逆忌公、促便道之部。抵鄂、會歲大祲^⑤、官強配民備米賑糶^⑥、民爭於糶、而官下其估、商舟不至、米益踴貴。椿損強配之數、弛裁抑之直、未幾、四方之米輻湊、賤十之三。漕計之數常賦有定數、乃有歲糴代發之米、凋殘未盡復、乃有增起二分之錢。椿奏乞蠲其額、寬其期。又椿券壅滯、請



通以錢和糴侵民、請從市直。監司行部多從吏卒、擾州縣、椿單車以行、不將一輩、所至之州就取吏卒以爲使令。又前戒吏具所當問事、各條列爲籍、按之以問、無復相通爲姦。攜私錢自給、一不受餉。召爲吏部員外郎。頃之、因議郊赦、有蠻人讎殺並與釋罪者、椿白執政曰、此椿在廣西因李拭事一時有請耳、非可常行也、當刪。執政愧謝曰、都司無人。除樞密院檢詳諸房文字。時張說僉書樞密、會小吏有持南丹州莫曾表求自宜州市馬者、因說以聞。椿白說、邕遠宜近、官非不知也、故迂之者、豈無意哉。莫氏方橫、奈何導之以中國地里之近。請治小臣引致邊事之罪。說又建議募民爲兵、以所募多寡之數立爲賞罰之格、以勸沮州郡。椿白說、贛、吉、撫、漳、汀等州俗勁悍、募之易也。湖北瀕蠻、京西、淮南凋敝、恐有以捕爲募者、必驚擾、請毋限額。積兩事忤說、說語人曰、吾乃無一可耶。椿不自安、

驟請補外、上疑之、以問執政。參加政事鄭聞以實奏、上令諭以安職。未幾說罷。遷左司員外郎、兼權檢正、深嫉吏姦、每裁正之。輪對言、三衙諸衛、沿江、蜀漢之兵、有用之兵也、當益者也。諸州將兵、禁廂兵、無用之兵也、當銷者也。然銷之有道、死亡勿補、二十年之後、無復無用之兵矣。異時寧以沿江、蜀漢之兵分屯諸州可也。又言、穀帛本也、錢末也、今穀帛之稅變而爲錢、此穀帛所以愈輕而錢愈重。民何自而不貧。願正賦法、更祿令、多畀之以穀帛、而寡畀之以錢。請補外、除直龍圖閣、知隆興府、江南西路安撫使、改荆湖南路轉運副使、又改都大提舉四川茶馬。俄復歸湖南、建請減桂陽軍月椿錢歲萬二千緡、損民稅折銀之直、免戶部配鬻乳香。衡嶽廟火、椿言廟洊火、天寔厭其非制、請除壇以祭而不屋、毋違典禮、毋煩財力、不報。茶寇作、帥臣絀、椿被旨權湖南安撫。時江西兵已集、寇勢窘、

謀復乘虛徑湖南擣嶺外。公當敗衄之餘、兵備單弱、遣一將將數百人捍禦于攸、茶陵、安仁、郴、桂陽之境、指授合事宜、寇卒不能再至。事平、請諸朝歲分兵以戍湘陰、平江、益陽、龍陽產茶之地、召歸首言軍政之敝曰、近者鄂渚大軍三千、捕茶寇數百、亡失過半。小寇尙爾、如大敵何。上乃得盡聞外間軍事。除司農卿、椿會大農歲用米百七十萬斛、而省倉見米僅支一月或兩月、歎曰、眞國非其國矣。力請歲儲二百萬斛、以爲一年之蓄。又請自南庫給錢以爲糴之資、又請糴洪、吉、潭、衡軍食之餘、及鄂商之舟、及取江西、湖南北寄積之米、自三總領所迭輸中都。又言於制國用者曰、今倉庾所用一月營一月之粟、帑藏所給一句貸一句之錢、而米有豐儲倉之積、錢有南上庫之積。所謂積者、本非有餘也。移東就西耳。朝廷之與戶部遂分彼此、告借之與索償、有同市道。此陽城所以惡裴延齡者。

願懲佞臣之欺、革而正之。皆不果用。臨安擇守、椿在議中。參知政事李彥穎曰、李椿於人無委曲。上曰、正欲得如此人。遂兼權臨安府。異時守臣走權門、奉約束、民事一付吏、椿身親文牒簿書、不避浩繁、寡弱得伸、權貴屏息、私謁不至。故事、府有中人承受公事、守至必謁。椿弗謁、怒、因諭旨、故遷延以相沮傷。椿白廟堂、無所用承受。德壽宮送內人四輩鞠火事、實甲遺燼而誣乙、一問得情。市有火、近大閹之舍、怒救者不專、遣兩親卒至府庭趨驢。椿奏下兩卒大理、大理觀望、覆逮府吏卒。椿即委府職於其貳而自劾、有旨杖兩卒、釋府吏卒。杭僧跌蕩、憑藉私宇數百、因有姦事、椿悉取其宇以舍中都官。旋解府事、椿在府止三月云。因轉對、言易二五剛柔之義曰、以九居五、以六居二、位當之卦十有六、宜無不利而辭多艱。以六居五、以九居二、位不當之卦十有六、宜有悔咎而辭多吉。蓋君以剛



健爲體、以虛中爲用、用虛中以行其剛健。臣以柔順爲體、以剛中爲用、用剛中以守其柔順。陛下得虛中之道、以行其剛健之德矣。未見剛中以守柔順之臣。臨九二未順命者、剛中之臣也。遯六二固志者、柔順之臣也。願觀象玩辭、取九二剛中之臣、或未即順命、究其義而無虧、則信而任之。察六二柔順之臣、或挾情固位、而無所執守、則疏而遠之。執政滋不悅。久之求去、除江南西路轉運副使、還前職。辭行、上曰、卿未可以遠去。改知婺州、進職秘閣修撰。初至、訟牒日五百、久之猶二百、率閱竟乃退食。償戶部積負二十萬緡。詔衢、婺市皮角若干、而筋居五千斤。椿奏一牛之筋四兩、是屠二萬牛也。上爲收前詔。除吏部侍郎、言民貧多盜、非國之便、願令有司各疏冗食之可省者。監司疏一路、守臣疏一州、上于朝議而省之。上善其言、委椿疏婺州事上之。椿爲吏部、請薦舉陞改奏狀限半年而

達、以革欺奪。選人酬賞、許後收用、以勸勞效。戶部酒庫監官不許辟舉、以公銓選。秀邸館客周荃特注湖州戶掾、椿言荃未銓試、且衝待次人、閔選法、奏改員外置、不預事。上親慮囚、命椿與張掄叙囚徒。掄官承宣使、奏牘欲列名椿右、椿不可、白丞相、丞相令先掄。椿退謂權要恃恩不足怪、廟堂曲徇爲可畏。草奏言、臣固知承宣使序權侍郎之上、但使事以閣門副侍郎耳。所被旨臣名實在上、不可不正。章未達而事聞、掄亟罷。時上獨攬機務、羣臣媿免。椿言、天下國家譬之一身、君爲元首而在上、臣爲支體而在下、故有腹心之臣、股肱之臣、手足爪牙之臣、耳目口舌之臣。易經八卦亦曰乾爲君、爲首、坤爲臣、爲腹、六子爲足、爲股、爲耳、爲目、爲手、爲口。今陛下焦勞於上、百官逸豫於下。號令未允輿議、則曰出自上意。除授不厭衆望、則曰命由中出。大臣不弼、侍從不規、給舍不駁、臺諫不論、是人

君獨任一身之責也。願體乾剛健、委任責成、使腹心股肱、手足爪牙、耳目口舌之臣各盡其職。侍衛司兵因競而碎、僧寺新補軍頭乘忿而剽都市、朝廷欲^⑧不深治、椿舉張彝之事爲戒。言官彈劾不勝去職、所從風聞者坐黥隸、椿言非置臺諫爲耳目之本意。軍中結邏者以搖主將、攬摘騰播、椿請嚴階級之法。又極言閹寺之盛曰：自古宦官^⑨之盛衰、繫有國之興亡。其盛也、始則人畏之、甚則人惡之、極則群起而攻之。漢唐勿論、靖康明受之禍未遠。今畏之矣、未甚惡也。有以裁制之、不使至極、則國家免於前日之患。宦官亦保其富貴。願官置蠶室而限其數、復祖宗之制、官高者補外。又門禁宮戒之外、勿使預於人材政事。又嚴士大夫兵將官與之交通之禁。上聞靖康明受之事、頓蹙久之曰：朕幼亦聞此。納疏袖中。最後爲上極言邊備、以奕爲諭曰：敵有強弱、猶奕之有優劣。奕固以優劣爲勝

負、而又論先後焉。此易之所以貴乎豫。今春虜加無禮於吾使人、所以備之不可不豫。歷疏保淮之地有八：曰楚、曰盱眙、曰招信、曰濠、曰渦口、曰花縣、曰正陽、曰光。保江之地有四：曰高郵、曰六合、曰巢湖口、曰北狹關。若保淮之計、今之事力或未能及、則保江之計在所必守。吳事如此、近事如此。又襄陽宜屯一軍、應城以爲近援。又荆南屯軍、宜徙^⑩江之南、以備呂蒙取關羽之故智。又論瓦梁濡須之形便、上與往復商略。椿以病賜告、請奉祠、弗許。既朝謁、力請甚哀。上察其誠、惻然許之。除集英殿修撰、知寧國府、改知太平州。將發、賜尙方珍劑。當塗寔采石重地、上意屬以一面。椿請有機密章奏、願從通進司以聞、皆從之。既至、力圖上流之備。上言州管禁軍舊籍二千七百而贏、今裁一千一百而縮、欲募若簡橫江水軍千人、選將練習、緩急列艦以直裕溪、上可以援東關濡須、下可以應采石。又



言采石水軍舟多卒少、欲以步卒之半爲水戰之用、或擇利而進、則舍舟登岸、不專采石之備、而爲往來巢湖、必保濡須之計。又言沿江津渡宜隸南岸。時和州利算商船、開支港、首尾屬之江。椿曰、是自隳天險也。奏之、上亟遣塞之。居歲餘、年六十九、即請老。上初惜其去、章三上、乃以敷文閣待制致仕。越二年、湖南謀帥、兵役之後、思有以鎮安之。上以椿爲重厚、遂落致仕、進顯謨閣待制知潭州、荆湖南路安撫使。再辭不得請、乃強起。至亡幾何、悴者蘇、疑者釋、復如盛時。朝廷下府議復稅酒、椿定其議。府貫民物積不償者、椿至、一錢悉償之。斗酒千錢、亦不妄用。故人賓客助以私財。縣有羨賦、州竭取之、縣以不可爲、椿歸其半。民事必躬、剖決如縣令。然歲旱、振廩勸分、下一紙之令而定蠲租十萬、給常平米二萬、糶又數萬、民免流徙。前守創新軍曰飛虎、驩議未息、椿曰、長沙鎮壓蠻徼、枕湖

阨^①嶺、二十年間至三乞師、可無一軍。且已費縣官四十二萬緡、何可廢也。亦在馭之而已。椿善遇其將而責之訓厲、俄而技擊精、紀律明、隱然爲彊軍、異論帖^②息。上說進其將一官。郴故多盜、而又厚賦、民輸田租率一斛、官取倍之又八斗。椿曰、何自弭盜、請^③損之。令爲二斛而減其一斗焉。民稍寬。未滿歲、請復致其事、詔不可。章又三上、言極危苦、乃進敷文閣直學士致仕。年七十有三。椿年三十始學、易有得、不著訓傳、或先儒未言則述之。在臨安、奉詔擇靈隱寺主僧、椿復于上、願崇先王之道、正人倫之本、毋鬻度僧牒、撤無名佛屋、漸汰游惰、歸之農桑。椿莊重簡淡、巖然有守、泊然無欲、而其中夷易平直、廉不異衆、介不絕物、不比權貴、亦非矯厲。每曰不幸值要人、亦忌而敬之。上嘗亟稱其樸直云。椿嘗議渡江以來茶法之敝、謂官執空券市之園戶、州縣歲額配之於民、卒有賴文政之寇、請更

法。初廣西鹽法、官自鬻之、後改鈔法、漕計大窘、乃盡以一路田租之米二十二萬斛、令民折而輸錢、至五倍其估。米既爲錢、二十餘州吏祿兵稍無以給、則又損其估以市米於民、曰和糴、曰招糴、民愈病。久之、鈔弗售者三年。椿請改法從舊、除民折苗和糴、官民俱便。椿初在莫府、即建兩淮屯田之策、欲令兵民雜耕、以楚、泗、滁、濠之田給鎮江之軍、廬壽、無爲之田給建康之軍、光黃之田給江、池之軍、襄郢安、隨之田給襄郢之軍、俾之自耕、自收其利、軍分爲二、歲迭耕焉。庶幾地利闢、邊儲廣、軍士足。乾道之初、渡江四十年矣。北來諸軍、率老且病、於是立法汰去、養之諸州。然廩給不時、而諸州亦困。新軍未戰、而舊人已空。椿言已汰者宜善視之、毋使失職。未汰者可勿汰、毋給全廩。其子弟不願涅者、以爲效用、毋失疆壯、可以收士卒之心。寬州郡之力、壯軍伍之勢。又言中原來歸者、待之宜有別、

若河朔起事、摧敗而來者、山東旱蝗流徙而來者、逆虜入寇、避死而來者、與大將通約、先後而來者、皆吾赤子、其優之宜也、亦或可用也。然優之之恩、厚於正軍、以怠吾舊人、不可也。薄於降虜、以怒仗義來歸者、亦不可也。至於遼東逃而來者、符離降而來者、蓋讎敵之餘孽也、貸其生足矣。宜悉置之江上、諸軍下者、分配部伍之役、高者假以添置軍職之名、勿散之州郡、勿屬之軍馬、勿令出入於禁衛可也。男二人、毅夫、正夫。椿居官儉而法、官燭不入中門、家人不用公家供張。始至有新帟幕、必撤而藏之、以須迎新。去之日、不私一物、餽餉非律令所應受者、率歸之公帑。素篤風誼、同僚李燮死、有女棄民間、贖而育之、嫁之云。

楊萬里撰 《誠齋集》卷一一六

校記

①大小：原倒，據明祁氏澹生堂抄本《周文忠公集》乙。

②析：原作「晰」，據右引改。

③「字」下原有「卷」，據右引刪。

④岱：原作「貸」，據傳增湘校本《廬陵周益國文忠公集》

改。

⑤洛：原作「洛」，據宋浙江刊本《晦庵先生文集》改。

⑥糴：原作「羅」，據右引改。

⑦檢：原作「驗」，據右引改。

⑧宦：原作「官」，據右引改。

⑨嶺：原作「領」，據四庫本《誠齋集》改。

⑩完：原作「元」，據右引改。

⑪察：原作「詞」，據右引改。按：底本「詞」或爲「伺」之誤。

⑫後：原作「俊」，據右引改。

⑬謀：原作「謀」，據右引改。

⑭褻：原作「侵」，據右引改。

⑮強：原脫。糴：原作「羅」，據右引改、補。

⑯除直：原作「降眞」，據右引改。

⑰曲：原作「典」，據右引改。

⑱欲：原脫，據右引補。

⑲宦官：原作「官官」，據右引改。

⑳徙：原作「徒」，據右引改。

㉑令：原作「冷」，據右引改。

㉒阨：原作「院」，據右引改。

㉓帖：原作「估」，據右引改。

㉔請：原作「讀」，據右引改。

㉕弗：原作「費」，據右引改。



藏書

宋儒碑傳集 卷一一四

宋儒碑傳集卷一百十五

李楠 劉大有 王十朋 林之奇 蕭之

敏 李彥華

李和伯行狀

公諱楠、和伯其字也。其先居光州固始。唐末從王氏入閩、遂爲福州侯官人。公幼遲重寡言笑、已如成人、稍長、自力學問。兩舉於禮部、不中第、初無懟色、曰、吾知治吾事爾、得失何預焉。益自刻學。未幾、與其弟三人俱擢鄉薦、而公爲舉首。有司閱其文、無翰墨畦逕、詫曰、非今世舉子文也。已而復黜、乃謝絕世事、杜門讀書。鄉人子弟委束脩於其門者數百人。以苦學、得重腿之疾、遂不起。時紹興十有七年九月十有八日也。享年三十有七。公天資近道、復能從當世先生長者問爲學本末、故其學專以古人爲法。嘗曰、不用私稱、輕重自定。不用私斛、多寡自足。不用私心、是非自明。又謂、夢者心之鑑。

人之善、或以矜持矯飾爲之、至夢寐間、則毫髮不可掩。君子以夢爲鑑、自知心之誠僞。蓋所守之約如是。故其讀書、務求有益於吾心者、而不爲空言、而每謂、吾於甫田、得爲學之道焉。吾於衡門、得處世之方焉。陳平燕居、深念陸賈在前、而不見吾欲、以是瘠吾思。嚴顏曰、斫頭便斫頭、何怒耶。吾欲以是懲吾忿。此足見其律身之嚴。至於待人、則以謂道有並行而不相悖者、人之善則譽之、己不可以自譽。人之過則恕之、己不可以自恕。人之貧則矜之、己不可以自矜。凡議論之補於教者、大率類此。其於書無所不觀、而尤邃於春秋。自三傳及諸家之說、皆旁搜博取、以會其旨趣。衆說之所未安者、然後斷以己意。謂春秋之不可以凡例拘、猶易之不可泥於象數也。苟惟取必於例、與柱後惠文何異。故著書未竟、而其說之一二、學者已傳之。與人交、柔聲下氣、出於至誠。遇不可、即毅然正色。雖賁

育莫奪、或與之談世事、口吃不能多言。至剖析義理、娓娓不休、若駕輕帆、乘順風、若決流水於千仞之山而赴東海也。疾革、語人曰、壽夭在天、無足言者、獨念累吾父母耳。遂了然順逝。娶陳氏、有子一人、曰渙、女四人、長適林如璋、餘未行。某以外弟從公游、自卯角至于壯齒、如一日也。每與公語、未嘗不自失、其賴切磋^①之益爲多。往年陸教授死、繼而公歿、里人相與痛吾州之再失賢士也。某於二人實兼師友之重、故哭之過期而哀。葬有日、舅氏語某曰、知吾子深者莫甥若、汝宜狀其行、以請銘於立言君子。某承命流涕。今公之所學、於古者雖百未一試、而其善言行誠足以貽世範、謹掇其大概而實書之、雖親不嫌也矣。謹狀。

林之奇撰 《拙齋文集》卷一八

劉處謙墓銘

乾道八年十有一月五日、里之僉寔來、得余友劉

彥純書、謂余盍碣劉處謙之窆。處謙之行、彥純所狀。處謙與予好、方懷其賢、遽攬其赴、淹若以悲、不於予徵、予猶碣之、況彥純言耶。處謙諱大有、其先曰瑕、守安城卒。母魏夫人學仙、因壇于浮山、遂爲吉之安福人。曾祖益、祖臣忠、父仲珪、皆不仕^②。處謙於書無簡不狙、魯經漢緯、齊志虞初、鉤貫跌宕^③、既飫既酣。學林幽幽、我則宅之。人度以篋、我度以腹。吐爲厥章、博麗剗剗。韓而敷棗、有蔚有煌。三詣太常、輒觸報聞。將逕入帝闈、祇奉大對、展布其挾、不幸死矣。蓋七年二月十一日也。年六十一。配郭氏。男曰夔、績文是似。一女未嫁。孫男二人、挺振。孫女一人、皆幼。處謙孝友天得、少而喪其母歐陽夫人、事繼母蕭夫人、宗族後生有不知蕭之爲繼者也。伯兄亮、季兄偉、先卒、處謙實葬之。亮之子曰宏、曰字、弱不樹立、處謙實扶之。偉之子曰衡、曰大猷、處謙實多遜土田以畀之。大猷受業有聞、遂偕計吏。



儒藏

仲兄樞有女擇對、處謙以妻吉水名儒桃源縣丞李次魚直卿。處謙有文五百篇、曰遯齋野錄。將葬、夔以筵簞卦^④之、筮得黃岡石壁、日得八月庚申。銘曰、

有頌其容、有介其躬、有涵其中。爲澤爲淵、不雨不川、其人其天。

楊萬里撰 《誠齋集》卷一二六

龍圖閣學士王公墓誌銘

公諱十朋、字龜齡、姓王氏、溫州樂清人。曾祖信、祖格、父輔。父以公貴、贈左朝散郎。母萬氏、贈碩人。其先自錢塘徙、至朝散公始業儒、有聲。公少穎悟、強記博覽、爲文頃刻數千言。事親盡孝。其居鄉進止、取予必以義、後學師尊之。既入太學、多士皆推敬焉。太上皇帝躬攬權綱、更新政事、紹興二十七年、策進士于廷、詔對策中有指陳時事、鯁亮切直者、並置上列、無失忠讜、無尙諂諛、稱朕取士之意。既

而考官以公所對進、上臨定其文、以爲經學淹通、議論純正、可第一。及唱名、則公也。士論翕然稱愜。詔益嚴銷金鋪翠之禁、且以交趾所貢翠羽焚于通衢、實自公發之。授左承事郎、簽書建康軍節度判官廳公事。又詔王十朋係朕親擢第一人、欲試以民事、尙待遠缺、可特添差紹興府簽判。秩滿、除祕省校書郎、尋兼建王府小學教授。時北人且背盟、朝廷疑之、猶未敢誦言爲備。公因輪對、力陳其不可無備者。且曰、禦戎之策、莫急于用人、用人之要、莫先于人望。今若內若外、士大夫軍民咸謂有天資忠義、才兼文武、可爲將相者、有長于用兵、士卒樂爲用、可爲大帥者、或實散地、或守遠郡。願陛下起而用之、可以作士氣、寢敵謀。又言、三衙管軍、或久而不代、兵柄在手、利權財賂、又皆入其門。且其官至三公、樞密、所以節制諸將者、乃班其下、倒置如此、其能節制之乎。併及諸軍承受、皇城邏卒



之弊、其他指陳、率人所難言者。公之將有言也、人皆危之、而上特開納焉。既而罷諸軍承受、邏卒亦加戢、更定樞密與管軍班次、管軍亦引去、邊備益嚴、舊人相繼復用。自昔人臣論一事、或章十數上、或合衆力爭不能回、公以一言悟意而事皆次第罷行、于是天下仰上之聰明大度、虛懷從諫、非徒優容之而已。然大臣有不樂者、公亦數求去、除著作佐郎、罷其兼職。公以求去得遷、力辭不許、久之除大宗正丞、仍待次。尋得請主管台州崇道觀。今上即位、除知嚴州。未赴間、召對、公奏言、太上皇帝非耄期倦勤之時、而以天下授之陛下、賢于堯舜遠矣。陛下所以仰副太上付託者當何如。舜重華協于帝、然八元八愷、堯未及舉而舜舉之、四凶、堯未及去而舜去之。今社稷之大安危、民生之大休戚、人材之大進退、朝廷之大刑賞、其所當行者、宜若舜之所以協于堯而行之、以彰太上知子之明、

以盡陛下繼述之道。又言、今和戎與戰守之議未決、臣謂或戰或守、當相時進退、而和決不可議也。又言、右相虛位、天下拭目觀陛下此舉。必諸大夫國人皆曰賢、然後用之可也、不可非其人以失天下望。除司封員外郎、兼國史院編修官、又兼崇政殿說書、除國子司業。諸生固已迎服矣、而公于學校事、其細微曲折皆粲然前知、所舉措無不當人心者。會詔百官言事、公上疏以爲百官進退者、大臣之職、論思獻納者、侍從之職、正朝廷紀綱者、臺諫之職、今居其位者、往往不舉其職、宜有以董正之。雖然、此特人臣之職也、而人主有大職事、曰任賢、曰納諫、曰賞罰。其言反覆詳盡、切于時務。上覽而嘉之、即召公與工部侍郎張闡對便殿、從容論天下事甚衆。請退、復留者再、賜坐、賜酒、又賜御書。隆興元年四月、除起居舍人、改兼侍讀。公與左史同奏史職之廢壞者、其一起居注錄本進呈非

古欲勿進其二曰雖侍立而在殿東南隅未嘗聞天子德音如二府自有時政記其餘臣僚登對欲許令史官侍立其三曰後殿侍立而前殿則否于義無據欲前殿侍立其四曰直前奏事欲不必豫牒閣門及候班次皆從之越月除侍御史公素以剛毅正直稱天下至是人皆曰真御史矣公益自任以當世之重大抵以定國論正人心爲本而去其害治者不屑屑于細故也江淮都督府出師進取宿州敵悉衆來爭我師退守淮都督張公浚上表自劾公奏曰臣自總角在草茅間聞強敵入中國痛心疾首義不戴天臣素不識張浚聞其天姿忠義誓不與敵俱生實敬慕之頃以館職輪對首言敵情不測乞用浚等旣而敵果大入太上皇帝親征遣浚知建康府陛下即位因以江淮都督之任委之天下皆以爲當臣去冬被召至闕前後進對皆以爲恢復大計仰贊聖斷又乞陛下勿貳以

濟大業浚遣二將取靈壁虹縣宿州降三大將一月三捷議者皆服陛下任浚爲難及王師不利橫議蠭起臣嘗奏陛下用兵爲祖宗陵寢而舉爲二百年境土而舉爲中原弔民伐罪而舉與古帝王好大喜功開邊生事不同投機而進知難而退益當內修政事俟時而動陛下剛明果斷規模固已素定然異論紛紛不肯置浚今浚旣待罪臣豈可尙居風憲之職欲望正臣妄言之罪特加竄殛詔以公權吏部侍郎辭不拜乃以集英殿修撰知饒州乾道元年七月移知夔州尋除敷文閣待制三年七月移知湖州未幾得請提舉江州太平興國宮才數月起知泉州進直學士又移知台州公以病力辭且乞致仕乃復提舉太平興國宮七年三月除太子詹事召旨敦趣公力疾造朝上特御選德殿而公足弱不能趨召給扶減拜且賜坐又詔權免朝參又遣使以告及金帶就賜公三上章乞



致仕、乃詔以龍圖閣學士致仕。命下而公薨矣。寔七月丙子也。享年六十。上聞嗟悼、賻卹有加。令兩浙路轉運司給葬事。公積階至左朝奉郎、封樂清縣開國男。至是贈左朝散大夫。遺戒喪事毋得用佛老教。諸孤行之。以十有二月丙午葬公于縣之左原白阡。碩人賈氏有賢行。先公二年卒。至是合祔焉。男三人、聞詩、聞禮、皆太學生。孟丙早卒。公兩遇郊祀恩、皆奏其弟。故二子皆未仕。女二人、長嫁進士錢萬全、次許嫁賈梓。孫男四人。公立朝議論、出處大節、旣如此矣。初公以文學先天下、人謂其于吏事未必數數然也。而自爲郡佐、遇事不苟。民有訟久不決、多走諸司乞委公。雖文書填委、公一繙閱、不以付吏。審核情僞、參用經律、所與奪人皆厭伏。其治郡旣以廉潔公正率其下、間有爲不善者、則反復告戒、誠意篤至、人亦有恥。故未嘗按吏。爲文勸導百姓、以遷善遠罪之意、有爭訟則曉

以義理、多退聽者。故鞭扑罕用、事至立斷。其甚不得已乃推鞠、亦不淹繫、故獄屢空。未嘗遣官吏至縣而人素信服、事亦舉。利有可以予民者予之、輸租使自操概、而用度有節、故財亦足。月率兩諸學宮、延見諸生、從容誨誘、且以詢究郡政。饒久旱、公下車即雨。湖久雨傷稼、公入境即霽。每罷郡、士民涕泣遮擁不容去、或借留于部使者旣不得、則奔走道路、或越境不忍別者。泉人聞公喪、會哭于開元僧舍、又立祠堂以事之。近世爲政得人心、未有如公比者。公有梅溪前後集五十卷、尙書春秋論語孟子講義、皆指授學者、未成書也。公于文專尙理致、不爲浮虛靡麗之詞。其論事章疏、意之所至、展發傾盡、無所回隱。尤條鬯明白。蓋自漢氏尊用儒術而士或飾詐、或阿諛取容、至于守節死義、能爲國重、則未必以儒名者。世遂以儒相靳。若公之學問粹然、一出于正、謹守而力行之、義之所在、疾

趨徑前、未嘗以利害毫髮顧避。更閱夷險、特立不回、施于政事、左右具宜。信乎其有本如是也。嗚呼、此真所謂儒者耶。銘曰、

漢廷用儒、黯獨戇樸。淮南憚之、謀不敢作。謂公孫輩、發蒙振落。儒豈不用、其效奚若。孰知其故、鼠腊非璞。公之節義、視黯無忤。屹然立朝、作世郭郭。正色凜凜、危言諤諤。招之不前、麾之不卻。猛虎在山、衛及藜藿。出守四郡、治行皆卓。問胡爲然、非智之鑿。聖有謨訓、守約施博。惟其躬行、粹美無駁。道固如是、不由外鑠。于彼汲直、如玉而琢。我爲銘詩、以表儒學。人雖云亡、尙有渠獲。

汪應辰撰 《文定集》卷二三

拙齋先生行實

先生姓林氏、名之奇、字少穎、侯官人。世以儒學聞。朝議公忻取李氏、得先生以大其家聲。先生幼聰俊不凡、與外兄李和伯、迂仲如親手足、常稱伯也。

德宇如元紫芝、仲無間然叔度之陂。日夕相從、惟道藝是講、是究。名肄業之所曰兌齋。晨興誦讀經史、各以所見結衣帶而識之。逮暮相與參訂、是否而書之、謂之兌齋錄。西垣呂公入閩、公聞其以道學名世、乃與二李往候之。一見之頃、遂定師生之分。呂亦欣然、進而語之以嵩洛、關輔諸儒之源流、慶曆、元祐諸賢之本末。且欲以廣大爲心、陋專門之蒙昧、以踐履爲實、刊繁文之支離。致嚴乎辭、受出處、欲其明白無玷。致察乎邪正是非、欲其毫髮不差。先生之學、自是日以光明。紹興丙辰、以賢書將試南宮、西垣公餞以詩曰、我爲福唐遊、破屋占城市。城中幾萬戶、所識一林子。蓊然衆木中、見此眞杞梓。先生見重於西垣公如此。及先生西上、日夕以膝下溫清爲念。行至北津驛、慨然作詩、有耿耿一寸心、不能去庭闈之句。遂改轅以歸。先生愛親之心、重於利祿、非學識過人、疇克爾。先生聲名



由此益重、士類歸仰、如水赴壑。其知向正學、宗正論、皆先生指蹤之力。呂紫微猶子倉部公莅憲幕時、呂成公未冠、以子職侍行。聞先生得西垣之傳、乃從先生遊。先生嘗語諸生、以爲若年浸長矣、宜以古文洗濯胸次、掃其煤塵、則晶明日生。成公受教作文、主以古意而潤色之。先生每讀必擊節賞嘆、知其遠且大。紹興己巳、先生奏名春官、注長汀尉、未上。鄉樞陳公誠之薦、試館職、除正字。鄉樞薨、先生哭之曰、聲名一旦、徑達宸前、遂階試用、躡升羣賢。示知己之恩不忘也。再除校書郎、修神宗寶訓。改京秩、以三劄入見、首言堯舜執中不離仁義、次言宜革文弊、歸於忠實、又其次言毋尙莊老之學。高宗玉音曰、卿得事君之體。高宗御製損齋記、先生因奏三說、謂損思以益德、損用以益本、損華以益實、聞者是之。又言、王氏三經、大率爲新法地。晉人以王、何清談之罪、深於桀紂。靖康禍亂、考其

端倪、王氏實負王、何之責、在孔孟書所謂邪說、誅行淫辭之不可訓者。金人自秦檜講和二十年、或傳敵欲南侵、徙汴。先生作書抵當路、以爲、久和畏戰、人情之常、故必以和爲重。敵知吾重於和、故常以虛聲喝我、而示我以欲戰之意、非果欲戰。所以堅吾和、欲與之和、宜無憚於戰。以戰而和、其權在我。章聖澶淵之役、與契丹約和、中國終無北顧之憂者、用此道也。又曰、戰之所須者不一、而人才爲先。苻堅以百萬臨淮、晉兵止於八千、謝石爲大都督、謝幼度爲前軍都督、謝琰、桓伊皆領衆而前。衆寡不敵、而校其人才、則幼度足以吞苻堅、姚萇故堅望晉軍曰、是亦勍敵、何謂之弱。然則人才其可後乎。又曰、人才有三、一曰文采華麗、二曰持身謹密、三曰沈實有用。由前二者言之、平居無事、羽儀朝廷足矣。一旦緩急、往往如賈誼所謂見利則逝、見便則奪、苟免而已、立而觀之耳、非可與共患難

也。欲求可與共患難者、必得如龐士元所謂俊傑者然後可也。陳福公參贊戎幕、先生嘗以書論進取、以爲自巴蜀以臨中原、此不可易之常勢。桓溫、劉裕嘗欲浮江絕淮下梁宋、舉齊趙、平燕絕塞、徑造北廷、非不可以邀功。抑形不便、勢不利、雖淝水、赤壁之役、其勢可長驅而前、而卒不能有中原寸土者、不由進取之常勢故也。今王師小勝、不足喜、大計不可失、當假以歲月、先固吾圉、使不可犯、然後由進取之常勢而圖之、庶乎其可耳。福公深然之。先生在館三年、搢紳浩然歸重、行且柄用、倏以末疾告。朝廷惜其去、除貳宗正司、俾就醫於會稽。既而疾向平、先生丐歸閩、遂除泉舶。及抵官、益究心厥職。居亡何、力丐祠命、贊本路帥幕。適越忠定王史公鎮閩、與先生道舊、款曲加敬。有以私囑先生爲入言者、先生拒之力、而求不已、乃陽諾之。暨歸、以爲問、則曰、吾忘之。他日又云、則曰、吾忘之。如

是者數四、竟不之言、其胸中不撓於私如此。初、先生任館時、與于湖張紫微厚善。先生別後、張紫微未嘗不言及之。先生門人江清卿自張所告歸、張贈之詩、以爲吾友林少穎、讀書不計屋。又云、此君抱高節、雪柏照霜竹。造物乃兒戲、卧病在空谷。觀張之詩、無一字溢美、亦可謂大賢矣。先生家居、弟之邵之子子冲能嗣先生之學。士子會者、必集先生時乘竹輿至羣居之所、諸生列左右致敬、先生有喜色。或命諸生講論、孟是則首肯而笑、否即令再講。或令誦先生所編觀瀾集、而聽之倦則啜茗歸卧、率以爲常。未幾、先生病革、不浹日而逝。四方賢士大夫聞者悲愴。呂成公在官所、走介致奠、侑之以文、凡數百言、且曰、某未冠、綴弟子之列、期待之厚、獨出千百人之右。顧譴薄何以得此、實惟我西垣之故、施及其後人。培植湔祓、閔閔焉如農夫之望歲。齒髮日衰、業不加進、大懼先生之功力爲



儒藏

宋儒碑傳集 卷一一五

三七一

虛施、每覲然慚、惕然恐。又曰、惟當與二三子尊所聞、行所知、使先生之志猶有攷也。成公於先生可謂敬之至而不敢忽、感之至而不能忘、師生之義、宜如是乎。先生一子縝、以遺澤尉建陽、未上而卒。二孫亦知學。猶子子冲、字通卿、登科、初任南豐簿、次丞將邑。子耕、叟行藝、不愧前修、諸生避席常數百人。君子是以知拙齋餘澤之不泯。先生所著不一、如書說、周禮說、論孟、揚子講義、通鑑論斷、兌齋錄、世已傳誦。先生遺文二十餘卷、子冲之所哀集。及場遊錄、道山記、聞藏於子冲之家、世未之見。嘉定五年、郡博潘自牧、諸父嘗從呂成公遊、知成公之學原於拙齋、乃請于郡而祠之於學。耕叟實奉祠焉。拙齋先生之所自號、天下之士唯曰三山先生云。

姚同撰 影印文淵閣四庫全書本《拙齋文集》附

秘閣修撰湖南轉運副使蕭公之敏墓誌

銘

公諱之敏、字敏中、系出梁蕭氏、五世祖自豫章徙居江州之湖口。曾祖昇、妣譚氏。祖中山、妣陳氏。考固、業儒而不求仕、惟孜孜教子、後贈朝奉郎。母安人彭氏。公少好學、有濟時之志、李成勳九江、係累齊民如貫魚。公亦被掠、以書生獨免繫。會夜賊醉寐、公密拔其刀、斷民縛縱遣、然後遁去。時猶未冠、人皆奇之。登紹興十二年進士第、補左迪功郎、蘄州廣濟縣尉。未赴、辟襄陽府司法參軍。府捕強盜陳大漢等十三人、不獲、鄉民群行適符其數、巡尉執送官、不堪笞掠、皆誣伏。公約法疑之、白帥移獄。已而楚州獲真盜、闔府嗟異。戶部尚書張澄吏事精明、禮部侍郎陳桷號醇正、相繼來守、屬吏奉承不暇、惟公遇事爭辯不屈。桷常曰、司法突兀長身、他日真御史也。自是有蕭御史之名。二十年、用薦者陞從事郎、知歸州秭歸縣。縣產椒漆蜜臘、部使

科買無藝、公一切拒之。境有龍湫洞、歲旱、群禱雨不應、公禱輒應、民號知縣雨。循文林郎、調建康府觀察推官。舒州惡少張天錫父子五人夜投宿僧寺、僧不敢納。天錫踰垣殺僧、屢鞫不承、遷延數年、株連者多死。詔江東選官鞫治。公至、天錫即伏辜。武臣梁俊彥獻議增沙田蘆場稅、詔同金部員外郎莫濛按視、勢欲張甚、至叱責轉運使、公不爲動、稅以不增。金陵大府、貴游子弟多在焉、又常守以大僚、郡事綱舉而已。幕職曹掾官日夜縱飲歌呼、往往踰越法度、諸司略不執問。公獨介然居中、時箴切之。受納秋苗例、別給餐錢、公謝不受、守固謂公毋妨他人、公盡以修官廨。戶部尙書韓仲通以法律進、其居守也、御僚吏嚴甚、無敢可否事。民有刃傷盜桑者、盜投繯死、吏當其主故殺、獄已具、公抗執不書。仲通初大怒、已乃薦公改秩。時公在選調踰二十年、未嘗求知^⑧於人、將代、舉將猶闕、府僚

數十人列誦其賢於留守樞密王公綸、王公爲成之、改左宣教郎、知興國軍大冶縣。三十一年、完顏亮渝盟、上司籍民爲兵、日役數千人、冒雪植暗椿、鹿角寨爲防江計。公度不足恃、徒困民力、亟請散遣、上司不能奪、明年兵解、以疾去官。隆興改元、復知建寧府建陽縣。邑大難治、自政和以來、閱五十餘令、終更者纔七人。公至、務以禮義化其俗、民翕然順從、至繪像刻文紀公善政。乾道元年、轉奉議郎。未幾、賜五品服。三年、選爲幹辦行在諸軍審計司。未上、有詔舉御史。大臣以公名聞。五年四月、召對便殿、論正風俗。上曰、正風俗當何先。公曰、仁祖時、朝臣以危言讜論爲忠、偷合苟容爲恥、故風俗醇正。崇寧、大觀而後反是、在陛下示之好惡耳。上曰、誠如卿言。明日、除監察御史。六年、轉承議郎。七年六月、輪對、言、人心之於國猶身之元氣、今欲復土疆、其本在結人心。譬之良醫治病、必先護養元



氣乃可攻疾。此非書生空言。孫吳論兵亦出於此。上曰。所謂一曰道。而孟子亦云。不嗜殺人者能一之。又乞減冗費。省冗兵。上皆嘉納。八年正月。秀州華亭捍海堰成。命公按視。公還奏。縣之四鄉鹹水壞田。乞蠲賦稅三年。上從之。三月。臺諫官坐論執政奉祠去。上以公分察歲久。見謂直諫。擢拜殿中侍御史。公感激思報。爲上言。治亂安危由言路通塞。願備其官。假以事權。毋使風采消沮。又言。前歲浙西夏澇秋旱。江湖淮南歲比不登。民多流離。今正陽之月。天多沉陰。寒氣慘慄。是謂常寒。側身修行。茲其時矣。因繳進富文忠公熙寧初奏議。上曰。富弼所論誠實。有愛君憂國之心。公知上聽納。即疏言。漢災異策免三公。今宰相名任恢復。實爲持祿保位計。變理乖方。既不引咎。聞人言災異輒肆怒罵。陛下昨許六察言事。今乃令求實迹。專務蔽閉。闕聰明。故二三年來莫敢言其失。併條奏擅權

不公等事。上曰。卿所論甚當。可謂稱職。於是宰相上章請去。縉紳喜曰。鳳鳴朝陽矣。會宰相復留。乃除公直秘閣。提點江東刑獄。制詞有剛方不撓。質直而明。造膝之辭。有犯無隱。正人去國。豈朕所欲之語。蓋在職纔四旬。所論如此。直聲遂聞於天下。既至江左。郡守多要官。公舉刺各一人。上皆罷行之。所部肅然。淳熙元年。轉朝奉郎。召爲太府少卿。公奏。臣奉使無補。何以復召。上曰。思卿直諫耳。公奏。提刑並置文武。非是。互用一員足矣。又論經總制錢及額則賞。是誘其求增羨也。請罷之。又奏。諸路水旱頻仍。今歲僅得中熟。而七月錢塘風潮壞堤岸。居民死者數千人。災異在遠。尙不可忽。況都門之外乎。又九月壬子。距立冬纔數日。雷晝夜發聲。亦非休徵。惟益修德政。轉禍爲福。上曰。卿直諫之氣殊不衰。未浹日。兼權禮部侍郎。進司農卿。明年三月。遷國子祭酒。太學之士以得明師交相賀。

先是職事闕、請托紛然。公籍校定優劣、升補先後之格、遇闕則察行藝次第而授、奔競頓絕。舊制職事官例牒宗族補試、是歲公自以長官臨涖、令二子毋得入。其後學官子弟中國子生者皆駁放、始服公之先見。頃之、諫官論職名不當輕授、公適引疾求去。八月以本官提點浙西刑獄、陛辭奏曰、周公作無逸、大概言畏天、恤民、和衆、勤邦、儉家、省躬、罪己、有容德。具此八善、自然保壽無疆。今會慶節不遠、臣當需次阻奉萬年之觴、願以此言爲獻。又乞禁止外路獻羨餘、又錄蘇文忠公治道篇以進。曰、陛下旣常置軾文座隅、更願熟復此篇、以發聖學。上皆稱美、相與論無逸、蘇文數百言。三年、改除湖南轉運副使。道州江華縣稅重民瘠、大軍錢三千緡、上供米八百餘斛、力不能辦、公奏免之。四年、上以公舊嘗帶職、超進秘閣修撰。官吏畏公之正、爭檢身恤下、湖湘之民陰受其賜不可計。公方厲

志澄清、欲徧行郡邑、而病日侵、上書丐祠、得主管建寧府武夷山冲佑觀、敕牒未至、以八月丙戌卒於官舍、享年六十六。訃聞、致仕恩外特用前郊恩。又官其一子、蓋異數也。士大夫識與不識皆太息。鄉人至出涕相弔。六年正月壬午、葬於彭澤鄉加堰里小桂山之原。娶同郡項氏天裕之女、封安人。生三子、長曰穎、前卒。顗、碩皆能世其家。顗復以官遜其兄之子。四女、長適迪功郎筠州司戶參軍李景範、次適進士張元觀、次以疾居家、次適鄉貢進士曹彥約。孫男四人、必誠、必簡、必聞、必蕃。女三人。曾孫男一人。公剛塞強義、自其天性、處心積慮、公而不私。平居聞時政之善、若賢才進用、輒懽欣贊美、不啻如己有得。至遇姦邪欺誕之人、直欲折其頭角、身之去就禍福弗計也。所至以廉介稱、一毫不取諸人、其自奉有布衣所難能者。當官毅然、初若寡合、及與人交、表裏殫盡、終始如一、遇觴詠從



容時溫乎可親也。素無嗜好、惟聚書至數千卷、讀之不倦。每見歷代及本朝名卿奏議、剴切平正者、輒三復慨歎、耻躬不逮。尤慕司馬文正公之誠實、蘇文忠公之議論、二書手不停披、暗誦率數百言、樂爲晚進道之。其後正色立朝、不諂不瀆、淵源蓋有所自。紹興末、都民望爲右正言、公移書云、司馬公倅并州、猶上儲議、且以告諫官范蜀公。今足下實任言責、事有急於此者乎。民望欲薦公會卒。侍御史周操又欲拔公入臺、復以他遷不果。晚受上知、自謂可行所學、不忍用細故塞責、彈擊自宰相始。上深察其忠、顧勢不兩立、姑聽外補。未幾竟易相、召公、歲中數遷、而公病不能留、旋齋志以沒、豈非命與。初、公仕不逮親、故於同產尤極友愛、常分俸給二弟。力教弟之美、後亦登進士第、今爲奉議郎、知蘄水縣。公雅留意於易、博問精思、所得深遠。暇日喜賦詩、未第時、都昌宰郭彥參、尉李鼎頗工

詞章、與公相琢磨、詩名遂著。公沒、二子旣哀遺文爲三十卷、復以蘄水君所狀遺事不遠千里、謁銘於予。予昔分教金陵、實與公同僚、方他人游戲相追逐、必過予清談終日、於今蓋二十年、中間雖同朝者再、而無前日之款矣。聞公云亡、殄瘁是悲、豈特念舊而已哉。銘曰、

維昔陽城、安貧篤學、振迹言路、鳳鳴謬謬。乃官成均、士化端慤。乃刺道州、聲隱衡岳。天生斯人、艱兮難數。侃侃蕭公、文敏而樸。或塞或通、守道彌確。礪兮眞清、蛻於衆濁。以配前修、誰謂其邈。銘藏諸幽、亦詔後覺。

周必大撰 《省齋文稿》卷三三

藏脩先生李公墓銘

寶慶元年、余待罪太史氏、新通判武岡軍、李劉移書言曰、劉之王父年三十、築室山中、以藏脩名堂、隱居樂道、凡五十有餘年、鄉人號曰藏脩先生。以

紹熙三年正月□日卒三月□日葬於所居十里盧墓之原。取樂安縣進士周光女，有賢德，先四十年卒。子男四人，琚、瑤、玖、琥。孫男十有四人，師古、萬里、好古、懷古、衷古、學古、復古、振古、希古、劉存古、從古、博古、曼古。孫女三人，適進士羅邦達、周山父、羅煥。曾孫男女八人。劉於諸孫爲晚出，王父孩提授書，教以孝弟謹信，餘力學文。王父卒之十七年，劉以貧求仕，始獲齒名於嘉定元年進士籍。今又十有八年，墓門之石未識，大懼因循歲月，無以光昭令德。公知我者也，敢徼一言之惠。嗚呼！余於公父何敢以它詞爲解，乃爲之銘曰：

公諱彥華，仲實其字。李氏之先，世居成紀。唐支十三、曹明在季。黎國公傑，明之次子。傑生三男，曰紹、承胤^⑨。武虺其宗，紹流嶺外。胤歸京師，曹爵濫繼。宣言於人，紹承乏裔。紹實生濟，濟生穎士。踰嶺西歸，仕不得志。南奔豫章，以章名子。昌黎韓公銘成王

誌。或亡或微，曹始就事。益微其詞，爲奪曹諱。克儉生懋，統承于章。始自豫章，遷撫宜黃。懋生益柔，時允實承。時允生興，興復生英。又遷崇仁，白沙是營。曰嗣務本，爲公高曾。侯爲公祖，持爲公考。考登辟雖踰冠而夭。從祖曰儀，與從兄浩，言論風指，前脩是蹈。歐陽公徹、吳澥沆氏，與嚴拙翁，皆公同里。受書于嚴、歐，吳爲友。內外熏烝，學成行美。歐公上書，請誅六賊，與陳伯陽殞命權慝。舊交夙好，辟影藏跡。公與同舍，樸村窳窳。家故藏書，至萬餘軸。矻矻晨夜，鉅心劇目。雞初鳴興，奉母飲食。退即危坐，聖賢是即。天文地理、禮樂律曆、兵謀方伎，毫分縷析。體習旣精，晚而有述，曰藏脩堂。與巴谷集、經傳辨疑、禮樂遺錄，合而成書，卷三十六。二吳著書，公與有力。吳吏部曾，編年謾錄，亦嘗從公，諮疑辨惑。先疇素薄，母陳好施，養志不違，惟躬自瘁。雖一衣衾，或數十載，然嘗約飭，以教子弟。其言有曰：齊明在



藏書

內盛服在外所以脩己。母陳早嫠養不遺跬。九十
六終君七十矣。人以爲難。執喪盡禮。晝之所爲。至
夕必紀。有不可紀。則如其已。行年九九。盡道而死。
士雖不遇。碩蹇亨否。與其徇物。無得於己。嗚呼仲
實。又焉取彼。

魏了翁撰 《重校鶴山先生大全文集》卷七九

校記

①嗟：原作「嗟」，據文意改。

②仕：原作「位」，據四庫本《誠齋集》改。

③宥：原作「巖」，據文意改。

④卦：原作「封」，據四庫本《誠齋集》改。

⑤副：原脫，據明祁氏澹生堂抄本《周文忠公集》補。

⑥祖中山妣陳氏：右引作「祖仲山妣徐氏」。

⑦群：傳增湘校本《廬陵周益國文忠公集》作「郡」。

⑧知：原作「之」，據右引改。

⑨胤：原作「嗣」，下有注云：「以犯藝祖諱下字，改曰

嗣。」則本是「胤」字，今回改。下同。

宋儒碑傳集卷一百十六

陳俊卿

少師觀文殿大學士致仕魏國公贈太師

謚正獻陳公行狀上

本貫興化軍莆田縣感德鄉胡公里。曾祖贈太師、沂國公、妣黃氏、贈徐國夫人。祖贈太師、蜀國公、妣李氏、贈蜀國夫人。父贈太師、冀國公、妣黃氏、贈越國夫人。卓氏、贈冀國夫人。公諱俊卿，字應求，其先世蓋出潁川。晉永嘉之亂，太尉廣陵郡公準之孫西中郎將遠南遷，泉江始爲閩人。其居莆田者歷唐、五季，而太尉十九世孫眞、二十二世孫嶠、沆，始斑斑見於碑碣。然世遠，不可得而詳矣。公之家自沂公以來，皆以好施周急聞於鄉里。公生而莊重，不妄言笑。七八歲，自知爲學。冀公薨，執喪如成人。少長益自刻厲。紹興八年，以鄉舉試禮部，知舉朱公震、張公致遠得其文，讀之，歎曰：「公輔器也。」將貢

首選，而同列有異議者，乃屈居其次。授左文林郎，泉州觀察推官。服勤職業，不以科第自高。同寮宴集，常謝不往。一日，郡中失火，太守汪公藻走視之，則諸掾屬方相從飲某所，而公之興卒亦或假之以行。於是例以後至被詰責，公亦唯唯摧謝已而汪公廉知其實，始召公慰諭，且問其故。公曰：「某也不能止同寮之行，而又資其僕御，亦安得爲無過。且是時，公方盛怒，某也其忍幸於自解而重人之罪乎？」汪公歎服，以爲不可及。秩滿，改宣義郎。故事，第二人再調，卽爲館學清官。是時秦丞相檜用事，察公意不附己，乃以爲南外敦宗院教授。終更造朝，中途心悸，夜不得眠。公曰：「吾它日未嘗如此意者，吾親其不康乎？」翌日馳歸，則冀國夫人果以是日屬疾矣。遭喪，服除，添差通判南劍州。未行而檜死，乃以秘書省校書郎召。在館歲餘，非時未嘗一詣東西府。時今天子方爲普安郡王，高宗命宰相



擇可輔導者、宰相爭欲置其所善。高宗不可、命擇館職端厚靜重者爲之、乃以公對。除著作佐郎、兼普安郡王府教授、尋遷著作郎。在邸二年、講說常傳經義以規戒、言簡理精。以王好鞠戲、誦韓愈之言以諫、王敬納之。王左右親吏故多與諸府寮狎、公獨正色出入、未嘗私交一談。歷司勳、禮部員外郎、樞密院檢詳諸房文字、除監察御史。始、公嘗與國子監丞朱倬鄰居、朝夕往來。及倬爲言事官、公一賀之、遂不復往。倬以是敬公。既遷中司、欲薦以爲御史而先以告、公力辭之。後數月、汪徹爲殿中侍御史、乃密以公名進。命下、然後謝公曰、恐公復辭、不敢告也。俄遷殿中侍御史、首爲上言、人主以兼聽爲美、而存心必本於至公。人臣以不欺爲忠、而論事必達於大體。反復推明、引今附古、詞指溫厚而正直之氣凜然不可犯、上固異之。又論、御下之道惟恩與威、不可偏廢。今主兵之官率無遠慮、

惟事驕侈、其志不過聚斂以肥家、其術不過交結以固寵、其所以侵漁百姓、刻剝軍士、陵駕州縣、輕侮朝廷者、無所不至、而任事者未嘗一誰何之、則將不知有威矣。養兵之費月計百萬、而虛籍太半、不可稽考。軍士疲於私使、困於回易、大率以奉主將之私、而所得衣糧隨手尅盡、羸瘦單薄、有可憐之色、而主將恬不之恤、則士不知有恩矣。陛下誠有以抑將之驕而警其惰、作士之氣而收其心、則紀綱正而號令行、三軍之士孰不感戴上恩而效死以報國者哉。上亦稱善再三。公遂劾奏韓仲通本以獄事附秦檜、冤陷無辜。今檜黨盡逐而仲通獨全、何以懲惡。劉寶總戎京口、紀律不嚴、哀斂特甚。朝命分兵屯戍、輒拒不遣、亦不可不治。於是二人皆抵罪。公論快之。宰相湯思退秉政無狀、公論沸騰。會冬無雲而雷、公與同列共奏論之。同列爭掎摭苛細、公曰、宰相上不當天心、下不厭人望、是

固當罷、何以它爲。乃獨奏言思退文藝有餘而器識淺暗、不足以任天下之重。詔罷思退、以大學士奉外祠。同列復議、請褫其職。公曰、事貴適中而已。思退非有大罪、特以不堪宰相而罷之、則祖宗時免相恩禮未可殺也。且思退雖不才、然視沈該、不有間乎。今該猶以大學士家居而思退顧不得、則執法之地所以議賞罰者偏矣。遂不復論。金虜自燕徙汴、謀遂入寇、中外震恐。而楊存中久握兵柄、尤以哀歛交結得幸、士卒嗟怨。三十一年春正月、既望大雷雹、已而雨雪凝沍、旬日不解。公引春秋所書雷雪之變、且言、當時兩異相距八日、其變有漸、聖人猶謹而書之。矧今一日並見、其異甚矣。蓋雷雹、陽也、雨雪、陰也。雷而復雪、是陽不能制陰、陰桀得作出而爲物害也。以類推之、是爲夷狄將陵中國、臣下將竊威權之象。所以應之、恐非虛文常禮所能及也。今虜勢駸駸、蓋已可見、備禦之計未

知所出、而大將官保傅、總兵戎、殖貨財、事交結、奪民利、壞軍政、其力足以奔走死士、其威足以杜塞衆口、道塗仄目、中外切齒久矣。養之不已、將有指大於股之患。此最不可不深慮。至於開言路、用人望、別能否、正紀綱、信號令、廣惠澤、亦所以應天消變之術而不可緩者。惟陛下并留聖意。因遂劾奏存中罪狀、語益切。天子爲罷存中、奪其兵。公又言、去冬無雲而雷、今春已雷而雪、間者日闇無光而淫雨不止、前日又有地震之異。變不虛生、實應人事。豈賢才有未用而賞罰有未當歟。備禦有未修而賦歛有未節歟。近習有撓權而大臣無任責者歟。左右阿諛者衆而忠讜之論不聞歟。何嘉氣之不應也。傳曰、聽之不聰、厥罰常寒。願下求言之詔、以審政事之闕、而深詔大臣、念咎引慝、以答天戒。又言、部使者多不舉職、請令自今臺諫論列一道歲中四人以上、臺司檢舉、議罪以聞。又言、近世例



以小廉曲謹文采醞藉取人而於識量深沈智略慷慨之士未有以爲意者所以多士盈庭而臨事常有乏才之歎謂宜廣收博采舍短錄長用之繩墨之外責以事業之成勿拘小節勿課近効庶其有得以濟時用會詔^②以災異數見令臺諫侍從條上計策公言虜人窺伺其意不測而兩淮之藩籬未固荆襄之聲援不接宜擇近臣有威望者盡護荆襄諸將之兵而假以它用陰遣間使往來江上密問諸將計策或令各遣腹心赴堂稟議使諸大臣從容延問詰難往復以盡其情參酌去取以定其論庶幾緩急內外相應不失事機其它則選練犒賜以作士氣擇吏蠲賦以輯鄉兵修城築壘以嚴保障亦事之不可緩者而總其大要則在朝廷處置得宜有以服人心者而推其大本則又在陛下益堅睿斷先定規模無以憂疑自爲退沮而已又言命令之出不可不審內外之任不可不均又

言今日之急在節財用而冗官妄費實爲今日財用之大蠹且如添差總管鈐轄一郡或不下十數人月俸大者百萬小者不下五六十萬公使人從費又倍之其間又有連爲數任而不替者有更歷數州而不已者宗戚生朝賜物尙依承平舊例外命婦亦請內命婦俸給有旨罷敕局而或兩年不罷有旨減吏員而三省密院御史臺不減大禮浮費以巨億計樂工五百人教習百口食錢至二萬緡修輿服器仗不過增飾而戶工兩房兩部將作軍器兩監文思車輅兩院以至儀仗等庫官吏添給食錢日五六百者不知幾人自四月朔以至禮成爲錢不知幾許大率一有興爲無問大小稍有關涉行遣文書一字以上無不支食錢者而一歲之中無慮以十數凡若此類乞令後省取索立限裁損而陛下以身先之始自宮掖如寶元慶曆熙寧故事則邦用足民力寬而人心不患於不服矣

又言、諸州將兵例供私役、教閱不時、緩急不堪倚仗。故今諸州往往有大軍留屯、皆截上供以給其費。宜詔有大軍處即令將兵通共教閱、無大軍處即令旁近大軍分遣將吏就州教之、勸以厚賞、禁其私役。異時習熟、則所屯大軍漸可抽回、以省截留之費。是時虜人侵軼之勢已形、而江淮備禦之方未講、大小惴惴、莫敢發言。公又力言宜蚤置統帥、使擇間探、遠斥堠、謹烽火、修城池、以待其變。而當是時、莫有堪其選者。中興舊臣、唯張忠獻公獨無恙、而方困於讒口、謫居湖湘、中外物情翕然屬之上、心益以爲疑、不肯用也。公乃上疏曰、竊惟今日事勢、可謂危且迫矣。而竊聞之軍民士夫之論、則皆曰、張浚素懷忠義、兼資文武、且諳軍旅之事、可當閩外之寄。臣素不識浚、且亦聞其爲人意廣才疏、其初雖有勤王之節、安蜀之功、然陷陝服散淮師、其敗事亦不少。特其許國之忠、白首不渝。今

居謫籍、杜門念咎、未嘗不追悔前非、老而練事、殆非復前日浚矣。今事勢危迫如此、而在廷之臣又未有能過之者、雖有射鉤斬祛之仇、猶當置而不問、況浚嘗爲陛下腹心之臣、初未嘗有此隙乎。竊聞譖者言其陰有異志、又以放棄之久、疑沮益深、若付以權、恐漸難制。臣請有以明其不然。夫浚之所以得人心、伏士論者、爲其有忠義之素心也。若其有此、則人將去之、誰復與爲變乎。臣願陛下察其讒誣、略加辨白、且與除一近郡、以係人心、庶幾緩急之際可以相及。疏入未報、因請對力言之。上意乃悟、首肯久之。內侍張去爲陰沮用兵之策、且陳避狄之計。公遂抗言、去爲竊弄威權、虧損聖德、今復沮撓成算、請按軍法斬之、以作士氣。上愕然曰、卿可謂仁者之勇矣。明日、除權兵部侍郎。後數月、竟用張公守建康如公策。既而邊報益急、王師始北渡江、屯據要害、而用兵之意猶未決也。公言、



今守禦略備、士氣亦振、以此待敵、何慮不勝。若得虜人便離巢穴、送死而來、則中原塗炭之民、與其種類怨叛之衆、爭欲起而圖之者、何可勝數。但以吾之重兵與之相持、而別遣銳師分出間道、以擣其虛、則虜之成禽必矣。臣之所慮、猶恐其知吾有備、僞爲甘言、復以和議誤我耳。然彼或出此、而吾能益嚴備禦之計、修築營壘、大開屯田、以爲久駐之基、俟其退歸巢穴、然後姑與之和、此則猶爲中策。但恐淺謀之士、苟於目前、更勸陛下受其甘言、反以今日之計爲非是、而遂歛兵增幣^③、墮其計中、則爲無策而大事去矣。虜兵尋果渡淮、公受詔措置浙西水軍、李寶因之、遂有膠西之捷。公因勸上進幸建康、號令諸將、指授方略。上然其計、戒嚴未發、而虜軍自亂、殺其主亮而歸。詔公措置淮東堡寨屯田、公行所過、勞來安集、流逋稍復舊業。虜中更立新酋、遣使來申舊好。朝廷方議酬答之宜、而

議者或謂得故疆者、實利也。正名分者、虛名也。朝著多附其說。公聞之、亟上奏曰、陛下前日和戎之計、蓋非得已。今此使來、正審事機、正名分之日也。若以得故疆爲實利、則得之而未必能守、是亦虛名而已。豈若因此先正名分、名分一正、則雖未能即復中原、遽謁陵廟、然亦足以作頽墮之氣、慰神靈之心。矧今虜人挫衄之餘、急於自定、汲汲求和、情亦可見。是豈能復以強大之勢、取必於我、如前日之爲哉。當此機會、臣以爲非獨名分可正、而歲幣亦當可減。惟在朝廷先定規模、有以俟之、則復中原、謁陵廟、亦不足以爲難也。公又以爲和好果成、尤不可以無備。因陳選將練兵之策、并圖上兩淮戍守屯田事宜、所以爲保江之計者甚悉。又請戒諸將、申嚴逃叛之法、毋得互相招誘。又請擇文臣有膽略者、以爲諸將參佐、使察軍政、除宿弊、因習戎務、以儲將材。又言、淮北流民自相剽略、吏不

能禁。宜加區別、撫其柔良而收其暴桀者、畜之軍中、束以紀律。至於虜中形勢、彼雖或能言之、然皆務爲可喜之言、以冀投合、不可輕信。而吾之虛實、險易、彼皆得之、則又不可以不爲之防。大抵但當益增屯兵、多遣間諜、以俟得其情狀之實、然後乘其機會、量力以應之耳。今天子受禪、公入對、陳戒懇切、且言今日之事、固當以嚴守備、練將卒、戒貪暴、省浮費、信賞罰、抑僥倖爲急。然此事也、非事之本也。清心寡欲、屏遠便佞、使姦聲亂色、不留聰明、淫詞詖行、不接心術、則庶乎用志專而見理明、功業可就而邪正可分矣。又言爲國之要有三、曰用人、曰賞功、曰罰罪。而所以行之者一、曰至公而已。故古人善爲國者、賢不以讎而棄、愚不以親而用、賞不以遠而遺、罰不以近而免。蓋不敢以一己之私廢天下之公也。若以生殺予奪、人莫予違、而惟好惡喜怒之私是徇、則不惟示天下以不廣、而其

偏黨反側之害於政事亦且無不至矣。昔太祖皇帝坐太寧宮、使闢重門而直視之、曰、此如我心、少有邪曲、人必見之。此陛下家學也。願留聖意、以幸天下。七月、遷中書舍人、尋以本職充江淮東西路宣撫判官、兼權建康府事。時上初即位、慨然有復境土、雪讎恥之志、方屬張忠獻公以閩外之事、顧在廷無可使佐之者、以公忠義奮發而沈靜有謀、故有是命。公力辭建康不允、乃辟材吏通判府事、分理民政、而獨與張公協規并力、大飭邊備。是時蜀漢之兵北征秦隴、雖頗略定城邑、而勝負久不決。公爲張公言、請襲虜以分其勢、張公然之。公因上奏曰、吳璘孤軍深入而虜人悉衆拒戰、兩軍殺傷雖略相當、然久而不決、則危道也。兩淮戰士今雖且當固守、然事勢已急、豈可不爲牽制之舉。臣竊以爲莫若分遣舟師、出其不意、直擣山東、中原豪傑宜有應者、則彼必還西師以自救、而璘得乘

勝^④以定關中。我又及其未至、長驅深入、潰其腹心、不世之功可一旦而立也。若其有備、回輒轉施、信宿可還、彼亦將如我何哉。此不唯救急之計、實因敵制勝之一奇、不可失也。奏入、會朝廷有力主和議者、已詔璘班師、而公計遂不行、識者恨之。公又極論軍中虛籍冗占、擺鋪營田差借之弊、且請戒諸將毋得以回易資饋餉、結權要。十一月、召入奏事。既對、遣中使面賜金帶。會給從臣筆札、條上時弊、公陳十事：一曰定規模、二曰振紀綱、三曰勵風俗、四曰明賞罰、五曰重名器、六曰遵祖宗之法、七曰杜邪枉之門、八曰裁任子之恩、九曰限改官之數、十曰蠲無名之賦。其杜邪枉之說曰：比年以來、左右近習稍有以名聞於外者、士夫奔走趨附、將帥納賂買官、遠近相傳、道路以目。願深察而痛懲之、無使或爲聖德之累也。隆興改元、都督府建、改參贊軍事、力辭建康得免、別除禮部侍郎領職。張

公初謀大舉北征、公以爲不若養威觀釁、俟萬全而後動。張公從之。會諜報虜多聚糧邊邑、諸將以爲如此則其勢秋高必來、不可當。不若先其未動、舉兵擊之、以破散其業。張公又以爲然、乃請於朝而出師焉。幕府次盱眙、大將李顯忠、邵宏淵連下虹縣、靈壁、遂將乘勝長驅。公曰：盛暑興師、深入敵國、皆兵家所忌、宜亟還。不然、師老力疲、遇敵恐不可用也。張公然之、亟以檄召顯忠班師。則顯忠等已進破宿州、而虜大發河南之兵以來矣。顯忠身出鏖戰城下、殺傷過當。會夜、兩軍不相聞知、各驚潰去。而道路流言、以爲官軍失利、數萬、賊且乘勝南來。素主和議者又侈其說以搖衆心。公從張公駐兵不動。潰兵聞之、稍稍來歸。計其實所亡失數千人。張公檄公亟入奏、且勸上勿爲浮議所搖。公見上、具道其事、且曰：勝負兵家常事、願勿以小衄而沮大計。上曰：朕任魏公不改也。張公抗章待罪、



公亦奏請從坐、上不得已、詔皆貶秩兩等。湯思退復相、公以嘗論思退請罷、不許。諫官尹穡陰附思退、建議罷張公都督使、復以宣撫使治揚州。公上疏曰、朝廷果以浚爲不可用、則罷之而更屬賢將可也。若猶欲責其後効、則貶官示罰亦古法也。今乃使之去都督甚重之權、居揚州必死之地、凡所奏請、臺諫又從而沮之、如此則人情觀望、無不解體。浚方爲賊餌之不暇、尙何後効之圖哉。且浚近畫兩淮備禦之計、惟保險清野、可挫賊鋒、陛下既許之矣。今議者之言乃如此、雖浚即以家行、有死無避、然浚負天下重望、一有蹉跌、人情震駭、臣恐江上之事將有不可測者。議者但知惡浚而欲殺之、乃不復爲宗社計、此陛下所宜自憂也。願下詔書戒敕中外、相與協濟、使浚得以畢力自效、贖其往愆。如度其終不可用、則請先治臣阿黨之罪而後改圖、無使浚它日復誤使令、而臣亦得不言之

罪也。疏上未報、公又奏言、陛下必以浚爲不可用、則請速詔中外、別求智勇可代浚者而拔用之。不然、則幸且勿加沮撓、使得支吾、畢此殘歲。詞益懇切。上覽奏感悟、即詔張公復開督府、卒召相之。然不數月、竟爲思退、穡等所擠、遣出視師、遂不復返。而公亦累章請罪、明年五月、乃除寶文閣待制、知泉州。復以自請、提舉江州太平興國宮。及思退貶死、上乃思公言、而太學生數百人伏闕下拜疏請起公。詔復命知泉州、未至、召赴闕。以乾道元年正月入對、上撫勞再三。公引歐陽修、司馬光之言、極論朋黨之弊、以爲紹聖、崇觀以來、此說肆行、實基靖康之亂。近歲宰相罷黜、則其所用之人不問賢否、一切屏棄。此鈎黨之漸、非國家之福也。願詔大臣一以大公至正爲心、並用恩仇、兼忘物我、唯才是任、毋恤其它、則植壤羣散而人人得以自效矣。又奏、虜騎旣退、兩淮屯田似不可緩。前此行之而



不見效、其失在於任人不久而責效太速耳。爲今之計、莫若擇二大將、使以建康、鎮江之軍分屯兩淮、而就兼一路之帥。使擇軍中裨將、各以所領分屯沿邊諸州、而就兼一州之守。境內財賦得自用、以爲屋廬耕牧之費、或募新軍、或取舊人之不入隊者、授田使耕、不盡其利、則人爭趨之、遲以數年而成效可睹矣。又勸上察羣情之所甚欲者行之、所甚惡者去之、捐其所甚愛、謹其所可戒、審真僞、辨忠邪、從諫任賢、以格天心、以作士氣、庶幾戎狄畏威、不敢侵侮。除吏部侍郎、尋兼侍讀、同修國史。嘗言、本朝之治、惟仁宗爲最盛。願陛下治心脩身之道、專以仁宗爲法、而立政任人之際、必稽成憲而行、則慶曆、嘉祐之治、不難致也。又言、今日積弊千條萬端、朝廷非不知之、而不能革者、蓋大臣受任不專、用事不久、不能以一身當衆怨、而風俗頹弊、人各有心上所建立、有不便於己者、則興訛造

訛、百計傾搖、必罷之而後已。願詔大臣力任此責、合羣議而討論之、力行堅守、必冀有成、則風俗變而紀綱立矣。又言、人才者、國家之命脈也。而論人才者、又當以氣節爲主。祖宗盛時、作成涵養、名公巨人、傑立角出、爭以氣節相高。頃自蔡京、秦檜用事以來、摧喪既略盡矣。太上更化之初、力救其弊、而士狃見聞、未能盡革。臣願陛下深以爲念。氣節之士、雖有小過、猶當容之。佞邪之人、雖甚有才、猶當察之。庶幾有以作新人才、興起頹弊。於是上顧公甚厚、蓋有意於大用矣。會錢端禮起戚里秉政、駸駸入相、館閣之士相與上疏斥之、皆爲端禮所逐。工部侍郎王弗陰附端禮、建爲國是之說、以助其勢。公抗疏力詆其非、且爲上言、本朝無以戚屬爲宰相者、今若此、懼不可爲子孫法。上以爲然。端禮聞之、密遣門下士語公曰、聞兩宮皆許相已、即相當引公共政。公不答、退而終日不樂。謂所親曰、

此言奚爲至於我哉。翌日進讀寶訓、適及外戚事。公又極言、本朝家法、外戚不預政、最有深意。陛下所宜謹守、無使天下後世有以此議聖德者。上首肯久之。端禮之客亟馳報之。端禮由是深忌公。諷使求去。除寶文閣直學士、知漳州、改建寧府。中書舍人閻安中封還詞頭、力請留公。命復下。安中不能力爭、然亦竟得罪以去。而端禮卒不相。時右正言龔茂良方以排擊近習黜守建而未上。公言、茂良前以言事補郡、且臣故交、今往奪之、於義有不安者。不得請、乃之官。在郡期年、治以寬簡、省節廚傳、官無浮費。然人服其清、亦莫之毀也。三年、執政請徙公帥江東、上稱公鯁亮、俾召赴闕。既至入對。上諭公曰、卿前去國、蓋有譖卿者。卿今日無一語自辨、朕益服卿厚德也。乃授吏部尚書。入謝之曰、奏曰、銓綜事有成法、臣固當謹守。第愚淺之見、或有不逮、願陛下時警敕之。蓋君臣之分雖嚴、而情

不可以不通。上曰、卿言是也。朕或有過、卿亦當盡言。公曰、唐太宗唯能導人使諫、所以致貞觀之治。今陛下導臣使諫、臣敢不奉詔。上曰、朕每讀太宗事、未嘗不慕之。觀德宗之忌刻、不樂受言、亦未嘗不鄙之也。公對曰、聖言及此、天下幸甚。遂從容爲上言、今日人材衰少、士氣不振、若必求全責備而後用之、則遺賢多矣。要當君臣一意、公聽並觀、略人細過而取其大節、去己私意而徇夫至公、則人材彬彬出爲時用矣。又言、爲政而不行甚者、必改而更化、此先儒之格言也。然臣竊以爲一時之敝、政可更、而祖宗之成法不可改也。就所當更、亦必計之審、議之熟、然後可更。既已更之、則當守之不變、而不可以屢更也。又言、州縣之間、號爲能吏者、往往務爲急刻、專以趣辦財賦爲功、而視撫字聽斷爲不急。其間又有聚斂以爲羨餘之獻者、增市征則害商賈、督逋賦則病農民、甚或侵移常賦、貽



患後人。朝廷不察。反謂有才。願有以深戒戢之。則天下之幸也。時上猶未能屏鞠戲。又將遊獵白石。公上疏力諫。至引漢桓靈。唐敬穆及司馬相如之言。以爲戒。後數日入對。上迎謂公曰。前日之奏。備見忠讜。朕決意用卿矣。公再拜謝。上曰。朕在藩邸。已知卿爲忠臣矣。十二月。受詔館北使。遂拜同知樞密院事。兼參知政事。首薦陳良翰。林栗。劉朔等五人。恬退有守。可爲侍從臺諫之儲。時龍大淵。曾覲。以舊恩竊寵。士大夫頗出其門。言事者語或及之。往往獲罪。及公館客。大淵爲副。公見外。未嘗與交一言。大淵造門納謁。亦謝不見。至是中書舍人洪邁來見。語公曰。人言鄭聞當除右史。某當除某官。信乎。公曰。不知也。公獨何自得之。邁以淵覲告。公明日至漏舍。語諸公曰。外議久指此兩人漏洩省中語。而未嘗得其實狀。故前此言者雖多。而不能入。今幸得此。不可以不聞。諸公皆以爲然。入奏

事畢。公乃獨進。具以邁語質於上前曰。臣不知平日此等除目。兩人實與聞乎。抑其密伺聖意而播之於外。以竊弄陛下威福之權也。上曰。朕何嘗謀及此輩。必竊聽而得之。卿言甚忠。當爲卿逐之。公再拜謝。退未及門。已有旨出二人於外矣。中外快之。至或舉酒相賀云。一日出省還第。有斂馬道周而不避者。公問爲誰。曰。戚里某官也。公遣直省吏白二相。此輕侮朝廷。不可不治。即使詰之。且具以聞。上怒曰。朕在藩邸時。出逢相車。未嘗不避。此輩乃敢爾耶。明日。以白高宗。下臨安府捕繫其從者。重坐之。知樞密院事虞允文入謝德壽宮。高宗語之曰。卿與陳俊卿同在樞府。俊卿極方正。非如它人。面從而退有後言也。公以兩淮藩籬未固。言於上曰。備邊經久之計。不過屯田積粟。增陴濬隍。訓練卒練兵。以爲不可犯之基而已。然今日任人之弊。大抵太拘。而邊郡爲尤病。謂宜廣求人才。勿間文

武使陳所見、與定規模、悉如太祖皇帝所以遇李漢超、馬仁瑀輩者。分之以兵、使自爲守。饒之以財、使自爲用。乃詔臺諫略其細過、使倜儻之人得以行其志而自效。諸使唯鹽司爲不可廢、自餘皆可且罷。而間遣使循行諸郡、按閱稽考、以行賞罰。數年之後、守備必固、敵人知之、自不敢犯。萬一有之、亦可責諸將以必守、而無異時望風奔潰之虞矣。荆襄諸郡亦宜放此、大率不過得十數材力任事之人、便可集事。唯陛下留意圖之。虜使來庭、公以故事押宴、使者致私覲、其狀花書而不名。公使卻之、掌儀懼、白公恐生事。公使語之曰、今日豈當用辛巳前故事耶。使者詞屈、乃問公爵里甚悉、而易狀書名以遣曰、特爲陳公屈耳。自是遂爲例云。虜又移書邊吏、取前所俘虜人。上顧輔臣、議所以應之者。公曰、此不可以力爭而可以理勝。虜方淫侈、安有遠謀。設欲用兵、亦不必假此爲詞。今當且如

常時、泛然報云、已下諸處根刷、俟至三四、然後報以諸處所申、皆無其人、或是軍前一時殺戮、或是後來節次死亡。且誓書之文、俘虜叛亡、自是兩事。俘虜發過已多、叛亡自不應遣。且如本朝兩淮之民、昨來上國兩次俘略、亡慮數萬、本朝未嘗以爲言者、誠恐破壞和議、使兩國邊境之民皆不得安也。如其不聽、或至交兵、則曲直之勢、勝負有所在矣。從臣有怯懦、爭言不可不予者、議久未決。公復上奏曰、虜知此輩皆在軍中、故遣官臨境、揭榜招諭、欲以搖我人心。冀或有變、而以兵乘其隙、此計深矣。今留不遣、彼必藉此以起兵端。然臣竊料彼無信義、專恃暴彊、盡發亦來、不發亦來、初不以吾之從違爲作輟也。但發之則吾國中先自紛紛、而彼乘其弊、其禍甚速。不發則其侵軼尙在一二年後、吾但堅壁勿戰、絕其糧道、彼亦安能持久。況兵之勝負、亦有天理。今我直彼曲、安能逆知其必不



能勝而遽爲此匆匆乎。沈介守上饒以上供負課罷郡鐫秩公爭以爲不可。鎮江軍帥戚方刻剝役使軍士嗟怨言者及之。公奏外議內臣中有主方者上曰朕亦聞之。方罪固不可貸亦當并治左右素主方者以警其餘。即詔罷方而以內侍陳瑤李宗回付大理究其賄狀。又諭輔臣以建康劉源亦嘗有賂於近習方思有以易之。今欲且遣王抃至彼檢察姦弊留數月而後歸庶幾新帥之來不至循習。公奏曰今但遴選主將則宿弊當自革矣。上曰政患未得其人耳。公曰苟未得人更宜精擇。旣已委之則當信任。今未得其人而已先疑之似非朝廷所以待將帥之體。況軍中積弊不在乎它特患交結之風未革所以有哀尅自營之事。今陛下旣赫然罪其尤者而又并及讐阿之人中外之情莫不震懾何事於此而後可以除宿弊乎。且軍中財賦所以激勸將士但主帥不以自私則其它當

一切聽之。今檢柅苛細動有拘礙則誰復敢出意繩墨之外爲國家立大事乎。況朝廷所以待將帥者如此使有氣節者爲之心先。不服其勢必將復得姦猾之徒則其巧思百出敝隨日滋又安得而盡防耶。今不慮此而欲獨任一介單車之使以察之政使得人猶失體而無益。況不得人則其弊又將不在將帥而在此人矣。上納公言罷抃不遣。虜使來賀會慶節上壽在郊禮散齋之內不當用樂。公請令館伴以禮諭之而議者慮其生事多請權用樂者。公又奏請必不得已則上壽之日設樂而宣旨罷之。及宴使客然後復用庶幾事天之誠得以自盡而所以禮使人者亦不爲薄。彼自當悅服矣。上可公奏且曰宴殿雖進御酒亦毋用樂。惟於使人乃用之耳。諸公顧以爲紫宸上壽乃使客之禮固執前議。公又不可獨奏言曰適奉詔旨有以見聖學高明過古帝王遠甚臣敢不奉詔。然獨竊

謂更當先令館伴以初議喻使人再三不從乃用今詔則於禮爲盡而彼亦無詞不可遽鄙夷之而遂自爲失禮以徇之也。蔣芾猶守前說公爭愈力。上顧公曰可即諭閣門行之。公退復爲奏曰彼初未嘗必欲用樂我乃望風希意而自欲用之彼必笑我以敵國之臣而虧事天之禮它時輕侮何所不至。此尤不可不留聖慮。上嘉納焉。既而上以當郊有雷震之異內出手詔戒飭大臣宰相葉顥魏杞坐免。公亦俟罪不獲命越數日遂除參知政事。公辭謝不得已就職言於上曰執政之臣惟當爲陛下進賢退不肖使百官各任其職至於細務宜歸有司者。自此當日有以省之庶幾中書之務稍清而臣等得以悉力於其當務之急。上甚然之一日審察吏部所注知縣有老不任事者公判令吏部改注。吏白例當奏知公曰此豈足以勞聖聽明日取旨自今此等請勿以聞上可其奏。時有以四

明銀礦獻者上命守臣詢究且將召冶工即禁中鍛之。公奏曰陛下留神庶務克勤小物至於如此天下幸甚。然不務帝王之大而屑屑乎有司之細臣恐有識者有以窺陛下也。況彼懼其言之不副則其鑿山愈深役民愈衆而百姓將有受其害者又不可以不慮乎。夫天地之產其出無窮若愛惜樽節常如今日則數年之後自當沛然。但願民之歲稔國家所少者豈財之謂哉。請直以其事付之明州使收其贏餘以佐國用則亦不至於甚擾民矣。從臣梁克家莫濟俱求外補公奏二人皆賢其去可惜。蓋近列中有以騰口交鬪致二人之不安者於是遂與同列劾奏洪邁姦險讒佞不宜在人主左右罷斥之。

少師觀文殿大學士致仕魏國公贈太師

諡正獻陳公行狀下

七月宰相蔣芾以憂去公遂獨持政枋尋兼知樞

密院事即言於上曰、臣自叨執政之列、每見三省、密院被內降指揮、苟有愚見、必皆密奏、多蒙開納、爲之中止。然比及如此、已爲後時。今以參預首員奉行政令、欲乞自今內降恩澤有未允公議者、容臣卷藏、不示同列、即時繳奏、或次日面納。上曰、卿能如是、朕復何憂。每勸上親忠直、納諫諍、抑僥倖、肅紀綱、講明軍政、寬恤民力。用人之際、隨才任使、未嘗求備。異時統兵官不見執政、無以別其能否。公曰、召三數人從容與語、察其材智所堪而密記之、以備選用。減福建鈔鹽歲額、罷江西和糴、廣西折米鹽錢、且蠲諸道累歲逋負、金穀錢帛以巨億計。當是時、上於公言多所聽用、大抵政事頗歸中書矣。旣而龍大淵死、上憐曾覲欲召之。公曰、自陛下出此兩人、中外無不稱誦聖德。今若復召、必大失天下望。臣請得先罷去。上納公言、遂止不召。殿前指揮使王琪被旨按視兩淮城壁還、薦和州教

授劉甄夫、上命召之。公與同列請其所自。上曰、王琪稱其有才。公曰、琪薦兵將官乃其職、教官有才、何預琪事。上曰、卿等可召問之。公退、召琪責之。琪惶恐不知所對。會揚州奏昨琪傳旨增築州城、今已訖事。公請於上、則初未嘗有是命也。公曰、若爾即琪爲詐傳聖旨、此非小利害也。容臣等熟議以聞。退至殿廬、遣吏召琪詰之。琪叩頭汗下。公亟草奏言曰、王琪妄傳聖訓、移檄邊臣增修城壁、此事係國家大利害、朝廷大紀綱、而陛下之大號令也。人主機務至繁、天下情僞百出、豈智力所能一一防閑。所恃紀綱號令、賞罰耳。今琪所犯如此、考其案牘及所置對、前後牴牾、姦僞明審。此而可詐、則亦何所不可爲也哉。臣等不勝大懼。謹按律文、詐爲制書者絞。惟陛下奮發英斷、早賜處分。於是有旨削琪官而罷之。先是禁中密旨直下諸軍者、朝廷多不與聞。有禁官張方者以某事發覺、公方與



同列奏請、自今有司承受御筆處分事宜、並須申朝廷奏審、方得施行、未報。至是因琪事復以爲言、上乃悅而從之。事下兩日、則又有旨收還前命。公語同列曰、反汗如此、必關牒至內、諸司有不樂者、相與爲之耳。即具奏曰、三省密院、所以行陛下詔命也。百司庶府、所以行朝廷號令也。詔命必出於陛下、號令必由於朝廷、所以謹出納而杜姦欺也。祖宗成憲、著在令甲。比年以來、漸至墮紊。臣等昨以張方之事、輒有奏陳、及此踰月、又因王琪姦妄之故、陛下赫然震怒、然後降出、聖慮亦已審矣。聖斷亦已明矣。中外傳聞、莫不歎服。而昨日陛下諭臣等曰、禁中欲取一飲一食、必待申審、豈不留滯。而今又有此指揮。夫臣等所慮者、命令之大、如令三衙發兵、則密院不可不知。令戶部取財、則三省不可不知耳。豈有此宮禁細微之事哉。況朝廷乃陛下之朝廷、臣等偶得備數其間、出內陛下命令耳。凡事奏審、乃欲取決於陛下、臣等非敢欲專之也。況此特申嚴舊制、亦非創立新條。而已行復收、中外惶惑、且將因循觀望、并舊法而廢之、爲後日無窮之害、則臣等之罪大矣。或恐小人因此疑似、陰以微言、上激雷霆之怒。更望聖明深賜體察。翌日面奏、上色甚溫。顧謂公曰、朕豈以小人之言而疑卿等耶。同知樞密院事劉琪進對語切、遂忤上意。既退、御筆除琪端明殿學士、在外宮觀。公即藏去密具奏言、前日奏劄、臣實草定。琪與王炎略更一兩字、即以投進。以爲有罪、則臣當先罷。若幸寬之、則琪之除命、臣未敢奉詔也。明日復申前說、且曰、陛下即位以來、容納諫諍、體貌大臣、皆盛德事。今琪乃以小事忤旨而獲罪如此、臣恐自此大臣皆以阿諛順指爲持祿固位之計、非國之福也。上色悔久之。公又言、琪正直有才略、肯任怨、臣所不及。願且留之。上曰、業已行之、不欲改也。公曰、琪無

罪而去、當與大藩以全進退之禮。上然之、乃以珙爲江西帥。公退、又自劾草奏抵突、被命稽留之罪、上手札留之、公請不已。上曰、卿必欲去、朕當勉從。然亦且在四明或平江一兩月復來可也。公以平江繁劇辭、上使自擇兩浙近地、公因以四明爲請、上乃許之。公退、即家居俟命、而翌日上更遣中使召公入奏事、迎謂之曰、朕昨思之、卿不可去。且諫官陳良祐亦奏留卿、是非獨朕所不可、公議亦不以爲可也。卿其勉爲朕留。公請益堅、上曰、卿雖百請、朕必不從也。公退、復上疏。上親書其後曰、卿之忠實、朕素簡知、而辭位無名、婁留愈懇、公論所協、宜勿再陳。公遂不敢復請。越數日、上喻且相公、公懇避再三、上竟不許。遂以乾道四年十月制授尙書右僕射、同中書門下平章事、兼樞密使。公爲相、以用人爲己任、所除吏皆一時選。尤抑奔競、獎廉退、或才可用而資歷尙淺、即密薦於上、退未嘗以

語人。有忽被召對、改秩除用而不知所自者。每接朝士及牧守來自遠方者、必問以時政得失、人才賢否。見給舍必勉之曰、朝廷政令、安得每事盡善。主上從諫如流、公等意有未安、勿憚舉職。朝廷唯是之從、初不以爲忤也。又以兩淮備禦未設、民無固志、萬一寇至、倉卒渡兵、恐不及事、奏於揚州、和州各屯三萬人、預爲家計。仍籍民家三丁者取其一、以爲義兵、授之弓弩、教之戰陳。農隙之日、給以兩月之食、聚而教之。沿江諸郡亦用其法。諸將渡江、則使之城守、以備禦緩急。且以陰制州兵、頡頏之患。其兩淮諸郡守臣、但當擇才、不當復論文武、計資歷。捐以財賦、許辟官吏、略其小過、責其成功。要使大兵屯要害、必爭之地、待敵至而決戰、使民兵各守其城、相爲犄角、以壯聲勢。而又言於上曰、國家養兵甚費、募兵甚難、惟有此策、可保邊面、可壯軍勢。而樂因循、憚改作之人、皆以擾民爲詞、天



下之事欲成其大、安能無小擾。但守臣得人、公心體國、不憚勞苦、善加拊循、則教習有方、自不至大擾矣。上意亦以爲然、詔即行之。然竟爲衆論所持、公尋亦去位、不能及其成也。邊民侍旺擁衆來歸、北虜移文取索。公以爲但可說諭令其北歸、不可捕遣以快彼意。上意猶欲粗遣百十以塞其意、公曰、粗遣一二、以失其心、使懷憤怨、而虜知其然、求索必不遽已、竊料兵端必起於此。是始欲兩全而終不免於兩失之也。此事本末曲雖在我、然彼亦豈得爲直。若且悠悠勿遣、彼必虞我有備、未敢遽動。萬一不免用兵、卻可全山東歸正之心、士氣自倍矣。於是卒從公計。一日、御札依祖宗舊制復置武臣提刑、公言、此職自景德以來置復不常、今用文臣一員、亦無闕事。員外添置、徒爲煩費無益也。乃止。時虞允文宣撫四川、公薦其才堪宰相、上即召允文爲樞密使。至拜公左相、遂以允文爲右相。

乾道五年八月也。允文既相、建議遣使金國、以陵寢爲請。公既面陳以爲未可、復手疏曰、陵寢幽隔、誠臣子之痛憤。然在今日、彼方以本朝意在用兵、多方爲備、若更爲此以速之、彼或先動、則吾之事力未辦、不知何以待之。況使者既行、中外疑惑、果得所請、猶爲有名。苟或未從、殊失國體。且天下之人亦以爲陛下舍其大而圖其細也。若欲必遣、則俟侍旺事定、或因遣使賀正、令王抃偕行、先與彼之館伴者議之。或令因見虜主、面陳此意。彼若許遣、則有必從之理。若其不許、則願陛下深謀遠慮、舍其小而圖其大。它時恢復故疆、陵寢固在度內。今日爲之、則是慕虛名而受實害、臣竊爲陛下危之。上感公言、事得少緩。既而上御弧矢、有弦激之虞。公以不能先事陳戒、深自克責、密疏言曰、陛下經月不御外朝、口語籍籍。由臣輔相無狀、不能先事開陳、以致驚動聖躬、虧損盛德、非細事也。前日



已嘗面奏俟罪、聖體未寧、未敢復請。然區區之愚、不敢不先言之。冀或有以感寤宸衷、則臣歸死、司敗、無復憾矣。臣聞自昔人主處富貴崇高之極、志得意滿、道不足以制欲、則游畋聲色、車服宮室、不能無所偏溺、而不得爲全德之君。陛下憂勤恭儉、清淨寡欲、凡前世英主所不能免者、一切屏絕。顧於騎射之末、猶有未能忘者。臣知陛下非有所樂乎此也。蓋神武之略、志圖恢復、故俯而從事於此、以閱武備、以激士氣耳。然誠如此、臣亦竊以爲過矣。夫弧矢之利、雖聖人所以威天下、然本非帝王所當親御也。一劍之任、吳起且羞爲之、而況萬乘之主乎。趙王好劍、而莊周說以天子之劍。楚王好弋、而莊辛說以王霸之弋。陛下既有志於武功、誠能任智謀之士、以爲腹心、仗武猛之材、以爲爪牙、明賞罰以鼓士卒、恢信義以懷歸附、則英聲義烈、不出尊俎之間、而敵人固已逡巡震疊於千萬里

之遠矣。尙何待區區馳射於百步之間哉。太祖皇帝深卻手撾之獻、蓋有見於此矣。又況陛下承祖宗積累之休、膺太上皇付託之重、一身之動靜、宗社生靈之休戚繫焉。可不自重、以爲天下無窮之計乎。今者之事、尙賴天地祖宗密垂覆佑、即獲痊愈、使其萬一有甚於此、則貽太上之憂念、駭四方之觀聽、雖誅左右執射之人、亦何益乎。故臣願陛下常以今日之事、永爲後來之戒、不惟志之聖心、而又書之盤杆、銘之几杖、不使須臾忘之、則天下幸甚。且古之命大臣者、使之朝夕納誨、以輔德、繩愆糾繆、以格非、欲其有以正君之過於未形、而不使著見於外也。唐太宗臂鷹將獵、見魏徵而遽止。憲宗蓬萊之遊、憚李絳而不行。此其效也。臣人微望輕、無二子骨鯁強諫之節、致陛下過舉、彰聞於外。今誅將及身而後乃言、亦何補於既往之咎哉。雖然、懲羹者必吹於蠶、傷桃者或戒於李。弓矢之

技人所常習而易精、然猶不免今日之患、況毬鞠之戲、本無益於用武、而激射之虞、銜櫛之變、又有甚於弓矢者乎。間者陛下頗亦好之、臣婁獻言、未蒙省錄。今茲之失、乃天之仁愛陛下、示以警懼、使其小而戒其大、誠宗社無疆之福也。陛下誠以弦斷之變思之、則向之盛氣馳騁於奔蹏擊逐之間、無所蹉跌、蓋亦幸矣、豈不爲之寒心哉。太祖皇帝嘗以墜馬之故而罷獵、又以乘醉之誤而戒飲、遷善改過、不俟旋踵、此子孫帝王萬世之大訓也。臣願陛下克己厲行、一以太祖爲法、罷毬鞠之會、屏騎射之習、謹威儀之節、玩經典之訓、則盛德輝光、將日新於天下、而前日之過、何傷日月之明哉。旣而曾覲官滿當代、公度其必將復入、預請以浙東總管處之。上曰、覲意似不欲爲此官。公曰、前此陛下去此兩人、中外無不歎仰盛德。今外間往往竊議、以謂覲必復來。願陛下且捐私恩、以伸公議。

上稱善久之。已而又以墨詔進覲官、公復持不可曰、必爾、亦當有名。會當賀金國正旦、乃請以覲爲副。還奏、因以例遷其官、而竟申浙東之命。覲猶遲徊不去、公戒閤門趣覲即日朝辭、覲怏怏而去。樞密承旨張說欲爲親戚求官、憚公不敢言。會公在告、請於右相得之。公聞敕已出、詰吏留之。說皇恐詣公謝、右相亦愧甚、然猶爲之請。公卒不與、說以是亦深怨公。永陽郡王居廣欲爲其客求嶽祠、先使人伺公意。公曰、它官則不可、嶽祠無傷也。然居廣憚公嚴正、卒不敢啓口。吏部尙書汪應辰舉李垕應制科、有旨召試。權中書舍人林機言垕詞業未經後省平奏、且獨試非故事。公奏元祐中謝懽亦獨試、機蓋爲人所使耳。上喻公詰之、乃機與諫官施元之密謀、以是沮應辰、而對上又不以實。公因極論其姦、遂詔暴二人朋比交通之狀而罷之、中外稱快。然應辰竟以與右相議事不合求去、公



奏應辰剛毅正直、士望所屬、當有以留其行者、因遂數薦應辰可以執政。上初然之、而後竟出應辰守平江。自是上意益向允文、而公亦數求去矣。明年允文復申前議。一日、上以手札諭公曰、朕痛念祖宗陵寢淪於腥羶者四十餘年、今欲遣使往請、卿意以爲如何。公奏曰、陛下焦勞萬機、日不暇給、痛念陵寢、思復故疆、臣雖疲駑、豈不知激昂憤切、仰贊聖謨、庶雪國恥。然性質頑滯、於國家大事每欲計其萬全、不敢輕爲嘗試之舉。是以前者留班面奏、欲俟一二年間、彼之疑心稍息、吾之事力稍充、乃可遣使。往返之間、又一二年、彼必怒而以兵臨我、然後徐起而應之、以逸待勞。此古人所謂應兵、其勝十可六七。茲又仰承聖問、臣之所見不過如此、不敢改詞以迎合意指、不敢依違以規免罪戾、不敢僥倖以上誤國事、惟陛下察之。繼即杜門上疏、以必去爲請。三上乃許、遂以觀文殿大學士

知福州、兼福建路安撫使。陛辭、猶勸上遠佞親賢、修政事以攘夷狄、泛使未宜輕遣。然公既去、允文遂遣使、竟不獲其要領。而曾覲亦召還、遂建節旄、歷使相以躋保傅、而士大夫莫有敢言者矣。公至福州、政尙寬厚而嚴於治盜。明年、定海水賊倪郎、侵軼閩廣、海道騷然。公召統領官鄭慶授以方略、慶頗逗留、以風爲解。公植旗於庭、視其所鄉。慶知公不可欺、晝夜窮追、悉遂禽捕、海道以清。上嘉其功、特遷銀青光祿大夫、力辭不許。始公任政、建言選人、獄廟無事得祿、又理考任陞改、此太僥倖、且非祖宗舊法。奏請革之、人以爲當。而權貴多不悅、扇爲浮論、游說萬方。公持之不變、衆亦自定。略計一歲、可省冒濫改官者三十員。至是不悅者幸公去、卒奏改之。公猶抗疏辨理、然事已行、不及止也。簽書節度判官事尙大伸、以事忤提點刑獄鄭興裔、興裔廉得其罪、以語公。公即以屬吏驗問、未竟、

憲屬張位擅呼獄吏喻以意旨。公劾奏位并大伸罷黜之。興裔勢大沮皇恐託它事出按旁郡以避公。轉運判官陳峴建議改行鈔鹽法。公移書宰執曰。福建鹽法與淮浙不同。蓋淮浙之鹽行八九路。八十餘州。地廣數千里。食之者衆。販之者多。百貨可通。故其利甚博。福建八州。下四州瀕海。已爲出鹽之鄉。惟汀、邵、劍、建四州可售。而地狹人貧。土無重貨。非可以它路比也。且四州每歲舊額當運鹽千三百萬斤。而實運僅及九百餘萬。蓋食鹽之民有限。其勢不可以復增也。然漕司以此歲得三十餘萬緡。而四州二十餘縣供給上下百費皆取於此。二三十年以來。州縣稍無科擾。百姓亦各安便。此則官自鬻鹽。亦不爲不利矣。今欲改行鈔法。比於它路。且於額外更責以增鬻取贏。而又陰奪州縣歲計以充其數。此不可之大者也。而或謂官鹽不行。由私販之不禁。今若稍嚴。必倍其利。此知其

一、不知其二者。福建民貧。上四州尤甚。性復強悍。輕生喜亂。農桑之外。多利私販。百十爲羣。操持兵仗。官不能禁。託名魚鱸。量收稅錢而已。貧民既有此路。可以自給。則不至輕於爲非。官司又得此錢。亦足少助經費。今欲改行鈔法。已奪州縣歲計。又欲嚴禁私販。必虧稅務常額。而貧民無業。又將起而爲盜。夫州縣闕用。則必橫斂農民。稅務旣虧。則必重征商旅。盜賊旣起。則未知所增三十萬緡之入。其足以償調兵之費否也。將來官鈔或滯不行。則必科下州縣。州縣無策。必至抑配民戶。本以利民而反擾之。此恐皆非變法之本意也。欲望朝廷更下有司熟議。或令建議之人一以身任其責。必有以見其決然可行者。然後行之。則庶乎其不悞也。當時諸公不能用。然鈔法果不行。又明年。力請閑。遂以提舉臨安府洞霄宮歸第。敝屋數楹。湫隘特甚。怡然不以屑意。淳熙二年。再命知福州。辭不



得請乃行。民習其政、不勞而治。始至、帑藏空竭、公節省浮費、用亦不乏。會有旨盡發本路海船及揀中禁軍、土軍、公奏曰、陛下厲精爲治、約己利民、至於軍須之用、亦無取之民者、獨於海舟尙藉民力、蓋不獲已。然自頃邊事既息、率三分調一以備守禦、非有緩急不盡發也。此意亦已厚矣。今乃但以教閱之故而使三番併發、彼不當番者既已遠出、豈能遽歸。則必徒使其家有追逮係累之擾。至於柁師水手、其技素習、初不待教。但其平日類皆轉移執事、今固不容拘以名籍、則又安知今日所教必爲異時所用之人哉。何補於事而煩擾如此。且去歲朝廷疑州郡有所隱漏、遣黃飛英點集、拘留年半、始得放散、商賈固已失業。今而併發、寧不重困。略計本路所發五百七十艘、用柁師水手萬四千人、留屯五月、犒設借請、朝廷費經總制錢六十餘萬緡、米六七萬餘碩、衣裝器甲與夫州縣之費

又不在是。推此一路以觀兩浙、則其費又當倍之矣。又況民力不可不惜、大衆不可輕動、無事而發、玩習爲常、一旦有急、或反誤事。曷若盡以教閱付之州縣、或令且發一番、當亦未至闕事。而船戶既蒙優恤、異時或有緩急、雖赴湯蹈火亦不避矣。其揀中禁軍已行起發、但本路帶山瀕海、民俗獷悍、私販寇盜所在有之、全賴土軍控制之力。向來戚世明銜命揀選、但欲數多、未嘗精擇。福州十三寨合千九百人、而揀中者已千七百餘人、所餘逐寨不過十人。今若將揀中人盡行起發、則州縣表裏空虛、姦民得計、其害有不可勝言者。欲乞許留其半、以備緩急。詔皆施行如章。公又嘗奏、本路上四州軍及江西、湖北諸郡豪猾之民多由衣食不充、相結爲盜、盤據險阻、官軍多不能制。近者茶寇雖平、其類尙多有之。與其縱使爲盜、不若籠以爲兵。謂宜專委逐路帥憲選閒居官員有方略者及土

豪有信義者、毋拘以文、使風喻此曹、令各以其技自獻、官爲格試、收而籍之。或刺其手、置寨教閱、厚其衣糧、拔其尤異、補轉資級。因事立功、更加優賞。或有小寇、責之收捕、決可討平。異時或欲起發、亦必感奮爲用。此銷盜賊、嚴武備、固根本之一策也。既而州境大旱、失火延境、且有星隕地震之異。公悉以其事上聞、且曰、一夕之間、變異兩見、臣愚不學、莫原休咎之端、惟劇震恐竊計陛下必欲聞之、不敢不奏。上感其言。適州校有部綱至在所者、上忽召入、問公治行甚悉。即降親札撫勞、賜以帶、笏、香藥甚厚。三年、太上皇帝聖壽七十、頒慶宇內。公以紹興從官特轉金紫光祿大夫。四年、復累章告歸。上欲許之、而難其代、爲遲回累日、乃除特進、提舉洞霄宮。五年五月、起判隆興府。未視事、改判建康府、江南東路安撫使、兼行宮留守、且詔赴闕奏事。既至、都人聚觀、無不咨嗟、喜公之將復用也。入

對垂拱殿、上爲改容加敬、命坐賜茶、宣問欵至。公因從容言曰、擇將當由公選。臣聞諸將多以賄賂交結而得之、如此大壞軍政。上曰、大將交結、恐或因仍。如統領官以下、皆朕親選。前日鄭鑑亦有是說、朕再三諭以無是事矣。鑑公壻也、故上語及之。公即奏曰、臣在遠、亦聞鑑以小臣輒論朝廷事。陛下和顏聽納、中外莫不仰服聖明從諫之美。然諸將交結之弊、則陛下不可以不察。蓋主兵者得之不以材能、而以貨賂、則其下不服、必致誤事。上曰、誠然。公又奏曰、陛下選用人材、當辨邪正、然又必由朝廷、乃合公論。如聞曾覲、王抃招權納賂、薦進人才、而皆以中批行之。外間口語籍籍、恩盡歸於此輩、謗獨萃於陛下、此非宗社之福也。上曰、小小差遣、或勉徇之。至於近上差除、此輩豈敢干預。公曰、此輩未必敢於陛下之前、明有論薦、或恐探知聖意而傳報於外耳。大抵禁中事、外間無不聞、皆



此曹所爲大非美事。願嚴加戒約。上亦然之。公又奏曰。比來出令多不審。隨即變更。祖宗故事。固不能守。而陛下初政。力去弊事。可以爲後世法者。今亦不能守矣。上問何事。公曰。如未銓試。不得注官。未歷任。不許堂除之類。今皆以內降放行矣。上曰。此誠一時不思之過。公又奏曰。臧吏最可惡。比亦有已經勘結而直降內批改正者。如此天下何所懲勸。上曰。恐無此事。公曰。臣知其人。但事已往。不欲斥其姓名耳。此皆左右害政之大者。陛下不可不每事加察。防其微漸。上曰。卿言甚當。朕若知之。決不容也。既退。上遣中使賜金器。犀帶。香茶。明日朝辭。上曰。卿遠來得相見。氣貌不減往時。今年幾何矣。公對曰。犬馬之齒六十有六矣。上曰。極清健可喜也。公因奏曰。臣去國九年。重入脩門。見都下穀賤物平。人情安帖。惟是士大夫風俗大變。上曰。何也。公曰。向來士夫奔覲。扞之門。十才一二。尙畏

人知。今則公然趨附。十已七八。不復有顧忌矣。人才進退。由於私門。大非朝廷美事。上曰。扞則不敢。覲雖時或有請。朕亦多抑之。自今不復從矣。公曰。陛下之言雖如此。其如外間喧傳某人由某人之薦。某人出某人之門。此曹聲勢既長。臺諫侍從往往多出其門。頤指如意。朝廷亦唯命是聽。無敢爲陛下言者。天下靡靡風俗日趨敗壞。奈何。臣昨所奏將帥賄賂交結。又爲特甚。不惟士大夫言之。雖軍伍使臣。朝廷胥吏。下至走卒。亦能言之。獨陛下以爲無有。臣恐小人姦計百端。巧爲彌縫。使陛下獨不悟。此不可不深察而嚴禁也。陛下信任此曹。壞朝廷之紀綱。廢有司之法令。敗天下之風俗。累陛下之聖德。臣實痛之。願陛下勿忘臣此四言者。常留聖慮。則天下幸甚。上曰。卿到建康。見兵將有如此者。一一奏來。公又奏。諸路監司亦望精擇。須稍諳練。有風采之人乃可用。若膏粱子弟。未更民

政權要子姪親故、率皆負勢妄作、爲一路之害。上因語及人材、問公識某人否。公對曰、臣素知之、今日正當得此等人布之朝列、則所謂猛虎在山、藜藿不采、汲黯在朝、淮南寢謀者也。願陛下留意。上爲沈思久之。上初欲爲公設宴、會小疾不果、乃命二府飲餞于浙江亭。公去建康、至是蓋十五年。父老喜公之來、所至相聚以百數、焚香迎拜、如見親戚。公爲政平易寬簡、悉罷無名之賦。府有軍屯、異時多爲民害。公爲出令、犯者當取旨以軍法從事。諸軍肅然。行宮局鑰別以宦者主之、留守待之如部使者禮。時節按行殿中、則宦者置酒自坐東偏、而留守顧爲客、甚或邀去就飲其家。公悉罷之、宦者浸不樂而不能害也。建康距淮南一水間、每聞邊面利害、無不言。嘗奏、北界群盜百餘、焚掠淮陰、殺人篡囚、執縛官吏。此由跳河盜馬之徒、有以啓之、請加嚴禁、而於沿淮諸縣量增戍兵以防之。其

自北方來歸者、則慰諭而勿受也。又奏、密院昨下諸郡造甲、自有程限、而諸郡爭先希賞、不無追集之擾。乞行戒諭、以安農業。且自頃罷兵、至今十六年、諸軍造甲當已足用、而御前軍器所甲匠又凡三千五百人、若以百工爲一具、則以歲計之、今不啻十四五萬具矣。行宮之甲見管四萬、今諸郡所造計亦不下三萬。欲望試加檢括、苟可足用、即逐州常年合納甲葉鐵炭之類、或可間年量與裁減、亦寬民力之一事也。又奏、日者陛下深念諸軍有口衆而廩假不足以自贍者、特降緡錢、三總領司各付以二十萬、俾之回易、歲取息錢五分以爲優給、甚大惠也。然商賈之利不過什一、今以總所之權、奉朝命、用禁令而責五分之息、其勢必至於盡籠商賈之利、陰奪場務之課、使道塗嗟怨、公私困竭。而淮西總司歲以十萬緡者、散之兩軍、多者不過兩千、少或僅得千錢。以朝廷黃榜措置、使此



曹終歲仰望、而所得不過如此。得者既未足爲惠、而不得者又有怨言、甚無謂也。請亟罷之、而歲捐交子三十萬於一司、以其半給諸軍之口衆者、以其半大閱而激犒之。不惟名正惠周、亦可少振士氣、而數路細民商旅受賜又不貲矣。是時御前多行白劄子、率用左右私人賁送、而迎送饋遺體同王人。至是、樞密承旨王抃遣所親以劄來、吏白故事、公悉罷之。因上奏曰、號令出於人主、行於朝廷、布於中外、古今之所同也。間有軍國機密文字、或御前批降、則用寶行下、此所以示信而防僞也。今乃直以白劄傳旨、處分事宜於數百里之外、則臣不知其可矣。其間亦有初非甚密之事、自可付之省部。今用白劄雖無甚害、然白劄既信於天下、則它時緩急或有支降錢物、調發軍馬、處置邊防、干國家大利害事、其間豈能保其無僞。若嚴重知體之人必須奏審、則往來之間或失事機。若庸懦無

識之人即便施行、則真僞不分、豈不悞事。況祇稟文字只付差來人、或令回申元承受處、到之與否、不可得知。此於事體尤爲非便。惟陛下察而改之。上爲手札獎諭、愧謝其意。公尋^⑧上章請致其事、答詔不允。上又出手札付三省、除公少保、加恩判建康府如故。宣制之日、亦上所自定、蓋異禮也。公力辭、以爲曾公亮嘗言司空非賞勞之官、卒不受拜。今之少保、即昔之司空也。況又^⑨無勞、其敢受乎。上手札敦諭、至於再三、公乃受命。時江東諸郡皆旱、而南康^⑩廣德爲尤甚。上詔公預講荒政。公奏曰、薄征緩刑、已責勸分之屬、不敢不勉。亦已揭榜招誘米商、嚴戒場務毋得征稅。但恐未到之間、民已流散、不可復收。欲乞於本路諸州朝廷椿積數內借米三十萬碩、穀二十萬碩、分給州縣賑糶。而又繼以常平之粟、仍先揭榜諭之、使細民不至流移。富家不敢閉糴、商旅不敢邀價。又奏乞除放淳熙四

年夏秋逋賦、權罷淮東和糴、倚閣畸零夏稅、申明納粟賞格、上多從之。惟所借椿積米穀、前後三奏、詞甚懇激、而廟堂有不樂公者、才得三萬斛。人皆爲公憂、而公處畫有方、船粟四集、境內帖然、民無流徙、咸仰公德焉。八年正月、復上告老之章、累詔不允、而公請益堅。二月、除醴泉觀使、進封申國公。將歸、薦本道守令耿秉等五人、皆以次擢用。九年正月、公之年已七十矣。元日、即謝醴泉之俸、復上疏申前請、凡表五上。上又手批其奏卻之。是歲親祠、召公陪位。公力辭、又三表懇請告休、不獲、即爲手札以請。上不得已、詔以少傅致仕、進封福國公。有司以法當給全俸、公按富文忠公故事、獨受少傅之祿、餘悉歸之。十一年十月七日、上以公生朝、遣使賜手詔、金器、香藥。十二年、又詔公陪祀南郊、且以增太上尊號、來歲當行慶壽之禮、上諭宰臣曰、陳丞相久不相見、宜趣其來。若赴陪祠不及、亦

可赴慶壽。且是禮之行、尤以元老在廷爲重也。公拜疏辭行、上復手札催促、書其末曰、付陳少傅而不名也。公竟懇辭。慶典告成、冊拜少師、進封魏國公。公辭避再四乃受。十三年十一月、屬疾、二十一日疾革、夜半、手書一紙示諸子曰、予病、恐不能自還。生死大數、無足悲者。白屋起家、致身三少、報國無功、叨榮有醜。獲死牖下、尙復何云。遺表只謝聖恩、無得祈求恩澤。死之後、百日入葬、不用僧道追薦等事。吾欲以身率薄俗、汝等不可違也。無功無德、無得立碑請諡。汝等力學善爲人、惟忠惟孝、可報國家。此外無可祝。命婦女出寢門、顧謂中子守曰、遺表惟以選用忠良、恢復竟土爲請可也。翌旦、整冠歛衽、神氣靜定、安卧而薨。先是、郡之鎮山壺峰大石崩墜、聲聞數里。是日、地復大震、鄉人異之。公生二十有六年而仕、仕三十年而相、相二年而去、去十三年而老、老三年而薨。薨之年、蓋七十有



四矣。上聞其喪、對輔臣嗟悼久之、再輟視朝、贈太保、令本路轉運司給葬事。後數月、有旨賜諡、遂以靖共其位、文賢有成二法諡公曰正獻、而以制可告於第。公孝友忠敬、得於天資。爲人清嚴好禮、終日無惰容。雖疾病、見子孫必衣冠。胸懷坦然、遇人無少長一以誠實。一言之出、終身可復。平居恂恂、言若不出諸口、而在朝廷危言正色、分別邪正、排斥權要、無所顧避。論事上前、指切時病、如請起張忠獻公、乞斬張去爲、按逐龍曾、議復奏審、及極論近習弄權納賂、鬻賣將帥之弊、皆卓犖奇偉、爲天下安危治亂之所繫。一時上意雖未即開納、公必懇請再三。然心平理順、色溫氣和、無激訐近名之意、上多悅而從之。處國家顧大體、務持重、不爲幸勝苟得之計。在中書尤以愛惜名器、裁抑僥倖爲事故。小人多不樂。而聖主獨深知之、是以居外積年、眷禮彌厚。歲時錫賚存問不絕。年六十七、即告

老于朝、上所以留之甚至、且婁稱其忠誠不欺、爲當今賢相。公子守嘗以宗正寺簿奏事殿中、上顧問公甚厚。陪祠之召、蓋將有所咨訪、而公病不能行。天下有志之士至今恨之、然非爲公私恨也。公性寬洪簡淡、無私喜怒。於天下士泛然若無所親疏、而好賢之心實篤於內。於一時人材薦達甚衆、然皆不以語人。有如熹之不肖、公前後蓋嘗三薦之。而赴建康時、對語尤切。然熹皆莫之知也。雅善故端明殿學士汪公應辰、敷文學士李公燾、嘗曰、吾待罪宰相、所以幸無過舉者、二公之力也。於人無所怨惡。錢端禮嘗沮公、洪邁亦與公不合、至入相、皆以名藩大郡處之。治郡崇尚風教、民有骨肉之訟、親以義理反覆譬之、爭者亦悔悟感泣而去。所至民必相率爲生祠、且立碑以頌公德。公聞之、亟命禁止而碎其碑。平居自奉甚約、言談舉止不改鄉閭之舊、食不過一肉、而衣或二十餘年不易。

晚歲築第、不爲華侈、僅使不過數人、皆謹愿忠樸、門庭闐然、過者或不知其爲公相家也。俸賜入門、多以施與、撫愛宗族、恩意甚備。內外總功之喪、必素服以終月數。在官不受饋遺、建康諸司例有月餉、公不欲異衆、別儲之以周貧士之往來者。將去、所餘幾萬緡、悉歸之公帑。於外物澹然無所好、獨喜觀書史、疾病猶不釋卷。其學一以聖賢爲法、於浮屠老子之說未嘗過而問也。嘗有詩曰、吾方蹈丘軻、未暇師粲可、此足以見其志矣。有遺文二十卷、奏議二十卷。娶聶氏、封唐國夫人。子男五人、寔朝奉郎、通判泉州事。守、承議郎、權發遣漳州事。定、承奉郎、有志於學而蚤卒、熹嘗銘其墓以哀之。宓、宿、皆承事郎。女四人、長適進士黃洧、次適故著作佐郎鄭鑑、再適太常少卿羅點、次適奉議郎、通判漳州事梁億、幼未行。孫男四人、瑩、承務郎、址、坦、皆承奉郎、塾、未官。孫女六人、長許嫁修職郎、泉州司

戶趙善綽、餘幼。初、公歸自金陵、即預爲棺衾。嘗遊鄉縣之保豐里龍汲山妙寂僧舍、愛其山水、相羊久之、命作壽藏。既薨、諸孤悉遵遺戒、惟百日而窆、懼於不懷、則以十五年七月二日奉公之柩葬焉。謂熹蚤蒙公知、晚歲尤篤、授以家傳、使最其迹、以告于太史氏。熹不得辭、直書其事如右、以俟采擇。謹狀。淳熙十五年十二月日、朝奉郎、直寶文閣、主管西京嵩山崇福宮朱熹狀。

朱熹撰 《晦庵先生朱文公文集》卷九六

丞相太保魏國正獻陳公墓誌銘

皇天祐宋、俾萬億年作民主、自祖宗暨于中興、必畀以傑魁文武之佐、負大公至正之望、爲一世善類之宗。故其人未用而天下望之、旣用而天下悅之、旣去而天下惜之。其進其退、君子小人視之、爲己用舍、四海生靈視之、爲己戚休、中國四夷視之、爲國輕重。在仁宗時、則有若杜、韓、富、范。在哲宗時、



則有若司馬文正。在高宗及我聖上時，則有若廣漢張公、莆田陳公。磊磊堂堂，後先相望，偉如也。初，紹興庚辰辛巳間，虜情獠甚，國勢臬兀，天下之望在張公，而廷臣莫敢以聞。首請用張公，以大慰民望。卒安宗社者，陳公也。是時萬姓三軍稱張公爲都督，而陳公爲小都督，其繫人望如此。至如乞斬大璫，張去爲，尼外戚錢端禮之相，逐倖臣龍大淵，曾覲議復奏審之法，及極言近習弄權，債帥納賄等弊，皆根柢天下治亂，天下稱誦其卓詭絕特之舉者，皆陳公云。詩曰：人之云亡，邦國殄瘁。廼淳熙十有三年秋七月二十有二日，民之無祿少師、觀文殿大學士、魏國陳公以薨聞。天子震悼，對輔臣驚歎久之，爲輟視朝，又再輟視朝，贈太保，諡曰正獻，令官治葬。以十五年七月二日葬于莆田縣保豐里龍汲山。朝奉郎直寶文閣、主管西京嵩山崇福宮朱公熹狀其行，其子守以請銘于太史氏，而

廬陵楊萬里實執筆待罪厥官，銘其可辭。公諱俊卿，字應求，其先潁川人。永嘉之亂，太尉、廣陵郡公準之孫西中郎將達南遷泉江。歷唐、五季，而太尉十九世孫真，二十二世孫嶠，沆始居莆田。自沂公以降，以好施聞。公生而莊敬，不妄笑言。七八歲知學，冀公薨，執喪如成人。少長益自厲。紹興八年舉於禮部，知舉朱公震、張公致遠得其試文曰：公輔器也。真首選，有不可者，屈居第二。授左文林郎，泉州觀察推官。秩滿，改宣義郎。故事，當入館學，時相秦檜察公不附己，以爲南外睦宗教授。終更造朝，道中一日忽心悸，亟馳歸。冀國夫人已即世，乃以是日屬疾云。服除，員外置通判南劍州。檜死，乃以秘書省校書郎召。非公事未嘗詣執政。今天子爲普安郡王，高宗命宰相擇可輔導者，爭欲植所善。高宗不可，命擇館職靜厚者，乃以公對。除著作佐郎，兼普安郡王府教授，尋遷著作郎。在邸二年，講

說常傳經以規。歷司勳、禮部外郎、樞密院檢詳諸房文字、監察御史、殿中侍御史。韓仲通以獄無辜媚秦檜、檜黨盡逐、仲通獨全。劉寶總戎培克、併按抵罪。宰相湯思退秉政、國言籍籍、會冬無雲而雷、公言、思退文藝有餘、器識不足、無以堪重任。詔罷思退。金虜自燕徙汴、謀入寇、中外震恐、而楊存中久握兵柄、尤以培克交結得幸、士皆怨咨。三十一年春正月望、大雷雹、已而雨雪。公引春秋書雷雪相距八日、其變有漸、今一日並見、此夷狄陵中國、臣下竊威權之象。遂彈存中、天子爲罷存中而奪之兵。時虜釁已形、公言宜蚤擇大帥、盡護諸軍、而在廷莫有堪其選者。舊臣唯張忠獻在、困於讒、謫居湖湘、中外翕然歸之。上心益疑、公上疏曰、竊惟今日事勢危迫、軍民士夫皆曰張浚忠義文武、且習軍事、可當閫寄。臣素不識浚、亦聞其人意廣才疏、雖有勤王之節、安蜀之功、然其敗事亦不少。特

其許國之忠、白首不渝。廷臣未有過之者。竊聞譖者言其陰有異志、若付以權、恐漸難制。夫浚之所以得人心、伏士論者、爲其有忠義之素心也。若其有此、人將去之、誰復與之。臣願陛下察其讒誣、略加辨白、且與除一近郡、以繫人心。上大悟。宦官張去爲陰沮戰議、且請避狄。公請斬之。上愕然曰、卿仁者之勇。明日、除權兵部侍郎。後數月、竟用張公守建康。邊報益急、王師始北渡江、據要害、然戰議猶未決。公言、今守禦略備、士氣亦振。北虜若來、持以重兵、擣以間道、上策也。嚴備禦、開屯田、中策也。受其甘言、斂兵增幣、無策矣。虜兵尋渡淮、公受詔經理浙西、我是以有膠西之捷。公勸上進幸建康、上然其計。未發而虜自亂、殺亮、新曾遣使求成、朝廷議所答。或曰歸疆者實利、正名者虛名、多附其說。公亟言曰、今日正名之日也。今天子受禪、公入對、陳戒懇切、且言、今日之事必也清心寡欲、屏遠



便佞、用志專、見理明、則邪正分、功業就。七月、遷中書舍人、尋以其職充江淮東路宣撫判官、兼權建康府事。時上初即位、慨然有雪讎耻之志、方屬張忠獻公以閩外事、顧在廷無可使佐之者、以公忠義奮發、沉靜有謀、故有是命。公與張公協謀效力、大飭邊備。十一月、召給札條時弊、公陳十事曰：定規模、振紀綱、勵風俗、明賞罰、重名器、遵祖宗之法、杜邪枉之門、裁任子之恩、限改秩之數、蠲無名之賦。其杜邪枉之說曰：比來左右近習名聞於外、士夫以身附炎、將帥以賂易官。隆興改元、都督府建、除禮部侍郎參贊軍事。張公初謀大舉北征、公以爲不若養威觀釁、俟萬全而動、從之。會虜盛兵聚糧邊邑、諸將謂秋高必來、不若先之。張公以爲然、乃表出師。是時六月、師興、出虜不意。幕府次盱眙、大將李顯忠、邵宏淵連下虹、靈壁二縣、禽其大將大周仁、蕭琦、縛至麾下。將乘勝長驅。公曰：盛暑興

師、深入敵國、皆兵家所忌、宜亟還。張公亟檄顯忠班師、而顯忠等已進破宿州。虜亦大發河南之兵以來、顯忠身鏖戰城下、自朝及晡、殺傷過當、虜氣燄焉。中興以來、王師之捷、鮮有此舉。會夜雨、不相知而驚、虜潰而北。我師潰而南、而流言以爲我師大失利。虜且乘勝而至、主和議者又侈其說以搖衆。公從張公駐兵不動。潰兵聞之、稍稍來歸。討其實、所亡失財數千人。張公檄公亟入奏。公見上具道其事、且曰：勝負兵家之常、願勿以小衄沮大計。上曰：朕任魏公不改。張公抗章待罪、公亦請從坐。上不得已、詔皆貶秩二等。湯思退復相、公以嘗論思退請罷、不許。諫官尹穡陰附思退、議罷張公都督、復以宣撫使治揚州。公上疏曰：今使浚去都督、甚重之權、居揚州必死之地、凡所奏請、臺諫沮之、如此則人情解體。浚方爲賊餌之不暇、且浚近畫兩淮備禦之計、惟保險清野、可挫賊鋒。陛下旣許

之矣。今議者之言乃如此。雖浚盡室以往、有死無避、然浚負天下重望、一有蹉跌、人情震駭、臣恐江上之事將有不可測者。議者但知惡浚而欲殺之、乃不復爲宗社計。願詔中外相與協濟、使浚得以畢力自效。上感悟、即召張公復開督府、卒召相之。然不數月、竟爲思退、穡等所擠、遣出視師、遂不復返、而公亦累章請罷。明年五月、乃除寶文閣待制、知泉州。公固請祠、除提舉江州太平興國宮。及思退貶死、上乃思公言、太學生數百人伏闕下拜疏、請起公。上勞之再三、公引歐陽脩、司馬光之言、極論朋黨之弊、以爲紹聖、崇觀以來、此說肆行、實基靖康之亂。近歲宰相罷黜、則其所用之人不問賢否、一切屏棄、此鈎黨之漸、非國家之福。除吏部侍郎、尋兼侍讀、同修國史。嘗言、本朝之治、惟仁宗爲最盛、願陛下治心修身、立政用人、專以仁宗爲法、此今日之要也。大臣受任不專、用事不久、不能以

一身當衆怨、此今日之敝也。人才國家之命脈、氣節又人才之命脈。祖宗盛時、作成涵養、名公巨人爭以氣節相^⑥。高、自蔡京、秦檜用事、摧喪略盡。今日之戒也。於是上有意大用公矣。會錢端禮起戚里秉政、駸駸入相、館閣之士相與上疏斥之、皆爲端禮所逐。工部侍郎王弗陰附之、公抗疏言、本朝無以戚屬爲宰相者。及進讀寶訓、適及外戚事、公又極言。本朝家法、外戚不預政、最有深意。上首肯久之。端禮由是深忌公。公力求去、除寶文閣直學士、知漳州、改建康府。公既去、而端禮亦卒不相。二年^⑦、召爲吏部尙書。時上猶未能屏鞠戲、又將畋白石、公上疏力諫、至引漢桓^⑧、靈、唐敬穆及司馬相如之言以爲戒。後數日入對、上迎謂公曰、前日之奏備見忠讜、朕決意用卿矣。十二月、詔館虜使、遂拜同知樞密院事兼參知政事。首薦名士陳良翰、林栗、劉朔。時龍大淵、曾覲以舊恩怙寵、士夫頗出其門、



言者往往獲罪。及公館客，大淵爲介，公見外不交一言。大淵造門不答。偶中書舍人洪邁來見，語公曰：「人言某當除某官。」公曰：「何自得之？」邁以淵覲告，公具以邁語質於上前曰：「臣不知平日除目，兩人實與聞乎？」抑密伺聖意而竊弄國權也。上曰：「朕何嘗謀及此輩。」即黜二人。知樞密院事虞允文入謝德壽宮，高宗語之曰：「卿與陳俊卿同在樞府，俊卿極方正。」公以兩淮荆襄藩籬未固，言於上曰：「備邊經久之計，不過屯田積粟，增陣濬隍，訓卒練兵而已。然今日任人太拘，而邊郡尤病。謂宜廣求人才，勿間文武，使陳所見與定規模，悉如太祖皇帝所以遇李漢超、馬仁瑀輩者，分之以兵，使自爲守，饒之以財，使自爲用。虜使來庭，公以故事押宴，使者致私覲，其牘不名，公卻之。使者乃書名。虜移書邊吏求歸亡命。上顧輔臣議所答，公曰：「俘虜歸叛亡否，此載書也。」鎮江軍帥戚方培克，軍士嗟怨，言者

及之。公奏：「外議內臣中有主方者。」上曰：「朕亦聞之。」方罪固不可貸，亦當併治譽阿者，以警其餘。即詔罪方而以內侍陳瑤、李宗回付大理，究其賄狀。虜使來賀會慶節，上壽適郊禮，散齋不用樂，公請令儉者以禮諭之。上親郊，霖以震，宰相葉顥、魏杞策免，公亦請罪。越數日，除參知政事。言於上曰：「執政當爲陛下進賢，退不肖，使百官各任其職。至於細務，宜歸有司。庶幾中書之務稍清，而臣等得以悉力於其急務。」從之。臣梁克家、莫濟求外補，公言二人皆賢，其去可惜，蓋有甚間者。於是劾洪邁姦險詭佞，不宜在人主左右，黜之。七月，宰相蔣芾以憂去，公獨當國，尋兼知樞密院事。請中出恩澤者，許得寢之。上曰：「卿能爾，朕何憂？」每勸上親忠直，納諫爭，抑僥僥，肅紀綱，講軍政，寬民力，用人隨才，無求其備。異時將帥不見執政，莫別能否，公曰：「召三數人與語，察其材智所堪而識之。」首減閩鹽罷江西羅

及廣西折配米鹽、蠲諸道積逋以大萬萬計。上於公言聽諫從，於是政頗歸中書矣。龍大淵死，上念曾覲欲召之。公曰：「自陛下出此兩人，中外詠歌聖德，今復召，願罷臣。」遂止。殿帥王琪奉詔行視淮城，還薦和州教授劉甄夫，上命召之。公與同列請其所自，上曰：「王琪稱其才。」公曰：「琪薦將佐職也，何與教官？」上曰：「可召問之。」公退責琪，皇恐不知所對。會揚州奏琪傳詔增城，今既竣事，公請於上，上曰：「無之。」公曰：「此矯制也。」退至殿廬，召琪詰之，琪叩頭汗下。公亟奏曰：「詔邊臣增城，此大利害，大紀綱，大號令也，而琪得詐爲之。」令甲曰：「詐爲制者殺。」於是詔削琪秩，罷之。先是，密命下諸軍，朝廷多不與聞，公與同列請自今百司受詔處事，並聞朝廷而奏審焉。至是復以爲言，從之，尋收前命。上諭執政曰：「禁中欲取一飲食，亦奏審乎？」公言：「祖宗成憲著在令甲，且如令三衙發兵，則密院不可不知，每事奏審，

乃欲取決於陛下也。今命下，復收，中外惶惑，且將併舊法而廢之矣。意者非陛下意也，將無小人因此陰以微言上激雷霆之怒乎？」翼日面奏，上曰：「朕豈以小人之言疑卿等耶？」同知樞密院事劉珙進對，語切忤旨，詔除珙端明殿學士，在外宮觀，公力爭之曰：「當與大藩。」上乃以珙帥江西。乾道四年十月，制授尙書右僕射，同中書門下平章事，兼樞密使。公爲相，以用人爲己任，所除吏皆一時選。尤抑奔競，獎廉退，或才可用而伐閱尙淺，即密薦於上，退未嘗以語人。有忽被召對除用，而不知所自者，如名儒朱熹，公三薦之，熹不知也。每接朝士及牧守來自遠方者，必問以時政得失，人才賢否，見給舍必勉之曰：「朝廷政令，公等意有未安，勿憚舉職。」又以兩淮備禦未設，民無固志，請於揚和二州各屯三萬人，仍書民數，率三男子者家一人爲民兵，要使大兵分屯要害，以揜腹背，民兵各守其城，以



相犄角。時虞允文宣撫四川、公薦其才堪宰相、上即召允文爲樞密使。至是拜公左相、允文右相、乾道五年八月也。允文建議遣使北虜、以陵寢爲請、公面陳未可、復手疏以爲恐慕虛名而受實害、事得小緩。曾覲秩滿、公預請以爲浙東總管、上曰、覲意似不欲。公曰、屬者陛下去覲甚盛、或謂覲必復來、今果然。願捐私恩、伸公議。又詔進覲官、公曰、無名。會遣使賀北虜正、乃請以覲爲介、還以故事遷其官。樞密承旨張說欲爲親戚求官、憚公不敢言。會公予告、請於他相、得之、公卒不與吏部尙書汪應辰舉李垕應制、有旨召試、權中書舍人林機言垕獨試、非故事。公奏元祐中謝惇亦獨試、乃機與諫官施元之意沮^②。汪應辰不爲垕也。公因極論其姦、遂罷二人。明年允文復申前議、上以手札謀於公公上疏力爭之、繼力請去。以觀文殿大學士知福州、兼福建路安撫使。辭行、猶勸上以泛使未宜

輕遣。竟遣之、不獲其要領云。曾覲亦召還、遂建節旄、歷使相、以躋保傅、士大夫莫敢言者。公至福州、政寬而嚴於治盜。明年定海水賊倪郎侵軼閩廣、海道騷然。公召統領官鄭慶授以方略、慶頗逗留、以風爲解。公植旗於庭、視其所鄉、慶懼、晝夜窮^③。追遂悉禽之。上嘉其功、特遷銀青光祿大夫。閩鹽故事、官自鬻之、轉運判官陳峴議改爲鈔。公移書執政、以爲法行三十年、州縣稍無橫斂、百姓亦各安業、此不爲不利矣。今欲改之、不可。竟改之、已而果不行。又明年力請投閑、遂以提舉臨安府洞霄宮歸里第。淳熙二年、再命知福州、民習其政、不勞而治。會有詔書發本道戈船及選卒、公奏留其半。州大旱、且火、且星隕、且地震、公悉以聞、上賜笏帶藥物。三年、太上皇帝聖壽七十、慶賜宇內、公以紹興從官、特轉金紫光祿大夫。四年、累章告老、上遲回累日、乃除特進、提舉洞霄宮。五年五月、起判隆興

府改建康府、江南東路安撫使兼行宮留守、且詔入奏。既至、都人聚觀咨嗟、喜公之將復用也。見于垂拱殿、上爲改容加敬、命坐賜茶、宣問款至。公因從容言曰、擇將當由公選。臣聞諸將多以賄得之、軍政大壞矣。上曰、前日鄭鑑亦云。鑑公婿、故及之。公曰、鑑以小臣論事、陛下和顏聽納、中外仰服。然諸將交結、用不以材而以貨、則下不服。上曰、然。又曰、陛下用人當辨邪正、當由朝廷。聞曾覲王抃招權納賄、薦進人才、而皆以中出行之。口語籍籍、恩歸此輩、謗萃陛下。上曰、小者或勉徇之、大者此輩何敢預。公曰、此輩未必敢明薦也、或伺知聖意而傳於外耳。禁中一事外間必聞、皆此曹也。願嚴戒勅。上遣中使賜金器犀帶茗香。明日辭行、因奏曰、臣去國九年、重入脩門、見都下穀賤人安、惟是士大夫風俗大變耳。上曰、何也。公曰、曩者士夫私趨覲、抃者十一二、尙畏人知、今則公趨之者十七八、不畏人知矣。人

才進退由於私門、大非朝廷美事。上曰、抃不敢。覲時有請、朕多抑之、繼今不復從矣。公曰、陛下之言雖如此、其如外間謹傳、某由某薦、某出某門、此曹聲生勢長、臺諫侍從多出其門、朝廷亦唯命是聽、孰敢爲陛下言者。如將帥賄交又特甚者、不惟士夫言之、吏卒亦能言之、獨陛下以爲無有耳。陛下信任此曹、壞朝廷之紀綱、廢有司之法令、敗天下之風俗、累陛下之聖德、臣實痛之。願陛下勿忘臣此四言者。上曰、卿到建康、見兵將如此者以聞。公去建康十五年、父老喜公之來、所至相聚以百數、焚香迎拜。公爲政平易寬簡、悉罷無名之賦。府有軍屯、異時多爲民害、公爲出令、犯者以軍法論、諸軍肅然。行宮管鑰、宦者主之、留守待之如部使者。時節按行殿中、則宦者置酒西嚮坐、而留守爲客、甚或邀飲其家。公悉罷之。建康距淮南一水間、每邊頭利害、知無不言。北境有盜百餘、焚掠淮陰、公請嚴禁、吾民越疆盜馬者、增瀕淮縣



兵之戍者不受自北來歸者。先是上念諸軍有孥衆而廩不贍^①者、出緡錢界三總領司、各十萬、俾市易、歲取子錢之五以優給焉。有司旁緣、盡籠商賈之利、陰奪關市之征。公請罷之、而歲捐券三十萬於一司、給孥衆者半、犒大蒐者半。時上前下文書于外、多不用符璽、謂之白劄子、率用摺御特送、而廷勞同王人。至是樞密承旨王抃遣所親以白劄來、吏白近比公不奉^②詔、因上疏曰、號令出於人主、行於朝廷、布於中外、古今所同也。間有軍國幾事、或禁中細札、亦必用璽書行之、此所以示信而防僞也。今乃直以白劄諭指、險度事宜於數百里外、異時緩急、或錢穀所出、或師旅有興、或邊防是經、繫乎國家大利害者、能保其無僞乎。上手札愧謝。公尋上章復告老、答詔不允。除公少保、益封。公固辭、上手札尉諭再三、乃受。時江東旱甚、上詔公預講荒政、公請貸米斛三十萬、穀二十萬、分州縣振糶、而又繼以發常平之粟、除田租之

逋^③。罷^④淮東之糶、蠲米商之征。從之。惟所貸穀米才得十七分之一云云。公^⑤設施有政、米舟四集、民無流徙。八年正月、復告老、累詔不允、而公請益堅。二月、除醴泉觀使、進封申國公。九年正月、公年七十、元日、即謝醴泉之廩、復申前請。凡五表、上手答卻其章。是歲親郊、召公侍祠。公固辭、又三表及手疏告老。上不得已、詔以少傅致其仕、進封福國公。有司以法當給全俸。公按富文忠公故事、獨受少傅之祿。餘悉上還。十一年十月七日、上以公生朝、遣使賜手詔、金器藥香。十二年、又詔公侍祠園丘、且來歲增上太上尊號、且慶壽陪班。上諭宰臣曰、陳丞相久不相見、宜趣其來。復手^⑥札書其末曰、付陳少傅、而不名。公竟固辭。慶典告成、冊拜少師、進對魏國公。及屬疾、且革、夜半手書一紙示諸子、勿祈恩澤、勿禱浮屠、勿立碑、請謚。遺表惟以用忠良、復境^⑦。土爲請。詰朝、整冠定氣、安卧而薨。得年七十有四。公忠孝天至、尤好禮。終日

無情容。雖疾見子孫必衣冠。遇人無少長以一誠實。一言終身可復。平居言若不出諸口。而在朝危言正色。辨邪正。斥權要。無所顧避。然心平氣和。無近名意。處國事顧大體。務持重。在中書尤愛名器。抑僥倖。故小人多不樂。上屢稱其忠誠爲賢相云。公性寬洪。無私喜怒。泛然若無所親疎。而好賢之心實篤。雅善故端明殿學士汪公應辰。敷文閣學士李公燾。嘗曰。吾待罪宰相。無過舉者。二公之力。治郡尙風教。民有骨肉訟者。譬以義理爭者。感泣。自奉甚約。食日一肉。而一衣或二十年。祿賜多以分人。撫愛宗族。恩意甚備。內外總功必素服終喪。在官不受饋問。建康諸部使者及諸大將。故事有月餉。公不欲異衆。別儲之以周士之貧者。將去。尙餘萬緡。悉歸之官。公於外物澹然。獨喜觀書。病猶不釋。其學一以聖賢爲法。於釋老未嘗問。嘗有詩曰。吾方蹈孔孟。未暇師粲可。有文集二十卷。曾祖諱仁。祖諱貴。父諱誦。皆以公貴。贈太師。

沂昌、冀三國公。曾祖妣黃氏。祖妣李氏。妣黃氏。卓氏。贈徐昌、越、冀四國夫人。配聶氏。封唐國夫人。人子男五人。寔。朝奉郎。通判泉州事。守。承議郎。權發遣漳州事。定。承奉郎。蚤卒。必宿。皆承事郎。女四人。長適進士黃洧。次適故著作佐郎鄭鑑。再適太常少卿羅點。次適奉議郎。通判漳州梁億。餘幼。孫男四人。埜。承務郎。址。坦。承奉郎。塾。未官。女六人。銘曰。宋十一葉。有赫有業。振天之綱。乾道惟皇。惟皇惟肖。肖我高廟。肖我祖宗。追而與同。慶曆元祐。紹興乾道。宋之聖時。郅隆四之。據國宿憤。信威朔狁。六月之師。周宣之奇。大醜仁琦。櫟之以歸。自此疋馬。誓不南下。謨明何人。猗張與陳。談者仰曰。曰大小都督。大勳駸駸。卒壞于成。張公既喪。久艱厥相。皇相陳公。奮熙載庸。正臣表治。萬物吐氣。勸皇德心。燭理自明。皇德一正。萬國以定。一時群材。驩爲公來。若鳳斯翽。萬羽斯會。色夷氣溫。皇知愛君。君有難啓。事有難止。不費頰



儒藏

齒、如石投水。乾道之隆、萬祀攸崇。走職太史、作誦萬祀。

楊萬里撰 《誠齋集》卷一二三

校記

- ①多：原作「名」，據宋浙江刊本《晦庵先生文集》改。
- ②詔：原作「語」，據右引改。
- ③幣：原作「弊」，據右引改。
- ④勝：清賀瑞麟《朱子文集正訛》改作「勢」。
- ⑤先：宋浙江刊本《晦庵先生文集》作「必」。
- ⑥又：原作「久」，據右引改。
- ⑦傳：原缺，據右引補。「增」上原有「可」字，據上引刪。
- ⑧尋：原作「等」，據右引改。
- ⑨又：原作「受」，據右引改。
- ⑩康：原缺，據右引補。
- ⑪「中」下原衍「外」字，據四庫本《誠齋集》刪。
- ⑫渝：原作「踰」，據右引改。
- ⑬宦：原脫，據右引補。
- ⑭「建康府」下原衍「康府」二字，據右引刪。

⑮失：原作「夫」，據右引改。

⑯相：原脫，據右引補。

⑰二年：原作「三年」。據《宋史》卷三三《孝宗本紀》錢

端禮罷參政在乾道元年八月，陳俊卿以吏部尚書除同知

樞密院事兼參知政事在二年十二月。今據改。

⑱桓：原作「戚」，據右引改。

⑲講：原作「請」，據右引改。

⑳罷：原作「能」，據右引改。

㉑收：原作「攸」，據右引改。

㉒不可：原脫，據右引補。

㉓下：原作「不」，據右引改。

㉔沮：原脫，據右引補。

㉕窮：原作「究」，據右引改。

㉖賄：原作「賂」，據右引改。

㉗曰：原脫，據右引補。

㉘不：原作「下」，據右引改。

㉙宦者：原作「官者」，據右引改。下句「宦者」同。

㉚瞻：原作「瞻」，據右引改。

㉛奉：原作「春」，據右引改。

㉜罷：原作「羅」，據右引改。

㉝公：原脫，據右引補。

㉞手：原作「乎」，據右引改。

㉟境：原作「竟」，據右引改。

㊱倖：原作「僥」，據右引改。

㊲夫：原作「天」，據右引改。

㊳塾：原作「熟」，據右引改。

宋儒碑傳集卷一百十七

胡昌齡 潘朝卿 任續 林光朝 孫介

邊友誠 李燾

宣義郎致仕賜紫金魚袋胡公昌齡墓誌銘

江西多名士、吉爲冠。自吉言之、廬陵胡氏爲大族、羣從百數、多通經工文章、守禮典。靖州治中份、宣和己亥上舍釋褐。循州錄事參軍敷、中甲辰進士第。高廟龍飛、策士於淮海、忠簡公以直言擢殊科、益宏厥家。其後大理寺主簿鎬、知蒲圻縣籍、相繼登第。秋舉殆無虛榜、他姓莫敢爭衡。公於忠簡雖從姪、而年相邇、同事蕭先生楚學春秋、俱號高弟。自公之祖已貢於鄉、公當弱冠、侍其父赴大比試、父升而公黜。公喜曰、吾固不欲父子同薦、妨他人。自是才名章章、人謂一第可唾手取。迨年四十始上春官。又二十五年、當乾道己丑、乃以特奏名對策萬餘言、唱名入高第。初補將仕郎、類試中選、授迪功郎、靜江府司戶參軍。

帥守張敬夫、儒宗吏師、不輕許可、咨公以府事、潔廉正平、闔府稱美。滿一歲謝去、敬夫曰、君力尙壯、何去之果。公曰、某昔銳意亢宗、今蹉跎至此、姑欲應京秩、格爲門戶計耳。敬夫不能奪、賦詩餞之。改承務郎致仕。時淳熙四年四月也。疊值德壽宮慶壽恩、十年賜緋衣銀魚、十三年轉承事郎、賜服金紫。壽皇內禪、轉宣義郎。蓋家居優游者十有六年。紹熙三年十月二十七日、以疾卒、享年八十。明年九月壬午、葬縣之儒行鄉仙壇嶺母塋之側、治命也。公諱昌齡、字長彥。曾大父諒、將仕郎、娶臧氏。大父方中、娶歐陽氏。父子母羅氏、生公九年而沒、遺言勉公學。公泣而誌之、終身焉。事繼母劉氏、解氏俱盡孝。解先適黃氏、有女、嫁公從弟、生子棟而寡。公收恤教育、使有成立。紹興己卯、慈寧慶典、解封孺人、創及老堂、忠簡公爲之記。家故貧、銖積寸累、不憚苦節、獨於賓祭致厚。族姻不能自存者、周急無少靳。自幼至老、學日益富、每著書、援證



古今是是非非下筆不休。喜藏異書，手自讐校，有文集五十卷。娶朱氏，先一年卒。四子：長椿、季根，早世。曰柢、曰枸。四女，存者亦兩人：張沅、劉之瀟，其婿也。孫男曰芡、曰曠，女許歸歐陽瑩。余與公游久矣，姪繹實娶公仲女，不幸偕亡，而公念舊弗替。年過八十，猶歲以詩文遺余，大篇小楷，少年者自謂不及。公今已矣，來請銘，其可辭。銘曰：

而孝於親及宗姻，而儉於身，豐祭賓，少而篤學，老益勤。仕焉遽止，晚乃榮。初終誰毀譽，則聞謂銘不信，諛鄉評。

周必大撰 《平園續稿》卷三二

承事郎潘公墓誌銘

公諱朝卿，字春卿，姓潘氏。某先君子與故侍講陳公鵬飛少南爲輩行，以諸叔父從之學。少南之門，授經數百人，叔父亟稱同舍生，則曰永嘉二潘公。此兒時所常常熟聞也。少南每過先君子，則館于叔父之心

遠堂，嘗賦詩焉。諸父下世，而詩不存。某蓋晚而後識公，因道兒時所聞語，恨不能記。所謂心遠堂詩者，公欣然爲誦之。且及少年時羣居事，迺知諸父之言信，前輩尊守其師說，不墜忘如此，而甚敬公。公學不但爲舉子業，會撮古今爲書，號經史事統。然試有司輒不利。秦太師之專也，私場屋，有與其子少保雅故，能不以糊名，即上第。少保者，亦在永嘉時同舍生也。嘗從容諷公附己，公謝不就。已而少南以忤秦意，逐炎荒，公遂一語不復及場屋矣。以其學力行於家及其族。至於昏友鄉黨，他人德色，公獨易易。益好讀易，一旦課一卦，室以蒙。名齋以復名，堂以視履名，園以觀頤名。某旣甚敬公，又與其子雷煥同爲乾道壬辰進士。雷煥掾宣城，丁母何氏夫人憂，某適罷丞三山，時時相往還。間從公蕭寺中，扣所詣處，令人深省。嘗與士友十數^④，人造其門，午夜坐，客醉淋漓，公年已七十餘，獨儼然無倦意。五鼓作，雷煥即所館治藥作



粥糜客問夜者公起居狀如何得無勞乎則應曰大人趣使來焚香課書良久矣由是益敬公父子始約以兒女爲兄弟紹熙之元某官衡陽遣其孫子順來成禮是年十一月甲寅公卒享年七十八以子遇慶典累封承事郎致仕賜緋魚袋子一人待衢州常山縣闕一女爲尼孫三人長法剛早卒次子順也次蘄老二女孫長適直龍圖閣故宗正少卿鄭伯熊景望第四子處仁一未行雷煥以三年十二月丙午奉其柩合於所居鄉橫塘何夫人之墓來乞銘某早衰苦於文士大夫求銘其父祖者率不克即如所欲於公爲諸父之執爲同年家丈人又爲息女之尊舅卒不得臨葬不得遣且吾女不得一日奉盥匱也而悲以慙遂強次之大父彥先墓誌在忠簡許公景衡少伊集中父安中墓誌在少南集中二文行世故不序其一潘兄傑也銘曰

維祖維父銘在百世我銘如何尙亦勿敗

陳傅良撰《止齋先生文集》卷四九

恭州太守任君續墓誌銘

君諱續字似之潼川郫縣人系出漢廣阿懿侯敖懿侯十六世爲晉安東將軍顓顓九世爲隋潯陽太守壁謫掾閬中以死子孫因家焉壁生穎穎生業業生雅相唐高宗其曾孫晚疇皆達官大和中詔以二龍旌其里晚生椿嘗參梓州軍遂徙郫之興城椿生韜符韜符生崇誥崇誥生琦琦生仲簡仲簡生伯傳登景祐五年乙科仕至尙書都官郎中是爲君之曾祖都官生庾終普州司理司理生忠原終朝請大夫知黎州君之祖與父也文獻相承衣冠不絕蜀人論氏族者推焉君少以父任爲將仕郎父疾革戒君曰興城之任世以儒科顯爾不可忘命易今名字君泣拜而志之紹興七年起家爲漢州雒縣尉十三年又尉昌之永川夙夜銜父訓懼從事不能卒業十九年求監潭州南嶽廟二十一年遂中進士第選澧州

州學教授。晨策羸馬，從一僮謁守丞，退則繙校遺編，盡日與聖賢對，他無所問。當路交薦，二十八年自承直郎，改左奉議郎，復求開州教授而去。隆興元年，就遷夔路轉運司主管文字。朝廷歲糜緡錢數百萬市馬川陝，歷梁洋，下襄郢，山行險遠，道斃之餘，至臨安者皆骨立。有大吏請治舟峽中，乘漲水載馬東下，既駛且安。詔從之。無何，官吏奉行弗虔，效率者又加迫促，資糧芻粟，篙師櫂夫一切取辦於民，急若星火。州縣大擾。乾道二年春，君適還朝，上疏言請調他道，禁旅分屯夔峽，代民駕舟，事已教閱如故。異時荆楚出師北伐，亦可爲上流聲援。召對，下其說。君因論三事曰：大臣雖罷政，猶當體國，安得苟且便安？宜使分守邊要。漢部刺史察舉二千石，今監司專繩小吏。夔鹽惡而直倍，漕檄州、州檄縣，州縣計口抑民，瘡痍一道。上嘉納之，擢守涪州。未上，易恭州。四年春，蜀大旱，常平義倉素空竭，姦氓姚京給言官廩有餘，誘致四

方流冗，冀以挺亂。君知其謀，既案京抵罪，即捐俸錢五十萬募民入粟，閭境爭勸趨之。饘粥廬舍，規畫有序。至者如歸，帖帖無事。璧山有淫祠，民病輒解牛以祭。君下令禁止，訛言神云：守奪吾祀，民與牛皆將疫死。郡人大恐。君知廟巫實導之，係郡獄，巫駭服。巴縣令貪虐，君劾去之。其子飛謗於朝，言者因論君前議。舟師爲迎合，八月罷郡事。六年夏，主管台州崇道觀，命至而君以疾卒於左綿。實九月戊子也。淳熙丙申冬，葬仙雲山之下，得年五十有七。積官左朝奉大夫。君靜重廉介，篤學喜爲文，身修家齊，勇於爲義，嘗傾產以賙嫠嫗，教養孤甥，迄有成立。仕宦三十年，先疇一無所增，身後妻子假貸以斂。君凡四娶，二李氏，鮮于氏，皆贈宜人。今夫人王氏，御史利用之女，有賢稱。子男七人：義山，興元府西縣尉；義問，義路；義舉，義端；義明，義正。女三人：一嫁文林郎馮適之，一嫁進士鮮于糾宗，一尙幼。所著書號仙雲集者二十卷，又有任

氏春秋十五卷、春秋五始、五禮論五卷、篆隸石刻譜三十卷。歲戊寅冬十月、君調盛山教官、過金陵、予分教在焉、以同年進士置酒道舊、見君氣貌瓌偉、議論慷慨、意其將爲世用、孰謂君止此也。比歲識其子義、問於行在所、博洽能文、奧篇隱帙、問無不知、君可謂有後矣。任氏其興乎。義問將還蜀、出石泉太守章森狀君之行實、乞銘於予、義不可辭。銘曰：謂君窮時既逢、謂君通志弗充、德之洪報也豐、劬爾躬、後其隆。

周必大撰 《省齋文稿》卷三四

朝散郎充集英殿修撰林公光朝神道碑

子貢問、鄉人皆好之、何如。孔子答以不如鄉人之善者好之。孟子告齊宣王以諸大夫曰賢爲未可、必國人皆曰賢、然後察而用之。是二者、古今觀人之要術、於吾艾軒尤信。初、予與著作佐郎劉夙賓之爲同年進士、後識故相陳正獻公、皆莆人也。賓之博洽剛介、

正獻道德隆重、其不輕許可則均。每論其鄉之人物、賓之曰艾軒吾師也、正獻曰艾軒吾友也。後予官太學、會諸生、則亦人人推林艾軒。蓋其博學篤志、手不釋卷、出入起居、必中規矩、事親孝、御下仁、行己恭、執事敬、勇於義、審於思、善并美具、宜爲當世所宗。然未嘗著書、惟口授學者、使之心通理解、常曰、道之全體存乎太虛、六經既發明之、後世注解固已支離、若復增加、道愈遠矣。文辭古雅、不事雕鏤、如清廟朱弦、可一唱三嘆也。五十方奏名、則有命焉。於時朋遊若門弟子宦達已多、交賀於朝、區區一第、何足爲公重。欲其因仕行道耳。夫未仕而鄉人之善者以爲師友、通國之人皆謂之賢、既仕則又爲之喜、由是天子察而用焉、茲豈聲音笑貌所能致哉。誠之不可揜也如此。艾軒公自號也。隆興元年調袁州司戶參軍、未上召對、改左承奉郎、知永福縣。大臣論薦不已、召試館職。乾道五年七月、遂入秘書省爲正字、兼國史編修、實



錄檢討官。六年佐著作兼司勳司封郎官。七年遷著作郎兼禮部。八年進國子司業兼太子侍讀史職如故。九年請外以直顯謨閣提點廣西刑獄。淳熙改元易使東路。二年茶寇自荆湖剽江西薄嶺南其鋒銳甚。公自將郡邑兵檄摧鋒統制路海本路鈐轄黃進各以其軍分控要害。會有詔徙公轉運副使公謂賊勢方張留屯不去督二將遮擊俘獲相繼賊驚懼宵遁。上聞之喜曰林某儒生乃知兵也。加直寶文閣。明年召拜國子祭酒兼太子左諭德。四年二月乙亥駕幸國子監命講中庸上大稱善面賜金紫。己丑除中書舍人爲誥有古風。坐繳奏新御史除目改權工部侍郎請外以朝散郎充集英殿修撰知婺州引疾提舉江州太平興國宮。五年五月六日卒。此其出處大略也。公諱光朝字謙之世爲興化軍莆田人。曾祖南一祖繁父勉贈奉議郎母恭人曾氏享年六十有五。是歲十月二十葬本縣麥堆原之北娶徐氏封恭

人。六子今存者宜季能季宜季某官。一女適某人。猶子成季力學而賢爲公作家傳正獻公作祠堂記凡公行誼閱閱已詳而其子姪復以先志來求墓隧之碑予念昔在兩省公適登第典貳秘書公來著庭佐春官公爲郎掌史事公爲僚晚忝宮端同事壽康皇帝前後五聯官曹大而道德性命之理無不講內而閨門寢食之私無不及讀書未達賴公析疑屬文未工資公指瑕平居相愛殆同天倫公之本末皆親見熟察非但傳聞而已是宜爲銘其銘曰

尙賢好修志誰不勤汲古纂言業誰不精孰如林公好學而醇所持者正所勉者誠身猶布衣人曰公卿年未強仕人曰老成時雨之教其化也深水上之風渙然有文瞻彼莆中冠蓋如雲祭公之社過者必欽

周必大撰 《平園續稿》卷二三

承議郎孫君墓誌銘

淳熙五年余贅倅天台已而會稽孫君應時季和尉



黃巖見其學行吏事詞采翰墨動輒過人與之定交。問其家世始知其父雪齋先生之賢甚悉。方與四方士友期季和以遠到開禧二年二月二十三日將赴邵武貳車忽一疾不起遂以朝奉郎致仕。識與不識莫不痛之。三年十月二十五日其母太孺人張氏繼卒于家。季和之兄應符遣其子祖祐來見余曰祖父雪齋之亡季父嘗持故國子錄沈君煥所狀行實乞銘于晦菴朱公公許以銘曰古所謂志士仁人今復見之恨不及展龐公之拜。銘文見屬其何敢辭。既而公亡迄不果銘。今不幸祖妣繼季父以逝顧當今孰能繼晦菴者敢泣以請。余以衰病掛衣冠而迫于上旨收置北扉震懼固辭不獲命念季和之交誼又不可以固陋爲解讀其所示事實見雪齋七十歲時倣程公大中自誌其墓有云雪齋野叟孫介字不朋越之餘姚人也族緒寒微難援譜系但聞五代祖自睦州徙居此力田自業余曾祖諱亮生二子余祖爲長

諱政孝慈馴善鄉黨稱之。生四子長從釋氏爲昇師。次爲十伯父次爲十三伯父次先考十七府君諱子全。昇師持苦行而有高識兼通儒書喜聽賢士大夫語歸葬父母守冢三年則聚諸弟之子躬授語孟詩禮漸變其家爲儒。已而余生于政和甲午八月辛未實十三伯父之子命以爲先考嗣。四歲能離家入郡庠隨兄壽朋讀書日數百言。七歲學于鄉先生胡定翁家聞本生伯母及先考之訃號噎奔喪哭臨以時孝悌之端發于天性衆稍驚異。其後兄常攜寓鄉館側聽講說文義粗通。然退侶燕朋弛怠不進。十四五潛喜哦詩兄使誦杜集頗費日寡益。十八九始學舉子賦遽罹兄喪哀痛之情如失乳哺如割肺腸偃偃無相幾不自立。因從畏友厲德輔肄業紫溪漸漬稍勝。既冠迫于凍飢踵兄故步授書自給益發憤自課經史注疏且閱且抄不敢荒逸竊志古人務爲實學時文非其所好而又無師屢試不利決意退藏尊拜

先聖、覬扶吾道、晨誦孝經、以致時思、人多非笑、不之恤也。壯室張氏、既得三子、捨館歸訓、鬻田就竭、人不堪其憂。五十九歲、始幸小子應時試入太學、閱三載、遂叨中進士科。其後長子亦廁鄉選、余于是家居寡出、諸兒分寓、歸辦菽水。今既七十、已隨應時滿尉黃巖、還鄉、閉門養疴、不交人事、挾策自適。凡余自少至老、備嘗艱阻、不可具言。初侍所後母陳氏、遭義兄陵暴、慨然景念孤臣孽子、竊以舜、曾、閔爲師、承意調諧、各終其世。紹興乙丑、仲兄有重罪、余未諳律令、以身援之、幾併坐縲紲。偶值星變、原赦俱免。其他困阨危難、苦心衡慮、改過遷善、迄能自持厥躬、不見薄于鄉里。吾家父行享年多止五十、今幸同產次兄七十有七、與余白髮相保、夫妻兒婦歡聚無缺、捫心感舊、粗足樂矣。然余所以行己立心、不忘恭敬、近而冠履、微而紙筆、未嘗輒輕易服用。嘗謂、不能動天地、不足以誠、不能正室家、不可以爲道。故其在畎畝、未始一

日忽忘君民。對妻子惟恐食息僭違禮教、一言一事必求合于人情、可無怨悔者、而後出之。其受人子弟之託、教之不啻己子、隨才指授、專事講釋、至老不倦。與人交不敢失信、廢禮受侮不敢爭忿、蓄怨平居確意安貧守分、不萌非義之求。聞人有善、心恨弗及、見人之惡、口不忍言。自信不移、量力而動、平生謹畏、求寡乎愧怍而已。噫、使余少年微有依怙、不歷屯剝、壯歲窒于理性、不明否泰、未必能操心慮患、固窮順命、亦何以至于今哉。凡吾子孫勿墜家學、推本源流、念之敬之、此吾之實錄也。余三復而嘆曰、嗚呼、其可謂躬行篤學、樂道知命之君子矣。凡君平生操履、大概已見于此、而國錄沈君所狀尤爲詳備、余復何所措其辭。至于蓬藿之居陋甚玉川、而門堦戶庭咸有銘勒、簞食菜羹終日不飽、而潔齋整齊如對大賓、子良婦教、孫枝競秀、家法修明、門雍戶肅、下逮僮僕、舉訢訢也。其遺風餘範、至今藹然、亦足以想見其典刑矣。



初君以淳熙十一年太上皇后慶壽恩封承務郎致仕。十三年上皇再慶進承奉郎。十五年正月二十八日甲子卒于泰州海陵縣丞官舍享年七十有五。後應時陞朝累贈承議郎。張氏同邑人也。曾大父恠大父儼父曰休封太孺人享年八十有六。三子長曰應求後君四年卒。次曰應符次即應時也。一女未嫁而夭。孫男三人祖祐祖詒祖開。孫女五人長適文正范公五世孫克家。次適宣教郎知婺州義烏縣丞胡衍。次適里士胡伯韶。次許嫁四明沈嚴曾。一尙幼。曾孫男二曰珍曰瑤。君初葬于燭溪湖潘山之塢穴頗不安。季和之亡得吉卜于新奧竹山始遂遷葬。今將以嘉定改元某月某日奉太孺人之柩祔焉。太孺人質性莊重雪齋動以古人自律孺人事之如賓終始若一日。季和宰平江之常熟縣號難治吏民歡服。既滿橫爲郡將所摺摭困阨兩期至開人使訴卒無一詞猶被鐫降。孺人曰但不得罪于公論足矣。窮達非所

計也。閒廢累年方權臣用事不肯附麗求進菽粟不繼族黨姻舊皆勉以祿仕。孺人獨未嘗一語及之曰使吾兒失節以爲養不如粗糲之爲甘。蓋不如此不足以配君子不足以生賢子孫不足以成禮法之家也。季和不幸出門軸折不得究所抱負以彰積慶諸孫皆孝友以承先訓後其有興乎。銘曰

德在陰報必明。活千人後必興。天人間響應聲。有篤行出志誠。子必賢家必名。偉孫君眞不朋。動以禮善服膺。不愧怍無虧成。廟之璉壺之冰。行于家森典刑。噤不施閔幽局。過者式視斯銘。

樓鑰撰 《玫瑰集》卷一〇七

邊友誠墓碣

紹熙五年九月庚辰承奉郎四明邊公以疾卒壽八十有一。越十一月丙午葬于鄞縣桃源鄉石橋嶼之原。子恢泣請銘銘所以發幽光余則安能然鄉黨老成有如公者可無傳乎。公信厚人也余爲童子時已

聞公賢。長娶公兄女、獲從之遊、挹其貌肅而溫、聽其言、簡而真、徐察其人、安常務實、不自表暴、恂恂退遜、有前輩典刑。余深敬之、而未知所以用力者。一日入其室、視其銘諸座右者、有曰、逆心行事必生。安吾分、無他恨。余然後喟然歎曰、公可謂知本矣。流俗滔滔、不反諸心、故去古人遠甚。今公以心爲師、其本如是、其爲安分大矣。美在其中、功深力久、其有不可掩者。嗚呼、豈偶然哉。公諱友誠、字仁叟、一字應叟、世家于鄞。曾祖玘、祖日章、考用和、三世俱不顯。及公習儒學、游場屋、則又屢不得志。屏居深念、求所以自表見、雖生理未裕、經畫勤勤、而雅志爲善、不用世人詭譎牟利之術。財日裕、德亦日充、處己應物、必誠必敬。行雖遽、必端直、坐雖久、不傾倚。品節內外、井井秩秩、庶乎孔門所謂不驕且好禮者。尤嚴于祭祀、先事敬戒、備物以薦、鞠躬屏氣、如將見之。年益高、持敬愈篤、雖細故不敢忽、所使令亦加敬。每誦昔人此亦人子之語、

曰、敬人所以敬己也。以是自律、復以教子、自嬰孩時、飲食好惡、毋得自肆、長而繩約愈嚴、家事無鉅細、躬其勞。縱恢使學、恢游成均、親四方師友、衆皆稱之。公曰、吾門戶有望矣。凡財計事、無復綴意。一日翻然取囊所以治生者、盡更其轍、棄末從本、益發儲蓄、散給親黨、饋無虛月、費廣不靳。貧士登門、延之坐、敬與之。每曰、人不當爲財役。又曰、錢財所以輔養吾氣、當與人時、吾心快適。其高致如此。夫人孰不憚繩檢、而公行篤敬、孰不欲專利、而公志及物。所謂師心而行者、于是可驗焉。紹熙初、恢擢甲科、得鎮江軍節度推官、該慈福慶壽恩、封公爲承務郎。今天子嗣位、進承奉郎、鄉閭榮之。夫人楊氏、先二十三年卒、至是合葬焉。一子、恢也。一女、適承議郎、知湖州德清縣舒烈。孫男曰驩老。公篤于信道、清心寡欲、雅好書、尤喜讀論語。若有所契合、終身披翫、目昏不輟。晚多疾、或勸之修鍊、答曰、論語一書、無非養生法、何以他爲。有味其言、

非口傳耳授者。平生少怒。既老益習不怒。曰。怒未必人畏。先自亂心。無損于人。祇以自損。余以是知公德度非淺。丈夫所及可尙也夫。銘曰。嗟吉人兮端良。雖則幽潛。其究芬芳。久彌光兮。石橋之藏。

袁燮撰 《繫齋集》卷二〇

敷文閣學士李文簡公燾神道碑

韓愈以天刑人禍歸咎史筆。柳宗元隨辟其說。後人終致疑焉。今以李文簡公驗之何疑。且左氏紀諸國之事。史記上下數千載。是是非非。利害不專及當世。若公續司馬光資治通鑑爲本朝長編。上關國體。下涉諸臣之家乘。非異代比。使天刑人禍可信。孰能結知明主。見推多士。生歷清要。沒定美謚。諸子繼踐世科。歷二千石。光顯未艾。如李氏者乎。況公出入中外。見謂忠直。盡言交游。藐視強禦。雖微作史。自當齟齬難合。然讒間不行於朝。士大夫鮮含怒者何也。守道

正。蒞位公事上不欺。應物無心。天人交助。其在茲乎。既沒十八年。蜀多文士。其子不近求銘詩而遠屬耆老。非以同朝久相知深也歟。是以序而銘之。公諱燾。字仁甫。一字子真。系出唐曹恭王季子右武衛大將軍恩。武后斥爲民。徙眉州之丹稜縣。遂家焉。六世孫瑜始復屬籍。仕至長江令。公長江十一世孫。曾祖夔。祖風。贈奉直大夫。考中。朝奉大夫。知仙井監。累贈宣奉大夫。妣碩人史氏。公生政和乙未。天資穎異。博覽經傳。獨不樂王安石學。甫冠。已著兩漢鑑。明年。追念靖康變故。著反正議十四篇。人皆奇之。紹興八年。第進士。調成都府華陽縣主簿。未上。讀書本縣龍鶴山。命曰巽巖。自◎記云。子真子三卜居。乃得此山。坐東南。面西北。其位爲巽爲乾。蓋處己非乾健無以立。應物非巽順無以行。易六十四卦。仲尼掇其九而三陳之。起乎履止乎巽。此講學之序也。語曰。可與共學。未可與適道。可與適道。未可與立。可與立。未可與權。夫



儒藏

人各有所履、善惡分焉。惟能謙可與共學、惟能復可與適道。知所適而無以自立、則莫能久。故取諸恆、當使久於其道、或損之、或益之、至於困而不改、若并未始隨邑而遷、則所以自立者成矣。雖然、吉凶禍福、橫發逆起、有不可知、將合於道、其惟權乎。然非異、則權亦不可行。學而至於異、乃可與權、此聖賢事業也。年方二十四、其志趨學問如此。久之赴華陽、時宰秦檜知公名、公不與通。會詔郡國舉賢良、公攜五十策謁成都帥張燾、不果薦。秩滿、外銓復置教授闕、公亦不就。注嘉州軍事推官。丁父憂。二十年服除、再注雅州軍事推官、作當直司箴、諷郡守用私情背公法者。總領財賦符行中屬公增簡州鹽筴、公移書力拒之。舊相張浚謂有臺諫風。二十四年、改宣教郎、知成都府雙流縣。日坐聽事、訟至立決。前執政李文會自瀘徙益府、下行縣供張加倍、公用常儀、李由它道去。有張氏子競家資、公曰、汝方在喪、忍墜先訓、盍歸思。三

日復來悔過自新。大姓李雱市丘成之產業、公以成之、不白所生母、追正之。雱譟詞訴府、公列經義律文、實雱法、豪右斂迹、邑庭如水。日繙史冊、彙次國朝事實、謂司馬光修史先爲百官公卿表十五卷、後頗散逸、乃徧求正史、實錄、傍采家集、野史、增廣門類、起建隆迄靖康、合新舊官制、成一百四十二卷、其重編光者僅七之一、長編之書蓋始於此。二十九年、四川制置使王剛中辟公幹辦公事。三十二年、如榮州。州因山爲城、川爲隍、夏秋常患水溢、公築防禦之。隆興二年、除潼川府路轉運判官、入境劾守令四人。州縣多橫斂、公選官置局、括一道財賦、列其名色、使有無相輔、酌三年中數而爲帳、徧示官吏、許摘不當更定、名爲科約、至今不廢。母憂去官。乾道三年、召赴行在、八月入對、上太祖故事、乞以爲法、請許六察言事。又言、軍興三十年、蜀賦一錢、折變百之、願自此勿增取。況蜀兵已多、宜罷招刺、嚴簡汰、禁大將毋張虛



籍、陪部曲。孝宗嘉納。除尙書兵部郎中、以父諱下。^①行員外郎、兼國史院編修官、又兼禮部。會慶節上壽、在郊禮散齋、內議權作樂、公言、漢唐祀天地、散齋四日、致齋三日、我藝祖初郊亦然。自崇寧、大觀法周禮、分祭天地、故前十日受誓戒。今既合祭、宜復漢唐及本朝舊制、庶幾兩得。詔垂拱上壽止樂、正殿爲北使權用。十二月^②、正除禮部員外郎。公言、中興祭典未備、岳鎮海瀆、先農先蠶、風雨雷師九祠、以酒脯代牲牢。近者雨暘失節、郡國水災、殆或以此。詔復舊。占城國入貢、依崇寧五年敕書用白背金花綾紙、貯以金鍍銀匣。公請如近例。學士院謂禮部不當預。公曰、典禮先有司部兼掌客、豈侵官耶。長編卷帙漸成、蜀帥汪應辰乞下臨安府給筆札繕寫藏秘。^③閣公遂進國初至治平一百八卷、特遷兩官。公患時文衰弱、乞命考官取學術醇正、切於世用之文、苟涉虛浮、必行黜落。明春省試、敕榜戒諭。上方勵精爲治、事或中出。

公輪對言、唐虞三代專倚輔弼、漢唐或謀卿士。今捨二塗、近習必^④進。此治亂之機、惟聖慮過防。蓋有所指也。又奏、省闈取士本不立額、乞參皇祐四百之限、稍加裁定。舊特奏名雖賜出身、罕授職任。近兩榜至八百五十餘人、放選注官、而賢良方正一科則寂無應詔、當責舉者。讀畢、遂言、天下有變、經營北方未見可付之人。上曰、朕當自將。公曰、聖論^⑤及此、與眞宗濟澶淵合矣。上曰、此朕家法。太祖平澤潞、取維揚、太宗平太原、皆是也。公請先自治以待時。上聳聽不見倦、近侍皆跛倚。明日、諭三省議省額、特恩二事、有沮之者、乃已。五年四月、遷秘書少監。太史言、八月日當食。公上疏曰、天降災異、所以儆戒人主。今經筵不訪問、臺路罕論奏、大臣無趙普補綴奏曰、杜衍^⑥封還內降之風、臣恐憂不在疆場。惟陛下進衆正、消羣陰、以應天變。是冬兼起居舍人。六年雷震上元後一日、公錄仁宗景祐三年正月甲辰求言、寬賦斂二詔以

進。直前乞刊定徽宗實錄之疏舛者。因言。臣方修進治平後長編。若就加討論。他時可助正史。詔復開實錄院。四月。首命公爲檢討官。汪應辰進公子瑋賢良詞業。上曰。卿有子矣。范成大除右史。升攝起居郎。議者誤引元豐八年十月詔。欲廢二浙保正。止存耆長。又宰相以蜀人帥蜀。工部並除二侍郎。武臣提點刑獄。皆違舊制。公援證再三。上曰。卿論事根據。極當朕心。左相陳俊卿出知福州。右相虞允文既任恢復。未免更張。公言。二典若稽古。夏有典則。商云成憲。周云舊章。漢云故事。子孫莫之敢廢。王安石變更法度。厲階可鑑。上欲除公兵部侍郎。公自攝記注。數論事。宰相頗不樂。公遂請去。六月。除直顯謨閣。湖北轉運副使。陛辭。以欲速變古爲戒。又表禹貢九州。荆田地第八。賦乃在三。人功既修。遂超五等。今田多荒蕪。賦虧十八。上委公條畫。至則言。創耕憚科斂。且畏爭奪。宜寬冒占。廣激勸。如太祖乾德四年。許見佃者止輸舊

稅。更不通檢。詔如所請。其妄執契爭奪。毋受理。守令能勸課者。賞之。總賦呂游問奏計。公攝其職。歲飢。發戶部大軍倉賑民。僚佐爭執。公曰。吾自任責。不以累諸君。尋如數償之。游問歸。劾公專輒。上令具析而已。七年。堂中制科。八年。以舊官趨召。會虞允文由左相宣撫西川。自詭^①北伐。疑公異議。預白上。改直寶文閣。帥潼川。兼知瀘州。首葺石門堡。置戍以扼夷人。叙州舊市羈縻。馬價頗平。比歲增其尺寸。償直不以時。公言。國計邊防。胥失之。乞戒茶馬司互市。毋溢額。仍勿於夷漢禁山內伐木造舟。尋皆報可。守邊逾歲。淳熙元年被召。適城中火。公上章自劾。既放罪矣。提刑何熙志奏。公不親至火所。并指長編記魏王食肥彘語。涉誣謗。上曰。此載皇宋事實。何害。止命成都提刑李蘩體量火事。公行及國門。乞祠待辨。除江西轉運副使。且許歸遣。公進治平四年至元符三年長編四百十七卷。或勸公方^②被讒。勿及時事。公曰。聖主



睿度如此。竭忠所以報也。遂奏。近者日食地震。夷狄小人不可不慮。又上快箴。引太祖退朝。悔乘快決事。以諫。上曰。朕當揭之坐隅。進秘閣修撰。旋坐火。後不盡書焚室。貶秩一等。而熙志以輒議史事。削兩官。公至江西。置一路財賦都簿。如潼川科約。未幾召還。乞令本路毋以臣去廢此書。上曰。卿不爲高論。務在便民。甚善。擢秘書監。權同修國史。權實錄院同修撰。蓋專付公以史事。故用侍從之禮。三年正月也。公前數言南郊明堂均大禮。自宜迭行。適轉對申前說。上令集議。嬖近謂於德壽宮有嫌。沮不行。及予爲禮部尙書。與諸儒議。周成王宗祀文王。漢武帝陟配高祖。所謂嚴父指周公也。晉唐及本朝名臣皆有是說。非出於燾。燾發之耳。其議遂定。三月。除權禮部尙書。賜服金紫。七月。雷震太廟。柱壞鴟尾。有司隨加繕治。公奏。此非所以祇天變。當應以實。上諭大臣。燾愛朕。屢有讜言。公嘗請正太祖東鄉條。上熙寧元符紹興

議論。其後卒行之。進四繫錄。記女眞契丹起滅。自紹聖迨宣和。靖康凡二十卷。上曰。朕可一日忘此虜哉。九月。兼侍講。以經筵少開。錄趙師民勸講箴以諷。并及仇士良不欲人主讀書。近儒生之說。會改潛邸爲佑聖觀。創璿璣殿於太一宮。公密疏二千餘言。上褒答之。四年春。駕幸太學。命公執經。特轉一官。堅辭不聽。公自郎春官已極論科舉及特奏名。去冬乞依紹興二十七年二月詔書。用經義詩賦論策四場。如元祐時。仍采蘇軾議量收恩科。至是力請變文體。取實學。以致人才。上袖公奏付三省下學官議。國子監司業鄭伯熊等請如公言。而老生晚學譁言不便。議遂格。八月。眞拜侍郎。仍兼工部。徽錄置院久。公薦呂祖謙爲秘書郎兼檢討官。審訂增削數百條。書遂成。特遷一官。或請升降兩學從祀。衆議不同。第去王雱像。用公說也。元符接靖康長編成。上稱公無愧司馬光。後有表云。預席恩言。比迹先正。指此夜宣引。奏近者

蒙氣蔽日、厥占不肖者祿、股肱耳目、宜謹厥與。賜坐欲起、上再留、賜茶、賜飲、恩意甚寵。尋詔監視太史、測驗天文。公爲郎時、已言乾道新曆不可用、因舉差失數十條、詰太史局官、皆無以對、然卒無知曆者。公又欲參酌開寶通禮、政和五禮新儀爲一書、雖下禮官、亦不能成。九月丁酉、日當夜食、公爲社壇祭告官、伐鼓禮廢、公舉行之。先是、厔入秘書爲正字、旋兼國史編修、實錄檢討、遷校書、著作。父子同典史事、縉紳榮之。公感上知、論事益切、每集議、衆未發言、公條陳可否、無所避。會近臣復舉公次子塾應科目、黜於閣試。厔考校上舍生、發策云云、爲御史所劾、語併及公。厔降一官、罷。公以本官知常德府。初、政和七年、鼎澧、辰、沅、靖州置營田、刀弩手司、給田募人開邊。范世雄、張察等附會擾民、建炎三年、亟罷之。乾道末、守臣劉邦翰請復行於沅、靖二州。公爲轉運、謂不當復。已而提刑尹機迫郡縣行之、田不能給、公至請度田額。

事下諸司、公獨約帥臣張栻具奏、上即從之。境多茶園、異時禁切商賈、率至交兵。公曰、官捕茶賊、豈禁茶商、聽其自如、迄無犬吠警。六年、丐閑、提舉江州太平興國宮。是秋行明堂大禮、上以公首建議、特除敷文閣待制。頃之、厔塾繼亡、上欲以吏事銷憂、起知遂寧府。用蔡挺涇原衛教法、關勸武堂、親閱士卒、其雜居市廛者、葺營聚之。七年、史院進四朝正史、經修官在外者例減磨勘二年。宰執奏正史頗采李燾長編、地理一志又出其手、詔減年外別轉一官。公自奉議郎年勞賞典積官朝議大夫、避父名遇遷秩寄理者三、於是轉通議大夫。公以酒課加重、奏榷酤起王莽而成於德宗。本朝郡釀有數、監司尙不許、今乃設法勸飲、以耗民財。縱未能盡弛、猶當用買撲舊法、罷去官監。上意鄉之、而計司迫贍軍、月減三十緡而已。公節用度、停燕會、官府肅然。前得旨、長編或有增損、依熙寧修三經義法具奏、至是上四千四百五十餘條。又



以一百六十八年事散九百八十卷、乙覽難周、別爲舉要六十八卷、總目五卷、修撰事目十卷。時召命已下、公控辭久之、上數詢來期。十年六月、對延和殿、邇英閣、方讀陸贄奏議、公掀贄言、切今者數十事、勸上力行、且曰、贄雖相德宗、其實不遇、今可謂千載一時。上曰、惟不遇於當日、是以言垂後世。公又奏、陛下即位二十餘年、志在富強、而兵弱財匱、與教民七年、可以即戎異矣。上有無功業之嘆。公曰、功業見乎變、人事既修、天應乃至。上曰、卿宿德耆儒、宜在左右任史職。進敷文閣直學士、提舉佑神觀、兼侍講、同修國史。七月久旱、公進避殿、損膳求言故事。上亟施行、命侍從、臺諫、兩省、卿監、館職、實封言事。趙彥中草詔云、意者委任或非其人。公奏、陛下委任不過三四大臣。神宗語富弼云、唐太宗與魏徵議政、全似爭競。宜敕二府以魏爲法、毋若元豐王珪號三旨相。三旨者、謂上有可否、珪曰領聖旨。諭軍國事曰誠如聖旨。啓擬

曰取聖旨也。又謂戶部不足、南庫有餘、請如唐建中罷瓊林大盈庫歸左藏。上以奏付外、讀者失色。丁丑遂雨。一日宣對、公言、外議陛下多服藥、罕御殿、宮嬪無時進見、浮費頗多。上曰、感卿忠愛、然朕春秋已高、安得此聲。近唯葬李婕妤用三萬緡、他無費也。上憂熒惑、嘗入斗。公言、天道遠、惟正厥事、可以弭災。類次漢元鼎至宣和四十五事以進。十一月朔日當食、心入分、公曰、心爲宋分、爲天王位、潛陽將復、陰氣乘之、小人害政、夷狄窺中國之象。復條上古今日食是月者三十四。明日對延和、又及晉何曾譏武帝無經國遠圖。上甚嘉獎。是歲、公賦詩云、明年七十吾歸矣、預買北關門外舟。至冬疾作、三省請給告十日。上曰、老者不以筋力爲禮、可半月。十一年春、表乞致仕、優詔不允。上數問宰執、公疾增損何如。萬里招來、豈容輕去。丞相王淮曰、叢知進退、宜從所請。上曰、脫不幸有故於道路、奈何。可諭其鄉人、給事中宇文价留之。价

傳上旨。公曰：臣子戀闕，非老疾忍乞骸骨。因詢价時事，勉以忠藎。聞四川制置使留正、總領馮憲論減酒額，猶手劄贊廟堂行之。二月病棘，甲子除數文閣直學士，轉一官致仕。命下，喜曰：事了矣。口占遺表云：臣年七十，死不爲夭，所恨報國缺然。願陛下經遠以藝祖爲師，用人以昭陵爲法。辭氣安定，俄卒。上聞嗟惻，賻銀絹三百匹兩，贈光祿大夫，令臨安治後事。沿江漕司津置歸舟。他日語宇文价曰：朕嘗許燾大書續資治通鑑長編七字，且用神宗賜司馬光故事爲序冠篇，不謂止此也。公孝友誠實，性無嗜好，惟潛心經史，有易學五卷、春秋學十卷。故其出處本於絜靜精微，著述則評論今古，別白善惡，得褒貶之旨。所至求奧篇隱帙，傳錄讎校，雖陰陽卜筮亦無遺者。家藏積數萬卷，爲文語_の適而理備。考蜀類試，參詳南省，多得名士，薦人輒削稿。前兩入朝，適虞允文暨趙雄當路，士大夫爭談兵。二公皆蜀人，雅敬公公，一無所徇。

晚在經筵，人頗懷安。公爲_⑧上言：前日紛紛，今日默默，俱非自治。其持論不隨時類如此。公著五經傳授、尙書百篇圖、大傳雜說、七十二子名籍各一卷、文集五十卷、奏議二十卷、四朝史稿五十卷、通論十卷、南北攻守錄三十卷、七十二候圖、陶潛新傳并詩譜各三卷、歷代宰相年表二十三卷、唐宰相譜一卷、江左方鎮年表六卷、晉司馬氏本支、齊梁本支、王謝世表、五代三衙將帥年表各一卷、本朝事始兩卷、建隆遺事辨、趙普別傳、科場沿革、集賢學士并賜帶典故各一卷、范韓文富歐陽司馬三蘇及_⑨六君子年譜各一卷。明年七月己酉，即葬巽巖之陽。妻碩人楊氏，同邑贈朝散大夫素之孫，黃庭堅爲記。大雅堂者，後公八年卒，祔焉。七子：謙、早死。晷，終奉議郎，主管成都府玉局觀。恂，今爲朝請郎，權發遣忠州。塾，終承務郎。堡，亦亡。壁，皇皆登科。壁，今爲朝散郎，權發遣漢州。皇，承議郎，主管華州雲臺觀。六女：均，適朝散郎；知果州曹



藏

執中。坑適朝奉大夫知崇慶府師祖慶壇適文林郎漢州州學教授任埤。埤適薛紘穎。增適承議郎充雲安軍使兼知縣事張仲。堪適朝散大夫利州路提點刑獄公事范子庚。孫十一人。鏗宣議郎。錫修職郎。彭州九隴縣主簿。鏗、鉢、鏐、周、鉤、鏐、銓、積、簡。其三今亡。鉢、周、鏐也。孫女三人。長馴。早夭。次眞。適修職郎孫剛。亦不在。從適迪功郎新雅州盧山縣簿尉劉成季。曾孫十一人。公爵丹稜縣開國伯。食邑七百戶。諸子升朝。贈少師而贈楊氏福國夫人。銘曰、

尙書記言、春秋書事。經別以六、史居其二。漢太史公儀尊相臣。我朝大典亦歸宰庭。時政有記起居有注。東觀石渠諸儒所聚。設官分職上下相維。合力纂修猶懼闕遺。公生遐方初筮州縣。間於期會。屈首鉛槧。祖功宗德業鉅事叢。政有因革論有異同。禮樂制作夷狄版服。原始要終咸舉綱目。三入承明。迄用奏篇。帝擬以光士推如遷。問何云然。多聞諒直。舞禮文

姦視若仇敵。以此事君忠讜不欺。出而臨民敬簡無私。赫赫榮名番番壽考。慶流子孫殃則何有。螭首龜趺刻以銘章。申勸剛者公爲不亡。

周必大撰 《平園續稿》卷二六

巽巖先生墓刻

公諱燾字仁甫一字子眞。其先唐宗室右武衛大將軍。僖武氏之禍。竄眉丹稜。子孫因家焉。距公十有七世矣。大王考諱夙。贈奉直大夫。考諱中。左朝奉大夫。贈宣奉大夫。妣碩人史氏。公生於政和五年四月丙辰。登紹興七年進士第。調華陽縣主簿。擬嘉州軍事推官。未赴。丁宣奉憂服除。調雅州軍事推官。改宣教郎知雙流縣。辟四川制置司幹辦公事。知榮州。除潼川府路轉運判官。丁太碩人憂服除。召赴行在。入尙書爲兵部郎中。以觸宣奉諱。改行員外郎。國史院編修官。轉禮部員外郎。遷秘書少監兼實錄院檢討官。權起居舍人。起居郎。直顯謨閣。荆湖北路

轉運副使。除秘書少監。赴闕供職。改直寶文閣。主管潼川府路安撫司公事。知瀘州。召赴行在。陞秘閣脩撰。江南西路轉運副使。召赴行在。除秘書監。兼權同修國史。實錄院同修撰。擢權尙書禮部侍郎。兼同修國史。實錄院同修撰。侍講。拜禮部侍郎。兼工部侍郎。以御史論公子瑱發策不當。黜。并出公知常德府。逾年。提舉江州太平興國宮。天子初行明堂禮。推恩首建議者。加敷文閣待制。尋除知遂寧府。召赴行在。拜敷文閣直學士。提舉佑神觀。兼侍講。同修國史。三上章請老。除敷文閣學士致仕。以淳熙十一年二月五日薨于行在所。享年七十。累官至通奉大夫。爵丹稜縣開國伯。遺奏上聞。天子哀其忠。贈光祿大夫。特命臨安府營辦葬事。又出內帑金帛賜其家。尋勅濱江漕臣護其喪歸葬蜀。明年七月二十八日。葬于丹稜縣龍鵠山巽巖之陽。公娶同邑楊氏。封碩人。子十三人。男曰謙。曰瑱。奉議郎。秘書省著作郎。曰恂。前知成

都府郫縣事。曰塾。承務郎。曰堡。曰壁。承奉郎。前主管尙書刑工部架閣文字。曰臺。承務郎。女曰均。適朝奉郎。新知果州曹執同。曰坑。適朝奉郎。前知普州師祖慶。曰壇。適迪功郎。漢州州學教授任阜。曰典。適河東進士薛純穎。曰增。適從政郎。榮州州學教授張伸。曰堪。適迪功郎。鳳州兩當縣主簿勾龍宗愈。謙。瑱。塾。堡。典。及純穎皆先公歿。阜後公一年亦亡。孫男七人。曰鏗。曰錫。曰鉢。曰鏐。曰鋤。曰鑣。孫女二人。曰眞。曰從。公高亮傑特。碩大剛毅。人望之凜然。而內甚夷曠。其學洞究古今。會道約理。晦明巨細。交貫旁達。其臨事如衡陳權設。主黍不可欺。四方學者宗仰敬畏。終莫測所至。其在朝廷。正色侃侃。守經據古。務以格君心。存舊章。畏天變。愛民力。裁恩倖。峻風節爲言。不擇禍福利害。以爲趨舍避就。挺立不撓。邪枉憚焉。其任外服。綱張目舉。仁行威振。強暴者戢。柔懦者立。貪沓者化。興利除弊。率爲後法。方公少年。遭王國多難。慨然



儒藏

宋儒碑傳集 卷一一七

有志馳驅、值權臣力主和議、務以術消闕天下忠義、敢爲之氣、公竊憤之、終其世不與通、陸沉遠方、凡三十年、始登天朝、屬時宰附會、規挑兵端、公又力爭之、以爲自治未至、何以謀人、至擯居外、猶懇懇弗已、晚再侍帷幄、察時論浸弛、慮成翫惕、晏安之漸、則勸上以無怠初志、益懋遠圖、迹公所學、考功素論、則公之盛心何如也、然嚴氣正性、不肯纖芥徇時、以故屹屹難合、迄大不施、獨爲天子所尊禮、至稱之曰有國之師表也、洎將用公、而公亡矣、嗚呼、用捨汙隆之數、實關諸天、豈人力哉、諸孤不令、何足以識公大致、念葬日薄矣、較德瑒辭、厥艱其人、敬忍死泣血、先用溫文正公法、書世次官簿終始、以掩諸幽、其論次之詳、則見諸家傳云。

李壁撰 《永樂大典》卷一〇四二一

校記

- ①中份：原倒，據文意乙。
- ②宏：原作「寵」，據四庫本《文忠集》改。
- ③蒙：原作「家」，據道光刻本《止齋先生文集》改。
- ④數：原作「敬」，據右引改。
- ⑤隋：原作「隨」，據明祁氏澹生堂抄本《周文忠公集》改。
- ⑥雒縣：原作「雄縣」，據右引及《宋史·地理志》五改。
- ⑦「漕檄」二句：原作「漕數州縣」，據傳增湘校《廬陵周益國文忠公集》本（下簡稱傳校本）改。
- ⑧摧鋒：原作「擢鋒」，「其」下又衍「銳」字。本路：原脫「路」字。均據《閩中金石志》卷一一改、刪、補。
- ⑨自：原作「目」，據四庫本《文忠集》改。
- ⑩公：原脫，據右引補。
- ⑪光：原脫，據傳校本補。
- ⑫以：原脫，據右引補。

⑬下：原作「不」，據四庫本《文忠集》改。

⑭十二月：原作「十三日」，據右引改。

⑮秘：原脫，據傳校本補。

⑯必：原作「新」，據右引改。

⑰論：右引作「喻」。

⑱衍：原作「衛」，據右引改。

⑲守：原作「寺」，據右引改。

⑳詭：右引作「將」。

㉑方：原脫，據右引補。

㉒如：原作「以」，據右引改。

㉓周：原作「用」，據右引改。

㉔局官：原倒，據四庫本《文忠集》乙。

㉕張察：右引作「張崇」。

㉖閣：原脫，據右引補。

㉗語：原脫，據右引補。

㉘爲：原作「謂」，據傳校本改。言：原無，據上引補。

㉙及：原脫，據傳校本補。

㉚安：原作「南」，據右引改。

㉛遺：原作「疑」，據右引改。

㉜歿：原作「殆」，據文意改。

宋儒碑傳集卷一百十八

范滄 曾崇 魏揆之

范叔源墓誌

范氏自忠文蜀國公以名節大其家、至猶子榮國公淵深質正、不見圭角、而太史唐鑑公凜然可畏、克肖蜀國。凡范氏食之而不盡者、非一世之積、故蜀之言家法者、首以范氏、而蘇氏次之。石蚤客於范氏、獲交其群從子弟、頗多賢而有文、不相依藉、各欲自立。而叔源諱滄、以贈太尉鐸爲曾祖、以榮國公百祿爲祖、以贈太中大夫祖述爲父。其世代著於天下、人知尊敬、而叔源能知上世之可學者、以滋其性。初以太中公恩得官、年未冠、頗欲深卻、以收文字之績。始試吏、爲仙井監錄事參軍、以鹽法與長史競、不屈於勢、有識者益知范氏之有子。以從兄塤將漕本路、換榮州錄事參軍。其辨金氏獄、直數十年之冤。金氏素樞、以喜故、失杖而起。一州推其神。叔源自挾世學、不少與

當路要人屈、故宦薄不甚進。辟監蜀州黑水鎮酒稅、監成都府王店鎮酒稅、監成都府商稅。雖筦庫間、不爲苟計、如減虛額、核羨緡、類不觀大吏顏色。故始知叔源者、終益不合。晚乃用舉者、得右宣教郎、覃恩轉右通直郎、知簡州平泉縣。未幾而叔源引疾去矣。疾少間、轉右奉議郎、知雅州廬山縣。縣扼制夷蠻、以互市略相羈縻。叔源增礮門、倚角之戍、而嚴禁姦民之私爲市。至今爲法。未幾疾復作、遂以不起。凡廬山之民、哭之者、廢其市。實乾道丙戌九月十二日、年五十二。方叔源年少時、欲起榮國、太史之絕學、以上襲忠文、滿口故家典型、而問學淵源、內有師友。蓋所至薄其官、若泛然者、已有聲如此、而乃不克壽、其可哀已。叔源有子仲黼、清苦而甚修、久從石游。將以乾道辛卯十月二十三日甲子葬叔源於雙流縣宜城鄉諸葛里曹池山之原、以其母王氏之命、求石書其墓。石於叔源父子蓋數世之交、且斯文相與不薄、石其敢



儒藏

辭。叔源二子、長仲黼、次仲芸、鄉貢進士、出繼仲兄之後。女三人、適王晞孟、程師夔、餘未笄。凡墓誌之所不及者、仲黼家傳爲詳、此不復著。銘曰、

世可以髣髴王道者、惟故家爲然。世益久而益有所憑藉、宜其孫子多賢。如蜀之范、蘇、誕、后稷之穡者、蓋踰百年矣。文獻可考、豈與夫崛起者校其後先哉。如叔源氏欲永其世、而或勝其天。尙有諸子能力於學、以大其傳。

李石撰 《方舟集》卷一五

高郵軍曾使君墓誌銘

曾宣靖公相仁祖致太平、晚預定策、賜號亞勳、其子孫儒雅才業、自爲世家。宣靖之子諱孝純者、君曾祖也。仕至光祿少卿。光祿之子諱宜者、君祖也。仕至尙書虞部郎中。虞部之子諱恬者、君父也。字天隱。方崇寧、大觀間、天下學者趨時好、溺王氏新書、以弋聲利。奸臣擅朝政、至禁錮諸儒之說、俾不得傳。而天隱獨

欲探性命之理、從上蔡謝先生、龜山楊先生游、以講明聖人之道、善類至今稱之、以其字行。而留落不偶、僅爲朝請郎、知大宗正丞、以沒、其身後之澤始及君也。君生五歲、葬母李氏、哭泣哀慕、不異于壯者。宗丞異之、俾從名士關注學。再舉進士不第、則歎曰、舉子之文、務應程度、豈若求吾所自得哉。益誦書史、欲見諸行事。起家監潭州南嶽廟、調錢塘縣主簿。錢塘在今爲赤縣、小官吏奔走、不復能顧其職。凡輸送之籍、率不時注、民被迫擾甚。君則督吏①注籍惟謹。至日夜稽攷、或廢寢食。府尹趙子瀟號嚴明、遇僚吏不假詞色、惟于君頗盡禮。時俾攝其屬以自近。就差衢州西安縣丞、樞密劉珙侍郎周操相繼爲守、皆器愛之。屢決疑獄于旁郡。用薦者改右宣教郎、知湖州安吉縣。浙之劇地、民悍吏猾、事叢集不可區別。卒得善去、僅一二。君獨以寬民處之、乃坦坦服化、鬪傷爲減。獄罕重囚、至以空聞。乃新縣學舍、延俊秀勸以向道藝、



務爲善。民相率詣部刺史乞留君。近臣亦薦君可應監司、郡守。而君之從父丞相懷適參大政。以爲嫌。僅除君通判臨安府。其佐府事。裁決無壅。總工役。新垂拱前殿。建太學。御書石經閣。皆以辦治受賞。秩滿。除權發遣高郵軍。陛對。即言天下之弊。莫大于無實。今士大夫議論。非不激昂可喜。而職業類苟歲月。且引漢文帝因張釋之言。不拜嗇夫之事。爲證。願獎敦厚。抑虛誕。以變風俗。又言。兩淮州縣。類多培克資妄用。徒知修城池。闢田野。爲邊備。然不知民和邊備之本也。上異其言。稱善久之。君既至郡。即以鎮靜不擾爲先。率斂橫取爲戒。而游謁饋餉。一無所問。先是。帑庾空乏。官吏營卒。俸不時給。君曰。吾不妄取。亦不妄用也。釋民之負。官錢貧窶。無所償者。凡數千緡。謹征權簡燕集。罷工役。持之僅一歲。用果有餘。歡呼之聲聞于道。而不幸君已疾病矣。君雖寬于治民。而嚴于馭吏。邑尉有非理掠里正致死者。數持達官書來。掌

牙校犯罪。請以功贖。君一不顧。而竟寘于法。人用是服君之平。莫敢犯。淳熙七年九月二十三日。終于治所。郡人相與罷市哭之。官朝散郎。賜服五品。娶陸氏。處士達可之女。封安人。君性友孝。溫厚長者。喪宗丞。廬于墓左三年。與其弟居。終身無間言。先世之產。遜而不取。其仕于州縣。雖上官屢知。不肯務合以求進。平生喜書札。有楷法。然與子弟書。僕隸約束。未嘗輒草。所爲文有約齊稿若干卷。而教其二子尤力。其長耆年。次延年。同時貢名禮部。入太學。有聲場屋。女五。適朝奉大夫軍器監丞魏叔介。承事郎激賞酒庫所幹辦公事王錞。進士毛适。元粹。一在室。孫男四。郇。郇。郇。郇。孫女一。尙幼。而延年後公十九日亦卒。耆年以是歲十二月某甲子。奉君之喪葬于平江府吳縣南宮鄉香山之原。其世次鄉里。國史有傳。曾祖與祖。則皆贈右正奉大夫。曾祖妣。祖妣。趙氏。同姓而異族。皆贈太碩人。考累贈朝議大夫。妣贈恭人。君則諱崇。字

希元春秋六十有六云。銘曰、

曾出溫陵、其冑奕奕。一門峨巍、逮茲七葉。大者廟堂、次亦侍從。光祿虞衡、慨已弗用。丞于大宗、既未省郎。孰謂使君、不實周行。蘊德抱材、粹然溫淳。百里一州、惠及我民。議論不詭、達于帝聰。自其家傳、以孝以忠。不即厥身、子孫是宜。君雖已矣、後爲可期。

韓元吉撰 《南澗甲乙稿》卷二一

國錄魏公墓誌銘

元履姓魏氏、舊名挺之、後更名揆之、則字子實。然其以元履聞也久、故稱者莫能易也。家建寧府建陽縣之招賢里、以儒學顯。其冑出遷徙之所繇、則故侍郎胡公寅已識於元履先君子之墓矣。元履幼有大志、少長遊郡庠、事籍溪先生胡公憲、先生奇之。已而徧從鄉之儒先長者遊、間適四方、又盡交其先達名士、於是聞見日廣而聲稱日益大。嘗客衢守章傑家、會故相趙忠簡公薨海上、歸葬常山。傑雅怨趙公、又希

秦檜意、逮繫其家人、劾治甚急。人畏其凶虐、無敢議者。元履獨慨然以書譙讓傑、長揖徑歸。傑亦不能害也。兩以鄉舉試禮部、皆不第。閩帥汪公應辰、建守陳公正、同知其賢、相與論薦于朝。時相尼之、又不得召。後數歲、詔舉遺逸。部刺史芮公燁、遂帥其寮與帥守六人者、共以元履行誼爲言。於是詔特徵之。元履辭謝不獲、則以布衣入見。極陳當世之務。大要勸上以修德業、正人心、養士氣爲恢復之本。上獎歎開納。勞問移時。明日、遂有詔賜同進士出身、授左迪功郎。守太學錄。乾道四年十有二月也。異時學官不與諸生接、亦漫不省學事。徒養望自高而已。元履既就職、則日進諸生而教誨之。且視其居有壞者、或幾壓焉、則請于朝、得緡錢四十萬以葺之。釋奠孔子祠、職當分獻先賢之從祀者、則先事白宰相。王安石父子以邪說惑主聽、溺人心、馴致禍亂、不應祀典。而河南程氏兄弟唱明絕學、以幸來今、其功爲大。請言於上、廢安

石父子勿祀而追爵程氏兄弟使從食不聽它日又言太學之教宜以德行經術爲先其次尤當使之通習世務以備官使今壹以空言浮說取人非是又不聽至它政事有係安危治亂之機而宰相不能正臺諫侍從不敢言者亦無不抗疏盡言以諫疏至三四上不納則移病杜門以書質責宰相語尤切宰相雅知元履招徠之至是始不能平而元履前已數求去矣遂以迎親予告使歸行數日罷爲台州州學教授元履自少則有志于當世晚而遇主謂可以行其學然其仕不能半歲而不合以歸間獨喟然嘆曰上恩深厚如此而吾學不至無以感悟報塞吾罪大矣先是嘗榜其書之室曰艮齋至是日處其間方將條理舊學以益求其所未至從遊之士稍有自遠來者而不幸病不起矣病革時顧念君親處理家事無一言之繆其母視之不巾不見也戒其子毋以僧巫俗禮浼我且以書召其友新安朱熹至則盡以終事爲

寄而訣卒之日實九年閏月壬戌其年五十有八矣娶同郡劉氏徵士勉之之兄女先十九年卒繼室虞氏子男二人孝伯國學進士孝朋尙幼所爲文章若論議訓說合數十卷藏于家元履於學無不講而尤長於前代治亂廢興存亡之說以至本朝故事之實皆領略通貫識其大者平居論說聽者悚然居家謹喪祭重禮法恤親舊雖貧不懈從父有落南者千里迎養死葬如禮而字其孤尤有恩歲饑爲粥以食餓者而力請移粟於官邑里賴焉又嘗請督鄉人之不葬其親者富予期貧予費而掩其無主後者以千數爲文以戒生子而不舉者所全活者亦甚衆與人交尤盡情嘉其善而救其失如恐不及後進以禮來者苟有一長必汲汲推挽成就之其處心制行類如此故嘗有病其爲人太過者元履笑曰不猶愈於橫曰自營者耶至或訾其近名則蹙然曰使夫人而皆避此嫌則爲善之路絕矣此其學道愛人之本意也嗚



呼使其老壽通達、舉而施之、則其所以及人者爲如何哉。孝伯將以七月己未奉其柩葬所居之南不十里所謂長坂者、元履平生時所樂處也。予往蒞其卜、孝伯泣拜奉嚴君士敦之狀以銘文爲請。予惟元履垂絕之言若有及此者、顧雖不能、不忍負也、則應曰諾。退視其狀不誣、因掇其大者序而銘之。銘曰、
謂天嗇之、則曷其材且志也。曰其德之、則又不年以位也、竟使抱其餘以沒於地也。我銘以哀之、又以掩其隧也。

朱熹撰 《晦庵先生朱文公文集》卷九一

教授魏元履墓表

故台州州學教授魏君元履之喪、新安朱君熹旣爲之志以內諸隧、而其子孝伯復以書來請表於墓。某雖聞元履之風而未及識、獨時以書往來、相與之意蓋有不待傾蓋而得者。又聞元履將沒、若以此屬於予、則於孝伯之請、反之於心、誠有不能已者、故不復

敢以荒陋辭。元履諱揆之、舊名挺之、後更今名、則字子實、然以元履行。今爲建寧府建陽縣人。父大名隱德不耀、故禮部侍郎胡公寅嘗志其墓、述其世系甚詳。元履自幼立志不羣、方是時、建寧多儒先長者、元履始入郡庠、事籍溪胡先生憲、先生器之、已而遍從諸長者遊、間又適四方、所交一時名卿賢大夫多丈人行、故聞見日廣、而聲稱亦日著。其爲學慨然企慕古先、於書無所不講、而於歷世治亂興亡得失之故、與夫本朝故事之實尤所諳究。爲文章長於論議、善談說、聽者無倦。其居家孝友、恂恂謹喪祭、重禮法。於親黨卹死字孤、雖貧、極其力而爲之。其居鄉、遇歲飢、則爲粥以食餓者、且請於官爲之移粟、閭里賴之、視鄉人有不葬其親者、請富與之期、貧與之費、賴以掩者亦以千計。其有不舉子者、則爲文以告戒之。細民亦多爲之感動。其與人交、盡其情、然不爲苟合、長善救失、惟恐不及。後進有一長、必亟稱而力推之。位望



尊重者、苟有不合己意、亦面質不置。大抵其爲人於義最隆也。方年壯時、遊江浙間、過衢、客郡守章傑之家、會故相趙忠簡公之喪、歸自海外、傑雅以私怨趙公、且希秦檜意、逮治其家人、勢烈如火。元履獨慨然以書譙傑、長揖而去、傑亦無以害也。其天資疾惡、勇於爲義、類如此。元履兩以鄉舉試禮部、不第、福建路安撫使汪公應辰知建州、陳公正同知其賢、相與論薦、復爲時相所忌、不得召。居數歲、詔舉遺逸、轉運判官芮公曄率其僚與帥若守六人者、以鄉人所狀行義聞、有旨特徵之。時宰相陳公俊卿實當國也。元履辭既不獲、乾道四年十二月、用布衣入見、條當世之務、首論脩德爲立政之本、繼以正人心、養士氣爲言、以爲恢復之道、要必以是數者爲先。上獎歎開納、勞問移晷、翼日詔賜同進士出身、授左迪功郎、守太學錄。異時學官多養望自高、不與諸生接、亦不復省學事。元履就職、則日進諸生而誨語之、視其屋有弊壞

弗支者、亟請於朝而葺之。其春釋奠於先聖、職當分獻先賢之從祀者、則先事白宰相。王安石父子以邪說亂天下、不當祠、而河南程氏兄弟倡明絕學、以訓方來、其功爲大、請論奏屏去王安石父子、而追爵程氏、列於從祀爲允。它日又白、太學之教、豈當專以浮言取人、宜隆德行、尙經術。其次猶當使之通習世務、以備官使、皆不聽。元履念上恩厚、言雖不見用、未忍去也。於是時事有係安危治亂之幾、而自宰相以下、無敢救正指陳者、懷不自已、每抗疏力言之。至於三四、不報、則移疾杜門、以書切責宰相。宰相病之、遂因元履之請、予告使歸。旣行、則罷爲台州州學教授。五年六月也。元履歸而喟然曰、幸得遇明主、學力未至、無以感悟効報萬一、當益自勉而已。舊榜其書室曰艮齋。至是日處其間、紬繹舊學、將求其所未至。士子有從之遊者、亦不之拒、而元履病矣。病且革、顧念君親、處理家事、無一語謬。其母游氏視之、不巾不見

也。戒其子、毋以僧巫俗禮浼我。招其友朱君熹、至則盡以終事爲託。以九年閏月壬戌沒於正寢、年五十八。娶劉氏、同郡徵士勉之兄女、先十九年卒。再娶虞氏。子男二人、孝伯長、國學進士。孝聞尙幼、所爲文章及論議合數十卷藏於家。嗟乎、習俗之弊久矣、惟一己之便利是圖、而其它有不遑卹也。若元履、平日制行、以急病讓夷爲心、一旦起布衣、有列於朝、則無隱君父言衆人之所不敢言、其比於區區自謀者、相去豈止十^④百而已哉。而世或以近名訾之、抑昌黎韓子所謂怠與忌者、非邪。雖然、使元履而天假之年、益充其所志、以進其所願學、則其所成就發見、又豈止於是而已邪。予是以歎惜而書之。淳熙元年五月戊申、廣漢張某述。

張栻撰 《新刊南軒先生文集》卷四〇

校記

①吏：原作「例」，據武英殿聚珍版本《南澗甲乙稿》改。

②疏：原缺，據宋淳熙刊本《晦庵先生朱文公文集》補。

③求：原作「來」，據明嘉靖繆補之刻本《南軒先生文集》改。

④十：右引作「千」。

宋儒碑傳集卷一百十九

董琦 洪适

迪功郎致仕董君行狀

君諱琦、字順之、饒州德興人。德興故樂平隸鄉也。後析爲縣。有太常博士董君淵者、始以進士擢第、其後簪組蟬聯、與邑之張氏、萬氏俱爲聞家。里諺號張董萬猶眉之蘇程石云。博士於君六世從祖也。而君曾祖介卿、祖材兩世仕皆有聲。介卿終左朝奉郎太醫令、材終右從政郎、處州^①縉雲縣令。材生陵、君考、獨隱居不仕。君少有英氣、務爲倜儻可喜事、不肯踐繩約、然實篤於風義。縉雲令憂其過、名之曰執柔、而以順之字之、曰、以代韋弦之戒。君佩服之、後更今名、猶以舊字、示不忘先訓也。年二十五、始從洵先君子遊、爲春秋學。先君子命設几案、日與對誦春秋、以左氏傳時時爲說大義、且以禮法開之。久之、浸若有省、遂痛自刻勵、務入禮法。鄉人稱焉。君亦益以風義自任。

朝廷念里胥之役不均、許以義役從事。君家無溢格之稅、而里多中下戶、慮不能集、即出田粟倡之事、遂定。鄉里賴以少紓。所居五里許、有地曰金山、地里家以爲吉、君雅有歸骨之志。會今秘閣修撰晦翁先生朱公有族兄死未葬、馳書語君、即捐以與、無吝色。少從鄉先生程君侗及其弟舟學。二君歿日久、而撫其子若孫、恩意不少衰。侗[□]端[□]母欲以爲、凡君之篤於風誼、皆此類也。嘗得朱公所定[□]祭儀讀之、曰、是可爲也。自是歲時祝饗、由始事逮卒祭、盛服酌酒饋食、有數有序、拜俯伏興、屏息以俟、如親見其形容而有所受命者、未嘗少倦也。晚節絕意進取、又欲漸磨屏家事、即所居傍藝花蒔竹、灌蔬畦藥、時杖策徜徉其間、觀物之華實盛衰以自適。客至、具壺觴、從容終日、間論時事、料成敗則雖老於市朝者不逮也。淳熙十三年、天子賜觴德壽宮、推恩耆老、以子銖恩授迪功郎致仕。後五年、以疾終於家。實紹熙二年八月十



儒藏

四日也。享年七十有六。君爲人精悍、議論貴決白、不爲模稜含糊態。有所喜怒、若茹物不下、必吐出乃已。然過則夷然、未嘗宿怨人。或時以橫逆、往往更結以恩意、使自愧悔、以是士之賢者愛之、其不肖者傾心事之。及其卒也、皆傷之。少嘗讀馬援傳、慨然慕之。既涉世不偶、又頗聞先生長者餘論、乃更折節爲儒生、自力於善、識者謂其視疇昔猶兩人也。嗟夫。天下平治、士無功名、才□一區之死無聲、昔人嘗恨之。如君者、使有所遇合、以其才頡頏一世、可量哉。娶周氏、再娶李氏、皆前卒。子男四人、鎬、銖、錫、鎡。女三人、嫁余梓、程澈、王中、皆周出也。錫、鎡及嫁程澈者、亦前卒。孫男三人、女二人。初君自恨知學晚、教子甚力、師儒有道之士、不遠千里、遣從之遊、故諸子行藝皆蔚然可觀。鎬、銖嘗舉進士、而銖尤自立。將以某年月日葬君其鄉湖山之原、以周氏祔、屬洵狀君行事、欲求銘當世立言君子。洵少從先君子牛馬走客君家、君以世契

故待之厚、義不得辭、謹述其行治、可以告後人者如右。

程洵撰 《尊德性齋小集》卷三

迪功郎致仕董公墓誌銘

君諱琦、字順之、饒州德興人。董爲德興著姓、世有登儒科者。君之曾大父□、左朝奉郎、太醫令。大父林、右從政郎、處州縉雲縣令。比兩世皆以才稱。父陸始不仕、而亦以氣節聞。君生有英氣、務爲倜儻可喜事、不肯踐繩約。縉雲君憂其過、名之曰執柔、而字以順之。曰、以是爲爾韋絃之戒。君佩服唯謹、及更今名、而猶以舊字行、示不敢忘也。年二十五、始從鄉先生韓溪程公受春秋學。程公命設几案、日與對誦春秋左氏及近世胡氏傳、時時爲說大義、稍以禮法開之。君自是浸若有省、痛自刻厲、雖益以風義自許、而不復事少年豪習矣。義役法行、首出田粟倡之事、以時定、里人賴之。嘗卜壽藏、既得吉、而所知有貧不克葬者、



舉以畀之無吝色。少嘗從程君侗及其弟舟學。二君沒久。遇其子若孫。恩意不少衰。其好義多此類。晚得諸公家祭禮。讀之曰。是固可勉。自是歲時祀饗。齋潔灌薦。跪起如法。比老不倦。既絕意進取。漸屏家務。即所居旁。雜藝花木蔬果。以自娛。客至。開尊命酌。劇談終日。間及世事。而處其是非成敗。則雖老於朝市者。不逮也。淳熙十三年^③。天子奉觴德壽宮。推恩耆老。以子銖故。授迪功郎致仕。紹熙三年八月庚寅。以疾終。年七十有六。蓋君爲人精悍。議論貴決白。不爲模稜含糊態。有所喜怒。若茹物不下。必吐出乃已。然已過則夷然。未嘗宿怨。人或待以橫逆。往往更結以恩意。使自愧悔。以是士之賢者愛之。其不肖者傾事之。及其卒也。皆傷之。少嘗讀馬援傳。慨然慕之。既涉世。不偶。又頗聞先生長者餘論。乃更折節爲儒生。自力於善。識之者謂其視疇昔猶兩人也。嗟夫。天下平治。士無功名。才否一區之死無聲。昔人嘗恨之。如君者。

使少有所遇合。以其才頡頏一世。可量哉。娶周氏。李氏。皆前卒。子男四人。鎬。銖。錫。鎡。女三人。嫁余梓。程徹。王中。皆周出也。而鎬。鎡。及程氏女亦前卒。孫男三人。女二人。明年銖將葬君湖山之原。以周氏祔。且屬新吉州錄事參軍程洵允夫狀君行如此。來請銘。予不及識君。而韓溪先生者。先君子之內弟。允夫即其子也。銖又來學。故聞君之行事爲詳。其可辭。始君自恨知學晚。教子甚力。故諸子多材。而鎬。銖皆舉進士。銖尤好學自立。庶能成君志者。銘曰。

才之良。氣之剛。有求必予。義之方。能不試。老其鄉。嗚呼歸哉。此其藏。

朱熹撰 《晦庵先生朱文公文集》卷九三

宋尙書右僕射觀文殿學士正議大夫贈特

進洪公行狀

曾祖炳。贈少保。曾祖母何氏。贈紀國夫人。祖彥先。贈太師。秦國公。祖母董氏。贈秦國夫人。父皓。徽猷閣直

學士、贈太師、魏國公、諡忠宣。母沈氏、贈魏國夫人。本貫饒州鄱陽縣、年六十八。公諱适、字景伯、其先徽州人、唐末避亂徙樂平之洪巖、世以耕桑爲業、自高祖府君士良篤義方之訓、力教子孫、每以事過郡、至潞潭、愛其山朝水挹、可卜宅兆、則鄭重求之、立庾屋其上、爲往來貯儲地。疾革、命家人曰、葬我必于彼、後世青紫當不絕。越十六年、爲元豐乙丑、長孫給事中彥昇遂以進士起家、是爲公伯祖。又三十年、政和乙未、曾孫忠宣公繼之、是爲公皇考。又二十七年、紹興壬戌、公與介弟文安公遵中博學宏詞科。後三年、仲弟今敷文閣待制、同修國史邁繼之。給事之後、官者七、忠宣之弟姪官者九、子、孫、曾孫官者二十六。忠宣嘗嘆曰、秦氏置我死地、曾祖潛德燾後、而褫章無因、齎恨泉下矣。公初除執政、即當轉官、勾高祖卹典、上惻然從之。諸公議以大夫告第、既有尼之者、遂寢。公爲兒時已穎異、十餘歲日誦三千言。忠宣連仕浙、因寓

嘉禾。及使虜、公年才十三、已能顓任門戶事。胡騎犯吳、間關奉秦國、魏國挾五弟三妹歸鄱陽。指衆食貧、忠宣奉入在秀、復迎挈以往。凡九年而魏國棄諸孤。忠宣又久留朔方、公茹悲含辛、破涕自力、以奉秦國之歡。躬帥二弟刻意問學、爲文自出機杼、皆中程度。一時名人多折輩行與之交。外氏居無錫、公奉魏國之喪往依以葬。時河南復爲王土、嘗擬宰臣賀表、有宣王復文武之士、光啓中興、齊人歸鄆、謹之田、不失舊物之句。仲舅博士沈公松年一見奇之、勉以爲宏博之習。初用出使、恩得修職郎、監南嶽廟、調嚴州錄事參軍、浙西提舉、常平司幹辦公事。旣以詞科賜第、宰臣進讀制詞、太上皇曰、父在遠、其子能自立爲可嘉。宜與陞擢差遣。于是爲敕令所刪定官、改左宣教郎、入秘書省爲正字。才數月、忠宣南歸、以直忤秦檜、即去國。公以奉親自列、通判台州。將終更、忠宣有英州之謫、台守與公不相能。公嘗行縣至黃巖、令以繫



囚十數輩匿堂廡間、詭以獄空告。公坐令聽事、聞大呼聲、即詰視、諸囚皆叫號稱冤、因備其事申諸司。歸白守、守以爲不關白長官、撰彈文迎秦意。秦諷言官上之、坐免官。往來于英、以奉忠宣溫清。里門聚食數百指、皆仰給于公。公處之怡然。凡九年而忠宣薨、服除、起知荊門軍。以惠愛爲政、首奏便民四事、大抵以均敷茶額錢、所出甚于常賦、茶商執害民之柄而託吏爲姦。民力重困、官田以附種爲名而不稼納租。麴引失立法之意而重叠出鑷。大禮代它州之貢而多方取辦、乞罷行之。又荊門自兵火後、學校廢弛、遇大比則附試江陵、解額五才得一、慨然以作成爲己任、力請于朝。由是軍得自解發、額亦稍增其舊。改知徽州。先是、朝廷立賞鬻官田、當路急于受賞、督迫甚峻、屬邑一切望風。公下車、民競赴愬。公曰、賞可慕、民獨不可愛耶。乃戒屬邑有虐吾民者必劾。已而使使者罷去、民率得寬。郡多訟分產不平者、公究其端、以官印

關書吏倍有邀索、民寧匿關而憚費、以故成訟。公下令、許民持關立庭下、不以蚤莫、即時呼吏印給之、無毫髮費、舊訟頓息。其簡易近民率如此。提舉浙西常平茶鹽事、詣闕且對、適文安知平江府、引嫌當避、乃移節江東。嘗奏論役事、其略曰、元祐旨揮、合役坐閑人戶不及三番處令雇募。蘇軾謂聖恩欲使百姓空閑六年。是以紹興二十六年之旨、歇役六年者與白腳同。行之數年、下戶得以寬佚。間者宣州守臣有請、欲不候六年再差上戶。有司誤以歇役六年之文、衝改、下戶畏避、多致流徙。蓋上戶稅錢有與下戶相去十百倍者、必俟差遍下戶、則富家經隔數十年方再執役。臣守徽州、以婺源一縣言之、有差及一貫稅錢者、民間哀訴、誠爲可念。乞仍行二十六年旨揮、庶使細民鼓舞德澤。又如一都之內、上等五戶稅錢各五十千、中等五戶稅錢各三十千、各曾應役。若以歇役六年再差、恐中等五戶僥倖終免。乞自第一戶差至

第十戶、然後再差、所貴役法均平、上下稱便。人以爲切中役法之弊。江東實鄉部公又嘗兼提點刑獄事、風采凜然、不可干以私。逆亮敗盟、有旨令沿江監司條具恢復事、公上奏謂、逆亮旣殞、大定僭號、未必諸國服從。若能仰順天時、遣使歸疆、則王師不血刃而得土宇、實天下之幸。萬一虜衆尙強、自淮以北別無爭立之人、則宜多遣有膽力人密傳詔檄、使中原義士各取州縣、因以畀之。王師但留屯淮泗、募兵積粟、以爲聲援、不必輕涉其地、以務力爭。俟蜀漢山東之兵數道俱集、見可而進、遲以歲月、必有機會可乘、恢復故道、何翅破竹。庶幾兵力不頓、可以萬全。車駕親征、至建康、因上殿陳言、江鄉之民以旱荒而遷徙淮甸、比遭虜騎之擾、復還故鄉、則所棄之產已爲官司估賣、形勢之□□者十不償一、佃者量納租課、無補于官而有害于民。乞斷自紹興二十八年以後、凡州縣所賣逃產、許元業人子孫以元估價就贖、專委提

舉常平官覺察。太上褒予甚飾。時待制爲右史、受命迎使客入對、太上顧其副張掄曰、洪某三子、其材皆可用。公激烈初心、念先志之未酬、每思盡瘁、曰邊防、曰民兵、曰防江、曰積粟、曰賑濟流民、皆次第爲朝廷言之。除尙書戶部郎中、總領淮東軍馬錢糧。當海州解圍、又有符離甲申之役、沿淮列戍、襁負而歸者踵相躡、供億之費數倍於曩時。公以書生從容心計、略不見其趣迫之色。有旨犒解圍軍兵、而鎮江府前軍之右軍與太平州之武鋒軍以在圍中獨不預。公從權比附、且倍其賞、軍士莫不歡呼。又以便宜招安海道嘗爲過者。又謂沿邊已招納降胡、若使之饑寒失所、則必怨望。如蕭鷗巴一家餘二十口、券錢最多、曰不過千六百元、尙不給用、則其餘可知。乞將已有官人與給料曆、進勇副尉與依武勇給券四口或五口以上、亦與添給口食。其臨事機識大體類是。總所建治京口、名雖淮東而所總多江東浙西財賦。嘗奏乞



以浙西、江東財賦入御，勿復增薦舉添官屬，庶名正事順，可以辦集。又嘗請於朝，皆爲戶部所沮。公登政府，始請行之。淮東至今蒙賴。就除司農少卿。隆興二年二月召還，改太常少卿，權直學士院，旋又兼權禮部侍郎。上初講郊丘之儀，公建議合進胙德壽宮，及改定樂章并郊回用雅樂與減樂工之冗員，皆當於禮而適于時。文安公罷西府，公亦上章求去。上諭令安職，復遣中使賜以珍茗。越三日，與右正言尹穡同賜對選德殿。上顧謂穡曰：「洪某爲人溫粹，文詞有用，論事皆可行。褒獎至于再三。」穡出，驚歎曰：「聖眷乃如此。」言者既攻文安，雅不欲公留，及是始無相憾意。閱月，除中書舍人。湯丞相思退罷免，公當制，侍御史晁公武噴有語，公露章求去，且乞身於上前甚力。上曰：「前日公武謂思退有罪而卿稱之爲大臣，制詞中無譴責語，乃其死黨。」朕曰：「朕令作平詞，非其罪。」公武執彈章在手，乞留楊後，已卻之，仍徙置戶部矣。時虜再

犯淮甸，羽書狎至，書詔填委。上焦勞，至夜分不寐，或夕召，或細書咨訪，公獨當內外制，視草之餘，應詔密啓，默當上心。始，淮上斥堠不明，將帥無申發文字。公奏乞預隄防海道，又乞降親征詔以激厲士卒。虜既尋盟，首爲賀生辰使。上謂副介龍大淵曰：「前日洪某侍玉輅，見其容貌甚悴，豈有聲色之奉耶？」方欲大用之，可諭意令自愛。公附奏曰：「家素無侍妾，近以法服執綏，車輅撼頓，失其常度，只尺天威，有戰慄之色，報國之軀，敢不自愛。」既越境，虜遣同簽書宣徽院事高嗣先接伴。嗣先之父司空嘗有德于忠宣者，故見公加敬，且詢先世甚詳。公因遜謝，相予驩甚，頗得虜要領以歸。乾道元年五月，除翰林學士，仍兼事中書舍人。輔臣奏例無翰苑下兼西掖者。上曰：「洪某在後省，甚振職，且要其整頓綱紀。」秦墳提舉太平興國宮，公奏：「秦檜欺天盜權，戕害忠直，當錮其子孫。若一人奉祠，則其黨與皆有彈冠之望，所謂一葉不去，將尋斧

柯者矣。上即從之。故事給舍繳駁施行者皆封付三省。是奏乃以付公。明日召對。上曰。所謂秦墳甚當。異日有繳奏。只須批敕以來。不須聯章。雖朕意所向而不可行者。但論之。如繳論巫伋之不當被召。余堯弼之不當復職。莫汲之不當除編修計議官。議者皆以爲當。未嘗一爲親故干求除授。有改秩而避免作縣尉。別得差遣者。雖門下士亦不置。以故人服其公。盈旬乞免兼職。上曰。執政有缺。朕今用卿。旣因繳馬監崔良輔轉官事。上數稱善。至乞令大臣討論賞典處。上云。卿今日作執政。可以討論。六月。除端明殿學士。簽書密院事。上語參政錢公端禮。虞公允文曰。三省事與洪某商量。早朝遂不先退。東西府同班奏事自此始。詣德壽宮謝。太上皇曰。上用卿爲執政。朕亦謂從官中無逾卿者。卿父精忠。今人臣所無。朕嘗謂蘇武不能及。頃歸自虜中。欲除執政。爲秦檜所忌。擠排使去。上天有報。卿兄弟相繼輔政。公每遇奏西府

事。必極意展布。至三省則終不敢出位盡言。一日偶及皇甫倜軍告乏。戶部祇將椿積錢應副。上云。無分三省事。卿有所見。第言之。八月。除左中大夫。參知政事。十二月。拜左通奉大夫。尙書右僕射。同中書門下平章事兼密使。明年三月久雨。上迎天竺佛請霽。減膳卻葷。公以燮理亡狀。獨三上章乞罷免。且面奏求去。上曰。春間自是多雨。卿奉法守公。近年宰執所不及。第安職。臺諫因論列。上隨事諭之。諫議大夫林安宅至居家待罪。遂以觀文殿學士提舉太平興國宮。明日。上謂參政葉公顥曰。宰臣奉法守公。純誠不欺。近年無如洪某者。臺諫搜索細故。不存公道。安得如此人而用之。公自西府至相府才旬月。而進呈之際多所開陳。大抵以誠實不欺爲主。見有負于國害于民者。必正色拒之。寧己任怨而必欲使君立于無過之地。用人第取實才。不采虛譽。可予不以疏而棄。不可予不以親而私。有受薦而終身不知所自者。上嘗



曰、今日可謂存公道、卿等所擬無不當、可見留意選擇。公奏、蔣芾嘗語臣復省無題目、臣云前此見行事有特字者、皆是非法、今不敢下一特字、自然無可論繳。上曰、蔣芾亦有此言。因奏、臣到政府數月、見陛下行事未有不循典憲者、今蔣芾尙欲降特旨、時常思祖宗故事、更願陛下思其所言、益崇聖德。上曰、朕與卿等共守之。上欲幸白石教場閱三衛軍馬、公奏云、閱武固有名、第聞三衙潛儲鷹犬、外人以爲出獵、又聞準備驪鹿、傳之遠方、恐損聖德。上曰、朕意不如此。于是戒諸將不得以鷹犬自隨。用兵後調度不給、獻議者欲復免行錢。上曰、曹泳所行惟免行一事、至今人以爲是、今日豈可不及曹泳。繼是有乞借房緡、收職田、立宮觀、嶽廟額、添交予、增乳香之直、令諸郡獻羨餘者、上以爲傷國大體、公亦力贊以爲不可行。上欲親見問郡守以觀能否、公奏乞降旨、去闕期半年、令奏事之任。自是一經睿鑑、能否判然、諸郡多得良

二千石。時有輔郡守獻言、欲如漢太守許上計、上問可行與否。公曰、漢法令長吏守丞歲終上計、大略似今攢帳耳。郡守不可以自來、惟嚴助以漢廷切責、乞奏三年計不可行。人以爲善對。然公始爲執政、即奏減機速房吏人、它日又奏乞降旨不得存留三省并密院額外吏人。將上、承旨司謝褒者至漏舍、堅請存留王興祖等四人、褒之子梓實在四人中。公奏朝廷久不治、吏互相循襲、無所忌憚、乞與放罷編管、上然之。戶部吏有稽慢、公亦懲治不貰。侍郎林安宅上章待罪。上曰、斷一二吏、何至如此。雖聖明可恃而群。小固已慍矣。又安宅乞降度牒千道、限廣東一季盡鬻。公奏諸路分料甚擾、乞減半付漕司、俾從民便、無得分下諸郡。上深以爲然。馬司治馬甲、買牛皮五千五百、而御前又買五萬、內侍復傳旨下工部買十三萬。公奏浙西去年水潦、漕司期限逼、民多殺牛納皮。上曰、如此卻是公然使人殺牛、軍器所妄計耳。

祇買一萬。奏曰：陛下務農重穀恤民如此，天下幸甚。中旨朱彥宗守婺，公奏彥宗雖故翊善子而娶長公主女，家居婺，此命若出，恐駭物聽，尋改知泰州。殿中侍御史張之綱論不差，陳宋霖華初成事，以初成姓名藏之章疏中，公奏白其事。上取履歷視之，明日曰：華初成數放罷，又嘗勒停，年已及，豈可復使爲郡？卿敢理會臺諫事，可見無私，朕終爲之喜。監察御史劉貢初除，公嘗於上前譽之。有術士薛言中出入貢門，因爲人求官于密使汪公澈，事泄，送臨安府。會奏事，上稱貢能治錢塘，寄囚事云：適已除殿中侍御史，公因斥其過，且言除書未啓，當封還。上曰：卿等如此無隱，向來宰執所無。貢遂罷去。皇甫坦以方技進，嘗與右史陳良祐同坐客舍，謁者導陳先，坦怒不同升，盛言謁者奮而來前，遽出懷中一餅以獻。公擲之地曰：君誠有道，何不爲呂洞賓，豁光塵外而僕僕朝市？正須仙食，非所願。麾使出。翌日奏曰：通國以神仙待皇

甫坦，不識陛下以爲何如人。上已先知昨日事，笑曰：頗能布氣治病爾。昨日中宮賜之酒，陛辭已大醉，語言不倫，故如此。凡公之所行，人多爲之岌岌，而公奮已直前，無所回避。林安宅既登諫坡，或勸公爲去就以避之，公曰：主上聖德遠過漢唐之君，士患不逢時，今身登宰輔，恨無以報國。苟一日留，有竭吾愚爾。吾于安宅異同，國事也，患失非所計。訖墮其口去國。不數月，除知紹興府、浙東安撫使。在越一歲有半，爲治得大體而無廢事，不求治賦而用自足，吏畏民愛，至于今思之。請祠以歸，提舉臨安府洞霄宮。待制在西掖，上曰：觀文在朝肯宣力，林安宅懷奸不能容，今已三請祠矣。姑從之。有大藩闕，即復用矣。公既歸，素不爲求田計，問舍之外，得負郭地百畝，剪除荆棘，列岫如驚，雙溪上下，引以爲蘭亭曲水之飲。洲渚窈窕，花木映帶，位置臺榭，隨力興作，野服瘦筇，終日婆娑其間，人視之不知其爲丞相也。目其地曰盤洲，一卉一



椽皆有題詠、雜親朋、醺倡爲一帙、曰盤洲編。平生淡泊、老猶嗜書不倦。晚歲爲文益古、軼出西京之上。尤好漢隸、略去筆墨畦逕、而落紙典刑、深得東京用筆意。治越之暇、訓釋考證、博極古書、爲隸釋一書、廿七卷。嗣有附益、爲隸續廿一卷。其後時有刪潤、合釋續爲一、而是正之、以屬越帥刊行。而書史失去、不復存副本。公每以爲恨。有文集一百卷、藏于家。淳熙十一年二月二日薨于正寢。公自撰遺表、至是上之。天子震悼、贈特進、官其後如格。爵至鄱陽郡開國公、食邑五千二百戶、實封二千六百戶。娶沈氏、封萊國夫人。左中大夫復之孫、即太學博士松年之女、魏國夫人之姪。先五年薨。公爲墓銘、效漢人立雙闕、因自作小傳、俾後人刻其上。男九人、槻、朝奉郎、通判興州。秘承議郎、通判光州。榴、蚤亡。楸、文林郎、池州建德縣丞。檣、宣教郎、知隆興府武寧縣。桴、故承事郎。楹、承奉郎、監漢陽軍酒稅。榴亦亡。楸、承奉郎、監台州商稅務。女三

人、長欲嫁而卒。次歸及之。次嫁承議郎、知袁州宜春縣薛紹。孫二十人、倬、承務郎、監筠州新昌縣酒稅。儼、及皆承務郎。及監舒州山口鎮。偲、僦、僑、仝、俱、侃、僊、傳、佃、憫、仔、佻、儻、伉、一未名。孫女十人、長適迪功郎隆興府武寧縣主簿楊汝明。次將仕郎權當國。次承務郎、監鎮江府江口鎮稅張履信。餘皆在室。將以明年三月甲申葬于郡四十里徐村之原、合萊國墓。興州君錄公事狀、俾及之詮次、以備太史氏之采擇。公爲總賦、屬文、安擇壻、及之爲隆興元年進士、實文安領貢舉。公以文安之言、信之不疑。一見即相器重。出疆辟使爲屬、旣而以疾辭。虞雍公在政府、復兩學官闕、欲以及之。及之辭。公曰、茲我意也。可以見予之所存矣。顧錄錄州縣且二紀、有負期待。前年冬解秩、分宜、紆道往省、公喜見顏際。從容餘月、垂別戀戀、閱月未再而公之訃聞矣。嗚呼、今尙忍言之。及之自登公門、頗聞忠宣公之往行爲詳、而公之忠鯁誠實、實似

之。與人交無長語、而情好周盡、收拾孤幼、周卹賤貧、爲己責而不爲己恩。薦舉必首寒素、不爲勢利所奪、涉於欺誕者、雖已舉而猶劾之。郊當奏長孫、念渭陽之恩未報、密以表弟沈自強之名聞。命下、子弟族黨方知之。終其身餉客不隨俗之好惡爲侈、具書札往復不貸一荷、幅溢語。閑居十六年、未嘗通朝士書、雖宰執除拜賀緘亦不講。晚遇英主、驟登宰輔、曾幾何時而秘殿珍祠、優游綠野、天日臨照、始終不渝、非公之忠實不欺、疇克爾耶。諸子稟公之訓、悉從常調、試邑、顯厚能自持、諸孫詵詵多秀發、或者用不盡之器業、其在于斯乎。待制方膺上異眷、顯付史事、及之辭不獲命、乃摭其凡而次叙之。若其詳則有公之奏藁語錄在。公初名造、字溫伯、一字景溫云。謹狀。淳熙十二年十一月日、壻奉議郎、幹辦行在諸軍審計司許及之狀。

許及之撰 四部叢刊本《盤州文集》附

丞相洪文惠公适神道碑

公姓洪、系出共工氏、後避仇以洪易共。三國有廬江太守矩、唐有集賢學士孝昌、五季自歙徙饒州樂平、又十世始歸鄱陽、隱德田廬。至公高祖士良力教子孫以學、愛滂港山川^⑦、而置倉焉、命其子曰、他日葬我倉下、青紫當不絕。後十六年元豐乙丑、孫彥昇果以進士起家、事徽宗、歷三院御史、至給事中、徽猷閣待制、遂爲大家。公之曾祖諱炳、贈少保、妣紀國夫人何氏。祖贈太師、鄭國^⑧公、諱彥先、給事弟也。妣魯國^⑨夫人董氏、後徙樂平之洪源^⑩。父皓、政和乙未進士、仕至徽猷閣直學士、贈太師、魏國公、諡忠宣。母魏國夫人沈氏。公初名造、字溫伯、一字景溫、後改名适、字景伯。幼穎異、日誦書三千言。忠宣公自嘉禾司錄應選使朔方、公年十三、已能任家事、率五弟三妹奉祖母及母避亂歸饒。母亡、復過嘉禾、食忠宣之祿、日夜率長弟文安公遵、次弟翰林學士邁、種學績文、至忘



寢食。用父出使恩補修職郎監南嶽廟調嚴州錄事參軍浙西提舉常平司幹辦公事。紹興十二年與文安公同應博學宏詞科。宰臣進呈所試制詞高宗曰父在遠子能自立可嘉宜與陞擢遂除敕令所刪定官。後三年翰林公亦中選由是洪氏文名滿天下。改左宣教郎入秘書省爲正字。才數月忠宣公歸自朔方以忠言忤秦丞相檜斥補鄉郡公亦出通判台州將滿而忠宣散官謫英州台守觀望擬彈公文納當路轉示言者以爲風聞坐免官往來嶺南供子職。閱九年秦薨忠宣北歸亦道卒。服闋起知荆門軍公才智有餘臨民惠愛二十八年應詔上寬恤四事凡公私以例取民錢歲數千緡悉除之。郡久爲盜區大比士附江陵試解額僅存五之一。公作成日衆乞自闢試闈稍還舊額繼有登科者。改知徽州會鬻官田監司慕賞迫州縣公獨寬之。初至訟析產不平者紛然公曰此吏求賂不印關書之過也。命人戶毋問

早晚齋書庭下立爲印給其訟遂絕。爲政得要類此。范文穆公成大來爲戶掾公一見知其遠器勉以吏事暇則商榷著述。自是范公宦業文章高一世。每德公云擢提舉浙西常平茶鹽會文安公守平江易江東路嘗兼提點刑獄蓋鄉部也持正不私風采振厲三十二年車駕視師金陵公因朝覲言本路昨旱荒民逐食淮甸復困虜兵今雖懷歸而田產官已斥賣不則給佃乞斷自二十八^④年後許業主若子孫用估價贖還。天語褒飾再三。時翰林被命迎使客上曰洪皓三子皆可用也。公於是歷陳邊防民兵積粟賑民等事朝廷益知其才除尙書戶部郎中總領淮東軍馬錢糧。孝宗即位海州解圍符離用兵供億繁夥公心計周密暇裕如平時。會有旨犒海州之師鎮江及武鋒軍有實在圍中而不與名公比附倍給以便宜招納海道逃卒歸之督府歸正者接踵而來或無以贍其家因公奏乃計口添支。公謂官以總領

淮東爲名、而財賦實隸浙西江東、乞以兩路入銜。後公登二府、竟行其說、迄今便之。隆興元年、就遷司農少卿。明年召貳太常、兼權直學士院、又兼權禮部尙書。上初講郊祀、公乞進昨德壽宮、及改定樂章、汰樂工冗員、人謂禮與時兩得之。七月、文安公罷西府、公即求去。上遣使賜茶、諭令安職。尋因夜直同右正言尹穡召對、上稱公溫粹、文詞有用、論事可觀、穡先頗睥睨公、知上眷乃已。九月、除中書舍人、內直如故。湯丞相思退免、侍御史晁公武論公草麻無譴責語、公亟請外。上曰、公武言卿黨思退、朕謂平詞、出朕意、固卻其章、仍徙戶部侍郎矣。方羽檄交馳、書詔填委、或夜召、或細札咨訪、公獨當內外制、時時奉詔言事、如乞防虞海道、降詔親征、多契聖心、大用之意已定。虜旣講好、首命公爲賀生辰使、虜遣同簽書宣徽院事高嗣先接伴、自言其父司空有德忠宣、相與甚歡、得其要領以歸。乾道元年五月、除翰林學士、仍兼

中書舍人。大臣奏翰苑不應下兼掖垣、上曰、洪某在後省振職、欲其整頓綱紀耳。秦塤予祠、公執不可、上徑批依奏、封以付公。明日賜對、宣諭曰、卿論秦塤甚當、雖朕意所向、不可行者、第言之。巫伋被召、余堯弼復職、莫汲爲密院編修官、公皆繳奏而止。又奏免外制、上曰、執政有闕、朕當用卿。公因繳馬監崔良輔轉官、乞令大臣討論賞典。上極稱善、且曰、卿且執政、自可討論。六月、遂除端明殿學士、簽書樞密院事。上諭參政錢端禮、虞允文曰、三省事與洪某商量。東西府始同班奏事。公赴德壽宮謝、高宗曰、上議用卿、吾謂從官中無踰卿者。況卿父精忠、古今所無、頃欲登用、阻於秦檜。今卿兄弟相繼入輔、此天報也。八月、以左中大夫參知政事。十二月、拜通奉大夫、尙書右僕射、同中書門下平章事、兼樞密使。公自簽樞旬月、入相、感激異知、任怨革弊、以誠實不欺爲主。人才可用、疏遠不棄。不然、雖親舊弗予。上每稱其心存公道、



進擬無不當。公奏中書舍人蔣芾語臣無事可繳。臣答云凡降旨云特者皆非法。今一切無之。上曰芾亦及此。且謂特旨宜審。公奏陛下動遵成憲。願思芾言。益崇聖德。上曰朕與卿等共守之。駕幸白石教場。閱三衛軍馬。公前奏將帥有潛蓄鷹犬備狩獵者。上即呼諸將戒諭。初議召見郡守。觀其能否。公言舊惟見闕賜對。今乞勿拘闕遠近。並令半年前奏事之任。遂爲定制。二千石多得人矣。公自執政即奏減機密房吏。三省密院毋留額外人。有承旨司謝褒者力乞存留四人。其子在焉。公怒取旨編置政府。久不治吏。上欣然以爲允。戶部事有稽慢。公追主令治之。侍郎林安宅上章請罪。既又欲給度牒千道付廣東。期一季盡鬻。公請減半。仍戒科擾。安宅滋不悅。馬軍乞牛皮五十餘萬爲馬甲。御前拋買五萬。工部別得旨市十三萬。公奏數多限迫。上曰軍器所妄計。是使人殺耕牛也。第買一萬而已。中批朱彥宗知婺州。公言此

資善堂翊善朱震之子。雖可與郡。然彥宗娶潘氏。乃婺州長公主家。遂改泰州。二年。殿中侍御史張之綱論陳宗霖當與差遣。而潛附所厚華初成於其中。公發其姦。上視初成履歷曰。屢放罷。又嘗停官。且年已及。豈應與郡。卿敢及臺諫。可見無私。朕終夕爲之喜。劉貢初除監察御史。公贊上得人。會術士薛言中同貢子爲人求官於樞密使汪澈。汪送有司。上未知也。早朝。上稱貢能治錢塘寄囚。已批出遷殿中。公與執政及薛言中事。且云除書未啓。當封還。上曰卿等如此無隱。向來宰執所無。之綱尋以憂去。貢遂罷。方士皇甫坦竭公。公薄其禮。坦怒云云。公責之曰。君誠有道。朝爲出入宮禁。妄談禍福耶。明日。公奏通國以神仙待坦。陛下謂坦何如。上已知公責坦。笑曰。頗能布氣治病。昨日宮中賜酒。醉語已無倫矣。公既疊忤言路。適林安宅爲諫大夫。或勸公引避。公曰。吾與安宅異同。國事也。上知吾忠。豈可患失。逆爲去就乎。

適春霖公引咎乞退。上曰：春自多雨，卿第安心。安宅遂與臺官合辭論公，上不聽。安宅至家居待罪，公亦力請。上不得已，三月辛未，除公觀文殿學士，提舉江州太平興國宮，謂參政葉顥曰：「宰臣奉法守公，誠實不欺，無如洪某，重違言者耳。」不數月，起知紹興府，浙東安撫使，治得大體，復勤小物，軍民安之。閱歲有半，提舉臨安府洞霄宮。時翰林在西掖，上語之曰：「賢兄三請祠，姑聽暫閑。」公素不營產業，自越歸，得負郭地百畝，因列岫雙溪之勝，復置臺榭，引水流觴，種花藝竹，命曰盤洲。一椽一卉，題詠殆徧。安居十有六年，身名俱榮，子孫滿前，近世備福鮮及公者。淳熙十一年二月^②辛酉薨於正寢，前自撰遺表上之。享年六十有八，爵鄱陽郡開國公，食邑五千二百戶，食實封二千四百戶。初贈特進，諸子遇恩累贈太師、魏國公。娶沈氏，太學博士松年女，追封魏國夫人。母夫人之姪也。先公五年薨，葬郡東南四十里徐村之原。公爲墓

銘，效漢人立雙闕，因自作小傳，俾後人刻其上。明年三月甲申，諸子奉公柩合葬焉。男九人：長槻，朝請大夫、新知贛州、江南西路兵馬鈐轄；次秘，朝請大夫、知南劍州；栻，早亡；櫛，朝散郎、新權發遣長寧軍、榘，朝請郎、前軍器監主簿；桴，故承事郎；楹，朝奉郎、新知慶元府定海縣；棟，早亡；栢，通直郎、前權簽書判門軍判官廳公事；女三人：長早卒；次適通奉大夫、同知樞密院事許及之子^③；前卒。次適朝散大夫、兩浙西路提點刑獄公事薛紹^④。孫二十四^⑤：人，倬，承議郎、江南西路提點刑獄司幹辦公事；儼，故承事郎、知常德府龍陽縣丞；伋，奉議郎、荆湖南路提舉茶鹽司幹辦公事；偁，承事郎、新知江州瑞昌縣；僚，承事郎；俯，承務郎^⑥。新提領建康府戶部贍軍酒庫所幹辦公事；僑，候，侃，承務郎、新監建康府戶部大軍庫門；倓，承事郎、新權簽書漢陽軍判官廳公事；傳，將仕郎；佃，佃，仔，倅，儉，儔，承事郎、新監無爲軍崑山鎮；伉，俊，仁，俶，承務郎^⑦；佑^⑧。



儒藏

倣倣。女孫十二人。適文林郎前廣南西路轉運司主管帳司楊汝明。修職郎新無爲軍巢縣主簿權當國。通直郎兩浙東路提舉常平司幹辦公事張履信。鄉貢進士陳^①洋。承務郎張^②。將仕郎邢^③。將仕郎王待問。進士高^④。迪功郎新信州弋陽縣尉王元春。餘在室。曾孫男五人。芾。蘊。蘭^⑤。將仕郎。蘊。荀。女一人。公器業早成。與人交誠實無浮禮。文華天賦。濟以力學。步驟經史。新奇富贍。兄弟鼎立。自成一派。罷政後。論著益多。四方傳誦。有盤洲集一百卷^⑥。耽嗜隸古。爲纂釋二十七卷。隸續二十一卷。屢加刪潤。合爲一書。將踵歐陽文忠公集古錄。趙明誠而下弗論也。某早與文安及翰林同朝。公由常平入對。始識公。又嘗與贛州爲僚金陵。故其子孫以副樞許甥狀請碑墓道。先是太常以文惠易公名。文固然矣。壬辰夏。予奉祠過饒。適連年水旱。流移系道。公宗支繁庶。或不自給。人人言相君賙我。且及恤貧已責事甚詳。夫家居均

惠若此。在公固可知矣。遇蔭補。捨長孫密奏表弟沈自強。酬渭陽之恩。命下乃知。是皆宜書。銘曰。

思文孝宗。雲漢章天。有臣洪公。優於代言。孝宗神武。志平醜虜。公踐帷幄。言整軍旅。帝方克勤。如日運行。公總衆職。甚稱上心。帝惟至公。天無私覆。相業伊何。才能是授。謀皆予同。德惟乃知。周旋二府。僅越三時。保釐東郊。注想未替。歸心浩然。何待奏計。榮名燕居。十有六年。爲而不恃。五福天全。燁燁斯文。振振厥後。詩以聲之。公乎不朽。

周必大撰 《平園續稿》卷二七

校記

①處州：原作「康州」。按：《宋史·地理志四》，縉雲縣屬兩浙東路處州轄縣。今據改。

②林：宋浙江刊本《晦庵先生文集》作「材」。

③三：原作「二」，據右引改。

④不：原無，據四庫本《文忠集》補。

⑤與：原作「以」，據右引改。

⑥群小：原作「郡」，據右引改。

⑦川：原脫，據傳增湘校本《廬陵周益國文忠公集》（下簡稱傳校本）及四部叢刊本《盤洲文集》附錄（下簡稱

《盤洲文集》）補。

⑧鄭國：《盤洲文集》作「秦國」。

⑨魯國：右引亦作「秦國」。

⑩洪源：右引作「洪嚴」。

⑪應：右引作「中」。

⑫坐：原作「公」，據右引改。

⑬「公」字原無，據右引補。

⑭二十八：原作「二十二」，據四庫本《文忠集》及《盤洲文集》改。

⑮夥：原作「侈」，據右引改。

⑯浙西江東：原作「浙江西東」，據《盤洲文集》改。

⑰乞：原作「必」，據右引改。

⑱莫汲：原作「巫伋」，據《盤洲文集》改。

⑲卿且：原脫，據右引補。

⑳馬甲：原脫「馬」字，據右引補。

㉑拋：右引作「批」。

㉒秦州：原作「秦州」，據右引改。

㉓公：原脫，據右引補。

㉔二月：原脫，據右引補。

㉕子：原作「女」，據右引改。

㉖二十四：原作「二十三」，據右引改。

㉗浦承務郎：原脫，據傳校本補。《盤洲文集》作「承事

郎」。

②⑧承務郎：《盤洲文集》作「承事郎」。

②⑨佑：原脫，據右引補。

③⑩陳：右引作「程」。

③⑪錢：原作「某」，據右引改。

③⑫俶：原作「某」，據右引改。

③⑬蘭：原作「蘭」，據右引改。

③⑭一百卷：右引作「八十卷」。按許及之所撰行狀稱「有文集一百卷藏於家」，而《直齋書錄解題》所著錄及今傳世本均爲八十卷。《四庫提要》謂百卷乃藏于家者，八十卷乃刊行者。



藏 儒

宋儒碑傳集卷一百二十

趙達 李縉 徐定 鄭綺 李占 趙善應

中書趙舍人墓誌銘

自中興三十餘年間、廷策天下士、其卓然號爲一時魁傑者、往往皆出東南。歲在辛未、蜀人趙公始以瓌瑋博達之文入奉大對、首論臣子事君父忠孝之大節、言約意確、洞見胸臆。天子奇之、親擢爲第一、授左承事郎、簽書劍南東川節度判官公事。秩滿、召爲祕書省校書郎。明年、自著作佐郎遷著作郎。不數日、除起居郎。丁丑春正月、同知貢舉。夏六月、拜中書舍人。冬十月以卒。後三年、其孤暮自蜀以書來請曰、先君仕于朝、同出處者公也。先君不幸死、公哭之哀、卹之厚。今葬有日矣、銘先君以詔諸幽、公爲宜。予得書曰、噫、予尙忍銘公哉。予與公自東觀、歷左右史、掌外制、皆同日並命、爲僚久且密、知公實深。雖不忍銘、銘不可已、乃爲公叙之。公諱達、字莊叔、姓趙氏。家本秦也。

八世祖銀青光祿大夫處榮徙居于蜀、遂爲資州人。曾大父可、以季子贈官至大中大夫。祖宗亮、父衍、贈右承事郎。母馬氏、何氏、皆太孺人。公少穎悟、一讀書數行俱下。甫冠、嫻於文章、所至求見者如市。性廉靜、不以世事介意。居官行己安恬、自有所守。其在潼川、簿書獄訟能以身親之。符行中總領四川財賦、暴橫無敢抗者。有子與薦、意公必爲類試考官、密以文屬公。公不啓緘。既試、符氏子不得奏。符怒、以他事攬摭甚峻、終莫能言。公亦不少屈也。及入館閣、未嘗輒以私一至時相府。時相欲出白金助公以家來、公不答。時相怒、人爲公危之。未幾時相死、上親擢庶事、屏姦擢良、風俗一變。忽有旨以兼普安郡王、恩平郡王府教授、即日引對。上曰、卿乃朕自擢。秦檜曰、薦士、曾無一語及卿、以此知卿不附權貴、眞天子門生也。又曰、兩王方學詩、冀有以切磋之。公因奏、言路久壅、願陛下廣覽兼聽、勿以賤微爲間、庶養成敢言之氣。上嘉

納。洎爲侍從、益以誠實見知。嘗入謝、上曰、朕所以用卿、卿既知之。朝有闕政、無鉅細直助朕也。又諭廷臣曰、趙逵純正可用。其爲上所知遇如此。一旦公有疾、予過之問焉。公喟然曰、疾其不瘳乎。昨夢驅車若將入館者、或曰此給舍養病坊也。汝當爲祕書監。居無何、疾亟、力上章請外。弗許。後數日、予因進對、上首問公得疾狀、論方劑甚悉。且曰、庸醫惡知此。遣侍醫視之、而疾不可爲矣。享年四十有一。訃聞、上悼惜不已。出內府銀絹各三百疋、贈左朝請郎、官其子婿各一人。敕沿路漕臣護其喪歸蜀以葬。是行也、母老子弱、旅櫬數千里、浮長江上三峽、間關險阻、幾再歲始得至鄉邑。道路聞者、識與不識皆哀之。公先娶汝氏、未歸而卒。贈孺人。繼室支氏、封孺人。一子四女。暮承務郎、監潭州南嶽廟。長女適右迪功郎、新差監成都府商稅務支燾。餘尙幼。以紹興三十年某月日葬于普州安岳縣永康鄉東北山之原。公既沒、哀其文得

三十卷、藏于家。公平生無他好、獨喜收聚古書、考歷代治亂興衰之迹、而樞其至要。爲文根據、亦以古爲歸。內行脩潔、不見過差。嘗語人曰、司馬溫公不近非色、不取非財、吾雖不肖、庶幾似之。上本以大用期公、而公亦厚自涵養、欲有所建明、不幸死矣。嗚呼、士君子必有所不爲而後可與有爲、有所不爲、知所爲也。知所爲者、矜其所不爲而安於所爲也。可與有爲、不必爲也。不必爲者、不待其有所爲而知其必有爲也。曩者權臣用事、附己者卿相可以立得。公於此時有貴賤死生之變、而處之泰然、終不以彼易此、亦不以是自高、是不矜其所不爲而安之也。聖天子秉哲臨下、得其才於遠方稠衆之中、察其賢於群小競驚之際、意其臨大事必將有所謂不可奪者、而不克見也。至今猶思之。是不待其有所爲而知之也。賢乎哉。銘曰、

蜀有偉人、今之卿雲。旣珪璧其身、亦黼黻其文。內抱



道以全其真、而方榮親而方得君。胡奄焉以淪、詩之幽石尙不泯。

周麟之撰 《海陵集》卷二三

鍾山先生行狀

先生諱繪、字參仲、姓李氏、世家新安婺源、儒家也。曾大父蒙、大父居注、皆隱居不仕。父鏞、始游太學知名。建炎初、以累舉補官、爲南康軍之建昌尉、饒州司法參軍、太平州軍事推官、以沒。先生、推官公之長子也。少穎悟、讀書日千言、詩、易、禮、皆略成誦、而尤精春秋。左氏傳、屬文敏甚。自朝廷設元祐學術之禁、士非王氏書不讀。宣和禁稍弛、而遠方人士狃於所習、未盡變也。婺源又居重山複嶺間、見聞尤狹陋。逮兵興、四方雲擾、賢士大夫多避地其間、於是有羅公兄弟曰和、問曰：「廣問者、和靖尹先生高第、傳伊洛致知篤敬之學。又有俞公靖者、亦里儒先也、多識前言往行、其學出入坡洛之間。先生與里人滕公愷悉從此三君

子遊。滕公長先生六歲、負才氣、不屑友不如己者、獨器重先生、目爲小友。嘗得閩中所刻東坡先生文章號大全集者、相與讀之、歎其編次無法、眞贋相雜、奮然取朱黃盡塗去、不類者。滕公見之、驚曰：「子後生、敢爾耶？」他日得蘇氏家傳本校之、果皆非也、益奇之、乃出書一編示之、曰：「好學而不知道、猶不學也。此書吾得之羅公、皆河洛遺言、公戒勿輕示人。吾今日爲子發內府之秘矣。」先生受之以歸、口誦心惟、默若有省、間有所疑、又從諸公質之、於是學問日進。復侍推官公官南康、遊廬阜、識隱君子祁公寬、亦和靖學徒也。聽其言多相契者、然猶疑其未也。出入釋老、求之者又數年、知其說不出乎吾宗、乃益自信。遂厭科舉之習、築室山間、爲隱居計、名其山曰鍾山、榜其室曰中林。常曰：「免夫微賤、棲居中林、人所不見之地也。以微賤之人、處人所不見之地、而能持之以謹肅之德、則可以爲公侯之腹心、然則人可怠於自修耶？自是

優游涵養、學益成、行益尊、鄉人宗慕之。然先生讀書不務多爲訓說、獨嘗著論語、西銘解義、山窗業書數篇而已。有來學者、隨其資誘之、循循不倦。其言曰、敬者、心之閑轡也。心有不敬焉、則馳矣。敬而不已、則明。明則誠。故學者致心之道、守敬爲要。又曰、禮義廉恥、是謂四維。勇於棄廉恥、則勇於廢禮義。一維苟絕、四維皆滅。理之相牽聯者也。四維張、其心康、其身昌。四維不張、其心荒、其身滅亡。故學者持身之道、知恥爲要。又曰、學者於道、能致知以玩索之、篤敬以涵養之、久則見面盎背、氣象自別、非聲音笑貌所能爲也。又曰、道有遠近、學無止法。近者道也、遠者亦道也。學者見其近、而不見其遠、遽止於見、則陋矣。惟於見處更加功夫、進進不已、自然所造深遠、而其成也宏矣。其發明後學、大指類此。雅好文詞、既老不衰、嘗曰、文者所以載道、言之不文、行之不遠。而世儒或以文爲不足學、非也。顧其言於道何如耳。每爲學者誦眉山之

言曰、物固有是理、患不能知之、知之患不能達之於口於手。辭者、達是理而已矣。以爲此最論文之妙。故其爲文、指事析理、引物託喻、要以達意所欲言者、而詞采自然如風行水上、如浮雲遊太空中、姿態橫生、可喜可愕。晦庵先生嘗評之、以爲筆力奔放而法度謹嚴、學者所難及也。至他所爲詩騷、閱肆俊偉、略皆稱是。工書、得顏、蘇筆法、人有得其簡牘者、多珍藏之。其爲人、長不踰中人、而貌古骨強、神觀粹清、言皆粲然成文、聽者忘倦。事推官公及繼母向夫人以孝聞。友誨諸弟、綺、緘甚篤。及其後、綺舉進士高第、嘗教授福建二郡、士人多推稱之。然皆先卒。諸子孤露、先生扶植教養如己子。男婚女嫁、皆有成立。蓋自推官公之沒、先生主家事者二十年、閨門肅睦、生計日贍、內外未嘗有間言也。其接賓客、奉祭祀、節之以禮、儉不及陋。租賦之入、常爲鄉里先。雖在林下、而事邑大夫不廢桑梓恭敬之節。親戚故舊或以緩急告、往往爲



之排難解紛、而不受其報。或譏其既無求於世、何苦爲是拘拘者。先生曰、是烏知吾心。夫以傲爲高、以放爲達、以自私爲有守、吾不爲也。且禮與仁不可須臾去、矧士可以去之乎。郡守徐侯誼聞其風、高仰之、馳使奉書幣迎至郡庠、使諸生矜式焉。先生勉強爲其一行、然亦竟不爲留也。嗚呼、若先生者、學博而守約、志篤而愛周、一介不以與人、而不以爲嗇。一介不以取諸人、而不以爲矯。其古之人歟、古之人歟。紹熙四年、先生之年七十有七矣。八月二十有六日、以疾終於家。屬纊之夕、其言琅然不亂。於是人益知其所養果有大過人者也。娶同郡朱氏、再娶董氏、王氏。子男三人、汝極、季札、叔栴、皆學種績、文有家法。女二人、嫁迪功郎江州德安縣尉王泰發、進士王某。孫男三人。諸孤將以某年某月某日葬先生某鄉某原、以書來告。初、先生之少也、嘗從洵先君子學、後洵復受業先生之門。先君子之喪、先生實狀其行、以授晦庵朱公

爲之銘。今先生之喪、諸孤以爲近而知先生者莫若洵、遠而知先生者莫若朱公、故復俾洵狀其行事、將以請於朱公。洵自惟疇昔從先生遊、時年未二十。今行年六十二、而朱公亦已老矣。嗟日月之逾邁、悼前輩之彫零、其可以文詞不工爲辭乎。乃雪涕爲之書。紹熙五年三月十三日、門人修職郎、吉州錄事參軍程洵狀。

程洵撰 《尊德性齋小集》卷三

徐德操墓誌銘

公姓徐氏、諱定、字德操、泉州晉江人。曾祖允、祖逢。父澤、贈朝議大夫。朝議少孤、母劉夫人挈之從呂氏、因以所從爲姓。五十年、公不知其徐氏子也。朝議且死、以告曰、即有立、毋忘吾宗。公憤泣終喪、與二弟來行在、約不取科名勿止。及公仕爲宣教郎、而二弟皆擢進士第矣。始以其本末自言、復姓徐氏。公解褐、授秀州崇德縣尉。母喪不行。歷處州吉州教授、知邵武軍



邵武縣幹辦福建路轉運司公事通判太平州知潮州。還奏事謁病。主管武夷山沖祐觀。紹熙二年九月丙戌卒。年七十四。官朝散大夫。在邵武危與守爭辨。數軋其不義。幾得罪。在太平之歲。實淳熙八年。火星犯南斗。公以曆占之曰。此歲飢而民流。當自南而趨北也。郡扼江淮之衝。可不備乎。始未信。流民果大至。當塗采石之間。疊餓駢疫。暴露洶洶。守不知所爲。盡以委公。公設次卧起。造屋數百。行食散藥。須舟不時。濟者皆歸焉。畢渡不失一人。宣州妖民胡木匠。居麻姑山。誘聚數千人。守適罷去。兩通判爭攝事不協。事莫理。盜乘間將犯城。縛巡檢一人。貫其耳以徇。人情恐懼。轉運使命公攝宣州。公單車馳入境。令曰。汝等粥糜苦不飽。謾相從爾。非爲亂也。能自首者無罪。與之粟。衆咸從令。胡木匠以半夜望西北有青雲起。喑謂其徒曰。吉人之祥哉。城不可冀也。已而卒敗。胡木匠亦幻以逃。不獲。潮之土豪吳亮者。當沈師寇汀

州。官軍合閩廣之人不能捕。亮實誘以出。有司抑其賞不奏。公爲之歎息。看待過意。月與餼錢甚多。會汀贛山寇復動。稍稍及潮。公議討之。賊聞之曰。是官能用吳亮者。奈何。因相與散去。公安重儉節。不以詞色娛人。不以意氣憑物。學博而要。文約而費。居閒教授。學者至數百。依經訓而言。無心通臆暢之說。仕宦平進。不求出常調。據法義以治。無刑名貨利之功。有所慘怛。若己好樂。不可銷釋。有所執論。發於堅毅。不可挽奪也。公既有以自守。不媚於世。世亦無能用公者。雖然。世之操縱方圓。雕琢技能。梳櫛繳繞。以赴繩墨。磨錯椎鈍。以就鋒銳。死往生來。不能絕也。使其有益於道之治亂。而貶性勞力以爲之。猶曰可耳。均之無益。而彼富貴之幾何。終磨滅以盡。則與其毀闕而進。不如成全而退。動而得於人之多。不如靜而失於己之少也。公其知之矣。宜人鮑氏永嘉人也。故公宅永嘉。四子。瑒。迪。功。郎。汀州司戶。咳。早卒。璣。當受公致仕

恩瑄、賀今皇帝即位補將仕郎。進士陳度、迪功郎徽州黟縣尉張炳、進士萬與權、三女子之壻也。紹熙四年正月壬申、葬公孝義鄉何奧村。諸子使瑄來請銘。余聞公在家時、惟以朔望日謁郡守、他官府曠歲不到、殊不識其處、參坐語未嘗及公事也。今瑒等所論叙信篤、固終始不懈其德矣。可無銘。銘曰、不耗其內、以盈其外、不虧其性、以益其命。尙不厚其生、豈其死而榮。烏乎徐公此其稱。

葉適撰 《水心文集》卷一四

宋故冲素處士鄭府君墓誌銘 有序

冲素處士鄭府君既歿五十有六年、其長孫運始以朝請大夫、右文殿修撰、知婺州趙與勲所爲狀走京師、來乞余銘。余閱狀爲之歎曰、世尙有純孝如處士者乎。使處士生三代時、予不必爾也。三代遠矣、彝倫日以耗斁、民俗日以偷墮、有如處士之孝者、豈多見哉。處士之生既無有表之以厲斯民、歿而弗圖、則處

士之善將遂淹沒。予乃序次而銘之、使運歸納諸墓。處士之先實出周之諸姬、桓公友始受封于鄭、後爲韓所并、子孫散處陳宋間、以國爲氏。至漢大司農當時、居滎陽。遠祖諱凝道、自滎陽來官于歙、因家焉。凝道之子自牖、又徙睦之遂安。自牖生子一十九人、皆以儒自奮。其第十三子安仁、尤邃於經、生子三人。安仁游學時、同浦陽朱君恮、師黃山薛公大觀。大觀善於說春秋、能紹述平陽孫公復遺旨、登其門者亡慮千餘人、唯恮實得其要領。恮既家居講授、安仁俾三子從之游。其幼淮字巨淵、時年甫十二、穎敏絕倫。學三年、洞究章旨。恮禮寵之、約以外家女宣氏爲配。宣居白麟溪上、淮後爲贅壻其家。當別來時、二兄送之十里、所不忍去。又復十里、因執手歔歔出涕、莫能仰視。竟夕不成行。復相謀共來徙、又爲娶之浦陽人。淮好施與、靖康歲儉、粥田一千畝有畸、以起飢乏之民。民懷之、號淮所宅爲仁義里。淮生子三人、煦、熙、照。照處



士父也。處士諱綺，字宗文，傳家學以春秋爲宗，其所篤好，獨在穀梁氏，撰穀梁合經論三萬言。照得罪，勢家賂重辟，文致之，囚繫獄廷，照不伏，拷掠無完膚。處士方自遂安還，號泣奔視，獄門閉不得通。處士以額叩門，血流被面。獄吏義之，使見照，見已即抱照仆地，幾至隕絕。復草疏歷陳父子大義，上愬州刺史錢公端禮，乞代父受刑，照冤竟得白。處士之母張夫人病風，攣手足不能屈伸。處士日候牀下，抱持以就便溲者三十年，初終如一日。張嗜溪水飲，天旱水脈皆絕，處士鑿溪數仞而不得泉，乃慟哭其下，三日夜不息，水爲湧出。俄頃溢丈餘，味甘如醴。微作白荷華香，浹旬始變。張病死，臨葬之夕，天大雪，平地深尺，處士泣禱上下神祇，辭極淒苦，傍聽者皆下淚。厥明，勢猶未止，迨喪車至冢，冢雪皆融，廉隅整方，類以物割截之者。冢外則封積如故，踰七日始消，人以爲皆孝感所致。處士妻丁氏，饋食稍緩，張恚，丁頗有後言，處士雖

甚宜丁，即出之，不俟終日。重娶阮氏，既有子閑，與其奴不相能，處士復出之。人或疑其已甚，處士改容曰：「因一婦而構一家不和，綺義不爲也。」遂安。族子有操瓢丐于道者，處士挽其還，呼妻賣簪珥，製衣衣之。且中割所畊田，使自給，亦得造家。里中子孫相傳至今。處士自淮毀家振荒之後，貧無以自存，或至過哺不饜。縣大姓黃宗夔，俠士也，袖白金二斤往遺焉。處士拒曰：「綺寧餓死，肯受子無名之賜乎？」黃不覺歎伏，至於下拜。傅夫人卒，處士畜一女奴，方九歲，與之處十一年，始嫁。女奴猶處子也。處士面深黑如鐵，目光焰焰射人，視烈日不眩，朝出耕隴上，掛書于牛角，中稍釋耒，輒取誦不輟。夜則澄坐，或至達旦，素不甘笑語。傅夫人謂其孫運曰：「自吾歸而翁見其破顏而喜，祇三度爾。」處士恆康強無疾。一日晨起沐浴，服深衣大帶，往拜先祠下，針下指出血，滴酒中，召子姓列飲之。仰天誓曰：「吾子孫有不孝不弟，不共財聚食者，天實

殛罰之言畢、叉手正容立、久而不動。就視之、則已逝矣。處士生於重和元年戊戌夏五月九日庚寅、歿於紹熙四年癸丑冬十二月二十又二日乙卯、以五年甲寅冬閏十月二日庚申葬于懸柏原、原在家正西一百步。享年七十有六。配傅氏、能執婦道。子二人、閑、聞。閑出爲兄縉之後。女一人、適鄉士金子鏞。孫男三人、運、達、逸。曾孫男一人、政。曾孫女一人、歸諸暨縣金彬。處士不樂仕進、有司薦其行誼于朝、乾道中賜號曰冲素處士。嗚呼、處士之純孝、有如是哉。徵之於家而信、參之於州里而喻、質之於天下而無愧。揆之於古、特立獨行之士、有過無弗及焉。嗚呼、處士之純孝、有如是哉。人莫不有貴也、雖位極將相、而孝道有未盡焉。君子弗與也。人莫不有富也、縱可以齊封君而孝道有未至焉。君子弗之願也。唯處士之行若是、可列於信史、可詔於方今、可爲法於後世、鄙貴富不道也。使世無良史官、則已、設有之、其能使處士無傳乎。

予猶懼知處士者尙寡也、因采掇行事爲之銘。在人誦予銘者、亦當蹶然而興起、況於處士之子孫、敢有不勗者乎。敢有辱其先者乎。銘曰、

有烈丈夫、其目如星、孝行上可通神明。柏原雪化溪泉馨、濯濯厥聲如雷霆。如雷霆、何昭晰、白石可泐名可滅。

新除朝請郎、守郎中、兼權右司郎官晏穆撰。資政殿大學士、正奉大夫、知紹興府、浙東安撫使游似書并篆碑首。

晏穆撰 《麟溪集》寅卷上、清初刻本

雲巢子墓誌銘

雲巢子者、故左奉議郎鄞縣府君之道號也。雲巢子築室資之丹神山、將隱焉、不得已而仕。仕不進、行東南、以辛卯九月己丑卒於湖州之舟中。自繪像授學徒、牟灼權後事、以旅柩西泝。適其子浩奏名東去、與喪值、謹具卒日、以訃至蜀。卒之明年春也。雲巢上有



母兄柩未至、以衣復屋上、設位如平生、妻子踐蓐袒括食粥如始死、奉其像成服、以訃告州。太守宇文侯紹奕爲同年、率州縣官朋舊者會哭、親戚黨友會哭、學徒匍匐百十會哭、哀動里巷。以雲巢爲君子、故愛之深、哭之哀而莫知止、則其母兄妻子至愛至痛、又不知其如何可忘也耶。雲巢幼依其兄方舟子修古學、學古文、行古道。學則曰孔習周、顏孟習孔、以習爲學也。文則典之嚴、雅之正、語如先秦、不陋不華、左氏戰國策以下不問也。道則曰中庸心傳、皇極大法、帝王作者、無過不及、賢不肖所共由也。二氏比吾道非不學、特空耳。喜談經、性理淹貫。視俗學浮剽、曰此牧豎兒糞土語、行丐可耳。其用心與方舟子多同。兄弟窘步進取、然雲巢尤不屑、故舍人趙公達謂曰、吾薦方舟、會當掖君俱升。大監楊公樸上殿薦其學問、被旨記姓名。嘗以說干時相、曰吳困於淫侈、淮困於盜賊、蜀困於窮賈。時相聽其說、取其盜賊論、增兵戍守、

皆其倡也。史公浩招至第、夜與隔壁呼曰、棄淮所得地、人謂斯何。答曰、江淮版圖、力戰得之、尋棄之、尙何言。以書干蔣丞相、奇其人、歎其議論可用。丞相虞公允文殊有意、曰以近制改秩當作邑、姑還蜀、超擢至矣。登紹興二十七年進士第、初筮左迪功郎、廣都簿、再任永川尉、關升左從政郎、成都府路提刑司幹辦、攝渠州學官、皆有能名。府委治路幣、會有以殺相誣者、即縱去不問、不肯以永川捕獲理賞、曰、實人於死、自利耶。其爲憲屬多平反、以舉主制置王公剛中、晁公武、叅政王公之望、提刑晁公公遡、張公行成、改左宣教郎、轉左奉議郎、知郫縣、服緋魚袋、以疾卒、年五十四。娶何氏、先卒。再娶趙氏。五子、浩、辛卯年正奏名。圻、鄉貢進士。彝、稟、出繼弟唐後。毅、稟、皆篤學。一女、未笄。孫男三人、永孫、提孫、觀孫。雲巢子姓李氏、諱占、字知來、唐隱太子小字芝蘭之後、大墓在簡平泉、號軍井李家、爲望族。曾祖仲舒、祖祐、父嗣宗、贈右朝

奉大夫。先妣蹇、贈安人、蚤世。今繼母太宜人杜在堂、尤所鍾愛。安人之死、三子一女、方舟子未娶、仲弟十六歲、已娶、雲巢九歲、勾龍妹甫十歲、病疳、翳、方舟子負妹挈弟、以土瓦自炬、火炊陳粟、雜鬪肝菊葉餉之、獲愈。每晨夕臨、手按弟首、髦髻毵垂肩、穿縷執桐、瞪目視母像、見者垂涕。先大夫手抄論語、孝經、命其兄爲師教之。甫冠、何先生三捷授徒鄉舍、壻之、往依焉。尋即返丹神山、以一僕一狗自隨、親荷鋤種蒔。時寄僧舍夜誦、寺僧至、誤聲曉鐘警之、乃睡。或時綴思行田舍、至墮坑墜岸不省。不喜食肉、曰、此脂障也、壞道氣、益昏睡耳。然極貧、婚嫁孤寡子女、存立門戶、典書質琴、未嘗以貧爲靳。兄弟姊妹八人、時節侍飲、二老側、義風煒然相後先。今亡矣、吾家豈復有此弟哉。方舟子被丁丑召命、雲巢落第西歸、值於峽、曰、兄少貶詞色、向俗即已。再被己丑召命、罪斥西歸、雲巢方東下、值於荆渚、拜母兄外、掩泣若欲訴、輒止曰、兄順

受而已。方舟子每念此、哭慟欲絕。臨死寄詩清婉、以雲巢之桃李爲祝。訃至之一日、而吾漢孫死。又五日、而雲巢觀孫死、皆奇童。葬以乾道九年十二月庚午、墓在丹神之左一里。文集五十卷、藏於家。方舟子即石也、攷淚銘。銘曰、

著書滿車、雲山以爲家。風杉雨花、寬褐以爲華。嗚呼、巢豈眞亡爾耶。挽玉斗、凌紫霞、侍吾先君子杖屨、距丹神故棲不數步、一丘之窆、于于乎、居居乎、巢乎其樂無涯。

李石撰 《方舟集》卷一七

篤行趙君彥遠墓碣銘

淳熙四年冬十有二月戊寅、崇道趙公善應卒于餘干私第之正寢。明年、葬縣東北華林岡。後六年、今少傅福國陳公乃大書其碣之首曰、皇宋篤行趙君彥遠之墓。於是趙公嗣子汝愚方以敷文閣待制知福州、充福建路安撫使、涕泣手疏、使人奉其書及故荆



州牧張侯栻鄂州守羅君願所序行實若狀兩通致之新安朱熹曰請得銘而刻于^③下方熹竊惟念平日所聞太宗皇帝之元子漢恭憲王實以至德高行為宋太伯後世雖屬籍疏遠爵秩淺微然猶多法象其賢者蓋歷七世而得公則又以孝友仁厚被服儒雅克篤于家而聞于邦卓然爲宗室儀表雖士大夫之賢而有禮者皆自以爲不及益教其子移孝爲忠對策庭中無所諱避天子異之擢以爲天下第一後歷館閣侍從奉使典州皆以風節惠愛有聞於時然天下不以賢其子而曰子直之能爲此嗟乃其父之教也嗚呼其真可謂篤行君子者矣陳公之目之也豈虛也哉是法宜銘顧陳公書法之嚴已足傳世而熹愚賤又所不當得爲既禮辭不獲命則敬考其書而悉次第之蓋公之曾大父曰開府儀同三司建寧軍節度使建國公仲企者恭憲王之曾孫也實生東頭供奉官士慮供奉生成忠郎不求成忠娶濟陽晁

氏生公公生於政和戊戌卒時年六十自建炎初補承信郎八遷至脩武郎歷監秀州崇德饒州餘干安仁縣景德鎮之酒稅潭州南嶽廟江南西路兵馬都監主管台州崇道觀卒後五年汝愚逢宗祀恩始更贈爲通直郎公資純篤孝謹少時父病訪醫行禱暑不解帶遭喪不內勺飲既殯居廬歔粥既葬乃食菜果終喪比御猶弗入也事母益兢兢致養嘗以寒夜遠歸從者將扣門公遽止之曰無恐吾母爲也露坐達旦門啓而入以母畏雷夜或聞雷必披衣走其所視門隙有光則扣而入否則屏立以待官薄食貧諸弟未製衣不敢製已製矣未服不敢服雖一瓜果必相待共嘗之諸妹遠嫁者極力致之相與娛侍親側內外諸孫合貴賤且百口菜羹蔬食恩意均洽人無間言從姊妹之遠而貧者亦以令分俸給之遭母喪時年五十有五矣始侍疾時嘗刺血和藥以進至是哭泣嘔血毀瘠柴立終日俯首柩旁聞雷猶起側立

垂涕。凡食之可於口者、不必酒肉。衣之適於體者、不必華采。聲之悅於耳者、不必音樂。皆弗忍以身接。雖其哭泣有時、而哀痛之心無時忘也。三年之外、生朝必哭于廟。有欲爲禮者、號泣向之。其後累年、言每及親、猶未嘗不揮涕。晉陵尤表延之見而歎曰：「古君子也。父以肺疾終、終身不忍以諸肺爲羞。母生歲直卯、謂免卯神、亦終身不食也。墓戶有不能事其母者、觀公之爲、惕然悔悟、遂以孝稱。識度超曠、不計有無。平居自奉甚約、而汲汲然惟以愛人及物爲事。故人許珪死、家貧、女無所歸。公即聘以爲次子婦。嘗與台人蔣彝者同僚、後至其鄉、首問之、則死久矣。貧不克葬、而子亦謀食于外、即往哭之、還其子、予貲使葬。它若是者、不勝紀。道見病者、必收養、躬爲煮藥。比瘡、或解衣遺之。歲饑、設器於庭、每食先舍其半。家人繼之、則取以濟饑者。其用心之微密、至於夏不去草、冬不破壤、懼百蟲之游且蟄者、失其所也。爲人謙和坦易、與

人語惟恐失詞色。至誼有不可、則奮然無所顧。雖以公族疏遠、留落江湖、而憂國之深、如在廊廟。聞當世進一善人、行一善政、則喜不自勝。聞遠近或水旱、則憂見顏色。辛巳江淮之警、爲流涕不食者數日。同僚有會飲者、公獨悵然北望曰：「此豈諸君樂飲時耶。衆爲失色罷去。好讀書、所藏至三萬卷。所著有唐書錄遺三十卷、幸庵見聞錄三卷、台州勸諭婚葬文一卷。居家不設條約、於子弟無所程督、而躬行之實所漸漬而興起者甚衆。居常稱曰：「欲學聖賢、當消客氣、灑掃應對、是其入處也。汝愚從屬籍、冠多士、國朝故事所未有。人爲公喜、而公處之如平時。及聞其入館、適與莆田林光朝謙之同舍、然後喜可知也。於其守上饒而來迎也、故不往。一日、呼二田夫肩輿潛入其境、訪問民情、閱信宿、意無所忤、因稍進至近郊、人始知之。其爲人大略如此。顧宗室之在右列者、例不得爲要官、故其事業無以見於世。至其潛德隱行、與其志



儒藏

念之精微、則人又有不得而言者。嗚呼、其真可謂篤行君子矣。陳公之目之也、豈虛也哉。其配令人李氏、丞相文正公七世孫、家號西李、司馬公所謂能守先法久而不衰者也。方承平時、宮宅婚姻皆勳侯貴戚、公父子獨再世娶儒家。令人明達剛果、居家以孝聞。既嫁、事姑如母、嘗割股以愈其疾。公罷崇德歸時、晁夫人尙無恙、篋有餘金、將出以獻而探之不獲、蓋令人已奉而致之姑矣。服飾之具、擇其新美以奉公諸妹而躬取其故敝者。公既勤其家、不吝一錢、而令人安貧自力、所以成公之志爲多。先公十二年卒、葬縣西雕峰、距公墓三十里所。子男四人、汝愚既爲時名卿。次汝拙、承信郎。汝魯、保義郎。汝悉、未仕。亦皆斤斤謹質、能守其家法。女三人、長適宣教郎逢維石、次適將仕郎路希傳、季未行也。孫男十二人、女七人。而其長曰崇憲、亦舉進士、中其科云。熹聞公之名蓋久而不及識、居常以爲恨。今乃獲叙德美以贊誅事、而

附於陳公所書之石、則既幸甚。然每讀行實之書、而於呂伯恭氏之言又未嘗不廢卷太息也。因頗采其意、銘以系焉。銘曰、

漢邸之別、去本而支。心融迹泯、世莫予知。建土分封、再世弗振。逮公而顯、匪爵其仁。孝不老衰、惠不約弛。忠不遠忘、以畀厥子。篤行之表、華林之臯。惟其不愧、日遠彌高。嗟爾後人、益謹毋怠。出者難工、德友所戒。

朱熹撰 《晦庵先生朱文公文集》卷九二

校記

①「兔夫」二句，《新安文獻志》作：「兔苴武夫，微賤之人，而中林，人所不見之地也。」

②罪：原作「非」，據四庫本《水心集》改。

③于：宋浙江刊本《晦庵先生文集》作「諸」。

④吝：右引作「名」。

宋儒碑傳集卷一百二十一

袁文 黃仁靜 王正功 吳松年 洪遵

先公行狀

先兄諱文、字質甫、姓袁氏、明之鄞人也。曾祖左朝奉大夫、知處州、贈光祿大夫諱轂、曾祖妣永嘉郡夫人葉氏。祖左朝議大夫、尚書倉部郎中諱灼、祖妣恭人石氏。考承事郎諱垌、妣夫人林氏。先君從大父守隨、無子、禱於大洪之神、夜夢神告曰、與而二子。是生先兄及章。先兄資稟尤厚、少小聰警、讀書數過成誦、詩語驚人。先君深器異之、爲擇賢師、敬待以禮、日偵視顏色、幾微不悅、痛自刻責、豈其拂之、何乃若是。苟悅矣、而後釋然。里士大夫咸謂袁公教子、可以爲法、而先兄亦曰、吾父教我如是不自植立、何以爲子。蚤夜孜孜、苦心刻意、求所以承親志者、手抄口誦、不知饑渴寒暑。於是里士大夫曰、袁氏有子、其門不墜矣。成童、以能賦稱。既冠、覃思經學、尤深於書、考質非一師、

久久通貫、得古聖賢意。勇於爲善、而恬於進取。甫踰壯歲、厭舉子業、而讀書益勤不懈、一書精熟、始更他書。几間未嘗有二書。此前輩讀書法也。爲人亮直、中無留藏、入與家人言、出與鄰里鄉黨言、是是非非、率由中出、凡世間面譽背毀、機巧鈎距之態、秋毫不存。遇無貴賤、能否、長幼、必以誠敬、恂恂卑謙、若無尺寸可稱者。醇醲之氣、藹然見於面目。即其貌、聽其言、知其爲故家遺俗也。中年益務沈晦、徜徉里閭、無歆羨富貴之心。有園數畝、稍植花竹、日涉成趣。性不喜奢靡、居處服用率簡樸、然頗喜古圖畫器玩、環列左右。前輩諸公遺墨、尤所珍愛、時時展對、想見其人。雅尙清致、俗塵不到胸次、猶以是爲累。晚歲泊然、平生所好、視之若無、圃亦弗不治、獨好書之意彌篤。自言、吾雖老、壯心猶在。觀書作字、一如少時。平旦即起、日抄書數千字、端勁有力。自經史子集下至稗官小說、奧編隱帙、多所記覽。好觀歷朝故事、既錄其大者、又掇



拾其小者、爲名賢碎事餘三十卷、字百餘萬、皆手所自抄也、無情筆。雜著一編、目曰甕牖閒評、凡制度之沿革、事物之原本、傳記之訛舛、風俗之變遷、先世之模範、與古今之善可法、惡可戒者、咸在。每以爲高明之士、糠粃小學、非所以通類格物、故其讀書、雖以大體爲本、而節目纖悉、亦必精研。於方言、聲韻、字書之學尤精、取古三百五篇、參之方言、概以韻語、往往多合。由是以觀、昔人銘詩酌辭之屬、音韻若不諧者、悉皆有本、非苟作也。字書流傳久益失真、雖六經不免博考參訂、務歸於是、偏旁點畫、毫釐不遺。榜所居小齋曰卧雪、自號逸叟。人皆戚戚、我獨恬愉。至其憂深思遠、時亦愀然不樂。其行己兢惕、其處心慈祥、其於鰥寡孤獨、貧不自勝者、哀矜惻怛、如己疾痛。宗族有窘於財者、力雖不及、獨屬念不忘。諸孫滿前、撫愛均一、無有厚薄。童僕有過、不加譴責、勞則佚之、病則藥之、撫之如一體。仁不嗜殺、所全活飛潛之類、不可勝

數。惟不肯治產業、爲後日計、或諷以稍立基址者、油然笑曰、人自不達耳。德則不勝、多藏何爲。吾以清德傳家、其爲基址、不旣多乎。訓誨諸子、小有不善、必怒之曰、汝曹不自努力、其若門戶何。諸子所友賢士、必加敬禮、每曰、吾不特敬其人、而其人之父兄、吾亦加敬焉。謂學問之要、惟精惟專、恐分其志、未嘗累以俗務。至於世間榮辱得喪、謂有命焉、不爲欣戚、以故諸子遂其初志、學者不求速成、而仕者安於義命、蓋家庭義方之教使然。紹熙之元、先兄春秋七十有二矣、鬚髮黢黑、神明不衰、親友咸以福壽未艾爲慶、而先兄獨自疑、我筋力不逮往時、何以能久。及秋、果屬疾、自謂必不起。若前知者、區區家務、稱物平施、語言不亂、氣度自若、視聽益精明。屬其子燮曰、吾甕牖一書、盍寶藏之。鼻息漫微、有所咳唾、猶不以污衽席、愴然而往、無怛化意。八月八日也。無親疏近遠、皆痛惜之。娶戴氏。子男五人、長曰覺、鄉貢進士、篤學守正、後學

多從之游。與先兄偕抱病、病且革、聞先兄歿、不勝悲痛、質明而殂。次曰燮、登進士第、儒林郎、新沿海制置司幹辦公事。次曰藻、次幼亡、次曰樵、兩貢於鄉。女二人、長適宣教郎、紹興府諸暨縣丞戴樟、次未行。孫男七人、女八人。諸孤將以三年正月丙午、葬先兄於縣

之陽堂鄉穆公山之原。惟四明袁氏、自我曾祖以儒學辭藻起家、名振一時、歷事四朝、直道寡合、卒老一州。先大父復以名節自勵、嘗守東陽、以法誅蔡氏黨親曹宗、觸京怒、得罪、時論譴之、而誌墓者有所諱忌、軼其事。先君孝友溫恭、與物無競、里中稱爲長者。至於先兄、又以彊學好善、有聞於鄉、君子謂家聲不殞焉。初、東坡蘇公守杭州、我曾大父實佐之、志同道合、倡酬篇什甚衆、流風遺韻、被於後昆。先兄尙友前修、歌詩字畫、必自蘇氏、編錄本末尤詳、此其風味淵源所自來者耶。諸孤以先兄言行、惟手足之愛、知之爲詳、涕泣有請。章與先兄少而共學、同歷艱難、友愛甚

篤。後章游太學、塵下第、隨牒州縣、惟先兄之訓不敢忘。今其永訣、痛徹肺肝、尙忍言之哉。雖然、本末之不一錄、則無以乞銘於當世君子、是沒其美也、而可乎。因勉強綴緝、以授諸孤、用求銘焉、當必有能發揮潛德者。謹狀。

袁燮代叔父作 《繫齋集》卷一六

先公墓表

公諱文、字質甫、四明鄞人也。曾祖左朝奉大夫、知處州、贈光祿大夫、諱穀、妣永嘉郡夫人葉氏。祖左朝議大夫、尙書倉部郎中、諱灼、妣恭人石氏。考贈朝奉郎諱垌、妣安人林氏。公篤厚而聰警、方童丱時、不煩督促、自喜讀書。倉部公雅有知人之鑒、謂公與弟章異於他孫、長必能以儒學奮發、爰取夫敏而好學、出言有章者、而命名焉。朝奉公爲子擇師、金先生彥博授徒里中、時論歸之、命公從學、而遇其師甚厚、殆罕其比。鄉人談及此事、皆云當以袁氏爲法。親歿之後、追



儒藏

承先志、復受教於李公大辯、莫公冠卿、吳公化鵬三先生、充其所未及、以能賦稱。且覃思經籍、學業日富、取一第易爾。顧場屋小技、難以立身揚名、不復汲汲、而務學益勤、一書精通、始閱他書。歷代史、諸子、若集及叢編小說、咸采取焉。前輩諸公一言一行、萃而爲書、目之曰名賢碎事、手抄三十巨帙、無一字不楷。雜著一編、名曰甕牖閒評、搜抉隱微、辨正訛謬、雜然具載、尤詳且確。今高明之士、批糠小學、非博通之道、公則不然、節目纖悉、亦必精詳。取古三百五篇、參之方言、而槩以韻語、有若不同韻而實相協者、則會歸於一。其於字書、偏旁點畫、毫髮無差。榜所居小齋曰卧雪、自號爲逸叟。有園數畝、日涉成趣。性不喜華侈、屋苟可以居、食苟可以飽、衣裘苟可以禦寒、如是足矣。古器圖畫、則深好之、每獲一物、欣然有喜。尤寶先賢遺墨、時時展對、想見其風度、自言、吾雖老、壯心猶在。年踰七十、盥櫛纔罷、抄錄不輟。爲人直諒、中無留藏、

言語率由中出、面諛背毀、巧譎鉤距之態、秋毫不存。遇人無貴賤、長幼能否、一以誠敬、醇醲之氣、藹然面日。乳母范氏、漢東人也。金人之難、公年始十一、生之全之、繫保護是賴。闔門四千畝田、契囊以自隨、無所遺失。遂老袁氏。躬率子婦奉惟謹。年八十六而終。號慕如童穉、以禮葬之。歲時祭焉。至於今不廢。僕病藥之不避癘疫、迄獲痊愈。仁不嗜殺、在窘乏中、海螯珍羞、不以自奉、常縱之江。及他物命、多所全活。此豈區區爲口腹計者比哉。勉力諸子、專精簡冊、未嘗雜以塵務。不治產業、或諷以稍立基址、油然笑曰、子孫賢乎、自能植立、何必遺之資財。且吾以清白傳家、其爲基址、不旣多乎。諸子所友賢士、肅加敬焉、抑又敬其父母、此亦所以訓厥子也。至於伸屈得喪、謂有命焉、弗爲欣感。家教如是、豈不大異於流俗乎。居約旣久、有所假貸、計其本息而盡償之。崇陵御極之初、詔盡蠲所負、窮乏者相慶、公獨愀然曰、豈可以需澤而負



吾心哉。償之如故。鄉閭間敬誦其賢曰。此吾邦之嘉瑞也。紹熙元年八月八日。以疾卒。享年七十有二。娶戴氏。免解進士諱冕之女。聰明靜專。自幼嗜學。多識前言往行。作字得顏體。相夫子儉約勤恪。而勉以正道。三年正月朔旦。卒。享年如公之數。合葬於縣之陽堂鄉穆嶺之原。長子覺。鄉貢進士。次燮。煥章閣學士。太中大夫。提舉南京鴻慶宮。次藻。次未名而夭。次樵。以累舉特蒙補官。終於宣教郎。饒州樂平縣丞。長女適宣教郎紹興府諸暨縣丞戴樟。次適進士吳适。孫喬。宣義郎。知紹興府新昌縣。肅。丞議郎。監登聞鼓院。甫。朝奉郎。權知徽州。商。承奉郎。新監臨安府新城縣稅。貢。丙。向。孫女適進士陳定。從事郎。監鎮江府寄椿庫林鵠。進士樓槃。國學進士鄭景淵。忠訓郎。監慶元府小溪鎮曹慤。進士舒鑠。紹興府鄉貢進士李師說。江西轉運司進士邊應時。曾孫衡。國學生。復從徽衛。女三人。燮之陞朝也。贈公承事郎。妣孺人。後累更郊。

需及該異恩。贈公通議大夫。妣淑人。初光祿公秋試開封。實爲首選。而東坡蘇公第二。後通守錢塘。蘇公作牧。相得懽甚。介亭和篇有曰。秋風起鴻鵠。我亦繼華躅。識前事也。而注家以爲同試館職。實無是事。蓋益之爾。公既修乃祖之業。而又忻慕蘇公之爲人。諷誦其言語。依放其字畫。曰。此吾平生所深愛。至老而不衰者。襟韻灑落。有前輩風。於是可占矣。某叨塵一第。實公教誨之力。肅甫復踐世科。而甫對策第一。沿流求源。豈敢忘哉。而德銘未立。可爲痛恨。姑表其墓。以詔來者。此亦歐陽公瀧岡阡表明著先世賢德之遺意。辭雖不達。要非溢美。亦所以取信云。

袁燮撰 《繫齋集》卷一七

朝奉大夫致仕黃公墓誌銘

越新昌黃公。諱仁靜。字仲山。其先婺徙也。曾祖朴。祖巽。父惠之。公累封朝奉大夫。賜服金紫。年八十七。開禧元年八月乙丑卒。十二月庚申。葬孟塘石冢山北。

麓娶沈氏、繼室潘氏、皆封宜人。子男六、度朝散大夫直寶文閣、主管建寧府武夷山沖佑觀、庶、庚、宜州文學、廡從事郎湖州長興縣主簿、庭、迪功郎池州州學教授、士隆、太學生。子女二、壻奉議郎知婺州東陽縣韓墨卿、宣教郎知慶元府鄞縣周之瑞、而庶、士隆及嫁墨卿者先已卒。孫男十二、邁、迪功郎、鎮江府司戶參軍、章、鄉貢進士、遵、準、迪功郎、饒州司戶參軍、覃、芾、申、餘未名、而邁、遵皆早卒。孫女九、壻文林郎、常州軍事推官周南、文林郎、武昌軍節度推官求淳、從事郎、婺州觀察推官王棐、將仕郎、陳錫、餘未行。曾孫男七、女一、皆未齒也。黃氏越之聞家、而公越之君子也。少爲士、家未充、米鹽旦夕急、公求所以逸其親者、百方督課、以身先之。未久、有田二十頃、公以爲如是不已、則以財自沒矣。于是諸子出師入友、交勸以學、而度中進士第、公喜曰、吾雖未耄老、然天其畀吾休乎。遂營隱居沃州之尾、孟塘之山、以某夫人年高多疾、卧

起、須公、尙未決去也。及某夫人歿、終喪、松柏迷道、庭花合圍、公著山人衣、曳杖挾書行吟、賓送煙月於林蔭中。凡故疇新畎、廩假進退、抱孫長息、婚嫁有無、皆落莫恍惚、若夢中事。唯聞名勝士、欣然邀至、共食啖麵羹苦薇、爲語儒拂二氏所以離合者、自言見性命眞處、如水中鹽味、非無非有、其說深美。陳君舉來游、經年、常縱論夜分。君舉名善辯、不能窮詰而畏之、曰、此非由師授而得也。至于天性曠達、不作疑吝、推己利人、不自封殖、無顏色之悅、而人譽其德、無市井之惠、而人懷其恩、蓋其中之信於人也。方度宦浙東西、公來不過三月、爲御史諫官、事有當言、言有難盡、微婉順導、冀必感發。前後援親以請至八九、輒不聽、最後命使守泉、復固辭。天子知公實老矣、乃自顯謨進直寶文閣、許以養公。君臣父子之際、人又以爲難焉。蓋自癸未至乙丑四十餘年、公子孫屢以文字起、庭旣釋褐、公疾姑侵、呼章語之曰、汝知吾樂乎。章對、不

知也。曰：夫除世俗粗事，易斷細微精想，難。吾用力於此久矣，然葉落枝生，不知其幾。今真斷矣，故樂也。臨絕視度而笑，度指其心曰：得非能於此洞然乎？公應曰：然。遂歿。銘曰：

昔君之來兮，友茲山而誰儔。今君之去兮，邈茲山乎何求。其風疏疏，其月皎皎。彼蔚者藏，不尙有詔。

葉適撰 《水心文集》卷一五

朝請大夫致仕王君墓誌銘

吾鄉五先生俱以文行師表士子，惟桃源王先生暨我高祖之後皆大。蓋其啓迪後學，德澤之及來裔者，源深而流長矣。先生之子宗正少卿珩，孫廣南提舉市舶勳，繼登進士科，提舉疎財尙義，以廉節著，所積尤厚。是生三子，長太府卿諱正己，次即君也。朝請大夫諱正功，季知安慶府諱正民。三人以節誼政術能世其家，嘗一歲同奏子，興固未艾也。嗚呼！昔者鑰旣銘太府之墓，纔八年而君與季相繼下世。旣葬矣，君

之諸子以國子正袁君燮之狀求銘。惟王氏樓氏自二先生以道義定交，至太府壻吾門，姻好稠疊。感今懷昔，乃撫其大概，爲之書而系以銘。君舊名上，字從真，下曰思，字有之。後以避孝宗嫌名改焉。遂字承甫。曾祖說，先生也，贈銀青光祿大夫。祖玩，贈朝奉郎。父贈金紫光祿大夫，娶蔡氏，元氏，薛氏，贈武陵、永寧、普寧郡夫人。君薛出也。家世之詳已載于太府之志。惟君生而不凡，幼篤于學，不待彊教，已如成人。以金紫遺澤補將仕郎。紹興二十四年，由銓選授右迪功郎，撫州宜黃縣主簿，尋易處州青田。有訴夫死于毆者，君按視，則更曰自經。君察其必以賄故，即用初情訊之，具服。隆興初，調筠州司理參軍。筠號道院，而獄事亦繁，精意推鞠，狴岸屢空。乾道二年，循右從政郎。四年，爲荆湖南路轉運司主管帳司。給事黃公鈞主漕計，以嚴明稱，寮屬僅取充位。君果于立事，滯訟見屬，剖析無留難。黃公舉以厲同列之持兩端者，尙



書沈公介爲帥、尤簡貴威重、裁決無敢輒經外臺者。理或未安、君改之不疑。沈公更加敬異、不以爲忤也。二公爭薦之、又爲延譽、不期月、舉削應格。七年、改宣教郎、知興化軍莆田縣。縣素難治、始至、牒訴數百、懲其非實而決其久滯者、遂寢以清省。宋氏子怙勢突入毆吏、林公寡守信、其從父、太學諸生也、喧競于庭、皆捕治使服而徐釋之、且戒曰、後復爾、不汝貸也。感謝而去。林公由是知君。後爲監司、嘗表薦之。邑岸大姓鬻鹽、因爲寇鈔、捕獲數十人。其黨篡取、殺傷卒徒、篡官亦被數創、救至得免、而郡怒其生事。君曰、拒捕至此、而賞罰不伸、何以厲其後。即窮治之、而賞官兵焉。又修陳鵠斗門、以永灌溉之利。淳熙六年、賜緋衣銀魚。七年、通判潮州、推誠佐郡、守貳無間言。郡人有爲憲屬者、武斷鄉曲、征利于近郊。君裁以法、不勝慚怨、擠之不遺餘力。君用是罷。將歸、會劇寇沈師逼城、民走依官寺。君開門納之、力贊郡將修戰守具甚悉。

賊知有備而退。衆喑曰、是已罷官、而爲民深切乃如此耶。至其行、多涕泣者。九年、簽書武安軍節度判官廳公事。十一年、改淮南、皆以伯氏將漕引嫌。十四年、主管湖北安撫司機宜文字。紹熙元年、差知澧州、陞辭、論沙毛錢及雜賣場二事。上亦深知其弊、嘉嘆再四。三年到郡、帑庾枵然、廩祿累月不給。君去其侵蠹之已甚者、節浮費、汰冗食、補罅漏、郡計無乏。及期而用頗裕、乃從邦人之請、即州治之前、闢城通道、建澧陽樓、前俯大江、巨麗軒豁、遂爲一方偉觀。嘗屬鑰記之。由是人心闐懽、士氣振厲、比舉多決科者。藥園寺僧以稔惡聞、邑令發其端、謂罪不可赦、而以賄緩其獄。君詰之、治始急、復賕于上司之吏、移文使先縱遣。而以牘來。君曰、欲以勢力求免耶。即日杖之。五年、奉最還朝、奏事重華宮行內、深稱上意、遂知蘄州。自私錢之廢、淮民多窶、鮮有蓋藏。遇霖雨、至絕市無糴。君以慶元四年視事、急發廩而損其直、且多邀米商、許



以蠲征、舳艫輻湊。又念歲收纔能自給、而巨商率先以他貨來售、禾始登場、厚取其贏。君以爲遏糴固非古訓、而坐視民食之空、咎將誰執。力請于朝、乞禁止商販、許之。民相謂曰、使君通變如此、自爾有足食之望矣。有言銀礦發于山者、君欲遏之、而未得其說。耆老訴云、往歲嘗有此事、官不熟計而遽行之、非徒無益、治戶以虧額、坐深文、鬻產以償者數百家、痛猶未定也。君爲奏罷之。佛燈大師者、自稱戚里、挾權要、書走州縣、攫取無藝、人病其擾、莫敢詰。君出郊、有訴者、立捕之、寮佐勸止不聽。比至、一黥隸爾、致之法。六年、除廣南西路提點刑獄公事。嘉泰元年、賜四品服。廣右之俗、輕于冒禁、而上官以不按吏爲從厚。君深病之、劾其貪暴之尤者、請託一無所聽。始知悚懼、而君亦寢危矣。興安令之子蹴小吏至死、逮繫郡獄、令脅治獄者、欲變之。君怒曰、臺治所在、可使死者抱冤乎。劾令而移獄鄰路。令誣訴于言者、公遭論而歸。自以

無嫌于中、處之怡然。二年冬、主管建寧府武夷山沖佑觀。三年正初、屬疾、癸未終于家。享年七十有一。娶同郡伍氏、贈宜人。先二十九年卒。今宜人應氏。子男六人、深、從事郎、新無爲軍巢縣尉。湏、迪功郎、新池州青陽縣尉。洙、迪功郎、太平州蕪湖縣主簿。登紹熙四年進士科。泌、將以遺澤補官。女八人、長適從事郎、監紹興府會稽縣戶部贍軍上臯酒庫毘陵張符女。後君半年卒。次適進士伍遵。第五、第六女蚤亡。餘與第四、第五男俱有廢疾。孫男三人、仁之、儀之、信之。信之先一年卒。二女、一夭、一未行。先是、伍宜人葬于鄞縣桃源鄉排陳之原。諸孤以四月己酉奉君之柩合焉。君資稟忠信、不發一妄語。妻子不見喜愠之色。開心見誠、吐露情素。孩孺有問、亦告以實、不敢戲侮之。田夫野老、市井小人過而挹之、俯接惟謹。或遇機穽險巖之人、一對以誠、彼自意消。以是善與人交、終始不變。筮仕之初、或言邑令有心術、亦當有以牢籠之。太

府問客言何如。君曰：以誠待之，爾何術之可用。卒與令甚厚，至執手不忍別。人但以君爲恂恂自謹之人，而遇事敢爲，毅然不可干以私。每曰：食君之祿，徇情撓法，以取悅于人，自爲計則得矣，其如體國何。廉潔守家法，俸入非令所載者，謝不受。澧陽終更，吏白有資送錢三百萬，悉拒之。惟備舟浮家而歸，郡人歎服。所至未嘗飾治器用，不市一物。莆陽荔子最盛，有以名品餽者，堅辭之。怡于仕進，不求知于人，而人自知之。丞相趙魏公樞密使軒山王公，每欲汲引，丞相京公尤稱其真淳，力薦于上。晚歷麾節，皆其力，而君不自知也。張侍講枻風裁甚高，在潭游從，雅相愛重，呼君爲齊年兄。清貧自處，質貸以給，奉己至薄。得祿不足以償逋負，如是者三十年。然持損有餘，補不足之說，有義事亦勉爲之。後既稍裕，親故有求，隨力以應。隆冬細民乏食，賑與無倦色。幼孤鞠于兄嫂，少長省事，自念孝養無及，以事親之禮事之。嫂即鑰先祖少

師之季女也。伍宜人亦順適君志，躬執婦禮。既亡，祔于廟，以時奉祀。太府諸女之行，竭力以助，歛具良厚，皆人所難者。性嗜學，多錄未見之書，唐諸帝實錄略備。今寫本及版行者各萬餘卷。少喜爲詩，周旋太府與王信州之間，佳句與之相下上。暮年益造平澹，有荆澧集行于時，餘藏于家。嗚呼，書曰：吉人爲善，惟日不足。卷阿之詩，言求賢用吉士也。漢文帝初立，召田叔問曰：公知天下長者乎？周家用人，以吉士爲首。文帝之化幾三王，實基于此。王氏父子兄弟皆有以自見于世，惟君制行醇篤，立身處家，施于有政，風誼聳然，而其本體蓋所謂吉人吉士長者人也。故鄉評卒以是歸之，使其得位而行，可使鄙夫寬，頑夫廉，而風俗庶幾于古。小試緒餘，感化已多。一區之宅始成，求田足以卒歲。天假之年，亦可表率鄉曲，而遽已矣。此鑰平日敬嘆，每以語人者。今也四子俱列仕版，家道肅穆，天之敷佑如此，爲善者亦可以勸矣。銘曰：

恂恂王君家世儒雅。君尤篤恭。視如樸野。周云吉士。漢言長者。君其人歟。力行不捨。藍田皆真。元規非假。施于有政。不言而化。義所當爲。勇于施舍。麾節倦遊。求田問舍。謂宜上壽。式是鄉社。云何不淑。棣華凋謝。高其門閭。尙容駟馬。詩以颺之。用慰泉下。

樓鑰撰 《玫瑰集》卷一〇〇

知漳州監丞吳公墓誌銘

公諱松年字公叔永嘉人。曾祖諱比故不仕。祖諱充故贈右光祿大夫。父諱表臣故任敷文閣直學士。右太中大夫提舉江州太平興國宮累贈少師。母鮑氏秦國夫人伍氏宜人。公伍出也。以蔭補官。初主平江崑山簿。監南嶽廟。由國子監書庫官遷刪定官。書成改秩攝登聞院。將遷擢而少師以壽皇府翊善議出閣事罷去。公亦請外。歷徽台二州簽書判官廳公事。其在徽州悉力吏治。無文士脫略囊箠細碎之意。太守多病予告。以公明敏委以郡事。吏牘填委。或累月

不省者。公一日決之如流。守倚以集。秩滿歸至中途。聞少師病篤。捐妻子。犯波濤。舟人無色。公不爲動。翼日至家。少師一見乃瞑。台州秩滿。得湖南轉運司幹辦公事。部使者知公能文。牋奏悉以倩公。每一篇出。大者百千。小者數語。詞意絕人。給事莫公濟嘗歎曰。公叔下筆無一點塵氣。何必減汪彥章。孫仲益。時逆亮入寇。湖南餉師粟斛四十萬。當遣吏護送。衆懼。公獨請行。舳艫銜尾。先至師次。糧道以濟。丞相魏國張公居長沙。望重四海。名士輳集。獨偉視。公每見必促席語。移日且勉之曰。君不必苦心屬文。當爲有用之學。且與其子敬夫游。公自是盡棄其學而學焉。魏公再相。首薦公于朝。及其宣撫江淮。招公議軍政。公以國事方急。不告妻子而行。通判明州。太守滎陽趙公伯圭母秀王夫人疾革。委攝郡事。公宿于郡舍。盡瘁勦力。事整而辦。時有死囚數十。公察其有冤色。即呼而前。溫色辭以問之。皆號泣曰。我海漁也。吏執以



來日夜笞掠、便誣服爲盜。公密遣吏驗問海濱枯魚之肆、果^②然。一日釋二十七人、郡中驚服。先是、詔郎官以上舉所知、尙書薛公良朋、中書舍人洪公邁、給事胡公沂、直院莫公濟、少卿胡公襄、皆以公名聞。秩滿造朝、^③丞相陳公俊卿一見奇之、除將作監丞。會中都官待次者例補外、改江西安撫司參議官。江西饑、米斗數十百錢。公捐俸以活饑者。除知南劍州。賜對便殿。壽皇勞曰、吾舊學之子也。因訪以天下事。公敷奏詳明。所陳四事如得天意。固民心。錄名將子孫革武舉試文。上甚喜。至延平、首條上民事。一曰差注巡檢須武舉中選或任^④。子曉民事者。二曰理訟先逮詞首。三曰商旅不得操兵。事皆施行。有氓誣其主人以殺其子者。獄久不決。公驗問。不三日得實。又明日獲其子於建寧。蓋氓匿之云。人以爲神。暇日則召掾史與之論文。入學校與諸生講經義。時薦舉久敝。有挾諸公貴人書至者。公一不省。廷語于衆曰、薦舉

本意、舉賢才及治行而已、挾貴而問、豈薦舉本意哉。先是、郡之材官多以請託隸尺籍。公一不聽。一日入蒐庭大閱。許其子弟畢集。試其藝能。簡其驍勇。可以爲兵。俄有旨集諸郡材官詣行在所按試。士氣奮甚。挽強穿札。爲閩郡最。第賞減會課三年。其治郡大抵慕朱邑。及去、延平之民遮道涕泣。爲之立祠。旣入朝、執政議以公爲尙書郎。上曰、吳某治郡有聲。朕欲再畀以名郡。遂得漳州。未之官而卒。實淳熙七年二月丁酉也。得年六十有二。終官朝散大夫。初、少師官通判。夢一浮屠傾然而瘠。謂己曰、帝詔予爲而子。視其謁云、杭州祥符寺。及解官道杭。公生焉。幼穎悟。甫六七歲。日誦數千言。年二十三。侍少師居婺州。晝夜讀書。甚至嘔血。少師以文名一世。公盡得其學。弟三人皆師友公。得同薦書。而公獨不第。及^⑤試宏詞科。隱秩秘文。過目不忘。同學如丞相洪公适、給事莫公濟、皆推其業之精。公風神高邁。談間傾坐。超然如晉、宋



間人物。好古樂道、經明行脩、不競於進、慤而澹、介而通、寡欲而有守。平居簡出、終日簡編筆研間、遇會心處、即書于牖戶。爲文深厚古雅、有前輩風。有詩文二十卷、曰江湖集。尤愛于兄弟。從兄御史臺主簿某、病革、託以死生。弟宗學教授某在閩中屬疾、公聞之、疾走至其官下、未幾卒、公護喪以歸、力貧以葬、拊二室之孤、不啻己子。所至得俸不以入門、不買田宅、分以周族親同寮之急。與游皆名勝、如王公十朋、鄭公伯熊、林公光朝、呂公祖謙尤厚云。初室周氏、封宜人、永嘉先生行己弟之子也。能通孝經論語、孟子諸書、與公德對云、前五年卒。繼室潘氏、亦封宜^⑥。人後十二年卒。子男四人、瓌、文林郎、前饒州軍事推官、璪、承直郎、前監建康府提領所南酒庫、琰、文林郎、前安豐軍安豐縣主簿。幼爲人後、公卒、歸其宗、以公蔭。琯、尙幼。女六人、希韞、適文林郎、瑞州軍事推官周若鑑。希孟、適迪功郎、前潮州司法參軍薛澤。季蘭、適進士周及。

次未嫁。次適修職郎、永州零陵縣主簿楊長孺。次適進士鄒畢。孫男三人、洵、澥、深。女四人。諸孤以八年九月乙酉葬公于吹臺鄉西山法濟院之陽、遷周氏宜^⑦。人祔焉。至紹熙壬子二月壬寅、復以潘氏宜人祔其左方。予與公初定交、長沙中同官豫章、公之子璪晚復與予同官高安、大兒長孺因得婿公之門、交莫厚焉。親莫至焉。公既葬之十二年、癸丑四月、璪以書來曰、先人未有銘詩、微先生、其誰宜爲。則追銘之曰、

公叔風神白而長身、如光風霽月之無塵。公叔詩文老而日新、如日光玉潔而不陳。公叔搢紳、意行無津、如我馬既同而覽其趾、我車既攻而方其輪。嗟嗟公叔、一炊黍之訕、而萬斯年之伸。公叔一去、于今幾春。意其上虛空而跨綠耳、下大荒而騎麒麟也耶。

楊萬里撰 《誠齋集》卷一二五

同知樞密院事贈太師洪文安公遵神道碑

洪忠宣公見危授命、半世異域、白首來歸、力陳忠言至計。高宗方引以自近、權臣惡其害己、不使浹日安於朝廷之上、至以漠北僅存之身、投諸南荒、必死之地、身且不閱、遑恤其家。然而長子丞相文惠公、次子樞密文安公、被遇兩朝、先後得政、又次子翰林公邁、未及大用、而入從出藩、翱翔最久。蓋立朝莫清於登瀛、莫榮於代言、莫重於掌文柄、莫尊於簡兩社。公既與昆季迭居、並以文章稱天下、公又先進、或一再至焉。其後孫曾印綬相望、方興而未艾、衣冠盛事、世推洪氏。易云、積善之家、必有餘慶。傳謂、非此其身、在其子孫。蓋天定能勝人也。樞密諱遵、字景嚴、世爲饒州鄱陽人。曾祖炳、贈少保。妣紀國夫人何氏。祖彥先、贈太師、榮國公。妣秦國夫人董氏。父忠宣、諱皓、終徽猷閣直學士、左朝散大夫、贈太師、冀國公。妣楚國夫人沈氏。世次見文惠碑。公兒時端默如成人。楚國亡、慟絕者再。苦學忘晝夜、詞章壯麗、自成一家。紹興十二

年春、以右承務郎監南京中嶽廟、冠詞科、賜進士出身。高宗念其父、特除秘書省正字、復科徑入館、自公始。閣下多前輩、皆以畏友待公。明年春、文惠公繼來、搢紳榮之。秦熈爲秘書郎、爲少監、勢燄赫赫。公守道安恬、留滯不遷。九月、忠宣去國、公求通判常州。守湯樞密鵬舉、部使者孫秘丞汝翼待僚吏嚴峻、公雖少而明、摘吏姦、臺府爭委以事。移倅婺州、守李琛傲愎、亦知敬公。升佐紹興府。未上。二十五年夏、再入爲正字、攝行外制。十一月、湯樞密執法殿中、薦爲御史。方賜對而忠宣公薨。服闋召還、公奏、先臣與龔璿均使虜廷。璿臣劉豫、以擅殺人被誅、秦檜反、贈節鉞、臣父抗節乃貶死、可謂不分逆順矣。詔還忠宣舊職、賜諡。擢公起居舍人、遷郎、兼權樞密都承旨。二十八年也。明年正月、除中書舍人、賜服金紫。殿前裨將輔達轉防禦使、王剛團練使、公言、近制管軍十年一遷、二人尙未滿歲。上喜曰、步帥趙密去年求遷、詞臣謂密爲



節度使方九年、逮今乃除太尉。卿論二人、軍中自以爲當也。時勳臣子孫多歷臺省、議者以爲言、詔序遷至次對、即久任內祠。公奏、侍從非磨勘比、言明序遷可乎。三十年正月、兼權禮部侍郎、俄遷吏部、選人詣曹改秩、予奪遲速盡出吏手、公隨事疏理、吏不得肆。完顏亮將渝平、中外以爲憂、沈介使回獨謂無他、公請密爲邊備。八月、兼權吏部尚書。舊制文武臣致仕任子許所在州保奏、或請必由本貫、革欺弊。公言、宦游蜀廣或數千里、自有敕牒可驗。詔仍舊法。公旣以近臣兼承密旨、邊防民隱每爲上言。三衙春夏牧馬夏菰城、仰給蘇湖秀三州、適積水淹田、有司預請倍輸夏麥以補芻。北虜索絳陽郭小的、安化劉孝恭等二百家、公皆執不可。軍器利弊命公料簡、公區別良窳、衆謂熟於軍旅者未必能也。上以是有大用意、入翰林爲學士、典銓如故。明年、御史論湯丞相思退章不下、內批以大學士奉祠。公當直、例作平詞、諫官云

云。公連請去。三省擬除敷文閣直學士、上令進徽猷、提舉江州太平興國宮。閱三月、平江闕守、上親用公。先是虜亮命張忠彥堅壁鳳翔、拒吳璘、以劉萼攻擾襄漢、自將精銳及簽軍分寇兩淮。謂我悉兵扞邊、乃別造舟膠西、刷河北壯丁雜金人號大漢軍、統以蘇尚書者、將由海道乘虛擣二浙。諜知其謀、詔浙西總管李寶率舟師禦之。公竭資糧器械濟寶、寶乘風盡焚虜舟。亮謀旣壞、忿躁就薨。寶由左武大夫超授靖海軍節度、公有助焉。步帥李捧嘗請斷吳江橋防虜入、或又欲塹常熟縣之福山限其騎軍。公曰、審爾、是棄吳以西耶。凡堂帖、監司符驗、皆收不行。上幸金陵、從衛百須、傍郡承迎不暇、入公境獨無過求。公謂官拘商船聚近海縣、募水手留民兵夾運河築烽臺、徒費無益、悉條奏散遣。吳人德之。三十二年夏、上將內禪、趣召公、日詢來期、遂還翰苑。凡傳位及登極赦、上太上尊號、追冊安穆皇后、封拜三王制詔皆公視草。

六月、進學士承旨、兼侍讀。隆興元年、知禮部貢舉。皇城邏卒挾^⑤內侍王允修、侵辱士人。公引蘇軾奏陳慥事以聞。閩士揖其友、邏者指爲傳義、欲掖出之。公命卒業。一士賦擅場、又有對策剴切、皆傍犯名諱、公爲取旨、許降等奏名。前二人、林光朝、樓鑰也。陳自修試詞科、擬制一語、齜牙被黜。公薦其才學、特與教官。其愛惜士類如此。五月、同知樞密院事。張忠獻公以元樞督師江淮、公與宰相協心帷幄、凡處分機要、平議對境書檄、敷陳曲折、率稱上意。公前在從班、與正言周操議論不同、至是操爲侍御史、將以和戰不決彈公。疏未入、語漏、上徙操權吏部侍郎。公不自安、求去、上卻其章、請益力、以端明殿學士再提舉興國宮。還鄉、傾貲葺園圃、築小隱堂、日與昆朋賦詩飲酒、極溪山之樂。乾道六年、起知信州。民遇吉凶及營造困於科酒、諸縣重賦斂、州市物虧其直。公家鄰郡、素知之、至即亟爲罷行。旬日、驛召赴闕奏事。時江東圩田

壞、徙公知太平州。前政即周御史、聞公來、不俟合符馳去。公追餞十里、曰、前日國事何嫌。今不爲子孫計耶。交驩而行。公躬^⑥履圩埂、勸相徒役、用工數萬人、忘其勞。轉運張松妄奏圩未嘗決、民無轉徙、止當責成圩戶、裁省雇募。公乞朝臣按視、於是將作監馬希言、監察御史陳舉善繼來、直公之言。圩成、合四百五十有五。松方別治溧水、永豐圩、過科工費、壑鄰逞憾。公曰、郡當歲儉、方賑恤流移、勸分乞糴、如剗股不充、喉尚能飽他人之腹乎。力訴於朝、就除建康府兼本道安撫使、行宮留守。上諭當制舍人范成大載公治績、且許入覲。時虞丞相允文有意北征、先移駐侍衛軍馬、驟增萬竈、敕公同二府議於內殿。公奏、呂惠卿請與弼臣同對、神宗赫怒。近太上在金陵、張浚司留鑰、亦不許偕執政奏事、願別班引。上批所委體大、共議勿辭、蓋近此所無也。進資政殿學士、寵其行。至則蠲苗米耗剩、許民自持斛槩、徧走郊野、布置營壘、



民居及塚墓、一無相涉、諸將不能易。上賜手札曰、寨地異同、卿挺身任責、非乃心王室、疇克爾。踰年役興、禁卒醉酒搖衆、公磔於市、帖帖無敢噪。御前軍常晝入旗亭、挺刃椎壚、公付獄、駟聞、統帥懼罪、乞付軍自治。上怒、罷統帥、公亦貶秩二等。頃之、五營乞公、亟還元官、加大學士。屬部饑、公疲精救荒、食少事多、庸醫勸服礬石、鼻衄不止。暮夜、江船火近大軍倉、公馳救、疾益侵、祠章三上。淳熙元年春、乃許提舉臨安府洞霄宮。十一月甲午、薨於里第、享年五十有五。積官大中大夫、贈宣奉大夫、爵本縣開國子、食邑六百戶。四年正月丙午、葬湖陽七蟠山之原。妻咸安郡夫人朱氏、尚書右丞諤之孫、朝議大夫正剛二山之女。翰林狀公遺事上太常、諡曰文安。有文集八十卷、東陽志、雙譜各十卷、錢譜五卷。子男三人、楫、今爲奉直大夫、新知峽州。楫早世。榘、今爲奉議郎、新兩浙轉運司幹辦公事。賜緋魚袋。女六人、四不及嫁、其二適禮部尚

書、木待問、提轄左藏東西庫陳由義、今俱亡。孫男七人、价、舊名恢、今爲奉議郎、淮東常平司幹辦公事。悅、承奉郎、早亡。佃、通仕郎。僖、承奉郎。倬、伸、倬、未仕。孫女八人、長適儒林郎、新四川總領所幹辦公事余忠卿、次適通直郎、前知德化縣汪杲、繼室以其妹。次許進士楊景受。二夭、餘未行。曾孫男三人、艾、將仕郎。蔚、登仕郎。著、將仕郎。公以二子升朝、累贈太師。咸安後公十二年十二月薨、與公同穴、贈秦國夫人。昔某試館職、公實發策。孝宗初元、分掌內外制、每議事輒聯名、相與至厚、以是峽州遠求墓道之碑。惟公靜重、明通平居言不輕發。上前議論纚纚、語簡而理足。雖以文進、政術自高、與物無競、人不忍欺。守郡未常以公錢予人、親舊有求、捐俸不靳、故通貴而家無餘資。某旣備書見聞、復系以銘曰、

劬躬燾後、有開於先。進德修業、惟嗣之賢。嗟嗟忠宣、奮身致主。生死朔南、兩極艱苦。天寔恫之、三子英英。

科名宦達公則先鳴。翔於樞庭底績三鎮。有猷有爲。謂復得政。何德之臧。而年弗長。惟文與行。沒世彌彰。彼崇者丘。屹立斯石。詩以颺之。有永無斁。

周必大撰 《平園續稿》卷二九

校記

①偉視：原作「視偉」，據四庫本《誠齋集》乙。

②果：原作「杲」，據右引改。

③朝：原作「胡」，據右引改。

④任：原作「住」，據右引改。

⑤及：原作「乃」，據右引改。

⑥宜：原作「宣」，據四庫本改。

⑦同⑥。

⑧挾：傳增湘校《廬陵周益國文忠公集》本作「杖」。

⑨躬：原無，據四庫本《文忠集》補。

宋儒碑傳集卷一百二十二

汪大猷

敷文閣學士宣奉大夫致仕贈特進汪公行

狀

曾祖元吉、不仕。妣何氏。祖洙、皇明州助教、累贈正奉大夫。妣陳氏、累贈太碩人。父思溫、皇左朝議大夫、直顯謨閣致仕、累贈少師。妣王氏、封恭人、累贈越國夫人。本貫慶元府鄞縣武康鄉沿江里。汪大猷、字仲嘉、年八十有一狀。

惟汪氏派出黃帝、得姓尙矣。然自歷代以至本朝、未嘗有一顯者。宣城、鄱陽、上饒、四明諸郡、大率皆出于新安英濟王、廟食千載、後裔繁衍、宦路相遇、多講宗盟。祐陵時、大司成澥以耆儒名、翰林學士藻以文章顯、嘗謝司成薦舉、止用張衡思立賦、汪氏龍魚及檀弓、童汪跼事、且曰、遙遙譜牒之相傳、沒沒衣冠之不振、雖更魏晉之遠、莫廁崔盧之間、槩可知矣。丞相伯

彥首相高宗、遂爲佐命之臣。紹興間、簽書樞密院事、勃樞密使、澈俱至大位、子孫宦達相踵。端明殿學士、尙書應辰、以重名崛起、雖不至公輔、而道誼風烈、足爲一世師表、此其尤盛者也。公以文昌舊臣、歷仕四朝、康寧耆艾、獨殿諸老、抑其次焉。今汪氏所在衆多、幾如王謝家、豈族姓盛衰、亦有待于時耶。公之曾祖處約、而有士君子之行、受知范文正公、王荊公、正奉爲鄉先生、文行淳備、沾丐後學。少師紹興初、爲太府少卿、兩浙漕使、風誼尤高、搢紳推重。生四子、公其仲也。始越國方娠、公之從伯父夢應真受生、產于叔父吏部鄞縣丞之官舍。生而岐嶷、骨相穎異。四歲誦孝經、能對客問、學中所講論語、孟子輒述口義、以示同舍。一日千里、儕輩皆畏之。紹興七年、以少師遇宗祀、補將仕郎、調右迪功郎、衢州江山縣尉。公漸漬義方、曉暢吏道、若老于州縣者。所部百人、默識姓名及幹力之優劣、輒得其用。分鄉警捕、境內肅然。鉤攷滯訟、



儒藏

斷之以理。歲在甲子，洪水稽天，發廩爲粥，以食避水者。又取鹽商大舟救之，存活爲多。時方申兼經之制，以嘗試南宮，公餘肄業，再薦漕臺，遂中十五年進士乙科。秩滿，關陞左從事郎，爲婺州金華縣丞。處事益明，期限必信。文引可以質錢，至有以潤其屋者。豪民陸氏析產鬻訟，案牘紛積。公詰其要，謂祖屋枕山，長兄據其前，而使諸弟由山蹊以出。公曰：「此最其不平者。」按圖更分，已得要領。又訴義遜及瞻塋嫁姑之厚。公曰：「爾父兄同力起家，義遜有法，奉先冢，嫁諸姑，豈得不厚？」一婦以衆錢買田，託以嫁資，公攷婦家戶籍，不滿半頃，復取均之。且諗之曰：「若送所司，一門無全人，至親不復可相見。」汝家破矣。命講長幼之禮，歎服而退。時戶部侍郎李公椿年建議行經界，選公爲龍游縣覆實官，約束嚴峻。已量之田，隱藏畝步，不以多寡率至黥配，盛氣臨人，無敢忤者。公獨曰：「愚民不識弓步，不善度量，若田少而所供反多，須使之首復，乃

可並行。」李公問當何如？公曰：「凡有不實，許其自陳，俟驗實與改正。悉皆施行，受賜者已不知其幾。」既至，躬行阡陌，唱弓量之目，則已默計其廣袤之實。吏運籌久之，無毫釐差。觀者以爲神。凡事俱有方略，邑人鼓舞，旁縣皆取爲法。事畢，躬納圖帳。李公又欲以十保合爲一圖，仍與鄰都犬牙相入。公曰：「一保之圖，用紙二百番，已無地可展，又從而十之，不惟不能圖畫，亦安所用之？徒重勞費，無益于經界也。」由是諸郡俱免催科。辦事談笑而了，不失忠厚。二十年，丁越國憂，星奔哀毀，悲動行路。服除，爲嚴州建德縣丞。二十四年，饑民嘯聚熾甚，守禦調度多出規畫，以訖無事。分都賑給，衆中指一夫詰曰：「是某都某人也。」蓋居兩都之間而冒請者，械繫于前，餘多引去。事已，徐釋之。又嘗薦牘，辭受輸，皆人所難能。明年，用舉者改宣教郎，知平江府崑山縣，旋遭外艱。既造朝，有達官使獻生財之說，將用以爲薦。公曰：「財不可生也，生財者必害



于民。寧甘心寸進耳。遂謝之。差總領淮西江東軍馬錢糧所幹辦公事。金亮犯邊。饋饗王師。高宗巡幸。供億百出。公佐其長以辦。羣工扈從。咸知公名。三十二年。賜緋魚袋。改幹辦行在諸司糧料院。文書盈几。目不給視。公間摘一二。無不切中。老吏驚歎。謂未有也。或言榷貨務左藏庫有羨儲。朝旨以諉公躬自檢校。得其實以對。隆興二年四月。參政錢簡肅公宣諭淮東。辟爲幹辦公事。九月。改充參議官。內裨幕府。外按邊陲。海泗唐鄧之棄。錢公執以爲不可。公亦贊之。雖不得盡行。終免倉猝之變者。宣諭司之力也。遷大宗正丞。乾道元年。兼吏部郎官。主管侍郎左選。又兼戶部右曹。有蜀士理和羅酬賞。吏必欲以小節取會。公曰。在法有旁照可驗。許比類而行。即取其同類者併上之。省吏沮抑尤急。公力爭之。自是始爲定例。六月。輪對。錢公先薦于上。乞與之言。察其人物。公奏。總覈名實。責任臣下。因才而任。毋違所長。量能授官。毋拘

流品。又乞表薦宗子。隨事錄用。上注目久之。謂輔臣曰。疏通詳雅。有議論。今日有用之才也。除禮部員外郎。公自登第。嘗習宏辭科。應用之文。足以行意。在州縣時。守將多委以箋奏。南宮名表一出。士林誦之。此外無他職務。同列言于廟堂。謂公撥繁治劇有餘。而清簡太甚。丞相洪文惠公以此諭公。七月。遂兼吏部侍郎右選。九月。除吏部郎官。主管尙書左選。莊文太子初建東宮。妙選僚案。是月以公兼太子左諭德。太子侍講。兩日一講孟子。多寓規戒。莊文深所欽重。嘗出龍大淵禁中所進侍燕樂章。諭宮僚同賦。既退。公謂同列曰。燕既不預。無以措辭。若出于御製。或儲禁爲之。猶可。賡和。鄭衛之音。近習爲倡。非講讀官所當預也。白于太子而止。二年。爲省試參詳官。參政林公安宅以戶筭同知貢舉。就除諫議大夫。自言去場屋久。以攷校事屬公。公爲之協心焉。訖事。曰。欲邀公議論。辭不往。林既罷政。獨免于評議。六月。除秘書少監。

高宗聖政書成、進讀于紫宸殿德壽宮。道山清高、領袖名士。職當修神宗以來會要、而曠歲不舉、深懼典故散逸、率屬分纂。上聞之、爲置局、命宰臣提舉。書奏五朝之大典始備。金國來賀四年正旦、借吏部尙書爲接送伴使。上閱語錄、見公敏于酬對、處事有體、滋嚮之。尋兼權刑部侍郎。六月、兼崇政殿說書。八月、兼權給事中。孝宗厲精民事、訪問不倦。宿直玉堂、夜宣對選德殿、賜坐從容、導公使言。時欲遣察官決獄畿邑、公奏使果有滯囚、亦且先次決遣、事體太重、徒擾諸縣、必又甚于監司之臨按、不得不謹于始、遂改命通判以行。公首以一言移主意、自爾每遇夜對、上多訪以時事。嘗曰、卿爲侍從、天下之事無所不當論。朕每厭宦官女子之言、思與卿等款語、正欲知朝政闕失、民情利病。苟有所聞、可極論之。公悉進所欲陳者、奏對明白、曲盡情僞、上多聳聽而行之。其造郟啓沃之際、若講義進故事、論治道之要、具有遺編、亦或削

藁而不傳、惟見于事功之實者、謹書之。以池饒信、建水災、乞用澶州劉渙收買耕牛之法、令州郡廣收糴以備賑糴。論役法、則陳一鄉通差、物力均差、均錢雇人、官戶例減限田之詳、又別白里正則專主煙火盜賊、耆長壯丁則催科承引、今取耆長雇直撥入經總制司、竝緣法意。里正承役之初、抑使兼充役者、受害爲甚、至死必爭。又乞改定役法、未可輕變、廣求衆議而後可、必須遲以歲月。若欲寬其困苦、當先嚴禁誅求。又論亭戶不充役次、以鹽折稅、或有未嘗親熬波之勞、居近場監、貸錢取息、射利爲厚。且三公尙有限田、而此曹獨無定數、反受官戶隱寄。又均和買于編民、欲將家產及二等以上依官戶充役。又論給賜勳舊近戚以田、一得指揮、豪奪占據、桀黠者妄指官之籍沒民之戶絕者以爲獻、藉勢陵轢州縣、至不能誰何。寧忍惠及一家而使人重罹其苦。自今惟當錫以金帛、使自求之。又論籍沒財產止可行于強盜囊橐



官吏犯贓之人、然朝爲富室、暮爲窮民、流離凍餒、已自可念。至有倉庫綱運、負陷官錢、而致破家者、宜有以處此。欲應以欠負拘產、不在給賜出賣之數、計其租入、償欠既足、則以給還、使復故業。以至廢鄉村、私立稅鋪、罷官監酒坊、及陳萬戶酒之策。嘗因輪對論銅器之害、則曰、產銅之地不發、浸銅之水漸涸、鼓鑄重費、楮券弊深、洩于邊境、而法不嚴、壞爲器用、而官不問。若立用銅之罪、重于銷銅之人、居官而使入爲器用者、坐以贓私罪、則法乃可行。論捕酒之害、則曰、民戶遭劫盜者、猶有官司可告、盜既不敢肆毒、鄰里亦得救應。今捕酒者、空人之家、鄰里至前、則誣以拒捕、官司不復明白、則是捕酒之暴、甚于劫盜也。殺人者、罪止一身、而老幼自若。今一遇捕酒、舉家拘繫、非法受苦、則是犯酒之罪、重于殺人也。大率公之論事、皆深切著明、考究詳備。玉音嘉獎、嘗曰、卿前後所言、皆今日可行之事、臣僚所未及。一一付外。雖議有不

同、不盡見諸施用、亦有遂著之甲令者。五年、再爲參詳官。四月、除權刑部侍郎兼侍講、職于秋官二年餘。孝宗垂意刑章、哀矜庶獄、公乞重修法令、謂中興之初、首立詳定一司、自建炎四年六月以前、著爲紹興法。今四十年、多編集監學、貢舉、常平、茶鹽等一司之法、而一代條章、因革損益、迄無成書。敕局官多吏繁、俸優賞厚、因減冗官、遽行廢罷、舉數十年之法、一切不省。建炎以後、續降指揮二萬餘條、若不刪其繁重、定其當否、有司率用新制、而棄舊法、日移月改、輕重舛牾、無所遵承、使舞文之吏、時出而用之、以售其姦。及今不爲、久益難攷。乞明詔盡行編纂、命大臣典領、而選廷臣討論、庶幾筆削必當、以杜吏姦、以一民聽。上極以爲然、即令條具、仍差大理二卿、本部三郎官、寺丞、司直各一員。公遂兼重修敕令詳定官。此四年之冬也。他官去留不一、惟公疚心修定、以爲己任、推舉詳明、通練之士、以自佐、訪求舊吏、網羅故牘。若一

司一路專法、不係海行者即釐送之。一時申嚴、或雖係續降、尋即衝改者即刪去之。于見行法中增損元文五百七十四條、帶修創立者三百六十一、全刪舊文八十三、存留照用者百二十有八。墨書舊文、朱書新條。年餘書成、進書之奏、公所草也。謂將前後續降參以累朝法意、酌以四方人情、攷訂編入。各有看詳案冊、明言去取之因、而例不以頒降。欲申敕有司、凡州縣于新書有所未曉、許條具申所、當以元修因依行下。孝宗取進本列于選德殿之左右、朝夕觀覽。嘗宣問所疑、隨即奏對。上又取條冊指問、與所奏俱合、嘉賞再三。曰、文字繁拏、不易盡記。留意所職、乃至于此。對曰、此法將與天下共之、況屢承宣諭、敢不盡心。他日又問如初、遂亟稱于宰執。有忌公者遽入譖言、賴聖明不以爲信。爾後屢更修定、今凡再易矣。其規畫大率循公之舊、而精力不能逮也。上又嘗問本職事、刑罰黜陟豈無過差、公因奏溫台大水、郡不以聞、

使之具析。以守臣王之望嘗爲執政、陳巖肖爲從官、特免違慢之劾。乃移罪二漕、各降一官。上云、亦覺未是、待作一名目改正。公又奏、知其未是、當明以示衆。若別作緣故、則前失仍在、不若徑改之。有旨改正。又奏、知信州趙師嚴補羅前政所虧常平米方及半而坐擅用、鑄兩秩、永不得任親民。提舉李庚已嘗申明送饒州取勘、亦以不行。檢察坐之、且不得與監司。雖欲示警、而皆不當其罪。案上、皆得追改前命。辯台民楊大任匿盜、而能告捕、不應坐以越訴、即依條給賞、仍免其罪。論一案推結之法屢變、會問無期、獄訟淹延、即令別行立法。時尙書周公執羔、韓公元吉、樞密劉公珙以強盜率不處死、無所懲艾。侍郎林公栗爲右司、謂今之強盜非親下手已殺人者、類皆不死、請依太祖舊法、賊滿三貫者皆斬。公恐遂行、曰、此吾職也。遂具奏曰、強盜豈可恕。用舊法而痛懲之、何爲不可。惟是天聖、景祐、宣和以來、益用中典、太上與民更



始非以刃殺人者一切貸死、遠近歸心。循襲既久、浸失禁姦之意。今已議爲法六項、犯者依法處斷、非此而但得財、惟再犯者死、可謂寬嚴適中矣。此輩雖愚、豈無黠者爲謀、知有可生之路、志在得財而已。所全尙多。若不分首從、雖不殺傷、悉皆抵死、則凡得財鮮不及三貫者、此法既立、未必能禁其爲盜。彼先以死自處、則被盜者將無噍類、爲盜者無復全人。究其極而計之、死者益衆矣。陳公良祐爲諫議大夫、請取案例。公以見定一案聞奏、用六項法則死者十七人、用見行法則纔四人。若如舊法、則百七人俱死。遂從公議。借吏部尙書爲六年賀金國正旦國信使。歸至盱眙、得印榜云、今後犯強盜竝依祖宗舊法。所有六項指揮更不施行。到闕未及結局、即以不得其職自列求去。上聞其詳、即日復行六項之制。至今遵用焉。有請以大辟奏案如情理可憫、即上朝廷、若情法相當者、止從刑部審覆行下。公以爲既經奏聞、非有司所

得自專、當依舊例擬斷、降旨處分、尤見詳審欽恤之仁。監司按發官吏、不得送置司州軍根勘、紹興之良法也。久而浸紊、爲弊亦多。公申嚴之、使見有違戾者、竝行改送勘院翻異、當究問其詞、具申監司。有詔物價騰踊、以絹定罪者每匹增爲三貫。公乞以錢定罪者亦如之。其明罰敕法、助聖朝好生之德者、未易悉數也。使金之役、權要爲輔行。公在朝累年、于人甚周、而介然有守、未嘗與之通。至是惟議使事相處、亦不爲異。惟不能過爲奉承。事已、又疎之。衆服其裁正、而其人自此不相樂矣。時孝宗方欲經略中原、使回者或承順旨意、過爲大言。公歸、首以爲問、因具陳經行所見聞者。上曰、如卿所言、則未可爲攻取計耶。公頓首曰、誠如聖訓。今日豈可輕動。且須益務內治、以俟機會耳。玉色不悅。公又曰、臣不敢妄論迎合。聞者以爲名言。七月、除權吏部侍郎。九月、兼權尙書、再置敕局、兼詳定一司敕令。先少師嘗爲吏部郎、仕者脫兵

火亡失文書、訴者日集、躬爲辨析、吏不得蔽。建請改官狀五紙之外、許令改舉、聲績卓然。公少親見之、自爲郎、嘗歷三選、以至長貳、清通簡要、兼古人之長、建明尤多、率以先德爲法。或曰、今日凡事從窄、非曩時比。蓋有務爲沮抑、號能任怨而至顯用者。公曰、方且鄙之、何忍效尤乎。調官陳詞者多孤寒之人、于此不爲留意、使不得其平、尙謂之銓衡耶。由是鬱者得伸、滯者得速、求者得遂、人人感悅。亦未嘗屈法以從人、其有不可、明以告之、退無所恨。辨宗室及陣亡人女、夫不當在七色之數、乞恩科權官選人願致仕者、請以歷過嶽廟爲考、修正川廣定差之弊、命官被訴、不經勘正者、免關刑寺注籍、以妨差注。縣令臧否、欲俟其任滿奏聞。案後收坐不當之人、止就部檢照、免行下取會。又條列部中留滯節目、附赦施行。皆欲去弊剔蠹、使選法流通、以爲公私之便。中使嘗夜傳旨學士院、袖出資治通鑑一冊、指唐沈既濟論選舉事曰、

今日有無此弊。其說可與不可行。來蚤面對。退即呼燭草奏。既入、先歷陳數項、謂事與今異、弊雖似之、其言則難行。上曰、卿言甚明、更試一言。因奏、正恐言不能盡、曾筆于紙、深夜書寫不謹。上即令展讀、讀畢、不敢留中、退至廡下。又遣宣取、且云、更欲詳觀、可遂留下。宸眷日隆、會當郊特差充鹵簿使。人知枋用有漸、而忌者愈甚。竣事、力求外祠、上亦知之。七年正月、除敷文閣待制、提舉江州太平興國宮。侍從館閣諸公賦詩留題、以餞行色。今石刻存焉。還鄉四月、起知泉州。到郡遇事風生、不勞而辦。郡實瀕海、中有沙洲數萬畝、號平湖、忽爲島夷號毗舍邪者奄至、盡刈所種。他日又登海岸殺略、禽四百餘人、殲其渠魁、餘分配諸郡。初則每遇南風、遣戍爲備、更迭勞擾。公即其地造屋二百間、遣將分屯、軍民皆以爲便、不敢犯境。後左翼軍狃于盜賞、忽又報侵犯、徑捕至庭、自以爲功。公曰、毗舍邪面目如漆、黥涅不辨。此其人服飾俱不



類何耶。察之、乃真臘大商四舟俱行、其二已到、餘二舟以疑似被誣。公驗其物貨什器信然、軍人猶譏譌不已、公諭其將曰、使真是寇賊、固不應縱捨。既知其爲商旅、又豈得陷以深文。始皆退聽、即使盡入來遠驛、所販黃蠟、償以官錢、命牙僧旬日間遣行。軍屯城外、有入盜庫銀者、踰垣而出、爲邏者所偵、反執而歸、誣以爲盜而上之郡。公已得其情、仍械邏者、使參對。失銀十二錠、得十而遺其二、主將辯數甚苦、公不爲動。已而軍士首伏、即其所窖取之、皆伏辜。微公明察善處、則俱失其情矣。蕃商雜處民間、而舊法與郡人爭鬪、非至折傷、皆用其國俗、以牛贖罪、浸亦難制。公號于衆曰、安有中國而用夷俗者。苟至吾前、當依法治之。始有所憚、無敢鬪者。三佛齊請就郡鑄銅瓦三萬片、舶司得旨、令泉廣二州守臣監造付之。公上疏極論其不可、既犯中國之禁、又爲外夷所役、獨不與。南外宗正司廩給歲廣、久以爲病、公樽節用度、增價

以糴、民始免于苛取。公再歲兩求奉祠、九年、以治行尤異、除敷文閣直學士、再任、賜衣帶。淳熙元年、申前請、始有興國宮之命。歸次延平、除知隆興府兼江南西路安撫使。赴闕奏事、甫入國門、即令引對、臨遣甚寵。江上有篙師謀害主人而據其女、因有資財。女聞公威名、密告縣令。公爲究治、得主人夫婦二屍于神祠之傍、冤始獲伸。吉民王氏雄于財、怒武尉之不容、冒佃官地、誣訴于州。尉不屈、夜歸、過其門、使人折其足、事達帥憲。公同奏其事、且謂父子皆以貲得官、恐從末減、無以懲姦、乞先除其名。孝宗閱奏震怒、徑下所勘建昌軍、皆黥配嶺海、併坐推吏之受賕者。江右無不快之。五月、茶寇賴文政等起湖北、自湖南向江西。帥司即令境上防託。江西所恃惟贛、吉將兵亟遣未及而賊已入境、與吉兵遇、一使臣死之。以湖南曾筠官軍至此又小勝、止爲逃死之計、遂據禾山洞。公遣副總管賈和仲總數州之兵以討之。和仲老將、意

頗輕敵、或已議其狠復難任、然兵官無踰此人者。未及出門而得旨、果以委之。主帥調發而箠牧領兵職也、武人謂朝廷專委、凡事浸不相關。一到賊壘、暮夜驅迫將士入山、反爲所覆、不可復用。又遽遣約降、至折箭爲誓、人知其爲詐而不寤。賊立旗幟爲疑兵、由鳥道竄去、兩日而後知之。六月初、有旨湖南令帥臣王炎節制、如已入江西、即令賈和仲統率四路人馬討捕。是時猶未委公、及和仲輕舉妄發、將兵已潰、賊勢日張、則乞就委江州都統制。月末始得金字牌、令公節制。大暑中、兼程而進。洪至吉七百里、勢不相及。賊亡命習險阻、常隱叢薄間、弓矢所不及。官兵驅逐、接戰十餘、殺傷相當、多猝遇于敵隘之處、交鋒者不過數人、餘已遁去、不知蹤跡。使荷戈被甲之士與之追逐、雖欲列陣併力、有所不可。既逐入廣、而又復回。初就招安、列六百餘人、後止餘百輩、則知所喪已多。勢既已窮、而有許拔身自首指揮。間有禽獲者、亦言

本非兇逆、若開其生路、必來降矣。遂以小榜具載指揮、募人入賊。賊云、望此久矣。苟得曉事文官來、即當隨往。提刑辛棄疾同議遣士人借補以行、而公已罷、盡復逃去。未幾、興國尉黃倬請行、正合前說、遂降。公初以和仲敗事自劾、降龍圖閣待制。會有爲和仲地者、又降集英殿修撰。後帥既以僞功受賞、公遂落職、南康軍居住。至四年自便。十二年、始得外祠。十三年、高宗慶霽、復龍圖閣待制。十四年、再奉祠。十六年、提舉鳳翔府上清太平宮。紹熙改元、盡復舊職。二年、致仕。兩朝即位之初、皆有詔求言、上又賜詔書撫問、賜銀合茶藥。公退閒既久、無復用世、拳拳憂國、終不弭忘。疏論天下事各數千言。慶元五年十一月、朝家優老、特除敷文閣學士、賜衣帶鞍馬。六年秋初感疾。七月庚辰、薨于正寢。遺奏上、贈四官、官一子。娶樓氏、封碩人。先二十七年卒于隆興。男三人、端中、奉議郎、兩浙西路提舉常平司幹辦公事。立中、宣教郎、知婺州



武義縣丞、沿檄歸省、弗可久留、方將丐祠就養、而公亡矣。蟻中將以遺恩補官。女四人、三蚤夭、一適奉議郎、知福州永福縣事樓鏐。孫男四人、之翰承奉郎、監嘉興府華亭縣市舶務。之幹之輔、之範、碩人以淳熙五年葬于慈谿縣石臺鄉龍潭之原、諸孤將以十二月丙申奉公之柩合焉、禮也。嗚呼、公之爲人、幾于全矣。少而孝弟、稱于鄉黨、長而聲譽振于場屋、入仕則公勤廉恕、施惠于民、立朝則忠諒精白、結知于君、用雖不盡、退而居鄉、高誼特達、四明素爲義郡、至公而忠厚之風益盛焉。天性樂易、于人無不容、而風裁自高、截然有不可犯者。其在朝行、史文惠公有同年之好。錢公知獎最深、魏成公少小相處如兄弟、蔣丞相同爲宮僚、王侍御伯庠寔爲姻家、前後同時。公樂于平進、旣無附炎之迹、又不涉于指議。公精敏而寬和、處事有體。其在禁路、尤爲梁文靖公、陳正獻公及今少傅周益公所知。惟虞雍公與史、魏、錢三公不咸、雅

不相樂、徐而避之。孝宗察見隱微、幸保終始。方龍曾鼎貴、一時諸公不事孫劉者蓋寡。龍在閣門、聞諭德之除、亟稱以爲當。有史官坐中問曰、亦與之熟耶。龍曰、在此未嘗往來。某少爲三衢兵官、只見人說江山、汪縣尉之賢、如出一口。聞者益以此服公之介。曾向有簡驩之嫌、隆興之屢貶、南康之久謫、旣歸而八年不得祠、多其力也。時碩人未葬、豈不念歸。史公風公通書修好、謂求進則不可不爾、恐梗歸計。公歎曰、若能爲此、前必不致相失。竟達空函、貽羞千載。老矣、一聽天命耳。後得善脫、史公深歎美此節、每以語人、謂不可及。南康之行、親戚恐公未免撓懷、或致摧沮。公方挹送行者曰、使某年近六十以恩科得官、今赴星子一尉、豈不爲我賀。其曠達類此。旣至、樂廬山之勝、杖履徜徉、登臨自適、若將終身者。借書郡庠、益沈酣于史冊、上下數千載興亡大概、下至稗官小說、罔不該究。塗中和淵明歸去來辭、平易精切、視前輩無媿

佳處或出其上。遇觴客則使歌之。王魯公謂公不求復用、公聞之曰、求之廟堂而辭之君父、非自欺乎。既登七十、即抗章引年、求致其事、朝論以爲高。又予之祠、再申力請。其後諸公相繼得謝、遂爲清時美事實。自公發之、尙書鄭公丙貽書曰、公少某二歲、先吾著鞭矣。始少師以深仁厚義稱于世、嘗曰、事事上行方便、物物上有利益、此吾志也。公又能推廣之。少師奉先塋素謹、公之葬二親、皆力貧襄事、規樞宏大、纖悉周備、鄉人視以爲式。既畢、窀穸假貸經營、久而冢舍方就。廬居終喪、拜埽之外、諱曰必親薦羞于山間。南城祖隴、外家王氏奉川諸墳、一一經理、可爲永久。三妹尙幼、竭力嫁遣、俱得所歸。聚族浸衆、闢先廬房宇百餘楹、皆身任之。內外百口、獨當家務、出私財以佐用者二十餘年。凡公所得、盡爲諸院公費、又以及女弟之貧者。二外孫既孤、收養至今。官賦輸送皆親爲之、不以累兄弟。又得整辦、無一金之負。少師既任諸

子、晚歲一以及伯氏長子行中、次當及公位、以伯氏子衆、推以與次子積中、尋又奏其二子得中、稽中、又及季弟江州之子敏中。既拘限員、將復與叔弟之子闡中而不果、然終念之。厥後江州沿公之意、命以一官、甚愜初志、而公之孫今尙有白丁焉。兩宮聖節、非有疾未嘗謁告。子弟之已仕者、必使之俱行、曰、汝曹世受國恩、終歲閒處、獨不能以頃刻之勞效後天之祝乎。宗黨有急、以公爲歸。產業素薄、僅足自給。納祿之後、用亦浸窘。隨力周施、嫁人之孤女、葬貧者之喪、不知其幾。叙宗盟及累世外門姻黨、宗派條列、號興仁錄、以遺子孫、使之不替親好。豫營美櫬、嘗輟以予人。至于再三無靳色。家有一池、鄰里來汲、每歎曰、安得有財如水、以濟人之欲乎。力既不及、遂率鄉之人爲義莊、首割二十餘畝以爲倡、衆皆競勸、至三百畝。又得郡中益以絕產二頃、凡賢士夫之清貧、身後不給者、量多寡周之。買地立莊于城西門之阿、親爲約



束防閑曲盡可謂無窮之利。庠校自兵火草創歲久浸圯勸率巨室且爲之文謂崇釋老之居以徼福不如新夫子之宮以助風化首創儀門聞者不約而趨黌舍一新冠于東南冬至歲旦序拜有規主盟斯事少長以禮推年長者爲學賓遇釋菜則爲祭酒自編于布韋之間以爲一鄉矜式凡里中義事率自公倡之賓客造門必與鈞禮不問遠近必親謝其門性不喜飲而好客觴豆不至過豐而情意周備歲講壽席自爲歌詞皆安分知足之語人多傳誦會者不下百客手自勸酬連夕不厭賤及僮僕無不霑給間赴宴集必盡主人之歡危坐笑談雖達旦不先退眞率之約觴詠琴奕未嘗以爵齒自居此皆終身行之後生之官多以卷軸求教公樂于訓誘隨所職一一以告能行公言者多著能稱眞一代之吏師也成就人固多矣而薦舉非名士不預樞密大資政葉公翥方爲掌故公一見識拔于稠人中尙書錢公象祖侍郎劉

公孝騷史公彌大經略潘公時屯田鄭公鏐簽判沈公銖皆卓然者其他汲引光顯于中外有知人之稱晚更篤學如少年書生有適齋存藁二十冊觀書手抄曰適齋備忘十七冊取唐宋名公詩集編爲詩韻四十冊又有漫錄訓鑑等書端中等方會粹俟他日鋟木以傳今藏于家鏐曾祖金紫娶翁氏公祖母陳氏翁陳出也兩家少師爲表兄弟行又甚相好先君工部遂締姻焉公之碩人又鏐從伯父之女交婚至今如朱陳然先君依甥館鏐輩生長外家蒙外祖教育之賜事諸舅如諸父受知于公尤深且久公爲禮部秘監時鏐留侍側護客使金皆許侍行晚而僥倖與表兄華文閣直學士陳公居仁繼登從班居素切鄰公旣謝事而鏐得奉祠六年之間有行必從有唱必和徒步往來殆無虛時劇談傾倒其樂無涯去歲老母年九十公少十歲鄉閭合慶元夕之後簫鼓相聞暮春方止歲晚公旣爲眞學士老母亦進封信安

郡太夫人。郡奉詔旨均致粟帛羊酒之賜皆爲一時之盛。平時慕白樂天之爲人。仕俱至尙書。白以五十八歸休。猶一出爲京尹。公之歸又先二年。而壽過之。以適名齋。宜靜名室。畫履道宅圖于屏。且書池上等篇于其顏。後又易以無可奈何之歌。詩造平淡。能道人情曲折。和達哉。樂天行等篇。置之集中。殆莫能辨也。鑰嘗與公同閱石林避暑錄話。論樂天事甚詳。公歷言出處大槩。慨然而歎。謂吾非敢追配古人。而大略偶似之。鑰遂錄于冊。益公見之。賦詩甚工。以公比樂天尤切。公曰。雖不敢當。然足爲不朽之榮矣。遂襲石竄適齋中。公既有疾。時問安否。一日奉版輿過公。笑語竟日。不見少異。纔隔再宿。有報公之疾變者。亟走牀下。則已不可爲矣。藥石禳禳。皆所不及。嗚呼。公豈厭塵世而徑仙耶。何去之速也。內行修飾。名節純全。壽考令終。幾無可憾。惟仙風道骨。必謂上壽禍起非意。最爲驚痛。聞公之亡者。無問貴賤大小。駭怛赴

弔。相向而哭。俱爲盡哀。鄉之達尊。郡太守而下。至庠校之士。相與設奠而寓哀于文。皆盛德之感也。鑰痛徹肺肝。固已不堪。若太夫人之悲慟。架不忍聞。行道之人所共歎也。諸孤以葬日迫近。未遑求銘于當世。儒宗。俾鑰叙次行事。竊自維。念愛我撫我。莫如吾舅。而知舅之詳者。亦莫如鑰。公之名位至此。小官時事不必屢書。痛惟侍坐之次。公歷言入仕之初。以至通顯。凡經區處者。歲月姓名一一不忘。聞見所及。旣不可勝書。謹擇其可法者備載之。不嫌于詳也。他日定謚法。秉史筆者。庶有取于斯焉。謹狀。

樓鑰撰 《攻媿集》卷八八

敷文閣直學士宣奉大夫贈特進汪公大猷

神道碑

子夏曰。死生有命。富貴在天。是謂格言。雖然。仁者多壽。賢者多貴。則有人事參焉。今敷文閣直學士汪公年開九帙。官職階①三品。爵二品。殆仁賢之驗也。公



諱大猷、字仲嘉、慶元府鄞縣人。曾祖元吉、以廉平吏受知范文正、王文公。妣何氏。祖洙、號儒先、本州助教。贈正奉大夫。妣碩人陳氏。父思溫、歷兩浙轉運副使、太府少卿、終左朝議大夫、直顯謨閣、累贈少師。妣越國夫人王氏。四子、公其仲也。四歲對客誦孝經、止十七章、或問末章、以具慶對、客異之。八九歲述先生口義、示同舍、十餘歲賦詩可觀。紹興七年、少師遇宗祀、奏補將仕郎、起家右迪功郎、衢州江山尉。十五年登進士乙科。夏大水、括鹽舟濟避溺者、又發廩爲糜食之。州符捕來暮鄉魔賊、公曰、賊有無、尉豈不知。第呼菜食、一二人杖遣之。監司交薦、陞左從事郎、移婺州金華丞、與民期限必信、人亦信之。豪族陸氏爭產久不決、公曉以恩義、悅服而退。戶部侍郎李椿年行經界法、量田不實、罪至徒流、檄公覆視龍遊縣。公曰、法峻民未喻、固有田少而供多者、願許首復改正。又謂每保各圖頃畝林塘、十保各一大圖、用紙二百番、安

所展視。李聽其言、輕刑省費爲多。二十年丁內艱。二十三年再承嚴州建德、用舉主改左宣教郎、知平江府崑山縣。未上、丁外艱。二十九年、辟顯仁皇后攢宮屬官、訖事爲淮西江東軍馬錢糧所幹辦公事。三十二年、孝宗受禪、自左奉議郎轉承議郎、賜服緋銀、入幹辦行在諸司糧料院。隆興二年、虜寇邊、錢簡肅公端禮宣諭淮東、辟幹辦公事。遷大宗正丞、升參議官、歷左朝奉、朝散郎。錢公執政、乾道元年兼侍左郎官、又兼戶部右曹。六月輪對、乞覈名實、責任臣下、量能授官、毋違所長。擢禮部員外郎、仍兼侍右。九月遷尙左郎官。莊文太子受冊、兼左諭德、仍侍講。二年省試、充參詳官。六月遷秘書少監、首率館職續編國朝會要、高宗聖政成書、轉左朝請郎。三年假吏部尙書、接送伴金國賀正旦使。四年兼權刑部侍郎、又兼崇政殿說書。夜直數^②。宣對、會遣御史決獄畿縣、公言其擾、請委倅貳。台民楊大任縛所藏盜赴朝希賞、政府

疑之。公曰：舍匿罪未發，而能慕賞執賊，若坐以赴訴，無復告捕者矣。上皆然之。宰相言：太祖朝強盜不分首從，不問殺傷，併贓滿三貫者死。景祐敕增至五貫，固已從寬。今設六項法，非手刃人例，奏裁黥配，何所懲艾？請從舊法。詔侍從臺諫集議。公言：賊知必死，將甘心於被盜之家，故稍開其生路。後遂不改。暫權給事中。公以中興條法已四十年，積續降二萬餘條，乞從刪定。詔委刑部大理長貳及僚屬掌其事，而以公兼重修敕令詳定官。五年再參詳省試，轉左朝奉、朝散大夫。四月，正除權刑部侍郎，兼侍講。上諭公曰：既爲侍從，天下事皆可論。朕每厭宦官、宮妾之言，故數延見經筵官。自今朝政闕失，民情利病，勿惜盡言。公奏：前後臣僚論事衆矣，未嘗簿錄，何以考其行否？宗室非嶽祠則員外置，雜官及歸正官多不釐務，何以顯其才能？兩淮多曠土，宜置力田科，募江浙富民，自以耕夫牛種開荒，苟有成效，特補官。凡配隸人亦聽

授田雜耕。又言：贓吏及囊橐盜賊者，財產沒官可也。若倉庫綱運欠折而無弊，責償苟足，合歸其業，不應斥賣或賜勳戚。州縣私立稅場，擾及行旅，鄉坊捕酒如治大辟，宜加禁止。上嘉獎曰：卿所陳皆可行，有用之才也。選充金國賀正旦國信使。六年使回，轉左朝請大夫。上方經略中原，將命者多從與之說。上以諗公。公曰：虜法簡嚴，上曰：未可圖耶。公頓首曰：誠如聖訓。姑修人事，以俟天應。閏五月，兼權吏部侍郎，進續會要，轉左朝議大夫。六月，改權吏部侍郎，尋兼尙書，轉左中奉大夫。十一月，敕令格式進書，增損元文五百七十四，帶修創立三百六十一，刪八十三，留以照用者百二十有八，公用力爲多。轉左中奉大夫。上嘗問黜陟卿職者有過差否。公言：溫、台水災，守臣王之望、陳巖肖以前執政從官犯罪，而二漕削官。知信州趙師嚴補前守，移兌常平米，反以擅用鑄秩，毋得親民。提舉官李庚已付鄰郡推治，乃坐不檢察罷，勿與



監司。上並許改正。公蚤侍少師郎銓曹耳熟精通。暨歷三選。力破有司從窄之論。迨兼長貳。益得行志。士大夫鬱滯頓伸。法或不可明以告之。辨宗室及陣亡人女。夫奏薦不當入七色恩科。選人乞休致許用獄。廟歲月例權入官之考。命官公過非經勘正勿關刑寺注簿。凡案後收坐者就部原赦結絕。存心之仁類此。上下翕然賢之。郊禋差五使。宰執不備。特命公充鹵簿使。有忌之者。禮成不自安。請去。七年正月。除敷文閣待制。提舉江州太平興國宮。侍從館閣分韻賦詩以餞。四月。起知泉州。海中大洲號平湖。邦人就植粟麥麻豆^③。有毗舍耶蠻揚颿奄至。肌體漆黑。語言不通。種植皆爲所穫。調兵逐捕。則入水持其舟。已而俘民爲鄉導。劫掠近城赤嶼洲。於是春夏遣戍。秋暮始歸。勞費不貲。公即其地造屋二百區。留屯水軍。蠻不復來。久之。戍將貪功。妄捕眞臘大商兩舟至庭。公辨而遣之。左翼軍列寨郊外。軍人夜踰城盜庫金。爲

邏卒所執。反誣卒爲盜。公得其實。主將懼罪爭辨。公畀軍中自治之。舊例蕃商與華人鬩。非折傷聽贖。公曰。旣在吾境。當用吾法。爭鬪用稀。詔許三佛齊寄銅造瓦。公奏。在法銅不下海。且中國方禁銷鑄。奈何爲小夷所役。卒不與。閩地狹田少。歲藉廣米。每患客舟不時至。公籍上戶航海者。出錢數萬緡貸之。使糴於五羊。比歸。損價以糴。官收其本。子與其人。南外宗子初纔數房。久益蕃衍。舊廩給不足。而僧^④田多戶絕。豪右增租爭佃。公諭見佃人。若受所增最高之數。歲以輸官。聽如其舊。佃戶樂從。宗子月給遂足。九年。進敷文閣直學士。再任。就賜衣帶。淳熙元年。轉太中大夫。請祠。六月。再提舉興國宮。江西謀帥。道隆興府。赴闕。臨遣甚寵。吉州龍泉縣豪民王氏父子鬻爵。怒武尉驗田不如欲。集惡少狙擊折足。州不能治。移鞫傍郡。猶不承。公與諸司具奏。決配嶺南。人皆快之。二年。湖北茶寇賴文政轉剽湖南。入江西。據永新禾山洞。

公遣宿將賈和仲帥師討之、和仲輕敵敗衄。六月、詔公節制軍馬。賊短兵輕甲、一晝夜馳山谷二百里、官軍困追逐、公曰、技有長短、不可強也。分兵遮列、賊蹙欲降、公與提刑辛棄疾議遣興國尉黃倬持檄招諭。而公先自劾和仲喪師、七月降龍圖閣待制、又降集英殿修撰、罷帥事。十月落職、南康軍居住。而賊迄就降、誅之。始公使北、曾覲爲介、頗疑簡驩、至是亦下石逞憾云。再期方許自便。後八年、乃提舉興國宮。十三年德壽慶典、遷龍圖閣待制、轉通議大夫、明年再任。十六年正月、改鳳翔府上清太平宮。光宗覃恩、轉通奉大夫。紹熙元年、復敷文閣直學士。十二月磨勘正議大夫。二年、以正奉大夫致仕。今上即位、遷宣奉大夫。詔書求言、仍賜銀合茶藥。慶元五年冬、優禮老臣、特加學士、賜衣帶鞍馬。六年七月庚辰、以疾薨、年八十一。遺奏聞、贈特進、妻碩人同郡樓氏、先二十七卒。三子、端中、奉議郎、兩浙西路提舉常平司幹辦

公事、賜緋魚袋。立中、宣教郎、知婺州武義縣丞。儀中、受遺澤。四女、三蚤夭、一適奉議郎、知福州永福縣樓鏐、再適修武郎、東南第六副將趙善琮。孫男四人、之翰、承奉郎、監嘉興府華亭縣市舶務。之榦、之輔、之範。孫女七人、長適迪功郎、新臨安府臨安縣尉裘得宜。次適沈楷、通仕郎趙鑄、王元恭。餘未行。曾孫女二人。先是碩人葬慈溪縣石臺鄉龍潭之原。十二月丙申、公合葬焉。爵自奉化縣開國男、積封本郡公、食邑通二千五百戶、實封百戶。公立朝盡心職業、深爲孝宗所知。雖與史丞相浩同里同年、魏丞相杞少相從、蔣丞相芾並爲儲僚、而公恬於進取、一無附麗。中間謫南康、有唁公者、公笑曰、某年踰五十、若以恩科入官、得尉星子、不賀我乎。客聞歎服。杖履往來廬山、和陶令歸去來詞、觴客則歌之。還鄉十五年、踰七十即納祿。又十年、兩值登極、應詔陳治道各數千言。八十被優異之恩、女兄樓夫人長公十歲、亦封郡夫人。兩家



賀賓盈門、燕集者累月、士大夫榮之。少師天資仁厚、常曰、事事方便、物物利益、是吾志也。公推廣力行、始終不怠。葬少師後、析常產遺兄弟、公以四之一獨任百費、竭力營冢舍、有餘亟作、無則暫輟、閱再期乃成。女弟三人、俱得所歸。遇大禮三蔭其姪、今諸孫尙白丁。性樂施、宗姻緩急皆歸之。著興仁錄示子孫。四明風素厚、公割田二十畝、創立義莊、欣慕者衆、積至三頃。郡守林大中助以絕產二頃、擇鄉官主之。遇士族清貧者家有吉凶、各爲限制、隨事白郡。郡下莊第給、遂爲無窮之利。府學當葺、公自任儀門、又爲文勸有力者、不日而新。冬至元日、集鄉士行禮大成殿下、退序拜明倫堂。歲講鄉飲、推長者祭酒、自齒韋布之列。凡里中義事、悉爲主盟。不喜飲而喜延客、座上常滿、各得其歡心。平居慕白樂天爲人、年六十即退閑、以適名齋、宜靜名室。時作歌詩、平澹造理、從容二十有五年、庶幾樂天之出處、壽則過之。立朝好延譽後進、

識樞密葉公翥於掌故之中、交游如錢尙書象祖、劉侍郎孝驥、史待制彌大、都司潘時、屯田鄭鏐、簽判沈銖、推揚汲引、惟恐不及。晚尤篤學、抄書如少年。有適齋存稿二十卷、備忘十七編、唐宋名公詩韻四十編、并漫錄、訓鑑等書、藏於家。予昔與公同朝相好也、去夏書未酬、聞公訃、諸孤遠求隧道之碑、而翰林尙書樓公鑰復示公行實、且曰、吾母年將期頤、哭弟不勝哀、況於其甥。願賜之銘、以慰存沒。乃爲銘曰、惟古賢者、匪懈爲仁。衆欲汎愛、均焉無貧。猗歟汪公、後已先人。俶佐三邑、已勤利民。翔於禁塗、謀告力陳。司寇枉直、典銓滯伸。苟可澤物、心無疏親。歸哉二紀、壽社交臻。肆推緒餘、施及鄉鄰。旣昌其詩、亦榮其身。仰止香山、逝將擬倫。刻銘豐碑、永世弗湮。

周必大撰 《平園續稿》卷二七

校記

①階：原作「皆」，據傳增湘校本《廬陵周益國文忠公集》

改。

②數：原無，據右引補。

③豆：原無，據右引補。

④「僧」上原有「主」字，據右引刪。

⑤熙：原作「興」，據四庫本《文忠集》改。

⑥潘時：原作「潘時」，據右引改。潘時，金華人，淳熙中

曾爲左司郎官，見《會稽續志》卷五。「都司」即左右司郎官之別稱。

宋儒碑傳集卷一百二十三

袁章 張淳 謝諤 趙彥端 鄭丙

叔父承議郎通判常德府行狀

公諱章字叔平慶元鄞人曾祖諱穀左朝奉大夫知處州贈光祿大夫妣永嘉郡夫人葉氏祖諱灼左朝議大夫尚書倉部郎中妣恭人石氏考諱垌以公升朝累贈朝奉郎妣安人林氏倉部守隨朝奉祈子于大洪山之神夢與二子是歲生某之先君明年從倉部官京師而公生焉公天資雋敏十歲徧誦五經十二能賦翹然秀出奇童之譽籍甚而嚴重靜深不苟言笑識者知其偉器朝奉志尚高潔恬於榮利惟教子是急金先生彥博模範一鄉俾公受業日偵伺顏色惟恐毫髮不當其意未有室家爲之聘娶餉遺無虛日公承親志愈自刻苦日不足繼以夜隱几而寐覺復誦書聞者異之曰是固未嘗寢耶居庭闈間婉容愉色無纖芥子弟之過一日燕語偶字姊婿朝奉

曰姊婿尊行也奈何字之自此未嘗語及其字執喪哀毀幾於滅性火熱其體曾莫之知其篤孝如是旣冠志氣彌強從李莫二先生質疑請益聞見日廣諸經皆通大義尤邃於書入太學交友皆英俊有司程其藝能屢爲之最公試高等其選甚艱嘗再得雋焉自秦丞相柄朝諱言程氏學士以雕琢靡麗相高公介於其間人所不嗜日嚙嚙之時見謂樸學戰或不和利公持之不變退而授徒於鄉以所學淑後進開明良心消釋鄙倍從游者日盛里中推爲碩師年幾五十未脫韋布磨礪不倦尚書汪公應辰以鴻儒領貢舉取士先本實後詞藝公始得在選中遂登乾道五年進士第左迪功郎紹興府諸暨縣主簿始至講求利害見其封畛廣戶口衆而怪其征科之難也悉索累年簿書考校其實而置諸廳事多寡強弱官有定賦而有田者不得不輸雖老姦巨猾無敢復爲欺者傳之後人遂爲經久之利用舉主關陞從政郎爲



儒藏

泰州州學教授。秩滿、教授和州。淮俗安於故習、知學者鮮、庠序雖設、視爲遊戲之地、羣焉而食、旣食而出、以爲常。公曰、士豈有不可教者。每旦入學、招諸生勉以進修、毋自棄暴、訓之以禮義之大經、聖賢之旨趣、陶染濯熏、善端旣開矣、則又束以規矩、出入必時、課試如式、所以防其放逸者、具有條目。有來見者、不以蚤暮寒暑、從容延接、隨叩而鳴、如一家中父子兄弟、款密無間、時人以爲眞能任職。高宗慶壽及光宗登極恩、再循儒林郎、用薦者改通直郎、簽書南康軍判官廳公事。郡事清簡、號稱道院、而朝夕勤勤、不敢以無事處。若振窮民、懲猾吏、蠲逋負、療疫疾、一時善政、力贊其長、如恐不及。僚吏有善、極口延譽、若自己出。有過、委曲覆護、冀其感悟。守有長於治郡、以能吏稱者、人少合其意、于公獨心服。時就見之、旣還朝、語中都士大夫曰、吾之爲郡、得賢者佐之爾。問其人、以公對、由此名重朝廷。皇上踐阼、轉奉議郎、祀明堂、賜緋

衣銀魚、主管台州崇道觀、再任。踰年、通判常德府、待次於鄉。年登上壽、精明不衰、晨起整衣冠、熟復周易一卦、折輩行與賢士交、講明立身之要、日進不止。每與人曰、吾以貧故、愧未納祿、可亟望爲郡耶。將申祠請、藁具而屬疾。彌月弗瘳、遂致其仕、轉承議郎。病且革、神色怡暢、語言自若、略不及家事、晏然而終。實慶元五年十二月二日也。享年八十。娶汪氏、封孺人。二子、燾、熹、皆先卒。孫男二、符、策。女二、適進士戴廩、吳桷。曾孫男二、魯、孫、英。孫。嘉泰元年九月壬申、符等奉其喪葬於慈溪縣西嶼鄉東嶺之原。公於學博、自少至老、未嘗廢書、雖疾病不去手。曰、吾每觀書、不知沈疴之去體也。對賓客無雜言、問古今事、其答如響、有一不知、深自愧怍。嘗從人借書、手自抄之、蠅頭細字、一精謹。洽聞多識、殆少其比。而謙恭自將、與人言如恐傷之。雖幼且賤、一與均禮。書字必楷、小心齋肅。行步卑弱、如不勝衣。晏居危坐、劇暑無惰容。客筆古人



儒藏

格言、日日對之、以自警勵。小有差失、必載之冊、謂之書過。聞人一善、亦手識之、謂之日志。食味不重、衣服不華、小齋容膝、無一長物、几席凝塵、恬弗爲動。忤之而不愠、迫之而不驚、事雖方殷、從容處之、未嘗疾言遽色。如春之溫、如玉之潤、如麒麟鳳凰之爲嘉祥、古所謂德人之容、晬面盎背者、公信有焉。進退窮達、安於義命。海陵將終、更薦書闕下、宗伯許之、剡奏曰、少俟兩月、其可。公曰、來者獨不欲得錄耶。利於己而虧交承之義、吾弗忍也。遂去之。時宰欲處以京局、辭焉。或問其故、曰、吾老矣、能復奔走車塵馬足間耶。常平使者行部南康、亟稱其賢、欲表薦之、固止之、乃已。其靜退類此。臨財亦然、非其義一介不取。居官廉靜、以法不以例、及可以取、可以無取者、未嘗輒受。主郡王公正己、將漕淮南、首以薦牘及之、或問之曰、他人求而不得、此不求而與、何耶。王公曰、吾觀今人宦遊而歸、鮮不買田、而斯人鬻產以自給、廉可知矣。吾是以

推之。里中有冒法抵罪、室廬入官者、公輸錢于郡、既得之矣、其人踵門拜曰、某不幸自速其禍、孥無所歸、願公垂憐。立索橐中錢數萬畀之、無難色。或言歲所入微、宜稍廣基址、公曰、昔人爲仕宦貧、好消息也。吾敢豐殖以自取戾。迄無所增。卒之日、室中蕭然、無以棺斂、質貸而後辦。自擢第至歿、餘三十年、而生理若是。聞其風者、可以自警矣。某年十有五、奉先君命、學於叔父、殷勤教督、不啻己子。自是每見無不傾盡、挹其貌、耳其言、孝弟恭遜之心、油然而生。某之官於越也、貽書語及新功、自謂胸中融融、有無涯之樂。某竊惟耄期稱道不倦、古難其人、而況今乎。他日還鄉、朝夕親炙、庶可少進。此念方切、而公則死矣。藥弗及羞、斂弗及視、晬和之貌、不可復見。丁寧深切之語、不可復聞、痛可勝言哉。葬有日、符等將求銘、屬某叙述其行。某不敢辭、則泣而書之。謹狀。

張忠甫墓誌銘

忠甫爲人嚴重深博、善忍事、鎮物、絕有才智、抑不使出。其氣貌沈沈、偉然丈人也。年方少、連五試禮部、不中、授特奏官。忠甫每自悼不第進士、雖宦達、將不得與文墨議論、亡足以著儒效、遂棄去、以居養其母。儀妻子、是正朋友爲事。蓋晚而學詩書、講誦數年。旣大通風人美刺、與古喪祭上下之交、立教微意、以爲天下國家可推此而理。此孔門之所教而傳也。益負其學、自刻苦貴愛。或言諸朝祿以監獄、忠甫謂徒費縣官亡誼、歷三任不食其祿、亦不書考。執母夫人黃氏之喪、自飯含至于旣窆、凡所以誠信其親者、自括髮至于旣祥、凡所以哀恫其身者、質諸士喪禮、無不合也。初、忠甫獨追古輩好繩俗、以己學無以寓見、則時時爲文章。銘人父祖、有諷有勸、皆不虛書。於族姻之喪、爲之治衣衾棺竈、絀巫佛、強其爲此、禁其爲彼、人頗謂怪。至交口哂罵之。忠甫說甚長、而未之服予也。

及見其躬行、極人之所難、然後翕然加敬、尊信其說、有從之者。雖不從者、亦內愧莫之敢議也。然而忠甫之言曰、吾生不免爲今人、吾行豈敢爲古人。吾於閭里後進、隨和唯諾、一若庸庸然、吾何賢哉。嗚呼、忠甫蓋已顧避眦勉如此、猶久而後與鄉人合、使盡己有耶、人必且大怪、宜愈難合。使得其位施行之、則必怪之者愈衆、亦愈流落不偶、不得其志。故忠甫一意忍窮以死、而非其釋然不屑於世也。忠甫與其友薛士龍、鄭景望齊名於時、而二人皆仕矣。士龍一見人主、語意合且大用、而爲政者不悅、去之以卒。景望三入朝、二十餘年、其卒也位不過九卿。二人嘗勉忠甫仕、忠甫不應、久之而道不行、功業不就也、則未嘗不壯忠甫之決、而推遜其高。嗚呼、是可謂之賢歟。忠甫諱淳、姓張氏、世永嘉人。曾祖某、祖某、父某。娶潘氏、休寧丞蔚之女。年六十有一、以歲之元日卒。以其年十有一年乙酉祔葬于吹臺鄉桐嶼黃夫人之兆。實淳

熙八年也。二子凡几。三女適袁州州學教授潘宇。進士劉嗣僖。廬趨將葬。潘氏曰。吾夫子之友。惟陳君在。且余家壻。銘夫子無以易君者。然則某其可辭。銘曰。勇避而不趨。人以爲爲異也。愁苦以行之。人以爲爲利也。我師古人。孰今不棄也。猶有鬼神。歿其寧于地也。

陳傅良撰 《止齋先生文集》卷四七

朝議大夫工部尙書贈通議大夫謝諤神道

碑

孝宗皇帝知人善任使。每擇恬靜正大之臣爲諫官。御史而宿其業。常曰。學術正則議論正。議論正則是非公。必不修睚眦之怨。訐曖昧之過。厥有大姦大佞。爲時指名。則仁者之勇。其肯舍諸。彼徒以擊搏爲能。指摘細故。豪強未必鋤。善類或被害矣。某久侍左右。熟聞聖訓。今觀故煥章閣直學士謝公舉世稱爲君子長者。其問學淹貫。內宜爲儒林之官。忠信慈惠。外

當付以民社。然自監察進殿中。歷侍御史。遂拜右諫議大夫。以遺光宗。爲御史中丞。六七年間。陳善閉邪。遏惡揚善。如漢孝文時。議論寬厚。恥言人過失。化行天下。此孝宗用公大意也。公諱諤。字昌國。臨江軍新喻縣人。其先叔方。唐初爲洪州都督。因家高安。元和中。有名華者。徙居新淦。十世孫懋。及其季子岐。舉廉。世充。元豐八年。同榜登科。號臨江四謝。舉廉字民師。蘇文忠公嘗與書論文。即公四世伯祖也。曾祖臻。祖誠。俱有隱德。世居新淦。父革。修身樂道。號清風老人。大觀中。始徙新喻。以公貴。贈中大夫。母胡氏。贈淑人。公幼敏慧。愿慤。日誦書千言。爲文立成。紹興二十七年。第進士。以左迪功郎調峽州夷陵縣主簿。未至。撫之樂安多盜。監司檄公攝尉。公條二十策。大要使其徒相糾。而以信賞隨之。群盜果解散。三十一年。至夷陵。適金虜渝平。諸軍往來境上。選行縣事。有治辦聲。三十二年。覃恩。循左修職郎。用舉者升左從政郎。移



儒藏

吉州錄事參軍。囚死給樸自公始。陳氏訴其僮竊財匿民家、辭頗過實、帥龔公茂良欲坐以罪。公列其不然。帥由是知公。乾道四年、廬陵艱食、饑民萬餘守譙門求振廩、官吏失措。公亟植五色旗、分部給糶、頃刻而定。其後江西再旱、帥命攝屬徧走郡邑、凡用粟百萬斛而戶口獲濟者百萬。蓋公素以仁民愛物爲心、故任事如此。七年、改左宣教郎、知袁州分宜縣。縣負郡欠十萬緡、公請蠲除於上司。會丁母憂、後令許樞密及之申前說、時公以在言路爲之助、併秀之華亭縣月椿重額皆得減免。淳熙五年、求主管台州崇道觀以便親。明年丁父憂。八年、朝士推薦者多、入幹辦行在諸司糧料院。九年夏、除國子監主簿。十年春、遷太學博士、俄擢監察御史。公素患差役不均、居鄉勸民買田充義役、至是婺處二州偶行之、詔下其法。諸路或以爲疑、公力陳其便。湖州安吉縣稅絹許用粗絲、名曰屑絹、有司請卻之。公言邑旣輸絲、又織綾、夏

稅已重、故相乘除、宜如故。上並從之。十三年九月爲副端、言士大夫習徇慾而背理、習徇私而背公、習貪恣而廢廉謹、習刻薄而鮮寬厚、習汰侈而恥節儉、習輕率而昧詳審、習詐僞而罕真實、習隱蔽而忘忠純、願如成湯制官刑以儆之。十四年、升臺雜、適淮浙夏旱、公條政事十二失、畫賑濟七策。天子嘉納。十月入諫垣、明年冬兼侍講。公奏、帝王之學、稽古爲先。六經皆古也、而書爲先、可證後世得失。上曰、人君不知學、則自怠。如唐太宗功非不高、恨不知學、使能以書證得失、豈復用兵高麗乎。公又言、事無大小、在乎立本救弊而已。帝王樂聞善言、稽古不倦、正爲二者。陛下每言允執厥中、蓋中則不倚、自然本立而弊除。上曰、所貴乎中、無過不及。朕最喜伊尹傳說、所學得事君之道。公曰、伊傳固然、非成湯武丁信用之、亦安能致治。公於啓沃、大率類此。嘗因夕對及邊事、上有乘機會之論。公曰、機會雖不可失、亦戒輕舉。上再三稱



善。一日與公論性。上曰：朕每愛孔子性相近及上智下愚不移之說簡而易明。知卿嘗從郭雍。雍於此似有得。豈曾見程頤乎。公奏：雍父忠孝嘗事頤。時雍尚幼。蓋得其傳於父耳。初雍已封冲晦處士。於是加賜頤正先生。十六年春。光宗登極。公獻十箴。一曰業難成而易敗。宜兢兢保之。二曰道甚簡易。在尊所聞。三曰畏天之威。四曰存心公正。五曰賞罰不可妄。六曰獎廉戒貪。七曰訪民疾苦。八曰理財以義。九曰姦諛生亂。甚於夷狄。十曰自治乃可治外。又論治天下必有家法。乃爲長久之道。又乞舉人望以聳動中外。又論二節三近。宴飲妄費。二節也。執政大臣。舊學名儒。經筵列職。三近也。上悅。四月。遂進中執法。會補闕薛叔似拾遺許及之。並移卿監。公言：壽皇復置此官。用意甚遠。今名遷而實廢。非新政所宜。頃之。徙權工部尚書。力請去。以直學士知泉州。又辭。遂提舉江州太平興國宮。凡歷三任。紹熙五年十一月九日。以疾

卒。享年七十四。官至朝議大夫。爵清江縣伯。食邑九百戶。遺奏聞。贈通議大夫。娶胡氏。封淑人。內助爲多。二子。峴。通直郎。江淮等九路都大。鑄錢司檢踏官。峙。蚤沒。三女。適進士丁南容。胡定。彭煇伯。孫男四人。淮。迪。功郎。新筠州高安縣尉。渭。漳。澧。皆登進士。孫女三人。長適歐陽珙。次許胡逢吉。一尚幼。公孝友慈祥。助以學力。每志於仁。勇於義。躬自厚而不責於人。事親養志無違。教二弟義兼師友。諮亦中第。豐城孟程筆力豪俊。公誨之曰：詩詞特遊士之雄耳。程即易業登科。問道請益者。屢滿戶外。公隨其材器勉使成立。姻戚交舊處之合宜。疾病死亡隨力周恤。後生求詩文筆札。應酬不倦。人人滿所欲而去。初居縣南之竹坡。榜曰艮齋。晚徙邑東。竹木參天。巖桂尤多。命曰桂山。二名聞於中外。予在從班。嘗被旨薦士。及公姓名。上遽曰：是所謂艮齋耶。予問：陛下何自知之。上曰：朕見其性學淵源五卷而得之耳。公平生著述至多。有

艮齋集四十卷、論語詩書解各二十卷、春秋左氏講義三卷、柏臺諫垣奏議各五卷、經筵總錄三卷、其他如金石庵類稿、鈐岡約草、筆隱堂記、自嬉集、楚塞從稿、雲根叢稿、樵林機鑑、南坡學林、天上詩稿、江行雜著、景符堂文稿、尙數十編。嘗進孝史五十卷、詔付秘書省。公量宏履坦、行以忠恕、待臧獲怡顏和氣、皆得其懽心。每語人云、吾自得頤正先生簡易之說、用之不盡。蓋亦天性也。葬以慶元元年十一月甲申、在袁州分宜縣神龍鄉鍾山里先塋之側。其子以公高弟、宣教郎、新知衡陽縣歐陽朴所述事實求寶文閣待制楊公萬里表公之墓、凡文章行誼登載已詳。鄉人又曰、螭首龜趺、刻爲歌詩、以詔來世、法也。復使來請其銘曰、

舜遠不仁、咎繇是翊。舉直錯枉、枉者自直。念昔淳熙、於古若稽。公歷臺諫、斂藏角圭。言忠謨嘉、可獻否替。彼激以訐、視之何細。司直於朝、消伏兇共。簡易之學、

始終頤雍。展也醇儒、其儀不忒。詩諗廟工、亦彰聖德。

周必大撰 《平園續稿》卷二八

故工部尙書煥章閣直學士朝議大夫贈通議大夫謝公神道碑

淳熙聖人睿文自天、典學日新、尊道隆儒、先路五三。於是儒學之士雲滂川匯、人舒向、家毛鄭也。而其耄艾典刑之尤者、在二浙則霅川程公泰之、在西蜀則眉山李公仲仁父、在江西則清江謝公昌國也。然程李二公或以經學鳴、或以史學鳴、或以文辭鳴、曰經而經、曰史而史、曰文而文者、其惟謝公乎。公諱諤、昌國其字、世家臨江之新喻。其先叔方、唐武德初都督洪州、因家于高安。至元和年徙居新淦。十世而懋、與弟岐子舉廉、世充同登元豐八年進士第、時稱臨江四謝。舉廉字民師、有藍溪集、東坡蘇公與之論文有書、尤稱其世上無真是之詩。蓋公四世伯祖也。曾祖臻、祖誠、父革、皆不仕。父始徙居新喻、自號清風老

人累贈太中大夫。母胡氏累贈淑人。公幼敏而愿，不妄語，誦書日記千言。既冠，文名載振，屢薦名，最後首送。紹興二十七年第進士，授迪功郎、峽州夷陵縣主簿。未赴，江西常平使者王傳檄公攝撫州樂安縣尉。公條治盜方略，上部使者，其要在開其徒自告。三十一年至夷陵，適北陞有霽，羽檄旁午，邑缺真令，州請於使，以公兼邑事，軍無乏興，民亦不擾。循左修職郎、陞左從政郎，授吉州錄事參軍。庾^⑦死者舊瘞以軀，往往暴骨。公白郡，取船官棄材以棺斂之。氓有陳其姓者，僮胥其篋以遁。有隱盜者，陳訴之官，辭過其實，反爲隱盜者誣訴。連帥龔公茂良怒，欲沒入陳之產，公爲書以白帥，陳氏竟免，而帥^⑧亦以是知公。以薦者改左宣教郎，知袁州分宜縣，表孝悌，崇學校，政尙忠厚。縣名難理，積負於郡者數十萬，一歲常賦之外，又鑿空索緡錢二萬餘。公歎曰：「桑弘羊復生，亦不能矣。」乃疏其弊於諸部使者，力求蠲損，得損亡幾以

母憂去，後令許公及之繼請于朝，竟蠲積負十三萬緡。至公居言路，又以分宜及秀之華亭月椿同奏，詔兩路漕臣躬至二邑廉問，故袁之四邑例蠲正額緡錢僅二萬，而華亭又數倍焉。分宜之民始有生意。服除，請爲祠官，以便養親，授主管台州崇道觀。尋丁父憂，服除，授幹辦行在諸司糧料院，除國子監主簿、太學博士、監察御史。先是，州縣役法久蠹，公里居時嘗教其里之人自占戶之甲乙，產之高下，當役者自請承之，編爲一書，命曰義役。至是以聞於上，下之諸路，民多便之。又論民之繇役，有曰保長者有十二患。又論湖州安吉夏租繭絲之征，既輸細綾，又輸細絹，請蠲其一，從之。除殿中侍御史，論士大夫八習，曰不恤，曰徇私，曰貪恣，曰刻薄，曰侈汰，曰輕率，曰詐僞，曰隱蔽。凡此八習，爲民八患，宜法湯之官刑以儆之。除侍御史，首論已然之惡爲易見，未然之姦爲難知。謂之姦者，冥於心晦於迹，未易研究，上嘉納之。淳熙十四



年淮浙大旱。七月、詔求直言、乃條缺政如繫獄之淹、如征商之苛、如權酷之羨、如經總月椿之算緡、如越州、廣德軍之和買、又條振貸七策、其要在勸分。從之。除右諫議大夫兼侍講。講尚書、因言於上曰、先儒論學先致知、經者致知之源、帝王之學先稽古、書者治道之本。故觀經者當以書爲本、觀書者當證以後世之得失。上曰、人君不知學則必至於自怠、如唐太宗、非無功也、而不知學。卿謂讀書取證於後世者、甚善。上又言及學問、公對曰、天下之事、立本救弊而已。臣嘗聞陛下論及允執厥中、蓋中者、本也。中則不倚、自然無敝。上曰、聖人所以貴中者、無過與不及也。嘗夜召見、論及南北事。上曰、當乘機會。公曰、機會雖不可失、而舉事亦不可輕。上曰、甚善。公每遞宿、必召見賜坐、賜茶、從容問曰、聞卿與郭雍從遊、雍學問甚好。公具陳本末。上曰、雍論性可取。朕於性說、獨取孔子性相近與上知下愚之說、其言簡而易明。自孟子而下、

論性者愈煩、皆失性之本。公對曰、陛下論性、眞得其要。上又問雍曾見伊川否。公對曰、程頤時雍尚幼。雍父忠者、得頤之傳。上問曰、觀雍議論多出於易、有易解否。公對曰、有。其解明白。雍初封冲晦處士、加封頤正先生、皆自公發之。太上登極、公獻十銘、其辭曰、業成而難、其敗或易。兢兢保之、常恐失墜。道甚簡易、在尊所聞。帝王之學、匪藝匪文。畏天之威、主德爲最。水旱雷風、天之仁愛。存心公正、治之所起。毫釐之私、患及千里。妄賞不勸、妄罰不畏。賞罰大權、以妄爲忌。貪吏虐民、戒石莫聽。獎廉以激、捷於號令。民之疾苦、幽遠難知。日訪日問、猶恐或遺。財在天下、理之以義。未聞刻斂、其罪在吏。亂之所生、非止夷狄。奸回諛說、尤害于國。自治十全、可以理外。重乃馭輕、輕動爲戒。又疏二事、其一則謂治天下必有家法、以爲一定長久之道。其二則謂舉人望之賢、以聳動中外、則巍巍之功、易以有成。時稱十銘如李衛公丹宸箴云。因經筵



勸講又陳二節三近累百千言。大槩謂所當節者二。曰宴飲曰妄費。所當近者三。曰執政大臣曰舊學名儒曰經筵列職。未幾補闕薛公叔似拾遺許公及之。有詔各與卿監以示褒擢。公獻疏曰。以補遺遷卿監。官固陞矣。意則非也。況此二職壽皇復建之。所以導諫用意至遠。若驟廢之。非新政所宜。公嘗言有直諫。有寓諫。直諫者言之難。受之尤難。寓諫者言之易。受之亦易。嘗進講至書無逸。嗣王其監于茲。言於上曰。監之一字。帝王治功之根本。由三代而上。以監戒之辭爲常。所以治多而亂少。堯舜之慈儉。禹之菲飲食。卑宮室。湯之不邇聲色。不殖貨利。皆周公所言四君無逸之類也。太康敗於甘酒。桀敗於酒池。厲王敗於荒酒。幽王敗於沉湎淫佚。皆周公所言商受酒德之類也。成王能用其言而躬無逸之行。以致盛治。誠可爲萬世法。十六年四月。除御史中丞。尋權工部尙書。六月。上章請爲祠官。甚力。除煥章閣直學士知泉州。

又辭。乃除提舉江州太平興國宮。秩滿。再請者再。既奉祠來歸。天下士君子高其風。公始居縣之南郭。名其燕坐曰艮齋。天下稱艮齋先生。後居東郭。茂林脩竹環列其居。而桂尤盛。遂以桂山名其堂。又皆稱桂山先生云。紹熙五年十一月九日。以疾薨於正寢。享年七十有四。階朝議大夫。爵清江縣開國伯。食邑九百戶。遺表聞。特贈通議大夫。娶胡氏。封淑人。柔恭勤敏。梱內之事。不以毫髮煩公。二子。峴。宣教郎。新差充江淮荆浙福建廣南路都大提點坑冶鑄錢司檢踏官。時先卒。二女。適進士丁南容。胡定。彭煇。孫男四人。淮。渭。皆登仕郎。漳。澧。皆蔭補。未命。女三人。長適進士歐陽珙。餘幼。公孝友溫恭。出於天性。清風老人喜詩。公每征行。有賦詠必寄歸。曰。以此當綵衣之戲。老人曰。以是娛我足矣。二親耄期而康寧。朝夕侍養。怡愉。見者感化。教育二弟。皆得公學識。有譽。庠序諸中。淳熙乙未科。每謂二弟曰。二親高年。兄弟侍養。

之樂雖聖賢亦所難必。公每云、人之立志、要以聖賢自期。毫末私意、不介胸中、然後能與天地相似。孝宗嘗有恬靜正大之褒、故烏臺諫省出入七年、凡所糾正無異論、無怨言。公有文集一百卷、經解四十三卷、奏議十卷、性學淵源五卷、雜著二十卷、孝史五十卷。公之經學受易於郭雍、以達于二程。謂良者聖人之止、無妄者聖人之動、其銘有曰、仁義忠信、蓋無常名。由近而推、則勇於行。又曰、出門萬里、其塗蕩蕩。用震以乾、是曰無妄。學者宗焉。公之文大抵祖歐陽公與曾南豐。予嘗謂公曰、近世古文絕弦矣。昌國之文如送陳獨秀序甚似歐、而南華藏記甚似曾、皆我所弗如也。予在朝時嘗攜二文以示兵部侍郎蜀人黃鈞。仲秉仲秉以古文自命、未嘗推表一人、至見此文、讀之一過曰、好。再過曰、極好。三過曰、此古人之文、非今人之文也。鈞也見文集不少矣、而獨未見此文、果何代何人作也。予笑曰、此古人、今在中都之逆旅、將詣

曹而覓官。黃驚曰、乃今人乎。慶元元年十一月甲申、其孤峴奉公之喪葬於袁州分宜縣神龍鄉鍾山里西峰安覺院之右、近太中淑人之塋、從公志也。後六年、峴以書及文林郎充荆湖北路提點刑獄司幹辦公事歐陽朴之狀來曰、先公葬六年、而墓隧之碣未立、非敢忘也。念先友最故者加少、而深知者又加少、兼斯二者、微先生碣之而誰也。予因特書其大者、其詳則有行狀與言行錄。銘曰、

皇矣維宋、奎宿芒動。文儒以光、漂漢滌唐。洛中之程、洞聖之經。南豐之曾、司文之盟。豐祐以降、疇嗣其響。中興昌辰、謝公其人。攤易之經、孝宗下問。優入程域、澄源乎良。以文而鳴、古文勃興。陟彼曾壇、韶鈞其磬。有一其得、則百斯世。云胡傷廉、奄有其二。公沒六年、草鞠新阡。碑于隧、前列彼下泉。

楊萬里撰 《誠齋集》卷二二

直寶文閣趙公墓誌銘



吾友趙德莊將葬于饒州餘干縣某山之原其婿方友陵以狀來曰。蓋爲之銘。始與德莊遊。蓋三十年。在朝廷同曹。在外同事。猶兄弟也。一日道前輩相約誌墓事。德莊忽曰。某死。幸子銘之。嗚呼。德莊竟先往矣。予何辭焉。予爲建寧。後德莊纔數年。方治郡圃一堂。德莊諾爲之記。聞其已病。將治書問之。則訃已及門矣。其尙忍銘。蓋德莊。吾宋之賢宗室也。在士大夫亦曰賢。力學能文。風度灑落。詞辯纚纚不休。遇樽酒談笑。掀髯抵掌。一坐盡傾。然持身嚴甚。非其交不往。當議論是非曲直之際。嶷嶷不可屈。雖坑穽在前。弗顧。鐘鼎探手可得。不能誘也。旣受知聖主。亦且用矣。遭如于外。不得盡其才而沒。豈命也哉。德莊諱彥端。德莊其字也。于宣祖皇帝爲八世孫。曾祖諱叔邯。贈廣德軍節度使。封淮陽侯。祖諱澤之。贈右朝奉郎。考諱公旦。終左朝奉郎。知建昌軍南城縣。贈左中大夫。妣某氏。贈令人。德莊年十七。應進士舉。南城亦鎖其廳。

試進士。父子俱爲國子監第一。遂同登紹興八年禮部第。主臨安府錢塘縣簿。公卿貴人爭識之。聲名籍甚。爲建州觀察推官。丁外艱。釋服。得軍事判官于秀州。守不任事。德莊率爲之區處。不自以能稱。用薦者改左宣教郎。有以德莊之文達宰相父子。欲用爲中都官者。德莊懼而歸。其人果敗。從吏部選。知饒州餘干縣。爲政簡易而辦治。故德莊謀居邑中。而邑人至今稱之。曰吾舊宰也。充福建路提點刑獄司幹辦公事。近臣薦所知宗室。隆興改元。召對。上迎謂曰。聞卿俊才久矣。時王師北伐還。德莊則曰。臣宗室也。與國家尤共休戚。言敢不盡。前日議者惡人異己。故近臣有不得盡其謀。遠臣有不敢進其說。如無近者一戰之悔。則將贊陛下以羣言爲可廢矣。願深爲他日戒。除國子監丞。遷吏部員外郎。言。元豐初。節度至觀察使纔八員。今乃四十員。防禦至。刺史纔二十員。今乃二百員。乞重名器。抑僥倖。又言。本朝以兵爲國。宜汰

廂軍以益禁兵。宗室孤遺女恩所不及無肯娶者。請聽其夫得就轉運司試以優之。權樞密院檢詳諸房文字會參知政事葉公去位有陰。謂爲黨者德莊曰。吾何黨哉。黨于是而已。即請外除。知江州。不數月召爲檢詳文字。遷右司員外郎。而葉公既相。德莊爲言人材巨細。可用不可用。大抵稱人之善。以助朝廷之選。始德莊父子甚貧。客四方。祖妣與其昆弟及妻子喪。皆藁葬未厝。德莊曰。吾得去畢此幸矣。既諸公留之不可。除直顯謨閣。爲江南東路計度轉運副使。即冒大雪走餘干。畢葬而後還。朝廷增修邊備。與予同論江淮事宜及所俘去留。上批紙尾。俾與大將議。饒信州大饑。民強糴爲暴。官廩不繼。德莊行部。請留二州上供米各三萬斛賑糴。自是歲以爲常。民以不病。移福建路計度轉運副使。過闕。請久任淮南郡守。休興築以安邊民。乞放池州被水人戶夏稅。故徽州折帛錢俾輸本色。皆極一路利害。上遣中貴人諭旨。留爲左司郎中。假戶部尙書館伴大金賀正使。前是宗室無出疆爲伴使者。自德莊始。遷太常少卿。復丐外。除直寶文閣。知建寧府。德莊舊悉其俗。民以便安。歲餘治倉廩。亭館一新之。因嚴不舉子令。且曰。毋俾民畏。當有以利之也。乃乞下戶生子給米一斛。與錢千。及蠲其身丁。凡萬四千緡。而以府用之錢償縣宰相見其奏。歎曰。趙君平日不吾同。此議何可遏也。遂著爲一路法。改提點浙東路刑獄。坐衢州賑歷稽期削兩秩。德莊恬弗辯。以小疾得主管台州崇道觀。餘干號佳山水。所居最勝。日與賓客觴詠自怡。好事者以爲有曠達之風。德莊在朝時。每欲用爲文字之職。訖不得用。聞其詩詞一出。人嗜之。往往如啗美味。然宗戚貴游欲以圖畫納禁廷。祈爲題賦者。率謝不能。其掾宰府。盡言無所遜避。以是多忤。與人交坦然。不事畦畛。其爲縣務寬其民。其爲郡務假其屬邑。其爲部使者則郡之細故亦不問。喜爲義事。重然諾。遇



儒藏

所施與不顧家有無親故客之經年不厭其田園屋宅之計如不聞也。官至朝奉大夫、享五十有五歲卒。以淳熙二年七月四日葬。以是年某月某甲子。先娶曾氏、繼室李氏、贈封皆宜人。一男子、良夫、將仕郎。二女、一嫁同年進士秘書省正字方翥之子、即友陵也。一尙幼。其所爲文、類之爲十卷、自號介庵居士集。云銘曰、

漢諸王裔、鮮克蹈義。惟向與歆、父子同著。於赫宋宗、仕于四方。有才有良、文藝益彰。德莊父子、聲譽則偉。南城弗施、蓋在其嗣。主實遇聖、知其雋名。正色委蛇、首于列卿。人則愛之、其用弗究。天胡嗇之、而弗俾壽。于越之濱、德莊所安。沒又葬焉、宜千萬年。

韓元吉撰 《南澗甲乙稿》卷二

吏部尙書鄭公丙神道碑

孝宗皇帝孜孜人才、精擇於初。常曰、一實周行、遂階顯用、不審可乎。既用矣、察其直諒不欺、則始終與之。

故二十六年間侍從多名卿、吏部尙書鄭公其一也。公諱丙、字少融。上世當五季時、自安陸徙家福州長樂縣。曾祖芳、祖馱、父遇、世有隱德。公貴、贈父宣奉大夫。母王氏、淑人。公生穎異、九歲能屬文、日誦書萬言。紹興十五年擢進士第五、補左從事郎、平海軍節度推官。秩滿、充建州州學教授。兩安定郡王令衿、令諷、參知政事楊椿、辛次膺、知樞密院事賀允、中皆號名臣、公適在所隸、交章以薦、改左宣教郎。辛嘗語公、官職易耳、使人尊仰實難。公服膺焉。入爲太學學錄、以父憂免。三十二年內禪、轉奉議郎、爲國子監主簿。詔求直言、公上從諫、遠佞、勤政、用人、裕民、練兵六事。會辛公爲御史中丞、辟公檢法官。隆興元年十二月、遷監察御史。虜亟求成、朝論不一、公謂不可遽。明年六月、出提點荊湖北路刑獄。權攝之禁方嚴、荆襄制置使沈介用待次官行江夏令、邊事方殷、信陽軍守臣委印赴制司、公皆持檄鐫級。介怒、奏乞引避。上不

得已、下遷湖南提舉常平茶鹽。乾道元年、宜章賊李金陷郴州、焚桂陽軍、尹寬起寧遠縣以應之。衡邇賊窠、提刑託行部避其鋒、常平亦置司在衡。公兼程疾趨督州將治城訓兵、復諭常寧縣世忠洞首李昂霄發壯丁禦賊、民恃以安。公劾郴、桂守棄城乞鄂軍濟師、糧餉不足、發義倉佐之、賊平、協助爲多。二年之春、鄉人林安宅爲諫議大夫、素不相合、求主管台州崇道觀。三年、起爲成都府路轉運判官、敕監四川類試、革挾書繼燭之弊。虞丞相允文以樞臣爲宣撫使、集四路漕議事、盛稱公賢、還朝薦召。六年正月入對、上喜曰、卿初元^①御史也。除尙書禮部員外郎。時陳正獻公俊卿與虞公爲左右相、高選王邸講讀官、公直講王府、與芮華、李彥穎、劉焞四人並命。陳公去、公亦出爲江西轉運判官、道除直秘閣、改湖南提刑。有旨招振華軍二千、帥司欲速、至涅士人、公立命改正。瀏陽縣歲歉、豪右移粟售他境、鄉民分競、尉以嘯聚張

大其事、漕請調兵追捕、歸罪團長陳淮、下之獄。公亟約常平司出米數千石、彈壓賑濟、杖淮釋之。漕有內援、奏公姑息、貶秩一等而罷。衆論不平、復提點廣東刑獄。適漕兄弟爲經略使、公引嫌移使西路。遠方官吏不奉法、公深行瘴鄉、一裁以正。邕守重賦斂、得公約束、請祠去。歸正官沙世堅素武勇、坐贓決配靜江。部有劇賊未獲、公諭世堅立功贖過、世堅馘渠魁以獻。公爲奏、稍復其官。後平李接、以總管守宜州、一路賴之。閩部鹽筴壞、上雅信公、徙本路轉運副使。公知福之嶺口、涵頭、海口三倉本錢不繼、命積錢對償^②。又汀、建等號上四州、高估抑售、公委邑令置場支賣、科擾頓絕。至今守其法。淳熙四年召爲吏部郎中、踰月兼中書門下省檢正諸房公事。議者謂舊法命官訴雪罪犯一歲別勘、三歲別定、以防枉撓。乃者有司憚煩、須元勘官伏其誤始許改正、實抑之也。章下三省、公謂復舊便、執政曰、上意似不然。公厲聲曰、事當



問理。若逆探上意而逢之、豈大臣事乎。執政怒、徙公大理少卿。五年二月也。尋充御試編排官、即殿幕擢秘書少監、累轉朝散大夫。車駕幸省、轉朝請大夫、面賜金紫。明日進秘書監、不數日兼權中書舍人。會諫議大夫蕭燧論夔師李景享貪虐、而大臣庇之、於是參知政事趙雄謂燧誤信蜀人謗書、既捕治其人、因改燧刑部侍郎、尋出知嚴州。公言、臺諫劾奸邪、反屈抑而去、豈國家之福耶。六年輪對、奏乞四川、襄漢、江淮置三大帥、擇曾任二府有文武威望者各當一面。復列上五弊、一曰取士代筆、傳義公行、富人以賄得科第。二曰養兵冒名。寄籍、闕額不補、懦弱不汰、一有草竊輒動御前之軍。三曰理財以橫斂預借、重折苛征爲能。四曰刑獄放縱大辟、淹留奏案。五曰薦舉非權要請託則謬舉親舊、羣至殿陛、徒有引驗之名。上甚嘉納、榜選德殿御屏之上、眞拜中書舍人。公疏、官冗賞濫、卿監丞簿事簡、官備館職史官至二十員、

學官書局各以十數、監司郡守疊授三政參議、歸正添差、養老將校充滿外路。東宮徹章、館閣進書、雜流廝役例霑賞典。曰隨。龍。曰應奉。開河修堰、併賜蠲賦、無時推恩。他司錢物、漕乞移用。尉不捕賊、詭奏有功、張大虛聲、橫被醲賞。累數百言。上批、賞功遷職不以濫予、丙言是也。給舍遇書牘當隨事以聞。又論臺諫獨員無助、察官不應專取歷知縣人。未幾召用顏師魯、張大經、劉國瑞、皆二千石、部刺史有聲者。聖政日曆、中興會要成、連轉朝議、中奉大夫。七年五月、除禮部侍郎、仍兼外制。公言、司封法不許以官回授、封贈比多援例、下至秘書省吏以無用之減年亦得之、請一切勿行。詔可。八年、吏部尙書王希呂知貢舉、公及侍御史黃洽副之。有沮公者謂丙、洽皆福州人。上曰、恐有偏耶。然皆無私。暨揭榜、三人同對。上曰、考校甚公、遠方多得人、雖不分路可也。轉中大夫兼給事中。時遴待補太學法、公視臨安府學籍、許試者二百

餘人游士羣訴臺諫宅。至夜喧集公第。公入奏待罪。先是春坊陳龜年女嫁大姓裴良珣。良珣醉死。其兄良顯訴龜年女利其富。死有冤狀。事下臨安。語涉龜年。府尹不敢治。上令送大理寺。朝士有爲地者。詔轉運司先審。責良顯不實反坐。乃施行。公駁奏。語侵臨安。且云。願少存國法。爲子孫萬世之業。竟送大理。至是尹誑冒試人使逞憾。上批無罪可待。令究爲首者。尹謂公芘閩人。不當深治。上怒。語宰執呼尹諭旨。卒杖丁如植。編管鄰州。前戶部尙書韓彥古負氣多援。公因其起廢。極口詆之。至云。仰累聖德。他日入謝。因言。論事欲激切。語或過當。望陛下恕罪。上曰。朕自喜給舍得人。樞密使王公藺時爲宗正丞。亦爲上言。今日不欺陛下。惟鄭丙。惜其愛莫能助之耳。九月兼左侍郎。乞文武添差官並不釐務。有郭世萃尋醫歲滿。參部法當察脈。醫有恃力受其賄。公執送棘寺。銓選清平。無敢干以私。九月進權吏部尙書。同修國史。九

年正月上辛。執政當祈穀。有故以待從攝。上特差公。尋兼侍讀。取陸贄奏議切時者。反復開陳。進司馬光五規。范祖禹帝學。以資乙覽。嘗乞勿聽妄獻利害。紛更庶事。又論治賊吏太寬。上並以爲然。次日舉二事諭宰執。有安靜之褒。八月。正除吏部尙書。轉大中大夫。公常曰。范鎮六十三致仕。吾已遲一年。上章請去。十年二月。除龍圖閣學士。知建寧府。政尙嚴明。千里肅然。浙東謀帥。移知紹興府。以臧否郡守。後時降中大夫。上銳更法。手札訪公。欲通差官民戶。公謂通差害多。著令里正專掌盜賊煙火。比來邑官責以應辦。至於破產。若以免役錢募耆長供他役。則善矣。攢陵敕使絡驛。輔藩多權豪。公不少假借。羣起造訕。公聞。請祠。上初不許。適諫官亦部人。助以風聞。竟提舉江州太平興國宮。皇城邏卒因誣公載官米萬斛而去。漕遣其屬趙善石。覈實無之。上語執政。使鄭丙有是。則今日無人可信矣。秩滿。再提舉隆興府玉



隆萬壽宮、轉通議大夫、起知泉州。光宗登極、語宰執曰、侍御史胡晉臣言、初政當召用人才、如鄭丙、張大經、楊萬里是也。尋詔公年德俱高、踐揚滋久、進端明殿學士。公應詔。上封事數千言、以謹始爲戒。覃恩轉通奉大夫、治泉如治越。或勸從寬、公曰、惟有德者能以寬服民。吾固非用猛者、然嫉惡有素、豈以晚節喪所守哉。閱半年、改知潭州。言者沮止、易太平州。固辭、復提舉興國宮、轉正議大夫。紹熙四年、引年致仕、轉正奉大夫。時史丞相浩、汪尙書大猷、沈詹事樞、右司郎中周頴與公皆同年進士、退休於二浙、詩筒唱酬、人競傳之。俄屬疾、屏醫藥、以後事付家人而逝。五年八月十四日也。享年七十有四。贈金紫光祿大夫。子升朝、特進爵安陸郡開國侯、食邑一千八百戶、實封百戶。妻淑人柯氏、同郡右文殿修撰棐之孫。前卒。以慶元二年十一月十二日合葬懷安縣沙溪之原。三子、頤孫、故奉議郎、通判辰州。齡孫、故承務郎、

監潭州南嶽廟。慶孫、承務郎。三女、長適朝奉郎、知吉州泰和縣卓洵。次適通直郎、知汀州上杭縣蕭輅。次適迪功郎、道州司法參軍柯謙宗。孫男五人、安祖、似祖、並承事郎。揚祖、通仕郎。餘幼。孫女三人、長適迪功郎、新泉州德化縣主簿葉英。公學術純正、文辭贍、縉有家集、外制、奏議、講義三十卷。居鄉接物極其和易、當官立朝則氣節凜然、上深重之。是時繳駁之任、不由進擬、公常以貳卿兼領、感激盡言、數犯貴要之鋒。在銓部抑僥倖、懲姦欺、蓋餘事也。嘗薦蕭公燧、胡公晉臣、羅公點、後俱至二府、世謂知人。其他如李燾之博洽、劉國瑞之清正、林栗、林枏、鄭湜之剛方、唐仲友之學問、援引不少置、善類歸心焉。某在紹興間、繼公爲太學錄、晚同朝久、意氣相投、會都司用私意、治王定國冒歸正賞、予按都督府文書辨其誤。公奏都司方舉職、政府乃欲沮之、其不黨同類此。公之卒、頤孫以沉刻見屬而不果。今卓君示公友壻林御史

采所狀行實、乃參以聞見、碑公墓道。其銘曰、

維南有閩、山環水聚。是生良材、接武王所。挺挺鄭公、如松之喬。碩大堅剛、歲寒後凋。持節典州、彰善癉惡。既鋤吏奸、亦蘇民瘼。帝思其賢、禁密以騫。守正觸邪、知無不言。舉朝僉諧、當宁眷顧。何待弼直、乃爲聖遇。昔者漢武、明於知人。獨稱汲黯、近社稷臣。相宏將青、任非不寵。孰如九卿、敬禮加重。以今準古、庶其似之。匪直公褒、阜陵是思。

周必大撰 《平園續稿》卷二五

校記

①據文意，句首似脫「除」、「授」一類動詞。

②十四年：原脫，據傳增湘校本《廬陵周益國文忠公集》

補。

③貪：原作「暴」，據右引改。

④大：原脫，據右引補。

⑤塗：原作「塗」，據四庫本《誠齋集》改。

⑥霽：原作「興」，據右引改。

⑦瘐：原作「瘦」，右引作「病」。按當作「瘐」，形近而

訛。瘐死謂囚徒病死獄中，見《漢書·宣帝紀》。此謂繫

囚病死者瘞之以韠，非指一般病人，四庫本妄改。

⑧帥：原作「師」，據右引改。

⑨踏：原作「蹈」，據右引改。

⑩譽：原作「舉」，據右引改。

⑪隧：原作「隊」，據右引改。

⑫廂：原作「廟」，據武英殿聚珍本《南澗甲乙稿》改。



儒藏

⑬陰：原作「除」，據右引改。

⑭介：原作「皆」，據右引改。

⑮允：原脫，據傳增湘校本《廬陵周益國文忠公集》補。

⑯元：原脫，據右引補。

⑰償：原作「價」，據右引改。

⑱名：原作「兵」，據右引改。

⑲隨：原作「寵」，據右引傳校本改。

⑳辛：原作「幸」，據右引改。

㉑學：原作「範」，據右引改。

㉒石：原作「后」，據右引改。

㉓詔：原作「召」，據文意改。

㉔熙：原作「興」，據文意改。

㉕人：原脫，據傳增湘校本《廬陵周益國文忠公集》補。

㉖英：原作「莫」，據右引改。

㉗析：原作「析」，據右引改。

㉘諧：原作「偕」，據右引改。

宋儒碑傳集卷一百二十四

李呂 周淳中 戴厚 王師愈 張淑堅

澹軒李君呂墓誌銘

嘉泰癸亥秋邵武軍光澤縣進士李閱祖袖書過予、繼示其父隱君澹軒集十五卷、朱待制熹元晦手書一大軸、及鄉先生太常伯黃簡肅公之子衡守瀚所述墓文來求銘。予讀隱君文、大抵有補名教、且知爲^①元晦益友、又衡州父子盛稱其賢、是可銘矣。按李氏自唐末居光澤、君諱呂、字賓老、一字東老。高祖大理評事鐸、能詩教子、始爲著姓。曾祖太常博士、贈朝散大夫誥、陳忠肅公稱有古人風。祖濬、不仕、太常卿李夔銘之。父純德、有學行、特奏名、不及試。元晦志其墓、云利不自予、惟義之取、其源遠矣。君幼莊重、記誦過人、十四喪父、能自立、學於從叔西山先生郁、蓋元祐黨籍諱深之子、紹興初特起者也。年四十即棄^②科舉、讀易六十四卦、皆爲義說。觀史傳百家之

書、尤留意資治通鑑^③、手抄至數四、凡興衰得失論著數百篇。事母上^④、官氏極其孝敬、教^⑤育弟妹、使有成立。聚族千指、朝夕擊鼓集衆、致禮饗堂、然後序^⑥揖、自少至老、不以寒暑廢。或勸少休、君曰、身率猶怠、矧自怠乎。爲會宗法、歲時設遠祖位、合族薦獻、聚拜飲福、秩然其可觀也。平時容止詳雅、居無惰容、學務躬行、深惡口耳之習。既切切訓其子孫、又以是善誘後生。尤不喜言貨財、苟可利人愛物、則勇爲之。邑宰張訢以春夏貴糴、立社倉平其價。下戶俗不舉子、議給粟助養育。行旅有病、創屋療治。條畫精明、隲括纖密、多自君出。元晦作記、歎其負經事綜物之才、老而不遇也。予觀易首乾卦、而以元亨利貞爲四德、文言曰、利物足以和義、蓋和於義乃得其宜、可以利物也。禮記大學亦謂國不以利爲利、以義爲利、小人反是。然則合義利而用之、斯不易之理。獨孟子告梁惠^⑦王曰、亦有仁義而已矣、何必曰利。截然判而爲二。蓋



戰國之君知以利爲利、不以義爲利、所謂大學、易經、彼惡能知、辭而闕之時不同耳。若君者、其善學大易、大學、孟子者歟。慶元四年六月壬子以疾終、享年七十七。六年六月乙酉葬所居之烏程縣。先娶高氏、郡人挺之女、再娶黃氏、御史臺主簿章之女、簡肅公猶子。六男、紹祖、依祖、閱祖、相祖、襲祖、壯祖。五女、適儒林郎馮森、進士鄧潭、饒淵、上官嘉會、從事郎吳炎。孫男七人、宣子、方子、文子、容敏學、敏行、夢錫。女七人、曾孫男女八人。文子登紹熙五年進士第、今爲建昌軍新城尉。銘曰、

以義爲利、君子攸行。以利爲利、彼哉小人。我嘉李君、隆師親友。允蹈經訓、知之非苟。家範昭然、守之弗緩。奕世其昌、視此銘言。

周必大撰 《平園續稿》卷三五

故朝散大夫主管建寧府武夷山冲佑觀周

先生墓誌銘

先生姓周氏、諱淳中、字仲古。及進士第、乞監潭州南嶽廟。教授全州、以心喪去。又教授廣德軍。廣德之學、自錢公輔、洪興祖、先生增制學宮、教以義利先後、人用知勸。滿秩、有咨其賢者、共爲薦、改官、知台州寧海縣。富人子育於伯父、後乃愬父與貲不平、傳獄累歲矣。先生使並處一室、爲言鞠養舊恩可念也、因相泣不復愬。知州索民久欠甚急、先生爭不可。又以故乞監嶽廟去。朝廷將用之、先生辭焉。爲主管淮西安撫司機宜文字、帥欲奏邊狀、必請先生迺具。還、授茶陵軍使、茶陵闕遠、故求之。已而遂乞主管台州崇道觀。成都府玉局觀。授淮東安撫司參議官、當上、又乞主管建寧府武夷山冲佑觀。淳熙十六年五月己未卒。積年六十八、階至朝散大夫。先生溫州瑞安縣人、居三港鎮之西。初買廢山、躬執鋤鑿、燒地種木、稍鑿平爲宅。既久、則大竹長杉、回合蔽虧、綺嵐紺池、煥霍房戶。先生出仕之日少、退休之日多、常終歲閉門、花香

鳥鳴暢然怡適、不問外事。間行市上、負販錯雜、見者驚異、謂爲古人。先生與人盡恭、能推善遜強、不使人以其薄仕進爲出己上、故行高而人不忌。著文集十卷、春秋說約六卷。曰昌齡者、曾王父也。曰贈宣教惟良者、王父也。曰大宗正丞贈中大夫之翰者、皇考也。娶林氏、將作少監待問之女、封宜人。有四男子、櫻、迪、功、郎。新福州永福縣主簿。櫛、未命。枋、先卒。枋、太學進士。兩壻曰劉用晦、林必大。孫男三人、壽、烈、熙。孫女二人。九月壬申、櫻等葬先生於來暮鄉龜巖。大宗正丞以節廉重、人恨其不得爲諫官御史。先生仍祈退遠利、詭世無悔、迄再不顯。銘曰、

凡仕之初、豈異乎民。超卑跨尊、奴使厥神。又於其間、突兀輪囷、智不能周、併傷乃身。取物之殘、眄睨嚙呻、勤拾涕洟、味其芳辛。吁嗟先生、退以自珍、冗不希榮、屈不望伸。有來招之、亦莫汝徇。不以爲高、所求者仁、異彼區區、計伐稱勳。如編羣羽、附諸堅珉。我述斯銘、

無脩後聞。

葉適撰 《水心文集》卷一三

戴俊仲墓誌銘

乾道七年、余客授東嘉、蓋士夫之淵也、職于學者多佳士。而戴君俊仲爲錄、以文行爲鄉先生、著春秋經解數萬言、能爲詞章。詩清婉有思致、性質粹溫、不得而親疏。久處庠校、與之議事、詳審而寡失、故尤與之密。君是時已嘗薦于鄉、五上禮部。至淳熙八年、始以特奏名試補賀州文學、尋授迪功郎、婺州金華縣尉。光堯慶壽恩、循修職郎。余去官十五年而復假守、眞欲下榻以禮孺子、避堂以舍蓋公、而君已得未疾、監潭州南嶽廟、不可出矣。徒有室邇人遠之歎。十六年、旣以光宗覃恩循從事郎、余以八月去郡、聞君以十有一月甲申終于家、享年六十有八。娶陶山張氏、相敬待如賓、家無間言。後君十五年卒、寔嘉泰三年七月十二日也。年八十。男二人、誠之、爲郡直學。淇、爲太



學生女六人、長適張渙、次適諸葛詵、次適包暹、次適迪功郎廬州州學教授張泳、次爲尼、名法壽、住處州回向院。幼適王廷碩。孫男三人、櫛杖復。孫女五人。君之喪、以紹熙元年三月辛酉殯于德政鄉湖嶼之原、夫人以開禧元年仲冬合葬焉。君方領袖諸生時、誠之已能屢試上游。淇雖幼、亦秀爽可喜。與余諸子同硯席、雖嘆君之滯留、庶二子之奮發、今誠之亦困于場屋、淇在上庠、尙可望也。公之初喪、二子來求銘、久而因仍未就。夫人旣祔、又以請。余投閒多病、又復許久。杜工部旣葬四十年、其孫過江陵、謁銘于元微之、一日而成。余旣許君之銘、二十年而不就、有媿多矣。君性孝友、幼失怙恃、語一及則痛自憫悼、至飲泣不已。弟一飛夫婦蚤沒、力貧治葬、撫愛其子女如己出。開門授徒、席下多名士。郡延之學、後進皆知所矜式。至今猶推淵源所自、而卒不偶、茲非命歟。經解三十卷、文集號橫蕩類藁五十卷、藏于家。後人尙猶因此

以見君之大概云。俊仲諱厚、又字長文、世爲鄉之著姓。曾大父天休、大父臨、父端夫、俱隱德不曜、後其有興乎。從兄之子溪、闔之俱擢儒科、溪有盛名、今爲兵部侍郎、太子右庶子、在君諸生中尤傑然者也。銘曰、嗟嗟俊仲、鄉之勝流。學博文優、衿佩從游。坎壈半生、不伎不求。命也奈何、何所怨尤。我銘雖緩、尙銘諸幽。後有知者、其惟春秋。

樓鑰撰 《攻媿集》卷一〇七

中奉大夫直煥章閣王公神道碑銘

孝宗皇帝嗣服之初、慨念陵廟之讎恥未報、中原之版圖未復、寤寐俊傑、以圖事功。而羣臣駑下、曾莫有以當上意者。蓋十餘年、乃得金部郎官王公於奏對間、意聳然異其言。旣退、又出手札以訪焉、俾悉其詞以對。公自以孤遠一朝、得見人主、論天下事、使蒙開納、而詔墨下詢、其勤又如此。誠爲不世之遇、遂極言無所隱。上益嘉歎、詔兼崇政講官、夜直必召、反覆咨

訪、屢移晷刻。大臣忌之、啓以爲淮東帥。上不許、曰王某諫官御史材也。由是忌者愈側目、則使人通慫慂、更以美官啖公。公不爲屈、彼計無所施、而猜懼益深。會公與本曹尙書爭職事、乃潛相表裏、爲巧語以中公使出補郡。蓋公自是轉徙於外幾二十年、而孝宗念公終始不替、數對近臣及公、猶有臺諫語。比復召還、則已迫移御、不及對矣。以是公訖不得復與朝廷議以沒。有識爲公歎恨、而公處之怡然、無幾微見言面。其所以言於上者、亦未嘗以一字語人、雖親子弟莫得聞焉。蓋公之爲人、於此可見其梗概、而君臣之際、從古所難、可勝歎哉。公世爲婺州人、八世祖始自義烏之鳳林、徙居金華郡城下。曾祖□、祖□、父□皆不仕、而父以公貴、贈中散大夫、母賈氏亦贈令人。公諱師愈、字與正、一字齊賢。生七年、逢兵亂、從父嬰城、誓死不暫去其側。少長、讀書郊外精舍、鄉先生潘舍人義榮出游、見而異之、指菴前竹命賦詩。

公遜謝一再、操筆立成、其卒章有願堅松柏操、同保歲寒心之句。潘公大嗟賞之、命刻其語竹上。後復以書論爲文養氣之法於潘公、時年甫十三、而義正詞達、意象和雅、蔚然有成人之度。潘公益奇之、召致門下、教視均子姪。與見龜山先生楊公、受易論語之說、公又自從東萊呂舍人居仁、問知中朝諸老言之、懿、二公皆器許之。於是益自刻厲、大肆其力於六經、子史百氏之書、手抄口誦、晝夜不息。俄遭父喪、貧不得窆、族姻欲使從俗爲火葬。公號泣不食者累日、見者感動、合力助之、乃克襄事。終喪、家益窮空、教學以養母、而自奉甚薄、人所難堪。其教飭子弟極懇款、與其父兄言、亦未嘗不依於孝弟忠信。而閭巷田野之間、情僞休戚皆習知之、其所以動心忍性、拂亂增益而進於日新者、又非他人所及知也。年二十有七、乃登進士第、調建州崇安尉。未行、遭母喪、哀毀骨立、得疾幾殆。服除、調臨江軍軍學教授。江西之俗、右文詞



而左學行。及公之來，諸生見其色溫氣和，言動有法，固已深敬服之。及開講席，則又告以學爲君子之說，聞者亦動心焉。其不率者，教詔懇惻，亦多自悔改。行僧杲有時名，竄嶺外得歸，所過士大夫爭先禮敬。至臨江，郡守延致，俾升高坐說佛法，而率其屬往聽焉。召公與俱，公謝曰：「彼之說某所不能知，然以儒官委講而北面於彼，某縱自輕，奈辱吾道何？」守不能強，識者韙之。再調和州教授，軍興官省，更授提點坑冶司幹辦公事。未赴，改潭州南嶽廟，蓋居閒又七八年，生事益落而德學益進。朋舊間有去登要路者，視之漠如也。尋改京官，知潭州長沙縣事。其爲政一以仁恕安靜爲本，而綱目嚴整，守之有常，人亦莫得而犯也。民以事至，廷中降意循撫，辨告諄悉。事有難處，爲之反復計慮深遠，不以一旦決遣快健爲己能，而要以民不受弊於數十年之後爲己安。人始而或笑其迂，久而後服其存心之厚，愛人之周也。里正之役困於

科擾，故多隱避。吏又操先後予奪之柄以導其爭，而又久不爲決，使必破產而後已。公至，罷諸無名之歛，人已欣然就役。至有當代，則又第其丁產之高下，停年之近遠，先期下之，俾自推擇定當役者以告。於是民無以役訟至常平使者之臺者。臺吏病之，反白使者，下書詰公爲飭法徇情者。公不爲變。楚俗尙巫鬼，窮山中有叢祠，號影株神，愚民千百輩操兵會祭，且欲爲亂。郡議發兵討之，公曰：「此非所以靖亂也。」退密召語一二土豪，貼以射士，出其不意，往悉禽其魁桀，以送州，而散其黨與。因撤其廟，禁勿復祠。民間疾病婚嫁舊皆決於巫史，俗以甚弊，而官利其多鬻乳香，不之禁也。公復下令毋以香市於巫，其爲奇袤以惑衆者，必罰無赦。俗爲少變。時汶上劉子駒、廣漢張敬夫皆居郡中，公以暇日與之遊，從容講貫，所造益深遠。一旦莫府所下文書，有不便於民者，公以利害爭之，不得，退將引去。敬夫疑之，曰：「行而無資，柰何？」公曰：

吾之來也固已慮此而先辦歸裝矣。豈待今日而後計耶。敬夫面歎加敬而事亦竟得寢。帥守張安國舍人知公深既剡薦之。及移荊州。又奏取以爲屬。而公已有召命矣。入對。首論人主不可自用其聰明以失委任之體。又論災異之來。當恐懼修省。以盡應天之實。言甚剴切。上皆嘉納。公復進言。辛巳之變。天實授我以中原。而我無以待之。坐失機會。今當亟爲修德。惠民。搜羅俊傑。屯據要害之計。庶幾異日幾會復來。有以待之。因及邊事甚悉。上意良悅。問卿何以知此。對曰。臣在長沙。戎將往來。臣必詢之。故得其實。上益喜曰。卿爲縣。乃能留意於此耶。除知嚴州。先是張敬夫守此邦。民安樂之。既召還。而諸公難其代。故特以授公。公至。一躡其故迹。無所更改。民又益喜。敬夫嘗奏請蠲丁鹽紬絹之稅。得免一年。至是公又奏曰。州土窮瘠。唯產蠶桑。乃不取其紬絹而使折錢。已非任土之意。而所折又太重。是以民尤苦之。今未能盡罷。

而僅免其一年。不若但令歲輸本色。猶足以少紓民力也。會歲旱。爲請於朝。得移婺州米五千斛以糴。且俾糴於秋成以償。公又奏曰。郡無良田。多水旱。有如異日復致饑饉。而後奏請俟報。則恐有不及事之悔。况郡素少米。使糴以償。亦非計也。願詔有司。異時嚴州饑。則移婺州之粟。如今歲而即以其直歸之。則於事爲兩得矣。詔皆從之。公爲政大略如長沙時。然於權豪則用法無所貸。大姓倚勢合黨。貪賴民田。公數其罪杖之。而奪田歸其主。凡姦民大賄。詐冒侵誣。皆下吏案驗。悉置之法。賞信罰必。威令肅然。姦凶帖息。不敢犯。而善良獲安其業。邦人畏而愛之。至今猶曰。安得復如王奉議時也。然嚴距行都密邇。士大夫往來無虛日。公莊正自持。接遇以禮。不以形勢有所低昂。以故多不悅者。因謂公政過嚴。相與騰口以撼公。會上饒驕兵譟譟。臺臣因露章請移公守信以彈壓之。蓋名以材選。而實非善意也。然公威望素孚。驕兵



聞風畏讐、不敢復爲故態。公至、更爲申明紀律、而壹以寬惠撫之、遂以無事。歲復大旱、它郡流民就食者衆。公先事定計、時方仲秋、即議發廩以糴。或咎其太蚤、恐後無以繼。公曰、此非若所知也。救之早則民心安而流移少、且各愛其屋廬生業、而無與爲亂。矧吾已致米二十萬斛矣、不患其無以繼也。即命揭榜賑糴、始自今日、以盡來年八月而後已。時民間米價已騰踊、公命官糴之、直財少損之、使不至大相絕。視私價自平、則又益下之、故無冒濫之姦、而私價亦不得起。於是人心帖然、而富室自知無所牟大利、莫復有閉糴者。願有以佐縣官者聽之、而亦弗之強也。公又益以金錢致船粟、來者舳艫相銜、日糴千斛、而猶不_之。常平司下書、俾移五萬斛於番陽、官吏皆言勿予。父老亦遮道泣訴。公曉之曰、彼與若曹皆國家赤子、吾食既有餘矣、亦何忍視彼_之之孳死而不_之救乎。亟具舟輸之、番陽賴以濟。明年、流民欲歸其郡者復

予行資以遣之。蜀人黃鈞仲秉、知名士也、聞其事、貽書贊美、以爲富公青社之功、不是過。以是政譽日聞。有旨召對、除金部郎官、尋兼崇政殿說書。乾道七年也。公時年已五十餘矣、數召對言事、上所賜書若曰、比聞奏對、頗及治道之具、而未詳也。尙有可裨政體而宜於今者、亟復條奏。其眷待之渥、一時在廷之士莫得望焉。執政曾懷以財利進、而前在版曹、貸內府緡錢數百萬、未有以償。一日、上以問戶部尙書楊倓、倓不知所對。退、取諸郡積逋緡錢七百萬付金部、使督之。公曰、此錢徒有名耳、督之未必有得、而文移一下、所擾者不知幾何人。且中外一體、若邦計未裕、不若歸誠君父、以幸寬免。豈宜舉此虛籍以罔上而病民耶。持其事不下。倓大不樂、乃密言於上曰、王某以學術自負、不肯屑意金穀事。而曾懷亦畏公在上、左右斥其短、又譖公漏洩省中語、上始怒、詔罷公。而臺諫有爲公辨明者、上復問懷所洩何語、懷不能對。上

悟、遂改知饒州。待次兩年、以例入奏、所論縣令宜以三年爲任、事亦施行。當軸或欲留公以自助、公遜辭謝去。上命更以公爲京西路轉運判官、公以楊倓方帥湖北、兩路事多相關、不欲行、乃卒赴番陽。番陽久廢不理、公私凋弊。公到郡、爲振綱維、決滯訟、政始有經。塞弊源、革浮蠹、財用有紀。郡歲輸米十二萬斛於建康、僦載之資取之民者有常數。後多爲總所移它處、而道里或過倍、則其費無所取。郡常輟它錢以續之、以故郡日益貧、而綱運亦有愆期折閱之患。至是、公力請於朝、凡綱運皆無得改撥、有不獲已、即先期告下、俾得預辦其費以行。朝廷從之。綱運遂得無耗失、而郡歲省緡錢六七萬云。郡故多盜、妖賊酋帥韓政黨衆日盛、且爲亂。公設方略禽捕獲之。及將受代、淮甸劇賊劉五從惡少五十餘人轉掠入境、殺人縱火。與官軍遇、輒以九人分三隊以迎敵、其鋒不可當。或被圍、則合其衆爲圓陳、外向潰出、所殺傷官軍民兵甚衆。公不以當去自弛、調兵定計、命毋得與賊戰、但嚴守津要而日驅逐之。晝夜毋得休息。一旦乘其憊盡獲之。於是羣盜震懾、其後累年猶相告戒、以番陽爲不可犯也。就除本路轉運判官。時諸郡多賢守、而政事之才不能無短長。有訟不決而訴於臺者、公爲更互委屬而陰喻以意、要使訟者得伸而聽者無所貶、一路稱治。會歲大旱、奏請出椿積米百萬斛分予諸郡、使爲賑糴、以安民心。人以爲便。而用事者靳之、僅得其什一。又奏閣畸零夏稅、免甲札牛皮馬穀諸賦、詔皆從之。饑民賴焉。改除荆湖北路轉運判官。而湖北之旱甚於江東、公究心賑恤、奏請規畫曲盡其至、遂得寒疾。得請主管武夷山冲佑觀、除兩浙東路提點刑獄公事。未行、改福建路轉運判官。始至、承空乏之後、入不支出。公念一路之寄獨仰漕司、而經費猶不給、柰緩急何。即爲校索源流、整飭程度、節冗費、檢吏姦、要使歲用之餘常有倍積而後已。行之有



常不徐不疾、未幾帑^①藏日充而民不告病、後之繼者皆莫能及也。閩上四州官鬻鹽以給歲費、始皆爲民病。後屢改法、三郡得少蘇、而汀之爲郡獨以兵寇之餘、田稅隱陷、故公私百計皆倚鹽以辦、而鹽所自來則官運遠而私販近、故官價高而私直平。又以距諸使治所皆絕遠、故抑配劫假之公行而民無所訴、困極無聊、數起爲亂、輒見夷滅。議者欲變官鬻爲鈔引以救之、公獨言、鬻鹽固不能無弊、然異時鈔或不售、則科買之害必有甚於鬻鹽者。今但盡蠲汀州宿負、漕司緡錢若干、而下其鹽直斤十有五錢、其當送漕司以轉餉者若干、分隸諸司者若干、皆丐之以足留州之用、則一歲之間、公私所損合爲緡錢五萬有奇矣。若更精擇守令、一意奉行、自爲悠久之利、而法亦不必改也。然鈔議旣寢、而公說亦竟不行、汀民之病迄今不得瘳、議者蓋兩惜之。孝宗猶念公不忘、屢欲召用、而輔臣以宗屬爲嫌、竟不果。垂滿、乃詔公以

直秘閣居故官。餘年上更用宰相、乃除公兩浙西路提點刑獄公事。促召入對、會孝宗已厭萬機、乃見今壽康皇帝、即奏宜體付託之重、勿忘未報之讎、并及中外輕重大勢、上亦褒歎再三。始至、即發平江通守姦贓累鉅萬、畿甸肅然。然公於是時已決退休之志、未數月、即上章丐閑。詔進職一等、提舉武夷山冲佑觀。公從容還家、燕閒自適、讀書玩理、教誘後進、德望隱然爲東州之重。明年紹熙改元七月七日、以疾終于居第之正寢、時年六十有九矣。階至中奉大夫、職直煥章閣、爵金華縣男、邑戶三百。蓋公爲人沉靜篤實、簡淡和粹、得之天資。平居莊默、不妄言笑。雖在暗室、如對大賓。其於接物溫恭誠信、充積有餘、而出之謹嚴、如有劑量、使人可親而不可狎。嘗念親在時貧、無以養、食飲服用終身不忍有所加。歲時祀享、輒哀慕如弗勝。書史外泊然無所嗜、几案間無一長物。居官取予、問法如何、推達賢才、不爲勢屈。其見於施設

者、大要以聖賢之言爲必可行、師友之論爲必可信。雖其中所以自守者凜然有不可奪之操、至於稱人之善、則又色愉神暢、如己有之。雖剽繁治劇、剔蠹鉏姦、隨事制變、各有條理、然仁厚之意、惻怛之誠、藹然行於其中、則又有非一時長於吏治者所能及。晚年更練益精、涵養益厚、渾然不見圭角。病革、猶爲諸子誦說前賢事業、勉勵訓飭、語訖而逝。其間^③於死生之際又如此。公於文不苟作、議奏又多削稿、今次其存者若干卷藏于家。娶同郡俞氏、封令人。其父持國、倜儻有遠志、蚤以文試有司、不合、遂放意山水間、自號溪西老人。令人歸公時、公甚貧、佐公養親盡其力、斥奩中裝以遺諸妹、無少吝。後公居閑累年、相與攻苦食淡、處之甚安。使公得以厲志德業而無內顧之憂者、令人之力爲多也。及公宦達、而令人儉素勤力、不改平日之舊。治家甚整、教子甚嚴、遇族姻甚厚、奉祀享賓甚敬而潔。至是哭公過哀、後三月、亦不起疾。

子男四人、長瀚、從事郎、新武當軍節度推官。次漢、迪功郎、新臨安府仁和縣尉。次洽、未仕。次潭、迪功郎、新紹興府會稽縣主簿。女五人、長適進士陳思、次適太學上舍生時涇、次適進士俞袞、次適進士葉紹彭、次適將仕郎潘晉孫。孫男六人、桐、集、操、餘未名。明年十月、諸孤奉公及令人之柩葬于金華縣白沙鄉石筍原之臺山。後三年、乃以太府寺丞呂君祖儉之狀來請銘。熹與公雖同年進士、視公爲前輩。自公在長沙時、始獲從遊、固已敬愛其爲人。及公入閩、而聞其議論、觀其行事、又益熟、義不得辭。且讀呂君之狀、事皆詳實不誣、乃刪其要而系以銘。銘曰、

天賦之奇、又粹以溫、篤行敏學、有本有文、誠意所通、士服民信。入告于廷、帝有清問、孰媒而合、孰隙以離。歛其餘功、梟凶哺饑、白首來歸、謂諧曩契。時與事違、卒不大試。白沙之里、石筍之原、一丘之閔、萬世之安。石筍之原、白沙之里、孰詔無窮、視此哀誄。

朱熹撰 《晦庵先生朱文公文集》卷八九

張監鎮墓誌銘

乾道五年、信安張杰赴於其友呂某曰、先君以七月二十五日棄諸孤、敢告於執事。某既與使者爲禮、即辦裝、粵十月二日會其葬於衢之西安縣靖安鄉九龍山已下。杰拜且哭曰、先君之葬也、遽未有辭以識諸幽、將惟子是屬。授以汴人趙焯行狀一通、某再拜興受、退而于役于仕、于喪于疾、棲置筆研、未克具藁。杰以書趣曰、己丑之會、吾子嘗墜言焉、今墓木之葉七易矣、吾子獨無意乎。某矍然驚謝、乃序而銘之。君諱淑堅、字正卿、其先自開封遷于衢。曾祖智全、尙書都官郎中。祖詠。考彥琦。君蚤嚮意文學、雖以季父任爲承信郎、年餘四十、足未嘗至吏部門。研索典籍、矻矻如諸生。周覽旁浹、星曆方劑、篆籀之屬、無所不窺。浮湛里閭、遇疾痛呻吟者、或和藥飲之、隨失其疾。世醫莫能識其節度。謁者浸衆、君悠然應之、不爲彼此

薄厚也。晚歲始出、監信州汭口鎮。鎮居住來之衝、課額夥甚、前政數負殿。君通商平飮、經入用登。銅官鐵官漕卒、將輸如織、頡頏侵蝕、鎮官素不能令。自君之至、道鎮境者皆抑首屏氣、無敢譁。庀局甫四月、卒官下。鎮民相與負其柩還衢、其孤強之傲直、委去不顧。蓋君於是年四十有八、官止承節郎。有詩、書解合三十卷。始君程督諸子、誦肄蚤夜不置。已而長子策、名人意其繩約當少寬、君所以訓厲之者益峻、甚於他子。然則君之期其子、其諸異乎人之期者矣。娶葉氏。三子、杰、迪、功郎。寧國府府學教授。次臯、次輿。一女、適袁煥。銘曰、

緩己之進、匪辰之競。急人之憂、匪藝之羞。期子之大、匪勝之怠。不怠其昌、視此石章。

呂祖謙撰 《東萊呂太史文集》卷一三



儒藏

校記

①爲：原作「與」，據四庫本《文忠集》改。

②棄：原作「葉」，據右引改。

③通：原作「適」，據右引改。

④上：原作「土」，據右引改。

⑤教：原脫，據右引補。

⑥序：原作「聚」，據右引改。

⑦惠：原作「重」，據右引改。

⑧「縣」下傳增湘校本《廬陵周益國文忠公文集》有「原」字。按此文有誤，李呂家在邵武軍光澤縣，不得云「葬所居之烏程縣」。考朱熹爲李呂父所作《特奏名李公墓誌銘》，李氏世居之地名烏洲，則此「烏程」應是「烏洲」之誤，蓋原文當是「葬所居之烏洲××原」。

⑨肅：原作「蕭」，據右引改。

⑩紹熙：原作「紹興」，據明祁氏澹生堂抄本《周益公文集》改。

⑪彼：原作「被」，據宋浙江刊本《晦庵先生文集》改。

⑫帑：原作「孥」，據右引改。

⑬間：四庫全書本《晦庵集》作「見」。

宋儒碑傳集卷一百二十五

劉珙

觀文殿學士太中大夫知建康軍府事兼管
內勸農使充江南東路安撫使馬步軍都
總管營田使兼行宮留守彭城郡開國侯
食邑一千六百戶食實封二百戶賜紫金
魚袋贈光祿大夫劉公行狀

本貫建寧府崇安縣開耀鄉五夫里。曾祖民先。故任
承事郎累贈太子太保。妣黃氏。彭城郡夫人。祖幹。故
任資政殿學士。銀青光祿大夫。謚忠顯。累贈太師。妣
李氏。秦國夫人。繼呂氏。韓國夫人。父子羽。故任右朝
議大夫。充徽猷閣待制。累贈少傅。妣熊氏。福國夫人。
繼卓氏。慶國夫人。公諱珙。字共父。其先蓋長安人。唐
末避地入閩。遂爲建人。六世至忠顯。公仕始通貴。靖
康中守眞定有功。京城失守。虜人得之。欲以爲將相。
義不辱而死。少傅公紹興初佐川陝宣撫使軍事。保

障梁益爲中興名臣。公其長子也。生有奇質。英晤絕
人。少長從季父屏山先生受書。知刻苦自厲。屬文敏
有思致。一時鄉先生皆歎以爲不可及。始以忠顯公
死節恩補承務郎。舉進士一上。中紹興十二年乙科。
調監紹興府都稅務。請監潭州南嶽廟以歸。杜門讀
經史書。討論纂述。益務其遠且大者。秩滿。差主管西
外敦宗院。未赴。遭外艱。旣禫而韓國夫人薨。持重終
喪。除諸王宮大小學教授。權祕書省校勘書籍官。禮
部郎官。中書舍人。時秦丞相當國用事。一日。微示風
旨。欲爲其父作謚。以公不亟奉行也。怒風言者論去
之。踰年。秦丞相死。乃得主管台州崇道觀。召爲大宗
正丞。未就職。改祕書丞。兼權吏部郎官。即眞。尋除監
察御史。避薦者。復還故官。公前在銓曹時。苦吏爲姦。
思有以制之。一日。命張幕設案於庭。置令式其中。使
選集者得出入繙閱。與吏辯。吏無得藏其巧。人甚便
之。間攝侍郎。引選人改官班。占對詳敏。天子悅焉。且



儒藏

聞其能檢柅吏姦。故因其引嫌。復委以選事。兼權祕書少監。遷起居舍人。兼權中書舍人。會金虜渝盟。天子震怒。將悉銳師北向。以雪讎恥。復土疆。一時詔檄多出公手。詞氣激烈。聞者感奮。或至泣下。御史杜莘老既擊侍醫王繼先逐之。又論宦者張去爲。遂以忤旨左降。公不草制。奏留之。莘老得不去。從車駕視師建康。兼權直學士院。既而車駕將還臨安。江淮軍務未有所付。張忠獻公方典留鑰。衆望屬之。而詔乃以楊存中爲宣撫使。中外大失望。公不書錄黃。奏論其不可。上怒。顧宰相曰。劉珙之父爲張浚所知。其爲此奏。意專爲浚地耳。宰相召公喻旨。且曰。再繳累且及張公。公曰。珙爲國家計。故不暇爲張公謀。若爲張公謀。則不爲是以累之矣。命再下。執奏如初。存中命乃寢。未幾。眞除中書舍人。直學士院。召入草制。立建王爲皇太子。今上皇帝既即位。詔公借禮部尙書使金國。是時南北甫罷兵。始爲鈞敵之禮。虜意不可測。公

受命慷慨。不復問家事。入辭母夫人。戒家人悉裘葛。兼副以行。曰。藉令不死。歸未可期也。副使某者以選置官屬。不公抵罪。上以公辟召無所私。手札褒諭之。尋以議禮不決。未出疆而還。然公於是時固以其死許國矣。在掖垣凡三年。事有不便者。知無不言。嘗有詔問足食足兵之策。公以擇將帥。核軍實爲對甚悉。會有太白經天。旱暵飛蝗之變。詔復問近臣闕政。公又奏曰。太白。兵象也。旱蝗。盤氣也。今仇虜窺覲。哆然未厭。而國家因仍縱弛。有賞無罰。諸將專事刻剝。以媚權倖。取官爵。士卒怨之。有甚於仇敵者。且輿土未復。地狹民貧。而費用日滋。征求日廣。爲監司者不卹郡。爲郡者不卹縣。爲縣者不卹民。至或重爲貪虐。以肆其心。則百姓之苦於官吏。亦不異於士卒之仇將帥也。然則天人相與之際。夫豈偶然而已哉。欲救其失。唯當信賞必罰。以肅將帥之心。痛懲刻剝。以固士卒之志。節浮冗。練軍實。精擇郡守。誅鉏臧吏。以厚吾



民之生。而是數者之得失。則又係乎人主之心誠與不誠耳。陛下審能擴恭儉日新之德。屏馳騁無益之戲。登崇俊良。斥遠邪佞。常使日用之間。有以養吾之誠。而無害焉。則夫數者固將有所依以立。而災異之變庶乎其可銷矣。間又嘗爲上言。應敵無一定之謀。而疆國有不易之策。今日和。曰戰。曰守者。皆應敵之計。因事制宜。不可膠於一說者也。若夫不易之策。則必講明自治之術。博詢救弊之原。毋事虛文。專責實効。使政事修舉。國勢日彊。然後三者之權在我。唯所用之。無不如志。今議者自^①紛紛於末流。而於其本未有言者。臣竊爲陛下憂之。上皆納焉。故將田師中死。其家請以沒入王繼先園第爲賜。詔許之。公以師中久竊兵柄。無尺寸功。貪饕刻剝。爲國家歛士卒之怨。不當予。方爲繳奏以聞。而其家復以請。公以錄黃稽程被詰。亟奏俟罪而持之愈力。於是乃不果賜。有迪功郎李珂者。以關通近習得補官。而自奏求爲督

府掾。詔除已下。公奏曰。珂名品至卑。不繇召見。敢以劄子非分祈恩。非所以嚴堂陛之勢。杜邪枉之門也。且今邊陲大計。方倚督府爲重。官屬尤當審擇。如珂小人。非惟不堪此選。政恐或能妄作。以沮撓其事機也。奏上。改除珂樞密院編修官。公論執益堅。乃罷之。然亦竟以數直諫。不得久居中。而宰相亦有陰忌公者。隆興元年冬。除集英殿修撰。知泉州。明年。改衢州。始至。委事僚屬。一無所問。人以公未更治民。意其憚於事。或不屑爲者。既乃一旦悉取而自爲之。辨察精明。區處的當。羣下斂手。不能有所爲。人始大服。先是吏員猥衆。公視員外置者悉罷之。受租米輒使民自操量。槩其發鈔銷簿。亦皆有法。人甚便之。會湖南旱饑。官吏不之恤。而郴州宜章縣方抑民市乳香。期會峻迫。有李金者。乘衆怒奮起爲亂。衆餘萬人。南逾嶺徼。分道犯英韶連廣德慶肇慶。封梧賀州之境。旁入道州桂陽軍。殺掠萬計。州縣不知所爲。至斂民間金

帛賂之以免。由是賊勢日盛。而帥守監司更共蔽匿。不以實聞。賊遂犯宜章。陷桂陽。聲震遠近。朝廷憂之。以公爲敷文閣待制、知潭州、荆湖南路安撫使。是歲乾道元年也。公以五月入境。則賊衆已數萬人矣。公聲言發郡縣兵討擊。且檄鄰道謹斥堠。守隘塞。聽期會。而亟以實奏。請下荆襄發卒奔命。又度比章下。或已歷旬時。失幾會。則移書制置使沈介曰。請毋須報。而亟遣以來。擅興之罪。吾自當之。不敢以累公也。介爲遣兵。詔亦報如公請。然皆未有至者。賊勢愈盛。而湘陰縣橋口鎮羣盜劉花三、李無對者。又竊發。距城郭僅六十里。人情益震。公亟簡州之役兵。得三百人。使部將趙彥帥之。合巡尉兵以行。下令戕舟發梁。募有生得盜者錢若干。得其首者錢若干。凡盜所挾。賊無多少悉給捕者。不數日。彥等擒捕三十餘人。公悉以便宜誅之。梟首於市。餘盜走。多溺死。其散入墟落者。又爲村民縛以送府。又悉誅之。奏將尉有功

者。皆被賞。於是威聲大振。吏士用命。人心少安。六月。制置使所遣遊奕軍統制田寶。乃以千人至。居數日。鄂州水軍統制楊欽。又以千五百人至。公知其暑行疲怠。悉爲發夫迎之。數程之外。代其任負以行。軍士固已歡呼感激。及至。撫勞犒賜。又皆豐飫過望。諸軍益喜。盡死力。欽故羣盜楊公部曲。公知其可用。檄諸軍皆受節度。使率其衆。鼓行而前。下令境中。凡軍民討捕有功者。皆以率受賞。其賊所誘脅。能相捕斬。以詣吏者。亦除罪受賞有差。是月晦。田寶大敗李金於郴州城下。追奔二十餘里。殺獲甚衆。七月。楊欽敗賊黨田政、尹寬等於桂陽。鄂將谷青、王翌又各以二千人至。公遣扼宜章大路。以分賊勢。通糧道。而欽連戰破賊。遂入宜章。八月。鑾龍岡下。賊兵數萬。自辰至申。官軍稍卻。欽被髮大呼。策馬橫衝之。賊分爲兩。其前列精兵殲焉。餘皆遁走。進至莽山。賊徒曹彥、黃拱。遂執李金與其腹心黃谷以降。欽因窮追深入。盡誅其



曾豪而其支黨脅從者尙衆、皆竄入山谷間。公喻欽等卻兵、而使人賁勝、聽其自詣、則皆相率聽命。歲盡師還、李金、黃谷等數十人皆伏誅。其降者、公皆稱詔給據納兵、復故田宅、蓋以千數。曹彥、黃拱皆奏補官而厚撫之。既乃第錄諸將功狀列上、又盡得其實、不以一毫有所私。上嘉歎再三、詔以爲敷文閣直學士、且賜璽書曰、近世書生但務清談、經綸實才蓋未之見、朕以是每有東晉之憂。今卿既誅羣盜、而功狀詳實、諸將優劣、破賊先後、歷歷可觀、甚副朕意。卿其益勉之哉。賊地既定、境內正清、公乃喟然歎曰、吾豈樂殺人哉。向者軍興、令不可以不肅。而今而後、庶有以亮吾心矣。吾豈樂殺人哉。自是一意於撫摩之政、且爲請於朝曰、今欲懲既往之失、銷未形之患、莫若擇守宰、寬賦歛、以安吾民而已。不此之圖、一李金死、一李金生、臣恐湖南自是無寧歲也。奏留鄂兵戍郴、桂而益廣蒐募、以補忠義親兵之缺、厚其恩意、嚴其紀

律而時訓習焉。於是湖南隱然爲重鎮、方地數千里、外戶不閉、商旅野宿焉。潭州故有嶽麓書院、眞廟特賜以敕額、給田與書、經亂蕪廢。公一新之、養士數十人、延禮修士彪君居正使爲之長、而屬其友廣漢張侯枻敬夫時往遊焉。與論大學次第、以開其學者於公私義利之間、聞者風動。三年召還、見上首論獨斷、雖英主之能事、然必合衆智而質之以至公、然後有以合乎天理人心之正而事無不成。若棄僉謀、徇私見而有獨御區宇之心焉、則適所以蔽其四達之明、而左右私昵之臣將有乘之以干天下之公議者矣。又論稅絹退剝、羨餘和糴之弊、又論州郡禁軍紀律不明、驕惰自恣、宜遴選武臣之奮行伍、習戎事者使爲將副、而貴游子弟、閤門國信、五房出職之輩不得與焉、則州郡之軍政庶乎其可脩矣。上然其言、以爲翰林學士、知制誥、兼侍讀。間復從容言於上曰、世儒多病漢高帝不悅學、輕儒生、臣竊獨以爲高帝之聰

明英偉其所不悅特腐儒之俗學耳。誠使當世之士有以聖王之學告之、臣知其必將竦然敬信、而其功烈之所就不止於是而已矣。蓋天下之事無窮而應事之綱在我、唯其移於耳目、動於意氣而私欲萌焉、則其綱必弛而無以應夫事物之變。是以古之聖王無不學、而其學也必求多聞、必師古訓、蓋將以明理正心而立萬事之綱也。此綱既立、則雖事物之來千變萬化、而在我常整整而不紊矣。惜乎當是之時、學絕道喪、未有以是告高帝者。上亟稱善。是歲小不登、公請亟詔監司郡守先事條畫來年荒政所宜、不者亦使任其無他。又奏州兵營伍教戰之法甚備。上由是益知公學問精深、忠義慷慨、可任大事。十一月、擢拜中大夫、同知樞密院事。公辭謝不獲、乃就職。因進言曰、汪應辰、陳良翰、張栻學行材能皆臣所不逮、而栻窮探聖微、曉暢軍務、曩幸破賊、栻謀爲多。願陛下亟召用之。上可其奏、以次登用焉。公以西府本兵柄、

於諸將之能否不可以不周知、乃自諸管軍統制官下至裨佐日召三數人從容與語、得其材用所宜、輒筆識之、以待選用。一日、上顧輔臣圖議恢復。公奏曰、復讎雪恥、誠今日之先務。然非內脩政事、有十年之功、臣恐未易可動也。同列有進而言者曰、機會之來間不容髮、柰何拘此曠日彌久之計。且漢之高光皆起匹夫、不數年而取天下、又安得所謂十年修政之功哉。公曰、高光唯起匹夫也、故以其身蹈不測之危而無所顧。陛下躬受太上皇帝祖宗二百年宗社之寄、其輕重之勢豈兩君比哉。臣竊以爲自古中興之君、陛下所當法者、惟周宣王而已。宣王之事見於詩者、始則側身修行以格天、心中則任賢使能以修政事而已。其終至於外攘戎狄、以復文武之境土、則其積累之功至此、自有不能已者、非一旦率然僥倖之所爲也。上以公言爲然。四年七月、詔兼參知政事。公方與一二同列夙夜悉心竭力、益圖所以叙進人材、



寬養民力、討理軍政、務以成上意之所欲爲者、蓋除福建鈔鹽歲額二萬萬、罷江西和糴及廣西折米鹽錢、又蠲累年逋負金錢穀帛巨億計。而公尤以輔成上德、振肅朝綱、抑僥倖、獎廉退爲己任、進則盡言無隱、退亦未嘗輕以詞色假人。苟清議之所不與、不以親故而有所私也。以是近倖仄目、而流俗亦多不悅公者。先是、潛邸使臣有^④龍大淵、曾覲者、憑恃舊恩、暴起富貴、公論不平者累年。上一日發寤、逐去之。未幾而大淵死、上顧憐覲、欲還之。公力陳其不可、且曰、此曹奴隸耳、憐之則厚賜之可也。今引以自近而賓友接之、至使得以與聞機事、進退人才、則臣懼非所以增盛德之光華、飭治朝之綱紀也。上納公言、爲止不召。殿前指揮使王琪謁告至淮上還、密薦和州教授劉甄夫。上諭執政召之、諸公相問、莫有知其所自來者。公曰、薦士吾徒之責、可不知耶。明日、請曰、此人微位下、陛下何自知之。上以琪告。公又請其所以

薦、上曰、卿自問之。公退、坐堂上、呼吏作頭引追之。琪至、公詰其故、授牘使對。琪恐懼、不能置辭。久之、公乃叱使責戒勵狀而去。無何、揚守來言、前琪過郡、稱受密旨、增所築新城若干尺。諸公請之、初未嘗有是命也。公既與諸公合奏、請其罪罷之、因奏、自今聖旨不經三省密院者、所下之官、皆請俟奏審乃得行。上欣然從之。公即從密院移中外諸官府、而內侍省與焉。明日、忽復有旨、前奏審事勿行。因諭諸公、即如此、則或須一飲食、亦必奏審乃得邪。公即以藝祖熏籠事對。退、又與諸公合奏言曰、朝廷者、陛下之朝廷、命令者、陛下之命令。臣等偶得備數其間、典司出納而已、非敢有所專也。今方舉行舊典、以正紀綱、而已出復收、中外惶惑、竊恐小人有因疑似、微以姦言上激雷霆之怒者。願陛下察之。上不悅、曰、朕豈以小人之言而疑卿等者耶。時諸公雖更進懇請、而公言尤激切、故獨罷公爲端明殿學士、在外宮觀、改知隆興府、江

南西路安撫使。公入辭，猶以開廣言路，講明聖學，敦本節用，虛己任賢，斥遠佞邪，選將撫軍，數事爲獻。上蹴然曰：「卿雖去國，不忘忠言，而材又非他人所及，行召卿矣。」隆興承前帥刻剝之後，場務皆增新額，而輸租更用方斛，視省量率多斗餘。公首罷之。屬邑奉新有復出稅錢三十五萬有奇，租六百二十八石，攤配諸鄉，多有視正稅且什四，歲久困不能輸，相率逃去。田畝榛蕪，所攤固不可得，而失正稅又數倍。公奏蠲之。又除二稅合零租米暗耗免役足錢之弊。人或爲公憂不足，公量入爲出，用度未嘗乏也。暇日咨訪賓僚，講求利病，率常一二延見，使得從容各盡所懷，以故下情宣通，舉無過事。而其人之器識短長亦無所隱。訟訴有久不決者，取其案牘藏之。旬日輒召會官屬之賢可委者，合坐堂上，人付一二事，使平決之。有司供具飲食如法。至暮，白所予奪而退。其大事則公先閱視，默有所處，然後參衆說以決焉。以故多得其

情，無不厭服。明年除資政殿學士，知荆南、湖北路安撫使。始至，條上荆襄兵少財匱之狀，詔即諉公措置。公因行視襄鄂兵屯，並邊形勢，盡得其實以聞。凡圖回役使，詭名虛籍之弊，與夫部伍教習之法，有不善者皆奏罷之。先是，荆南兵戍襄陽者累年不得歸，父子至不相識。公奏爲半年番休之法，春夏三軍，秋冬四軍，更迭往來，軍士感悅。荆襄故有民兵，皆農家子，敦樸豪勇，又有土著常產，自愛惜。且居近邊，知虜情，輕戰鬪。比稍墮廢，公更爲簡閱，寬其取丁之數，貧者弛其賦役，隨鄉團結，以七十五人爲隊。隊有長，四隊爲部，部有將。縣置總首，都副各一人，當教則郡爲選官訓練，已事而罷之。至於資糧械器，皆爲處畫，各有條理。撫循犒賞，歲費錢一萬萬，而不以一介有取於民也。明年遭內艱。又明年起復，同知樞密院事，荆襄宣撫使。遣中使奉璽書，即喪次宣押奏事。其書曰：「朕以荆襄上流，宿師尤重，欲以軍民之寄付卿，



其任重矣。奪情臨民。國有常典。況吾大臣。義當體國。毋以家事辭王事也。公六上奏辭不肯起。引經據禮。詞甚切至。最後言曰。三年通喪。先王因人情而節文之。三代以來。未之有改。至於漢儒。乃有金革無避之說。此固已爲先王之罪人矣。然尙有可諉者。則曰魯公伯禽有爲爲之也。今以陛下威靈。邊陲幸無犬吠之警。臣乃欲冒金革之名。以私利祿之實。不亦又爲漢儒之罪人乎。且孝之與忠。豈有二致。事君事親。初無兩心。使親喪而可奪。則他日所以事君者。可知矣。況陛下方以天下奉兩宮之驩。而以衰經不祥之人。簞迹二三大臣之間。殆非所以全孝治之美。且使仇虜聞之。亦必以爲中國乏材。乃至於此。而敢肆其輕侮。此臣所以受恩感激。反覆慮思。而卒不敢起也。抑陛下之詔臣。則有曰。義當體國者矣。臣其敢噤無一言以塞明詔哉。乃手疏別奏以聞。其略曰。天下之事。有其實而不露其形者。無所爲而不成。無其實而

先示其形者。無所爲而不敗。今德未加修。賢不得用。賦歛日重。民不聊生。將帥方割士卒以事苞苴。士卒方饑寒窮苦而生怨謗。凡吾所以自治而爲恢復之實者。大抵闊略如此。而乃外招歸正之人。內移禁衛之卒。規算未立。手足先露。其勢適足以速禍而致寇。臣不知爲此議者將何以待之也。且荆襄四支也。朝廷腹心元氣也。誠使朝廷設施得宜。元氣充實。則犁庭掃穴。在反掌間耳。何荆襄之足慮。如其不然。則荆襄雖得。臣輩百人悉心經理。顧亦何足恃哉。以今而慮。臣恐恢復之功未易可圖。而意外立至之憂將有不可勝言者。惟陛下圖之。上納其言。爲寢前詔。八年免喪。乃復除知潭州。安撫湖南。過闕見上。言曰。人君能得天下之心。然後可以立天下之事。能循天下之理。然後可以得天下之心。然非至誠虛己。兼聽並觀。使在我者空洞清明。而無一豪物欲之蔽。亦未有能循天下之理者也。因引其意以傳時事。言甚切至。上

加勞再三進職資政殿大學士以行。湖南公舊鎮威惠之在人者久而愈深。及是再至，蓋有不待教令而孚者。而公所以自律者愈嚴，所以撫民者愈寬，以是人愈畏服而敬愛之。會安南貢馴象，所過發夫一縣至二千人，除道路毀屋廬，數路騷動。公奏曰：象之用於郊祀，不見於經，驅而遠之，則有若周公之典。且使吾中國之疲民困於遠夷之野獸，豈仁聖之所忍爲也哉？歲旱，公亟遣官吏行視，蠲放田租。聞郴、道、桂陽民饑，則檄轉運、常平司移粟賑之。且慮山谷姦民乘時竊發，則又遣將益兵戍守，遂以無事。一旦茶盜數千人入境，疆吏以告。公曰：此非必死之寇，緩之則散而求生，急之則聚而致死。乃處處揭榜，喻以自新，聲言大兵且至，令屬州縣具數千人之食，盜果散去，獨餘五百許人。公乃遣兵戒曰：來毋亟戰，去毋窮追，毋遏其塗，不去者乃擊之耳。於是盜之存者無幾，進兵擊之，盡擒以歸。公獨奏誅首惡數人，餘悉以隸諸

軍。明年盜之餘黨賴文政等復入境，後帥曰：此前日養寇罪也，吾必盡誅之。盜聞其言，悉力死戰。既勦湖南軍，遂入江西，侵擾數州，官軍數敗，將吏死者數十人，爲費以數萬計。於是人乃服公爲有謀也。淳熙二年，除知建康府、江南東路安撫使，行宮留守。始至，孔目吏有爲姦利稔惡數十年者，杖而黥之，一郡稱快。會歲水旱，高下田皆不收。公首奏倚閣下三等戶夏稅，爲錢六千萬，紬絹二千疋，綿三千兩，分遣官吏行田，蠲正租米十三萬七千八百斛，雜折米又二萬八千七百斛，豆草菰菱布租稱是。又奏下漕司遣吏行屬州，視其所蠲租頗未盡者，悉以與民。又奏禁上流稅米遏糴，違者劾治如法。即在他路，亦願得以名聞，請其罪，詔從之。得商人米三百萬斛，貸椿管及總司錢合三萬萬，遣官糴米上江，又得十四萬九千斛。又奏禁州縣毋得督舊逋，以重困饑民。借常平米付圩戶堤塞缺漏，籍農民當賑貸者若干戶，十口以上一



斛六口以上八斗、五口以下六斗、客戶當賑濟者若干戶、五口以上五斗、四口以下三斗。又運米村落、從本價賑糶、合十餘萬斛、而貸者卒亦不取償焉。置局府中、以通判府事趙善珏觀察推官王以寧、前蘄州教授李宗思、新楚州教授劉煒領之、而分遣羣屬循行境中、窮山僻壤、無所不到。公又憊心疲精、廣詢博訪、夙夜不少懈。凡官吏奉行之不謹、民間冤苦之無告、幽隱纖悉、無不畢聞。縣給印曆、親書所聞、告諭獎詰、絡繹於道、無不切中事宜者。蓋本之以誠意、輔之以賞罰、是以人人爭效其力、如辦己事。起是年九月、盡明年四月、闔境數十萬人、無一人捐瘠流徙者。上嘉其績、賜書褒喻焉。公治財寬於民、而急於吏、二稅之入、所以禁其漁取、察其蠹弊者甚悉。自累鎮所施行、每益加詳。至是人被其澤尤深。凡屬縣所負課、不能償者、悉以丐之、而禁其非法病民者。至於蠲租振廩、其費又數十巨萬、而軍吏糧賜皆隨月遣給、無不

暨者。被旨壁城、面丈以萬計者數千、用錢八千萬、米千五百斛、而役不及民。又償前帥所負內庫錢三萬。上積公勞効、賜手札勞獎、賁以鞍馬器物甚厚。府學四十年不葺、弊甚。公一新之、以明道程公先生嘗主上元簿、即學祠之。且刻陳忠肅公責沈之文於壁、以示學者。建康大軍所屯、盜賊常竄迹尺籍中、吏不能禁。公耳目跡捕、每發輒得、繩以重典、盜皆相戒遁去。市里晏然、道無拾遺者。明年、進觀文殿學士。五年閏月、屬疾、再請奉祠、未報、則請致仕。上意公疾病、亟遣中使挾侍醫以來。公亦知疾不可爲、不復得見上矣。即草遺奏千餘言、首引恭顯、佞文以爲近習用事之戒、且言、今以腹心耳目寄之此曹、故士大夫倚之以媒其身、將帥倚之以饑其軍、牧守倚之以賊其民、朝綱以紊、士氣以索、民心以離、咎皆在是。願亟加屏遠、以幸天下。若羣臣之賢、臣所知者、則唯陳俊卿、忠良確實、可以任重致遠。張栻學問醇正、可以拾遺補闕。

願陛下亟召用之、則衆賢彙進而羣小黜伏矣。既又手書屬敬夫及其故友新安朱熹、仲晦父及從弟玘、皆以國恩未報、國恥未雪爲言、然後以家事爲寄。七月甲子疾革、命取前所草奏封上之、遂以是日薨于府寺之正寢、享年五十有五。訃聞、上爲震悼、始從公請、轉通議大夫致仕、贈光祿大夫、輟視朝一日。詔建康府致其喪、建寧府給葬事。公娶呂氏、兵部尙書社之女、贈新定郡夫人。繼韓氏、贈新興郡夫人。又娶其季、贈淑人、皆魏國忠獻公四世孫也。二男子、學雅、承務郎。學裘、承奉郎。二女、長適將仕郎呂欽、幼未行。六年二月乙巳、葬于甌寧縣慈善鄉豐樂里新歷之原、公所命也。公爲人機鑑精明、議論英發、遇事立斷、其威不可犯。而居家極孝慈、事繼母慶國夫人禮敬飭備。遭喪時年逾五十、執禮盡哀、以致毀得疾幾殆。友愛諸弟、晚歲彌篤。歲時祭祀、酌古今禮而敬以行之。內外功總之戚、必素服以終月數。在官爲罷燕樂、聞

同寮有喪者亦如之。福國夫人蚤薨、公哀慕無以自致。出疆侍祠、再當得任子恩、欲奏官其內弟、輒不遂。竟三奏然後得之。所治有骨肉之訟、皆召至前、喻以恩意、責以義理、反復詳盡、至或深自引咎、詞意懇切。聞者悔悟感泣、往往失其所爭而去。遺命治喪毋用浮屠法。平居樂取人善、不啻如己出。與張敬夫、朱仲晦父游、久而益敬信之。居官樂受盡言、事小失中、雖下吏言之、無不立改。以是得南豐曾摶於湖南幕府、厚遇之。公去、摶爲後帥所惡、誣奏奪其官。公在建康、力爲辨理得伸、而要路有忌公者、奏卻之、蓋其意不在摶也。公不悔、遇摶益厚。在朝廷危言正色、直前無所避、其忠義奮發、不以死生動其心。蓋得乎家世之傳。而論事之際、務在審密持重、不肯爲僥倖嘗試之舉。其侍上語、每及恢復大計、必以修政事固根本爲先。辭起復手疏盡發當時用事者大言不顧、罔上誤國之姦。大臣蓋不悅、而上獨深察其忠。其在方鎮愛



民戢吏、平訟獄、理財用、治軍旅、除盜賊、皆有科指、而尤以敦教化、厲風俗爲急務。蓋其生質雖高、聞譽雖蚤、而德成望尊、尤在晚節。故天子知之久而益深、增秩賜金、勞問狎至、蓋將有意復用之也。士大夫之賢者、平日固多豫附、其不能無私意異說者、晚亦相與歸重。及聞其喪、無賢不肖、莫不慘然相弔、恨國家失此洪毅忠壯、忘身憂國之臣也。所臨數鎮、民愛之如父母。聞訃、有罷市巷哭者。至於諸軍將吏、外暨夷狄、則於公家威名義烈服習蓋久、莫不想聞其風采。軍士固敬愛之、而虜謀者至荆襄、亦每訶今劉公於延康爲何屬也。延康蓋忠顯公舊官云。公自少即以文學知名於時、及登朝廷、入禁掖、論思潤色、當世尤稱其得體。而平居未嘗輒爲無用之文、間有應酬之作、隨輒棄去。後省駁議、又多削稿、故今存於家者文集八卷、奏議十卷、內外制二十卷而已。然公之所以自立於不朽者、有不在於空言也。珣謹按令甲、考公品

秩實應誅行易名之典、其姓名事迹又當得書信史以示來世、故敢狀其鄉里世系、歷官行事之實如右、以告于太常考功、并移太史氏。而其事關國體軍機之重者、猶弗敢盡著、尋第錄別上。謹狀。淳熙九年四月日、從弟從事郎珣狀。

朱熹撰 《晦庵先生朱文公文集》卷九七

觀文殿學士劉公神道碑^⑩

淳熙五年夏、觀文殿學士、太中大夫、知建康府事、江南東路安撫使、行宮留守、彭城劉公寢疾府舍、即拜疏言、臣病力不任府事、願上符鑰、歸死故山、惟陛^⑪下哀之。時天子方倚公以重別都、旦莫且召用之、未即聽許。而公疾已革矣。再疏請老。於是上乃深以爲憂、亟遣中貴人挾侍醫馳驛診視。未至、秋七月甲子、公召門下生^⑫、口授千餘言、使具爲奏。極言時弊、根本、且薦群臣之可用者、畢封上之。有頃而薨。上覽奏驚歎、即日出公前請老章、使以通議大夫致仕。及訃

聞益嗟悼。詔贈光祿大夫。罷朝一日。且命有司護致其喪。仍給葬事。明年二月。公之嗣子學雅等遂奉公柩葬於建寧府甌寧縣豐樂里新歷之原。而請於朝。冀有以易其名者。事下奉常。以公廉公方正。威德克就。宜諡忠肅。過考功無異詞。詔報曰可。於是公之終始哀榮無所不備。獨墓隧之碑久未克立。學雅等懼。數相與涕泣來請文。熹蚤託公諸父間。遂與公相長大。知公爲詳。而公晚歲相予亦益篤。顧雖不文。義有所不得辭也。公家唐末自長安南徙。遂爲建人。世居崇安縣五夫里。有諱民先者。敦樸有行。從安定先生受春秋學。晚以累舉得官歸家。教授學者至數百人。累贈太子太保。於公爲曾祖。太保生忠顯公諱韜。靖康之難。秉義不屈而死。累贈太師。忠顯公生徽猷。閣待制諱子羽。建炎紹興之間。佐川陝軍有功。累贈少傅。公其長子也。諱珙。字共父。少以恩補承務郎。長從季父屏山先生學。舉進士乙未科。調監紹興府都

稅務。潭州南嶽廟主管。西外敦宗院。遭少傅及祖母韓國夫人呂氏憂。除喪。爲諸王宮大小學教授。權秘書省校勘書籍官。禮部郎官。中書舍人。時秦氏用權久。士大夫已竊竊言符讖事。檜欲因以追諡其父。召會禮官議問其法。以公不時至。怒而逐之。踰年。檜死。乃得主管台州崇道觀。召爲大宗正丞。改祕書丞。遷尙書吏部員外郎。除監察御史。避薦者。還故官。銓曹法密吏姦。官不能制。公真令式庭中。使選集者得指其違以詰吏。人甚便之。兼權祕書少監。遷起居舍人。兼權中書舍人。金亮渝盟。天子震怒。悉師北伐。一時詔檄多出公手。詞氣激烈。聞者或至泣下。御史杜莘老劾大闔張去爲忤旨左降。公封還詔書。莘老得不去。從上幸建康。兼權直學士院。時張忠獻公留守行宮。衆謂車駕東還。必以征討軍事爲寄。俄而詔下。乃以楊存中爲江淮宣撫使。中外大失望。公奏論其不可。上曰。此特爲張浚地耳。命再下。宰相召公諭旨。且



曰、再論則累張公矣。公曰、某爲國家計、豈暇爲張公謀哉。再論愈力、事乃寢。眞除中書舍人、直學士院。會詔立建王爲皇太子、宣入視草。今上即位、借禮部尙書使金國。是時南北甫罷兵、始爲鈞敵之禮、使者往輒困辱而歸、人皆爲公危之。公受命慷慨、戒家人悉裘葛兼副以行、曰、藉令不死、歸未可期也。上聞副使以賄除吏、而公獨無所私、手札褒諭甚寵。然竟以議禮不決、不果行也。詔以星變旱蝗、大詢闕政。公言、比年以來、綱維解縱、有賞無罰。外則諸將刻剝軍士、以事交結、內則朝廷不恤諸路、路不恤郡、郡不恤縣、縣不恤民、甚或重爲貪虐、以快己私。軍民之怨、日積于下、其禍將有不可勝言者。願陛下擴恭儉日新之德、屏馳騁無益之戲、登崇俊良、斥遠邪佞、然後信賞必罰、戢近懲遠、以修軍政之闕、節浮冗、寬賦歛、精擇郡守、誅鋤賊吏、以厚吾民之生、則災異庶乎其可消矣。間又嘗爲上言、應敵無一定之謀、而疆國有不易

之策。夫曰和、曰戰、曰守、皆所謂應敵之計、不可預圖者。惟修政事以彊國勢、使三者之權在我、而用無不利、乃爲不易之策耳。故將田師中死、其家請得賜第京師。又有李珂者、以關通貴幸得官、而自奏求爲督府掾。詔從中下、公皆奏以爲不可。不聽。再奏極論、竟皆罷之。然由此遂多忤近習意、而宰相又有陰忌公者。出公爲集英殿修撰、知泉州。未行、改知衢州。始至、委事僚屬、一無所問。人或以公未更治民、意頗輕之。旣而欺者得枉者伸、羣下歛手、不能有所爲。始大畏服。凡吏員外置者、悉罷之。受租米、使民得自操概。其發鈔消籍、皆有程式。田里大安。乾道元年、湖南旱饑。郴州宜章民李金以縣抑買乳香急、乘衆怒猝起爲亂、衆踰萬人、分道南出、犯廣東、西九郡之境。還入道州、桂陽軍界、殺掠萬計。連破郴、桂兩城、數道大震。朝廷憂之、以公爲敷文閣待制、知潭州、荆湖南路安撫使。公受命兼行、以五月入境、則賊衆已數萬人矣。亟

以實奏請下荆襄發卒奔命。且移書制置使沈介曰：道遠賊熾，比詔下，且不及事。請以便宜出師，即朝廷以擅興爲罪，吾自當之，不敢以累公也。制置使即爲遣兵而詔報亦如公請。然皆未有至者，而賊勢愈張。湘陰橋口羣盜又數百人乘亂竊發，密邇府下，人心益搖。公簡役兵擊之，募民有得盜斬首者，皆厚其賞。盜所隱賊無多少，官一不問。不數日，悉捕斬無脫者。於是賞信刑威，士氣大振，人知破賊之有期矣。六月，制置使所遣將田寶、楊欽乃以其兵數千人至，公所。以迎勞慰撫之者甚厚。諸軍感奮，願盡死力。公與欽語，知其能，檄諸軍皆受節度，使率其衆鼓行而前。下令募賊徒相捕斬詣吏者，除罪受賞。於是欽等連戰破賊，諸將後至者亦遣四出，以分賊勢，通糧道。大軍遂入宜章。八月，鑾龍岡下，賊兵數萬，自辰至申，官軍稍卻。欽被髮大呼，策馬橫衝之。賊分爲兩，其前列精兵殲焉，餘皆遁走。追至莽山，賊黨曹彥、黃拱遂執李

金與其腹心黃谷以降。欽因窮追深入，盡誅其酋豪，而支黨脅從竄匿山谷者尙衆。公諭欽等卻兵而聽其自詣，則皆相率聽命。歲盡師還，金等數十人皆伏誅，餘皆稱詔釋之，復故田宅者以千數。奏官曹彥、黃拱而列上諸將功狀，又不以一毫有所私。上嘉歎再三，進職敷文閣直學士，且賜璽書曰：近世書生但務清談，經綸實才蓋未之見。朕以是每有東晉之憂。今卿既誅羣盜，而功狀詳實，諸將優劣，破賊先後，歷歷可觀。宜益勉旃，以副朕意。賊地既定，境內正清。於是公乃宣布上恩，力行寬政，且爲請於朝曰：今以陛下神靈，雖幸破賊，然不亟擇守宰，寬賦歛以安居民，即一李金死，一李金生，臣恐湖南自是無寧歲也。又奏留鄂兵以戍郴、桂，而益廣蒐募以補州兵之缺，厚撫犒嚴紀律而時勒習之。於是湖南隱然爲重鎮，姦盜屏迹，商旅復野宿焉。三年召還，見上，首論獨斷雖英主之能事，然必合衆智而質之以至公，然後有以合



乎天理人心之正、而事無不成。若棄僉謀、徇私見、而有獨御區寓之心焉、則適所以蔽其四達之明、而左右私昵之臣將有乘之以干天下之公議者矣。次論稅絹退剝、羨餘和糴之弊、又以州郡禁軍紀律不明、驕惰自恣、請亟選武臣之奮行伍、習戎事者、使爲將副、責以訓練、而貴游子弟、閤門國信、五房出職之輩、不得與焉。上皆然之、以爲翰林學士、知制誥、兼侍讀、間復從容言於上曰、世儒多病漢高帝不悅學、輕儒生。臣竊獨以爲高帝之明、其所不悅、特腐儒之俗學耳。誠使當時有以二帝三王之學告之、臣知其必將竦然敬信、而功烈所就不止此矣。因爲上言聖王之學所以明理正心、而爲萬事之綱者甚悉、上亟稱善。是歲小不登、公請亟詔監司郡守先事條畫荒政所宜、不者亦使任其無他。又奏州兵營伍教戰之法甚備、事皆施行。十一月、遂拜中大夫、同知樞密院事。公辭不獲、乃進言曰、汪應辰、陳良翰、張栻學行材能皆

臣所不逮、而栻窮探聖微、曉暢軍務、曩幸破賊、栻謀爲多。願陛下亟召用之。上可其奏、以次登用焉。公入西府、日召諸軍將佐從容訪問、盡得其材用所宜、以待選用。一日、上顧輔臣、圖議恢復。公曰、復讎雪耻、誠今日之大計、然所以求之、必有其道。臣願陛下以周宣王爲法、側身修行、任賢使能、以圖內修之實、則外攘之効將有不能自己者。計不出此、而欲淺謀輕舉、以幸其成、臣未見其可也。上悅。明年七月、詔兼參知政事。公方與一二同列夙夜悉心竭力、益圖所以叙進人材、寬養民力、討理軍政、卒成上意之所欲爲者。蓋除福建鈔鹽歲額二萬萬、罷江西和糴及廣西折米鹽錢、又蠲諸路累年逋負金銀穀帛巨億計。而公尤以輔成上德、振肅朝綱、抑僥倖、獎廉退爲己任、以是近倖側目、而流俗亦多不悅。蓋上嘗以久旱、齋居請雨、一夕而應。諸公皆賀、公復進言曰、陛下誠心感格、其應如響、此足以見天人相與之際、眞有不容髮

者矣。然則隱微之間、纖介之失、其應豈不亦猶是乎。臣願陛下察此而益謹其獨焉、則天下幸甚。上爲竦然改容稱善。龍大淵、曾覲既逐去、未幾而大淵死。上憐覲欲還之、公言、二人之去、天下方仰威斷而慶盛德之日新、柰何遽復爲此。且此曹奴隸耳、憐之則厚賜之可也。若引以自近而賓友接之、至使得以與聞幾事、進退人材、則臣懼非所以隆德業而振綱紀也。上感其言、爲止不召。殿前指揮使王琪嘗密薦士、得召用。公請其所自、上以琪告。公退、坐堂上、呼院吏作頭引琪至而詰之。琪恐懼、不能置對、請後不敢、乃叱遣去。無何、揚守來言、琪嘗檄郡、稱受密旨增築新城若干尺。公與諸公請之、則上未嘗有是命也。公未出殿門、遣吏馳取其牘。琪不得隱、遂以罪罷。諸公因奏、自今聖旨不經三省密院者、所下之官皆請俟奏審乃得行。上欣然從之。公即從密院移中外諸官府、而內侍省與焉。明日、忽復有旨、前奏審事勿行。因諭

諸公、即如此、則禁中或時須一飲食、亦必待奏審然後可得耶。公即以藝祖熏籠事對。退、又與諸公合奏言曰、朝廷者、陛下之朝廷、命令者、陛下之命令。臣等典司出納、不敢廢職而已。今方舉行舊典、以正紀綱而已、出復收、中外惶惑、臣等竊爲陛下惜之。時諸公雖更進合辭、而公尤激切。殿中皆驚。以故獨罷爲端明殿學士、使奉外祠。上意尋寤、亟詔改知隆興府、江南西路安撫使。公入辭、猶以開廣言路、講明聖學、敦本節用、虛己任賢、斥遠邪佞、選將撫軍數事爲獻。上蹴然曰、卿雖去國、不忘忠言、而材又非他人所及。行召卿矣。至鎮、首蠲稅務新額、及罷苗倉大斛。屬邑奉新有複^⑥出租稅、攤配諸鄉、歲久民窮、相率逃去、反失正稅不勝計、亦奏除之。又除二稅合零、租米暗耗、免役足錢之弊。人或爲公憂不足、而公量入爲出、未嘗有所乏也。明年、除資政殿學士、知荆南府、荆湖北路安撫使。始至、條上荆襄兵少財匱之狀、詔即諉公

經畫。公因行視襄鄂兵屯、並邊形勢、盡得其實以聞。凡回圖役使、詭名虛籍之弊、與夫部伍教習之法、有不善者、皆奏罷之。先是、荆南兵戍襄陽者、累年不得歸。公奏爲半歲番休之法、春夏三軍、秋冬四軍、更迭往來、軍士感悅。荆襄故有民兵、皆農家子、敦樸豪勇、土著自愛、且居近邊、知虜情、輕戰鬪。比稍墮廢、公更爲簡閱、寬其取丁之數、貧者弛其賦役、隨鄉團結而歲閱習焉。其資糧械器、亦爲處畫、各有條理。撫循犒賞、歲費錢一萬萬、而不以一介有取於民也。明年、遭繼母慶國夫人卓氏憂。又明年、起復同知樞密院事。荆襄宣撫使、遣中使奉璽書、即喪次宣押奏事。公引經援禮、涕泣懇辭、凡五六上、不得請。時宰相方以恢復大言中上意、而政事不修、舉動煩擾、識者憂之。公乃手疏別奏、具言天下之事、有其實而不露其形者、無所爲而不成、無其實而先示其形者、無所爲而不敗。今吾所以自治而爲恢復之實者爲如何、而乃外

招降附、內徙營屯、規算未立、手足先露、其勢適足以速禍而致寇。臣不知爲此議者將何以待之也。且荆襄四支也、朝廷腹心元氣也。今不憂元氣之憊而慮四支之不彊、非臣之所敢知也。上納其言、爲寢前詔。八年免喪、乃復除知潭州、安撫湖南。過闕、見上言曰、人君能循天下之理、然後有以得天下之心而立天下之事。然非至誠虛己、兼聽並觀、使在我者空洞清明、而無一毫物欲之蔽、亦未有能循天下之理者也。因以極論時事、言甚切至。上加勞再三、進職大學士以行。公再臨舊鎮、不懈益虔、蓋所以自律者愈嚴、而所以撫民者愈寬、以是人愈畏服而敬愛之。歲旱、民饑、公亟遣吏行田蠲租如法、而檄轉運、常平司移粟諸郡。且慮姦民乘時竊發、則又遣將益兵戍守、遂以無事。一旦、湖北茶盜數千人入境、公盛軍聲以威之、而開其自新之路、盜多散去、其存者蓋無幾人。公乃遣兵、然猶深以迎戰邀擊爲戒。盜意益緩、於是一戰



敗之、而盡擒以歸、獨誅其首惡數人、餘悉以隸軍籍。明年盜之餘黨賴文政等復入境、後帥欲盡誅之、盜因悉力死戰。既勦湖南軍、遂入江西、犯廣東、官軍數敗、將尉死者數十人、爲費以大萬計。於是人乃服公爲有謀也。淳熙二年、除知建康府、安撫江南東路、留守行宮。會水且旱、公奏閣夏稅錢六千萬緡、蠲秋苗米十有六萬六千餘斛、沿納他物稱是。仍請下漕司、遣吏覆視諸州所蠲租、其頗未盡者、悉以予民。禁上流稅米遏糴、即他路有敢違者、請亦得以名聞、抵其罪。詔皆從之。以是得商人米三百萬斛、散之民間。又貸諸司錢合三萬萬、遣官糴米上江、得十四萬九千斛。籍農民當賑貸、客戶當賑濟者、戶以口數給米有差。村落又皆運米置場、平價賑糴、而貸者卒亦不取償焉。以府佐趙善珏、王以寧及寓士李宗思、劉煒領其事、分遣群屬循行境中、無遠不到。公又蚤夜咨訪、幽隱畢聞。縣給印曆、手書告諭、誠意既孚、而賞信罰

必是以人爭效用、如辦己事。起是年九月、盡明年四月、闔境數十萬人、無一人捐瘠流徙者。上嘉其績、賜書褒諭焉。公治財寬於民、而急於吏、所以禁其漁取、察其蠹弊者甚悉。自累鎮所施行、每益加詳。至是人被其澤尤深。凡屬縣所負課、度不能償者、悉以丐之、而獨重禁其非法病民者。被旨壁城、面以丈計者數十萬、用緡錢數萬、米千餘斛、而役蓋不及民也。上積公勞效、手札勞獎、賫以鞍馬器物甚厚。明年進觀文殿學士、蓋將復登用之、而公病不起矣。臨沒時、所上疏極言近習用事之禍、至引恭顯、伾文以爲戒。所薦則故相魏國陳公、桂帥張栻、敬夫也。別以手書訣敬夫、而熹亦與焉。其言皆以未能爲國家報雪讎恥爲深恨。蓋其忠孝誠篤、雖蹈死生之變、而未始須臾忘也。公爲人機鑑精明、議論英發、遇事立斷、其威不可犯。而居家極孝慈、母福國夫人熊氏早薨、公哀慕無以自致、則以任子恩官其內弟。事繼母禮敬飭備、



遭喪時年逾五十、盡哀致毀、得疾幾殆。友愛諸弟、晚歲彌篤。歲時祭祀、酌古今禮而敬以行之。內外功總之戚、必素服以終月數。在官爲罷燕樂、同寮有喪亦如之。將薨、遺命治喪、毋得用浮屠法。後諸賢公往往效之。其在州郡治平聽察、令行禁止、而於愛民厚俗之意尤孜孜焉。事或小失、雖下吏言之、無不立改。大脩潭州嶽麓書院、養士數十人、而屬張子敬夫往遊其間、告以古人爲己之學。謂明道程公先生嘗官建康屬邑、爲之立祠學官、而刻陳忠肅公責沈之文於壁、以示學者。民有骨肉之訟、躬以恩義反復辨告、甚或深自引咎、聞者皆失所爭而去。其在朝廷、危言正色、直前無所避、忠義奮發、未嘗以死生動其心。而愛君憂國、審密持重、不肯爲僥倖嘗試之舉。蓋其飭躬應事、規模科指、晚歲皆益精密。故上則人主知之愈深、下則學士大夫望之愈重、以至兒童走卒、莫不知公之忠烈。而在荊州時、北虜亦每使諜者訶公家世、

蓋知其忠義之有傳也。及薨、所臨之邦軍民往往罷市巷哭、相與祠之、而建康爲尤盛。且自數歲以來、國家每有四方之故、而有識之士相與私憂、語未嘗不及公也。公薨時年五十有七、封彭城郡開國侯、食邑一千六百戶、食實封二百戶。其配曰新定郡夫人呂氏、故兵部尙書社之女。新興郡夫人韓氏、淑人韓氏、皆魏國忠獻公四世孫也。二男子、學雅、承務郎、學裘、承奉郎。二女、長適迪功郎、南劍州劍浦縣尉呂欽、次適某官趙崇憲。文集八卷、奏議十卷、內外制二十卷、藏於家。公自少即以文學知名、及登朝廷、論思潤色、當世尤稱其得體。然未嘗爲無用之文、其駁議又多削稿、故所傳止此云。學雅以公從弟從事郎玘所狀公行事視、熹受而讀之、皆昔所見聞者也。因刻其大者、著之石而系以銘。銘曰、昔在陽九、失我泰平。東游三紀、汴洛羶腥。帝始靈承、俯仰顧歎。曰汝在廷、孰抗斯難。爰有俊哲、三世一心。

忠精義烈思遠憂深。沫血奮辭曰此讎耻乃盟乃歡。顙得無泚。不有豪聖孰慮孰圖。孰秉武節以行天誅。抑臣有聞在周中圯既脩乃攘厥仆斯起。惟聖時監利伸否蟠。毋棘其欲毋溺其安。帝曰俞哉予欽汝誨。既啓于中盍布于外。澤流威燁汝則來歸。卒輔吾志以究汝爲。四鎮十年帝適西顧。彼皇顙蒼胡奪之遽。我最其迹有孝有忠有政有事有言有功。嗟爾嗣人尙承厥慶。公思不忘天子聖神。

朱熹撰 《晦庵先生朱文公文集》卷八八

校記

①自：宋淳熙刻本《晦庵先生朱文公文集》作「日」。

②比：原作「此」，據《晦庵先生朱文公文集》卷八八《劉珙神道碑》及淳熙刻本改。

③盜：原作「益」，據宋淳熙刻本《晦庵先生朱文公文集》改。

④有：原缺，據右引補。

⑤累：原作「系」，據右引改。

⑥敦：原作「敦」，據宋浙江刻本《晦庵先生文集》改。

⑦部：原作「步」，據右引改。

⑧者：原缺，據宋淳熙刻本《晦庵先生朱文公文集》補。

⑨盜：原作「鹽」，據卷八十八《劉珙神道碑》改。

⑩此碑與卷九十七《劉珙行狀》大段文字相同，今并收入，可以互校。

⑪陞：原作「陞」，據宋浙江刻本《晦庵先生文集》改。

⑫生：原作「主」，據右引改。



宋儒

⑬二：原缺，據《劉珙行狀》補。

⑭乙：原作「一」，據宋浙江刻本《晦庵先生文集》改。

⑮災：原作「大」，據《劉珙行狀》改。

⑯複：原作「復」，據宋浙江刻本《晦庵先生文集》改。

⑰及：原作「反」，據右引改。

宋儒碑傳集卷一百二十六

胡季懷 程大昌 丁泰 王頤 翁蒙之

劉夙 劉朔 謝源 江泳

季懷姪墓誌

乾道庚寅九月中浣姪孫柯抵書行在所曰柯不夭考一疾不起屬纊時八月二十三日也享四十有八年曾祖拱辰學有根源屢中進士舉婆娑丘園以終祖權有隱操父鈇以國學免解試禮部不中歸林泉考幼孤能自植立志學攻苦逮壯與計偕聲震場屋連不得志於春闈乃於廬陵之永和鎮築室榜曰時中著書訓子號明儒方凡二十有五卷大概發明大學之說又著易筌蹄一卷詩集二十卷周官類編五卷春秋類例十五卷屬比五卷左氏類編十卷文集十五卷皆藏於家娶羅氏主簿孝逸先生之女男六人柯秘桷札棣榆女二人長適士人任日就次尙幼孫女一人以其年十二月丙午葬於吉水縣中鵠鄉

龍塘之原。考易簣之際。意欲得老人書於石以託不朽。老人幸哀其意。而特書焉。吾發書驚。即其日爲位哭曰。哀哉季懷。痛哉季懷。而止於斯耶。復哭之以詩云。四十餘年一夢寒。平生篤學困瓢簞。傷心一念鳥驚哭。灑淚數行風裊殘。苦海要除根豈易。甘泉欲去本非難。何時得請臨其穴。緣斷三生指漫彈。時秘書少監直學士院周公子充來會。哭曰。吾亡友也。能無一言以寫予悲。亦用我韵哭之云。詞鋒激烈劍鋌寒。素蘊輝光珠在簞。萬里未行騏驥死。百圍將半豫章殘。山中宰相今誰繼。地下修文古亦難。一讀名章二太息。淚流何待雍門彈。是爲銘。

胡銓撰 《胡澹庵先生文集》卷二八

龍圖閣學士宣奉大夫贈特進程公大昌神道碑

故吏部尙書程公以龍圖閣學士就第。踰年而卒。其子準等持兵部侍郎楊公大法所狀行實屬予以銘。



予與公同年進士、數嘗同僚、厚我莫如公、知公莫如我、其何敢辭。恭惟孝宗皇帝聖學高妙、勵精政事、尤有知人之明。惟公歷兩省六曹、以該洽直諒見知、相與論道、統平政體、在廷少比。公亦忘身徇國、思爲朝廷植悠久之計。其在外則心乎愛民、長慮卻顧、未嘗便文自營、士大夫皆以不大用爲恨。及事壽康皇帝、興念舊僚、疊加恩禮、而左右乏裏言、公亦老矣、無意仕進、得謝於家、盡發所蘊、著書立言、啓迪後生。蓋其自幼至老、襟祥卜祝無所信、玩好技藝無所嗜、唯通經評史、考古驗今、一事未詳、一理未窮、弗措也。其始終大概如此。若乃爵里議論、則可一二數矣。公諱大昌、字泰之。按程氏其先出自重黎、周有休父、封於程、地在關中、子孫散居西北。有開府儀同三司靈洗者、效節蕭梁、著功於陳、封忠壯公。南史以程安爲新海寧人、即今徽州休寧也。厥後或北歸、或遂留、故公爲休寧人也。曾祖晟、娶洪氏。祖士彥、娶金氏。父呖、累贈

正奉大夫。妣淑人陳氏、世積善尙義、孜孜教子。至公穎悟殊常兒、十歲能爲文。紹興癸亥重立太學、年甫冠矣、一試即與選、學官爭爲延譽。二十一年、登進士第一、左迪功郎、主吳縣簿。丁正奉憂、服除、獻文於朝、宰府奇之。二十六年、除太平州教授、明年召爲太學正。三十年、詔館職必試、乃除。初召朱熹、載等、再召劉儀鳳等、皆辭。上命宰職擇人、不許辭。以公應詔、仍諭上旨、遂除秘書省正字、改左宣教郎。三十二年六月、孝宗受禪、擢著作佐郎。初政銳意事功、命諭四出、貴近或預密議、公因輪對及之。尋命百官條弊事、公又極言、漢石顯知元帝信己、先請夜開宮門之詔。他日故投夜還、稱詔啓關。或言顯矯制、帝笑以前詔示之。自是顯眞矯制人不復言。國朝命令必由三省、防此弊也。請自今被御前直降文書、皆申省審奏、乃得行、以合祖宗之規。以防石顯之奸。又論、去歲完顏亮入寇、無一士死守、而兵將至今策勳未已。惟李寶捷膠

西、虞允文戰采石、實屠亮之階、今寶罷兵、允文守夔、此公論所爲不平也。上韙其言。三皇子就傅、遴擇宮僚、九月以公爲尙書駕部員外郎、兼恭王府贊讀、又兼兵部郎官。隆興元年、兼慶王府直講。十二月丁母憂。乾道二年春服闋、召爲考功員外郎、六月復兼恭邸贊讀、八月遷國子司業。三年十二月、兼權禮部侍郎、一時文柄舉屬公。其成就人才不可計、凡今老師宿儒多公門生也。五年正月、兼權直學士院、宣對於選德殿。上曰、朕治道不進、如何。公知上志在恢復、迎合者多、即奏、陛下勤儉過古帝王、北虜自通和、知尊中國、不可謂無效。但當求賢納諫、使政事日修、則大有爲之業在其中、不必用迎合之言、求奇策以幸速成。又言、淮上築城太多、緩急何人可守。臣謂設險莫如練卒、練卒則在選將。上深然之。後數日再召對、上曰、卿前言朕儉是也、獨病風俗太奢、用度不足、今早與大臣議立法以止之。公奏、居室衣服、吉凶之禮、皆

由著令、要在上之人持久以化之耳。上又問、卿更有何事爲朕言之。公曰、事有大小、有先後。今四方獄案必經聖覽、大臣因是亦困省閱。何暇議大事、急先務乎。往陛下嘗增左右司爲四員、若漸復減員、分以委之、中書之務清矣。後數年、迄如公言。八月除直龍圖閣、江東轉運副使、蓋公求試民事、故以鄉部寵之。公引嫌改浙東提點刑獄。越帥多大僚、適歲豐、酒稅溢額、漕臣不敢問、乘公攝帥、遣其屬挾朝命括羨財、且將增額。公力拒之、曰、某寧罪去、不可增也。越人迄今德公。七年、復徙江東運副、詔勿引嫌。公猶不自安、踰年乞祠、就徙江西路。公曰、可以興利除害、行吾志矣。九年歲歉、出錢十餘萬緡代輸贛、吉、臨江、南安四郡五等夏稅折帛、遏饑民爲盜之原、又遷吉安造船塲於臺治、以省費革弊、凡吉舊欠皆捐之。清江縣有破坑、桐塘兩堰、堤江四十里、護田千三百^③七十頃、民居陸地又三百頃。堰壞四十年、歲罹水患、公力復

其舊。又奏漕臣遇代、積累欠數病州縣、乞行蠲削。淳熙元年冬^④、詔可。凡乾道七年、八年諸路欠稅賦、丁役及他錢物、併除之。由公一言、上恩及天下矣。歲滿再任、進告不下、宰執問其故、上曰、程大昌職事修舉、自合加職。乃陞秘閣修撰。二年四月、召爲秘書少監。九月兼權中書舍人。六合塔僧以鎮潮爲功、求內降給賜所置田產、仍免科徭。公奏、二稅外和預^⑤、買折帛正額、額外科借皆科也、保正長身丁雜役皆徭也。僧寺旣違法置田、復移科徭於民、奈何許之。況自紹興二十二年修塔之後、潮果不齧岸乎。御前置忠銳忠武軍、以浙西路鈐轄李師古兼統制、帶御器械戚世明兼訓練、援例增請給。公執不可、其命俱寢。俄兼崇政殿說書。二年四月除權刑部侍郎、升侍講。五月兼國子祭酒。公言、辟以止辟、未聞縱有罪爲仁也。今四方讞獄例擬貸死、臣謂有司當守法、人主察其可貸則貸之、如此則法伸於下、仁歸乎上矣。上以爲然。

舊法、宰執初除、轉廳皆有給賜、減半^⑥。其後太尉使相、三少而上往往取旨視樞密使、都官用例、浸失法意。公請自侍從而執政、自執政而相、則爲初除、法當全與、餘爲轉廳、皆減其半、遂爲定制。上知公持正不避怨、滋欲用之。四年八月兼給事中。江陵統制官辛逢原縱部曲毆百姓、守帥辛棄疾謂曲在軍人、坐徙豫章。公極論不可。上曰、朕治軍民一體、逢原已削兩官、降本軍副將矣。康與之在紹興時、以談諧進、後坐事長流廣南、至是有與爲地、刊除舊犯、還其資歷。公封還敕黃。上喜曰、待遷擢卿、其益盡心、無避忌。十月落權字。五年正月同知禮部貢舉、御製原道辨、尋易名三教論、獨公與聞之。六月進吏部右選侍郎、兼同修國史。舊小使臣注令尉若監鎮兼煙火者、驗老病而已、公以其親民、面令讀律、且詰其大旨、不通者輒罷遣。八月兼權吏部尙書。六年夏、正除權吏部尙書。公遇事啓請、知無不言。如論軍中強壯子弟及西北



伉健之人不可輕聽離軍、禁衛不以膂力進、今率三年輒補外官、用違所長、宜留實三衙。又欲酌紹興舊制、命諸軍挽強轉資、稍示勸誘。又請究歸正僞冒、裁減添差、以寬州郡。面奏堂白累萬餘言。會舉行中外更迭之制、公力請郡、是冬除敷文閣直學士、知泉州。陛辭、上諭曰、凡有見、悉奏來。自南渡後、泉爲台、信、建、邵、武四郡代輸銀二萬四千兩、諸縣并緣苛歛預借。公條便民事具言本末、有司持之未下。明年首爲民代輸一年、且乞禁絕後日預借、又蠲前歲秋苗之未輸者。八年春汀賊沈師作亂、詔并剿其徒。公請罪止渠魁、赦其脅從、仍許徒衆相糾、可使亡命解散、不然數州據亂、是堅其附賊也。宰相然公言、奏行之。是冬、沈師獨與死黨竄伏漳州山谷間、距城百餘里。州有左翼軍戍將蕭統領者卷甲赴之、逮夜力疲、搏賊不勝死焉。閩中大震、漕檄左統制裴師武出兵。師武置司在泉、謂帥符未下、不敢擅興。公手書趣之曰、事

急矣、有如帥責、君可持吾書自解。又取前得釋脅從之旨、散榜以間其黨。師武至漳、群情頓安、捕獲謀者十餘曹、皆積藏兵器、謀刻日縱火爲賊內應。微公先事從權趣師武行、漳且屠矣。太守劉正義、郡人今左司郎中鄭公顯馳書謝公曰、城邑獲全、公之賜也。終更、提舉江州太平興國宮。十三年秋起知建寧府、十四年復提舉南京鴻慶宮。自公爲郎、首侍壽康於王邸、多所宏益、其後間謁東宮、必款語移時。嘗用家人禮許見、今上及公主親取寶器酌酒飲公。受禪之初、與宮僚一等推恩。紹熙元年加寶文閣直學士、旋知明州、示將復用、遽以祠歸。四年超進龍圖閣直學士。明年請老、進本閣學士致仕、皆非常典也。慶元改元十一月甲申、以疾不起、享年七十三。積官宣奉大夫、爵新安郡開國公、食邑二千一百戶、食實封一百戶、贈特進。公自宦遊去鄉里、樂吳興溪山之勝而卜居焉。晚得安吉縣梅谿鄉邸間山。規營塋域未成。



而卒。淑人陳氏、公母之從兄女、生百日、值方臘亂、父母攜匿谷中、祝曰、兒若貴、勿啼。自是悄然。既長歸公、事舅姑以孝聞、生諸子躬自鞠育。公嗜書、未嘗省家事、賓祭孔時、淑人力也。年七十六遭公喪、謂諸子曰、吾得從而父足矣。病不服藥。後公四十七日、安然而逝、遂合葬焉。二年四月辛酉也。四男、準、朝、散、郎、新通判太平州、本、早世、阜、朝、奉、郎、知上元縣、覃、宣、教、郎、新浙西茶鹽司幹辦公事。三女、適承直郎、監行在文思院都門鄭汝正、次適奉議郎、新知湖州武康縣丁大聲、季早亡。孫三人、端復、登仕郎、端節、端履、以遺澤補官。孫女三人。公有文集若干卷、別著禹貢論五十二篇、辨江河淮漢濟、弱水、黑水甚詳、凡諸儒捨經泥傳、注失禹本指者、一皆正之。又爲山川地里圖、端明殿學士汪公應辰博洽重許可、讀之大嘆服、謂不可及。公在講筵、遂以進御、天語嘉獎、今行於世。別有演蕃露六卷、考古編、易老通言、易原、雍錄四書各十卷、北

邊備對六卷、書譜二十卷、取^⑤五十八篇互相發明、篇^⑥爲一論、抉隱正譌、尤有功於學者。嗚呼、若公可謂博學篤志者矣。銘曰、

浩浩千古、孰知其津。擾擾萬生、孰致其身。偉歟程公、絕類離倫。氣以直養、業以精勤。士之指南、國之寶臣。其在兩禁、昌言復君。使於四方、仁心庇民。胡不弼諧、迄其經綸。歸而著書、極道之真。既沒言立、庶幾不泯。自歎而湖、肇自於今。有式新阡、尙考斯銘。

周必大撰 《平園續稿》卷二三

贈奉直大夫丁公墓誌銘

寶慶元年秋、軍器監丁黼文伯過史臣魏某言曰、黼不天、吾父奉直府君以慶元二年□月棄諸孤、厥□年□月葬于石埭縣舒溪之南曰鸞溪。黼雖貧、凡以致其誠信于親者、既不敢不勉、惟未有以銘吾竊也。敢以前達州王侯東所次行治、將子是屬。某曰、墓必有銘、漢魏之未造也。文伯方以正學直道爲時聞人、

茲其顯敷不已多乎、而必銘之云。雖然、余定交于文伯既二十年、知其世爲詳。余曷敢不銘。公諱泰、字巖老。丁氏故梁人、自漢將軍寬以易授同郡碭田王孫。碭沛相近、其後徙沛。公之曾大父洪、贈訓武郎。大父執中、武德郎、溫處衢、婺四州都巡檢使。父述、徐州鄉貢進士。公生四年而遇靖康之變、江淮盜起、馬吉等剽池之青陽石埭。武德以嘗中材武科入仕、與討方臘有功、遂以選差青陽之武尉、督捕羣盜。未幾、虜入汴、迫徐、貢士攜家由清河趨淮陰、以達于青陽。丁於沛爲右族、自經亂離、南來者僅兩院。武德其一也。武德往來石隸、經理平寇、愛其山水清麗、因託居焉。相傳至貢士、猶夢寐故疆之歸、故流移再世、未嘗治產業也。公幼而明晤、日記二千言。時版本文字尙少、經傳史漢書、皆晝抄夜誦。漢晉以來詩文、亦手自編萃。善古文、於詩尤長。以餘力爲舉子業、率先諸子鳴遠近、爭辟塾延之。其後疾不能出者十年、皆負笈踵

門、諸從子亦從受業。黼時年十四、已知爲學之要。會永嘉徐子宜爲郡教授、公慨然挈往從之。徐雅敬公、留與共學、參授後進、而訓黼以語、孟、庸、大學。黼幼從公、誦言觀行、漸漬已久。至是一聞義理之誘、氣竦神悟、卒爲成材。公資稟勁直、務質行、不蘄人知、不輕爲然諾。在貢士侍側、色莊而氣怡。貢士卒號毀骨立、事母臧夫人、晨興候戶外、昏定率至夜分。夫人自過江、痛家族流離、不肉食。公食輒不擇、有嘉疏旨畜、必問奉夫人已否。夫人年八十二而卒、公老猶致毀。與二弟處、極其和孺。嗚呼、公之學、其亦異乎世之所謂學者矣。享年七十有四。元配章氏、繼室孫氏、前後凡五男六女。長男輝、次耀、次某、爲叔父某後。次黼、次黻、輝、耀、某、黻、尋卒。黼今以朝請大夫爲軍器監。六女各得所歸。孫男四人、鑄、鎰、未仕。鎬以軍器任爲將仕郎。銘從事郎、紹興府司理參軍。孫女五人。曾孫男女四人。銘曰、

徐沛之間、鄒魯所鄰。質實近本、故家典刑。公生不辰、逢世孔填。風氣之感、則厚且純。冲約自持、碩蹇亨屯。東周之思、西方美人。允毅丁公、則我思存。

魏了翁撰 《重校鶴山先生大全文集》卷八一

王叔雅墓誌銘

叔雅王氏諱頤。九世祖該、自太原徙家吉之廬陵。又徙安福。曾祖祥、祖爽、皆隱德不仕。父庭珪、字民瞻、登進士第、終官左承奉郎、直敷文閣、主管台州崇道觀、號瀘溪先生云。叔雅自束髮受書、性警敏、六經百氏、悉鉤其深、尤邃於春秋。初、文定胡公過瀘溪先生草堂、與先生講春秋、叔雅從傍聽之、即能陳說大義、筆削袞斧、洞視聖秘。諸儒陳陳一武不隨。夏秋侯卿讞以王法、恕不及漏、戚不病刻、然輦悅其詞、以賈於時。我實耻之。一再試於有司、即棄去。曰、持古晞今、可乎。先生詩句得法於杜子美、自江西而下、不論也。叔雅少從先生賦、早行篇、先生驚喜曰、吾子亦能詩乎。遂

授以句法。龍圖閣學士胡公以直言謫嶺表、先生以詩送行、有名高北斗、身落南州之句、人爭傳誦。一日、滿四海、權臣聞而惡之、下江西帥司、興詔獄、名捕先生、叔雅泣以從、父子俱繫獄。叔雅請於決曹掾蘇庠曰、吾父老矣、願以身代之罪。若笞死、瘐死、唯命、翦之市朝、亦唯命。願以聞焉。蘇喜受辭、白帥、帥怒、屏不奏。先生竟謫夜郎。既赴貶所、族大口衆、不能偕往、留叔雅經紀家事。夜郎猩咆鼯嘯、非人所居、崖路攀天、下則入井、距家二千餘里、叔雅徒步省覲、^①抵足血指、一歲再行、行不可至、至不忍歸。凡八年。權臣殂、先生始得放還、年八十^②矣。上即位、聞先生名、兩詔召見、先生往來道塗、叔雅皆侍行。禮部侍郎周公嘉叔雅之勤、欲白之朝、有以旌寵之者、叔雅力辭焉。先生沒之四年、而叔雅卒。叔雅未嘗疾、一日與客飲酒、至丙夜、無惰容、明日夙興、坐而逝云。實淳熙二年閏九月一日也。享年五十有三。娶劉氏。男二人、詹、虞^③。女



楊萬里撰 《誠齋集》卷一二七

司農寺丞翁君墓碣銘

二人長適將仕郎葛耆年次許嫁進士劉逢原孫男五人女二人將以明年十一月庚申葬于安福縣翔鸞鄉青陂之原。叔雅靜者視之若不能言及論當世人物如水監影人犯之不校或疑其矯退而察之終不言其非其胸中自與甚高望之蕭然簡遠若晉宋間人蓋近之若疏遠之若親即之若遺去之若思者也。群從與叔雅分田既定有一人若不滿意者叔雅復剖分己田以多畀之與從兄二人同居且同食二兄沒叔雅字其孤人不知其爲猶子也里之人有伍其姓者以貧不自食至欲扣其祖宮教墓中之藏叔雅呼謂之曰汝欲錢耶吾汝畀墓不可發也至今松柏不刊某少出先生門下與叔雅有五十年之舊晚復託昏焉於誼宜銘銘曰瀘溪之詩叔雅胡得其傳瀘溪之壽叔雅胡半其年豈可傳者人不可傳者天耶抑瀘溪既逝叔雅不留人間耶將父子騎麟翳鳳追少陵太白而俱仙耶

紹興中宰相秦檜專柄用事諸有故怨及不附己者皆誣以罪竄嶺海故相趙忠簡公用此死朱崖天子哀之還其柩將葬衢州常山縣郡將章傑紹聖丞相惇諸孫雅怨趙公當國時奉詔治惇罪又希檜旨陽以善意檄常山尉翁君蒙之護其喪一日下書翁君曰趙氏私爲酒以飲役夫亟捕寘之法而陰使人喻意使并搜取趙公平日知舊往來書疏欲以敗趙氏快私憾且媚檜取美官翁君不可則陷以利又不可則脅以威往反再三翁君度傑意壯不但已或更屬它吏則事有不可爲者即密告趙氏夜取諸文書悉燒之無片紙在翌旦乃往爲搜捕者而以無所得告傑怒又廉知翁君女弟適故禮部侍郎胡公寅實當時草詔罪狀惇者益怒乃誣翁君它罪劾之會胡公弟寧爲尙書郎具以其事白檜檜亦悟爲傑所賣下



其事安撫使問狀。徙翁君官旁郡。趙氏亦竟得無它。而傑遂廢不復用。當是時。天下莫不高翁君之誼。慕翁君之名。而想見其爲人者。今天子即位。近臣乃以其事聞。上亟召見。嘉歎其節。改秩。再除中都官。皆以省員補外。晚乃歸爲司農寺丞。未幾而卒。聞者莫不哀之。君字子功。世家建寧府崇安縣之白水村。大父彥深。宣和中爲秘書少監。梁師成欲一見之。不可得。遂久不徙官。其後歷國子祭酒。太常少卿。以集英殿脩撰歸老于家。父揆。文林郎。密州司士曹事。亦以文行知名。蚤卒。君以集英任補登仕郎。調右迪功郎。尉常山。移婺之蘭溪。更調明州司理參軍。以母喪不赴。主管吏部架閣文字。又以少母喪去官。改□□郎監登聞鼓院。出爲江南東路安撫司主管機宜文字。當塗。滌疫。君以檄按行。拯療極力。全活甚衆。除軍器監丞。又主江西安撫機宜文字。復值歲凶。君佐其府咨訪處畫。用力尤多。使龔公茂良與諸使者合言於朝。

乃召丞大農。卒時年五十有二。淳熙元年二月十三日也。君自幼卓犖不群。曹偶敬憚。而孝謹順悌。事集英及母兄無間言。兄沒。撫其孤甚厚。嫁其女先己女。集英引年恩當及君子。君推以予。從祖弟履之。家居不問有無。仕官不計升黜。至於周人之急。則亦不復知有難易多寡之擇。即有不逮。雖奔走乞貸勞辱不憚也。歷陽張晉彥以子孝祥被親擢冠多士。故忤相檜意。逮繫廷尉。親舊畏禍及己。莫與通。求所以爲橐。餽費者無所得。君聞之。獨慨然謁其兄。罄家貲。得白金百兩遺之。會檜死。事壹解。後張氏父子俱官達。以此德君。終其身不能忘。君與之遊。亦每規正其失。無所避。人兩賢之。在江西時。同寮劉氏子琦奔父喪。病疫甚殆。人莫敢視。君獨輿致其家。蚤暮躬治粥藥。琦得不死。它所爲類此。人所難者甚衆。不勝紀。平居食客滿堂。莫非有求於君者。而君不之厭也。娶李氏。紹興史官彌正之女。先卒。無子。以從祖兄誠之之子樗

年爲後。一女適修職郎王仲。君家自集英時有別業金陵。君即居之。既卒，遂葬江寧縣西北村，祔以李氏。後數年，君之甥豫章通守胡君大原狀君行事以來曰：舅氏志未克申而不幸至此，其高節馴行有不可以弗識者。子盍識諸。吾且刻其墓上。予婦家與君有連姻，得蚤從君游，相期甚厚。讀其書爲出涕，不忍辭也。乃書其事而銘之。銘曰：

仁全故家，知折姦謀。勇蹈大難，賁育其儔。偉哉若人，躬此達德。俛焉終身，靡有回遘。無曰斯丘，四尺之崇。忘私起懦，千載高風。

朱熹撰 《晦庵先生朱文公文集》卷九一

著作正字二劉公墓誌銘

隆興、乾道中，天下稱莆之賢曰二劉公。著作諱夙，字賓之，弟正字諱朔，字復之。其學本於師友，成於理義，輕爵祿而重出處，厚名聞而薄利勢。立朝能盡言，治民能盡力。居家以父母兄弟爲心而不私其身，鄉黨

隱一州之患，若除其身之疾。其飭廉隅、定臧否，公是非、審予奪，皆可以暴之當世。方孝宗始初求治，召二公實館閣，犯而不欺，難進易退，國人貴焉，以爲麟見獲鳳來儀也。不幸正字年四十四，以乾道六年六月卒。其明年五月，著作年四十八，亦卒。四方相弔，如悲親戚。後四十年，道其事者，尙相與悼痛嗟惜不已。嗚呼！其中心誠信於人耶？士之不求爲君子者，視此歟？著作生毀齒，日讀千字，已記憶，猶摘誦不離口。同學兒黃芻季野笑曰：豈患此數句易忘耶？著作曰：我心樂此誦久，樂益深矣。聞者異之。詰所以樂，皆自言也。二公及芻蓋師中書舍人林公，事之終身。林公名光朝，莆人，所謂艾軒先生者也。正字少而喜易，蘄以名家。著作曰：春秋爲王介甫茅塞久矣，由是更治春秋。紹興庚辰，禮部奏第一。前九年，著作以詞賦在第二。二公不爲科舉學，雖場屋荒速之文，與論著金石等。而春秋於三家凡例外自出新義，爾雅獨至，無能及。

者。著作既釋褐。調吉州司戶。臨安府教授。會正字迎游夫人於永嘉。易教授溫州。召試館職學士院。問薦舉之敝。著作對策曰。此執政大臣爲惠而不爲政致之也。陳執中。章子厚。人知其小人也。然能不以官私其親。今將告執政大臣曰。子爲子厚乎。爲執中乎。則艱然怒矣。至其行事。則有爲子厚。執中所不爲者矣。學者至今誦之。除秘書省正字。減員。移樞密院編修官。母老。屢求去。不許。兼史院編修官。著作曰。求去以便私也。美職可因而得乎。力辭不就。右正言陳良祐。侍御史周操疑其必去。合疏留之。除著作佐郎。初秦檜死。高宗開諫路。輪對羣臣。孝宗既即位。望太平旦夕。虜講和未定。內庭設射馳毬。大雨水。蝗害稼。而曾覲。龍大淵挾聲勢。陰進退士大夫。皆相顧莫敢發口。發亦輒逐。時隆興二年七月也。著作輪對。見上曰。羣臣不以堯舜事陛下。臣不識忌諱。竊深憤之。上遽曰。天下事可言者。卿第言勿隱。對曰。自去夏至今。日再

食。東南三地震。比又積陰彌月。所至水潦。蝗食雨中。爲異尤大。在廷紛紛謂陛下宜避殿損膳。自責矣。而至今不聞德音。古者災沴。皆爲臣偪君之象。今一二大臣奉行且不暇。何足語此。殆左右近習盜陛下權爾。且長淮無一兵之戍。而陛下乃親技擊。騁銜轡。豈緩急欲爲自將地乎。閻德。陳敏。近墮馬失臂。梁珂亦摧折瀕死。陛下所親見也。上爲改容動色。遂下詔曰。政事不修。災異數見。江浙水潦。害於秋成。朕甚懼焉。其自八月朔不御正殿。減常膳。令侍從至館職疏朕闕失及當今急務。著作復封上曰。陛下引舊僚謀政事。得如張闡。王十朋可也。乃與覲。大淵輩觴咏唱酬。字而不名。罷宰相。易大將。待其言而後決乎。嚴法守。裁僥倖。自宮掖近侍始可也。今梁珂一年三受醴賞。他內目一日遷四使。而但減卿監郎曹數十員乎。昔姚崇以十事要其君曰。能用則就。不用則去。今陛下以五事要其臣曰。不能如是則去。能如是則留。然則



安用大臣。孔道輔首論曹利用、羅崇勳使罷去。呂誨、范純仁力諫。濮王稱親爲不可。今么麼如楊俛、曹口、尙熟視不敢議。然則安用臺諫。又言：國初僭叛雖平，人情未一，故設邏卒，廣耳目，有不便者，一切聞上改之。今徒監謗愈密，豈可不畏。禹惡旨酒，湯不邇聲色。夫宴游無度，甚則有流蕩戲狎之患。御幸無節，其終爲人獸雜亂之禍。願陛下罷行前事，應天以實，庶可消弭災變。疏入，亟求罷，留之數十不可。以爲湖北安撫司參議，不行。三年十二月，覲大淵出爲總管。於是天下相慶，而著作知衢州矣。復奏論君子小人之辨，曰：人主不示天下以所好，而常禁其所偏。上深然之。在州期年，政平訟簡，郡人畫像祠公。會覲副賀金正旦，道衢謁公不納。復求去，徙知溫州。春夏不雨，公全家淡食，請命八十餘日。母游夫人飯以梅乾，自乞病甚。主管崇道觀而去。始，正字調溫州戶曹，緣歲大饑，繼以大疫，正字計口受祿，以其餘散粥糜，日有常數。

同僚寓士富人爭效之，挾醫至門，顰蹙掩鼻卻立。正字親切脈煮藥，晨往晏罷，徑入徐出。有難之者曰：將爲太夫人憂。曰：此老母意也。所活數萬人。聚道旁棄兒常百計，幕嫗乳飼，聽無子者擇取。比滿秩，災疫猶未已，皆泣曰：司戶去，吾何所得衣食。旣而著作來守，故民望之亦如正字。及著作亦去，又泣曰：天以二劉賜我而不能終也。奈何。莆人往還，必問著作、正字及游夫人安否，其皆卒也，哭之皆失聲。此蓋余少年親見聞實事也。正字旣解戶曹，乞監嶽廟，召對，奏曰：陛下何不延納憤激敢言之士，而聽訐直難堪之言，因以自考察成敗得失，以是不得留，猶改官知福清縣。福之支邑，月責羨錢而無經賦，正字盡罷之，復請緩輸數月。帥爲併寬旁縣，聽訟，使兩辭自詣，無追呼者。市食挂錢於門，民當其物，持錢而去。邑庭常空，失械索所在。時王參政之望爲帥自尊，不使僚屬抗禮，正字以義責之，望不悅也。居五月，以疾復請祠歸。再召

對虞丞相允文贊上謀恢復銳甚希進者趨和之正字極諫曰臣觀今日通和未爲失策昔富弼累增歲幣今減十萬矣往時兩淮不許備守今江北諸城增陣浚隍矣前此江上教兵彼且呵問今沿淮分屯鼓聲達泗潁矣虜或示我弱殆不可測宜選兵將廣儲峙責成於端重堪事者從容以待其變若募彼人嚮導挾異國濟師合中原響赴而兵不必衆就虜人儲聚而粟不必多憑虛蹈空過爲指料將有臨危失據之憂矣此所謂決天下於一擲者也上竦然不以試除正字於時士無不嚮恢復者朱公元晦亦以爲人主義在復讎遇著作於李德遠坐論之著作弗是也他日朱公曰乃爲賓之德遠夾攻德遠者吏部侍郎李浩也正字又言歸明人宜散處州縣不當聚畿甸從之疾復作求爲福建參議官行至信安傳舍卒嗚呼二公之道所謂憂天下之危而忘其身圖國家之便而不利其樂者歟著作之還自溫疾有間莆亦大

旱手爲救荒十餘事率鄉人行之招潮惠米商白守免力勝四集城下郡以不飢莆之苗斛餘六萬建炎盜起漕司筭其軍食猶剩二萬五百入之福州自是莆有猶剩米斛增四斂焉著作出湖北愬於朝捨其半請猶不已宰相袖書以進盡蠲之正字嘗行秦溪有道殭者駐家良久棺殮瘞之乃去過劍津望覆舟號呼解鄭夫人髻金救之而免平居昏暮扣戶宿春飯之二公行事隱顯大略如此自謂朋友講習爲古今至樂常曰天下至大也千歲至遠也所不可一日無者公論也朋友羣居敬畏之心所由生而公論之所由出也窮山永夕篝燈共語常聞鐘聲未已死日家無留貲著作前後夫人皆林氏子彌正朝請郎淮南轉運判官彌恭彌邵女嫁鄭其卿林尙之其卿某官正字鄭夫人星生三子起晦朝奉大夫秘書省正字起世迪功郎南海縣尉皆已卒起元某官蓋著作止承議郎正字奉議郎而彌正起晦起世皆登進士



第起元則起晦爲大夫時所任也。諸孫曰瀛曰箴曰鎮曰慶曰洪曰合曰鼎而正字則希醇希道希謙希深所爲祖也。余童孺事二公既與彌正爲友而起晦實同年生。彌正曰吾二父銘以幸子。病眊十年不能文。嗚呼悲夫。二公之卒也艾軒先生爲國受弔筆濡不忍銘以至是也。而余何敢僭。雖然艾軒之不忍痛至也。痛且遠。德將湮無以屬來者矣。而余何敢忽。每念紹興末淳熙終若汪聖錫芮國瑞王龜齡張欽夫朱元晦鄭景望薛士隆呂伯恭及劉賓之復之兄弟十餘公位雖屈其道伸矣。身雖沒其言立矣。好惡同出處偕進退用捨必能一其志者也。表直木於四達之達後生之所望而從也。著作既教授溫州正字亦次攝學事。於是邦之士披山通谷浚泉源而達之川流其尙克有聞二公之力也。蓋余昔孺子而今老矣而又何敢忘。乃爲銘曰

範曾祖也。愿王父也。顯考諱炳三世長者。府君將終

有虹闐然升堂繞几如綬蜿蜒其端二公文字之符有孝有德以言以謨並事阜陵致忠極愛朕樂聞過不諫奚待如玉斯攻如木斯繩治煩去惑臣道以弘味苦而長語甘而螫彼何人斯苟追朝夕元凱既來舜諧其琴伯夷叔齊稱之到今壽溪之源土囊之下墓檀相扶百世一化我銘其詩古人無已庶幾後生聞風而起

葉適撰 《水心文集》卷一六

邵武縣丞謝君墓碣銘

臨川有隱君子曰溪堂先生謝君名逸字無逸與其弟竹友先生名邁字幼槃俱學詩於黃太史氏而以清介廉節有聞於時。然皆不遇以死是以獨以其詩行於四方而其行業之懿則非其邑子有不得而詳焉是可歎已。竹友之子曰敏行字長訥自號中隱居士娶季氏生子曰源字資深始以進士得官爲文林郎邵武軍邵武縣丞且以慶恩得封其母爲太安人



蓋將有以大其門者。而不幸以卒。識者莫不傷之。資深自幼日誦數千言。少長受經屬文。有聲庠塾間。士大夫之賢者來臨川。聞其名莫不延致而賓禮之。再試禮部中第。宰相以兩先生故。不使從吏部選。言於上。以爲建昌軍學教授。居官靜重有守。然事有當爲。亦不憚改革也。嘗祠其鄉之賢者五人於學。以勸諸生。而故劉侍郎季高爲之記。秩滿。諸生相率狀其行治。扣漕臺請留之。使者知其賢。顧法不可。因相與薦之。得稍遷秩。復教授江州學。未行。遭父喪。終制。調隆興府南昌縣丞。會李侍郎仁甫將漕江西。披輯舊聞。以修一路圖經。於官屬中獨以資深爲可與於此者。又與諸使者共薦之。嘗行邑事歲餘。屬帥守以聚歛爲急。諸邑奉承唯謹。而資深獨無所屈。常歎曰。迫貧民以奉上官。吾弗忍爲也。帥守以是於資深獨不悅。而邑人深德之。旣去。父兄子弟相與送之。數里不絕。帥守愧歎。亟以薦書追而與之。詣曹校考。當改京

秩。會舉將有故不果。遂來邵武。當路者多知其賢。而常平使者宋君若水尤敬重之。又率同列交薦。章下而資深已病不起矣。時年五十有八。淳熙辛丑九月己丑也。資深天資渾厚。人少見其喜怒。未第時。數學以奉甘旨。教撫弟妹而婚嫁之。鄉黨稱其孝友。家世清貧。獨有園廬數畝。中隱君旣以其號榜之。至資深雖從官。然於生產亦不能有所增益。獨葺此園。築室其間。雜蒔花木蔬果桑竹。暇日挾冊吟哦其間。雖飯蔬飲水。不自知其有不足也。其詩秀潤和雅。有二祖風致。存者百餘篇。號空齋詩稿云。資深娶同郡黃氏。生三男五女。男曰樞。曰機。曰椿。女所適曰嚴。享甫。曰饒。祔。餘未有行也。資深在邵武時。嘗以檄書便道過我。予雅聞資深名。一見即知其長者。旣去。遊武夷山水間。得予所結廬處。復留詩見屬。予以是又知其句律之妙。可追前輩無慚也。顧未及酬而聞其訃。又以病不能往弔。今樞等旣葬資深中隱君墓之側。而以

書奉資深親友吳君炳若之狀來請銘。時予方病，欲謝不能。又念資深前日賦詩相屬之意，不可以終莫之償也。乃爲之銘。銘曰：

惟君家世隱淪，載其德之後人。君承之勢，欲振塗末半，隕厥身，藏於斯，從隱君。陵爲谷，訂此文。

朱熹撰 《晦庵先生朱文公文集》卷九一

江元適墓誌銘

始余遊柯山，聞南塘徐誠叟先生之名。其學本于伊川，欲見而不得。今二十餘年，乃聞其徒江君之賢于其鄉之秀士。且曰：南塘之門，顯者固多，而江君則得其傳而不仕者也。君諱泳，字元適，世居衢之開化。大父以上，潛德弗耀。考沔從常山起家，主饒之安仁簿，辟泉司屬以卒。君其季子也，束髮知讀書，一以爲己爲本。手抄中庸大繫置座右，口誦心維，寒暑不廢。弱冠有聲庠序，漳守陳公杲得君諸生中，以其子妻之。子蓋張出，是爲右史文潛外孫。紹興初，黨籍解，詔

沒者官其子孫一人，無後者許授異姓親。右史與龔公夬俱無後，龔氏以官予外孫壻臧珙。陳公欲以右史之澤與君，君辭焉。廼及其友壻戚族，既欲奏以他官，又不就。至是，君之年益壯，學益明，再應鄉大夫舉，不利，絕不爲舉子語。既遭外艱，廬墓毀瘠，除喪，因弗去，遂不復謀仕，而行其志于家。號所居爲西莊。堂室軒館，下至器用，悉有銘記，以便觀省。創樓西偏，揭先聖像，朝夕瞻仰，如親見而師之。榜家塾曰明善，命其子震升、謙蒙、革肄業其中。所訓先德行，後文藝，絕口不利達啓其心，亦不使預家務。而治家自有法，中閫有亭，以限僕妾。細大條理，擇謹厚者董其凡，不勞而辦。不事生產，家業無所增益。伯氏仲氏貲息日倍，人以百畝與之，謝不取。樂以所聞見告人，願學而力不逮者，教且食之，曰：吾非養其口體，養其才也。常有小疾，一日出就外寢，焚香默坐，間一諷詠，不異平時。惟勵諸子以毋忘疇昔之訓，語畢而逝。寔乾道八年



儒藏

宋儒碑傳集 卷一二六

八月二十九日、享年四十有九。以其年十二月二十六日庚申葬于祿墩之原。遺文曰西莊題意、曰朋遊講習、曰天籟編、曰因心錄、易、中庸有解、他論述尙多、藏于家、未傳也。葬之五年、始得以銘諸墓。嗚呼、人孰不欲仕。如君才足以取、事足以得、而其學又可見于用、乃翛然自適、以終其身。余惟孔門有用之學、上可以爲邦南面、而其流亞皆可使從政、觀至人與點說漆雕之意、則知樂道者之爲高、而以政學者皆自欺也。余于道未有聞而仕、仕而未能優也、聞君之風有媿焉、故爲之銘。銘曰、

仕以行志、而或害義。孰若不仕、以全吾氣。允矣南塘、源由二程。有派其流、君挹其清。德成行修、不用于世。淑諸人者、抑君之細。命雖匪長、後其熾昌。銘以訂之、觀者勿忘。

樓鑰撰 《攻媿集》卷一〇〇

校記

- ①簞：原作「簞」。按此用顏回「一簞食、一瓢飲」之意。又周必大次韵詩亦用「簞」字，據改。
- ②閱：原作「日」，據傳增湘校本《廬陵周益國文忠公集》改。
- ③百：原無，據文意補。
- ④元年冬：原作「九年各」，據右引改。
- ⑤和預：原作「給予」，據明祁氏澹生堂抄本《周益公文集》改。
- ⑥「減半」上疑脫「轉廳」二字。
- ⑦紹熙：原作「紹興」，據右引改。
- ⑧邸間山：右引作「邸閣山」，當是。
- ⑨「取」上原有「與」字，據右引刪。
- ⑩「篇」字原脫，據四庫本《文忠集》及《直齋書錄解題》卷二補。
- ⑪貢：原脫，據四庫本《鶴山集》補。

⑫諾：原作「誥」，據右引改。

⑬瘵：原作「瘦」，據四庫本《誠齋集》改。

⑭覲：原作「觀」，據右引改。

⑮十：原脫，據右引補。

⑯虞：原作「澹」，據右引改。

⑰姓：原作「性」，據右引改。

⑱焉：原作「哉」，據宋浙江刊本《晦庵先生文集》改。

⑲其徒江君：原作「其江徒君」，據叢書集成本《攻媿集》乙。

宋儒碑傳集卷一百二十七

施師點 吳儼 胡公武 諸葛說 陸九皋

吳居仁

故知樞密院事資政殿大學士施公墓誌銘

淳熙十五年、知樞密院事施公師點引疾辭位、逃寵畏盈、敷露懇切。上疑訝、抑首蹙眉、請問諭公曰、卿輔朕事已有緒、奈何欲棄朕。還其奏五六、公徑出六和塔俟命。上不得已、以爲資政殿大學士、知泉州。固辭州、提舉洞霄宮。光宗內禪、詔曰、卿冲人舊學也、何以啓告朕。公即疏言、今民貧兵餒、將愚而敵詐、虜懼有伏、宜熟察審處、使初元之政足以竦厲。而陛下心術之微、又有當自謹者。知隆興府、放逋賦十八萬、達冤疏壅、微細必親。半歲復求去、不許。紹熙三年二月乙未、薨於豫章、年六十九。口自爲表謝、略曰、念民情難保、監天命靡常、憂國勢所可憂、用人材所當用。上覽奏悲惻。四年十一月戊寅、葬永豐縣富成鄉西塘山。

提舉福建市舶榷來曰、先人蒙國大恩、贈死卹孤、一用舊禮、階崇二列、謚美正憲、蓋哀榮略備矣。獨墓道之碑未立、非敢慢也、有待而然。竊惟淳熙中、天下治安、天子恭己、羣臣遵職、中都官貴重、留久者尤幸甚。執政至十餘年、公一旦乞身不及顧、竟得請。將行、徧謁朝士舊故、諸客送登舟、人人把手笑語、盡歡而別。行路聚觀、咨歎傾挹、雖疏廣、受無以尙之。夫耽位敗高節、懷祿失令名、然則縻於進者非公之志、而果於退者公之勇也、豈不賢哉。公字聖與、信州玉山人。三世褒叙、安與少保、舜則太傅、實太師。紹興二十七年、太學上舍中第、教授復州。魏國夫人終喪、王樞密綸欲以館職薦、公曰、父年高、迫近祿、人子私願也。無考任而躐華選、懼爲僥倖之倡。教授臨安府。陳丞相康伯遂以館職薦、召對、言頃中外人情急於得和、無故裂四郡奉虜、是欲和也、非欲久也。陛下發憤、逐宰相諫官、主議者、示以必戰而後和可成、然猶未也。因陳



儒藏

備虜五事及他便宜甚衆曰如是則有備備堅而和可久矣。故終孝宗世和以爲形以備爲實虜卒不敢背約策自公始。授正字兼聖政檢討校書郎兼吳益王教授國史編修官。又言法爲天下信事爲天下功臣下爭欲變法各求立事不參覈而遽從已變過復暫立忽廢此功信所以隳國權所以去也。又言治盜賊當委牧守但責巡尉何以禁暴事多施行。公起疏外論建樸率不擇深淺而切機湊的深中利害雖老於臺閣□□不能及。上方嚮用言者不樂罷。主管崇道觀知筠州。太師終喪知池州。入奏今日用人未有毫髮效驟遷輕改視職守如流。上美其意曰卿謙退靖重除祕書丞考功郎官國子司業祕書少監兼左諭德中書舍人兼右庶子。既升監俄正知制誥兼左庶子禮部侍郎進給事中增詹事爲二兼焉。在後省言吳淵小人被劾不可雜學士。潘景珪無學法吏不可權侍郎張說子薦贓敗不可收叙。宋鈞罷黜不可

眞俸。郭倪李安禮他日一轉九官不可宣贊。而明州民汪伋獻稻萬餘助賑卹戶部謂不應賞格朝廷令須歲稔還之亦極論其非。使女眞班定典儀以虜王子且至退公位公曰立已定何退爲。屢請不改白其相曰南大使不肯動。王子竟徙他班虜相與愕顧歎服。公初見上固默許任屬。及請乞戶四等以下積欠謂非卿不聞此。至引書三宅三俊欲先重職事官之選然後次補而上皆有其人爲愈用愈不匱之術。則曰公輔器也。及封駁不避專對有守益嗟異。郊祀以備顧問輦由側升。上念公魁偉使陟降從御道有司曰非故典也。遂詔衛士扶掖。於是人知上決意用公。十一年除端明殿學士簽書樞密院事。其九日兼參知政事。既而以參政同知樞密院又知樞密院事凡六載。與同列開陳上前有不中理未嘗不反覆執諫退無異言。上數勞勉曰異時宰相奏事參署噤不一語。朕圖回天下日周徧常再三。卿盡言若此眞慰朕



懷也。公益感勵奮發、以薄聚斂、厚捨施爲己任。大閱出內藏錢激犒、而除其窠名爲民病者六十萬。罷昭州貢金、盡蠲經總制宿負鉅億萬、而旱饑有一州放至六十萬者、皆公所建白。戶部立上供比較法、且請不待歲終行之、旣畫降、公力辨、遂追寢。至於寬釋威怒、保護善良、鑒析材傑、舒拔淹滯、上常曰、公言一聽可、至今人多稱誦、而公不自以爲德也。于時法度尊明、民物豐樂、公喟然曰、以寵利居成功、古人之深戒也。決去不回、有識壯之。內行尤淳備。喪魏國、日侍太師、夜即墓廬以宿。喪太師、如魏國。任補先其姪、政府恩悉推與族人、裨窮乏、有倒廩助婚喪、有傾橐待人質而篤處己約而裕。不鳴善以收譽、不銜薦以市恩。每謂諸子、進退以義、士之節也、枉道干進、士之恥也。汝第戒之。子栝、上舍甲科、福建帥司幹官。栝、通判福州。械、通判沅州。梈、通判撫州。婿劉伋、知南劍州。趙汝談、西外宗正。栝、栢、栢、伋、皆已卒。孫沆、京西提舉兼

提刑通判。汝、監蘄口鎮。洙、承務郎江陵縣主簿。浚、承務郎。沆、瑞安縣尉。洽、將仕郎。漬、登仕郎。而洙、浚亦已卒。曾孫鑒、鎡、雄、峴、童、小大、餘未名、而鎡、雄皆將仕郎也。余讀公講筵故事、審時所急、能因時正救而納之於道、東宮故事、擇義所明、能先事豫防而引之於善。及前後章奏累百數、大抵權實兼舉、雅俗並伸、切而不偏、廣而不緩。至於科舉、制科之外、有安貧樂道、經明行修者、欲詔州郡特舉而官之、則又未嘗不大公之志、懿公之識、而惜其不遂相哉。銘曰、
迪惟阜陵、載競載勤。淳熙末年、求治愈新。不自聖智、推賢其臣。其臣施公、左右有民。文獻舉之、貨財與之。泰道并包、勿猜沮之。嚴嚴廟謨、虛己以咨。令如雷風、鼓舞四馳。我無上欺、上惟我信。律呂必應、心手同運。祈歸故國、草木華潤。世躋其退、有考其進。公旣返止、帝亦禪止。古稱明良、毋或遠止。幽堂久寂、遺耀未紀。君臣之逢、以播來史。

嘉定十四年二月□日。

葉適撰 《水心文集》卷二四

宋故朝散郎知邕州軍州兼管內勸農營田
事兼廣南西路安撫都監提舉欽廉等州
盜賊公事沿邊溪峒都巡檢事兼提點買
馬事竹洲先生吳公徹行狀

曾祖師政、妣程氏。祖俊、妣汪氏。繼妣魏氏。父舜選，故
任奉議郎，賜緋魚袋。妣金氏，封安人。公初諱倂，避秀
園諱，改曰徹，字益恭，吳其姓也。吳自泰伯以國得姓，
其子孫散四方，譜牒不可攷，獨居歙之休寧者最盛。
公之高曾世以長者稱，薄取而厚施，視糴之貴，平其
價以出之，施及旁郡，全活者甚衆。至奉議公，襲德彌
厚。一夕，與夫人金氏坐月下，有二星飛入懷，衆異之。
曰：「其吳氏種德之徵，有子之祥乎？」已而宣和之甲辰，
果生國錄公。俯乙巳十二月之朔，又生公。公生而穎
悟，日誦千餘言，十歲屬文，已能道老生宿儒之所不

能道。弱冠，與國錄公游太學，時四方之英俊萃焉，月
與角筆墨短長，輒居首選。儕輩相與歎服，爲之語曰：
眉山三蘇、江東二吳。以上舍高選登紹興二十七年
進士第，調明州鄞縣尉。三十二年，遇恩陞修職郎。隆
興元年，獲強盜，改承事郎。二年，差充婺州教授，不赴。
乾道二年，差知饒州安仁縣。四年，轉宣教郎。七年，丁
母艱，服闋。淳熙元年，轉奉議郎，通判邕州。五年，任滿，
轉承議郎。被召上殿，除知州，兼廣西四路安撫都監，
提舉欽廉等州盜賊公事，沿邊溪洞都巡檢使，兼提
點買馬事。親老，乞祠，主管台州崇道觀。六年，轉朝奉
郎。七年，轉朝散郎。差知泰州，乞祠，復主管台州崇道
觀。十年，致其仕。以淳熙十年二月二十七日卒，享年
五十有九。公天資雄渾，學該體用，高遠而不爲迂，切
近而不爲陋。上下數千年間，世變升降，制度因革，燦
然若指諸掌，而能劑量之以道。出入諸子百家，天官
稗說，靡不洞究，而能折衷之以聖人之經。故其發爲



文辭涵蓄演養、嚴潔淵奧。每一引筆、若飄風驟雨、不可止遏、旁觀駭立悚汗、而公初未嘗屑意也。公英邁慷慨、忠義激烈、雖窮居厄處、抱膝長吟、常以社稷安危爲己任。方隆興、天子銳意北向、效奇獻策者無算、公獨憮然曰、是碌碌者釣取爵位耳、烏足與語大計。使吾得當一面、提精兵數萬、必擒頡利以報天子。蓋公平日之志也。當時宗工鉅卿如晦菴朱公、南軒張公、東萊呂公、龍川陳公、梭山陸公、石湖范公、止齋陳公、及知名之士數十人、皆與公友善。公之倅邕也、南軒以書告晦菴曰、吳益恭忠義果斷、緩急可仗、未見其匹。及歸自邕而得對也、南軒書孔子之剛、曾子之勇、南方之強三章以諗別。旣而又以書相勞於中都、曰、益恭才氣事業、烏可掩抑、對揚忠言、必當上意。至龍川則反復太息、徧告于東萊與石天民曰、此君蹉跎、日以老矣、今茲得對、或有遇合之理、其爲一時名公所慕重蓋如此。初、公未第、爲太學錄、時天子厲精、

以邏卒廉察中外、一日且至膠庠、公曰、此曹挾小忠、簸弄耳、今闖足至此、異時六館之士以非所宜言與大不敬論報、豈不上累聖朝、執而答之曰、國有令、汝無故烏得輒入。卒噤受答、去不復至。蓋公之風裁峻整、臨機果決、已見於爲布衣時。得第尉鄞、鄞並海、盜出沒、鬼神不可踪跡、間來掠民家輒去、朝廷雖宿將重兵不能禁。公潛布耳目、盜所至輒知之、單馬徑造、捕者隨至、盜驚謂神。卒有先登被創者、公解駝裘以衣之、親與傅藥、士卒皆感慨爭奮、願空賊以報。及宰安仁、安仁舊號冷邑、公至則肅吏厚民、薄征緩賦。異時負販少有至者、公立爲會市、會之日、官無征斂、市不二價、約束明肅、商賈四集、皆得所欲以歸。於是井邑饒富、江東壯縣或愧焉。時歲大旱、公度民將艱食、預約一縣戶口所需米若干、令富民儲蓄以備、境內賴以不饑。會旁境饑民百十爲羣、攫食偷活、惡少年乘之爲盜、勢駸駸且犯境、州人以爲憂、遣兵數百戍

之。或有勸公避者。公奮然曰。吾爲令。顧委命若等。是謂草間求活。吾寧與賊死。況不必死乎。籍丁壯閱之。公馳馬橫槊其間。聲勢張甚。有無賴子襲旁邑。所爲者法外。出新意殺之以令盜聞之。皆恐懼縮頸不敢犯。事已自効。不報。然不便者從而媒孽之。以是坐累數年。公嘗言於孝宗皇帝曰。盜賊弄兵。驚陛下之赤子。甚至阻山澤殺吏士。遣大將發重兵而不能定。皆由帥憲守令罷軟不任職。治之不早。以至滋蔓難圖。仁哉斯言。使安仁非公。盜滋蔓矣。法吏乃反以爲公罪。此識者所甚痛也。暨通判邕州。沿邊溪洞蠻獠少不得意。則反側。南軒張公經略廣右。有疑事悉以咨公。置郵筒往來。籌畫日至再至三。公曲爲之盡。畢就條理。郡闕守。檄攝郡事。有自杞蠻者。勢強盛。服屬化外諸國。至羈縻州境上。其人皆長大。勇悍善鬪。歲數千人至橫山市馬。日益橫忽。其酋必程持國書來爭論。淳熙三年。蠻人與其官兵相殺傷。因及十餘事。以

乾正爲年號。州人大恐。公嚴兵庭見之。其詞色驕甚。公責以汝國本小小聚落。只因朝廷許汝市馬。歲得銀帛二十餘萬。今三十年矣。汝國以此富強。役屬諸蠻。若忘朝廷厚恩邪。輒敢妄有邀求。吾當聞諸朝。絕汝買馬之路。又以不用本朝年號。且犯廟諱。詰之。曾遂屈服。有田州下閉洞首領凌謐。以掠良民與化外諸國爲市。人易金一兩。伎藝者倍之。每歲上邊買馬。遣丁夫除驛道。輒爲掠去。公屢委所屬追問。謐不伏。以兵擒之。梟首於市。遠近稱快。又有安平州酋長李械。藏匿逃逋。窺伺叵測。累年帥憲不能治。州有虞兵逸去。公大書尺紙示械。如期而來。且惶懼遣使以書幣請罪。公責而釋之。還其書幣。械歎往時太守率以賄遷。公清如水。吾敢慢乎。於是兩江五十餘洞。告戒部落無有犯者。且曰。吾寧貧窮。毋犯吳公。留邕三年。績效不可殫紀。南軒露薦于朝。得旨赴都堂審察。去之日。若士若民。若吏若兵。合數千人遮道流涕奔



告諸臺借留。公陞對、首論恢復、天下之大勢有二、天下之大計亦有二。有紛紜未定之勢、有立國相持之勢。紛紜未定之勢、利疾戰、立國相持之勢、宜緩圖。方海陵即世、中原之勢幾至紛紜、諸將反不能渡淮而發一矢。及葛王定位、南北之勢復成勍敵、張浚、虞允文乃欲長驅以定中原、進退緩急皆兩失之、此功業所以未建。今之議者不察、持苟安之說者欲保守江左、爲欲速之計者便謂中原可平。臣未嘗不痛惜於斯也。臣願陛下治兵積粟、涵勇韜力、十年生聚、十年教訓、乃以舟師出其東、蜀兵出其西、且戰且守、稍稍前進。東自齊以圖晉、西自隴以圖秦、爲祖逖、譙梁戰守之謀、而無桓溫、劉裕深入遠鬪之患。會逢其適、糾合諸侯之兵、而以武臨之、一戎衣而天下定矣。若彼此勢鈞而力敵、雖一兵一騎不可輕動。聞者始知公規略宏遠、區畫精密、平日慷慨自許、非孟浪叫呼者也。使公獲展其志、應敵著數、各隨局面、如環無端、功

業可量也哉。及論自杞蠻、二廣官吏與治賊之方、皆切中事機。孝宗皇帝嘉獎、欲除公御史。適邕又闕守、上以馬政爲憂、復以邕管屬公。時奉議公已八十、公曰、吾奉親以往乎親且老、離井里以戚吾親、非孝也。上方以孝治天下、其念我乎。力請、上爲惻然、予祠、已而思之、擢知泰州。復以親老請祠。公孝友出於天性、常視奉議公嘖笑以爲欣戚。所居之前有洲、廣數畝、舊種竹、蒼翠可愛。奉議公樂之、於是結廬其上、環以秋冬不凋之木、日奉觴酒、怡愉其中。又以餘閒與從游之朋窮經論史、考德訂業。四方之士聞之、負笈而至、歲數百人。居不足以容、或相率結茅其傍、因號爲竹洲先生。公分齋肄業、如安定湖學之法以教之。士由以成材者、有方公恬首春官、汪公義端首臚傳、其他簪佩滿州縣。言有章、行有操、官有業、問有學、未有不目竹洲之門者。公之沒也、奉議公已九十、呼其子、泫然流涕曰、子之事親也、生有養、死有葬。今吾先而

祖以死有餘恨矣。汝其毋忘乃父之志以事而祖。又曰：汝其知所以立身立家乎？忠孝者百行之本也。恭儉者百行之端也。其了然於死生之故，有釋老所不能及者。娶金氏，封宜人。後公六年卒。以紹熙元年四月某日，合葬于績溪縣高車原。男四人，載、宣、教、郎。簽書高郵軍判官廳公事。圻、塹。女一人，適奉議郎。知袁州萬載縣事王僎。孫十一人，鎬、鉉、錫、鎮、鎔、銓、鐔、鏞、銘、錡。曰鑑，出繼國錄公長子。塹之後，曰銓，出繼國錄公次子。塹之後，孫女二人，長適承議郎知江州瑞昌縣事韓埜卿。次幼未行。卓於公同里閭。先伯父文簡尚書與公同肄業，而公之季子圻又從予游。故知公之出處頗詳。嘗論公之才足以佐理天下，而身不得居卿相之位。公之氣足以從事中原，而身不得任鈇鉞之寄。公之節足以揮斥姦慝，而不得綱維國之風憲。公之文足以光昭雲漢，而不得黼藻國之綸綍。公之命固有所制矣。然孝盡於親，道信於友，名尊於

身，識與不識皆知公爲一世偉人。公之所以不朽，孰得而制哉？公嘗作尊己堂記，謂天爵義榮己所有也，可常尊也。人爵勢榮得失在命，不可常也。士大夫喪其可常之尊，乃藉夫不可常尊者以華其身，得則喜，失則悲，甚而苟得，至於忘恥，是何異乞墦間之祭，醉飽而歸，其妻妾方羞且泣而施施焉，未之知也。晦庵朱公見而喜曰：往者張荊州、呂著作皆稱吳邕州之才，今讀其記文，又可見其所存。然則雲霧晦冥，日月之光景常新，公之存固有用，舍得喪不得易者。有文集三十卷行於世，或謂其峻潔類賈長沙，雄麗類蘇內翰，風騷類柳柳州。世必有能辨者，不待予言也。公歿既有年，其孫鉉入都門，涕泣謂予曰：先祖言行久未編次，將遂湮墜，敢稽首以請。予辭不敢，鉉之請愈力，因概書其大節，以備太史氏采錄云。謹狀。嘉定十五年十一月日，通奉大夫同知樞密院事休寧縣開國伯食邑九百戶食實封一百戶程卓狀。

胡英彥墓誌銘

澹菴先生胡公以道德文學師表一世、仁濡義染、不
變大江以西、而其宗族家庭、俊茂尤角立、其好學刻
深、厲操清苦、克肖先生者、猶子英彥也。英彥諱公武、
年十三爲黨庠春秋弟子員、一試出諸老生上。郡博
士汪俛、劉夙譽之、吃吃也、招爲春秋師、以風學者。英
彥覃思經訓、鈎沉聖處、出入百氏、洞視根穴。至論道
原、獨謂求聖道當自論語始、以韓子始、孟爲非是。乃
取賈誼、揚雄、李翱筆解等爲集、註論語若干卷、傳以
新意。自鄭康成、王肅、馬融之外、史、漢所引、臣瓚、顏秘
書輩所注釋、闕文異義、靡不裒萃、成一家言。今參政
周公甚愛其書、爲之序。性嗜文、尤工於詩。其句法祖
元、白、而宗蘇、黃、追琢光景、繪事萬彙。金春玉應、山高
水深、獨造其極。晚自號學林居士。澹菴先生賡符讀
書城南韻、以勗之。蜀人何子應亦寄以詩、而予亦嘗

爲賦之云。其論交極不苟、如范浚、明尤所厚者、嘗以
書與之、上下其論、往復千里。歲在癸巳、嬰末疾、自是
沉綿無瘳。後六年卒、實淳熙六年十二月晦也。享年
五十有五。有詩若干篇、詩話若干卷、論語叢書三卷、
又集音二卷、文髓十卷、注蘭臺詩及淮海詞各若干
卷。曾祖諒、故將仕郎、祖方中、父宗古、皆隱不仕。娶劉
氏、故丞相楚公沆之曾孫。男四人、樞、樛、柅、稅、皆志學。
女適劉德衍、鄧執規、次許嫁蕭景衡、餘尙幼。樛將卜
葬英彥于某所、其兄箕狀其言行來謁銘。銘曰、
嗜古入骨、瑀句得髓。不爵不齒、竟以窮死。既獲乎此、
又覩乎彼、不曰責天無已。吁。

楊萬里撰 《誠齋集》卷二二八

福州長樂縣主簿諸葛公行狀

曾祖考璿、妣朱氏。祖考原、武翼郎、祖妣張氏、趙氏、並
封孺人。考純、迪功郎、妣趙氏。公姓諸葛氏、諱說、字夢
叟。琅琊諸葛、自會稽內史恢別爲浙東之族、後稍徙



嚴陵永嘉族蓋嚴徙也。或曰新安譜亡弗可論次。公大父娶城南張氏。以諸子從其舅學。所謂草堂先生以八行應書者也。繇是闔郡賢士大夫往往多諸葛氏師友。姬姪公幼陶染諸公間。已岐然度越行輩。益自勵。讀書著文。窮夜旦不輒休。既冠入太學。再薦登紹興庚辰進士第。方待嚴州司戶參軍闕。丁迪功公憂服除。授台之黃巖尉。復丁母氏憂。公故負當世志。學不爲章句訓詁淺事。務見於施設。比罹兩喪。謂祿養之無逮。命之不偶也。於是名其園曰艮園。室曰儵室。以其學力行於家。輯柔其族。而厲其鄉人。久之。上下交孚。子弟無少長咸視公習。謹而麗於善。莫之或肆。里並大海。其商海自給者。率剽悍。迺時以所不平。就公決質之。惟一唯否是定。郡之東南隅。廣斥易恐。截然倚公爲巨防。而公亦任其戚休。非衆同欲。謁不至郡邑。凶年艱歲。縣官有恤政。爲守者率需公至。爲方略。公白事當若何。費當幾何。立聽行之。然他鄉部

未有條。而東南隅若干戶。少長秩秩然蒙惠矣。紹興之季年也。防海隆興之甲申。視疫。丙戌。埋魃。乾道之庚寅。辛卯。食飢。壬辰。築埭。皆其小試。微見者也。往年余與薛叔似。象先。陳謙益之俱會行在所。私相語。爲授福之長樂簿。公重違吾黨意。強起之官。是時。前丞相史公帥閩部。丞相閱人熟。不輕以獄訟畀屬吏。雅聞公賢。數委以事。公以理平決。不視大府意所疑。信爲非是。丞相滋相知。延之幕中。幕中故盛賓游。惟公自一話一言。無裨補。不出諸口。丞相自喜。晚得士。禮以己敵。且率當路者薦之朝。而公死矣。實淳熙元年正月庚戌也。公平生燕寢無惰。待物不矜。莊施交際。語唯恐傷人。聞或爲不義。必反覆鐫切。不但已。雖行百里。從一僕。持被飲食。廬廬無乏。所以周鄰里。朋友則不問費。室事一切勿理。趨公事。未嘗不勇決也。年且五十。德日加脩。講問日加切。余嘗見公暨張淳忠甫夜論學。自叙讀書二十年。得一健字。余輒從旁款



公健天德也。盍求其本。公云云旦日忽挈余手出曰。吾固深省於疇昔之言。余竊自恨規意之淺也。比將歿。猶校讎儀禮。家人不知其甚病也。厥明盥櫛已。遽索紙書遺友人。以訓其子爲寄。更以一紙書。吾他日將族葬。必擇寬地。問法於伯忠甫。又以一紙書。吾弟兒女多。以某所田若干畝盡歸之。適劉氏娣薛氏妹具有缺。以田若干畝歸之。已呼其子耕來曰。汝行之。毋敢違戒。又曰。語汝母。屏母來前也。一家始大驚。頃之。長樂尉之書至。還答如平時。又頃。丞相遣客與其子至。亦將迎如平時。客出大門。公目已瞑矣。娶徐氏。一子。耕也。享年五十。有易論語說若干卷。碑誌詩文若干卷。耕卜以三年十二月丙申。奉公葬于黃嶼山。以狀來請。始余聞公誼甚高。未之敢請見也。寓城南。有題曰。里弟諸葛某之謁入。余愧歎袖謁走出見。遂辱與爲忘年交。將何敢辭。以余所見聞。公居鄉試吏。建民利甚衆。夫人有一事則以傳世。要之於公不足

道。故道其出處進退死生者爲狀。

陳傳良撰 《止齋先生文集》卷五一

陸修職墓表

陸氏徙金谿。年餘二百。嗣見九世。公居五世。諱九臯。字子昭。同胞六人。公爲叔氏。子美其季也。次爲子壽。次爲某。子壽下世。今十有三年矣。某狀其行。述世系爲詳。當是時。先君子未贈官。其後某誌仲兄子儀之墓。不復具世次。獨載先君子贈承事郎。今再贈宣教郎。去年秋。某迎侍伯兄子強來守荆門。伯兄至。甫一月。旣歸。歸未及家。公已下世。嗚呼痛哉。公少力于學。日課經子文集。必成誦。夜閱史冊。不盡帙不止。嘗夜過分。先君子見公猶觀書。勉使寢息。公後不能自己。爲之障燈屏息。懼先君之復知之也。及長。補郡學子弟員。一試即居上游。郡博士徐君。視公文行俱優。擢爲齋長。公與二季。嘗正衣冠講誦不懈。徐君每所咨賞。月試必聯名占前列。徐君嘗語於衆曰。此其學皆

有淵源、非私之也。然公年過三十、始獲薦名、又復不第、投老乃得一官、茲非命耶。公持論根據經理、耻穿鑿之習、雖蹭蹬場屋、而人所推尊、不在利達者後。授經之士、或以獨步膠庠、或以擅場南省、而公之與否、曾不以是一視其言行如何耳。今其徒有忠信自將、退然里巷庠序之間、若將終焉而進修不替者、公之教也。先君子居約時、門戶艱難之事、公所當、每以條理精密、濟登平易。吾家素無田、蔬圃不盈十畝、而食指以千數、仰藥寮以生。伯兄總家務、仲兄治藥寮、公授徒家塾、以束脩之饋補其不足。先君晚歲、用是得與族黨賓客優游觴詠、從容琴弈、裕然無窮匱之憂。當是時、公於妻子裘葛未嘗問也。杜子美北征詩謂、海圖坼波濤、舊繡移曲折。天吳及紫鳳、顛倒在短褐。公妻子無海圖可折、無天吳紫鳳可衣、然舊繡移曲折、顛倒在短褐、則有之矣。先君子喪既除、公不復御講席、家塾教授、屬諸其季。過從之隙、時時杖策徜徉

畦壟阡陌間、檢校種刈、若無意斯世者、豈各以其時耶。番禺許氏爲書院桐嶺、延師其間、以處鄉之學者、又自稟若干人。然其季子往往從學于外、亦嘗來從余游、因得侍公函丈之末。公之餘論遺風、或者竊有所聞矣。一日、父子協謀、闢廬舍、儲器用、廣會集之堂、增自廩之員、介其鄉之賢者、致禮以延公。公卻之再三、請益固、公爲一出。桐嶺學者於是變而樂義理之言、厭場屋之陋。士大夫聞風、莫不願與參席、自遠至者、踵繫不絕、興起甚衆。然公年益高、頗倦酬應、未幾謝去。越數歲、安仁宰曾君、文清孫也、至則葺縣學、增士廩、修禮義、尊師道、願公主之、公不復出矣。淳熙丁未、江西歲旱、撫爲甚。撫五邑、金谿爲甚。倉臺郡守、留意賑恤、別駕廖君實主之。廖知其說、莫善於鄉得其人、莫不善於吏與其事。造廬同公計策、且屈公爲鄉官。於是鄉之所得多忠信之士、而吏不得制其權以牟利。明年賑糴行、出粟受粟、舉無異時之弊。里閭熙



熙不知爲歉歲、而俗更以善、公力爲多。公平居混然、無異於人者、而智識濬深、遇事始見。又其晦明之變、人所不解。當其晦時、童子所了、隸人所知、公或不辨。然特間見於燕閒、視聽使令之間、未始害事。至事理之盤錯、情僞之隱伏、賢識趨起、或用蹉跌、惟公之明、如辨蒼素。客有以名聞者、公探衣將見之矣、戶間偶目其貌、退而卻衣曰、吾不欲見斯人也。已而果非佳士。況此非獨人所不解、公亦有不能自知者。不以學自命、而就證者類有愜志。不以智自多、而就謀者類有寤心。公之得於天者、如玉在山、如珠在淵、其可量哉。逆遜溺心、形似蔽實、微者過當、甚者易位、今之賢者、未易免此。惟公之明、好惡不能亂、形似不能蔽。大學曰、好而知其惡、惡而知其美者、天下鮮矣。故諺有之曰、人莫知其子之惡、莫知其苗之碩。公疇昔亟誦斯言、而屢歎其難。公之所以自致其力者深矣。是書之流行、近世特甚。然其靈足以造此者、求諸其傑、未

見如公者焉。公壯年以呂氏次序大學章句、猶有未安、於是自爲次序。今遠方學者傳錄浸廣、吾家獨亡其稿。公之子、長者年將四十、乃不知父嘗有是書。蓋自其省事、惟見公正文講授故也。公見善未嘗不喜、而稱道不浮其實。見惡未嘗不惡、而指摘不加其罪。兩益之辭、無所和、一切之論、無所取、疑似之跡、不輕實、流傳之事、不輕據。故人之所稱、有所未許、人之所擯、有所不絕。衆人所決、發言盈庭、公每低回以致裁抑。憂世之士、或病公首鼠、不足以植風聲、示懲勸。而公隱然持之自若。近年以文祭舊生徒劉堯夫、頌其平日之美、責其晚節之過、謂改之冥冥、尤足爲貴。其辭深切著明、讀者無不感動。理之所存、何間幽顯、當疑而決、當決而疑、均爲不明也。孰謂公首鼠哉。公嘗名所居齋曰庸學者、因號庸齋先生。然公未嘗言其義、學者亦未嘗有所請。公著述頗多、皆未編次。生於宣和乙巳、十有二月、十有四日辛亥、卒於紹熙辛亥。

十月十日乙酉、享年六十有七。卒之前一夕、起旋小跌、自是倦乏、然就枕即熟睡。覺時醫者視脈、家人進藥、雖飲之、必曰、吾不起矣。十日之朝、侍疾者忽不聞鼻息、察公則已逝矣。娶吳氏。子四人、損之、益之、賁之、升之。女二人、長先公二年卒、未及許嫁。次許嫁貴溪張氏。孫男一人、女三人。卜以紹熙壬子七月十有二日葬于鄉之長慶寺側。公以淳熙甲辰壽聖慶恩、授迪功郎、監潭州南嶽廟。十六年己酉、上登極、覃恩進修職郎。某效官重湖、疾不侍藥、斂不撫棺、葬不臨穴、嗚呼痛哉。敬次序公平生以表墓。某聞命之日、嘗請迎侍、公曰、子行矣。吾往時當自訪子。訃前數日、從公于夢、自是節朔必夢見公、嗚呼痛哉。東望隕涕、爲之銘曰、

如珠潛光、可以照夜、公之明也。如玉儲潤、可以賁山、公之德也。表公之墳、與斯銘其長存。

陸九淵撰 《象山先生全集》卷二八

吳節推墓誌銘

君諱居仁、字溫父、姓吳氏、建陽縣考亭人。考亭溪山之勝、甲建陽。文公朱晦菴先生卜居之、君其西鄰也。先生以道學訓後進、四方之士日造焉。暨君至、則竦然起敬、延之上座、語移晷乃退。幹嘗私請焉、曰、此真廉吏也。嗟異者久之。又數年、先生爲幹買地結廬、徙其家以居、則又爲君之西鄰焉。於是始識君、君亦折輩行爲道義交。故知君之履行爲尤詳。君沒之十年、仲子從周以其婿葉士龍之狀爲書走漢陽、曰、吾父以廉介自守、旣沒而無傳焉、諸孤責也。又曰、吾父受知於文公、又獲與子交。文公沒矣、述吾父之行傳諸後、非子其誰。幹旣與君鄰、有雅故、其奚辭。君之曾祖睿、仕至承議郎、知福州侯官縣、有廉聲。妣安仁縣君黃氏。祖天覺、妣陳氏。父懋功、妣江氏。君自少以學行爲鄉閭所敬、長貢於其州、晚以特恩補官、爲福州古田縣尉。再轉爲潭州攸縣丞、秩滿爲融州節度推官。



君仕所至、勤於職業、以儒飾吏。聽訟必以人倫大誼斷曲直、部使者下其所斷爲州縣式。居官常俸不足、自給、君洗手奉法、一毫不妄取。古田之人稱其清廉、世所絕無、以俗語目之爲生羅漢。邑人思之至今。丞滿、不能歸、邑長以富民之訟產者囑君、且曰、行計可辦矣。君笑曰、此言何爲至我哉。遂徒步以歸。廣西部使者知君貧、不可以不義屈也、委君行視十邑倉粟、一切餽遺悉卻之。大爲當路所知、共薦之、而君沒矣。同寮交致賻、始能以喪歸。君生以建炎丙午、其沒以開禧丙寅。葬於其鄉均亭里石溪之原。娶翁氏、先君二十年卒。子三人、有洽、從周、子容、今其存者從周也。女一人、適進士黃拱。孫男四人、椿田、杞、郴。孫女二人、長適進士葉士龍。讀其狀、皆生平閭里所聞見、可考不誣也。嗚呼、貧固人所難處、君老得官、且家貧、又多累、獨能以廉自將、是則眞可敬也、其爲大賢之所推許也宜矣。吾聞君之八世祖殿中丞文靖與其弟比

部員外郎文秀、自國初擢第、歷仕三朝。祥符三年、同日告老辭位、而天子以三朝元老、加賜章服、以華其行。時人榮之以比漢二疏。侍郎李虛己以詩餞之、有常棣陰中齊拜表、脊令原上對懸車之句。然則君之清風高節、其源流固有自也。吳氏之先自太伯避位、逃奔于吳、孔子稱其至德。其後季札有賢德、孔子題其墓。今君亦以廉見稱於文公、豈其苗裔耶。何其多賢也。抑予有感焉。始予爲兒童、從先生長者游、相告語必以氣節。鄉人有貪者、皆鄙賤而不與之齒。士大夫官至監司郡守、子孫至無以爲食、人猶敬之、曰、此賢者後也。今老矣、視俗之所尙、大與曩者異。一簿若尉、而求田問舍之計畢矣。人爭慕之、若不可及。不若是、則子孫惇然折而爲廝役者有之。榮辱之殊如是、孰肯以此而易彼哉。然嘗思之、廉而貧、賢也。貪而富、盜也。貧而子孫能自立、則又賢也。富而子孫驕且駸、習見其父祖之所爲而效之、其爲盜可勝旣耶。孰貴

孰賤必有能辯之者。予因吳君之事併書之以爲世戒。且以勉其子孫。銘之曰、

謂貪爲可樂兮、跖名以盜。謂廉爲可貴兮、夷死以餓。歷前聖以折中兮、跖之鄙而夷是慕。嗚呼賢哉、是謂有宋廉吏吳君之墓。

黃榦撰 《勉齋先生黃文肅公文集》卷三五

校記

①水：原作「冰」，據文意改。

宋儒碑傳集卷一百二十八

周必大 一

周文忠公行狀

公諱必大、字子充、初字洪道、世爲鄭州管城人。宣和中朝散公通判吉州、因家焉。曾祖衍、故任朝奉郎、累贈太師秦國公。妣潘氏、李氏、張氏俱累贈秦國夫人。考利達、早游成均、冠釋褐選終左宣教郎、太學博士、累贈太師秦國公。妣王氏、贈秦國夫人、給事中覲之女。母衛國夫人宋氏、元憲公之孫、龐莊敏公之甥也。靖康丙午、外祖給事守平江、公以是年七月十五日生於郡治。公幼孤、母夫人課公讀書、每至夜分、聞汴人陳持之賢、使公從之。公敏慧夙成、刻苦自礪、出語綴文、見者驚異。登紹興二十一年進士第、授徽州司戶參軍、改差監行在和劑局門。與運屬王其姓者共席屋數椽、王不戒於火、延燒及公家。官知火自王氏、以其連婣臺察不敢問、執公蒼頭、抑使伏辜、公坐是

免去。朝士勸公直之、公不校也。二十七年、中博學宏詞科、授建康府府學教授。三十年、除太學錄、召試館職、奏篇上、高宗稱其文、諭丞相云、他日可令掌制。除秘書省正字。明年、兼國史院編修官。三十二年五月、除監察御史。六月、孝宗即位。八月、除起居郎、直前奏事。上曰、朕數年前見卿文、有近作可多進來。屬初御經筵、公奏、祖宗置經筵、非爲分章析句、正欲人主從容訪問、以裨聖德、究治體、惟陛下留意。兼編類聖政、以正得失。時暫權給事中、兼權中書舍人、講筵留身、論邊事。上曰、淮南不足憂、所憂者蜀耳。公奏、蜀民久困征求、願降詔撫諭、許以事定寬其力。先是、左右史不常置、而記注多闕書、公奏、乞斷自今年六月十一日以後、先次修纂、每月投進、其積壓未修者、依舊疾速帶修。庶幾陛下始初清明、言動必書、足以示後。婉容翟氏位官吏、轉行有礙正法者、公言、上皇扈從之賞、陛下登極之恩、事體至重、然法當回授者、未嘗轉



藏

行、豈容掖廷奉事之人獨越此例。上曰、朕初以卿止能文、不謂剛正如此。公奏、近日前報政侍從、並依赦復職名、其間亦有不合人望當繳者。上曰、固然、卿論事但令適中、朕無不從也。崇國正夫人位手分罷去、差錢塘縣貼書填其闕、公奏四方聞知、謂勅差貼書、無乃傷國體乎。蔡仍復官、公具奏蔡卞陰賊險狠、遠出京右、使其子得以赦原、亟籓郎選、則宿姦巨蠹之後、皆可並緣以進、失政刑矣。有詔求言、公奏、名器輕假、無甚此時、陛下試命有司、取畢仲衍中書備對、以熙寧官吏之數板今日之籍、遂項比類、修寫圖則、多寡蓋可見矣。又云、祖宗朝甚重諸路總管、鈐轄、將、副將差遣、或待有功之士、或儲將帥之才。乞下樞密院、自今進擬、先取本人腳色聯粘於敕黃之前、照祖宗舊法、毋使背戾。雖有內降、亦須依此。又云、朝廷知外虞之當先、而忘諸道之無備、願於湖南、二廣、福建量屯軍馬數百、控扼要害。遴諸州都監之選、而稍重其

權、使禁軍漸知階級。時金人來索舊禮、上命從臣條對、公奏、太上皇向以祐陵未卜、慈寧未返、一旦以講好之故、寧親寧神、兩遂所欲、禮雖屈而志則伸矣。今彼以數寸之檄、邀我厚禮、而遽聽之、安知不謂我怯而繼以難從之請乎。今使之行、臣願再以敵國之禮嘗之。彼納吾使、吾又何求。如必俟舊而後受、則告之曰、太上皇帝前日之屈爲親也、今通好於用兵之後、主上欲以何名而屈、北朝欲以何名而受。願以爲請。彼雖貪利無厭、亦將思所處矣。論者譴之。隆興元年、有旨押行門張宏特與支破遙郡請給、公奏、臣檢照事因、既非御筆、又非寶批、止用一白劄子、臣不知此命何自而出。幸付三省、尙可進呈。設若指授百司、亦用方寸之紙、奉行則難辨真僞、不行則輕損命令。況宏一班一直之長耳、去秋已嘗特支全分請給、戶部執奏而止。今才數月、乃復紊煩天聽、不可以無懲。經筵取三月十一日開講、公奏、國朝之制、春以二月上



旬、今乃遠用三月。陛下收召英髦、並直經幄、彼皆日夜望賜清閒之燕、致緝熙之助、若緩其所當急、而使講藝論道之風稍闕於初政、甚未可。又奏邵宏淵能還軍中冒濫之恩、併錄戰功、而除正任觀察使、此信賞也。郭振僅一對內殿、既無舊勞、又無新功、亦以觀察使與之、則重矣。陸廉以貪黷配流、此必罰也。張耘賊殺士卒、盜沒軍資、有司當以殊死、而亦與廉同臬、則輕矣。臣願陛下大明賞罰、賞罰明則名實辨、名實辨則政事修、而夷狄可攘矣。樞密副都承旨龍大淵、帶御器械曾覲、除知閤門事、公與給事中金安節、繳奏曰、臣等於大淵、覲功過能否、初不詳知。近聞皆以臺諫論列、故有此除。陛下自即位以來、凡臺諫有所彈奏、雖兩府大將、侍從要官、欲罷則罷、欲貶則貶、一付公論。獨於二人、乃爲遷就、殆非帝堯舍己從人之義也。臣等若奉明詔、則臣等負中外之謗。大臣若不開陳、則大臣來中外之責。陛下若不俯從、則深恐中

外紛紛未止也。依奏、龍大淵別與差遣、曾覲仍舊帶御器械。翌日、公又奏入云、適蒙宰相宣示御札、謂臣等爲人扇動、議論羣起、且以太上時小事不敢如此、則是臣等不以事太上皇帝者、事陛下、專徇流俗、輕瀆聖明、死有餘責。臣等見歸家待臬、有旨無罪可待。上從容語公曰、朕察卿務舉職、但朕欲破朋黨振紀綱耳。未幾、二相道上意、再除兩知閤。公曰、命令反復尤不可。遂留除命不下。上章乞祠。差台州崇道觀。乾道四年、除權發遣南劍州、未赴。六年、改福建提點刑獄。入對、論人才平居選擇則易、緩急求之實難。願深詔執事、雜舉中外文武之才、區別所能、總爲一籍、藏之禁中、副在二府、無事之日、預加審覈、或有任使、按圖而取、上然之。除秘書少監、直學士院、兼國史院編修官。公奏、陛下取漢宣帝之言、親制贊書、明示好惡、使臣下知所趨向。臣觀西漢所謂社稷臣者、乃在乎周勃之鄙樸、汲黯之少文、霍光之不學、至於服儒

衣冠持祿保位、則公孫弘、蔡義、韋賢輩實爲之、故宣帝謂俗儒不達時宜、好是古非今、使人眩於名實、不知所守。然使宣帝知求真儒而用之、何至雜霸哉。臣願陛下平心而察之、不可有輕儒生之名。兼實錄院檢討官。加上德壽徽號、公以高宗萬壽而冊文稱嗣皇帝爲嫌、因閱建炎以後遇節朔遙拜徽宗表本止稱皇帝、按唐憲宗上順宗尊號冊文亦止稱皇帝、議遂定。七年、兼權兵部侍郎、奏四事曰、重侍從以儲將相、曰增臺諫以廣耳目、曰擇監司郡守以補員郎之闕、曰久任監司郡守。上曰、皆今日要務也。上問、越謀吳甚難、何也。奏曰、越已爲吳所殘、勾踐男爲吳臣、女爲吳妾、以小復大、以弱報強、此其所以甚難。然觀其與範蠡謀吳、固有先後之序、非如後世規模不定、僥倖戰勝。上曰、卿議論甚當朕心、朝夕除卿侍從。退即有旨、除權禮部侍郎、仍兼直學士院、陞同修國史、實錄院同修撰。公奏、陛下練兵以圖恢復、而用將之道

或未盡、擇人以守郡國、而責實之方或未至。且如江州一軍、自陛下即位始付苗定、其後戚方繼之、甫一年而定復至、又數年王明繼之、纔半年而皇甫倜又繼之。池州一軍、始付時俊、其後王琪繼之、甫半年而秦琪繼之、纔十月而吳總繼之。數易如此、平居猶慮其乏事、何暇議進取哉。諸州長吏倏來忽去、且以二浙言之、婺州四年之間易守者五、平江西年之間易守者四、又其甚則秀州一年而四易守。用度何爲而不窘、吏姦何爲而不滋、民瘼何由而可蘇。上旋召公謂曰、卿近所論甚善。朕方力革二者之弊。公奏、人主無職事、惟在察臣下邪正、凡輕於任事、速於求售、他日必誤國。願陛下察之。公又言、江湖大旱、嗣歲尙遠、而諸州賑濟之策已盡、須朝廷於南庫支撥一二十萬緡代民租。臣非不知大農匱闕、然艱食則盜起、盜起則調兵、當是時能惜費乎。上曰、聞所未聞。公再拜謝曰、臣惟以不欺事陛下。上曰、正賴卿裨補不逮耳。



兼侍講公奏臺端繩糾中外一日不可闕官今乃五十日不除上曰未有人故也公曰御史臺令殿中闕具察官姓名取旨差權上驚曰朕不知此宰執亦不言蓋避嫌耳公曰臣嘗爲察官是以知之宰執未必知也上謂都承旨葉衡周某奏御史臺舊法卿可諭宰相具來八年兼中書舍人公奏中興以來駐蹕兩浙踰四十年蓋今日根本之地而賦稅供億反重於他路如近日越婺諸郡以隱落爲名增無實之稅是也上曰此胡堅常之謬奏曰陛下既知何不改正上曰當令理會公屢請免兼西掖有旨從之張說再除簽書樞密院事與王之奇賜出身並命公時在翰苑適當答詔入奏云昨除張說簽樞舉朝皆曰不可陛下旋即改命曾未周歲復有此除若謂西府當間以武臣則願於大將中擇有威望者畀之去年羣臣爭論之際傳聞聖諭茲事誠誤以此觀之用說非陛下意明矣所有二人辭免不允詔書未敢具草草上批

王曦疾速撰入公與在外宮觀日下出門九年除知建寧府三請祠提舉江州太平興國宮淳熙元年除右文殿修撰未幾召赴行在二年除敷文閣待制兼侍講兼直學士院上曰朕知卿文學固久今卿不迎合無附麗朕所倚重除兵部侍郎仍兼侍講公言儲材當於閒暇太祖太宗搜覽豪傑恢張四維凡作成之方無所不用其至及眞宗仁宗之世名卿大夫磊落相望是其效也仁宗尤以涵養士類爲急故自治平至元祐悉獲其用厥後章蔡相繼沮士氣以壞風俗獎讒慝以植黨與卒致裔夷之禍紹興初將相卿士得人爲多旣而秦檜以患失之心濟忌刻之性同己者用異己者逐人才衰落貽患至今上皆嘉納上諭公卿所進太上尊號詔草溫純典雅更無一字可議公奏向者庚寅之詔亦臣所草流落累年再塵翰苑上愕然曰前詔亦卿草耶公曰臣幸甚方紹興末太上初上尊號臣已爲察官預此議當時不以表請

私切非之、其後適在翰苑、遂援古誼改正此禮。兼太子詹事。三年、公奏、前年冬江西地震、贛州天狗星墜、既而茶寇入境。今聞十二月及正月福州地再震、亦有天狗之變、其事不可不慮。上曰、防微杜漸固然。公曰、天人相去甚邇、願陛下毋忽。又奏、昨聞殿前司進羨餘二十萬貫、此何從得哉。上曰、朕已不受、聞軍中有百餘萬矣。公曰、雖不受、當思其所自來。上曰、軍中財賦自有源流、蓋統制官不治財賦、統領卻治財賦、可以相關防、更無滲漏。歲月既久、蓄積浸多。公奏、主將須令得統制權心、統制須令得統領權心、今因小利卻使互爲猜嫌、戚戚然相伺察、情何由通、緩急何由得其死力。他日公奏、臣聞陛下日御毬場、固知不忘閱武。然太祖二百年之天下、屬在聖躬、願爲社稷自愛。上作色曰、卿言甚忠、得非憂銜櫪之變乎。朕每次須再三審視前後、兼南方無好馬、非西北比。正緣讎恥未雪、不欲自逸耳。陞兼侍讀、除吏部侍郎。四年、

除翰林學士、依舊兼職。公奏、臣觀自唐至本朝、優待詞臣、異乎他官、謂其居近侍之職、無簿書之冗、可以朝夕論思、日月獻納、或有補於治道也。臣所慕者陸贄、歐陽修而已。十月久雨、公上言、陰雨已踰兩旬、甚妨收刈。伏聞太祖朝以久雨、謂左右曰、後宮止三百餘人、當更放數十人。今禁中給使雖少、不知可用太祖故事否。浙中諸郡積欠頗多、不知可降旨少寬期限否。其餘更有寬恤事件、望令三省及戶部日下條具取旨。內直宣引、公奏、臣在翰苑、無有司之職、所以久不敢請對。上曰、學士宴見無時、最爲親近。公因論時事、遂及陛下當委任大臣、而使臺諫給舍各舉其職、自無過舉。今風俗委靡、士大夫以簿書期會爲能、不思其職、久而不已、其害將不可勝言。願陛下早正其偏。又奏、九月間天文不順、且聞金星近前星。上曰、止是略近、已戒太子勿近外人。奏曰、天道高遠、當論人事。武士擊毬、太子亦與、臣甚危之。上曰、卿可語太

子。奏曰：太子人子也。陛下命使馳驅，臣安敢勸以違命。陛下勿命之可也。上曰：近日察官甚舉職。奏曰：人臣肯不避怨謗論事。陛下當聽而主張之。且六察止有二員，若更除一員，則每員可分兩察，亦所以示開廣言路之意。他日公問上：太上何所苦。前日陛下不及整輿衛而出，人情疑懼。上曰：太上於飲食小失節，當日朕甚倉皇。因奏德壽宮相去太遠，非便。上曰：前日已曾及此。太上堅不肯遷，如殿前司卻多地步，待更力請。又奏人主外寄耳目於監司，臣願明詔部刺史，或月或季，各以部內所當罷行之事，做成周小行人，所謂萬民之利害，政事教治刑政之逆順，與夫作惡犯令，豐凶和樂之書，條具以聞，毋得用薄物細故塞責。如此，則不惟陛下坐而周知天下之故，亦可於是稽其人之才否，而詔黜陟矣。公屢乞去，上勿許。且奏陛下用臣太過，位序浸高，未免招致人言。且蘇軾在此官，猶請郡至八九，臣實何人，敢不知懼。上曰：待

召人令與卿分力。因問呂祖謙能文，公奏祖謙不但能文，極知典故，翰苑須常用有學問之人，乃爲有補。五年十二月，除禮部尚書兼翰林學士。公奏：臣竊見本朝昭憲皇后誕生太祖、太宗、聖子神孫，垂裕萬世，宜擇其子孫愿恪有才能者一二人，加之以一命之寵，畀以祠廟之祿，世世勿絕，仍就行在賜屋，使聚族以居，與國無窮，庶幾慰在天之靈，報垂裕之德。六年，詔禮官詳議明堂典禮。公奏：祀帝祀天以祖宗配，此本朝已行之制。但世俗誦孝經之語，未嘗深考其義，致以今日爲疑。故前郊李燾申請，雖經羣臣集議，尋爲異說所奪。今旣明降旨，揮即與臣下啓請不同。若或中輟，理爲未安。由是圓丘合宮始互舉云。講筵留身，論本朝立國專以仁，兵非不用也，而以禁暴安人爲本。上曰：本朝兵勢大抵似弱。公奏：仁故似弱，其實非弱。社稷靈長，職此之由。上曰：所以並無禍亂。公曰：本朝似周，彼秦雖強，祇以自蹙。上論前代人物，公奏：



陛下萬幾之暇、潛心聖賢、不爲嗜好所惑。上曰、自昔人君、不知道只爲不學。公奏、堯舜禹之稽古、高宗之監成憲、故措諸事業、後世莫及。今陛下留意於學、眞積力久、此心清明如止水、明鑑物之過者、妍醜眞僞、灼然可見。以此應天下之務、安有一事失其當哉。十一月、除吏部尙書兼翰林承旨。公奏、近日裁減宗室恩數事、上曰、太濫。公曰、若擇服屬疏者、許其一依土人應舉取放、既可密減入流、又待之厚、彼自無怨。上稱善。又奏、自昔治少亂多、未有數十年常晏然者、今中外幸小康、豈可不防患於未亂。上曰、無怠、無荒、四夷來王。公奏云、明王謹德、四夷咸賓、皆是道也。又云、虞舜無爲、非皆無爲也、但不爲簿書期會之屑屑耳。七年五月、除參知政事。上曰、朕近見卿理會一二事、殊不依違、執政之於宰相、事任非遠、貴在和而不同、有所見言之、勿以爲嫌。公對願盡力。上嘗密遣人往昌化覘視箭穀、回云六十年前有此、上以示丞相趙

公雄、雄言、上再三及此、恐合宣示外廷。公曰、宣和間有此、豈是休證。乃不果言。上謂公曰、只爲養兵、不免皆取之民。公因極陳民困之由、上問、各有名色、何故困民。公曰、且以平江府論之、紹興以前、歸正添差等官、歲用五萬緡、後來乃用二十餘萬緡、則是歲添三倍以上。旣無所從出、遂於支移折變中、暗增錢數、如苗米一石、其耗三斗、州府受納、則令折科、增三斗爲五斗、增五斗爲七斗。如此則有田之家、無不被害、安得不困。此特一端耳、他皆類此。上爲之悵然。八年八月、以久旱降親筆付三省求直言、丞相回奏謂熟多旱少、今此詔一下、所在皆有賑濟之請、何以應之。約公通簽進入、公言、上明日達聰、欲通下情、而吾儕阻隔不行、萬一上自行之、且以此奏示人、豈不獲罪。公論相亟從之。上嘗以樞密非古官、欲罷之。公奏、樞密本唐傳導之官、五代始置崇政院、分宰相之權。慶曆間、張方平固嘗以爲非、而神宗亦有廢併之意。今聖



諭可謂盡善。但二百年官制。一旦驟改。良亦未易。不若且令二府互領。又及求直言事。公奏。陛下聖德日躋。而星變旱災如此。殆由臣等所致。上曰。若封事言及大臣。朕須留中。公曰。付出何害。欲人不知。莫若勿爲。未聞有過而人不知也。有介宮闈之援。而求爲郎者。上令公諭給舍繳駁。公奏。臺諫給舍與三省相維持。豈可諭意。不從失體。從則壞法。命下之曰。臣等自當執奏。上喜曰。卿等肯如此任怨。甚善。公奏。不與其所當與。謂之任怨。不與其所不當與。何怨之有。上曰。此所謂任責。非任怨也。公嘗言用人之道。因及著作郎佐各二人。紹興以來。未嘗官備。蓋以職任清高。實爲左右史之儲。近歲習俗奔競。遷進太速。今在館多非久次。望姑養其器業。以厚士風。九年九月。除知樞密院事。上謂公曰。每見宰相所不能處之事。卿以數語決之。三省本未可輟卿也。他日。上謂公如統制官之類。當時與之接。以觀其才。公奏。昨雷世賢相見。說

淮南地形緩急。欲守滁。臣謂不然。滁有山林之阻。可守而不可禦敵。若廬和嬰敵衝。此則當備禦。山陽舊屯軍八千。雷世賢方請止差鎮江一軍五千人。上欲許之。公奏。山陽控扼清河口。紹興初。韓世忠嘗屯重兵於彼。若無故減戍。他時旋增。必致敵疑。今揚州武鋒軍有衆八千。本屯山陽。若歲撥三千人同鎮江一全軍往戍。似爲兩便。十年。御帶林憶年丁憂。中官除此闕者數人。公奏。闕官徒借。是以希升轉。近用王實。今又用王毅。雖是德壽宮人。給舍不知。多來問臣。臣雖具以陛下奉親之意曉之。終非美事。上曰。也是都要轉遙郡。公奏。不得已。且令給據亦可。公又言。近者白氣自西南亘天。宜爲兵備。上曰。日腳之氣。冬常有之。公言。此太史局相寬之詞。抑天道固不可知。有備乃無患。吳挺申交州蕃部劫漢人二名及牛畜而去。挺以事細。止乞照會。公奏。今欲降旨。揮督其根治。庶幾知朝廷每事留意。不敢忽略。國家日有萬幾。若不

察之於微其弊將有不可勝救者。上曰：幾者動之微，自古多緣不能防微杜漸，馴致禍亂。溫州軍士因教閱喧悖，郡守汪義端將爲首者決配，憲臣張詔欲先定義端減尅衣糧之罪，然後將軍士明正紀律。公奏：此風不可長，若稍行遣義端，則今後驕兵苟有所求，必爲劫持計矣。郭果請移江陵兵萬二千人并家屬永屯襄陽。公言：江陵兵一萬八千人，自來半戍襄陽，今果謂襄陽極邊爲門戶之要，殊不知江陵亦在江北，爲吳楚喉衿。或金以數萬人綴襄陽之師，自隨郢直走荆南，則奈何。上曰：正爲軍士家屬在荆南，恐或擣虛牽連士卒心。公奏：如此，則江陵遂棄之乎？爭甚力，上乃許果萬人而留八千於江陵。盱眙報金酋今歲避暑壽安宮，所徙器用倍常時，且分諸子出鎮。上謂公：此必有避位意。公奏：當預爲之備。如淮上萬弩手近密令州郡置籍，而諸路民兵關於教閱，內外諸軍亦久無陞進，欲併擬一指揮，令擇精習武藝者解

發赴行在。宰執三衙親行閱試，高者補一兩資，餘第支賞給，亦所以示不忘武備之意。上曰：便是恐人謂放下。公嘗奏：祖宗時大臣奏事榻前，互相可否。今陛下虛心無我，有所未至，惟恐臣下不言，豈容人臣卻護短自是。夫惟小事不敢於榻前有隱，則大事無由欺蔽矣。上深以爲然。公言：近探報敵酋欲至東京，秋冬議過上京，乞密下諸將究實，且降親劄付蜀中三大帥，令條具攻守之策以聞。公奏：事次上獨命留身，宣諭云：金酋既過上京，秋間或傳位興兵，卿留心軍政，甚副朕擢用之意。公奏：臣本以文墨荷聖知，戎務本非所習，誤蒙任使，不敢辭耳。今彼恫疑虛喝，正恐我或先動，所當鎮之以靜。惟邊將不可不精擇，山陽最爲重地，正當金糧道。今正與尋常州郡一等用人，緩急竊恐誤事。淮西延璽申、泗州歸正朱現已補承信郎，不曾與告。上曰：何不與之。公曰：元來誓書不得招納叛亡，恐卻過北界，引惹邊事。今欲令王希呂



更加優恤。上獎諭再三。曰：卿處事甚當。十一年六月，除樞密使。上曰：卿在西府，備殫忠勞，若有邊事，宣撫使惟卿可，他人不能也。公奏：諸軍陞差置籍，今已一季，合行點召，雖不專以此取人，亦因以察其能否，使之不測，則主帥自不敢行私。詔令赴密院審察。王希呂乞增兵守廬，上欲令郭鈞、雷世賢共分數千人與之。又云：萬弩手民兵自可爲用，若添得一藩籬，甚好。公曰：希呂欲二萬人，少猶半之，蓋須以正軍爲主，則帥司可立。帥司既立，則沿淮歸正山水寨民兵萬弩手等皆爲我用矣。十二年，留正申西兵已免起二年，今次取聽朝廷指揮，上令發來。公奏：襄陽兵少，閻世雄欲得此項人。上曰：三衙不可闕。公言：頃金不得志於四川，又嘗送死於兩淮，深恐睥睨荆襄，向來猶調他處官軍，不比三衙在近，臨時可以措置。上悟曰：與應付一年。金州闕帥，公奏欲令侍從管軍薦舉。上云：大帥自合朝廷除授，卿等且更求人。公曰：舜用九官，

並咨四岳，用否在上，何嫌之有？與其暗薦，不若明揚。仁宗用臺臣，至於列所薦人姓名，已乃考實，誰敢妄舉。上言：王藺論事頗偏。公奏：藺議論雖時有過當，然人主左右豈可無數人盡言不顧身者？若上下相蒙，合而爲一，殆非國家之福。盱眙奏報達實林牙領兵犯金國，金下宿泗等州堤備，御筆賜公等曰：達實契丹欲興兵，不如所傳則已，有之則在我，豈得漠然？他日我經舉兵，則違誓約，若因釁則將何以爲辭。公奏：敵中多詐，彼一方小警，何至移文近邊？若果有釁，臨時不患無辭，所急在於間探精審耳。明年，上又諭公：以吳挺約結夏國事，公奏：陛下念世讎之未報，思境土之未復，規摹宏遠，夙夜不忘。臣備位於茲，無以少副使令，每切慚負。但夏人自來翻覆，乾道中王炎嘗因任令公用帛書通好，隨即密送金人，范成大奉使日雍，遂出以示之，其難保如此，結約似未可輕。若雍易世，親離衆叛，天相聖明，決有機會。廣東帥潘時以

擅斬犯法軍士自効待臯、上批無罪可待、公奏帥無便宜之文、不經錄問詳覆而斬四人、雖意在除惡、然人命至重、若如此施行、恐開妄殺。只如洪邁誅婺州唱亂六兵、亦止是放罪、後不妨旌賞。池州李思學自陳本軍正將二人不能開弓、竊恐被點喚、乞與罷任。上曰、此法甚好、皆樞密使措置之效。楚州報金中呼魯大王占據上京、上批問公曰、金若中分其國、宜預畫計策。公奏、茲事體大、譬如奕棋、須隨着應之、若遂先舉、恐貽後憂。他日上諭公、近北使到闕、詢問其三節、人皆云呼魯年已六十餘、因於僧舍、前所報達實林牙亦是妄傳、樞使可謂先見之明。十四年二月、拜右丞相、公奏、臣不才備位、初無設施、惟奉行成算。今陛下勤政、內外寧謐、二十餘年、此正可懼之時、當思經遠之計。臣欲具要務、取自聖裁、若其可行、當與王淮等協濟、亦不敢紛更欲速。上曰、銳則易怠、國家無事時、正宜修明政理。公奏、大臣朝夕納誨、非如臺諫

給舍救之已然。上曰、朕有過失、卿宜盡言。上欲下吏部將知縣有薦舉人先與通判闕、公奏、莫若籍記與堂除通判、免滋攙奪之風、且壞銓法。公以早求退、不允。因奏及民實惠、惟寬減夏稅而施德自近始。如會稽和買詭避極多、今乞權免一年、後當差官釐正。秀州申乞權減大軍總制錢二萬餘緡、吏擬勘當、公曰、此豈勘當時耶。奏蠲之。高宗上僊、朝廷欲用顯仁例、遣三使如敵中、公固執不可、謂今昔事體不同、不當畏人而曲徇。金國賀生辰使人到闕、上在喪次、議欲宣諭俾歸。公奏、賀禮固不可行、但彼遠來、止是館伴發遣、朝廷更無一辭、於理未安。遂口占數語、令使者歸、附奏、中外咸謂得體。十一月、手詔討論皇太子參決庶務典禮以聞、上欲從天禧舊制、止就資善堂、公奏、其時太子尚幼、初見輔臣、恐難尊用。昔晉有宣猷堂、今作議事堂、亦可。十五年、太上山陵、公奏、當如祖宗舊法、置使五人、首相意不欲、禮官又引紹興顯仁



例。公言、今陛下既用七月之制、又行三年之喪、山陵豈可不用大臣。永熙陵差呂端攝太傅、是時一相尙且親往。昭慈在會稽、倉卒間猶命樞臣爲總護使、又差執政張守監掩攢宮。舊章著明、昭然可証。臣備位宰司、當行。乃以公攝太傅、如端故事。明堂加恩、進封濟國公。公奏、久塵政路、自思陵歸、即欲求去。緣京鏜使北、爭執禮文、屢蒙宣諭、恐彼中因賀生辰、卻求報復、令臣任責、是以遷延少待。今人使已行、求去無嫌、願乞骸骨歸山林。上獎勞再三、曰、朕比年殊覺病倦、欲傳位太子、卿須且留數年。公奏、陛下聖體方康彊、只緣哀毀太過、何遽及此。上曰、禮莫大於事宗廟、而病不能自力、每直孟享、往往分詣。孝莫大於寧親、而德壽宮隔遠、不得日至、欲不退休、得乎。朕方以此委卿。公泣而退。十二月壬申、上密付紹興三十二年太上傳位親札。公奏、陛下躬行舜禹之事、臣願釋政、以內祠事、陛下於別宮。上曰、丞相得無欲用錢端禮例、

邪。上命公草詔、宜以侍几筵奉東朝爲意。十六年正月、拜特進、左丞相、進封許國公。二月壬戌、內禪。公奏、陛下聖壽康寧、巽位與子、古今盛典、再見本朝、中外同慶。臣等輔政無狀、自此不得日侍天顏、無任依戀之至。哽噎幾不能言。上亦泫然曰、正賴卿等協贊新君。光宗即位、公奏、陛下初政、用人求言爲急、如前宰執侍從、首合咨訪。後三日、御筆批出降詔、從公請也。三月、陞少保、益國公。累奏乞回授、上不許。降詔面諭至三四。公在位稍久、士之有求而不獲者多。望公、公爲是懼、求去甚力、上不許。既而諫官有言、公請益堅、詔以觀文殿大學士判潭州。言者不已、遂以少保奉祠而歸。孝宗遣中使賜公金器、勞問有加。紹熙改元、判隆興府、辭不赴。除觀文殿學士、判潭州。郡有倍稅牙契錢、歲約二十萬緡、公亟罷之。明年六月、復大觀文。七月、坐舉官不實、降授滎陽郡公。又明年八月、復益國公、改判隆興。復再入奏祈免、除醴泉觀使。今上

即位、詔求直言、公奏陳四事曰、聖孝、曰敬天、曰崇儉、曰久任。且欲倣靖康時譚世勛主管龍德宮、壽皇時命錢端禮爲德壽宮使故事、遴選太上舊臣一二人、使侍燕閒、從遊幸、以廣陛下之孝。本朝提舉司天監、皆委近臣、如神宗初年用司馬光、元豐間用王安禮、今莫若擇侍從之忠直者提舉太史局。此誠格天之一端。上特遣使賜公少傅告、公一再辭、尋許回授。慶元元年三上表告老、詔以少傅致仕。嘉泰元年有以布衣上書及公姓名者、言者論公降一官、次年復少傅。四年十月一日薨、年七十有九。訃聞、上輟朝兩日、贈太師、賻銀千兩、絹千疋。公娶王氏、益國夫人、監察御史葆之女、先公一年薨、葬於廬陵縣斗岡之原。十二月八日、奉公柩合焉。子綸、朝請大夫、行大理司直。孫顯、宣議郎、新監饒州浮梁縣景德鎮兼煙火公事。孫女五人、長適承事郎、監嘉興府羅納倉蕭彖、餘未行。公英亮宏達、得於天資、研精覃思、博極書傳、少有

大志、常以古人自期。登進士第、繼擢詞科、當官泣事、慮周而識敏、內秉剛方而外和易、人不見其圭角。高宗一見其文、奇之、由臺閣登侍從、標望屹然、凡所獻替、前代之典章、國朝之故實、援引考證、辭婉意切、悉中事宜。在兩制、除拜有非其人者、據正爭執、前後兩以祠去、士大夫莫不高其風。而孝宗於是益敬公矣。暨再還朝、旋踐二府、政事之外、尤究心武備、選將練兵、常如敵至、慨然以規恢大義爲不可已、而務存審重。孝宗亦自謂往時以文章知公爲不盡、而始有大用之意矣。既正宰席、以身任天下之重、進盡忠益、退省闕遺、輔贊彌縫、靡不用其極。每與同列奏事上前、有甚公者、公一不顧、反覆辯論、歸於是而已。公於人才務合異同、不主一偏、惟賢是用、尤不樂矯激近名者。其規模建置、大抵本於仁厚、每以愛養民力、久任牧守爲急、於祖宗故事遵守不敢輕易。孝宗將內禪、討論典禮、草定詔冊、一出公手、他人莫與。光宗以公

甘盤舊學、眷禮尤篤。於是側目者衆。公竟以論去。閒居十五年。自號平園老叟。築堂名曰玉和。公自序云。四氣和謂之玉燭。方今賢和於朝。物和於野。遂使皤然一叟。得狹老於和氣之內。則知公雖從容綠野。坐遠世氛。而其心未嘗一日不在朝廷也。顧常謂易六十四卦。惟謙六爻皆吉。又誦一言可以終身行之者。其恕矣乎。故平生處己以謙。待物以恕。出於自然。無所矯飾。公之爲文。溫純雅正。不厲聲色。自足如意。近代建言得體。無出公右。晚筆力益逾。四方碑板多以屬公。公自奉甚約。義所當予。略無所靳。親舊貧不能自給者。廩之終身。事從兄甚嚴。視其顏色以爲戚欣。撫族嫻曲有恩意。官同姓者六。異姓者五。公雖貴。遇朋友如貧賤時。澹於聲色。獨嗜書如饑渴。已老。手校文苑英華一千卷。又與同志取歐陽公集。反復是正之。遂爲善本。公有省齋文藁四十卷。平園續藁四十卷。省齋別藁十卷。詞科舊稿三卷。掖垣叢稿七卷。玉

堂類藁二十卷。政府應制稿一卷。歷官表奏十二卷。奏議十二卷。奉詔錄七卷。承明集十卷。辛巳親征錄一卷。壬午龍飛錄一卷。癸未日記一卷。閒居錄一卷。丁亥游山錄三卷。庚寅奏事錄一卷。壬辰南歸錄一卷。思陵錄二卷。玉堂雜記三卷。二老堂詩話二卷。二老堂雜誌五卷。玉藥辨證一卷。樂府一卷。書稿十五卷。壁之先君文簡。辱交於公。同德比誼。獨相知心。仲兄著作。季兄賢良。皆從公游。蒙待以國士。而壁自幼亦荷公期。予甚過。追惟三十年間。死生離合。感慨增係。自顧驚下。學不加進。有負獎知。今公既葬矣。綸以行述來請。用不敢辭。序始終大略如右。以俟誌公之墓者。且以備奉常太史氏之采擇云。開禧元年十二月辛未。朝議大夫。試尙書禮部侍郎。兼同修國史。兼實錄院同修撰。兼直學士院。兼樞密都承旨。李壁謹狀。

李壁撰 道光刻本《廬陵周益國文忠公集》附錄卷二



宋儒碑傳集卷一百二十九

周必大 二

少傅觀文殿大學士致仕益國公贈太師諡

文忠周公神道碑

孝宗皇帝在位二十八年、厲精求治、久而不倦、聖德日新、光紹祖宗。宰相凡十有五人、明良會遇、可謂盛矣。求其相爲終始、全德備福、亦未有如益國周文忠公者。始公親見龍飛、御名之立、已嘗預議。中間再出力排權倖、沮其枋用、忤旨去國、略不少貶。士大夫之過計者、謂公不復用矣。聖明洞照、愈加褒擢、遂至元宰、任天下之重、周旋密勿、終贊與子之決。以孝宗之實睿實聰、公之明敏肅給、眞千載之遇。而又事光宗于春宮、夾輔初政、功成身退、旣掛衣冠、猶被主上寵光者十年。嗚呼、其可謂聖朝之宗臣矣。公薨之二年、嗣子綸以書抵四明樓鑰曰、先公旣葬而隧碑未立。謂鑰荷公之知、晚而益深、又嘗待罪太史氏、俾爲之

辭、且示以今參知政事李公壁^①所作行狀。鑰不佞、謹撫其大槩、泊平日見聞之實而書之。公諱必大、字子充、一字洪道、世爲鄭州管城縣人。曾祖衍、朝奉郎。祖詵、左朝散大夫。父利建、以上舍魁登第、終左宣教郎、太學博士。以公貴、三世俱贈太師、秦國公。曾祖妣郭氏、祖妣潘氏、李氏、張氏、妣王氏、俱贈秦國夫人。宣和中、祖爲吉州通判、因家焉。外祖給事中靚、知平江府。靖康元年、公生于郡治。幼孤、歸信州外家、從汴人陳持學、太夫人躬督誦書、率至夜分。十三而太夫人卒。公記誦絕人、徒手入舉場、有問者、應如響。文又工緻、遂名薦書。紹興二十一年、擢進士第、授左迪功郎、徽州司戶參軍、改監行在和劑局門、以鄰火罷。二十七年、中博學宏詞科、循左修職郎、建康府府學教授。三十年、除太學錄、召試館職。高宗稱奏篇、謂他日可掌制。除秘書省正字、循左文林郎。三十一年、改左宣教郎、兼權國史院編修官。三十二年五月、除監察御



史。六月、孝宗即位。八月、除起居郎、直前奏事。上曰：朕舊見卿文、有近作進來。此眷注之始也。侍立講筵、奏勸講、非爲分章析句、正欲從容訪問、以裨聖聰、究治體。兼編類聖政所詳定官、暫權給事中、兼權中書舍人。嘗論邊事、上以蜀爲憂、對曰：蜀民久困、征求願降、詔撫諭、許以事定寬其力。又奏：比歲史官不備、故記注多闕。欲先自六月十一日修纂、前未備者併修之。論翟婉容位、官吏轉行礙止法事。上曰：初謂卿止能文、不謂剛正如此。公奏：前宰執侍從、依赦復職、亦有不合人望、當繳奏者。上曰：固然。卿論事、但令適中、朕無不從也。應詔條上十事、皆切中時病。其一嚴銓試之法。又奏：羣臣六參、除朔望過宮外、勿改舊制。至今行之。安穆皇后追冊祔饗。公奏：神主謁諸室前殿、則不以欽宗服而廢祖宗之樂。別廟奉安、則乞備而不作。金人來邀舊禮、詔從臣指陳定論。公率同列奏向者祐陵未卜、慈寧未返、以講好之故、寧視寧神、兩遂

所欲、禮雖屈而志則伸。今而遽許之、必謂我怯、將有難塞之請。使者之行、當再用鄰國之禮。彼或有辭、則告以通好于用兵之後、以何名而屈、以何名而受耶。事有當駁者、皆極論其不可。上亟加獎歎。公亦言：陛下有納諫之資、故臣輩各思自竭。龍大淵、曾覲、除知閣門事、公同給事中、金安節、奏大淵罷副都承旨、覲罷帶御器械、俱以閣門處之、實遷也。若以攀附舊恩、尙有可諉、正以搢紳指目、臺諫有言、外議方喧、而除命遽加、陛下于將相要官、或罷或貶、一付公論、略無適莫。獨此二人、乃爲之遷就諱避、殆非舍己從人之義也。有旨：罷劇就閒。已允公論。尙茲回繳、可特依奏。已而二相宣示御札、謂給舍爲人鼓惑、議論羣起、小事豈應如此。公等奏言：昧于事體、專徇流俗、輕瀆天威、居家俟罪、再乞重賜竄責。俱不允。入謝。上曰：朕察卿務舉職、但朕欲破朋黨、振紀綱耳。旬日、二相又道上意、已再除兩知閣。且云：後省想亦無他。公曰：前已

反汗、今復申命、豈敢但已。格除目不下。右揆以聞。越三日不獲命、以信州遷奉請祠、兩任主管台州崇道觀。乾道四年、權發遣南劍州、未赴。六年、改福建路提點刑獄公事。陛對、論帥臣有名而無其實、將副具官而非其人。又論雜舉中外文武之才、以備選用。益縣令之俸而責其廉。及捕盜官候六攷行賞。執政奏擬秘書少監、上可之。仍令兼直學士院。會草晁公武知揚州不允詔、御筆改定、公引故事乞罷、不許。兼國史院編修官。初、鄭聞草公制、上改首尾詞、公奏、陛下取漢宣帝之言、親制贊書、明示好惡、敢因訓詞推廣聖意。臣觀漢社稷臣、乃在乎周勃之鄙樸、汲黯之少文、霍光之不學。至于儒者持祿保位、則公孫弘輩實爲之。故宣帝嫉之、以爲俗儒不達時宜、蓋有激而云爾。使宣帝求真儒用之、何至雜霸哉。陛下以漢爲監、則士風趨向歸于正矣。上曰、卿學術精深、記問該博。又嘗曰、平昔所蘊、可以自見矣。自此當日夕與卿論文。

兼實錄院檢討官。加上德壽尊號、公謂、太上萬壽、而紹興末議文及近上表例用嗣皇帝爲未安。按建炎以後遙拜徽宗表及唐憲宗上順宗尊號冊文、皆稱皇帝。議遂定。趙丞相雄以中書舍人奉使、賀金主生日、宗室伯驢爲介。御札生辰使兼齎國書一封、理會受書。公立具草、有云、尊卑分定、或校等威、叔姪情親、豈嫌坐起。後四日對秘殿、上曰、朕未嘗諭國書之意、而卿能道朕心中事、可謂大才。賜坐久之、欲退而不記來路。上指示之、命內侍導而出。七年、奏四事、重侍從以儲將相、增臺諫以廣耳目、郎官專以旌外庸、監司郡守皆當久任。上稱其爲要務。皇太子領臨安尹、公旣草制、因奏恐別無被受、欲依詔書體式降付東宮。兼權兵部侍郎。上云、學士院湫隘。公奏、宮城不容增廣、陛下欲卑宮室、臣等居此亦過矣。若遴選名儒而信任之、不在棟宇之麗也。除權禮部侍郎、仍兼直學士院。陞同修國史實錄院修撰。有旨、公與吏部侍



郎王之奇、太子詹事陳良翰對選德殿、袖出御札、引唐太宗、魏徵問對、以在位之久、功未有成、治效優劣、苦不自知、各極陳其當否。公退而條陳、練兵以圖恢復、而用將之道未盡、擇人以守郡國、而責實之方未至。又指陳大將郡守數易之弊、且言、貞觀政要四十篇、既先之以魏徵論爲君之道、又著不克終之戒于編末、蓋是時惟徵爲善諫。願思太宗廣諫諍之德、使嘉言日聞、治道日興。上嘉納、且曰、方圖力革二弊。又奏、諫官虛位、願早擇正人。先朝參用古制、卑其品而厚其禮、責其盡言、使姦邪望風畏戢、消患未形。如近歲張松、韓玉等、使臺諫無所顧忌、早爲力言、豈至勞民費財、始勤英斷。雖天縱濬哲、安能盡見。上曰、如人奕碁、當局多誤、惟旁觀乃見之。朕自此知戒矣。又奏、人主無職事、惟在察臣下邪正。凡輕于任事而速于求售者、他日必至敗事、不可不察。若疑儒者不足用、而專謂才臣能趣辦、今既累年、其效可睹。唐太宗之

臣即隋之臣、藝祖之臣、即五代之臣、非前愚而後智、顧人主用之如何耳。又論、臣寮務爲新說、欲徼奇功。王安石以堯舜之道告人主、實行管商之術。指司馬光、蘇軾輩爲流俗、尤當深察之。上曰、蘇軾卻是流俗、可謂顛倒。嘗奏江湖大旱、上稱龔茂良措置有理、公請出南庫緡錢二十萬代民租、乃不乏事。非不知大農急闕、然艱食則盜起、盜起則調兵、費可省乎。上曰、卿議論殊善、使朕聞所未聞。謝曰、臣惟以不欺事陛下。兼侍講、上以雨雪愆亢、欲加精禱。公奏、洪範肅時雨若、此殆言路曠官之證。臺端一日不可闕、今乃五旬不除。上言未有人、公奏、百執事何至乏才。兼御史臺令、殿中闕、具察官姓名取旨差權、苟未欲輕用人、亦可舉行此制。上驚曰、朕不知此。遂宣諭宰相具上。又奏、近奉詔、以僕射名官非古、欲更其名。周之太宰、卿也、小宰、中大夫也。中間所改、亦未可用。上曰、太宰今吏部尙書爾。止欲爲左右丞相、如同中書門下平

章事皆可削。公遂歷奏前古沿革而退。八年，權中書舍人。公奏西浙爲今日根本之地，而賦稅供億反重于他路。且戶部既理財，朝廷又理財，爭肆漁取，致以隱漏爲名，增無實之稅。上曰：此漕臣之繆。公曰：陛下既知，何不改正？因辭西掖，且言外制之設，正欲謹于出令。凡有未當，欲其繳奏，非專責以詞翰也。上曰：正有望于卿。因奏閩漕陳峴議變鹽法，恐擾民難行。又奏曹耜除府推事，上曰：知其人才，欲與寺丞。公曰：臣即有文字。上意不悅，退而繳詞頭，願別擇俊寮。協贊元良。耜知嚴州，公亦免兼矣。張說再除簽書樞密院，王之奇賜出身，並命公當草，不允。詔奏謂：昨者舉朝以爲不可，陛下欣然聽納。嘗云茲事誠誤，旋即改命。曾未周歲，復有此除，貴戚預政，公私兩失。若謂西府間以武臣，願擇大將有威望者畀之。臣非欲專任文吏也。且當是時，之奇亦曾論奏，今乃與說同陞，恐亦未當遽受也。臣未敢具草。時權給事中莫濟再封還御筆，遂俱與外祠。又趣公出門，匹馬便面，翩然徑行。九年，除知建寧府，再辭不允。中道引疾，提舉江州太平興國宮，天下愈高之。淳熙元年，除右文殿修撰，說罷，召還，除敷文閣待制兼侍講。六月，兼權兵部侍郎。嘗論改官舉削到部放散之制，後雖潤色，然自公發之。八月，兼直學士院。上稱公持重，不迎合，無附麗。除兵部侍郎，仍兼侍講。進太上尊號詔草，上曰：此文難于言，而溫純典雅，無一字可議。公奏：向者初上光堯之號，臣已預議。庚寅之詔，亦出臣手。上愕然曰：前詔亦卿所草耶？兼太子詹事，上論史事，公奏：李燾于史學如嗜飲食，長編攷證異同，罕見其比。嘗論用人惟上智與下愚不移，中人惟上所御。爲官擇人，則引中人爲君子。若爲人擇官，則引中才爲小人。今不及數月，已望遷擢，後將無官可遷。願力革此風，愛惜名器。又奏兵將官刻削等事，上曰：今不如此。且言王友直極廉，安有刻下。公曰：昨聞殿司進羨餘二十萬緡，此



何從而得。上曰：朕已不受。公曰：雖則不受，當思其所自來。上曰：統制官不治財賦，統領卻治之，可相關防，不致妄費。公則曰：此尤非也。主將而下，須令各得懽心。今因小利，更相猜察，情既不通，緩急何由得其死力。又奏聞陛下曰：御毬場固知不忘閱武。然大祖二百餘年之天下，屬在聖躬，可不自愛。上作色曰：卿言甚忠，得非憂銜縻之虞乎？正以讎恥未雪，不欲自逸耳。又奏聞金星近前星。上曰：止是略近。公曰：天道高遠，當論人事。武士擊毬，太子亦預，臣甚危之。上曰：卿可語太子。公曰：太子，人子也。陛下命以驅馳，臣安敢勸以違命。陛下勿命之可也。陞兼侍讀。大禮執綏，備顧問。除吏部侍郎。奏：朝廷守至公之道，有司持一定之法，行以無私，孰不心服。近乃有任怨之說，法行以公，人自無怨。上曰：朕每諭大臣，彌縫人情，無有是處。四年，除翰林學士。奏：自唐至本朝，優待詞臣，以其無簿書之冗，可以朝夕論思，或有補于治道，得人固多，

最可慕者，陸贄、歐陽修而已。若乃進則有隱，退則不密，擠人而利己，揚己以取名，安能逃日月之照哉。上曰：學士宴見無時，至爲親近。五年，爲御試詳定官，屢乞去。上問文士可代者。聞呂祖謙能文，公謂翰苑須用有學問者。祖謙涵養既久，習知典故，史院甚得其力，不但文字之工也。得旨撰選德殿記，又命書之。後內直宣對，別令中使引至碑下，傳旨記文詞采贍蔚，召卿觀覽。既見，上又有博美之稱。歸至玉堂，御書白居易七德舞賜之，墨猶濕也。後進呈皇朝文鑑序，上曰：卿之文在廷莫及，眞匠手也。除禮部尙書兼翰林學士。嘗論本朝專以仁立國，兵非不用，而以禁暴安人爲本。上曰：兵勢似弱。公曰：仁故似弱，實非弱也。社稷靈長，職此之由。上曰：所以竝無禍亂。公曰：本朝似周，彼秦兵雖彊，興衰竟如何。六年，詔禮官詳議明堂典禮。公奏：祀帝祀天，以祖宗配，此前朝已行之制。世俗止誦孝經之語，未嘗深攷其義，致以今日爲疑。由

是定園丘合宮互舉之議。公再執綏草赦，引周漢故事有曰：「俶經路寢，有皇祐之彝儀，偏秩羣神，有紹興之近制。」蓋明著古禮，以示來世也。禮成獻詩，又進動天之誠。上曰：「動天誠當以德，惟知道乃可語此。」公曰：「皇天親有德，饗有道，此豈聰明作爲所能爲哉？」除吏部尚書兼翰林學士承旨。論六部長貳判依字，遂改爲從。嘗奏：「祖宗涵養善類，名卿才大夫相望。自章蔡沮士氣以壞風俗，獎讒諂以植黨與，卒致播遷之禍。中興一洗前弊，得人爲多。秦檜以患失之心，濟忌刻之資，引庸人以充侍從，對畢輒納副封。旣出其門，無所不有。人才衰落，貽患至今。論思之職，上規人主，次及大臣，下及四方，安可納副封耶？」願博求文武之英，布列中外。上曰：「如曾開輩，今豈易得？」又及舜之無爲，非皆無所爲也，特不爲期會之屑屑耳。又言：「自古上自人君，下至士庶，鮮有不爲左右前後之人所牽制者。」上謂公視草勞甚，公奏：「臣素無汗馬之勞，致此爵

位，正使宣力文字之間，未爲勞也。」上曰：「翰墨之功，豈小補哉？」若大述作，固當煩卿。七年五月，除參知政事。上曰：「近見卿遇事殊不依違，執政之于宰相事，任非遠，自當和而不同。」公曰：「韓琦、歐陽修殿上日有所爭，退則懽然無間，最爲可法。」後又嘗曰：「前此宰相議事，執政更無語，今乃肯各述所見。」公奏：「大臣自應互相可否，秦檜用事，執政至不敢措一辭，後遂以爲當然。」臣嘗以紹興初聖語示同列，勉其協濟。況陛下虛心無我，惟恐臣下不言，人臣乃欲自是乎？惟小事不敢有隱，則大事何緣蔽欺。八月，以久旱，御筆付三省求直言。初，回奏慮所在，因是皆有賑濟之請。公言：「上明日達聰，而吾儕不能將順，獨不愧于心乎？」萬一上自行之，或以此奏示外，豈不獲罪公議？相亟從之。又奏：「聖明在上，星變旱災殆繇臣等所致。」上曰：「若封事及大臣，朕須留中。」公曰：「付出何害？未聞有過而人不知也。」昌化有箭穀得米，相以上再三。及此議宣示外廷，



公曰、天若爲瑞、必無水旱。乾道間有以九華山竹米爲瑞而得罪者。且宣和有此、豈是休徵。遂已。有乞改常平不以赦原之法、公奏、紹興中因孔括申請、遂與謀叛等同科。乞令削去、祇從海行法。遇兩赦或非次赦聽原。公嘗極陳民困之由、上問其故、公曰、且以平江府論之、二十年前歸正添差等官歲用五萬緡、今乃數倍、支移折變之數日有所增、齊民安得不困。此特其一爾。上爲之悵然。進呈湖北月椿錢數、公曰、固出于不得已、亦須平時有以存卹。去歲旱荒、若非陛下先事賑救、禁戢苛暴、何以免流殍之苦。舒州汪革始謀不善、若如前代失軍民之心、則乘災唱亂、必致蠭起、彼亦安肯束身自歸于司敗。所貴得民、正爲是耳。此非倉猝所能成、其來有漸矣。上大以爲然。上嘗謂樞密非古官、公奏、在唐止司傳導、五代始置崇政院、分宰相之權。神宗亦有意廢併、聖諭可謂盡善。但二百年官制難以驟改、不若且令二府互領、更加熟

慮。有恃長樂之援求爲郎者、上俾諭給舍。公奏、臺諫給舍與三省相維持、豈可諭意。不從則失體、從之則壞法。命下之日、臣等自當執奏。上曰、卿等肯如此任怨。公曰、當與而不與、則有怨、不當與而不與、何怨之云。上歎曰、此所謂任責非任怨也。上嘗言唐鑑一書興衰治亂之理甚明、公奏、祖禹著書、皆可備乙夜之覽、篇篇即是諫疏。九月、除知樞密院事。上曰、卿才堪其任、三省本未可輟。卿每見難處之事、卿以數語決之、可謂敏矣。上謂公如統制官之類、可時與之接、以觀其才。公因奏、雷世賢說淮南地形緩急、欲守滁。臣謂不然。廬和則當其衝、滁沮山林、可自守而不可以禦敵。楚州舊屯軍八千、雷世方乞止差鎮江軍五千人。公奏、山陽控扼清河口、韓世忠實屯重兵。今無故減戍、他時或增、必致敵疑。揚州武鋒軍有衆八千、本屯山陽、若歲撥三千同戍、誠爲兩便。十年、奏、白氣自西南亘天、宜爲兵備。上曰、日腳之氣、冬常有之。公言、

此日官相寬之詞、然有備乃能無患。上嘗歎養兵費邦賦之八、公奏自古未有五十年屯兵不解。古者講和則罷兵、今既有歲幣而兵不敢徹、所以倍費。文州蕃部劫殺二漢人、吳挺止申照會。公請督其根治、使知朝廷事必留意、不敢忽略。日有萬幾、不察于微、弊不勝救。上曰、自昔多因不防其微、馴致禍敗。溫州軍士喧悖憲司、欲先定汪義端刻削之罪、仍正紀律。公奏、此風不可長、恐兵愈驕。郭杲請移江陵萬二千人、與其孥永屯襄陽。公言、止當以兵之半分成。杲謂襄陽爲要地、而江陵亦在江北、爲吳楚喉衿、爭辯甚力、乃許萬人、且令騎兵盡行。上眷公益深、嘗奏事退、特命中使賜御筆、卿臨事明敏而有決、朕每嘉之。宣諭金主避暑壽安、所徙器用倍多、且分諸子出鎮。或謂欲至東都、秋間議過上京。公奏當豫爲之備甚詳。上稱公通練軍政、深副朕擢用之意。公謝曰、臣本以文墨受知、豈能曉暢武事。誤蒙任使、不敢不勉。彼方恫

疑虛喝、正恐我或先動。所當精擇邊將、鎮之以靜。上曰、朕嘗戒臣下以公心、人自無說。公曰、所以私者、欲收人情、其來無窮。得者寡、不得者衆。若不裁以公道、恐譽者不若毀者之多。以陛下聖明、臣等智慮所不及、則有之、何敢有所欺也。十一年、奏廣中鹽法既更、州縣空乏、事勢可憂。詹儀之、胡庭直皆賢而才短、故銳于革弊而不能計其後。已而果然。公言、趙汝愚在福州百廢具舉、孜孜國事、殆不多得。王希呂緩急可當一面、彼小廉曲謹、雖無瑕可指、卻恐誤事。上曰、如趙雄、汝愚、希呂皆帥才也。義勝軍皆契丹、渤海漢兒慕義來歸、屯于興元。御筆以金、商山險、欲移襄陽用騎之地。聞其營皆遭火、因以遷之。公奏、路經金、洋、當先計人馬之數、使郭杲于襄陽豫辦、方可議遷。更令彭杲具以此意深察衆情。御批、卿謀慮深遠、良用嘉賞。六月、拜樞密使。上曰、卿在西府光前絕後、若有邊事、宣撫使惟卿可、他人不能也。呈諸軍陞差籍、公奏、



已及一季、欲間召一二。雖不專用此取人、亦因以察其能否、使主將不敢容私。上令赴樞密院審察。後池州李思孝自言正將二人不能開弓、乞與罷軍。上曰、此皆樞使措置之效。北牒以上京道遠、權止賀正生辰使一年。宣諭、卿等料未必遣使、今果不來、可謂廟謨矣。王希呂乞增兵戍廬州、上以萬弩手民兵已多、止可分數千人。公奏、須與萬人。蓋當以正軍爲主、則帥司可立。帥司既立、則沿淮歸正山水寨民兵皆爲我用矣。十二年、留正申西兵已免起二年、今年取旨。上以三衙不可闕、欲令發來。公奏、襄陽兵少、閻世雄欲得此人、敵不得志于四川、又嘗送死淮南、深恐睨荆襄。遂與一年。金州謀帥、公欲令侍從管軍薦舉。上曰、大帥當自上除授。公曰、舜用九官、皆咨四岳、與其私薦、不若明揚。若能攷實、孰敢妄舉。因論邊報異同、上獎諭云、事無大小、卿皆究心。公又曰、天下安有不可措置之事。上曰、昨密問一事、卿便條上數端、深

謀遠慮、朕所不及也。上謂王藺論事頗偏、公奏、藺雖稍過、然汲黯在朝、淮南寢謀。盡言而不顧身者、陛下左右豈可無此等人。況以獻納爲職、若上下相蒙、非國家之福也。先是、御筆大石契丹欲加兵于金、果有之、在我豈得漠然。固不可違誓、或有釁端、何以爲詞。公奏、彼一方小警、何至移文宿泗。若果有釁、何患無詞。急在間探精審耳。至是、又諭結約夏國事。公奏、頃嘗因任令公帛書通信、金以示范成大、夏國難保如此。似未可也。後又報忽魯大王據上京、上問公、公奏、茲事體大、當隨機應之。未幾、上諭公、所傳皆妄。樞使真有先見之明矣。廣東帥潘時以擅斬逃兵自劾、上批無罪。公奏、帥無便宜之文、不經錄問、詳覆而斬四人、雖銳于除惡、然人命至重、不可輕許。洪邁守婺、誅首亂六人、止是放罪、後不妨旌賞。十四年二月乙亥、宣諭、卿在樞筦、凡事無不經心、更旬日拜相、後人難繼。丁亥、拜右丞相、尋兼提舉國史院會要所、敕令所。

上諭以擢用人才及委任之意。公奏東府事繁。非西樞比。自古鮮有無事時。今賴陛下勤政。內外晏然。殆將二紀。此正可懼之時。當思經遠之計。又奏舜禹君臣相戒。唐太宗不存形迹。臣等過失。望陛下隨事戒勅。免積罪戾。臣有所見。不敢廢弼直之義。日有論奏。動係天下休戚。比至給舍繳駁。臺諫論列。已爲後時。不若致審于初。又奏人才不失之虛夸。則失之緘默。凡冗宜求篤實爲國者。大旱求退甚力。上曰。方賴卿等協贊。若捨朕而去。誰與共此。又請依慶曆中例。降秩一等。亦不許。徧禱羣望。下詔求言。遂奏實惠及民。莫若寬減夏稅。施德當自近始。會稽和買詭避至多。請權免一年。徐議釐正。秀州乞權減大軍總制錢二萬餘緡。吏擬勘當。公曰。此豈勘當時耶。奏蠲之。上方篤意救荒。其所以贊寬仁之政。不可勝紀。封事多言大臣同異。公奏豈可尙同。要當各盡所見。臣每謂同心體國。苟有未然。雖面相詰責。何害。止欲歸于是耳。

若人才邪正。政事得失。安危治忽所繫。自當反覆論難。陛下復祖宗密白之制。使三省官覆奏而後行。正欲斟量可否。上下相維。非止奉行文書也。高宗上仙。始末稽攷制度。奏置山陵五使。贊成聖孝。哀禮兩備。初欲用顯仁例。遣三使。公固謂事體不同。不當曲徇。會賀生辰使至。上在喪次。議令館伴使發遣。公奏賀禮固不可行。但彼遠來。朝無一辭。于理未安。遂口占數語。使歸報。後正旦使將至。或請權易淡黃袍御殿受書。然後素幄見使者。公力陳不可。止以縞素引見。使者果心服。手詔討論皇太子參決庶務典禮。初欲開資善堂。公奏天禧時仁廟尙幼。始見輔臣。恐不可用。西晉有宣猷堂。今作議事堂可也。十五年正月戊戌。公請上特御延和殿。令宰執奏事畢。然後過議事堂。思陵發引。公奏陛下旣行三年之喪。又用七月之制。永熙典故。呂端一相。猶攝太傅親往。而有司欲用顯仁舊例。非是。遂再拜請行。乃以公攝太傅。上慮使



人堅欲上壽。公奏引見受書。即是成禮。上壽時。不過隨班拜舞。若奉觴致詞。皆無所預。臣等保無爭執。上欲先令侍從臺諫集議。公曰。國家大事。謀之帷幄中。有不必詢衆者。況事理曉然。不必徒爲紛紛。上尤稱獎。卿能任責如此。國之幸也。仲冬之初。留身。奏臣歸自陵下。即欲求外。緣京鏜使回。聖慮來賀者。求報復。令臣少待。人使已行。願乞骸骨。上獎勞再三。忽宣諭。比年病倦。欲傳位太子。卿須且留。公奏聖體康寧。止因孝思稍過。豈應遽爾勸勤。上曰。禮莫大于事宗廟。而孟饗多以病而分詣。孝莫大于執喪。而不得日至。德壽欲不退休。得乎。朕方以此委卿。公泣而退。十二月壬申。密賜紹熙傳位親札。辛卯。留身。議定二月壬戌之吉。又命公留身呈詔草。兼提舉玉牒及監修日曆。二月辛酉朔。降傳位詔。翌日。上吉服御紫宸殿。

公奏陛下巽位與子。古今盛典。再見聖朝。中外同慶。臣等輔政無狀。自此無由日侍天顏。無任依戀之至。哽噎幾不能言。上亦泫然曰。正賴卿等協贊新君。光宗問當世急務。公奏用人求言二事。尋即降詔。公積階至特進。爵自管城縣開國男。至滎陽郡公。歷封濟許二國。三月。拜少保。益國公。公以三孤之官。不應以需恩而得力辭不可。又乞回授至于四五。不得已而後受焉。奏以朔望之次日朝重華宮。五月。求去甚力。既而諫省有言。請益切。除觀文殿大學士。判潭州。言者不已。副端助之。遂以少保充醴泉觀使而歸。孝宗賜金器勞問。紹熙改元。判隆興府。辭不赴。二年。除觀文殿學士。判潭州。親理郡政。不以簡貴自居。罷倍稅牙契錢二十萬緡。三年四月。復元職。七月。坐所舉官以賄敗。降滎陽郡公。四年八月。復舊封。冬。易鎮隆興。五年。力求奉祠。主上踐阼。詔求言于舊弼。公奏四事。曰聖孝。曰敬天。曰崇儉。曰久任。皆訐謨也。遣閣門官

賜少傅告一再辭免始許貶恩。慶元元年公于是年七十矣三上表引年遂以少傅致仕。嘉泰元年布衣上書及公姓名臺評降一官。明年乃復。四年十月庚寅朔薨年七十有九。累食邑一萬五千六百戶。食實封五千八百戶。遺奏聞上爲震悼輟朝兩日。贈太師。賻銀絹各千。仍命弟之子縝添差江南西路轉運司主管帳司以護襄奉。尋賜諡文忠。娶王氏監察御史葆之女封益國夫人。先一年薨。一子即綸也。朝請大夫行大理司直孫顯宣義郎新監饒州浮梁縣景德鎮兼烟火公事孫女五人長適承事郎監嘉興府羅納倉蕭彖餘尙幼。初益國夫人葬廬陵縣斗岡之原。十二月丙申奉公之喪合焉。公在高宗朝已擢臺察事孝宗最久始皆以詞章受知可以平挹美官而秉心不欺遇事輒發不復顧身屢貽復奮上久而深察其精忠北門之官有四公偏爲之前後十年兩宮極孝治之盛講慶壽加尊號親祠赦宥立后陞儲過宮

出郊無非盛事大典公皆在屬車間鋪張揚厲實有以佐宋之光明。若水旱災異夷狄寇盜之辭咸無焉。自參預樞筦以歷二揆又涉十年楊前論事出入經史練習典章動有援據不爲空言故天子聳聽嘉獎而同列自以爲不及以國事爲己任進退人才一本公道養民擇守憂邊訓兵仰贊睿謨慮周而敏被遇日隆數當大事典禮論議裁處曲當內禪尤爲至重吉日徽稱宮名母后孝宗獨與公素定于數旬之前近將浹旬始諭宰執注意委任可謂不膠漆而固矣。天資超穎非凡材可及而體夫子忠恕之道大易勞謙之義孝友淳篤事從兄如諸父自奉甚約絕聲色之娛周卹族姻具有恩意官同姓者六異姓者五少自號省齋居士中年曰青原野夫既貴而閒曰平園老叟孝宗生于丁未一時輔相多在丙午丁未間公及丞相王公淮參政錢公良臣同爲參樞人謂三府爲丙午坊公嘗作詩用文潞公同生丙午之韻告老

之後猶引故等夷之齊年者遇生朝同會用韻賦詩者數年方其端委廟堂一介之善收拾如恐不及退而均逸汲引無虛日士類莫不歸心焉以文苑英華及六一居士集訛舛太甚率同志者朱黃手校如老書生鏤板家塾以惠學者卜築貢院故基公實預薦此地故以充賦名堂作唐虞二典閣藏兩朝內禪詔書洎崇陵宸翰又爲玉和蜀錦二堂皆自爲之記晚歲康強神明不衰天下猶望公之再起不謂天之不憖遺也嗚呼殄瘁之痛四海所同有如鑰之不肖素辱知遇假守東嘉屢有收用之意未滿秩而公已歸比忝代言公之除少傅暨加恩兩預草制又四作不允詔書嘗蒙摘句稱賞投閒以來書函詩筒倍加獎予當世銘記多求于公間使鑰書之公已書丹或徑以賤姓名題蓋此意甚厚皆非所敢當也嘗竊謂公初入禁林自謂所慕者惟陸宣公歐陽文忠公公之始卒絕似二公者無事不言無言不盡而卒至大用

上不負天子下不負所學既不媿于宣公而得時遇主無追仇盡言之患文忠晚居于穎望瀧岡而不得歸公乃優游平園使里人矜式是兼二公之美而又無遺恨者也若克勤小物誘掖後進皆公之細不勝書有省齋文藁別藁平園續藁掖垣叢藁玉堂類藁詞科舊藁政府應制藁歷官表奏奏議奉詔錄承明集玉堂雜記龍飛錄親征錄及閒居紀錄等書總二百卷藏于家其行于世者已多屬文之士傳誦以爲模楷公之文不待贊揚微至題跋之語考古證今歲月先後通徹明白讀者歎服未爲三忠堂記謂歐陽文忠楊忠襄胡忠簡皆郡人也精確簡嚴幾于絕筆嗚呼一代風流于焉盡矣鑰何足以銘公銘曰世非乏才何謂才難有君無臣自古所歎吝驕平凡動則爲己不合是憂安得奇偉直道而行無患失心一有遇合奚翅斷金於皇孝宗才選于衆誕謾畏縮慨不足用堂堂益公負王佐才始以文名芸省蘭臺



高文大冊、追配古作。獨步禁林、不負所學。二十八年相爲始終。屢跽而奮、致身上公。堯既授舜、舜亦命禹。首贊大議、龍飛再覩。功成身退、樂哉平園。晚陳四事、不已于言。既挂衣冠、無與世道。胡不百年、遺此一老。星隕于堂、人之云亡。不亡者存、文章光芒。惟子是似、觀行取則。後其有興、視此銘刻。

樓鑰撰 《攻媿集》卷九四

宋故左丞相少傅贈太師益國周公墓誌

先公諱必大、字子充、初字洪道。周氏世爲鄭之滎陽人、因先大夫秦國公倅廬陵、遂家焉。曾祖衍□□□□贈太師秦國公。曾祖妣秦國夫人郭氏。祖誥、故任左朝散大夫、累贈太師、秦國公。祖妣秦國夫人潘氏。祖妣秦國夫人李氏。祖妣秦國夫人張氏。父利建、故任左宣敎郎、太學博士、累贈太師、秦國公。妣秦國夫人王氏。先公四歲而孤。又九年、而秦國王夫人即世。紹興二十一年、擢進士第、授徽州司戶參

軍、監行在太平惠民和□局。□二十七年、中博學宏詞科、差充建康府學敎授。除太學錄、召試館職。除秘書省正字、兼國史院編修官、守監察御史。孝宗登極、試起居郎、兼編類聖政所詳定官、兼權中書舍人。繳曾覲、龍大淵知閣門事、旨揮、乞祠、主管台州崇道觀。知南劍州、未赴。改除福建路提點刑獄。奏事、留爲秘書少監、兼權直學士院、兼國史院編修官、實錄院檢討官、兼權兵部侍郎、權尙書禮部侍郎、兼直學士院、升同修國史、實錄院同修撰、兼侍講、兼權中書舍人。不草張說、王之奇辭、免簽書樞密院、不允詔書。提舉江州太平興國宮。知建寧府、未赴。力辭。復提舉江州太平興國宮。充右文殿修撰、召赴行在、充敷文閣待制、侍講。試尙書兵部侍郎、兼直學士院、兼太子詹事、兼侍讀。試尙書吏部侍郎、遷翰林學士、知制誥、兼修國史。試禮部尙書、兼翰林學士、試吏部尙書、兼翰林學士承旨、除參知政事、同提舉敕令所、知樞密院事。



升樞密使、拜右丞相。提舉國史院、提舉編修國朝會要所、提舉敕令所。高宗靈駕發引、攝太傅持節前導、及奠謚冊、謚寶、監掩攢宮。拜左丞相、提舉編修玉牒、監修國史日曆。重華內禪、轉少保、輔政三月、祈解機務。光宗不許、辭愈力。除觀文殿大學士、判潭州。諫議大夫何澹、殿中侍御史范處義論奏、充醴泉觀使、判隆興府、辭不赴。再除觀文殿學士、判潭州。復觀文殿大學士、再判隆興府、辭免。充醴泉觀使。今上登極、轉少傅、遣閤門官賜告、力辭、許回授。慶元元年、三上納祿之章、轉少傅致仕。嘉泰元年、呂祖泰上書妄及姓名、監察御史施康年上疏覺察、降授少保。二年、復少傅。寄階由迪功郎二十一遷為特進、遂登三少。爵自滎陽縣男五加封為本郡公、又三改封為益國公。邑自三百戶積至一萬五千六百戶、食實封自百戶積至五千八百戶。先公以靖康元年中元日生于平江府治、以嘉泰四年十月旦薨于正寢、享年七十有九。

遺奏聞□□□兩日、詔贈太師、恩禮甚厚。先妣姓王氏、累封益國夫人、先一年薨。綸卜以是年十二月丙申、扶護□□□歸葬吉州廬陵儒林鄉斗岡之原、與先妣同穴而異棺、蓋治命也。子綸、朝請大夫、行大理司直、孫顯、宣義郎、□□□□□□□□□□監嘉興府羅納倉蕭椽、餘尚幼。綸泣血謹書、以納諸壙。甥婿朝請大夫田橡填諱。

周綸撰 江西省博物館藏拓片

校記

①壁：原作「璧」，據《宋史·李壁傳》改。

宋儒碑傳集卷一百三十

范成大 徐夢莘 周鼎臣 孫調

資政殿大學士贈銀青光祿大夫范公成大

神道碑

吳郡范氏自文正公起孤童事仁宗皇帝當慶曆癸未入參大政後百三十有六年公復參孝宗皇帝政事雖譜牒不通俱望高平派南陽之順陽蓋鴟夷子苗裔也今爲郡之吳縣人公諱成大字至能曾祖澤贈太子少保妣昌元郡夫人夏氏祖師尹贈太子少傅妣咸安郡夫人陸氏咸寧郡夫人蔣氏考雱終左奉議郎秘書郎贈少師母秦國夫人蔡氏莆陽忠惠公之孫而潞忠烈公外孫也公在懷抱已識屏間字少師力教之年十二徧讀經史十四能文詞是歲秦國薨明年少師薨公煢然哀慕十年不出竭力嫁二妹無科舉意欲買山無貲取唐人只在此山中之語自號此山居士又慕元魯山爲人一字幼元友生御

史王公彥光勉之曰子之先君期爾祿仕志可違乎因課以舉業遂中紹興二十四年進士第調徽州司戶參軍歷三守李植潘莘洪文惠公李御下嚴獨霽威待公會遷提點坑冶辟公幹辦公事不就潘格郊赦不弛諸軍糧欠衆言紛紛將校告急於公公徑爲免符白守行之乃定洪公博洽精明每以訟牒付公必問一牒幾人姓名云何公由此究心熟吏事洪公喜曰與公商榷古今常曰吾視君齒必致兩府地其自愛用舉主陞從仕郎三十二年入監行在太平惠民和劑局堂吏勾藥不獲以朝旨下所隸大府蒐細故杖吏逞憾公白戶部侍郎汪公應辰杖大府吏已能大其官矣壽皇受禪命宰臣編類高宗聖政隆興元年四月以公爲檢討官又兼敕令所近世局務無修書者人以公爲宜詔百官條時弊公舉十事極論文具非所以爲國執政奇其才二年四月除樞密院編修官居數月自以銓格改左宣教郎時館職



儒藏

定員、有詔公與王衛候闕召試。十二月、鄭升之不試先除、牽聯併除公秘書省正字。公不可、必試策而後就。乾道元年三月升校書郎、六月兼國史院編修官、十一月遷著作佐郎、二年二月除尙書吏部員外郎。言者以不先攝爲超遷、宰相曰、著廷間擢左右史、顧不可爲郎耶。九月言者罷、乃主管台州崇道觀。三年十二月起知處州、陛對論力之所及有三、一曰日力、寸陰是也。二曰國力、資用是也。三曰人力、思慮知術所及者是也。三者有限、今盡以虛文耗之。公前應詔上封事及試策、反復論此、至是方見上、力以爲言。上曰、卿能激昂如此、朕當行之。四年八月至郡、松陽^③民爭役、公曉之曰、吾聞東陽縣有率錢助役者、前婺守吳侯義之爲易鄉名、揭碑褒勸、爾與之鄰、獨無愧乎。民旣感謝、則推廣其制、諭鄉人視貧富輸金買田、擇信義之家掌其事、儲歲入助當役者、命曰義役、許自第名次、有司勿預。數月間、人皆樂從、一縣二十五

都悉以辦告、甲乙相推、遠至二十年、諸邑爭效之。處多山田、梁天監中詹、南二司馬作通濟堰於松陽、遂昌之間、激溪水四十里外、溉田二十萬畝。溪遠田高、堰壞已五十年。公尋故迹、議伐大木橫壅溪流、度水與田平、即循溪壘石岸、引水行其中、置四十九閘以節啓閉、上源用足、乃及其中、次及其下而堰可復。議定、官爲僱工運石、命其傍食利戶各發丁壯、分畫界至。以五年正月同日興工、四月而成、水大至如初議。適公被召、躬往勞之。父老懽呼曰、堰成、公忍去我耶。公曰、吾能經始、安能保其無壞。爲立詹南廟、作堰規刻石廟中、盡給左右山林爲修堰備。至今蒙其利。公入對、因及義役。上大嘉、頒其法諸路。公曰、此可助法、非以爲法。顧守令行之何如耳。初、上命宰相陳正獻公擇文士掌內制、正獻薦知遂寧府張震^④。及公至、是上曰、卿文學詞翰、宜直禁林。公懲前遷郎致謗、懇辭、退復告執政。會上日疾、不御朝久之。內殿奏事、上



首及公除目、正獻道公意。上曰：不專在內制，正要士人宿直備顧問。乃除禮部員外郎兼崇政殿說書，上令更加清職，遂兼國史院編修官。會從兄成象爲工部郎官，公援故事乞班其下，從之。內直數宣對，嘗諭公：朕治心養性，以求知道。公曰：知道莫如堯舜禹湯文武周孔，其靜而聖，存心養性是也。動而王，治天下國家是也。漢唐之君功業固有之，道統則無傳焉。上嘉獎數四。十二月，擢起居舍人兼侍講，直前謝。上曰：卿宏深博約，因有此除。又兼實錄院檢討官。公奏：獄案淹延，當貸者多，瘐死乞嚴程限。於是自三省至大理皆定經由之。公先嘗論二浙丁錢至是詔遞減之。乾道令以絹計賦，估價頗輕，論罪過重。公奏：承平時絹匹不及千錢，而估價過倍。紹興三年遞增五分，爲錢三千足。今絹益貴，當倍時值。上驚曰：是陷民深文也。遂增爲四千，而刑輕矣。後又奏：勤政而不省其成否，治具雖多，何益？古者君臣相戒，既曰率作興事，

又曰屢省乃成，二典之治如斯而已。上喜曰：卿言切治道。已退，復招公曰：爲朕尋繹經傳與此論協者條上。公即摘取書、易、左傳、國語、孟荀等書上之。初，大臣與上謀移侍衛馬軍屯金陵，示將進取，先遣使請祖宗陵寢河南故地。又隆興再講和，名體雖正，失定受書之禮，上常悔之。六年五月，遷公起居郎，假資政殿大學士、左太中大夫、醴泉觀使，兼侍講。丹陽郡開國公充金國祈請國信使，爲二事也。上語公曰：朕以卿氣宇不羣，親加選擇，聞外議洵洵，官屬皆憚行，有諸？公曰：無故遣泛使，近於求釁，不戮則執，臣已立後，仍區處家事，爲不還計，心甚安之。上曰：朕不敗盟發兵，何至害卿？嚙雪餐氈，理或有之，不欲明言，恐負卿耳。國書專求陵寢，而命公自及受書事。公乞并載書中，朝廷不從。公遂行。虜遣吏部郎中田彥皋侍御史完顏德溫迓客。彥皋文儒，深敬慕公，至求巾幘效之。抵燕山，公知虜法嚴，附請不可達，密草奏，具言他日北

使至、欲令親王受書、其詞云云、懷之入覲。初跪進國書、陳誼慷慨、虜君臣方傾聽、公隨奏曰、兩朝既爲叔姪、而受書之禮未稱、昨嘗附完顏仲、李若川等口陳、久未得報、臣有奏劄在此、摺笏出而執之。金主大駭、厲聲謂其宣徽副使韓綱曰、有請當語館伴、此豈獻書啓處耶。自來使者未嘗敢爾。連呼綽起、綱惶恐、以笏來綽公。公不爲動、再奏云、奏不達、歸必死、寧死於此。金主欲起、左右掖之坐、又厲聲云、教拜了去。綱復以笏抑公拜、公跪如故。金主曰、何不拜。公曰、此奏得達、當下殿百拜以謝。金主乃令納館伴處、公即袖下殿、望殿上臣僚往來紛然。後聞太子欲殺公、其兄越王不可而止。頃之、引見如常儀。既歸、館伴果宣旨取奏去。是日、綱押宴、謂公早來殿上甚忠勤、皇帝嘉歎、云可以激勵兩國臣子。後數日朝辭、金主令其臣傳諭云、盟好已固、汝國乃以帛書密與夏國任德敬結約、此何理也。公答以界外奸細僞爲之。俄館伴持蜀

中蠟書來、指印文示公。公曰、御寶可僞、况印乎。德敬者、夏王外祖、號任令公、再世用事、欲篡其國、事敗族誅、而四川^⑥宣撫司嘗與通問、爲夏人所獲、致之虜廷云。十月公還、金主答書有曰、抑聞附請之辭、欲變受書之禮、出於率易、要以必從。上於是知公竭節盡忠、獎勞之餘、有終始保全語、除中書舍人、同修國史、及實錄院同修撰、賜紫章服。副使以下皆遷兩官、惟公不預。蓋大臣不樂公嘗言其輕信西夏也。上勵精政事、患風俗委靡、書崔寔政論賜輔臣。公講禮記天子不合圍、諸侯不掩羣、上曰、此成湯祝網意也。公遂奏、德莫大於好生、陛下得之矣。乃者御書政論、意在飭紀綱、振積弊、而近日大理議刑遞加一等、此非以嚴致平、乃酷也。上大喜曰、卿知言、聞臨安已觀望行事矣。講退、侍講張君栻謂公深得納約自牖之義、右史莫君濟曰、當書之記注。後數日、公進故事、復申其說。自公使北、狂生上書迎合恢復事、補官十餘人。公



奏倖門不可開、繼此臣必繳奏。上曰、誠然。書已滿屋、朕皆弗省。公每事正救、大率類此。七年、以知閤門事兼樞密都承旨、張說簽書院事、公當制、知空言不可回、明日袖詞頭納上前、且曰、閤門官日日引班、一旦驟寘二府、正如州郡以典謁吏爲倖貳、觀聽謂何。明日說罷、後月餘、公求去。上曰、卿言引班事甚當、朕方聽言納諫、乃欲去耶。公自是數有繳奏。會召宋貺、公又論之、章不下、尋除集英殿修撰、知靜江府、廣西經略安撫使。明年春、說竟拜簽樞。九年、公始赴鎮。廣西荒遠窘匱、承平時仰湖南^⑧北及封椿錢七十餘萬緡裨歲計、此外惟恃鹽貨、其法屢變、大要官般爲便。建炎後、中原士族富家避地輻輳、嘗一行客販、其後客皆北歸、鄰道歲給亦停、稍許折苗^⑨招糴、旋以病民而罷。諸郡專藉運鹽之利、漕司取十六、以其四充郡計、已復盡取之、於是屬州有增價抑配之弊。詔復行鈔鹽、漕司拘鈔錢均給所部、而錢不時至、守令

束手無措、極邊如邕州至經年無吏俸、禁軍逃亡不補。公入境曰、利害有大於此乎。日夜討論、連奏疏數千言、大略謂法久或弊、救之在人。誠能裁漕司強取之數以寬郡縣、則科抑可禁、不在改法。上亟從之。後二年、廣州一鹽商上書、乞復客販。吏部侍郎詹君儀之以爲然、宰相入其說、請下詔示必行、大出朝廷錢銀助之。人多以爲非、屢下有司議、皆謂公前疏不可易、久之卒如其舊。交趾間進馴象、紹興二十六年有大僚爲帥、自詣驛禮其使。至是遣尹子思來、公曰、吾經略諸蠻、陪臣安得亢禮。受其庭參而犒之、遂爲定制。舊法馬以四尺三寸爲限、詔加至四寸以上。公謂互市四十年、不宜驟改、論奏再三、仍條馬政革弊事皆報可。有沿邊巡檢常恭者、誘南丹酋莫延甚開路市馬、直達帥司、自以爲功。張說猶在樞庭、引恭見上、詔委李宗彥措置馬事。公奏、南丹越宜州已非法、今併舍帥司、邊防壞矣。疏恭罪惡、密遣人擒歸。會說去

位流恭江州。公以溪洞獠人出沒不時，請選官團結省民，毋得外交，寇至勿俟官兵徑禦之。次及熟獠在省地者，亦爲保伍，明開博易之路，毋得私易。又遣人深入蠻境，諭以約束，自是無敢犯法。興安縣界盜傷人，公密設方略掩捕。適中秋，同諸司泛舟賞月，命取大卮酌酒置案間。提刑鄭丙問故，公笑曰：「欲飲至爾。」俄岸上謹譟，乃將官沙世堅執賊首來，即以卮酒飲之。諸司駭服。瘴鄉多旅樞，公擇城北坑冶故墟爲冢，瘞之，揭名氏於傍。微者別爲二大塚。凡仕族落南，使自言給歸資，至今以爲法。淳熙元年十月，除敷文閣待制、四川制置使，知成都府，稍鑿夔峽山路以避湍險，人以爲便。會復置宣撫使，以命樞臣，改公成都路制置使。未幾，廢宣撫司，公復專四路之寄。初及境，言吐蕃南詔昔爲唐患，今幸瓜分，西南無警二百年。近者雅州碉門蠻入寇，敗官軍。乾道九年，吐蕃青羌兩犯黎州，而奴兒結蕃列等尤桀黠，輕視中國。臣當內

教將兵，外修堡寨，仍講明寨丁、教閱團結之法，使人自爲戰，三者非財不可。上手札獎勵，賜度牒錢四十萬緡。公日夜閱士，製器甲，督邊郡，次第行之。時摘兵赴帥司，按其精粗，以黎爲要地，奏置路分都監，增五寨，籍少壯五千爲戰兵。經理歲餘，凡吐蕃擾邊徑路十有八，悉築堡置戍。奴兒結借諸部兵二千扣安靜寨，公發飛山軍千人赴之，料其三日必遁，戒勿與爭，已而果然。有白水寨將王文才私娶蠻女，常導之寇邊，公重賞檄羣蠻使相疑貳。俄蕃牙擒文才以獻，公命即黎州教場斬之，兵威大振。於是專意恤民矣。初，蜀之財用止以贍蜀，自屯大兵，始竭民力，公私俱困。公略計成都在城建炎三年酒稅歲纔四萬緡，有奇，後增十倍，縣鎮酒稅場店民戶買撲課利總十五萬有奇，後累至四十萬，他郡可知。即具以聞，詔歲減四十八萬緡。公隨額重輕，躬爲裁定，蜀人呼舞，即寺觀爲感恩祝聖道場。公復言和羅之害，凡西兵十萬，歲

用米一百四十七萬斛兌買省計及營田之外闕五十二萬斛括興元、階、成、西和、鳳、文、龍等州民戶家業而均科之。每石予錢引四道有半。其二分折茶實給三引。耗費斛面不與焉。詔與總領李繫議。繫密計本所饋遺乾沒歲約百萬。隱而不言。獨奏乞朝廷降本招糴。執政怒。詔公劾繫違制不同議。公遣人語繫。繫感懼。始出羨數。是歲遂以此錢所在招糴。其後上疑歲歉或防闕。公謂脫不得已。權科一年。歲豐如故。不猶愈於常擾民乎。上曰。善。令每歲降旨揮。而科糴遂止。文州蕃部間擾邊。公奏乞預爲文告。崛強者討擊之。善良者撫摩之。使知畏慕。不可專示弱啓侮。上以公深知事體。即日施行。蜀用陝西舊法。料簡強壯民丁三萬寓之於農。號曰義士。以待緩急。歲久。監司郡守多雜役之。都統司又令守關隘烽燧。且乞與大軍更戍。公力言其不可。詔遵舊法。諸路提刑。歲候朝命疏決。詔到率以秋。公請五月舉行。解試取士以四

月五日。鎖院後十日引試。公請避盛暑遞先一月。皆著爲令。高宗慶壽。赦舉引年致仕而才力不衰者。公奏名。士樊漢廣年五十九。孫松壽六十六。先已納錄。尤宜旌異。詔令赴闕。二人俱不至。進職賜服。蜀士歸心焉。凡人才可用者。公悉羅致幕下。用其所長。不以小節拘之。其傑然者則露章以薦。往往光顯於朝。或至二府。三年春。公大病求歸。上令先進敷文閣直學士。明日乃下詔命。公列上兵民十五事。上曰。范某已病。尙爲國遠慮。可趣其來。公疾愈而行。送客數百里。不忍別。後公謝病吳門。往來者伺候謁舍。或經月。必一見乃去。其得士心如此。十一月入對。除權禮部尙書。賜上方珍劑。五年正月。知貢舉。開院。侍御史奉詔啓封。吏承例牒拆號官。而不云何官。御史疑薄己。有後言。公尋兼直學士院。四月。以中大夫參知政事。又權監修國史、日曆。纔兩月。前御史亟論公。公即出門。明日宣押奏事。引咎而已。上曰。朕不忘卿。數月訊至



卿家矣。除資政殿學士、知婺州。公請以本官奉祠，詔如所乞。提舉臨安府洞霄宮。九月，果有使來傳詔撫問，密賜累珠、金鼎、金合、寶香其中。六年^①二月，魏王薨於明州，起公代之，兼沿海制置使。公未復職，遇闕，依前執政例，中使郊勞，賜銀合茶藥，仍許服毬文帶，特御後殿引見，賜茶。上曰：「蜀人思卿如慈親，故付卿以海道。」公奏：「張津、伯圭、魏王皆國懿親，時節奉海物於兩宮，臣外朝臣也，不敢效尤。」上命停貢而罷進奉局。又乞權閣魏王移用諸司錢數萬緡，寬民力。詔除之。七年^②二月，除端明殿學士。三月，改帥江東，兼行宮留守。奏事畢，陛辭，詔明日辭選德殿。近例，賜宰執酒止傳觴，至是牧設几，開宴酒三行，命侍行過西小軒，曰：「此朕清坐處也。」再坐，上曰：「勸卿一盃，且有以爲侑。」公飲訖，二內侍奉縑素來，上有石湖二大字，御墨尚溼。公拜賜，奉觴進酒謝。上滿飲，復袖御書蘇軾詩一軸以賜，自未至西乃罷。石湖在平江盤門西南十

里，蓋太湖之派，范蠡所從入五湖者。始吳夫差築姑蘇前後臺，相距半里，爲城三重，宴遊忘歸。其前有溪，今號越來溪，勾踐由此攻吳。瀕溪築城，與吳人夾水相持，遺址儼然。公隨高下爲亭觀，植花竹蓮芰，湖山勝絕，繪圖以傳。至是攜宸奎過家，刻之。四月，開府金陵。適歲旱，公招徠商賈，損閣^③夏稅，請於上，得軍儲二十萬石賑饑民。苗額二十萬斛，是年蠲三之二，而五邑受粟總四萬五千四百餘戶，無流徙者。盜發柴溝，去城二十里，又劫江賊徐五稱靜江大將軍，公皆設策捕獲。在鎮二年，以餘財代輸下戶秋苗及丁錢一年。九年^④，公以積勤浸苦頭眩，自夏徂秋五上章求閒。上不得已，進資政殿學士，再領洞霄。里居七年^⑤。十六年^⑥十一月起知福州，引疾固辭。詔令奏事，又辭。上先遣醫官張廣卿傳旨灼艾，既對，勞公曰：「卿南至桂廣，北使幽燕，西入巴蜀，東薄鄞海，可謂賢勞，宜其多疾。」袖丹砂以賜。時皇太子參決庶務，公得見

東宮、坐論治道移時、太子諭公、不敢暇逸、日惟讀書作字。公曰、石湖已拜宸翰、有壽櫟堂、願得寶書。太子欣然曰、是莊子櫟社事耶。公既出關、上復賜藥^①甚厚、至家、又遣使賜御書蘇軾詩二首、太子亦送壽櫟堂三大字。俄壽皇內禪、公行至婺州、以腹疾力請奉祠、從之。壽康皇帝初政、特詔求言。公疏乞述重華以廣孝治、執仁術以守家法、堅國本以定規模、節經費以蘇民力、精覘謀以應事機、審選任以求將材、修堡障以固西南、議鹽筴以安二廣、嚴錢禁以榷官會、廣屯田以實邊儲、皆當世要務。紹熙^②三年、加資政殿大學士、知太平州。公辭數四、優詔不允。下車踰月、幼女將有行而逝、公追悼切至、遂請納祿、復得洞霄而歸。先以石湖稍遠、不能日涉、即城居之南、別營一圃、閱杜光庭神仙傳記、胡六子自崑山風海至范老村、遇陶朱公事、大喜曰、此吾里、吾宗故事、不可失也。題曰范村。刻兩朝賜書於堂上、榜曰重奎。其北又葺古

桃花塢、往來其間。四年九月、公疾病、語門人曰、吾本不待年告老、今不濟矣、亟爲我剡奏。詔下、而公以是月五日薨。積官至通議大夫、爵自吳縣開國男、累封吳郡公、食邑三千二百戶、實封一百戶。享年六十有八。遺奏聞、贈銀青光祿大夫。自公會祖葬吳縣至德鄉上沙之赤山、少師嘗戒子姪、他日葬我母遠先塋、後葬稍南小丘。公嘗營壽藏百步間、以十二月十三日歸窆。妻和義郡夫人魏氏、前公幾月薨、至是祔焉。夫人承直郎信臣女、紹興參知政事敏肅公之猶子。敏肅知公深、一見以遠大期之。二子、華、承務郎。茲、承奉郎。女、長適從事郎、新監行在車輅院張蒙。次封孺人、即沒於當塗者。公天性孝友、事少師、工部如嚴師。愛二弟、教而撫之、待成績尤至、今爲朝請郎、通判建康府。成己前卒。郊恩官羣從弟姪五人。歷典名藩、所至禮賢下士、仁民愛物、凡可興利除害、不顧難易、必爲之。樂善不厭、於同僚舊交喜道其所長、不欲聞人



過去思遺愛、所在歌舞之。公天資俊明、輔以博學、文章瞻麗清逸、自成一派。尤工詩、大篇短章、傳播四方。初倣王筠一官一集、後自哀次爲石湖集一百三十六卷、別著吳郡志五十卷、使北有攬轡錄、入粵有驂鸞錄、桂海虞衡志、出蜀有吳船錄、各一卷。公蔡氏所自出、故書法兼眞行草之妙、人爭藏之。壽皇尤愛賞、相與極論古今翰墨、數被賜予。因虜使爲館伴、王侍郎柅詳言公奉使時事、益簡上心、以公羸疾、賜藥無虛歲。至口授導引修養秘訣、親厚非羣臣比。輔政旣日淺、每出鎮輒以病免、故雖大用而未盡、議者惜焉。某與公齊年、御史王公予外舅也、以是與公善。壬辰春、自春官去朝、過平江、遊城西諸山。公訪余靈巖、同宿石湖、望夜小舟共載湖心、風露浩然、嘗有六十掛冠之約。其後或同朝、或相遇於外、每以未踐言爲恨。今公云亡、二子以主管吏部架閣文字龔頤正行狀來請銘、其敢以老諄辭。銘曰、

應龍將翔、滂以雲霧。聖君勃興、賚以丞輔。伊昔重華、治謹厥與。洵美范公、心期致主。皇初好文、公筆燕許。皇念典學、公業馬楮。皇資專對、公節騫武。皇命征鎮、公猶方虎。他人偏長、公力交舉。經營四方、不遑啓處。衰職有闕、帝命公補。纔六浹旬、誰實公沮。豈無藩維、每以疾阻。時非不逢、施迄未普。刻銘幽墟、尙詔終古。

周必大撰 《平園續稿》卷二二

直秘閣徐公墓誌銘

慶元二年有旨、朝散大夫徐夢莘。除直秘閣、蓋異恩也。始、公生于靖康之初元、歲在丙午、是冬金人再犯闕、海內雲擾。建炎二年、寇躡江右、叛將大盜蜂起。公之生纔四年、母氏襁負、走陂頭劉氏家、僅免于難。公旣省事、自念生長兵間、欲得盡見事之始末、宦游四方、收羅野史及他文書多至二百餘家、爲編年之體、會粹成書、傳聞異辭者、又從而訂正之、號三朝北盟集編。自政和七年海上之盟、迄逆亮之斃、上下四



十五載間、具列事實、制敕、詔誥、國書、奏疏、記序、碑誌之文、有正史所不及載者、搜掇無遺、成二百五十卷。又有綱目一冊、併藏于家。至是史官方修高宗皇帝實錄、修撰楊公輔率同寮十人奏、乞取公所編之書、仍下臨江軍給筆札抄錄以進。十一月、史官又奏、其書有補于史筆爲多、仍薦公之賢、大略云、廉靜樂道、好學不衰、故有是命。又奏所編書目內有百餘家館所未備、復命錄其全書。諸公欲相挽一出、與同筆削、有諭公者、答曰、此書本不爲進身計。力辭之。後又得未見之書、再編集、補三帙。所居闢一堂、取詞命褒語、扁曰、儒榮、以侈上賜。樞密劉公德秀爲之記、待制楊公萬里爲之銘。少傅周公必大、端明洪公邁而下賦詩者數百篇、遠邇流傳、而公之名愈顯矣。公字商老、清江縣人。曾祖用和、祖士穩、俱不仕。父世亨、累贈通議大夫。母楊氏、贈碩人。公俊敏篤學、至忘飢渴寒暑。讀書過眼輒不忘、通貫經史百家、尤熟晉宋南北

五代時事。自熙豐、元祐以來名公奏議及出處大致、無不該綜。作文皆有根據、用事精確。紹興二十四年登進士科、授左迪功郎、洪州新建縣尉、以外艱不赴。調鬱林州司戶參軍、到官未幾、又以母憂而歸。後爲江陵府司戶、任滿、關陞左從政郎。乾道四年、外移南安軍教授。以舉主改宣教郎、知潭州湘陰縣。次授廣南西路轉運司主管文字、賜緋衣銀魚。諸司辟知賓州、到郡遭罷、主管建寧府武夷山沖佑觀、華州雲臺觀。紹熙元年、授荆湖北路安撫司參議官。慶元初、引親嫌徑歸、再奉沖佑祠、引年致仕。六年、賜紫衣金魚。仕宦幾五十年、閒居之日爲多。南安官舍素在城外、請遷入、以附校官。建雲漢閣、以奉御書、立濂谿、二程先生祠于左、劉元城、張橫浦先生祠于右、自爲之記。參政龔公茂良時帥江西、讀而善之、以講筵官薦。湘陰並湖、少田多盜、帥括盜耕湖田者悉輸租、號增耕稅、他邑或移別賦應命。公恐重困吾民、謂邑無新田、

稅無從出。帥盛怒，移湘潭丞，仍窘撫邑事。無可疵瑕者，卒免于行，更加禮焉。增葺學宮，嚴設祠像，祭器書籍，以次而舉。選士主之，湘陰于是始興于學矣。朝廷議更二廣鹽法，遣浙西安撫司幹官胡廷直銜命與二漕臣集議境上。西漕王公正己以公審知利害，邀至蒼梧會所。公謂二廣事體不同，使者徒見東路郡多瀕江，可通客販，固已非是。若西路多山，郡近江者少，道阻運艱，客販不通，價必騰踴，郡計不給，重爲民害。郡有兵吏可役，民不告勞。若止循官般舊法，初無抑配等弊，公私俱便，可以經久。衆不能奪，胡亦是之。議定而去。將入奏，爲主議者所訕，畏罪希進，盡變其說。擢爲東路提舉，旋升西漕。侍郎詹公儀之出鎮桂林，共行客販之策。慮公或以賓州奏事，必撼成說，武憲熊飛素不快于公，二人從而基之。熊上悔舉之章，公遂罷。不三年，二廣之害果如公言，民食貴鹽，富商至破產喪生。胡憂懼至死，詹亦得罪，復行舊制。至今

便之。周益公當軸，謂公前謾未直，公答以事久自明，不待辨也。歸而悼亡，連喪子女，宦情愈泊然矣。楊誠齋挽使造朝，薦進甚力。廟堂將處內郡，止求議幕。荆帥樞使王公蘭移鎮長沙，以公可任帥事，申省委公。經時而侍郎袁公樞始來，知公止，請上幕俸給，盡以三月帥俸歸之。又力辭，尤歎其廉。既而從母之子侍郎彭公龜年爲帥，公去替止半年，法不用避，公乞祠以去。彭公餞以詩云：法許公不許，法不如公嚴。年雖已高，手不釋卷。有讀書記忘，集醫錄，集仙後錄各三冊，會錄四冊，皆以儒榮冠其目。家有萬書閣，籤帙甚整。能視細字，如年少時。事親盡孝，祭器封鐫，惟謹。有家記一編，載時祀禮式。又揭百不憂堂，以志義方之效。閣前亂石森立，石間多紅薇花，若張錦然。號紫薇洞天。勝日深衣坐閣下，二鶴翔舞于前，殆神仙中人。也。弟妹四人，弟得之亦休官而歸。時節聚會，子孫甥壻羅拜爲壽，竟觴卜夜無倦色。從母昆弟七人，時置



酒款集。韋濟川楫、黃仲禮琮、彭子壽而下俱效之。開禧元年，親黨爲八十之慶，宴笑數日，乃罷。中嬰小疾，精明如故，猶能課諸孫誦習。三年八月，浴出，瞑目危坐而化，二十有一日也。娶豐城鄔氏，先公二十一年卒，封贈至宜人。五男子：簡，從事郎、新邵州新化縣令；範，迪功郎、新袁州司理參軍、懿業進士；次子符，幼子節，皆蚤歿。二女：長適免解進士曾三異，次適進士鄒時，亦前卒。孫男十人：長峰，亡矣；次嶢，次金西，薦于鄉；崧，峨，皆崇巖，歲一女，適鄉貢進士向公美。曾孫二人：郊，郁。二女尚幼。諸孤以嘉定元年十一月庚申奉公之柩葬于縣之修德鄉古牛岡之原，始鑰扉居四明，得子壽書，俾爲儒榮堂賦詩。時雖抱疴，爲作古風寄之。已而子壽與公俱以書來謝，比聞子壽之訃，固已不堪云亡之痛，而公亦下世矣。公既葬之二年，簡以赴調來見，謂前詩恨未見北盟全書，盡錄以見遺。又出其季父致政所作行狀求銘，致政嘗著左氏國

紀，中書舍人陳公傅良爲之序，蓋深于經者，書事尤覈，敬掇其狀而爲之銘。銘曰：

靖康兵禍，古所未有。凡曰臣子，痛心疾首。公生初元，以及己酉，犬羊長驅，薦食江右。幼而得全，實賴襁負。少長讀書，志已不苟。宦游四方，諮訪尋究。網羅舊聞，編不停手。二百餘家，筆下輻湊。繫日繫年，別記誰某。有制有書，有疏有奏。衆說雜然，考證是否。名聞于朝，六丁下取。蓬萊漢閣，寵數加厚。儒榮名堂，足以不朽。才不盡用，仕多不偶。身退名尊，二疏俱壽。奄然仙去，何憾何咎。有子克孝，慶流在後。銘以發之，尙照林藪。

樓鑰撰 《攻媿集》卷一〇八

周鎮伯墓誌銘

曾祖宗道，祖德元，父案，永嘉人。君諱鼎臣，字鎮伯，勤志廣學。大書叢卷多數百者，親手傳寫，記憶略遍。未冠，與鄭景望同登名譽正等。旣而川壅澤流，山止谷進，諸弟迭起，各取科目，爭爲聞家，然皆由君教也。授

漳浦主簿、文牘間、判疑雪枉、筆勢若飛、不可遏。有以民爲劫冒賞、獄上矣。君覆而冤之。一食頃、放散數十人、傳聲懽呼、徹於比郡。州使行視四縣、盡荒遠不到地。龍巖瘴毒深厚、號烏腳溪者、左足未投、右脛已駢黑。君特館其處。村落所急、便宜不請白。蒲延大掠流鵝灣、同巡檢輕戰而潰。君代尉馳往、三日中生縛其酋二、剽賊無遺。發寄納倉賑傷死、召奔逃歸業。差次將卒功狀、無敢不平、而不自言也。姿敏決、剛峭、不可屈。前守材其爲、無不聽。後守惡其直、不盡從也。監司欲薦未及。以淳熙十三年三月二十九日卒。年六十一。十五年十二月二十三日、葬建牙鄉渚浦。夫人王氏。子曰籲。曰端朝。省試第一。今宣教郎太學博士。君卒後、二子出入、里中指曰、周鎮伯兒也。外家初與田不取、弟多分財、不較也。細人或歎曰、異日主簿有酒、常飲我、今亡矣。或泣曰、我性傲無禮、主簿輒避我。他大人咄撻、不我恕也。故僮使曰、去官人久、見則教我。

好伏事、牢拾餘碗、未嘗墜此言也。余旣廬松臺下、而周氏居二百年矣。山之先儒故老、莫如君者。其學也、情者可殖、其行也、薄者可化也。銘曰、

闊視宇宙隘、回慮几席安。古來賢達流、何必用捨間。活人烏腳溪、殺賊流鵝砦。雖無舊史傳、幸有新銘載。嘉定十三年六月日。

葉適撰 《水心文集》卷二四

孫和卿墓誌

余遷靖之明年、閩人孫君遇從其族父來爲守、博志而強善。以余之進之也、從容語及其大父事、泣數行下。且曰、將有請焉而未之敢。余曰、何傷乎。亦孝子慈孫之情也。明年、以其父坦之所書事狀謁誌、則君以靖康元年生、以嘉泰四年六月丙午卒、且地相去、世相後若此。況如余之獨學寡聞、安足以知君、乃即其狀而叙之曰、孫君和卿諱調、系出江表、世居光之固始。唐末徙福之烏石山。歷數世、散處長溪縣大留村、



數世又徙龍坡。曾大父某、大父某皆不仕。父某號柏巖居士。母葉氏。君少有異質、長通經子百家之書。長溪自唐神龍元年薛令之初舉進士、士知鄉學。國朝中興初、眉山師彥立古時號義丰^②。先生講授于縣之十里曰赤岸、一方士習爲之不變。迨君講授邑中、發明經術、砥厲名行、時亦號龍坡先生。閩俗善爲浮屠、君務以攘異端、正人心爲己任。縣令下車、必首咨訪。蓋館于校官者垂四十年、前後著錄之生不下千人。由是文物彬彬輩出、與義丰分魯焉。耻爲世俗輒媚語、故試有司率不合。堂之東扁^③曰寄隱堂、聚書千卷、藏修息游其間、舉世之所謂可悅者一無以動其心焉。嗚呼、自屬民之法廢、閭塾不修、民無父師少師之教、於是乃有鄉黨自好者、合國人子弟而私淑之。譬如大玉孚尹、雖不幸不以鎮天府、裸清廟、然含英蓄華、輝潤一方、所及不既多矣乎。哀其遺文、得易解、書解、詩口義各五十卷、左氏春秋事類二十卷、冊

府一百卷、龍坡文集十六卷。子男二人、坦夫、甫。甫早卒。女子子二人、長適郭德彰、再適黃復、次適進士林駿。曾孫男一人、坦夫將以某年某月某日葬君于某所、以陳氏配、是爲誌。

魏了翁撰 《重校鶴山先生大全文集》卷八〇

校記

- ①白：原作「曰」，據明祁氏澹生堂抄本《周益公文集》（下簡稱明抄本）改。
- ②二年四月：原作「四年二月」，據右引改。
- ③陽：原作「楊」，據右引改。
- ④震：傳增湘校本《廬陵周益國文忠公集》（下簡稱傳校本）作「振」。
- ⑤固：右引作「定」。
- ⑥川：原作「州」，據明抄本改。
- ⑦貺：原作「說」，據右引改。
- ⑧南：原脫，據右引補。
- ⑨苗：傳校本作「留」。
- ⑩刑：原作「點」，據明抄本、傳校本改。
- ⑪六年：據《宋史》卷二四六《宗室傳》三，魏王愷卒於淳熙七年二月，「六」當爲「七」之誤。
- ⑫七年：《宋會要輯稿》職官六二之三繫此事於八年。
- 「七」當爲「八」之誤。
- ⑬閣：原作「各」，據明抄本改。
- ⑭九年：據《石湖居士詩集》卷二六詩題《癸卯孟夏晦得疾》等，「九」當爲「十」之誤。
- ⑮七年：明抄本作「元年」，當爲「六年」之誤。
- ⑯十六年：據下文「時太子參決庶務」、「俄壽皇內禪」等語，當爲「十五年」之誤。
- ⑰藥：原脫，據明抄本、傳校本改。
- ⑱紹熙：原作「紹興」，據明抄本改。
- ⑲郡：原作「門」，據四庫本《文忠集》改。
- ⑳莘：原作「華」，徑改。
- ㉑清：原作「倩」，據四庫本《玫瑰集》改。
- ㉒義丰：四庫本《鶴山集》作「義門」，《宋元學案補遺》卷四五作「義學」。
- ㉓扁：原作「偏」，據四庫本《鶴山集》改。

宋儒碑傳集卷一百三十一

江介 江明 宋晉之 葛渌 趙像之

蔣漳 何耕 季光弼 石整

通判恭州江君墓誌銘

君諱介、字邦直、姓江氏。曾大父時、大父夢符、父衍、世居徽之婺源、未有仕者。至君始居饒之德興、以鄉舉中第、至通朝籍而贈其父宣教郎、遂爲德興人。君少穎悟、年十五六治舉子業、鄉先生亟稱之、君不自多。一日、讀程子書至水清性善之說、喟然太息。視平日所學、不過爲利祿、有不足爲者。亟走謁衢州徐先生誠叟、以書道其所志而請業焉。徐讀書喜謂其徒曰、此可與共學矣。居數年而歸、更以其說授學者、多所興起。初仕迪功郎、興國軍司戶參軍。先是受俸米者率倍其券、君獨不取其予人也亦然。郡將試以難事、又皆從容以決、遂以廉吏薦之。陞從事郎、調隆興府進賢令。將行、會天旱民饑、度比至官、且不及事、亟移

文喻民廣殖牟麥。民知君之愛己也、聞其且至、爭相扶攜、拜迎馬首。既至、不暇燕饗、倍道趨府、極陳所以拯救之策甚備。富民舒氏當出穀餘萬斛以糴、而自請以緡錢輸府、冀得免糶規賞。君爭之力、帥守龔公茂良不悅、而君執議愈堅。龔公始悟、從君計。而君不俟報、已先喻舒氏出其穀矣。視饑民尤困憊者、收養療治、賴以全活者甚衆。既而旁邑官吏多以救饑受賞、或喻君盍自言。君曰、民饑而令食之、猶子饑而母乳之也、敢幸賞乎。會詔蠲民田半租、君白部使者程公大昌曰、常時輸租雖合勺之畸、亦必使就盈數。今若但減其半、則全戶輸一升者名減五合、而實猶輸一升也。若自全戶三升以下悉蠲之、則貧民被實惠矣。程公以君語聞、詔從之。程公喜、舉酒屬君曰、君宰百里而惠加一路、可謂仁人之言矣。君始至官、有旨新沿道廩置。時民方饑瘁、聞是令下、欲相率逃去。君喻以不得已之故、且爲率溫戶金、伐道旁木、徹廢



佛屋以助其役。民喜趨事而執牽者亦便安之。未幾密院又頒新圖、漕臺趣使改爲甚亟。君言、前役未既、後役復興、民且不堪。況廣西之馬歲不過三十綱、綱不過五十疋、新圖乃度爲容二百四十疋者、亦何爲乎。且馬之息耗、在芻秣之盈虛。今不察兵吏之盜其廩而必病民以豐其屋、尤非分之所安也。使者是其言、縣得罷役、而旁邑亦有賴以免者。天子以連歲旱饑、詔吏敕民修築陂塘以爲之備。吏情不供而畏罪、以希賞、至有未嘗一施畚鍤而以訖事告者。君獨出入阡陌、推上德意、喻民以利害之實而身勸督之。民感君誠意、作治如法。後雖惡歲、猶得半稔。君又深以獄事爲己憂、籍逃田、收其租爲繫囚食飲醫藥之費。言於憲臺、而刻其事於石。暇日延見學子、教以孝弟忠信、亶亶不倦。且祠唐故隱者崔君於學、以風勵之。改宣教郎、知興國軍永興縣事。君舊爲郡掾、習知其俗。到官、移書諸臺、爲陳五事、一曰稅重之弊、二曰准

衣之弊、三曰續起上供之弊、四曰累年不放水旱之弊、五曰魚池權稅之弊。其言明白懇切、覽者動心。然卒無有能行之者。盜劫民尹惠政家、殺其奴而逸。尉恐負課、脅惠政使自誣爲殺奴者。知君不可欺、賂吏移鞠軍獄。君條其可疑者九事、毅然以去、留爭之、惠政乃得免。永興田多水少、君以水種豐凶不可期、則兼課陸種、立賞勸募。父老傳誦、至於感泣。天申錫宴、舊例百物皆取之民、吏緣爲姦、費且數倍。君白太守和市予直、民甚便之。郡當通衢、使客接踵而力役不均、有一歲而數役者、有終身不一行者。君至、始爲籍以均之。他所以便民者多此類也。轉奉議郎、四川總領司主管文字。總領主餉大軍、平時未嘗與民事。至是、東川大饑、君言於其長太府卿李公昌圖、請得庫之羨錢往賑之。李公以爲然、得緡錢五十四萬以行。漕米勸分、極力拯救。既又盡蠲被災郡縣田租、而以所賣官錢代輸。水浮陸走、衝冒暑暍、至感疾以歸。而

果公、昌、普、廣安數郡之民爭繪像立祠以報其德。金州民千餘家以負茶租逮繫笞箠十餘年不得釋。君一旦白除之，無不鼓舞感泣而去。遂寧守李公燾聞之，以書遺君曰：公兩邑之政，可比古之循吏。而見於文字者，又皆如絲麻穀粟之有用於世。今來佐饋軍而幕府施設有忠厚之稱，蓋賢者之助多矣。秩滿將歸，而諸使者留之，使從外銓調補通判恭州事。非其志也。因以檄書至武昌，已事而歸。舟次江陵，則不幸而以疾卒矣。卒時年五十八。淳熙十年十二月二十一日也。君爲人誠懇敦重，不妄言笑。意所與合，開心見誠。即與異趣，雖對之終日，如未嘗有人。少時貧窶，短褐不完，而處之怡然，不妄以一毫取諸人也。喪親毀瘠甚。事兄敬愛有過人者。自奉省約而周贍族姻甚厚。徐先生之喪，爲位以哭。遇諱日，爲卻酒肉以報。居官廉直，不可屈撓。孜孜焉以愛民爲事。興利除害，如己嗜欲。至於身之利害，則未嘗有毫髮顧藉意也。

於上官有所不合，爭辨反復，詞旨慷慨。始雖小忤，然以其發於誠心，卒多聽納。或遂爲知己。如龔公尤相愛重。還朝欲薦之，迫銓法當試邑不果。君於聽訟折獄，察見底蘊，而風喻開誘，卒多歸於仁恕。所治兩邑，獄空皆歲餘。它日道出其竟，民老稚相攜持，羅拜道周，有屑涕扶輿而不去者。送之或越竟而後反。君爲文不務雕刻，而辨說縱橫，詞氣卓犖，曲盡事理。有玉汝堂集藏於家。君之配孺人胡氏。子男四人：元、恭、仲、恭叔、懿、恭女二人。其壻舒竦、汪升之也。君卒之明年，元、恭等乃克以君柩還里中。又明年二月壬戌，遂反葬於婺源瀛山大田之原。元、恭以予之與君善也，使君門人程端蒙狀其行事來拜泣請銘。其事皆予素所聞者。且哀君之命止於此而不得盡其用以厚其澤於吾民也，爲之銘曰：

學以爲己，仕以爲人。廉直不撓，有志必伸。惠滿一同，溢于四鄰。士飽餘功，野殍懷仁。才雄氣剛，一言萬鈞。



退省其私、嗟嗟恂恂。宜登天朝、正色垂紳。嬰鱗折角、卒惠我民。云胡不弔、隕于中身。欲考其德、訂此墓文。

朱熹撰 《晦庵先生朱文公文集》卷九二

江君清卿墓誌銘

淳熙十有四年春二月庚午、鶴山江君清卿卒。冬十有一月庚申、葬于其里少東夏嶺之原。前期、其弟嗣以書致今臨江通守賈侯應之狀來請銘。予幸蚤得從清卿游、然家居相距百餘里、不得旦暮相與切磋琢磨以究其學也。然每一相見、則心愈益敬愛之。及聞其死、以病未克赴弔。至是乃輿疾而往哭之。入其門、望其几筵像設、見其子甚幼、纍然服喪、撫其柩於西廂、不自知其慟也。歸乃發賈侯之狀、又附以予所知者而具論之。君諱明、清卿其字也。世家建陽縣北樂里。曾大父諱測、以學行教鄉黨、仕止將作監主簿、而贈官至太中大夫。大父諱立、左朝奉郎、以吏治循良受知於司馬文正公。父諱琦、左宣教郎、永州州學

教授。覃思春秋之學、龜山先生楊公見其書而稱之、尤以文學行義知名當世。娶同縣虞氏而生清卿焉。清卿生有異稟、書過目輒成誦。作文操筆立成、皆有思致。見者驚歎、以爲江氏有子矣。以童子見張魏公、即開口論天下事、儼然如成人。公亦奇之。年十七遭外憂、執喪如禮。既冠、益從諸長老遊。讀書問學、探討不倦、而不肯輕爲論說。持守踐行、造次必以規矩、而不務過爲崖異、斬絕之行。其接物薰然以和、然亦未嘗苟然有所阿徇。鄉人無不悅而親之。然其恬曠虛遠之懷、安靖篤實之操、誠於中而形於外者、人亦望而敬之、不敢有以加也。始、教授公無恙時、嘗欲盡以先世遺業奉其兄、未及而卒。清卿卒成其志、自處雖約、不以爲慮。母夫人有賢行、自寡居即布衣疏食、以終身。及春秋高、遂抱羸疾。清卿左右奉養無違。既沒、葬祭如法。父同產有適人而老且貧者、迎養周給、以立其家、始終不懈。鄉人有死於遠宦者、爲之糾合



親故還其喪而窆之。有以昆弟訟其先人之遺澤而累歲不決者、喻以恩義之重、一言而解。蓋其志行之

所以信於人者非一日也。嘗以進士試禮部、不合而歸、遂無復有進取之念。而獨於脩身進德益孳孳焉、不以歲年之晚、疾病之侵而少有自安之意也。始亦嘗有意爲浮圖學、至是乃喟然曰、徒亂人耳。卒時年六十有二、篋無完衣以斂、而一子宗老才七歲。鄉人無問親疏賢否、哭之皆出涕。退而相與咨嗟悼歎者無異詞也。妻吳氏先卒。二女適翁益、李懷祖。其遺文十餘卷藏於家。嗚呼、君家比三世以儒學起家、從宦而皆不大顯、至君而學益明、行益修、人曰是必且爲世用而有以大其門矣、而又不位不年以沒于地、於是人莫不以是疑於造物之理而爲君惜之。予獨有以知君之志、其所以爲欣戚者、有不在是也。然則文卿之託銘於予也、豈不有以也哉。銘曰、

不同乎今人者君之樂、不及乎古人者君之憂。蓋其

所樂者人以爲戚、而其所憂者我以爲休。銘焉不慚、子孫是收。

朱熹撰 《晦庵先生朱文公文集》卷九三

朝散郎致仕宋君墓誌銘

隆興改元、永嘉進士得人最盛。尙書木蘊之旣在魁選、一郡同登至二十七人。余忝末科、至乾道七年客授此邦。三年間、多與同年往還、甚樂也。後又假守、則在者已寡矣。今四十載、惟余參議光遠、宋貳車正卿在、鑰亦偶未死。故三人時以音問往來、而正卿又亡矣。明年、其弟習之持書求銘正卿之墓。投涕之餘、爲序其平生而系之銘、且請光遠篆其蓋云。君諱晉之、正卿其字也。舊名孝先、字舜卿。五季時、處士靖自福之、長谿徙溫之、樂清。邑有張文君隱居、築室爲鄰、而緱山僊人吹簫臺峙其前、眞勝地也。今八葉矣。子孫繁衍爲名族、曾祖惟表、祖世則俱晦德不耀。考允修、行義過人、有聲舍選、而終不偶。篤意教子、旣口授以

尙書大義、又力貧爲之擇師。君旣升朝、生封承務郎、後又贈至奉直大夫、妣萬氏、繼母張氏、皆贈恭人。由是邑人益勵子于學。君幼穎悟、日誦數百千言。弱冠從梅溪先生王公十朋游、學徒數百人、獨君首出。王公器之、曾以詩贈別、褒借甚至。未幾入太學、登乙科、授左迪功郎、汀州司戶參軍。王公又以詩送行、期待尤遠。到官明銳、任事不擇劇易、郡政待戶曹乃決、有霹靂手之名。秋稼加耗病民、君以郡命蠲之、人皆謹服。校文三山、士踰二萬。杜君申有場屋聲、又嘗名薦書、文卷已遭摧剝。君識于衆人中、引義力爭、竟寘舉首、果以經魁南省。人尤服鑑裁之明。時丞相王公淮、檢正吳公龜年、少卿鄭公伯熊同爲部使者、皆欲出其門。外移長谿丞。縣去福州數百里、休戚幾不相同。丞相陳公俊卿爲帥、君言邑之利病、多所開納。贊其長、黃君藻和而不同、相得尤深。罷官祖餞、揮涕而別。海舟之隸于邑者數千艘、君旣被檄總籍、其日分番

以備調發、舟人安之。時造戰艦、期會趣迫、君緩其期、事亦隨辦。伐木必親相視、而後取其免于斧斤者、號宋公松。丁奉直憂、治喪諸費、一金不仰于公家。歸營葬、送、仍自爲壽藏于側、泣曰、尙當供養于地下也。除服、調臨海令、以辦治聞。催科不擾、囹圄屢空。太守邀入簽幕、郡縣視猶一體、知無不爲。輅車行部、士民遮道、稱德政者動數百人。樞密丘公鳩爲憲使、率諸臺薦于朝。及去官、壺漿攀戀、旗幟咽道、相望不絕。前此未有也。再調光化令、鄉人王公自中爲守、每稱爲老先生。被邊事簡、作亭豐山之顛、遙望卧龍舊隱、暇日相與登高弔古、哦詩度曲、不復以僚屬相遇。改奉議郎、知奉化縣。君三更邑寄、熟于綱目、剏方爲圜、坐以無事、民大愛之。丞相謝公深甫臨海人、素知治行、時在參預、欲引之周行。君赴部、授信州通判以歸。佐郡期月、即引年求謝事。謝公又卻其請、且勉留之。秩滿、竟以朝散郎致仕。或謂理賞可及正郎、君曰、不翅足

矣。翩然還家。聞者愧服。天資孝友。奉直素爲鄉曲所敬。憚以儒術自信。黜釋老之說。每曰。親亡而藉緇黃以薦。何待之薄也。死欲速葬。或溺于陰陽家之言。以幸富貴。至累年不入土者。不孝爲大。其卓見類如此。君之執喪。一遵遺言。追慕老而不衰。歲時祭祀。君蒿悽愴。如將見之。言及則必泣然。弟習之。少君四十歲。撫之如子。捐祖產以畀之。而不忍析爨。弟亦恭謹好學。事君猶父。門內以禮法稱。護墳塋如護頭目。拜掃必躬必親。宗黨貧者。收卹經紀。有孤女。則爲遣嫁之。不惟子弟承教修飭。廝僕亦能以生事相戒。有古樟。蔭蔽甚廣。自號樟坡居士。晚又築亭其上。榜曰可高。賦詩賡酬者衆。鑰亦預焉。嘉定四年八月。屬疾。終于家。享年八十有六。娶孫氏。繼萬氏。皆贈安人。二子。長曰統。迪功郎。寧德主簿。衢州比較務。調邵武軍司法。姿稟端重。居家臨政。綽有父風。不幸先二年亡矣。次曰纓。孫四人。仝僑。叔皆業儒。幼曰宅。孫女四人。佰適。

進士劉頤。仲適國學進士張復道。叔從浮屠。名法定。季適進士萬達。女孫三人。習之與纓。將以五年十月。丁酉葬君于縣蓋竹山。寔附先塋。君志也。君敏而靜。貫穿百家。不爲艱深之文。明白豐贍。詩辭高勝。淡而實腴。即席唱酬。鋒起泉湧。人畏其捷。而服其工。所至留心風教。勉厲後學。長谿有隱君子林君維屏。號榕臺先生。君屈致邑庠。遇講書。與其長率邑之寓公聽焉。學者益勵。丞相梁文靖公聞之。遂招入郡中。一時政化之盛。君實啓之。憂居開義學。來者輒受。勸諭有文。齋舍有銘。深衣大帶。濟濟翼翼。習俗益媿。臨海官事整暇。太守熊公克遇視學。則請君爲說春秋。光化旣爲一新軍學。至奉化。則又親見之。銳意興作。里士監南嶽廟汪君。偁與其弟份。斥家財爲之倡。衆亦競勸。輪奐鼎新。照映山川。舉梁之文。落成之記。皆鑰爲之。自爾累舉。得士爲多。家素貧。孫安人初以田四頃自隨。伏臘粗給。仕幾四紀。無一丘之益。客至必留盡。



歡或假貸以續食、人爲不堪、晏如也。歸老餘年、齒落復生、髮白更黑、頽然爲鄉曲之望。詩文甚多、隨有散佚。今惟乾坤二卦、中庸、大學、禹貢、洪範講義、春秋十二公論各一卷、歷代中興君臣論二卷、擬進萬言書一卷、樟坡集三十卷藏焉。銘曰、

阜陵取士、隆興之春。惟溫最盛、二十七人。我幸同升、游官海濱。相與往來、久而益親。四十餘年、如星向晨。惟宋與余、壽踰八旬。宋君忽焉、而迹遽陳。行義治政、藹然弗泯。難弟貽書、其請甚勤。哀懷易感、勒銘翠珉。

樓鑰撰 《玫瑰集》卷一〇九

葛先生澤墓誌銘

古者賓興之士、論定於鄉。是以上不失人、下無遺才。後世升黜、一以程文。賢能不皆進、愚不肖未必退。往往出於偶然。曰此公舉也、而鄉評不在焉。若乃德行道藝脩之身、信於人。雖曰未遇、而無智愚大小生、則推尊之、沒則追思之、是謂鄉評。殆與公舉相爲權衡。

然彼猶可幸得、而此不容力致、輕重斷可識矣。吉爲士之鄧林、鄉評所推。今有人焉、葛先生是已。先生諱淑、字德源、系出常州。祥符間、名宮者始登科。自是世策高第、或至侍從輔相。惟先生高祖詠、徙家廬陵。曾祖曰宣、祖敏求、考經俱有文行。叔祖導、岷先生敏修擢元祐三年甲科、受知蘇文忠公、黃太史。先生坐^⑥上書入黨籍、學者宗之。先生四歲而孤、又七年母亡、依仲父唐州錄事參軍。苦學忘寢食、手抄書鉅萬、無一字行草。貫通經子、歷代史書、端醇詳雅。士大夫子弟爭願從之。胡忠簡公及其群從號儒先甲族、競以書帛延致、亦嘗不鄙過予家塾。晚即所居講授、八邑暨傍郡秀民著錄盈門。先生迪以行誼、非但章通句解而已。後多登第游宦、薦春官者不論也。初、錄參老而貧、同產滋流落湖湘、娣嫠居。先生併迎歸奉養、罄束脩畢其婚嫁、常產闕如也。導岷既無子、錄參爲之繼。先生亦謂錄參鞠育不可忘身^⑦。主其祭。孝

友類此。郡博士稔賢名、請爲直學、遷學錄。慶元六年

四月甲午以疾不起。博士率諸生奠哭盡哀。鄉人皆來告予曰、鄉先生亡矣。享年七十有五、以十二月甲申葬郡西清塘之原。娶同郡曾氏。生三男、長琳、早世、次玠、季瓌、傳父業。玠再預賓貢。四女、長適貢士曾友節。仲適吳簡卿、叔適王及、及夭。改適尹先達。前先生十二日而亡。季適白^⑧。逢原。孫四人、一男杞、三女俱幼。所著書有草茅卑論三卷、壽齋筆語四十卷。先生存心忠而勇於義、嘗集本朝死王事者著旌忠錄三卷、名士多爲序跋。常州族立象、大司成次仲之子、乾道中來守廬陵、於先生爲從兄。先生旅謁即退、立象代還、執手嘆其安恬。予自上印綬、與先生及歐陽伯威歲講同甲之會、月爲眞率之集。先生文華有餘、凡予小圃草木猿鶴悉爲賦詩、語新而事的、卷軸盈篋。今失良朋、能無永嘆。玠等乞銘、其忍弗從。銘曰、修其天爵、席以儒珍。昔聞其語、今覩其人。士無賢愚、

曰鄉先生。盍祭於社、永光楡枌。

周必大撰 《平園續稿》卷三二

朝請大夫將作少監趙公行狀

曾祖承錫、潁川郡王。祖克家、崇信軍節度使、安康^⑨郡王。考叔贊、通議大夫。公諱像之、字民則、秦悼王之六世孫也。今居高安。穉齒嗜學、至忘寢饋、痛掃綺襦、鑽礪螢雪。年未冠、洞視經訓、貫綜太史公、班固書、屬文立成、風蹕川達。小試郡博士館下、每蹴寒士于下、風而立其上。與其仲氏儼同。登紹興十八年之乙科、年二十有一、爲宗子第三人、授修職郎、撫州司戶參軍。有異縣令以苛政免者、部使者下二尺木書詭他官攝之、皆移疾不行。諸公合議、差擇命公、公不辭。於是用仁滌苛、以廉鏟汙^⑩。佳政惠化、滂被四達、民譽雷出。諸公薦之、陞從事郎、郴州軍事判官。溪徭出掠、漢民靡寧、部使者檄郡丞往尉安之、懼不敢往。公請代行、承感泣。公單車深入蠻巢、召其酋長、諭以朝廷



儒藏

德意、即日聽命。三十一年、逆亮寇邊、王師征之。朝廷下虎符發諸郡材官、郴兵不滿三百、不發則違詔、發之則郡無備。公爲太守草奏、請勿發。免符下、州民守譙門呼舞、爲賀且謝。守曰、此趙判官草奏力也。他日有詔、賚中外諸軍餐錢、而無其數、郡欲請而俟報、士譁于庭、守懼不出。公往叱之曰、輩人不過得數十百錢爾、今欲何爲。遂白守用郊賚故事畀之。衆定、公陰求其倡者、白守先誅之、而後自列于朝。有詔下郡國繕甲、郴小州也、而其數視潭府、官吏莫知所措。公曰、此易辦爾。先是、境內有官軍禽盜、旣去而棄其甲者、居民或藏^①去之、公令求之以應焉。再轉潭之攸縣令。宜章縣兵李金倡^②蠻數千人起爲盜、張甚、聲震湖廣。孝宗皇帝特命中書舍人劉公珙帥長沙、詭以平賊。劉公入境、公與縣令御之境上。劉公以公知名士也、送客獨留、諏以平賊之策、且問郴城堅瑕之狀。公曰、城小而堅、然不可守。曰、旣堅、曷不可守。公曰、

城中有三井爾、受圍五日、不待戰死、已渴死矣。曰、爲之奈何。公曰、此賊非湖南材官所能了也、非鄂渚羽林不可。劉公遂用公言以聞、朝廷遣一將谷青者來、賊即伏誅。劉公首薦以改秩、且請擢以不次之位。後帥張公孝祥至、得公牋記、手之不釋、以示幕下士曰、吾當薦士、無出趙令右者矣。即刻薦書、且招公入府、爲十日飲。時侍講張公栻與侍講朱公熹相與講習、皆與公遊、文名詩聲焯于朝野。改左宣教郎、知鄂之蒲圻縣。會諸道大侵、流殍相望、蒲圻邈在湖山之外、地荒民貧。公勞來安集、振貸^③有方、境內安業、旱不爲災。部使者及太守交章上其最、詔與^④中外陞擢之職、除知漢陽軍。見上辭行、時孝宗方銳意恢復、公進言曰、鸞鳥之擊、必匿其形。舉大計而使敵人有備、我之心、非策也。願陛下晦其強、以驕其心、使不我備。修政刑、廣儲積、礪兵甲、選將帥、觀釁而動、待機而發、使如雷霆不及掩耳。又言、召見多士、許其盡言、此盛



德事也。然人懷希合之心，好立新奇之論，聞之若可喜行之，則無實。願審於聽言，而謹於出令。上皆稱善。鄂之一軍，其舟師蒙衝視諸營，屯獨雄且精。每歲夏，潦孔殷，則檣于鄂之西浦，霜降水落，則檣于漢陽之劉洲。明年復如初。歲中在鄂者四閱月，在漢陽者八閱月，而守舟者不滿百人。公之未至，一夕火延其涯，焚其四艘。公至，訪其利病有五，亟言于朝，請移一軍隨舟次舍。事下軍帥，帥未嘗以火事聞，怒公發之，竟格不行。沔之與鄂相望于大江之南北，故事沔守未嘗踰境至鄂。比十年間，始有諂事諸部使者而越江者。其始曰慶朔望，其後曰受約束，遂旦旦而往。公至之初，典謁以近比白。公曰：「先是有不往者否？」曰：「無之。」公爲書與諸公曰：「守臣出境，非令甲也。因不復往。諸公間有以公爲傲者，來索錢穀簿書，冥^⑤搜出入，以求公罪。見民無橫斂，官無罅漏，吏俸兵食給無虛月，而公之俸不自與者餘一歲，於是敬歎。諸公復表其

治狀。公因上章極言守臣渡江之弊。孝宗大喜曰：「所未聞也。」有詔繼今敢有謁與受者抵罪，惟均改守全州。丁通議公憂，服除，貧甚，有房州別駕虛位，公欣然詣曹受署。房陵與公所居相距三千里，公留孥以待母太碩人宋，而匹馬之官^⑥。守缺兼行府事，勤恤遠民，專務惠養。境內告旱，公精意雩祭，不崇朝而雨，民皆欣然曰：「此趙公雨也。」丁太碩人憂，服除，將造朝。一日，孝宗御垂拱殿，見文武俊乂盈庭，天顏有喜，因問班綴中屬籍在列者若干人，則曰：「無之。」於是愀然不怡，即詔侍從舉宗室文學政事可爲中外之用者各二人。吏部尙書蕭公燧首以公應書，除知郢州。公見孝宗，論事剴切，上喜曰：「觀卿議論，非苟合者。」郢非所以處卿，卿當爲朕卿士。即日除軍器少監，朝士相慶，以爲得賢。同年進士官于中朝者七人，一日有陳郎中之喪，七人致奠，其一人參政蕭公燧也。蕭公以祭文屬公爲之，其文一日傳都下云：「在列未滿歲，白丞

相丐補外。丞相以聞，上留之不可，乃除湖南常平使者。辭行，上首問公曰：「何求去之力？」又曰：「湖南去朝廷遠甚，一路部使者之寄非輕。卿宜廣儲積以備旱，戢鹺茗之私鬻。」公對曰：「儲積一事，臣敢不欽承。天子休命，地非近鹽，非產茗，然戢之亦當以漸。」上喜曰：「卿言是也。」急則激之使亂矣。朝士惜其去，置酒飲餞。踰月，公不得行，又皆賦詩以詠歌其退勇守堅之節。所部利病，公至之日亟罷行之。歲適小歉，公與連帥潘公時講求荒政，發廩移粟，民不流徙。移江東常平使者，未上，改西外知宗。宗司有學，有教授官，然有夫子廟而無祀事。宗盟子弟無所觀禮。春秋上丁，附拜于郡庠。公進諸生講學政之未周密者，首諗之曰：「學奉先聖而不祀，可乎？」或曰：「禮器未具。」公計費召匠製冕弁，繪藻火，斲俎豆，冶尊爵，列磬管，潔柜鬯，卜牲牷。明年服器既成，先期躬率諸生致齋直廬。夜漏未盡，十刻，公夙興，盛服將事，陟降拜起，沃盥奠瘞，禮文於祭。

盛於一時云。未幾，即拜福建路提點刑獄公事。建臺之始，風采一新。浦城縣獄有以平民爲大辟者，其人誣伏。具獄來上，公平反之，劾其令，免所居官，一路讐服。又劾帥屬王次春於遏密中呼營妓歌舞飲酒，其人甚口，人皆爲公危之。公不顧也，竟隨其語竄而去。未幾，請爲祠官。丞相京公鎰遺公書曰：「官有似祠官而祿差豐者，帥司參議官是也。公肯俯而就乎？乃俾食江西添差參議之祿，以便其里居之適焉。公少無宦情，年未三十即治別墅，號曰南疇，花木成列，松竹造天，皆手植也。一觴一詠，左琴右書，飄然有違世之想。不治生業，老而益貧。有問者，公曰：「居閑食不足，從事力難任，吾故未能以此而易彼也。」嘉泰二年四月二十三日，以疾終于正寢。官至朝請大夫，賜紫金魚袋。享年七十有五。配任氏，太平州通判望之女也。封宜人。先一月卒，年七十。子四人：公掄、迪功郎、贛州左司理參軍。公括、迪功郎、吉州司戶參軍。公哲，將仕



郎。幼未名世。女四人。長適從政郎向士充。先公而亡。次適儒林郎王城。次適進士某。次未嫁。孫男二人。長彥。次未名。孫女二人。並幼。公性淵靜。不見澄撓。遇物傾豁。洞見表裏。然剛而不爆。介而不崖。雖貴介。公子而矜然退然。若寒酸焉。故其爲詩平淡簡遠。如清泉白石。蒼松翠竹。初無鈎章棘句之苦心。而有絕塵撥俗之逸韻。其文尤長於論事。上前敷奏。坦明練達。灼然可行。孝宗恨見之晚。方登進而浩然去之。使上有用不盡之歎。天下賢之士大夫惜之云。諸孤得卜。以是歲十一月八日葬公于高安縣來賢鄉雲居山中主岡之原。以宜人祔焉。將辟公。括移書且錄公之言行來請行狀。公某之鄉舉。明有司也。狀之爲宜。門人通議大夫寶文閣待制致仕吉水縣開國伯食邑七百戶楊萬里謹狀。

楊萬里撰 《誠齋集》卷一一九

蔣彥回傳

蔣彥回名漳。零陵人也。居郡之南郭。少辭家入太學。既無遇於有司。則歎曰。士必富貴而後得志耶。棄而歸。市書數千卷。閣以藏焉。築園植花木。葺亭榭。以讀書於其間。未幾。園產玉芝。遂以名焉。山谷黃先生貶宜州。過而賦之。是時黨禁密甚。士大夫有顧望心。先是郡守丁注有玉芝園詩。山谷之詩蓋次其韻也。丁見之。懼易其本韻。二三以異焉。教授侯思孺者。一日突入郡士某之家。命剗其壁。山谷留題者。將以告于朝。主人亟剗磔之。乃已。惟彥回曰。從山谷游。藏弄其詩文字畫二百餘紙。山谷亦樂爲彥回作也。實崇寧三年三月也。明年九月。山谷病革。彥回聞之。往見焉。至則山谷大喜。握手曰。吾身後事非彥回則誰付。乃盡出所著書示曰。惟公所欲取之。彥回竟不私片紙。山谷既卒。彥回買棺以斂。而以錢二十萬具舟送之。歸雙井云。道鄉鄒先生謫居永。彥回復從之游。驩甚。未幾。道鄉復有昭州之命。留其夫人與其子。僦民屋。

於太平寺後以居乃行。彥回實經紀其家同其患難而周其乏困。道鄉率月致二書以謝蓋深德之。其後北歸臨別之詩可見矣。嗟乎士窮乃見節義此韓退之爲久故之交而言也。若彥回之於二先生秦越也非有平生之素而能慕鄉二先生之風既賢也已。況二先生當蛟蛇熊豹狃狃搖牙之鋒賓客落而朋友缺淹汨阨塞於荒遠寂寞之地望風而憎無仇而擠者滔滔也。而彥回至於死生之際而不變此古之仁且賢者族且親者恩且舊者猶或難焉彥回能之可不謂賢矣哉。予來丞邑訪其所謂玉芝園者但見荒煙野草而已。問其子則觀言者在老矣。顧其家貧甚觀言居之澹如也。其猶有彥回之風歟。問彥回之遺事所言云爾。其人顓朴而無純緣其言可信也。且出道鄉之翰墨七輩讀之使人三歎恨不出乎其時。又曰山谷美丈夫也。今畫者莫之肖。觀言年十五在旁見其喜爲人作字及留題吾鄉人士日持縑素以

往几上如積忽得意一掃千字。一日訪陶豫豫置酒且令人汎除其堂之壁。先生曰何爲者。豫離立而請曰敢丐一字爲寵光。先生曰諾。酒半酣起索筆大書下語驚坐。今亡矣且忘其詞。又曰道鄉對人寡言終日拱手不下帶其莊敬如此。又曰先君子有文集若干卷頃大盜孔彥舟屠城寸紙不遺餘矣。予太息而爲之傳。

楊萬里撰 《誠齋集》卷二一七

朝請大夫知潼川府何君耕墓誌銘

公諱耕字道夫姓何氏世居漢州之綿竹縣。曾大父杲大父延世號休菴居士輕財好施食客日數十人。與同郡德陽史彬善以其子革爲彬婿即公之父也。贈朝議大夫彬教授弟子以百數號絕學先生。兩家旣通婚姻何氏亦占籍德陽矣。公甫勝衣從外祖學詞賦警敏異羣兒更授尙書殫思精義東西川名士張行成任慥繼爲郡博士皆奇之。方弱冠類試奏



名第一、時紹興十七年也。自行在吳中、蜀士不預廷試、例賜魁進士及第、命官視甲科第三。講和後稍稍來奉大對、時秦益公當國、諭禮部尙書、凡不至者第一等並賜進士出身、今後準此。入熟畫可、遂爲故事。蓋自公始。以左迪功郎充彭州州學教授、用舉主陞從政郎、教授成都。公天資高明、積學勤篤、士聞風四面至、帥守監司交薦之、改左宣教郎、領職如故。制置使沈介、轉運周綰、何逢原皆中朝名勝、待公以異禮。今上登極、轉左奉議郎、移成都府路轉運司幹辦公事。官長查籥負才易公、公遇其施設未安、必反復告之、籥大敬愛。吏部尙書汪公應辰、儒宗嚴許可、以文章典雅科薦公、俄通判成都府。乾道四年、綿漢大饑、公沿帥檄賑濟、過家率族黨發私廩爲之倡。里富人獨閉糴、公登門曉之、弗聽、械繫其家人、遠近輸米相踵、全活不可計。文人晁公遡爲提點刑獄、詩以美之、會邛蜀間盜發、帥遣將將數百人、命公督捕。公宣

示恩信、譬以禍福、尋即解散。擢知蜀州、撫摩善良、繩治姦猾、郡以大治。盜復起鄰邑、州民驚擾、公立木四門、大書曰、率衆劫民財者斬。有村夫攫鬻物于市者、罪當流、部使者欲殺之、且責公自叛其說。公曰、前令爲率衆而劫人者設、今一夫攫物耳、非姑息也。使者愧謝。居頃之、丁太宜人憂、疏食三年、出居僧舍、自號恬菴畸叟、以布裘鐵環竹杖等五物爲五友、若無意于世者。免喪踰年、青羌寇沉黎、虞雍公爲宣撫使、檄公守雅州。諸司調西兵來戍、公曰、蠻敢侵邊、貪吏實啓之、其患常在外。今多屯兵、必損郡計、脫不滿意、且內訌、是腹心之疾也。守誠潔已奉公、戒城寨官無黷貨生事、訓練州兵、優恤土丁、蠻何足患。其後八年、黎境再擾、制置司調戍兵益衆、將非其人、果作亂。人服公先見。知果州、改嘉州、課常爲諸郡最。除潼川府路提點刑獄公事、作諭民詩四十二篇、語平易而教化寓焉。郡邑家有其書。強暴犯法、父老必譙曰、汝不

誦何公詩乎。往往知悔。淳熙四年、敕差監四川類試、得士爲多。是歲被召。明年入對、論恢復四事、且曰、願陛下內定其志、外修其具、考其實、無聽其虛言、無畏難於今而成功於後日。上曰、卿所言盡之矣。拜倉部員外郎、改戶部郎中、兼國史院編修官、侍講東宮。未幾遷國子司業、就陞祭酒、改太子侍讀。講禮記終篇、及史院進四朝志、皆增秩一等。徙秘書監。丐外、知潼川府。請祠、未報。以十年六月乙卯卒于府之正寢。享年五十有七。既詔公主管玉局觀、不及拜矣。積官朝請大夫。娶同郡李氏、封宜人。前公四年卒。三男、德方、將仕郎、德彥、迪功郎、新邛州司戶參軍、德固、迪功郎、新嘉州州學教授。三女、德秀、德珍、德蠲、適進士王璿、關谿李兌。孫男七人、居安、慶傳、遷曾、卿月、早夭。今存者曰惠雲、法雲、登雲。即其年九月乙酉葬于縣之義合鄉元池里、與李宜人同域而異藏。公有文集百卷、藏于家。予未常至蜀、而多識蜀士、夙聞公有盛名、紹

興末、外舅王公葆^⑧光守漢、每道公之賢。歲在戊戌、予在翰林、而公實來、一見如舊交。已而僚於東宮、於史院、予既知公、公亦知予。自公云亡、懷思不已。今德彥、德固同登進士第、泣請銘公墓、義不得辭。竊常評公、於書無不讀、而得其要、於文無不能、而根諸理。立朝端諒、敢言、典郡豈弟、人不忍欺。其持心雖厚、而臨事剛不可奪。其造行甚謹、至適性亦通而不拘。當仕則仕、當止即止、惟其時而已矣。始蜀先進久欲扳公於朝、公未嘗有所就。虞公秉政、知公特深、迄莫能致也。趙沂公入相、薦公爲郎。公積閱雖高、然寄祿未至大夫、爲中郎滿歲乃可任子。素友愛季弟、憐其早世、撫孤德崇過己子、將命以官。於是翻然而起、至則忠嘉合上意、譽望動縉紳、朝廷進退蜀士、多以公言爲輕重。學省蓬山、極道德文章之選、公俱爲之長、視禁途跬步可登。一旦悼亡、浩然有歸志、日夜求去。人爭欲留公、予時爲承轄、諒公誠慙、莫敢遏也。蓋公之行

誼文學出處去就大略慕唐白樂天而耽玩釋氏躬持齋戒尤與之同。嗚呼亦賢矣。是宜銘。銘曰、

珪璧其德松筠其節。何以文之。惟學與識。宜公宜卿。我則自抑。宜耄宜期。天曷爾嗇。寧非劬躬。以壽奕葉。邈乎來今。尙考斯刻。

周必大撰 《省齋文稿》卷三五

知嵯縣季君墓誌銘

皇帝即位之六年五月壬戌有旨季光弼所獻文字有補治道可與循兩資制曰上書公車日以百計高則近迂卑則涉諂至于出入經史動含諷諫覽爾奏篇朕甚嘉之進官一列不獨爾私庶聞其風亦克用勸先是四月戊辰朔日有食之君撫光武十事備論以進曰曰美芹文簡而旨深意篤而言婉訓詞既頒士夫相與傳誦聖天子導人使諫盛德日新而君之名亦由此暴白于天下君居八年再上萬言書數繹前說又泛論當世之務不報一日聞西府除目愀然

曰樞筦與中書並立繫朝廷輕重其可忽諸遂攷唐之宰相起自武德裴寂終于天祐楊涉作編年錄論說二百五十有五去取抑揚皆有微意苟位之非據假以隆名雖元勛如郭子儀亦不得預讀者爲之聳歎嗚呼才不得究齋志而歿著書一二亦足以不朽矣君字觀國其先家處之龍泉七世祖超爲吳越錢氏常侍始籍于溫居平陽之桂源曾祖宗喬祖文瑩俱不仕父敦習以君陞朝贈宣教郎妣林氏贈孺人宣教公早世君方在髫髻號慕如成人祖母猶無恙與林孺人自釐家務俾君一意問學君少穎悟痛自激昂于書無所不讀詩禮左氏春秋及諸子古文皆手自編寫寒暑不少變年十六授室益加刻苦視生產作業與閨房之私一不經意羣試庠校輒出其輩行而器識凝邃不見圭角閣學林公待聘待制蕭公振里之先達少所許可咸器重之兩薦于鄉紹興二十七年遂登進士第授左迪功郎調福州福清縣主



簿以祖母憂不赴。服除授臨安府鹽官主簿。秩滿用薦者關陞左從政郎。特旨授左儒林郎充邵州教授。丁太孺人憂授福州寧德縣丞。改通直郎知紹興府嵊縣。磨勘轉奉議郎。代者且至俄疾卒于縣治享年五十有七。時淳熙十年四月四日也。嗚呼君之抱負厚矣。學行政術皆欲以古人自期而見于用者止于州縣間。所在皆著聲績而其甚可稱者數端。鹽官邑庠久不振君召張橫浦高弟子恕郎曄勉以身率士子課試皆臨視之咸自奮勵登巍科如張少良等數人邵陽僻遠士無師承君遇諸生如朋儕程度甚悉鄰郡縣之士至者相屬凡經指授多成美才如陳偕謝特起輩有聲湖湘間此君之善教養者然也。浙西漕河淺淤例調民運水以濟往來歲旱民勞水愈不至君相地形鑿河引潮以灌之至今爲便。閩有僊湖爲豪右所田君按黃諫議之舊疏濬以廣灌溉此君之善興民利者然也。君之聽訟不爲鉤距一以至誠

臨之公而生明無不洞察。羅源尉鍛鍊平民爲盜以希賞連帥丞相陳申公命君鞠治悉從平反。公欲騰奏又力辭之。有母改適而子有後言訟其不孝。君曰不爲伋也妻者是不爲白也母安得以不孝坐之。申公稱其引經之決。剡民張僖之子爲盜所筠疑怨家黃氏爲之黃無以自明。君察其非殺人者故緩其獄得子之衣于東陽遂禽眞盜。又有王生與僧有隙匿田家之子使其交訟之旁引曲證僧自誣服。君獨以爲疑求之竟得于其家告者遂伏辜焉。君之救荒不爲文具皆出于惻怛之意所至疚心受賜者衆。隆興之初畿邑大歉尙書薛公良朋尹京以事屬君。君列急務六條獻之隨即施行。給事程公叔達以六察行縣喜曰使諸邑皆如君尙憂飢民哉。丞相史魏公聞丞之才常下君所陳盡發常平裁價分糶民爲之謠曰飢不憂與之庾儒林季公民之父寒不憂今有袴儒林季公民之母既爲縣又遭游饑山谷窮民易致



嘯聚。君加意拊摩，豫令富室致吳中之米七千餘斛，丐于府，得常平緡錢二萬于鄰邑，始得按堵而嗣歲尤甚，禾未登場，民已菜色。秘丞朱公熹力舉一道荒政，尤詳于越。君求哀諸司，得米四萬斛。縣有二十七鄉，凡爲賑糶場、賑濟場、養濟坊三十餘所，戴星出入以課督之。數月之後，鬚髮爲變。朱公每貽書勞勉曰：省刑緩賦，以回天意，非體國愛民之切，不及此也。君爲丞貳，則悉心以贊其長，謀事甚詳，請于長而後行。及爲長，則待寮友如兄弟，莫不樂爲盡力，故所至皆有可紀。而去輒見思。卒之日，剡中耆穉相持聚泣，至巷哭以過車。識與不識皆喟曰：善人亡矣。平日安于義命，論說甚明。儒林之命旣下，人謂君且通顯。君曰：吾豈以此釣爵位耶？竟客授湖外以去。巨公知己甚衆，亦有欲薦于朝，亦或有尼之者。君雖聞之，不以介介。至義所當爲，則奮然直前，無所顧忌。親故以出位抗論得罪，後當叙理，無敢保任。君方爲簿領，慨然許

之。有貴臣過縣境，冠蓋相望，或勸俱往。君爲詩曰：不堪枉道依陽虎，可是無心簡子敖。聞者趨之，亦以是終不得爲時用，可哀也已。娶同里周氏，清儉端恪，克相夫子。先君十年卒，後以明堂恩贈孺人。男五人，復之、泰之、蒙之，俱習世業，次兼善，舉善，早世。女二人，長適進士林仲明，次適陳權，皆周出也。君天資篤厚，孝謹過人，少小孤立，奉祖母及母甚至，未始暫去。邾下有疾，必躬治湯藥，執喪以毀聞。與弟兄光度友愛，誦書作文，自爲師友，終身無間言。無他嗜好，惟以論著自娛。奉養寡薄，俸錢多以買書。別有文集八卷，藏于家。爲文渾厚典雅，言皆有用，庶幾乎一飯不忘君者。雅愛東山林泉之勝，築室其下，樓曰雙清，軒曰靜寧，欲爲晚歲歸休之地，竟不得一日之適，顧非命耶？諸子將以某年某月甲子葬君于邑之某鄉某原，以君之甥朱德成之狀來求銘。鑰頃官東嘉，一見辱定交，盡得君之書讀之，相與益厚，今其可辭銘。然君志不

負所學而見于行事者僅如許、既已屢書于前、惟所著之書當表其大者、以示後世。銘曰、

惟君之生、未爲不遇。位雖不豐、朝有顯譽。章交公車、君獨進御。美芹之書、一言而寤。唐三百年、曰宰曰輔、汎論其尤。姚宋房杜、君獨究觀。一一論著、忠邪眇分、咸有旨趣。位非其據、勳如汾陽而不與。事有責備、德如晉公而不恕。上可以發潛德而誅姦諛、下可以垂世鑑而切時務。紬繹乎義命之說、磊砢乎經濟之具。使用于世、則必古人之與稽。使之作史、亦必大明于勸沮。嗚呼、尙何言哉。後之君子、必有撫是書而太息者。銘實昭之、用以載君之名于不腐者也。

樓鑰撰 《攻媿集》卷一〇〇

知南康軍石君墓誌銘

吾友石君子重諱某、其先世爲會稽新昌右族。曾大父諱某、不仕。大父諱某、避庚子之亂、始居台州臨海縣。後以遺逸召、授右迪功郎以沒。父諱某、贈朝奉郎。

母安人朱氏、太宜人陳氏。君幼端慤、警悟不群。年十二、即自知刻意爲學、晝夜不怠。年十八、擢進士第。丁外艱、服除、授左迪功郎、郴州桂陽縣主簿。會故參知政事李安簡公謫居郡下、性嚴重、不輕許可。一見君、深器重之、授館其家。日與論說前言往行、勵以致遠之業。常語人曰、吾閱人多矣、未有石君比者。秩滿、循從事郎、調泉州同安縣丞。天旱民饑、縣白府、請得蠲歲租如故事。太守怒、檄君杖主吏。君移書太守曰、杖一吏細事耳、然其所繫則大。民今皇皇無以爲命、縱不能救、忍復箝其口乎。守怒未已、遣幕府官按驗、至則希守意、以爲不當蠲。君爭益力、部使者聞之、因以其事諉君。君既行視歸、即揭榜諭民、蠲之什九。然後言府。且亟召鄉吏閉廨中、使鄉爲一榜、戶列所蠲與其當輸之數。既成、立授里胥、使走揭於其所。於是上官不得變其說、鄉吏無所逞其姦。邑人便之。改宣教郎、知常州武進縣事。民訟有數年不決者、君一訊立

辨雖姦民健猾者亦皆驚服愧謝而去。它邑滯訟多請屬君以決。郡守欲爲寓客治第而屬役於縣其費且數十萬。君不可。曰：吾爲天子牧民豈爲若人治第者耶。且浚吾民之膏血以媚人吾不忍也。守怒欲中以法掇拾亡所得。會君有親嫌法當兩易。君不顧求罷徑歸。民數千人詣郡請留君不可則相與伺守出遮道號訴至有褫其檐帷者。守不能禁。君因更調南劍州尤溪縣待次。家食三年雖貧不戚也。至官吏以財賈請借民租君不答。但曰：治稅籍凡民逃絕而田入見戶者與鬻產而不能更其籍者皆正之。又謹視其出內之際要爲簡易以便民而吏不得以容其姦。關市之征亦損其數於是官無苛擾農商得職租入以時力役有序至有爭先爲里正者。縣故窮僻學校久廢士寡見聞不知所以爲學。君至即命其友古田林用中來掌教事而選邑子願學者充弟子員。始教之日親率佐史宿賓客往臨之因爲陳說聖賢教學

凡以爲修己治人之資而非如今之所謂者聞者皆動心焉。自是五日一往伐鼓升堂問諸生進業次第相與反復以求義理至當之歸。員外諸生數十或異邦之人皆裹糧來就學。君視故學宮爲不稱乃廣其規模新其棟宇市書萬卷買田數百畝以充入之。旣成爲考古制舉鄉飲酒禮以落之於是士始知學而民俗亦變。君又摭其舊俗之不美者數事爲文以訓飭之民皆傳寫誦習焉。遠鄉有據險自豪不輸租賦數十年日與比鄉爲仇敵者君爲榜以喻之即斂手聽命輸賦解仇復與齊民齒。民王某者有刑罪具獄上府吏以邀求不厭欲致之死。君爭之不聽則請白對獄與吏辯代民死民乃得免。歲大疫多治藥劑分遣醫者散之村落自爲詩以勸之賴以活者甚衆。及代去民或畫像祠之。監察御史陳公舉善聞其賢薦之朝而君自從吏部選授福建路安撫司幹辦公事以去。會丞相史公再入薦一時名士數人君復與焉。



有旨召對、君辭不獲、乃入見。首陳人君之道與天同方、天心至公、故人君之心不可以有一毫之私。因歷引時事以質之、言甚剴切。上皆然之、差監登聞檢院。未幾、除將作監主簿、尋改太常。居頃之、有所不樂、因謁告歸省、請得奉祠終養。除知南康軍事、將行而遭內艱。未終制、有詔舉材堪刺舉者。吏部尙書鄭公丙以君對、然君已不及聞矣。其卒以淳熙九年六月乙丑、享年五十有五、積官至朝散郎。君爲人外和內剛、平居恂恂、如不能言者。而遇事立斷、毅然有不可犯之色。事繼母承順不違、兄弟之間怡怡如也。族黨有貧不能自活者、買田捐金以振業之。教其子與己子等、嫁孤女多得所歸。道遇棄子、募人母之、月有給焉。其爲政一主於愛民、而憂國之心又甚切、於賢材之用舍、政令之得失、一有所聞、憂喜之誠形於言色。至或累日不解。然自處甚約、自律甚嚴、在州縣未嘗屈意上官、在朝廷未嘗造請當路。繇疏賤一旦見天子、

盡言竭忠、未嘗少爲迂回避就之計。其爲學自聘君朝奉時已傳其業、後更從舅氏太子詹事陳公良翰受書焉。聞人之善、必手記而心慕之。其人可見、雖少賤僻遠不憚。其與予遊、相好尤篤也。晚名其燕居之室曰克齋、讀書其間、沒身不懈。後生執業就正者、皆賴君知所鄉。而君未嘗少自足也。此其志豈可量哉。予前年守南康、朝廷以君與予善、除以爲代。予亦日夜望君至、冀得用疲忙學子爲寄、而君不果來。當年奉使浙東、聞新剡饑民轉入台境甚衆、亟以屬君。君即慨然以爲己任、其得免於饑凍捐瘠而歸者蓋數百人。然其後予以事至台、則已不及見君而哭其殯矣。嗚呼悲夫。君之配朱氏、劉氏、李氏、皆贈安人。姜氏、封安人。子男四人、繼微、繼喩、繼善、繼周。女五人、長適范籍、次許嫁商月卿、餘尙幼。君爲文明白徑切、似其爲人。然非有故、未嘗作。今有文集十卷藏於家。所集周易、大學、中庸解又數十卷傳學者。繼微等將以十



儒藏

宋儒碑傳集 卷一三一

二月庚申葬君龍谷山雲溪先塋之側使來請銘時予已病歸卧故山念不得往而祖君之行也乃叙其事而銘之其詞曰

予悲斯人之病而莫與瘳也悼斯學之孤而莫與儔也又哀君之有志而久不酬也時若可俟而君不留也龍谷之城雲溪之宅詔彼茫茫不在斯刻

朱熹撰 《晦庵先生朱文公文集》卷九二

校記

①實：原作「亦」，據宋浙江刊本《晦庵先生文集》改。

②元：右引作「允」，下文同。

③宦：原作「官」，據右引改。

④宦：原作「官」，據右引改。

⑤宮：原作「官」，據明祁氏澹生堂抄本《周文忠公集》

改。

⑥坐：原脫，據右引補。

⑦身：原作「生」，據右引改。

⑧白：右引作「田」。

⑨「康」下原衍「王」字，據四庫本《誠齋集》刪。

⑩「以」原脫，「汙」原作「汗」，據右引補、改。

⑪藏：原作「臧」，據右引改。

⑫倡：原作「昌」，據右引改。

⑬貸：原作「貨」，據右引改。

⑭與：原作「興」，據右引改。

⑮冥：原作「宜」，據右引改。

⑯官：原作「宮」，據右引改。

⑰鹽：原作「監」，據右引改。

⑱宦：原作「官」，據右引改。

⑲別：原作「則」，據右引改。

⑳法：右引作「法」。

㉑幼：原作「幻」，據右引改。

㉒輩：右引作「篇」。

㉓議：明祁氏澹生堂抄本《周文忠公集》作「請」。

㉔辰：原作「承」，據右引改。

㉕青：原脫，據右引補。

㉖「葆」下原脫「光」字，據《省齋文稿》卷三三《靖州推

官張君廷傑墓誌銘》補。

宋儒碑傳集卷一百三十二

何鎬 鮑俊德 劉靖之 李祥 羅維藩

吳翌 滕洙

何叔京墓碣^①銘

邵武之東百里而近、七臺之麓、小溪之濱、有君子者、曰何君、名鎬、字叔京、予獲從之遊、相好也。今年冬、過予於寒泉精舍、留止浹旬、歸而屬疾。既病、則手書來告訣、語不及私、獨以不獲^②終養、卒學爲深念、而於當世之慮亦眷眷不忘也。時予別君甫踰月、發書驚歎失聲、亟走省焉。至則君已逝矣。既入哭、盡哀、明日、君之親友門人以予至、皆復來會、哭相弔、議語葬故。君嗣子琰亦衰經杖出拜伏哭、固以銘墓爲請。予惟君實以其死累我、今其子又哀以請如是、其何說之辭。則與諸來會者共訂君事、皆曰：君家臺溪、且數世^③。世有隱德。至君皇考諱兌始仕、爲左朝奉郎、通判辰州事。娶陳氏、劉氏、林氏、鄧氏、皆封安人。而君

劉^④出也。生孝謹、有器識。既出就傅、暮歸則不復去親側。誦書日數千言、爲文敏而有思、趣尙高遠、識者奇之。辰州嘗受程氏中庸之學於故殿中侍御史東平馬公伸、服行不怠。又以其忠節事狀移書太史、忤秦檜、下吏竄南方。危死不恨、間復悉以其所聞者語君。君既受其說、則益務貫穿經史、取友四方、博考旁資以相參伍。蓋久而後有以自信之。於是一意操存、杜門終日、澹然若無所營者。至其論說古今、指陳得失、則又明白慷慨、可舉而行。平居崇德義、厲廉節、絕口未嘗及功利。至^⑤於收族恤孤、興事濟衆、則又^⑥懇惻憂勞、如己嗜欲。言行相循、沒身不懈。由此南州之爲程學者、始又知有馬氏之傳焉。始用辰州致仕恩補官、授泉州安溪主簿。未赴、鄧舅祚帥江西、辟掌書寫機宜文字。再調汀州上杭丞。數^⑦行縣事、專用寬簡爲治。白^⑧罷稅外無名之賦、人便安之。部使者鄭君伯熊名好士、行部得君、喜甚。顧郡事爲不理、囚繫



儒藏

或累歲月不得釋檄君佐其守。君入幕悉取文書閱視具得其所以然者持白守決遣之旬日^⑤皆盡。又以田稅不均貧弱受病夙夜疚^⑥思爲所以均之之說甚備。他所以彌縫補助者亦盡其力。而守顧不悅君即謝去。君事鄧安人素謹其赴上杭也安人以瘴毒爲憚君不敢請遂單行。至官歲以公事一再歸省每行輒不受俸秩滿計其月十有四悉歸其券於有司。一時學士僚友高君學行多師尊之而當路鮮識之者君固不求亦不自悔獨以年格循資調潭州善化令將行而卒年四十有八。淳熙乙未十有一月丁丑晦也。君爲人清夷恬曠廉直惠和談經論事簡易條暢所著書有易論語說史論詩文數十卷其言多^⑦可傳者。晚築書堂所居南坂上名以高遠用見己志。疾病召子弟教戒一以義理終不及家人生產事。獨曰治喪以禮勿用浮屠鬼教亂吾法而已。娶同郡李氏其叔父郁學於龜山楊公所謂西山先生者

也奉君命無所違^⑧將以明年某月日葬于臺溪東楊之原。子男三人琰爲長次璣瑀女三人長適吳大同次適馮棟次未行也。諸君所論君行事如此皆予所聞知。琰等葬君東碭之原予既書其最納竈中然間嘗竊目君學行可以司教育論議可以陪獻納而其心誠才實又可以宣德澤而惠鰥寡今乃僅得一縣令而又不及試以死此爲重可哀者乃復叙次其詳刻石表墓且系以銘。銘曰

清直而溫夷易而^⑨方惟學不懈厥猷以光孰啓于家而尼于邦孰豐其粹而嗇其長帝罔弗衷氣或交沴^⑩既欽厥承君則奚愧莫尊匪德莫久匪言銘以相之刻石墓門。

朱熹撰 《晦庵先生朱文公文集》卷九一

知縣何公壙誌

君姓何氏諱鎬字叔京邵武軍邵武縣人父諱兌左朝奉郎母陳氏劉氏林氏鄧氏皆封安人而君劉出

也。以朝奉公致事恩補將仕郎、更授右迪功郎、泉州安溪縣主簿。辟江南西路安撫司書寫機宜文字、調汀州上杭縣丞、陞從政郎、潭州善化縣令。未上、以淳熙二年十一月丁丑晦卒于家、年四十有八。娶同郡李氏。子男三人、琰、璣、瑀。女三人、長壻吳大同、次馮棟、季未行也。君天資夷曠、廉靜寡欲、有過人者。始朝奉公學於故殿院東平馬公伸、受河南程氏中庸之說、篤信力行、沒身不怠。而君又得其傳、培植從容、克篤前列。佐邑有惠愛、著書數萬言。琰等將以四年三月某日葬君臺溪東碭之原、其友新安朱熹爲識壙中如此、且將叙次其詳、以表于墓上云。

朱熹撰 《晦庵先生朱文公文集》卷九四

鮑明叔墓誌銘

友人鮑氏明叔將葬、其子萬里、萬石、萬容踵門再拜求銘于余、余爲之悲。始余數歲時、侍二兄從李先生若訥學、明叔亦與其兄德光受業于門。旣冠矣、余兄

弟皆以兄事之。明叔二十六而入太學、猶時時相過、友誼日篤。隆興改元、試南宮、明叔與鄉人張伯玉璧、王彥方敦義同邸、余與從舅汪公刪定求分□以處、而舅甥偶在選中、今又二十四年矣。回首舊遊、德光與伯兄俱蚤世、伯玉亦不祿、彥方止于一尉。淳熙十年春、仲兄與余護先君之喪歸自嚴陵、明叔來弔甚哀。未幾、聞明叔之訃、爲之失聲。又兩月而仲兄不幸、甲辰之冬、刪定亦亡矣。憂苦之餘、親朋凋喪、俛仰感觸、尙忍言哉。明叔之亡也、余方在苦山中、不得摩其棺一慟、今其可銘。君諱俊德、字日新、明叔其少時字也。世居明之奉化。曾大父遂良、大父智、俱不仕。父璿、以君故、該慶典、封迪功郎。母江氏封孺人。大父力穡起家、迪功愛二子之敏、入城就師友、能相勵勉、洛誦聲徹夜旦不休。賦篇素工、兼長于書。多記經史子傳之文、喜爲人講說、纒纒可聽。以其餘力爲詩詞、發語清麗、倡酬無虛時。君性端重簡出、自奉隨力、不爲異。



藏

三兄繼歿、獨任仰事俯育之寄。經理生事、米鹽靡密、處之裕如。與人交關、務適其平。門戶雖大、若無事者。孝謹和易、率子弟以學、延名儒訓督之、皆嶷嶷自立。君尤篤親故、見單寒者親解衣以遺之、無德色。間有造門、觴豆留連、談笑彌日不倦。庠校二十年、閱人甚衆、交情終始、無纖芥之間。儕輩或致位通顯、曾不以毫末干請、人尤敬愛之。兩上禮部、竟以不售。病且革、戒其子毋爲禴禴事、遺言琅琅有序。三月六日卒、享年纔五十有六。嗚呼、可哀也已。娶丘氏女一人。孫男二人、長曰初、幼未名。孫女一人。諸孤卜地于嵩溪王奧祖塋之側、以十四年正月己酉襄事。銘曰、吁嗟明叔而止于斯。少也篤學、幾忘寒飢。足用輟稼、日侵腦脂。勵志愈確、期用于時。命之不淑、十上空歸。孝友衆知、月評則推。有子克家、尙其似之。我作銘詩、維後之貽。

樓鑰撰 《攻媿集》卷一〇一

教授劉君墓誌銘

前贛州教授、開封劉君靖之、淳熙五年四月二十四日、以疾沒於家。後三月、其弟前太常寺主簿清之、葬君於廬陵先墓之側、書來請銘。頃予居長沙、聞章貢有學官始至、登講肄之堂、視其旁列繪像凡五六、皆近歲太守、部使者、即日撤去、進諸生而告之曰、若亦知濂溪周先生嘗通判是邦乎。先生百世師也、學者所當尊事。於是以其處爲先生祠、使誦習其書。問其姓名、而知君之爲賢。今得清之所寄行錄一編、大抵皆贛之士紀述君之言行。謂君之教人、首務正其趨向、月校其士以行義爲先、視其文論治道而尊管商、談學問而涉佛老、言時事而忘讎敵者、必痛抑力排之。終日坐直舍、雖休沐亦或不出。講質問辯者相踵、與之反復無少倦。有一善輒屢獎而申勸之、有不善爲之愀然曰、吾教之不至也。以故多所感動、凡學之事、小大悉有條理。致其鄉之老成者、使分教席下、向



有濫居其職者輒漸自引去。士爭趨於學。益市書它州使之讀。而丐增其廩以食之。自太守、部刺史以下見其懇惻、無敢有紊其學政者。故君得以行其志。贛之士知有爲己之爲重、恥言利而趨於義。君之教爲多。故其去官、爭欲留之而不能。比其死、奔走往哭、又爭爲紀其言行、欲其有傳。夫豈偶然也哉。予於是而歎君雖在下位、而能不苟於職如此、且觀其所以教而知其志之遠且大也。則爲按其錄而書之。君字子和本臨江人。五世祖太子太保式自臨江歸京師。曾祖敦、故朝議大夫、贈太中大夫。祖武賢、故承議郎。考滌、故通直郎致仕。母趙氏。君資稟冲淡而溫厚。中紹興甲戌進士第。初任吉州司戶參軍、兼掌獄事。即不爲詭隨。更尉邵武。上官文符之下、有病民者不輕以行。及得贛學教授。待次凡五年。益用力於經史、講論先覺師友淵源。及其居官、則推己之所從事者而與其士共之。秩滿改官。遭繼母裴氏憂。未及禫。而君

死矣。病且革、戒其家曰、喪事勿用異說。享年五十有一。娶趙氏、有子曰仁季、女一人。惟劉氏自國朝開基以至於極盛之際、世有顯人、名在國史、忠厚雍睦之風相傳、以至於今、世系益遠、而家法不衰。君之兄弟又能克篤其敬、相勉以道義、藹如也。大家子孫能世守如此者、其亦鮮矣。予雖未識君兄弟、而與君之弟相與書辭往來、有講論之好、來求銘君墓至五六辭、甚苦、有不得而辭焉。銘曰、

世之論者以郡教授爲不急之官、以予觀之、使得其人、則於其州可以成才而善俗、顧不急哉。贛之學自紹聖間有賢者曰李朴先之、實臨其官、今八十有餘年矣、而士猶稱之不衰。及君、又見稱曰、是可繼先之也。豈不賢哉。予故表而出之。

張栻撰 《新刊南軒先生文集》卷四〇

劉子和傳

劉子和者、江南人、名某。五世祖式、仕太宗朝爲某官、

國史有傳。夫人陳氏有賢行遠識。子孫多爲聞人。海陵胡瑗先生所爲紀墨莊者也。至子和之父某官稍不遂。然亦好學脩飭。能守其家。娶長垣趙氏。實吳興孫侔先生外孫女。讀書能文。生子。和。和爲人廉靜寡欲。敦重少言。而和易端粹。不爲崖異之行。其家居孝友尤篤也。自少即以經學文行知名。中進士第。調吉州戶掾。邵武尉。皆能其官。更調贛州教授。還家待次。益以諸經自課。日求其所未至者。蓋自音讀訓詁先儒之說。以及近世先生長者之論。無不該貫。及至官。視其學故。有趙清獻公祠。後廢。而生祠郡守。部刺史至五六人。子和曰。趙公與濂溪先生法皆當得祠者。今或廢於已舉。或初未嘗立也。彼紛紛者。果何爲哉。命悉撤去。而更爲二公之祠。諸生請曰。趙公則聞耳矣。敢問濂溪何人也。子和具告之故。且出其書。使之讀之。諸生固已風動。於是子和又益推本其說。以發明六經論孟之遺意。晨入寓直之舍。諸生迭進問

事。子和諄諄辨告。如教子弟。至暮乃罷。日以爲常。其教大抵以讀書窮理爲先。持敬脩身爲主。曰。此古人爲己之學也。至於學官程課。有不可廢者。其命題發端。必依於是而出焉。於是學者益知所向。其言行小不中理。服飾小不中度。必規正之。課試之文。以老佛論道。以管商議政。忘讎耻。徇時俗者。皆棄不錄。於是學者又知所懲。其於有司之事。所以謹出內。窒罅漏者。亦皆精審嚴密。間斥其贏。以市圖史。至若干卷。視諸生老者。優禮之。貧者周給之。疾病者與之藥。死喪者加之賻。所以恩勤之者甚備。至於進退取舍之間。則必考行能。視次第。稽諸公論。而未嘗有所私也。以故諸生之事子和如事父兄。服習其教而守行之。俗爲一變。其浮惰不事學者。往往引去。或亦悔前所爲而革心自新焉。郡縣吏皆怪。以謂學官弟子比無入官府辯訟請謁者。父老皆喜。以謂吾家子弟比無荒嬉惰游。還家覓錢叫呼犯上者。以至士大夫家亦爭



遣子弟來入學、贛之人至咨嗟相與言曰、吾邦自李先之教官、迨今七八十年、乃復得劉君耳。今翰林承旨周必大聞之、爲記其說於聽事之壁。子和既去、改宣教郎、遭繼母喪以卒。故諸生哭之皆失聲、益相與尊其言、信其道、守其法不變、去而從其弟清之以卒業者亦數人。子和平日閉戶讀書、不甚與人接、雖名士亦不強附、而搢紳先生多慕與交。國子祭酒蕭之敏嘗以經行氣節薦於朝、成都劉焯稱之曰、國朝鉅人門戶、一再世凋落者何可悉數。惟劉氏自太宗時歷嘉祐、元祐盛際、莫不有人。逮子和兄弟、世數益遠、而家法益峻、忠厚雍睦之風不墜。求之故家、能如是者少矣。及卒、丹稜李燾書其墓曰、孝敬劉君、而廣漢張栻爲刻銘納壙中。是數君子者、蓋或未嘗識子和也。新安朱熹曰、自周之衰、司徒樂正之官廢、爲士者未嘗知有學也。士未嘗學而強使教焉、則其所以教者可知已。予亦不及識子和、而識其弟、且得贛諸生

所記讀之、觀其所以修於身、行於家者、而知其所以教於學者有餘矣。使得其年、究其施、則其所立豈可勝道哉。爲之掩卷太息、因刻其大者著于篇。

朱熹撰 《晦庵先生朱文公文集》卷九八

國子祭酒贈寶謨閣待制李公墓誌銘

李公名祥、字元德、曾祖遠、祖通、父贈中大夫揚常州無錫人。隆興元年登進士第、主錢塘縣簿。皇城司妄告密、威脅吏成其罪。武臣子謗訕、鞫於臨安。公偶攝錄參、亟閉獄戶、邏者求入、吏白舊例得監視、皆不許。既而所告無實。知府姚憲驚曰、上命無實乎。公謝曰、即坐譴、自甘。憲曰、上何知是君。公曰、尹言過矣。上至明、豈重邏輕尹哉。小人姦罔、宜有懲艾。憲具論如公意。上駭曰、朕幾誤卿。吾爭臣。遂賜憲出身、爲諫大夫、預政矣。調濠州錄事參軍。安豐守冒民田、訟屢改、監司以委公、還之民。未幾、其人易守濠、換司理廬州。守出、改官奏爲勸留者、公曰、無吝民田、幸矣。薦何敢。主

管戶部架閣文字、太學博士、國子博士、司農寺丞、樞密院編修官、兼刑部郎官、大宗正丞、軍器少監。言、忝蹟八年、外賢材不勝衆、願更出迭入、由臣始出、提舉淮東鹽、淮西運判入、郎倉部、檢詳樞密院諸房文字。兩淮鐵錢比不定、大商喪億萬、浮細失什伯、且亂。公再疏乞官賜錢米銷濫惡者、廢定城、興國、漢陽監、更鑄紹熙新錢、從之。淮人以安。遷國子司業、宗正少卿、國子祭酒。慶元元年二月、丞相趙汝愚免。公爭議曰、頃壽皇崩、兩宮隔絕、喪無主、留正棄印亡、國命如髮。汝愚不畏滅族、決策立陛下、風塵不搖、天下晏然、社稷之臣也。奈何無念功誠意、忽體貌常典、精忠巨節、佛鬱黯闇、何以示後世。除直龍圖閣、湖南運副。言者怒、劾公罷之。於是太學諸生楊宏中、周端朝六人固留公、併得罪。悲夫。禍所從來遠矣。世方紂道學、而柄路艱用材。周丞相執政久、士多貌若願、不心與也。伎者已怨、相與擊逐。喜曰、道學散羣矣。趙丞相特用材

銳甚、清官重職、往往世所標指、謂道學者、伎者尤怨。幸其有功、生異起說、枝連葉綴、若組織然。謗成而趙公亦逐、則又喜曰、道學結局矣。凡經趙公識面坐語、無不迹絕影滅也。蓋道學於公、塗問巷揖、無及門之款。趙公於公、序進次補、無踰級之遷也。一旦正色抗辭、殄行讒說、猶螫蟲之遇震霆、莫能測焉。何哉。冲然無去來而爲心者、公心也。漠然無重輕而爲言者、公論也。公本於公心、以發公論、趙公之誣賴、以明道學之禁賴、以解殆天意、非人力也。既歸無錫、客或扣前語、掉頭不對。常時祿入、緣手散親舊、悉盡。家人憂之。更賣田、起宅數間而已。再主冲佑觀。再請老、以直龍圖閣致仕。嘉泰元年八月十八日卒。年七十四。夫人戴氏、有淑行、能助公爲施者也。十月十四日、葬開元鄉華嶧村。山曰橫山。明年戴氏歿、合于墓。子曰綸、先卒。曰維、某官。曰約、某官。婿曰趙繹、某官。孫曰慤、曰愈、曰思、孫女四人。其後上旣於趙公備褒卹之禮、謚曰



忠定而公亦贈寶謨閣待制、賜諡肅簡焉。公義順而理和、填唱箴應、璋判圭合、得於自然。是非邪正、豫定於心、不待擇而知。趨捨避就、行其所安、不待辨而明也。古今歎材難有二、不能必行、難也。不能必言、難也。能必行者、執政大臣之選也。能必言者、諫官御史之選也。今人共稱趙公事、是其一驗爾。其言於孝宗曰、唐虞稱盛治者、君臣和也。今猜防收攬、雖幹官亦親擢、陛下不和也。政事堂多存形迹、不肯協同、輔相不和也。大將宿衛、當清苦孤立、今黨援封殖、大殘也。閹佞給使、當沈伏奔走、今名聞鼎貴、大賊也。騎淮常作過、扞邊何有。而長此隳信誓。武舉試七書、韜略安在。而重此輕儒臣。箴痛過砭石矣。又特奏五劄子、故淹緩晷刻以廣上意。余以是知其能必言也。言恢復衆矣、未有循其本者。公言、預買四十餘千、秋苗斛兩大碩、秬麥尤重、經總無名、本先撥也。皆曰不可損。今歲損一二、來歲損一二、不可乎。爲博士、爲寺丞、爲編修

官、爲提舉、朝辭始終一志、前後一念、皆復讎也。氣泰神靜、本末有序、余以是知其能必行也。然而其上不爲執政大臣、其次不爲諫官、御史、材非果難也。銘曰、超天門之嶮峨兮、衆外逐而俯諉、奚夫子之並登兮、獨內秉而塞淵。建驚世之華旗兮、載駭俗之高軒、遏讒慝之橫潰兮、扶忠良之璿艱。訊曰、山浮蒼兮水涵清、深復深兮窈斯銘。

嘉定十三年六月日。

葉適撰 《水心文集》卷二四

羅价卿墓誌銘

予外舅羅公天文以詩學鳴政和間、爲橫舍明師。自天文至其曾孫瀛、繼繼里選者十有二人、策第者六人。元亨、仲謀父子仕皆不達、至价卿其文方昌、其德方茂、其聞方焯。士友謂大天文之家在是矣。年五十有二、淳熙八年正月望一疾而卒、天乎痛哉。初、价卿父子同薦名、而价卿爲詩學舉首、再舉與兄弟六人

同升三舉擢進士第。未擬官、居父憂、復居母憂、毀瘠逾制。除喪、授迪功郎、南雄州保昌縣尉。始至、湖北寇逸入江西、將犯廣東、提點刑獄司業林公光朝宿重兵南雄禦之。价卿謁曰、南安前章貢後、賊來南雄、將焉寄徑。惟韶州仁化、其徑有三、曰珠子嶺、曰九曲嶺、其險可守。曰芙溪長岡、其地坦夷、寇所必趨。盍遣一軍爲覆以待之、可憐也。林公從之、賊果至、大破之。廣東轉運司厥貢惟銀、異時歲以緡錢十五萬市於州縣、近歲止給三一、官無自出、始以民產高下征之、民弗堪。適林公遷轉運副使、价卿謁曰、緡錢日賸而銀如初、不剝民焉取之。盍請諸朝、使盡給異時緡錢之數、則一路蒙福。林公嘉歎、即席草奏薦之公車。韶之樂昌有眚、詣部使者、言其令盜所臨。部使者怒、遣价卿廉之、至則以無罪告。部使者疑其有所左右、移价卿乳源尉、下其事司敗。凡三易官、典理其獄、令竟得釋。秩滿造朝、見丞相衛國史公浩、極論二廣煮海改

法之弊、請一用舊章。又作平邊策、論戰守、疏民瘼。欲興內治、以俟天時。丞相奇之。用薦者陞秩從政郎、調監行在省倉中界門。既歸、日聚族子弟尊酒論文、澹如也。官期將及、未赴而卒。价卿性簡而厲、言動從繩、靜以禦繁、勇以行義。里閭族黨欲辨曲直、有不之官府而之价卿者、一語曉之、聞者意沮。其猶子子琳與劉振英貧而無教、則迪之以文。其鄉曲小民以饑歲不能自給、則書其名數而廩之以粟。二弟曰維申、曰維翰、皆自幼教之。既而維申薦名、維翰與价卿同日擢第、人咸曰价卿之教。父之既沒、悉舉先疇以遜二弟。曰、堇堇足矣、奚以多爲。廬陵縣令梁君兌聞之、爲文以風流俗。而二弟亦固辭不受、盡以給族親之貧。時稱義門云。价卿居官、秋毫不苟。保昌學宮燬無尺椽、亟白縣令啓度一新。春秋釋菜、禮用無曠。講武營表、鞠爲枳棘、擘張通播、存者十五。价卿既至、習射有亭、築場有垣、逋者來歸、旗幟精明、見謂稱職。



价卿諱維藩廬陵人。曾祖仇祖紉字天文。父上達字元通。母季氏。娶蕭氏。男一人。解弱冠與里選。女一人。適進士楊奎。予叔父麻陽知縣子也。女孫一人。尚幼。有古賦二卷。詩十卷。史論二卷。平邊策四卷。詩解二卷。左傳說二卷。論語解二卷。雜著六卷。棣華集二十卷。目曰印山集。卒之歲十二月庚申。解奉价卿之喪。葬于吉水縣鄉曰同水。原曰體泉。前事來請銘。予泣曰。予出入舅家三十年而^②。銘元通。元亨。元忠。仲謀矣。今又銘价卿乎。銘曰。

惟文惟德。后帝所畱。多取奚益。汝文斯絕。汝德斯碩。汝聞斯白。探珠既獲。歸覲其宅。則毀其壁。而祖之澤厥世有奕。尚瞑汝窆。

楊萬里撰 《誠齋集》卷一二九

南嶽處士吳君行狀

君諱翌字晦叔。世爲建寧府建陽縣忠孝里人。曾祖惻祖深。父從周。皆不仕。君早孤。踰冠。遊學衡山。師事

五峰胡先生。聞其所論學問之方。一以明理修身爲要。遂捐科舉之學。曰。此不足爲吾事也。先生既沒。又與先生之從弟廣仲。從子伯逢。門人張敬夫遊。既誦其所聞於先生者。而又上稽前古聖賢之言。中覽前世儒先之論。下引四方朋友之說。參伍辨訂。去短集長。其左右出入。雖不專主於一家。然其大要以胡氏所傳爲宗也。其爲人忠信明決。通微曉事。教撫諸弟。曲有恩意。與人交表裏殫竭。心所不安。告語切至。而不失其和。以是朋友多賴其益而樂親之。雖或不能從。而亦不厭其言之盡也。衡山人葉公賢君爲人妻。以其女。君因教其子定。使知所趨。又見之敬夫而俾受學焉。定以是爲修士。鄉黨稱之。張氏門人在衡湘者甚衆。亦無不往來。從君參決其所疑者。長沙故有嶽麓書院。國初時。郡人周式爲山長。教授數百人。後更變亂。院廢而山長罷。五峰方辭秦氏禮命。時嘗請爲之。不報。乾道初。帥守建安劉公珙始復立焉。猶虛

山長不置。至是轉運副使九江蕭侯之敏始以禮聘君請爲之。君曰：侯之意則美矣，然此吾先師之所不得爲者，豈可以否德忝之哉？卒辭不能。蕭侯亦高其義，不強致也。時君方買田築室於衡山之下，有竹林水沼之勝，因取程夫子澄濁求清之語，榜之曰澄齋。日與賓客從容其間，講道讀書，間出詩篇以咏歌其所志，蓋翛然有以自樂。然不數月而病不起矣。淳熙四年八月三日也，享年四十有九。

君娶葉氏，生一男，曰傳，纔六歲。一女，亦尙幼。君既沒，葉夫人以君遺命請於其父，使弟定與君之外弟游霖、游彰等以九月三日葬君衡山之東梅橋之原。於是君之外弟游彬居故里，踰月而後聞君之喪，泣而言於熹曰：吳兄之終，彬獨以遠，不得奔走其葬。今將狀兄之行，而請文於桂州張先生，以表于墓，願吾子之文之也。熹於晦叔有朋友之誼，不可以辭，乃論其行事始終大者如此，以備采擇。然敬夫與晦叔學同

師，居同郡，其遊久於熹，所以知之必將有深於此者，請并列而具刻焉。謹狀。

朱熹撰 《晦庵先生朱文公文集》卷九七

滕府君行狀

君諱洙，字希尹，姓滕氏，世家徽之婺源。其始不知何自徙居熙寧中，君族叔祖循州興寧縣令申遊京師，見龍圖閣學士東陽滕公達道，叙家世，知東陽婺源之滕本出一族，而至其所由合散，亦不能言也。君曾祖谷，祖爲父恂，皆不仕。君未冠而孤，自力學問。叔父信州司戶參軍愷，儒學決科，嘗從豫章羅公仲恭，其弟叔恭，傳眉山蘇氏之學。又從神崧呂公節夫及其弟仁夫，傳伊洛程氏之學，皆得其旨。文詞卓偉，聲名動一時。君幼聞家庭之訓，已知所趨嚮。鄉先生有俞靖，宋祐者，多見前輩大老，學有師承，亦司戶公之師友也。君復從之。又從它知名士俞允若、順卿、李繪、參仲、江介、邦直、汪廷祐子卿及洵先君子，磨礱浸灌，久



益完粹。尤好春秋左氏傳、對客論事、或援證至數百言不休、於他書亦口誦手抄勤甚。其爲舉子之文、精緻有程度、然以試有司、輒不利、因棄去不復作。久之、二子璘、珙浸長、知讀書、乃以所學授之、曰、是庶幾能成吾志者。時晦翁先生朱公方倡道閩中、即使璘、珙以書自言願受業於門。朱公見書喜、復之曰、學者患不知所歸趣、與所以蔽害之者、今旣知之矣、誠能於聖門親切之訓、心念而躬行之、漸涵旣久、心定理明、將自有得。二子得書、佩服惟謹。君又時時誦其語、戒之曰、勿負先生所以期汝者。及朱公還里中、二子曰、往從之、質疑問難、歸輒疏所論於紙、君見之、曰、非先生意也。先生誨汝時、豈不曰、心念躬行、將自有得乎。二子感悟刻勵、及擢第、守四方、則又日以異時里閭所見聞人情之誠僞、事理之是非、誨飭之、由是二子克自樹立、爲時所稱、由君所以教之、素有方也。晚得末疾、猶手抄孔孟言仁爲一編、日夕誦味、嘗大書壁

間、以自警曰、躬自厚而薄責於人。蓋其好學檢身、雖老且病、猶不倦如此。紹熙四年、病復作、夏秋浸劇、知不可爲、卻醫藥、不御書、子夏語示諸子曰、死生有命、富貴在天。居無何、遂卒、享年六十有五、實是歲七月二十七日也。夫人胡氏、與君同甲子、資溫淑、能順君所爲、以成其志。里人咨其賢、前君一年卒。五男子、璘、珙、瑀、琇、璚、從政郎、鄂州州學教授。珙、迪功郎、寧國府旌德縣主簿。琇、瑀皆業進士。琇前卒。二女子、適程萬頃、程樵之。七男孫、五女孫。君爲人恭儉好義、遇人無少長、俛首接語、如見大賓。凡少年所爲、飲酒歌呼、饒樂放縱事、未嘗一接也。自奉菲薄、食不二味、無彫鏤之器、華輶之衣、苦節力行、終身如一日、不以豐約易其度。嘗有一士族女、年甫齠齔、家貧母病、父爲牙儉所欺、鬻之倡家。聞者不平、而莫能誰何、君獨憤然呼倡、儉許償直還女。倡陽諾、而實謀挾之以遯。君廉知之、亟訴諸官、未決、倡與儉謀僞契、增其直累數倍、

覬君憚費而止。君喜女得還，不復斥其僞，即謀所以酬之。然未有處也。會璘舉鄉貢，郡餽鹿鳴勸駕之金，即以取女還其家。縣令張安中聞之，擊節稱歎，書其牘，譽君良美。蓋雖居困約，猶自拔爲義。至他嫁親戚孤遺之女與矜其貧而恤之者，猶多，不能盡書也。洵之祖妣胡氏夫人與君母夫人兄弟也。胡夫人無恙時，嘗爲洵言：峨山府君既歿，子幼家貧，未有以葬。有地在縣西易潭上，術家以爲吉，而吾家未之知。一日，滕氏妹來省，從容爲我言，姊夫捐館，歲久未葬，聞姊家有吉地在易潭山，或囑我以重貲求之。我謂姊夫猶未葬，不許也。姊子弱，慮爲他人所誑，蓋早圖之。吾聞之，豐然遂以葬府君。今所謂峨山是也。因歎曰：是家有陰德，子孫其興乎？洵聞此時方壯歲，今又三十年矣，而君二子相繼取高科，叔季皆力世其家。夫人之言，於是可信。諸孤將以某年月日合葬君夫婦萬安鄉松巖里龍陂西四壯之原，書來求狀，君行將屬

名世之士爲之銘。洵既叙其大概，又因記祖妣語於其末，使覽者知君家之所由興云。謹狀。

程洵撰 《尊德性齋小集》卷三

滕君希尹墓誌銘

君姓滕氏，諱洙，字希尹，世家徽之婺源，蓋莫詳其始所自來。中間有見故翰林學士達道者，扣之，乃知與東陽之族同原，而亦不能言其遷徙合散之所由也。君曾祖谷，祖爲父，洵皆不仕，而叔父愷蚤以文學論議有聞於時，起進士，官信之戶掾，以卒。士友惜之。君幼聞家學緒餘，長從鄉先生俞君宋祐及一二知名士遊，益務記覽，其蓄甚富，爲舉子文亦精緻有程度。而數以不偶，即棄去，不復爲，獨教諸子爲學，而不專爲場屋計。平居厲以篤志力行之訓甚悉，及二子登科從仕，則又時時爲道平日閭里間所聞見情僞失得之變，以開曉風切之，以故二子皆以能自樹立有聲州縣間。晚得末疾，猶手抄孔孟言仁梗概一編，曰



夕玩誦而又大書躬自厚而薄責於人之語於壁以自警。其好學檢身雖老不倦如此。病革卻醫藥手書死生有命富貴在天兩言以示諸子而卒。紹熙四年七月二十七日也。年六十有五。夫人胡氏有賢行。前君一年卒。五男子。璘從政郎。鄂州州學教授。珙迪功郎。寧國府旌德縣主簿。璫理皆業進士。琇前卒。二女子。嫁進士程萬頃。程標之。孫男七女四。君爲人恭儉質實。遇人無少長。俛首接語。如見大賓。凡世所謂少年豪習。饒樂放縱事。未嘗一接於身。自奉甚薄。終身如一日。不以豐約易其度。居家事親誠心孝愛。委巷之禮。薄俗之態。雖於強之。不忍爲也。兩逢慶壽恩。或勸增年以應格。君不可。或問之。則曰。欺君而受爵。亦何榮之有哉。有士族女未亂落倡家。君謀贖之。倡僮知君貧。立僞券高其直以難之。君未有以爲策也。會璘預薦書。郡致金錢若干爲勸駕禮。盡以予倡。得女嫁之。不復詰其僞。縣宰張安中賢之。爲書其牒以表

焉。君之爲人大抵如此。嗚呼。是亦可謂善人君子矣。然其志與材既不得少自見於當世。其壽命又不得究於高年。獨諸子既能順承其志。而又將有以顯揚之。則人或以是爲天之報施。果不繆也。璘等將以明年五月二十四日合葬君。夫人於萬安鄉龍陂四牡之原。使珙奉吉州錄事參軍程君洵之狀以來請銘。余以疾病久衰。謝不能。而珙請益堅。余竊哀之。乃爲次其事而銘之。銘曰。

行之躬。學之力。積之豐。施之嗇。謂天夢夢。請視斯刻。

朱熹撰 《晦庵先生朱文公文集》卷九四

校記

- ①碣：宋淳熙刻本《晦庵先生朱文公文集》作「誌」。
- ②獨、獲：右引作「惟」、「及」。
- ③此句右引作「君家邵武七臺之麓小溪之濱也」。
- ④劉：右引作「林」。
- ⑤至：右引作「唯」。
- ⑥「則又」二句：右引作「爲無所愛其力而」。
- ⑦數：右引作「攝」。
- ⑧白：右引作「且」。
- ⑨日：右引作「月」。
- ⑩疾：右引作「究」。
- ⑪言多：右引作「間皆」。
- ⑫「奉君命無所違」以下底本差略，今從右引增補。
- ⑬易而：右引作「直以」。
- ⑭「氣或交沴」以下，右引作「氣則靡定。惟欽厥承，斯得其正。君乎知此，既順且寧。何以昭之，幽竊其銘。」

⑮變：原作「某」，據右引補。

⑯瑀：原作「某」，據右引補。

⑰禪：原作「禪」，據四庫本《南軒集》改。

⑱「瘼」下原衍「瘼」字，據四庫本《誠齋集》刪。

⑲興：原脫，據右引補。

⑳菜：原作「萊」，據右引改。

㉑「而」上原衍「甘」字，據右引刪。

Z126
18
3:3

[General Information]

书名=儒藏 史部 儒林碑传五

作者=杨仕文，舒大刚主编

页数=702

SS号=12315579

DX号=000007486408

出版日期=2005.05

出版社=四川大学出版社